


Mushug Testamento



New Testament in Quechua, Panao Huánuco (PE:qxh:Quechua,
Panao Huánuco)

Mushug Testamento

New Testament in Quechua, Panao Huánuco (PE:qxh:Quechua, Panao Huánuco)

copyright © 2009 Wycliffe Bible Translators, Inc.

Language: Quechua, Panao Huánuco

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Quechua, Panao Huánuco

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

PDF generated using Haiola and XeLaTeX on 25 Aug 2023 from source files dated 29 Jan 2022
7054d98c-7632-5339-9ee8-560fc45d86cd

Contents

SAN MATEO	1
SAN MARCOS	55
SAN LUCAS	86
SAN JUAN	141
HECHOS	178
ROMANOS	226
1 CORINTIOS	252
2 CORINTIOS	274
GÁLATAS	288
EFESIOS	296
FILIPENSES	304
COLOSENSESES	310
1 TESALONICENSESES	316
2 TESALONICENSESES	321
1 TIMOTEO	324
2 TIMOTEO	331
TITO	336
FILEMÓN	339
HEBREOS	341
SANTIAGO	360
1 SAN PEDRO	366
2 SAN PEDRO	373
1 SAN JUAN	377
2 SAN JUAN	384
3 SAN JUAN	386
SAN JUDAS	388
APOCALIPSIS	390

Jesúspa willapanta San Mateo willacushan

Tantiyacunanchipaj:

Mateo cay libruta isquirbiran. Paypa juc-caj jutin caran Leví. Israel runa carpis, Roma marcapaj jillayta shuntaj. Chaypita Israel-masincuna chiquij. Chaypis purishinanpaj Jesús acracuran. Jesúsllawanna puriran. Cačhan cashpan jipataraj Jesúspa alli willapanta isquirbiran Israel-masincunata tantiyachinanpaj. Mateupita musyayta munar, liguinqui: San Mateo 9.9-13; San Marcos 2.3-17; San Lucas 5.27-32.

Unaypita-pacha Israel runacuna ñacayčhu juyar, juc Washäcuja shuyarpaycaran. Tayta Diosninchí aunish caran Washäcuja cačhamunapaj. Chaymi Jesús Washäcu cashanta Mateo musyachicuran.

Mateo isquirbiran:

Jesúspa auquilluncunapita, yurishanpita: *San Mateo 1.1-2.23.*

Jesús ushyacushanpita, Supay maquichacuya camashanpita: *San Mateo 3.1-4.11.*

Jesús willapäcushanpita, Tayta Diosninchí camacächiyninpa imatapis rurashanpita: *San Mateo 4.12-18.35.*

Judea quinrančhu Jesús willapäcushanpita: *San Mateo 19.1-20.16.*

Jerusalén marcapa aywar Jesús willapäcushanpita, Tayta Diosninchí camacächiyninpa imatapis rurashanpita: *San Mateo 20.17-21.11.*

Jerusalén marcačhu Jesús caycashanpita: *San Mateo 21.12-25.46.*

Jesústa wañuchishanpita, cawarachimushanpita, purishijnincunawan tincushanpita, paycunata cačhacushanpita: *San Mateo 26.1-28.20.*

Jesúspa unay auquilluncunapita musyachicushan

San Lucas 3.23-38

¹ Jesucristu caran mandaj Davidpa willcan, Abrahampa willcan. Canan Jesúspa auquilluncunata ricsicushun. Cay libručhu jutincuna isquirbiraycan:

² Abraham churiyäcuran Isaacta.

Isaacna churiyäcuran Jacobta.

Jacobna churiyäcuran Judáta,
waquin wauguincunatapis.

³ Judána churiyäcuran Faréstawan Zérata. Paycunapa maman caran Tamar.

Farésna churiyäcuran Esrónta.

Esrónna churiyäcuran Aramta.

⁴ Aramna churiyäcuran Aminadabta.

Aminadabna churiyäcuran Naasónta.

Naasónna churiyäcuran Salmónta.

⁵ Salmónna warmin Rahabéhu churiyäcuran Boozta.

Boozna warmin Rutčhu churiyäcuran Obedta.

Obedna churiyäcuran Jeséta.

⁶ Jeséna churiyäcuran mandaj Davidta.

Mandaj Davidna churiyäcuran Salomónta.

Salomónpa maman caran Uriáspa warmin.

⁷ Salomónna churiyäcuran Roboamta.

Roboamna churiyäcuran Abíasta.

Abíasna churiyäcuran Asáta.

⁸ Asána churiyäcuran Josafatta.

Josafatna churiyäcuran Joramta.

Joramna churiyäcuran Ocíasta.

9 Ocíasna churiyäcuran Yotamta.
 Yotamna churiyäcuran Ajazta.
 Ajazna churiyäcuran Ezequíasta.
10 Ezequíasna churiyäcuran Manasésta.
 Manasésna churiyäcuran Amónta.
 Amónna churiyäcuran Josíasta.
11 Josíasna churiyäcuran Jeconíasta.

Jeconíaspwa wauguincunapis caran.

Jeconías cawashan wican Babilonia runacuna Israel runacunata marcanman apacäriran. **12** Chay marcačhu Jeconíaspwa wamran Salatiel yuriran.

Salatielna churiyäcuran Zorobabelta.

13 Zorobabelna churiyäcuran Abiudta.
 Abiudna churiyäcuran Eliacimta.
 Eliacimna churiyäcuran Azorta.
14 Azorna churiyäcuran Sadocta.
 Sadocna churiyäcuran Aquimta.
 Aquimna churiyäcuran Eliudta.
15 Eliudna churiyäcuran Eleazarta.
 Eleazarna churiyäcuran Matánta.
 Matánnna churiyäcuran Jacobta.
16 Jacobna churiyäcuran Joséta.

Joséga Maríapa majan caran.
 Mariapita Jesúspita yuriran.

Jesústa ricsinchi: «Tayta Diosninchcaáchamushan Washäcu» nir.*

17 Abrahampita mandaj Davidcaman čhunca čhuscuwan (14) willcacaman runacuna miraran. Mandaj Davidpita Israelcunata Babilonia marcaman apashancaman yapay čhunca čhuscuwan (14) willcacaman miraran. Chaypita Tayta Diosninchcaáchamushan Washäcu yurishancaman yapay čhunca čhuscuwan (14) willcacaman miraran.

Jesús yurishan

San Lucas 2.1-7

18 Canan Jesucristupita tantiyacushun. Maríawan José majachacänanpaj parlanacush caycaran. Ichanga manasi yataptillan Espíritu Santu camacächiptinmi, María jishyaj ricacuran. **19** Mana yataycaptin María jishyaj ricacuptin, José jaguiricuya munaran. Payga Tayta Diosninchita sumaj manchapacuran. Chaymi runa washanta rimananta mana munar, pacayllapa jaguiricuya munaran.

20 Jaguiriyta munaptin, suyñuyllančhu Tayta Diosninchcaáchamushan anjil niran: «José, mandaj Davidpa willcan canqui. Maríawan majachacayta ama pingacuychu. Payga Espíritu Santu camacächiptin, jishyaj ricacusha. **21** Wamrangepis ullgu yuringa. Marca-masincunata jucha aparicuypta washanga. Chaymi: «Jesús» nir jutinta čhurapanqui.»*

22 Llapanpis camacaran Tayta Diosninchipa shimin čharcucänanpaj. Payga willacujnun unayna musyachicuran:

23 «Runa yatäni jipash jishyaj ricacunga.

Ullguta jishyacunga.

Jutintana čhurapanga: «Emmanuel» nir.

«Emmanuel» ninanga: «Tayta Diosninchcaáchamushan iwal juyan» ninan.»*

* **1:16** Washäcu ninanta griego rimayčhu: «Cristo» nin. Hebreo rimayčhuna: «Mesías» nin. «Mesías» nirsi, «Cristo» nirsi, Tayta Diosninchcaáchamushan washäcu paj tantiyachinanchi. Israel runacuna shuyararan jäpa runacunapa maquinpita washänanta. * **1:21** Griego rimayčhu: «Jesús» ninanta: «Yeshúa» nin. «Yeshúa» niptin, tantiyan: «Tayta Diosninchcaáchamushan» nir. * **1:23** Isaías 7.14.

²⁴ José puñushampita ricchapacurir anjilpa shiminta wiyanur; Maríawan majachacaran.
²⁵ Wamran manaraj yurishancaman Maríata mana yataparanchu. Wamran yuriptin: «Jesús» nir jutichaparan.

2

Tantiyaj runacuna mallwa Jesústa alliman ́churashan

¹ Judea quinran Belén marcachu Jesús yuriran. Judea marcacuna mandaj Herodespa maquinché caycaran. Chay wican inti jigamunapita Jerusalén marcacaman tantiyaj runacuna ́chayaran. Paycuna ima-imapaj istrilla cashantapis sumaj tantiyaran.
² Jerusalén marcachüna tapucuran: «Israel runacunapa mandajnin, ¿maychütaj yurisha? Marcápita-pacha musyachicuj istrillata ricamushcä. Chaymi ricsichimashan mallwata alliman ́churaj shamushcä» nir

³ «Israel runacunapa mandajnin, ¿maychütaj yurisha?» niptin, mandaj Herodespis, Jerusalén marca runacunapis mancharicäcuran. ⁴ Chaymi mandaj Herodes mayur cüracunata, Moiséspa shiminta yaćhajcunata jayachiran: «Tayta Diosninchí cačhamushan Washäcuj, ¿maychütaj yurinan casha?» nir. ⁵ Tapuptin, niran: «Judá quinran Belén marcachüshi. Chaychu yurinanpäshi unay willacuj musyachicur isquibiran:
⁶ Judá quinran Belén runacuna, waquin marca runacuna jatun-tucuptinsi, alli ricash canquipaj.

Marcayquičhu juc mandaj yuringa.

Paypa maquinché llapan Israel runa cawanga.

Uysha michij ricashan-jina llapanta ricanga» » nir.*

⁷ Chaura yaćhajcunata pacayllapa jayarcachir, mandaj Herodes tapuran: «¿Imaypitatanataj istrillata ricashcanqui?» nir. ⁸ Imaypita ricarishantapis willaycuptin, Belén marcacaman cačharan: «Mallwa ashij mä, ayway. Tarirga, nuwatapis willamanqui mallwata alliman ́churaj aywanäpaj» nir.

⁹ Chaura chaynuy niptin, Belén marcapa aywacuran. Maypa aywananpäpis ricarij istrilla ūapaparan. Ichanga mallwa yurishan marca ricänanchu ićhicuycuran. ¹⁰ Istrilla ićhicuycuptin, yaćhajcuna jatunpa cushicuran. ¹¹ Wasiman yaycur, Maríata mallwantinta tariran. Mallwanpa ūapanman jungurpacuycur, alliman ́churaran. Jipinta pascarir, cuyachicuynin jurita, insinsuta, pirjümita juycuran.* ¹² Chaypita suyñuñillančhu Tayta Diosninchí willaran mandaj Herodesman mana cutinanpaj. Suyñuñinčhu willaycuptin jucläpa tumarcur, yaćhaj runacuna marcanman cuticäritan. Mandaj Herodesman mana cutirannachu.

Egipto marcaman Maríawan José jishpicushan

¹³ Istrilla tantiyaj runacuna aywacuriptin, suyñuñillančhu Tayta Diosninchí cačhamushan anjil Joséta niran: «Jatariy. Warmiquitawan mallwata Egipto marcaman jishpicthicuy. Willaptiraj, cutimunqui. Mandaj Herodes wamrayquita wañuchinanpaj ashinga» nir.

¹⁴ Chaynuy niptin, José jataricurcuran. Chay chacaylla warmintawan mallwanta pushacurcur, Egipto marcaman aywacuran. ¹⁵ Egipto marcallačhu mandaj Herodes wañushancaman tiyacuran. Chaynuy ́charcunapaj unay willacujnинwan Tayta Diosninchí musyachicuran: «Egipto marcapita Wawäta jayamushcä» nir.

¹⁶ Chaura istrilla tantiyajcuna mana ́chayaptin, mandaj Herodes juyupa ullgucäcuran: «Istrilla tantiyajcuna llullapämasha» nir. Chaymi willashanta tantiyacurir, Belén marca quinrančhu iti wamracunata murucuncunawan wañuchiran. Ishcay watayujpita uraman llapan ullgu wamrata wañuchiran. ¹⁷ Chaymi willacuj Jeremíaspa shimin ́charcucaran. Jeremíasga unayna niran:

* ^{2:6} Miqueas 5.2. * ^{2:11} Mandaj cashanta yarpar, ćhaninyuj cuyachicuynincunata jararan.

¹⁸ «Ramá marcačhu tiyaj runacuna ataran.
Atashanta llapan wiyan.
Raquelpa wawancunata wañuchishanpita juyupa wagaran.
Wawancuna ushyacashanpita wagar amachaptinsi, mana ćhawaranchu.»*

Egipto marcapita Mariawan José cutishan

¹⁹ Mandaj Herodes wañucuptinna Egipto marcachu José caycaptillanraj, suyñuyñillanchu Tayta Diosninchí caáchamushan anjil niran: ²⁰ «José, jatariy. Warmiquita mallwantinta pushacurcur, Israel marcaman cuticäriy. Wamrata wañuchiya munajcuna wañucushana.»

²¹ Chaynuy niptin, José jataricurcuran. Warminta mallwantinta pushacurcur, Israel marcaman cuticuran. ²² Chay wican Judea quinranta mandaj Herodespa wamran Arquelao mandaycaran. Chaymi Judea quinranman chayaya José mana munaranchu. Tayta Diosninchipa anjilninpis suyñuñillanchu willaran Galilea quinranpana aywacunanpaj. ²³ Willaptin, Nazaret marcaman juyaj aywacuran. Llapanpis camacaran willacujcunapa shimin charcucänanpaj. Willacujcuna unayna nirán: «Washäcuja ricsingapaj: ‹Nazaret runa› nir.»

3

Jesúspita Ushyachicuj Juan willacushan

San Marcos 1.1-8; San Lucas 3.1-9, 15-17; San Juan 1.19-28

¹ Chaypita unayllata Judea quinran chunyaj pacha hu Ushyachicuj Juan ricariran.

² Llapanta willapár nirán:

«Juchayquipita wanacäriy.

Tayta Diosninchí jananchíchünam.

Maquinchünam purichimäshun.»

³ Juan willacuran willacuj Isaíaspa shimin ēcharcucānanpaj. Isaíasga unayna niran:

«Chunyajchümi juc runa jayacuypa willacuyca:

〈Taytanchi shamunanpaj camaricuy.

Caminuta pichay.

Wicsu caminucunatapis allchay.» *

⁴ Juanpa müdanan camíllupa ajchanpita caran. Sinturunninpis jarachapita caran. Chaynuypis chunyajchú tarishan chucluscunallatawan munti abijapa mishquillanta micuj. ⁵ Jerusalén marcapita, Judea marcacunapita, Jordán mayu rajra quinranpita runacuna Juanpa shiminta wiyaj aywaran. ⁶ Jucha aparicushanta mana pacaptin, Jordán mayuchu Juan ushyachiran.

⁷ Fariseu runacunapis, saduceu runacunapis ushyacuyta munar chayaran. Chaypis Juan niran: «Supaypa wawancuna, ushyacurpis juchallačhu aruptiquiga, Tayta Diosninchı ñacachishunquipämi. Mana jishpinquipächu. ⁸ Wanacushayqui musyacänanpaj Tayta Diosninchita manchapacur allillata rurar caway. ⁹ Ama chapacunquichu: ‹Abrahampa willcan caycanchi. Paypita Tayta Diosninchı alli ricaycämanchi› nir. Abrahampa willcan cananpäga Tayta Diosninchı rumitapis ticraráchinman wiyacuj cananpaj. ¹⁰ Ushyacurpis juchapita mana wanacuptiqui, Tayta Diosninchipis jargurishunquipaj. Yüratapis mana sumaj wayuptin, jächawan muturij-muturijllana shuyaranchi. Muturir, ninaman jaycurinchi. ¹¹ Juchapita wanacushayqui musyacänanpaj yacullawan ushyachiycay. Jucmi ichanga Espíritu Santuwanpis, ninawanpis ushyachishunquipaj. Payga munayniyujmi. Chaymi llanguinta apäshiyllatapis manchapacü. ¹² Juchapita wanacuncunata alli ñawinwan Tayta Diosninchı ricanga. Juchačhu arujcunatam ichanga mana

* 2:18 Jeremías 31.15. * 3:3 Isaías 40.3.

upij ninaman jaycuringa. Sumaj tantiyacärinquiman. Ríguta wapyarpis, punshanta ruparachin. Muruntam ichanga wasinman shuntan.»

Jesústa Juan ushyachishan

San Marcos 1.9-11; San Lucas 3.21-22

¹³ Chay wican Jesústa aywaran Galilea quinranpita Jordán mayuman Ushyachicuj Juan ushyachinanpaj. ¹⁴ Ushyachiya mana munar, Juan nirán: «Tayta Jesústa, mana ushyachijmanchu. Manchága ushyachimanquiman.»

¹⁵ Jesústa nirán: «Ushyachimay. Chayraj Tayta Diosninchipa shungun munashanta charcushun.» Chaymi Jesústa Juan ushyachiran. ¹⁶ Ushyacuriycur yacupita Jesústa llucshiriptin, janaj pachapa puncun quiáchacäcamuran. Espíritu Santuna paluma-jina Jesústan manchága ushyachimanquiman. ¹⁷ Janaj pachapitana nimuran: «Jesúsga cuyay Wawämi. Shungüman tincun.»

4

Jesústa Supay maquichacuya camashan

San Marcos 1.12-13; San Lucas 4.1-13

¹ Chaypita chunyaj pachaman Espíritu Santu Jesústa aparan Supay maquichacuya camananpaj. ² Jesúsga chuscu chunca (40) pagas, chuscu chunca (40) junaj micuya mana mallir, yargaranna. ³ Chaypita juchacachicuj Supay chayarcur, nirán: «Tayta Diosninchipa Wawan car, cay rumita tantaman mä, ticrarachiy.»

⁴ Jesústa nirán: «Tayta Diosninchipa shimin nin:
«Runa mana tantallawanchu cawan.

Manchága Tayta Diosninchipa shiminta wiyacurpis cawan.» *

⁵ Chaypita Jerusalén marcamanna Jesústa Supay aparan. Tayta Diosninchipa wasinpa siswanman ičhichiran. Jinarcur nirán: ⁶ «Tayta Diosninchipa Wawan car, pachaman mä, jigacurpu. Tayta Diosninchipa shimin nin:

«Anjilnincunata Tayta Diosninchichi cačhamunga washäshunayquipaj.

«Chaquiqui rumiman mana tacacunapäpis maquinwan charishunquipaj.» *

⁷ Jesústa nirán: «Tayta Diosninchipa shimin nin:
«Tayta Diosninchita maquichacuya ama camanquimanchu.» *

⁸ Chaypita jatunnin puntamanna Jesústa Supay aparan. Jatun marcacunata imaycancunatawanpis ricachiran. ⁹ Jinarcur nirán: «Ñaupäman jungurpaycur alliman churamaptiqui, llapan marcäcunata juycushayqui. Maquiquíhu purichinquipaj.»

¹⁰ Jesústa nirán: «Washata ayway, Supay. Tayta Diosninchipa shimin nin:

«Tayta Diosnillanchita manchapacunquiman.

Paypa maquillančhu cawanquiman.» *

¹¹ Jarguriptin, supay aywacuran. Anjilcunana Jesústan manchága ushyachimanquiman.

Jesús willapäcuya jallaycushan

San Marcos 1.14-15; San Lucas 4.14-15

¹² Ushyachicuj Juanta carsilčhu wičgachishanta mayar, Galilea quinranmanna Jesústa cuticuran. ¹³ Ichanga Nazaret wasinman mana chayaranchu. Manchága Cafarnaún marcaman tiyaj aywacuran.* Cafarnaún marca Galilea püsu cantunčhu caran. Chay quinrančhu Zabulónpa yawar-masincuna, Neftalípa yawar-masincuna tiyaran. ¹⁴ Cafarnaún marcačhüna Jesústa tiyaran willacuj Isaíaspa shimin chercucänanpaj. Isaíasga unayna nirán:

¹⁵ «Galilea runacuna, sumaj wiyacunquiman.

Wiyacunquiman Zabulónpa yawar-masincarpis,

* **4:4** Deuteronomio 8.3. * **4:6** Salmo 91.11-12. * **4:7** Deuteronomio 6.16. * **4:10** Deuteronomio 6.13.

* **4:13** Cafarnaún marcata waquin Bibliačhu nin: «Capernaúm.» Waquinčhüna: «Cafarnaúm» nin.

Neftalípa yawar-masin carpis,
 Jordán mayu wajtančhu tiyarpis,
 Galilea quinran jäpa runacunapa marcančhu tiyarpis.
¹⁶ Shunguyqui yanayash caycan juchačhu cawashayquipita.
 Chaypis Washäcuj čhayamuptin, shunguyqui achicyacäcunga.
 Juchata aparicushayquipita waňuy janayquičhu caycasha.
 Chaypis achquipäshunayquipaj Washäcuj čhayamushana.»*

¹⁷ Isaíaspa shiminta čharcur Tayta Diosninchipa shiminta willapäcur, Jesús niran: «Juchayquipita wanacäriy. Tayta Diosninchichi shuyaraycämanchina. Maquinčhüna purichimäshun.»

Purishinanpaj čhuscuj piscädu charijcunata Jesús jayashan

San Marcos 1.16-20; San Lucas 5.1-11

¹⁸ Galilea püsü cantunpa aywaycashančhu Jesús ricaran «Pedro» nishan Simónta, wauguin Andrésta-imá. Piscädu charij car, ridinta yacuman jitarcaycaran. ¹⁹ Jesúsna niran: «Purishimay. Piscäduta charishayqui-jina runacunata shuntanquipaj Tayta Diosninchipa maquinčhu cawananpaj. Chaytaga quiquimi camacächishaj.» ²⁰ Chaura ridinta jaguiriycur, Jesúswan aywacuran.

²¹ Washlänija aywaycashančhu Santiagutawan Juanta bütillačhu ridinta allcharcaycajta tariran. Paycunapa taytan caran Zebedeo. Ridinta allchaycajta Jesús jayaran.

²² Jayaptin papänin Zebedeuta bütičhu jaguiycur, Jesúswan aywacärriran.

²³ Galilea quinrančhu marcan-marcan Jesús puriran. Shuntacäna wasicunačüpís Tayta Diosninchipa alli willacuyninta willapäcuran. Jishyačhucunatapis allchacächiran. Nanapäcujcunatapis allchacächiran.

²⁴ Jesús ima-imata rurashanta llapan Siria runacunapis mayaran. Chaymi apamuran nanächicucunata, jishyačhucunata, supay pucllacushan runacunata, waňupayyujcunata, cumllucashcunata. Ima jishyawan jishyaptinsi, llapallanta Jesús allchacächiran.

²⁵ Chaymi chay-tucuypita čhayar, achcaj runa Jesústa jatirpararan. Jatirpararan: Galilea runacunapis, Decápolis runacunapis, Jerusalén runacunapis, Judea runacunapis, Jordán mayu chimpančhu tiyaj runacunapis.

5

Jesús willapäcushan

San Lucas 6.20-23

¹ Chay-chicaj runata ricar pataman jigarcur, Jesús jamacuycuran. Purishijnincuna jutupaycuptin, ² tantiyachicur Jesús niran:

³ «Pishipacujcuna, cusicärinquiman. Llapan shunguyquiwan yupachicuptiqui, Tayta Diosninchichi yanapaycäshunqui. Maquinčhümi cawaycächishunqui.

⁴ Ņacajcuna, cusicärinquiman. Llaquicur wagaptiquisi, Tayta Diosninchichi yanapaycäshunqui. Shacyaycächishunqui.

⁵ Čacraynaj, wasiynaj runacuna, cusicärinquiman. Pampa runa captiquisi, Tayta Diosninchichi yanapaycäshunqui. Maquiquimanmi cay pachatapis čhuranga.

⁶ Waňuy-caway Tayta Diosninchipa shungun munashannuy cawayta ashicuna, cusicärinquiman. Tayta Diosninchichi yanapaycäshunqui. Shunguyqui munashantapis tarichishunqui.

⁷ Llaquipäcujcuna, cusicärinquiman. Tayta Diosninchichi yanapaycäshunqui. Sumaj llaqui-paycäshunquim.

⁸ Shungunčhu juchata mana pacajcuna, cusicärinquiman. Tayta Diosninchichi yana-paycäshunqui. Quiquinwanmi tincunquipaj.

* ^{4:16} Isaías 9.1-2.

⁹ Pi-maytapis amachajcuna, cusicärinquiman. Tayta Diosninchí yanapaycäshunqui. Payga wamrachacushunquim.

¹⁰ Tayta Diosninchipa shungun munashanta rurajcuna, cusicärinquiman. Runacuna ñacachishuptiquisi, Tayta Diosninchí yanapaycäshunqui. Maquinchümi puriycächishunqui.

¹¹ «Wiyacamashayqui-janan ashllishuptiquisi, chiquir ushyashuptiquisi, imapita tumpashuptiquisi, cusicärinquiman. ¹² Ñacachishushayqui-jina chiqui runacuna Tayta Diosninchipa unay-unay willacujnincunatapis ñacachir ushyaran. Janaj pachačümi ichanga Tayta Diosninchí alli cawayta shuyaraycächishunqui. Chaymi sumaj cusicärinquiman. Shunguyquicunapis achicyacärinman.

Cačhiwan, achquian tincuchiypa willapäcushan

San Marcos 9.50; San Lucas 14.34-35

¹³ «Jadcuna cačhi-jina carcaycanqui. Cačhipa puchguynin illariptin, ¿yapay puchguyninman cutichinquimanchuraj? Mana. Puchguynin illariptin, wicaparin. Runacuna lluchcar ushyan.

¹⁴ «Tayta Diosninchipa shiminta wiycushayquipita achquita alli ricashan-jina jamicunatapis llapan runa alli ricashunquiman. Juc patačhu marca captinshi, llapan runa rican. ¹⁵ Achquita ratarcachir, pipis manash manca rurinman čhuranmanchu. Manchäga wasiéhu llapanta achicyänanpaj patacmanshi čhuran. ¹⁶ Achqui allipaj cashan-jina jamicunapis alli shungu canquiman. Alli shungu cashayquita ricar, janaj pachačhu tiyaj Tayta Diosninchitapis llapan runa alliman čhuranga.

Moiséspa shiminpitá Jesús willapäcushan

¹⁷ «Sumaj tantiyacunquiman. Mana Moiséspa shiminta, unay willacujcunapa shiminta ushyacächijchu shamushcä; manchäga llapanta alliman camacächijmi. ¹⁸ Cay pachawan janaj pacha mana ushyacaptillan, Moiséspa shimin čharcanga Tayta Diosninchipa shimin cashpan. Mana ichicllapis jungacangachu. ¹⁹ Chaymi pipis Tayta Diosninchipa shiminta llapanta čharcupis juc-ishcayllatasí pantaptin, Tayta Diosninchipis mana ricaj-tucungachu. Juc-ishcayllata mana wiycunananpaj shimiyačcunatapis Tayta Diosninchí mana ricaj-tucungachu. Shiminta wiycujcunatawan sumaj yačhachicujcunatam ichanga alli ricar, maquinchú cawachinga. ²⁰ Fariseucunapis, Moiséspa shiminta yačhajcunapis janan-janallan Tayta Diosninchipa shiminta wiycun. Tayta Diosninchipa ñaupanman čhayanayquipämi ichanga llapan shunguyquianraj wiycunquiman.

Chiquinacuypita willapashan

San Lucas 12.57-59

²¹ «Mä, wiymay. Unay auquillunchicunata Moisés niran: «Ama wañuchicunquichu. Wañuchicujpa juchan jurgapash canga.»* ²² Canan nuwana willashayqui. Shungullančhu warmijcunapa, ullgujcunapa juchantapis Tayta Diosninchí jurgapanga. Runa-masinta ashlllicujcunata mayur Israel runacunapa ñaupanman čhayachinga. Pipis runa-masinta ashllir: «Upa. Tacra» nir pampaman čhuraptin, chacaj pachaman čhayanga. Ninačhu Tayta Diosninchí ñacachinga. ²³⁻²⁴ Chaymi: «Tayta Diosninchita cuyachicuyniota jarashaj» nir runa-masiquian jagayächinacush caycar, ama čhuranquirächu. Manchä juclla ushyacächinquiman. Jinarcurreda cuyachicuyniquita Tayta Diosninchita jaranguiman.

²⁵ «Pipis dimandashuptiqui jatunman mana čhayallar, juclla ushyacächinquiman. Manchäga huiswan charichishunquipaj. Huisga murucucunawan carsilman apachishunquipaj. ²⁶ Carsilpita llap-llapanta pägarraj llucshimunquipaj. Chayta sumaj tantiyacunquiman.

Jananpachicuypita willapashan

* **5:21** Éxodo 20.13; Deuteronomio 5.17.

²⁷ «Moiséspa shiminta musyanqui. Shiminčhu nin: <Majayquita ama jananpachinchichu.>^{*} ²⁸ Canan nuwana willashayqui. Pipis juc warmiwan cacuyta yarpar, mayna shungullančhu juchata aparicusha. Majanta jananpachishana. ²⁹ Chaymi ñawiqui juchata aparicachishuptiqui ujtirir wicapariptiqui, alli canman.^{*} Ñawiyuj caycar chacaj pachaman aywanayquipita ñawiquita wicapariptiqui, alli canman. Manchäga chacaj pachačhu ñacanquipaj.^{**} ³⁰ Maquiquipis juchata aparicachishuptiqui muturir wicapariptiqui, alli canman. Maquiyuj caycar ñacayman aywanayquipita maquiquita muturir wicapariptiqui, alli canman. Manchäga chacaj pachačhu ñacanquipaj.

Raquicaypita willapashan

San Mateo 19.9; San Marcos 10.11-12; San Lucas 16.18

³¹ «Moiséspa shiminta yačhacushcanqui. Shiminčhu nin: <Pipis warminta jaguirir, actaman jamachinman.>^{*} ³² Canan nuwana willashayqui. Juc runa majanta jaguiriycur jucwan jananpachiptillanraj, jaguirinman. Manchäga mana camacanchu. Jaguirirga, jucha aparicuyman warminta čhayachin. Juc runatana čhasquir, juchaman čhayan. Runan jaguirish warmiwan majachacaj runapis juchata aparicun.

Ishcay-quimsata rimashanpita willapashan

³³ «Unay auquillunchicunata Moisés nirán: <Ama llullacunquichu. Manchäga shimiuita čharcunquiman. Tayta Diosninchipa ñaupančhu aunishcanqui.>^{*} ³⁴ Canan nuwana willashayqui. Imatapis aunir, janaj pachaman ama ricarinquichu. Janaj pachaga Tayta Diosninchipa wasin. ³⁵ Čhacrayquitapis ama auninquichu. Čhacracunapis Tayta Diosninchipa maquinčhumi. Jerusalén marcamanpis ama ricarinquichu. Jerusalén marcapis munayniyuj Tayta Diosninchipa maquinčhumi. Paypa marcanmi. ³⁶ <Mana čharcupti, wañurachimanqui> ama ninquichu. Cawayniquipis Tayta Diosninchipa maquinčhumi. Ajchayqui yana cananpäpis, yuraj cananpäpis quiquin camasha. Juncnayllatasí rucayta mana junquimanchu. ³⁷ Rimacuyniquiga juc shímilla cachun. Aunir, ama cutircunquichu. <Mana> aunirpis, ama auninquinachu. Ishcay-quimsata rimar, supay yarpashanta rimaycanqui.

Chiquicupita willapashan

San Lucas 6.29-30

³⁸ «Moiséspa shiminta musyanqui. Shiminčhu nin: <Maganacur, iwal cutichinacunqui. Ñawiyquičhu čhayachishuptiqui, ñawillančhu cutichinqui. Quiruyquičhu čhayachishuptiqui, quirullančhu cutichinqui.>^{*} Canan nuwana willashayqui. ³⁹ Pipis magashuptiqui, ayninta ama cutichinquichu. Juc-caj jaillaryquičhu lajyashuptiqui, juc-cajlätana camapunqui. ⁴⁰ Camsayquita jičhushunayqui-cashan dimandashuptiqui, punchuyquitapis jagui-paycunquiman. ⁴¹ Juc murucu juc līwacaman jipinta apachishuptiqui, ishcay līwacaman apaparcunquiman. ⁴² Mañacushuptiqui, tarichinquiman. <Challimay> nishuptiqui, ama upa-tucunquimanchu.

Chiquicucunata alli ricananpaj willapashan

San Lucas 6.27-28, 32-36

⁴³ «Moiséspa shiminta musyanqui. Shiminčhu nin: <Yačhänacushayquita alli ricanqui. Juyucunatam ichanga chiquinqui.>^{*} ⁴⁴ Canan nuwana willashayqui. Pipis chiquishuptiqui, llaquipanquiman. Juyu ñawinpa ricashuptiquisi, alli ñawiquipa ricanqui. Paycunapaj Tayta Diosninchita mañacunqui alli cawayta tarichinanpaj. ⁴⁵ Chayrämi Tayta Diosninchipa wawan cashayqui musyacanga. Payga alli runacunapäpis, juyu

* 5:27 Éxodo 20.14; Deuteronomio 5.18. * 5:29 Israelcuna yarpaj diričha maquin, diričha ñawin bälj cashanta.

** 5:29 Chacaj pachata griego rimayčhu nin: «Gehenna.» Waquin Biblia castillanúčhu nin: «infierno.» * 5:31 Deuteronomio 24.1-4. * 5:38 Éxodo 21.24; Levítico 24.20; Deuteronomio 19.21. * 5:43 Levítico 19.18.

runacunapäpis intita achicyächimun. Chaynuypis shiminta wiyacujcunapäpis, mana wiyacujcunapäpis tamyachimun.

⁴⁶ «Yačhänacushallayquiwan llaquipänacur, ¿rasunpachuraj llaquipayta yačhanqui? Mana. Aynillanta cutiycächinqui. Chiqui runacunapis yačhänacushallanwan alli ricanacun.*

⁴⁷ Ricsinacushallayquiwan wamayänacur, ¿allitachuraj ruraycanqui? Mana. Aynillanta cutiycächinqui. Tayta Diosninchita mana manchapacujcunapis ricsinacushallanwan wamayänacun. ⁴⁸ Chaymi Tayta Diosninchchi llaquipäcu cashan-jina, allillata ruraj cashan-jina, jamcunapis llapan runa-masiquita llaquipanquiman. Alli ricanquiman.

6

Pishipacujcunata tarichiypita willapashan

¹ «Runa ricanallanpaj ama alli-tucuychu. Runa ricanallanpaj ruraptiqui, janaj pachačhu tiyaj Tayta Diosninchita mana imatapis tarichishunquipächu. ² Chaymi pishipacuja jarar, willacuräcur ama purinquichu. Janan shungu runacunalla cällicunačüpis, shuntacäna wasicunačüpis willacuräcur purin. Chay-niraj cashanpita runa-masin alli ricaption, ashishanta mayna tarisha. Chaymi Tayta Diosninchchi imatapis mana tarichinganachu. Chayta sumaj tantiyacunquiman. ³ Chaura wacchata jarar, pitapis ama musyachinquieru. ⁴ Llaquipäcu cashayquita mana willacuptiquiraj Tayta Diosninchchi shunguyquita musyapar, imatapis tarichishunquipaj.

Tayta Diosninchita mañacuypita tantiyachishan

San Lucas 11.2-4

⁵ «Tayta Diosninchita mañacur, janan shungu runacuna-jina ama ruranquieru. Paycunaga runa ricanallanpaj shuntacäna wasicunačüpis, cällicunačüpis ičhicaycärir Tayta Diosninchita mañacun. Chay-niraj cashanpita runa-masin alli ricaption, ashishanta mayna tarisha. Chaymi Tayta Diosninchchi imatapis mana tarichinganachu. Chayta sumaj tantiyacunquiman. ⁶ Tayta Diosninchita mañacushayquita shungulayqui musyaranman. Wasi puncuyquita wičhgacurcur, mañacunqui. Pacayllapa mañacushayquita ricar, Tayta Diosninchchi imatapis tarichishunquipaj.

⁷ «Juc rimashallayquita cutiparir-cutiparir Tayta Diosninchita ama mañacunquieru. Jäpa runacuna Tayta Diosninchchi pii cashantapis mana musyar, yarpan: «Cutiparir-cutiparir mañacuptiräshi, Tayta Diosninchchi wiyamanga» nir. ⁸ Chay-niraj runacuna yarpashanta ama jatinquieru. Ima-imata mañacunanchipaj cashantapis mayna Tayta Diosninchchi musyaycan. Shiminchchi mana pashtapacuptillanraj, musyaycanna.

⁹ Chaymi Tayta Diosninchita mañacur ninqui:

«Papäninchchi,

Janaj pachačhu tiyajmi canqui.

Llapanpis manchapacuyculläshunqui.

¹⁰ Maquiquíchu cawaycachillämay.

Janaj pachačhu wiycushushayqui-jina

cay pachačüpis llapanmi wiyculläshunqui.

¹¹ Waran-waran cawanäpäpis tariycachillämay, ari.

¹² Juchäcunatapis ama yarparaynachu.

Manchäga chiquimajcunata alli ricashä-jina alli ricaycallämay.

¹³ Juchaman čhayanätapis ama camacaycachillaychu.

Manchäga Supaypa maquinpita washaycallämay.»

¹⁴ «Runa-masiquian imatapis alli shiwillayquipa ushyacächiptiqui, Tayta Diosninchipis llapan juchayquita junganga. ¹⁵ Quiquipi-pura mana ushyacächiptiquim ichanga, Tayta Diosninchipis juchayquita mana jungangachu.

* ^{5:46} «Chiqui runa» niptin, waquin Bibliačhu nin: «publicano, cobrador de impuestos.»

Ayünupita tantiyachishan

¹⁶ «Ayünar, llaquish-niraj ama canquichu. Janan shungu runacuna-jina ama canquichu. Paycunaga ayünashanta runacuna musyananpaj llaquish-tucur purin. Chayniraj cashanpita runa-masin alli ricaycaptin, ashishanta mayna tarisha. Chaymi Tayta Diosninchipita mana imatapis čhasquinganachu. Chayta sumaj tantiyacunquiman.

¹⁷ Jamcunam ichanga ayünar, umayquita pajpacurir ñajchacunqui. Jajllayquitapis mayllacunqui.

¹⁸ Chaura ayünashayquita pipis mana tantiyangachu. Tayta Diosninchim ichanga pacayllapa mañacushayquita ricar, imatapis tarichishunquipaj. Payga llapan runapa shungunta musyapan.

Ricashanchiman mana yupachicunapaj

San Lucas 12.33-34

¹⁹ «Cay pachallačhu rīcuyaytapis, ima-aycatapis ama ashinquichu. Caychüga imanchicuna mupallin. Puyun. Suwapis apacun.

²⁰ Chaymi cay pachačhu imatapis ama čhuracunquichu. Manchäga janaj pachaman čhuracunqui. Runa-masiquita llaquipar yanapashayquita Tayta Diosninchi ricanga. Ricaptera, mana mupallinchu. Mana puyunchu. Suwapis mana apanchu.

²¹ Sumaj tantiyacunquiman. Runaga shungun imata munashallanta yarparācun.

²² «Achquiga shimiwan tincun. Ñawinchiwan llapantapis ricanchi. Ñawinchi achquita ricaptin, shungunchipis achicyacäcun. Shunguyquiman shimi čhayaptin, Tayta Diosninchipa shungun munashanta tantiyacunquipaj. Shunguyquiman mana čhayaptinmi ichanga, jucha aruyllačhu cawanquipaj.

²³ ²⁴ Ñawinchi chacash captin, rama-ramalla ricashanchi-jina juyu shungu cashanchipis ricacan Tayta Diosninchipa shungun munashanta mana ruraptinchi. Ñawinchi japra captin, allita, mana allitapis mana tantiyacushunpächu.

²⁴ «Juc runa ishcaj patrunpa maquinčhu mana cawanmanchu. Ishcanwan shungun mana tincunmanchu. Ishcajpa maquinčhu cawar, juc-cajpita carupayllapa purir, juc-cajllamanna jillicurcunga. Juc-cajta pampaman čhurar, juc-cajllatana alli ñawinwan ricanga. Jamcunapis jillayllaman yarparar, Tayta Diosninchita jungaycärinquipaj.

²⁵ «Canan sumaj willapāshayqui. Ama llaquicunquichu: «¿Imawanraj cawashaj? ¿Imataraj micushaj? ¿Imataraj ushtucushaj?» nir. Cawaycar pačhayquipaj pishiptinpis, janayquipaj pishiptinpis, ama llaquicunquichu.

²⁶ Pichuysacunata mä, ricacushun. Paycuna mana murupacunchu. Mana pallapacunchu. Murutapis mana čhuracunchu. Imatapis mana ruracuycaptinsi, Tayta Diosninchi micunanta camapan. Pichuysacunata camapaycarga, ¿pishichishunquimanchuraj? Mana. Tarichishunquipämi.

²⁷ «May-jina llaquicurpis wañuy čhayamuptin, mana jishpinquipächu: «Cawapärishärraj» nir.

²⁸ ²⁹ Müdanayquipaj ama yarpačhacunquichu. Waytacunata mä, ricacushun. Waytacunaga mana arucuycarsi, mana puchcacuycarsi cuyayllapaj waytan.

³⁰ Wayta cuyayllapaj cashanman unay mandaj Salomónpis mana tincuranchu achic-achicyaycaj müdanash caycarsi.

³¹ Waytacuna juc-ishcay junajllapämi. Juc junaj cuyayllapaj waytan. Waranninna capllupäna chaquicäcun. Nircur tulipallačhu ushyacäcun. Chaypis Tayta Diosninchi cuyayllapaj waytachin. Chaynuy caycaptin, ¿jamcunata Tayta Diosninchi pishichishunquimanchuraj? Mana. Chaymi sumaj yupachicärinquipiman.

³² ³³ ³⁴ ³⁵ Ama llaquicunquichu: «¿Imataraj micushaj? ¿Imataraj upushaj? ¿Imataraj ushtucushaj?» nir.

Tayta Diosninchiman mana yupachicunqui. Payga imalla pishišushayquitapis mayna musyaycan.

Chaymi maquillančhu cawanquiman. Shungun munashallanta rurar cawanquiman. Maquinčhu purichishushpayqui pishijcunatapis tarichishunquipaj.

Chaymi: «Wara-warantin, ¿imanuyraj cawashaj?» nir ama llaquicunquichu. Warawarantinpis cawashayquinylla cawanquipaj.»

7

*Jamurpaypita tantiyachicushan
San Lucas 6.37-38, 41-42*

¹ «Runa-masiquita pampaman mana ćhuraptiqui, Tayta Diosninchipis pampaman mana ćhurashunquipächu. ² Runa-masiquita pampaman ćhurashayquiman-tupu Tayta Diosninchipis pampaman ćhurashunquipaj. Runa-masiquita juyu ñawiquowan ricashayquiman-tupu Tayta Diosninchipis juyu ñawinwan ricashunquipaj. ³ Mä, tincuchiypa tantiyacushun. Quiquipa ñawiquichu cullu jatiraycaptin, ¿jucpa ñawinpita pujrita jurgapunquimanchuraj? Mana. ⁴ Quiquipa ñawiquichu cullu caycaptin, ¿imanuyparaj runa-masiquita ninquiman: «Ñawiquipita pujrita jurgapushayqui? ⁵ Chaynuy nir, juchaynaj-tucurcaycanqui. Ñawiquipitaraj culluta jurgunquiman runa-masiquipa ñawinpita pujrita jurgapunayquipaj. Chay-jina juchačhu cawaycarga, jucpa juchanta ama jurgapanquichu.

⁶ «Tayta Diosninchipa shiminta mana wiyacujcunata ama willapanquimanchu. Quishatapis allguta mana jaranchichu. Jaraptinchi, caniramäshuwan. Achic-achicyaycaj rumipita piñitapis cuchicunata mana wallgapanchichu. Wallgapaptinchi, achicyaycaj rumi piñitapis lluchcar ushyarinman. Chay-jina mana wiyacujcunapis Tayta Diosninchipa shiminta pampaman ćhuranga. Allita willapaptiqui, ticrapushunquiman.

*Manayamacällar mañacunananpaj cashan
San Lucas 11.9-13; 6.31*

⁷ «Mañacuptiqui, Tayta Diosninchichi jushunquipaj. Ashiptiqui, tarichishunquipaj. Jay-acuptiqui, puncuta quičchapushunquipaj. ⁸ Mañacujcunaga ćhasquinmi. Ashijcunaga tar-inmi. Jayacujcunataga puncuta quičhapunmi. ⁹ Mä, tapushayqui. Wawayquicuna tantata mañacushuptiqui, ¿rumitachuraj aptaparcunquiman? ¹⁰ Piscäduta mañacushuptiqui, ¿wañuchicuj curutachuraj aptaparcunquiman? ¹¹ Jamcuna jucha-sapa carcaycarsi, wamrayquicunata allita jaranqui. Tayta Diosninchipis llaquipäcuji. Mañacuptiquiga, quiquinmi janaj pachačhu caycashpan alli-allillata tarichishunquipaj.

¹² «Alli ricashunayquita munashayqui-jina runa-masiquitapis alli ricanquiman. Alli ricanacunanchipämi Moiséspa shiminpis, unay willacujcunapa shiminpis willapämanchi.

*Quičqui puncuwan tincuchishan
San Lucas 13.24*

¹³⁻¹⁴ «Quičqui puncupa yaycuy sasa cashan-jina Tayta Diosninchipa maquinčhu puriyga sasa. Paypa shungun munashannuy cawar, ñacanquipaj. Chaymi wallcajlla quičqui puncupa yaycun. Paycunalla imaycamanpis Tayta Diosninchipa maquinčhu cawanga. Jatun puncupa yaycuya mana sasachu. Ichanga ushyacayman ćhayan. Chaypis achcaj runa jatun puncupa yaycushan-jina quiquinpa shungun munashallanta rurar cawan. Chaymi ushyacayman mana ćhayanayquipaj quičqui puncupa yaycuy.

*Wayuyninpita ricsichicushan
San Lucas 6.43-44*

¹⁵ «Pipis pantachishurunquiman: «Tayta Diosninchipa shiminta willapäcuyca» nir. Paycunaga micucuj liyun-jina caycarsi, shuti uysha-jina ćhayapushunquipaj: «Tayta Diosninchipa shungun munashallanta rurashun» nillar. ¹⁶ Ichanga ruracuyninpa, cawacuyninpa ricsican. ¿Mishqui übasta wangurpitachuraj pallanchi? ¿Durashnutapis wirca-cashapitachuraj pallanchi? ¹⁷ Rüta yüra mishquijta wayun. Casha jačhapis asgajta wayun. ¹⁸ Rüta yüra asgajta mana wayunmanchu. Casha jačhapis mishquijta mana wayunmanchu. ¹⁹ Cashayuj jačhata cuchurin. Ninaman jaycurin. ²⁰ Casha jačhacunata

wayuyninpa ricsishayqui-jina pantachicujcunatapis ruracuyninpa, cawacuyninpa ric-sinquipaj.

*Tayta Diosninchipa ñaupanman āhayananpita willapashan
San Lucas 13.25-27*

²¹ «〈Taytallau Tayta〉 nimaj runacuna mana llapanchu Tayta Diosninchipa ñaupanman āhayanga imaycamanpis maquinčhu cawanapaj. Papānipa maquinčhu shungun munashanta rurajcunalla cawanga. ²² Cay pacha ushyacaptin, llapan runapa juchanta jurgapashä junaj achcajmi nimanga: 〈Taytallau Tayta, nimashayquinuylla shimi-quita willapäcushcä. Yačhachimashayquinuylla supaycunata jargur, puclacushancunata allchacächishcä. Camacächishayquinuylla runa mana rurashancunata rurashcä.〉 ²³ Nuwam ichanga nishaj: 〈Juchačhu arujcuna, ¿piraj cacullanquipis? Ricaytapis mana munallajchu. Washata ayway.〉»

*Wasi rurajcunawan tincuchishan
San Marcos 1.22; San Lucas 6.47-49*

²⁴ «Shimīta wiyacujcunata alli wasita rurajwan tincuchi. Wasita alli rurar, rumiwan simintuta jallarachin. ²⁵ Rumi janančhu wasi tapyarar, mana jučhunchu. Chigaypa tamyar llujlla āhayaptinsi, mayu āhayaptinsi, chicchinpa pücaptinsi, wasi mana jučhunchu. Llapantapis ičhipun rumiwan simintuta jallarish captin. ²⁶ Shimīta mana wiyacujcunata ichanga upa rinri runawan tincuchi. Upa runaga ñushya allpallaman wasinta jatarachin. ²⁷ Chaymi tamyar llujlla āhayaptin, mayu āhayaptin, chicchinpa pücaptin, wasin jučhucäcun. Llapallan ushyacäcun.»

²⁸ Rimayta ushyarcuptin, llapan runa cushicuran: ²⁹ «Moiséspa shiminta yačhajcuna willapäcushanta mana tantiyanchichu. Jesús willapäcushanmi ichanga shungunchiman sumaj āhyan» nir.

8

*Jaračhu jishyaj runata Jesús allchacächishan
San Marcos 1.40-45; San Lucas 5.12-16*

¹ Sumaj willapäcurir puntapita yarpuptin, achcaj runa Jesúspa jipanpa aywaran. ² Jaračhu jishyaj runapis Jesússta taripar ñaupanman jungurpacuycur, niran: «Llaquipämashpayqui allchacaycachillämay. Tayta Diosninchipa ricay ñawinčhüpis alli cayta munä.»

³ Jesúsna llaquipashpan maquinwan yataycur, niran: «Llaquipajmi. Allchacayna.» Niptin, jaračhu jishya illaricäcuran. Allchacäcuran. ⁴ Jinarcur Jesús niran: «Ama pitapis willapanquichu. Manchäga cüraman ayway. Moiséspa shiminta čharcur cuyachicuyniq-uitapis Tayta Diosninchita jaray. Chayraj llapanpa ricay ñawinčhu alli canquipaj.»

*Capitanpa uywayninta Jesús allchacächishan
San Lucas 7.1-10; San Juan 4.43-54*

⁵ Cafarnaún marcaman Jesús āhayacaptin, Roma murucucunapa capitannin āhayapurán. Āhayarcur mañacuran: ⁶ «Tayta, uywaynii jishyaycan. Āhaquinta, maquinta mana cuyuchinchu. Juyupa nanächicun» nir.

⁷ Jesúsna niran: «Wasiquiman aywashun. Allchacächishaj.»

⁸ Capitanmi ichanga niran: «Wasíman āhyanayqui mana camacanchu. Roma runa capti, Israel-masiquicuna ricamaytapis mana munanchu. Chaypis aunimaptiqui, uywaynii allchacäcunga. Mana aywanayquirächu. ⁹ Nuwapis jucpa maquinčhu juyä. Quiquüpis maquičhu murucucunata purichi. Chaymi: 〈Shamuy nipti, shamun. 〈Ayway, nipti, aywan. Wasíchüpis llapan mincaynii shimīta wiyacun〉» nir.

¹⁰ Capitanpa shiminta wiyar; Jesús jatunpa cusicurá. Jatirpaj runacunata níran: «Jäpa runa caycarsi, llapan shungunwan cay runa manchapacaman; Israel-masinchicunam ichanga janan shungulla. ¹¹ Sumaj tantiyacunquiman. Tayta Diosninchipa maquinchhu cawajcuna chay-tucuy marcapita jutucangapaj. Auquillunchi Abrahamwan, Isaacwan, Jacobwan, llapanmi Tayta Diosninchipa ñaupallanchhu micupacungapaj. ¹² Israel-masinchicunam ichanga: ‘Tayta Diosninchipa wawanmi cä» nirpis, mana jutucangachu. Paycunata chacaj pachaman Tayta Diosninchchi jargungapaj. Chaychüraj llaquicunga. Atar waganga. Juyupa ñacar quiruntapis uchunga.»

¹³ Jinarcur capitanta Jesús níran: «Wasiquimanna cuticuy. Yupachicamashayquiman-tupu camacanga.» Nishan ürash capitanta uywaynin allchacäcuran.

Simónpa suydanta Jesús allchacächishan

San Marcos 1.29-31; San Lucas 4.38-39

¹⁴ Chaypita Pedrupa wasinman Jesús aywaran. Pedrupa suydan wayllaywan jishyay-caran. ¹⁵ Maquinpita Jesús yataycuptinmi ichanga, wayllay cachariycuran. Chaura jatarcur, yanucuriycuran jarananpaj.

¹⁶ Chacanaycaptinna, Jesúsman jishyačhucunata apamuran: «Diyawarda ushyashanam» nir. Supay puclacushan jishyačhucunatapis chayachiran. Jesúsmi ichanga juc shimi rimarillar, supaycunata jarguriran. Jishyačhucunatapis llapallanta allchacächiran. ¹⁷ Chaynuymi unay willacuj Isaíaspa shimin charcucaran. Isaíasga unayna níran: «Quiquinmi jishyanchicunata jurgusha.

Nanayninchicunatapis apasha.»*

Jesúswan puriyta munajcuna

San Lucas 9.57-62

¹⁸ Juc cuti achcaj runata ricar, purishijnincunata Jesús níran: «Yacu püsuta chim-pashun.» ¹⁹ Chaynuy niptin, Moiséspa shiminta yačhaj runa níran: «Tayta, ay-washayquipa aywayta munä. Maypapis purimushun.»

²⁰ Jesúsna níran: «Atujcunapis mačhayninchhu tiyan. Pichuysacunapis jishuyuj. Nuwam ichanga Tayta Diosninchipa cačhan captisi, mayman chayanäpäpis wasi mana canchu.»

²¹ Chaypita juc purishijninna Jesúsna níran: «Tayta, papänitaraj ricashaj. Wañucuptin pampaycurraj, purishishayqui» níran.

²² Jesúsna níran: «Papäniqui chapata ama rurashunquimanchu. Juclla purishimay. Wañushta wañush-masincuna pampachun.»

Wayranpawan tamyata Jesús čhawachishan

San Marcos 4.35-41; San Lucas 8.22-25

²³ Chaypita purishijnincunawan-ima Jesús bütiman jigaran. ²⁴ Bütiwan aywaycashanchhu Jesús puñucäcuran. Puñucäcushancaman shucucuy wayra ricacumuran. Yacu büchiypabüchir, bütiman yaycuycaran. ²⁵ Purishijnincunana Jesúsna ricchachiran: «Washämay. Washämay, Tayta. Challpucaycanchina» níran.

²⁶ Jesúsna níran: «¿Imanirtaj mancharinqui? ¿Janan shungullachu Tayta Diosninchiman yupachicunqui?» Jatarcurna, yacutawan wayrata Jesús piñacuran. Piñacuptin, shucucuy wayra chawacäcuran. Yacupis puñucäcuran.

²⁷ Chaura purishijnincuna mancharicäcur, quiquin-pura ninacäriran: «¿Piraj cay runa? Piñacuptin, shucucuy wayra chawacäcun. Yacupis puñucäcun» níran.

Gadara quinranchhu supay puclacushan runacunata Jesús allchacächishan

San Marcos 5.1-20; San Lucas 8.26-39

²⁸ Püsuta chimpar, Gadara quinranman Jesús chayaran. Chayaptin, pantyunpita ishcay runa llucshiramuran. Supaypa maquinchhu purir, juyu caran. Chaymi chay quinranpa

* **8:17** Isaías 53.4.

pipis mana puricujnachu. ²⁹ Supay pucllacushan runacunana supay rimachiptin, jayacuran: «Tayta Diosninchipa Wawan Jesús, ¿imanirtaj ashipämanqui? ¿Imanirtaj juclla ñacayman jitarpamayta munaycanqui? Amaraj ñacachimaychu, ari» nir.

³⁰ Chay junaj washlänin quinranchú chay-chica cuchi pagupacurcaycaran. ³¹ Chaymi supaycuna Jesústa mañacuran: «Cay runapita jargumashpayqui cuchicunata pucllacunäpaj aunikay, ari» nir.

³² Mañacushanta Jesús auniran: «Ayway» nir. Aunipta runata caćharycur, cuchi-cunatana pucllacuran. Cuchicunana jishyayar, chagapita yacuman jigapurcuran. Llapallan shugupacaypa wañuran.

³³ Cuchi michijcunana mancharish jishpicäriran. Marcanman ćhayar, imallata ricas-hantapis willacuran. Ishcaj jishyayash runa allchacashantapis willacuran. ³⁴ Willaptin, llapan runa Jesúsman aywaran. Ćhayar, mañacuran: «Cay marcapita aywacuy, ari» nir.

9

Cumllucash runata Jesús allchacächishan San Marcos 2.1-12; San Lucas 5.17-26

¹ Chaypita bütiman jigarcur, marcanman Jesús cuticuran. ² Čhayaptin, runacuna quirmallawan cumllucash runata Jesúsman ćhayachiran. Paycuna llapan shungun-wan yupachicushanta musyar, cumllucash runata Jesús niran: «Wawallau wawa, ama llaquicuychu. Juchayquicunata jungashcäna.»

³ Chaura Moiséspa shiminta yaćhajcuna shungullanchú ullgucäcuran: «Caynuy rimar, Tayta Diosninchita apäriycan» nir.

⁴ Yarpashanta musyar, Jesús tapuran: «¿Imanirtaj llutanta yarparcaycanqui? ⁵ Mä, tapushayqui. ¿Allchacächichu, jucha aparicushanta jungacächichu sasa? ⁶ Sumaj tantiyacunquiman. Tayta Diosninchipa cay pachaman caćhamasha. Munayniujmi cä pipa juchantapis jungacächinäpaj.» Chaymi cumllucash runata niran: «Jatariy. Quirmayquita shuntacurcur, wasiquiman cuticuy.» ⁷ Chaynuy niptin, cumllucash runa änir, jatarcur wasinman cuticuran.

⁸ Runacunana jatunpa mancharicäcuran. Tayta Diosninchitapis alliman ćhuraran: «Ima allish Tayta Diosninchita runacunatapis yanapan munayniuj cananpaj» nir.

Mateuta Jesús jayashan San Marcos 2.13-17; San Lucas 5.27-32

⁹ Chaypita aywaycurna, Mateo jutiyuj runata Jesús ricaran. Payga Roma marcapa mandajninpaj jillayta shuntaycaran. Ricar, Jesús niran: «Mateo, purišhimay.» Niptin, Jesússtana Mateo purišhiran.

¹⁰ Chaypita Mateupa wasinchú purišhijnincunawan Jesús micurcaycaran. Waquin juchačhu arujcunawanpis, jillayta shuntajcunawanpis micurcaycaran. ¹¹ Paycunata ricar, fariseucuna Jesúspa purišhijnincunata jamurparan: «¿Imanirtaj jillayta shuntaj chiqui runacunawan, juchačhu arujcunawan Taytayqui Jesús micun?» nir.

¹² Jamurpaptin, Jesúspis niran: «Jishyaćhucunallah jampicujta ashin. Mana jish-yarga, mana ashinchu. ¹³ Sumaj tantiyacunquiman. Tayta Diosninchipa shiminchú nin: ‹Jaramänayquitachu mana munaycä; manchäga runa-masiquita llaquipänayquitam.› Nuwapis juchačhu arujcunata Tayta Diosninchiman cutichijmi shamushcä. ‹Juchayna-jimi cä› nijcunatachu mana ashiycä.»*

Ayünupita tapunacushan San Marcos 2.18-22; San Lucas 5.33-39

* ^{9:13} Oseas 6.6.

¹⁴ Chaypita Ushyachicuj Juanpa purišhijnincuna Jesúsman ćhayar, tapucuran: «Fariseucunapis, nuwacunapis ayünar, Tayta Diosninchita mañacü. ¿Imanirtaj purišhijniquicuna mana ayünanchu?» nir.

¹⁵ Chaynuy niptin quiquinman tincuchicur, Jesús niran: «Warmi ashishijcuna manash llaquishachu ayünan. Manchäga cushishash micupacärin. Warmi ashij müsuta jičhuptinshi ichanga, ayünangapaj. Jatunpash llaquicungapaj. ¹⁶ Chaynuypis mauca müdanata mushuj račhipawan manash pipis jiranmanchu. Mushujwan jiraptin, jintishpan mauca müdanatapis jatunpanash račhirachin. ¹⁷ Bìnuta puguchinanpäpis manash pipis chaquish jaracha putuman wiñanmanchu. Bìnuta pugur, chaquish jaracha pututa pashtarachinshi. Pashtaptin, bìnupis ushyacäcunshi. Jaracha putupis račhicäcunshi. Chayshi llullu bìnuta llullu jaracha putumanraj wiñan. Chaynuypa bìnupis, jaracha putupis manash ushyacanchu.»

Wamrata cawarachishanpis, yawar-apaywan jishyaycaj warmitapis Jesús allchacächishan

San Marcos 5.21-43; San Lucas 8.40-56

¹⁸ Jesús rimaycaptillan juc mayur Israel runa ćhayarcur, Jesúspa ñaupanman jungurpacuycuran: «Tayta, warmi wamrä chayraj wañucusha. Wasíman aywashun. Maquiquwan yatarcptiqui, wamrä cawarimungapämi» nir. ¹⁹ Niptin, purišhijnincunawan-imá Jesús aywaran. ²⁰ Yawar-apaywan jishyaycaj warmipis tallucash aywaycaran. Čhunca ishcaywan (12) watana jishyaycaran. Jipallanpita tariparcur, Jesúspa müdananta yataycuran: ²¹ «Müdanallantapis yatar, allchacashaj» nir. ²² Yataptin, ticrarcur Jesús niran: «Wawallau wawa, ama llaquicuychu. Yupachicamashayquipita allchacashcanqui.» Chaynuy niptin, warmi allchacäcuran.

²³ Chaypita mayur runapa wasinman ćhayar, Jesús yaycuran. Canturcunapis pampananpaj camaricuycaranna. Runacunapis atarcaycaran. ²⁴ Jesúsna niran: «Witicuy. Wamra jipash mana wañushachu. Manchäga puñucashalla caycan.» Niptin, täpacuna Jesústa asiparan. ²⁵ Jurpacunata jarguriptin, maquinpita charircur, wamra jipashta Jesús cawarachiran. ²⁶ Cawarachishanta chay quinrančhu llapan runa mayaran.

Ishcaj japrata Jesús allchacächishan

²⁷ Jesús aywacuptin, ishcaj japrana Jesúspa jipanta jayacuraycar aywacullaran: «Unay mandaj Davidpa willcan Jesús, llaquipaycallämay, ari» nir. ²⁸ Wasíman ćhayaptin, ishcaj japracunapis ćhayaran. Paycunata Jesús tapuran: «Allchacächinäpaj yupachicamanquichu» nir. Japracunana: «Aumi, Tayta» nirán. ²⁹ Chaynuy niptin japa runacunapa ñawinta yataycuran, Jesús niran: «Yupachicamashayquiman-tupu allchacashana canquipaj.» ³⁰ Chaura ñawin quičhacäcuran. Ñawincuna quičhacäuptin, Jesús piñaparan: «Pitasi ama willapanquichu.» ³¹ Paycunam ichanga shiminta chapacuya mana camäpacuranchu. Manchäga marcanman aywaycur llapanta willaparan: «Ñawiña Jesúsmi allchacächisha» nir.

Upa runata Jesús allchacächishan

³² Japracuna aywacurishallanta supay pucllacushan upa runatapis Jesúsman ćhayachiran. ³³ Supayta Jesús jarguptin, upa runa rimariranna. Upa runa rimariptin, llapan runa cushicuran: «Cay Israel marcanchičhu upa rimajta imaypis mana ricaranchichu» nir. ³⁴ Fariseucunam ichanga niran: «Mayur supayta jayararshi, supaycunata jarguycan.»

Pallapacuywan tincuchishan

³⁵ Chaypita marcan-marcan purir shuntacäna wasicunačhu Tayta Diosninchipa shiminta Jesús willapäcuran. Alli willapata willapäcur niran: «Maquinčhu cawananchipaj Tayta Diosninchi shuyaraycämanchi» nir. Jishyačhucunatapis, nanapäcujcunatapis

allchacächiran. ³⁶ Achcaj runata ricar, Jesús llaquiparan: «Cay runacunata pipis mana ricanchu. Ujracash uysha-yupay mancharish carcaycan. Llaquish carcaycan» nir. ³⁷ Chaymi micuy shuntaywan tincuchir puríshijnincunata niran: «Micuy puguraycaj-yupay chay-chicaj runa Tayta Diosninchipa shiminta wiyaj-wiyajlla shuyaraycan. Shiminta willacujcunam ichanga wallcajlla. ³⁸ Chaymi willacujcuna juclla yapacämunanpaj Tayta Diosninchita mañacäriy. Shiminta čhasquicujcunata shuntamunan carcaycan.»

10

Čhunca ishcaywan cačhancunata Jesús acracushan

San Marcos 3.13-19; San Lucas 6.12-16

¹ Chaypita čhunca ishcaywan puríshijnincunata Jesús shuntaran. Nircur cargunman čhuraycur niran: «Nuwapita munayniyuj caycanqui supaycunata jargunayquipäpis, jishyačhucunatawan nanapäćucunata allchacächinayquipäpis.»

² Jesúspa puríshijnincuna čhunca ishcaywanmi caran: «Pedro» nishan Simón, Simónpa wauguin Andrés, Zebedeupa ishcan wamran Santiaguwan Juan, ³ Felipe, Bartolomé, Tomás, jillayta shuntaj Mateo, Alfeupa wamran Santiago, Tadeo, ⁴ «Marcapaj nanachicuj» nishan Simón, Judas Iscariote. Payga Jesústa wañuyman jitarpuran.

Čhunca ishcaywan cačhancunata Jesús cačhacushan

San Marcos 6.7-13; San Lucas 9.1-6

⁵⁻⁶ Čhunca ishcaywan puríshijnincunata cačhacuran. Cargunman čhurar, Jesús niran: «Sumaj wihamay. Israel runacunallaman cačhashayqui. Paycuna ujracash uysha-yupay cawan. Jäpa runacunamanmi ichanga ama aywanquichu. Samaria runacunapa marcanmanpis ama yaycunquichu. ⁷ Israel runacunata willapar ninqui: ‹Tayta Diosninchi shuyaraycämichi. Maquinčhüna purichimäshun› nir. ⁸ Jishyačhucunatapis allchacächinqui. Wañushcunatapis cawarachinqui. Jaračhu jishyacunatapis allchacächir, allina ricanqui. Supaycunatapis jargunqui. Carguyquiman čhurar, llapan shungüwan čhurashcaj. Mana imatapis mañacushcajchu. Jamcunapis imatapis mana mañacullar, llapan shunguyquiwan carguyquita čharcunqui. ⁹ Willapäcu aywar, jillayniquita ama apanquichu. ¹⁰ Jipiquitapis, rucanayquitapis, llanguquitapis, garutiquitapis ama apanquichu. Shimita willapäćucunaga micush-upush purinan camacan.

¹¹ «Marcacunaman čhayar, alli runata ashinqui. Pachacur, jucläpa aywacushayquiman jinallančhu pacharäcunqui. ¹² Juc wasiman čhayar: ‹Tayta Diosninchi yanapay-culläshunqui› nir wamayanqui. ¹³ Čhasquicushushpayqui änirmi alli cawayta taringa; manchä, mana. ¹⁴ Čhayashayqui marcačhu, čhayashayqui wasičhu mana čhasquishuptiqui, mana wiyashuptiqui, čhaquiquita pichacurir aywacunqui.* ¹⁵ Sumaj tantiyacunquiman. Cay pacha ushyacaptin, Sodoma quinran runacunatawan Gomorra quinran runacunata ñacachirpis, Tayta Diosninchi llaquipangaraj. Wasguipajcunatam ichanga mana llaquipällar ñacachinga.»

Chiquir ushyash cananta willapashan

¹⁶ «Sumaj tantiyacunquiman. Willapäcu cačhar, uyshata liyun rurinman jaycurij-yupay cačhaycaj. Juyu runacunaman čhayanquipaj. Chaymi pichuysa curuyupaypis jishpij-jishpijlla purinqui. Paluma-yupaypis llutalla purinqui. ¹⁷ Sumaj tantiyacunquiman. Chiquishushpayqui mayur Israel runacunaman čhayachishunquipaj. Shuntacäna wasicunačhusi magashunquipaj. ¹⁸ Čhasquicamashayqui-janan Roma auturdäcunamanpis, Roma mandajcunamanpis čhayachishunquipaj. Wacpa-caypa purichishuptiquisi, shimiquita ama amucurcunquichu. Manchäga auturdä captinsi,

* **10:14** Israel runacuna pitapis chiquir, müdanantapis, llanguintapis tapsicurin.

jäpa runacuna captinsi, pii-maytapis nuwapita willapanqui. ¹⁹ Auturdäcunaman chayachishuptiqui, ama llutäpacunquichu: «¿Imataraj rimashaj? ¿Imanayparaj chapacusha?» nir. Manchäga shimiquiman Tayta Diosninchi churashallanta rimanquipaj. ²⁰ Quiquillayquipitachu mana rimanquipaj. Manchäga quiquin Espíritu Santu rimachishunquipaj.

²¹ «Waugui-purapis nuwa-janan wañuyman jitarpanacunga. Juc waugui chiquimar, chasquicamaj wauguinta wañuyman jitarpunga. Papänincunapis wamrancunata wañuyman jitarpunga. Wamrancunapis maman-taytanta chiquir, wañuyman jitarpunga. ²² Chasquicamashayqui-janan llapan runa chiquishunquipaj. Imaman chayarpis mana wasguimaptiquiga, maquinchümi Tayta Diosninchi imaycamanpis cawachishunquipaj.

²³ «Juc marcapita jaticačhäshuptiqui, juc marcemannna jishpicunqui. Sumaj tantiyacunquiman. Cutimushäcaman llapan Israel marcacunaman chayayta mana atipanquipächu. Llapanman mana chayaptiquisi, Tayta Diosninchipa cačhan cashpä cutimushaj.

²⁴ «Jipa wamracuna mayur runacuna yarpashanta manash yarpanrächu. Uyway runapis patrunninta manash apärinmanchu. ²⁵ Jipa wamracuna mayur runa yarpashanta yarparraj cushicunman. Uyway runapis patrunninta ricacurrat, cushicunman. Sumaj wiyacunquiman. Juyu runacuna ashllimar nin: «Supaycunapa mandajnin Beelzebulmi canqui.» Chaynuy ashllimaptin, ¿imamanraj tincuchishunquipaj maquičhu cawaptiqui?

Mana manchacullar willapäcunapaj shacyächishan

San Lucas 12.2-7

²⁶ «Chiqui runacuna imata rurashuptiquisi, ama manchacunquichu. Runacuna shungullančhu pacarächishanpis mayacanga. Imata yarpashanpis unayllata musyacanga. ²⁷ Chaymi rinrillayquičhu willashäta llapan runapa rinrinman chayachiy. Quiquillayquita willapashätapis llapan runata musyachiy. ²⁸ Chiqui runacuna wañuchishunayquita ama manchacunquichu. Wañuchishushpayquisi, almayquita mana wañuchingachu. Tayta Diosninchitam ichanga manchapacärinquiman. Payga munayniujmi wañuyman jitarpushunayquipäpis, almayquita ninačhu illarachinanpäpis. ²⁹ Chaymi ama mancharinquichu. Acapalla pichuysacuna mana čhaninchu. Chaypis Tayta Diosninchi camacächiptinraj, wañuyman chayan. Pichuysata ricaycarga, ¿jungaycushunquimanchuraj? Mana. ³⁰ Tayta Diosninchipa maquinchümi cawaycanqui. Mana imaysi jungashunquichu. Ajchayquitapis yuparaycächin. ³¹ Chaymi imatapis ama manchacuychu. Jamcunaman pichuysacunapis mana tincunchu. ³²⁻³³ Runacunata mana manchacur chasquicamashayquita willacuptiqui, janaj pachačhu Papänipa ñaupančhu nuwapis willacushaj: «Rasunpa maquičhu purin» nir. Runata manchacur wasguimaptiquim ichanga, nuwapis janaj pachačhu Papänipa ñaupančhu wasguishayqui.

Jesús-janan runacuna tincupänacushan

San Lucas 12.51-53; 14.26-27

³⁴ «Shunguyquičhu ama yarpanquichu: «Cay pachaman Jesús shamusha alli cawayta tarichimänanchipaj.» Runacuna mana alli cawayllačħechu cawanga. Manchäga chasquicamashayqui-janan chiquir ushyashunquipaj. ³⁵ Nuwa-janan papänintapis ullgu wamran chiquinga. Warmi wamrangepis mamanta chiquinga. Llumchuyninpis suydanta chiquinga. ³⁶ Juc wasičhu quiquin-puralla tincupänacunga. Chiquinacunga.*

³⁷ «Shungü munashallanta ruranquiman. Mamayqui-taytayqui-janan ama jungaramanquimanchu. Wamrayquicuna-janan ama wasguiramanquimanchu. Shimita wiycacuptquiraj, alli ricashayqui. ³⁸ Shimita wiyacujcuna imanuy ñacarsi, rusčhu wañuyman chayarsi, ricay ñawičhu alli cawanman. Manchäga purishimaya mana camäpacungachu.

* **10:36** Miqueas 7.6.

39 Ñacaytapis, wañuytapis manchacur maquiúchu puriyta mana munar, ushyacayman chayangapaj. Maquiúchu purir llapanta jaguijcunam ichanga imaycamanpis Tayta Diosninchipa maquinúchu cawangapaj.

Llaquipashanman-tupu imatapis tarishan

San Marcos 9.41

40 «Shimiquita chasquicucuna nuwatapis chasquicaman. Chasquicamajcunana Tayta Diosninchitapis chasquicun. Paymi caáchamasha. **41** Pipis Tayta Diosninchipa shiminta willacujcunata chasquiptin, willacujta-jina Tayta Diosninchispis alli ricar ayninta cutichinga. Wiyacuj runata chasquiptin, wiycuj runata-jina Tayta Diosninchispis alli ricar ayninta cutichinga. **42** Sumaj tantiyacunquiman. Pipis: «Washäcuj Jesúspa puríshijnin canqui» nir yacullatasi macyaycushuptiqui, Tayta Diosninchispis alli ricar ayninta cutichinga.»

11

Ushyachicuj Juanpa puríshijnincuna tapucushan

San Lucas 7.18-35

1 Chunca ishcaywan puríshijnincunata willapariycur, Jesús aywacuran. Waquin marca-cunaáchuna Tayta Diosninchipa shiminta willapäcurácur puriran.

2 Chay wican Ushyachicuj Juan carsilúchu wičgaraycaran. Jesús ima-imata rurashal-lanta mayar, puríshijnincunata Jesúzman cačharan: **3** «¿Jamchush Tayta Diosninchichi caáchamushan Washäcuj caycanqui? ¿Juctarächush shuyäcärishaj?» nir. **4** Tapuptin, Jesús niran: «Cutircur, ricashayquicunata, wiyahayquicunata, Juanta willar ninqui:

5 Japracuna ricaycanna.

Wijrucunapis puriycanna.

Jaraáchu jishyajcunapis allchacaycanna.

Upacunapis wiyaycanna.

Wañushcunatapis cawarachin.

Pishipacujcunatapis Tayta Diosninchipa alli willapanta willapäcuycanna.*

6 Chaymi Tayta Diosninchipa cačhan cashäta mana wasguijcuna sumaj cushicarinman.

Imaman chayaptinsi, paycunata Tayta Diosninchichi sumaj yanapan.»

7 Chaura Ushyachicuj Juanpa cačhancuna cuticuriptin, juturashan runacunata Jesús niran: «Jamcunapis chunyaj pachaman aywar, Juanpa shiminta wiyarayquim, ¿au? Payga imatapis mana manchacujchu. Mana ishcay-quimsatachu rimaj. **8** ¿Imamanraj aywashcanqui? ¿Alli müdanashtachu tarishcanqui? Mana. Alli müdanashcunata achic-

achicyaycaj wasillaáchu juyaycajtam tarinqui. Jatun auturdäcunallam alli-alliga cawan.

9 ¿Pi runataraj ashishcanqui? Chunyaj pachaáchu Juanpa shiminta wiyaycur, Tayta Diosninchipa willacujnin cashanta tantiyacärishcanqui. Payman waquin willacujcunapis mana tincuranchu. **10** Juanta cačhamunanpaj unayna Tayta Diosninchichi musyachicuran. Shiminúchu nin:

«Cačhäta ñaupapäshunayquipaj juc runata ñaupachishaj.

Camaricushalla shuyaräshunayquipaj runacunata willapäcungapaj» nir.*

11 «Sumaj tantiyacunquiman. Chay-chicaj runa carsi, Ushyachicuj Juanman mayganpis mana tincushachu. Chaypis maygan runa mana alli ricash caycaptinsi, Tayta Diosninchipa maquinúchu cawajcunaman Juanpis mana tincunchu.

12 «Ushyachicuj Juan willapäcushanpita-pacha Tayta Diosninchitapis, shiminta wiyacujcunatapis runacuna chiquin. Maquichacuya munan. **13** Chaynuy cananta manaraj Juan willapäcupillan, unay willacujcunapis, Moiséspis musyachicuran. **14** «Willacuj Elíasta cačhamushaj» nir Ushyachicuj Juanta cačhamunanpaj musyachicuycaran. Chayta tantiyar, rimashantapis tantiyacunquiman. **15** Rinriyujmi canqui. Tantiyacunquiman.»

* **11:5** Isaías 35.5-6; 61.1. * **11:10** Malaquías 3.1.

¹⁶ Chaymi paycunata wiyächipar Jesús niran: «Canan wican runacunata, ¿imawanraj tincuchiman? Yupay-tucuj wamracunawanchi tincuchishaj. Upa wamracuna-jina mana imatapis tantiyacunchu.

¹⁷ «Cushicuywan jachwashun» nir quinata tucapaptinpis, mana jachwashcanquichu.

«Llaquicuywan wagashun» niptinpis, mana wagashcanquichu.

¹⁸ «Chay-jina Ushyachicuj Juan ichic-ichicllata micuj. Binutapis mana mallishachu. Chaypis Juanta ashllishcanqui: «Supay puclacusha» nir. ¹⁹ Nuwatapis Tayta Diosninchi caçhamasha. Llapanta micü. Binutapis upü. Chaypis ashllircaycämanqui: «Shincanan-raycullar, paçhan-raycullar purin. Juchaçhu arujcunawanpis, jillayta shuntaj chiqui runacunawanpis purin» nir. Imata rimarsi, Tayta Diosninchi yarpashanta pipis mana chapanmanchu. Shiminta wiyacujcunaga ricsipalla cawan.»

Mana wiyacujcunapita rimashan

San Lucas 10.13-15

²⁰ Shiminta mana wiyacushanpita runacunata Jesús piñacuran. Payga Tayta Diosninchi sumaj munayniyuj cashanta musyachicur tucuy-jinanpa imatapis rurar, runacunata sumaj yanaparan. Chaypis runacuna jucha aparicushanpita mana wanacuranchu. Chaymi Jesús piñacur niran:

²¹ «Corozaín runacuna, Betsaida runacuna, Israel runa captiquisi, juyupa Tayta Diosninchi ñacachishunquipaj. Pay camacächiynipa shiminta willapaycaptisi, jishyaçhucunata allchacaycächiptisi, chay-chicaj runata jaraycaptisi, supaycunata jarguycaptisi, maquinchu cawayta mana munashcanquichu. Jäpa Tiro marca runacunawan jäpa Sidón marca runacunam ichanga jishyaçhucunata allchacächishäta ricar, supaycunata jargushäta ricar, mayna Tayta Diosninchipa shiminta chasquicur juchanpita wanacunman caran. Wanacushan musyacänanpaj llaquicuywan mayna waganman caran. Umanman uçhpata piçhucunman caran. Jaçhga müdananta ushtucunman caran. ²² Chaymi Tiro runacunatawan Sidón runacunata Tayta Diosninchi yangallaraj ñacachingapaj. Jamcunatam ichanga ricaycarsi mana wanacushayquipita cay pacha ushyacashan junaj juyupa ñacachishunquipaj. ²³ Cafarnaún runacuna: «Janaj pachaman aywashaj» niptiquisi, yarpashayqui mana camacangachu. Chacaj pachaman Tayta Diosninchi jargushunquipaj.* Sodoma runacunam ichanga wanacunman caran Tayta Diosninchi camacächishanta ricaycar. Wanacurga, marcantin mana ushyacanmanchu caran. ²⁴ Sodoma runacuna mana wanacushanpita ushyacaran. Jamcunatam ichanga mana wanacuptiqui cay pacha ushyacaptin, llaquipaypaj Tayta Diosninchi ñacachishunquipaj. Chay junajmi juchayquita sumaj jurgapäshunquipaj.»

Tayta Diosninchawan Wawan Jesúsla ricsinacushan

San Lucas 10.21-22

²⁵ Chaypita Tayta Diosninchita alliman churar, wiyächipaya Jesús niran: «Papällau Papä, jatunpa cushicü. Cay pachapis, janaj pachapis maquiquíchu caycan. Alli shungu runacunata wamra-jina wiyacuj captin, yarpashayquita musyachishcanqui. Yaçhajtucujcunatam ichanga shunguyqui yarpashanta mana musyachishcanquichu. Papä, shunguyqui munashanta llapantam camacächishcanqui.»

²⁶ Jinarcur llapan runata niran: «Shungun munaptin, Papäni maquüman llapanta churasha. ²⁷ Wawan cashäta Papäni musyan. Wawan carmi, Papäni pii cashantapis musyä. Yanapaptiraj, pipis Papäni pa shungunta musyapanga.

* ^{11:23} Chacaj pachata griego rimaychu ricsin: «Hades» nir.

²⁸ «¿Imanirtaj jamcuna llaquish juyanqui? ¿Imanirtaj llutäpacur cawanqui? Wiyacamaptiquiga, alli cawayta tarichishayqui. ²⁹ Shimita wiycunquiman. Imanuy cawashätapis ricacunquiman. Tantiyacujmi cä. Alli shungu cä. Allilla cawachishayqui. ³⁰ Shimiga mana sasachu čharcunayquipaj. Mana yamacanquipächu.»

12

Diyawardačhu ríguta shipishan San Marcos 2.23-28; San Lucas 6.1-5

¹ Juc cuti diyawarda junajčhu rígu cantunpa puríshijnincunawan Jesús aywaycaran. Puríshijnincunana yargar ríguta shipircur-shipircur cupacačhärir, učhuran.

² Cupacačhashanta ricar, waquin fariseucuna tapuran: «¿Imanirtaj diyawardačhu puríshijniquicuna ríguta cupacačharcaycan? Diyawardačhu Tayta Diosninchipa shiminta čharcurmí, mana arunchichu» nir.

³ Chaura Jesús niran: «¿Auquillunchi David imata rurashantapis manachu musyanqui? Tayta Diosninchipa shiminta liguiycarsi, ¿yargaywan David imata rurashantapis manachu tantiyacushcanqui? ⁴ Yargay chariptin Tayta Diosninchipa wasinman yaycurir, jarashan tantanta micuran. Cúracunallapa micunan caycaptinsi, yanaguincunawanraj David micupäcuran. ⁵ ¿Moiséspa shimintapis manachu liguishcanqui? Shiminčhu nin: «Diyawarda captinsi, Tayta Diosninchipa wasinčhu aruj cüracuna arucunman. Arursi, juchata mana aparicunchu.»

⁶ «Sumaj wiyamay. Tayta Diosninchipa wasinta ama manchapacunquichu. Manchäga quiqiüta sumaj manchapacamanquiman. ⁷ Jamcuna Tayta Diosninchipa shiminta mana tantiyacunquirächu. Shiminčhu nin: «Jaramänayquitachu mana munaycä; manchäga runa-masiquita llaquipänayquitam.»* Shiminta tantiyacur, puríshimajnïcunata mana tumpanquimanchu caran: «Juchata aparicusha» nir. Paycunaga juchata mana aparicushachu. ⁸ Tayta Diosninchichi cačhamasha. Chaymi diyawardapis maquičhu caycan. Diyawardačhu runa imata rurananpäpis, imata mičhänäpäpis maquičhu caycan.»

Maquin wañush runata Jesús allchacächishan San Marcos 3.1-6; San Lucas 6.6-11

⁹ Chaypita aywacur, juc shuntacäna wasiman Jesús čhayaran. ¹⁰ Maquin wañush runapis caycaran. Waquin runa achäquita ashinan-cashallan Jesústa tapucuran: «Tayta, ¿diyawarda caycaptin, Moiséspa shimin auninchu jishyačhucunata allchacächinanchipaj?» nir.

¹¹ Jesúsnra niran: «Diyawarda caycaptin japallan uyshayqui učhcuman shicwaptin, ¿manachu utgaylla jurgurinquiman? ¹² Uyshatapis cawanapaj jurguycar, ¿jishyačhu runata manachu yanapäšhuwan? Chaymi diyawarda captinsi, yanapänacunanchi camacan.» ¹³ Jinarcur maquin wañush runata Jesús niran: «Maquiquita chutapacuy.» Chutapacuriptin, maquin änir allchacäcuranna. Juc-caj maquin-jina allina ricacuran. ¹⁴ Fariseucunam ichanga ullgush llucshicur, parlanacuran Jesústa wañurachinapaj.

Unay willacujpa shimin čharcushan

¹⁵ Chaura wañuchiya munashanta musyar, Jesús aywacuran. Aywacuptinsi, achcaj runa aywähiran. Jishyačhucunatapis allchacächir, piňaparan: ¹⁶ «Pí cashätapis ama willacunquichu» nir. Ricsichinanta mana munaranchu. ¹⁷ Chaynuypa unay willacuj Isaíaspa shimin čharcucaran. Tayta Diosninchichi musyachiptin, Isaías unay niran:

¹⁸ «Mä, wiyamay. Mandu-rurajniä quiqiü acracushcä.
Payta llaquï.
Shungüwan sumaj tincun.

Espíritu Santupa maquinčhu purichishaj.

* **12:7** Oseas 6.6.

Llapan runacunata may-chaychhu juyarpis, shacyächinga:
 «Maquinchhu Tayta Diosninchu puriycächishunqui» nir.

19 Piwanpis mana piñanacungachu.

Mana tincupänacungachu.

Runa ricay mana rimangachu.

20 Wañunächi runacunatapis alli ñawinpa ricanga.

Pishipacuj wacchacunata llaquipanga.

Llapan runa Tayta Diosninchipa maquinchhu alli cawananta munar, llapantapis ru-ranga.

21 Llapan runa may-chaychhu juyarpis, payman yupachicunga.»*

Jesústa pampaman churashan

San Marcos 3.20-30; San Lucas 11.14-23; 12.10

22 Chaypita supay puclacushan runata Jesúsman apamuran. Chay runa mana ricaranchu. Mana rimaranchu. Jesús allchacächiptinmi ichanga, shiminpis rimaricuranna. Ñawinpis ricaranna. **23** Chayta ricar, runacuna mancharicäcushpan tapunacuran: «¿Cay runa washämäshunchuraj? ¿Rasunpachuraj unay mandaj Davidpa willcan?» nir. **24** Runacuna rimashanta wiyarmi ichanga, fariseucuna Jesústa pampaman churaran: «Supaycunapa mandajnin Beelzebulta jayararshi, supaycunata jarguycan. Mana Tayta Diosninchitachu jayaraycan» nir.

25 Shungun yarpashanta musyar, Jesús tincuchiypa niran: «Juc marcačhu runacuna quiquin-pura ticrapanacurshi, wacpa-caypa aywacärin. May marcačhüpis, may wasichüpis majanwan ticrapanacur, raquicaymanshi chayan. **26** Mayur supaypis supaymasinwan ticrapanacur, ima ruraytapis mana camäpacunmanchu, ¿au? Raquicarraquicar, ushyacäcunga. **27** ¿Imanirtaj Beelzebulta jayararraj supaycunata jargushäta yarparcaycanqui? Mä, tapucushayqui. Jamcunapis supayta jargur, ¿pitataj jayaranqui? ¿Tayta Diosninchita jayararchu, supayta jayararchu? Beelzebulta jayararraj jargupti, jamcunapis payta jayararrächi jarguycanqui. **28** Sumaj tantiyacunquiman. Tayta Diosninchu camacächiptin, munayniwan supaycunata jargur, Tayta Diosninchu munayniuj cashanta musyachicuyca. Chayta ricar, maquinchuna Tayta Diosninchu runacunata puriycächishantapis tantiyacunquiman. **29** Tincuchiypa tantiyachishayqui. Juc runash quiquinpa imancunata sumaj rican. Chayshi sumaj callpayuj yaycurraj, wasiyulta mancurnan. Jinarcurräshi imancunatapis ushyajpaj apacun. **30** Chaymi Tayta Diosninchu cačhamashanta mana aunirga, chiquircaycämanqui. Tayta Diosninchipa shiminta willacupti mana yanapämarga, chapata rurarcaycämanqui. Runacunatapis manchaycächinqui.

31 «Sumaj wiyamay. Runacuna tucuy-jinanpa juchata aparicun. Chaypis wanacuptin Tayta Diosninchillaquipar, juchanta mana yarparanganachu. Tayta Diosninchu Espíritu Santuwan allita ruraycaptinsi: «Rurashanta supaypa maquinchi» nir runa ashllir ushyaptinmi ichanga, Tayta Diosninchu juchanta mana imaysi jungangachu. **32** Tayta Diosninchu cačhamashanta mana aunir tincupämaptinsi, Tayta Diosninchu juchanta mana yarparanganachu. Allita ruranäpaj Espíritu Santu camacächiptin: «Payga supayta jayaran» nir tincupaptinmi ichanga, Tayta Diosninchu juchanta mana imaysi jungangachu.

Wayuyninpita ricsichicushan

San Lucas 6.43-45

33 «Chay-jina yürata wayuyninpá ricsinchu. Alli yüra mishquijta wayun. Wañunächi yüram ichanga wamajllata wayun. **34** Tumpamashayquipita jamcuna supaypa wawan carcaycanqui. Juchallačhu arurcaycanqui. Shunguyqui yarpashanta musyachicur,

* **12:21** Isaías 42.1-4.

tucuytapis rimanqui. ³⁵ Tayta Diosninchita manchapacuj runa Tayta Diosninchipa shungun munashallanta ruran. Juchačhu aruj runam ichanga llutanta ruran shungun llutanta yarpaptin. ³⁶ Sumaj wiycäriy. Cay pacha ushyacaptin, llapan runata ima-imata rimashanpitapis Tayta Diosninchi ñauquinga. ³⁷ Shiminman-tupu runacunapa juchanta jurgapanga. Shimillayquipita alli cawaytapis tarinquipaj. Ñacaymanpis ćhayankipaj.»

Jesústa ashipashan

San Marcos 8.12; San Lucas 11.29-32

³⁸ Chaura waquin fariseucunawan Moiséspa shiminta yačhajcuna niran: «Tayta Jesús, Tayta Diosninchi camacächiyninpa mä, imallatapis ruray.» ³⁹ Jesúsna niran: «Jamcuna juchallačhu arunqui. Jananpachicuj carcaycanqui. Tayta Diosninchi camacächiyninpa imallata ruranäta munaptiquisi, mana rurashächu. Chaypis tantiyayta munar, unay willacuj Jonáspa willapanta yarparanquiman. ⁴⁰ Jonásga quimsa pagas, quimsa junaj jatun piscädupa pačhančhu caran. Chay-jina nuwapis Tayta Diosninchi cačhamash captin, quimsa pagas, quimsa junaj pacha rurinčhu pamparäshaj.

⁴¹ «Jucha aparicushanpita llapan runata Tayta Diosninchi ñauquiptin, Nínive marca runacunapis ñauquishunquipaj: «Tayta Diosninchi llaquipämashanta Jonás willapämaptin, wanacärishcä. Jamcunam ichanga mana wanacärishcanquichu» nir. Jonásga Tayta Diosninchipa willacujnин carsi, nuwaman mana tincushachu. ⁴² Sumaj tantiyacunquiman. Cay pacha ushyacaptin, llapan runata jucha aparicushanpita Tayta Diosninchi ñauquiptin, Saba marca mandaj warmipis cawarimunga. Paymi ñauquishunquipaj: «Mandaj Salomónpa shiminta wiyar, Tayta Diosninchi llaquipäcuј cashanta tantiyacushcä. Jamcunam ichanga mana tantiyacärishcanquichu» nir. Chay warmi carupitapacha shamuran mandaj Salomón rimashanta wiyananpaj. Wiyar, Tayta Diosninchipa shiminta ćhasquicuran. Mandaj Salomón yačhaj carsi, nuwaman mana tincushachu. Chaypis shimiňta wiyacuya mana munanquichu.

Runaman supay cutishanpita willapashan

San Lucas 11.24-26

⁴³ «Supay imata rurashantapis tantiyacunquiman. Runapita jargush captin, chunyajčhiši purin. Jamaytapis manash tarinchu. ⁴⁴ Mayčüpis jamayta mana tarir, yarpačhacun: «Chay runaman cuticushaj» nir. Cutirshi, chay runata pichapacush wasita-jina, jäcuycaj wasita-jina tarin. ⁴⁵ Chayshi jančhis mas juyu supay-masincunata pushacurcur runačhu tiyananpaj cutin. Supaycuna cutiptin, juyu cashanpitash masna runa juyuyacäcun. Chay runa juyuyacäcushan-jina jamcunapis juchallačhu arur, juyuyacäcunquipaj.»

Mamanwan wauguincuna Jesústa ashishan

San Marcos 3.31-35; San Lucas 8.19-21

⁴⁶ Juturaj runacunata parlapaycaptillan, Jesúspa mamanwan wauguincuna ćhayaran. Paywan parlayta munaran. ⁴⁷ Chaymi juc runa niran: «Tayta Jesús, mamayquiwan wauguicunash jawačhu shuyarpaycäshunqui. Jamwan parlaytash munaycan.»

⁴⁸ Willaptin, Jesús niran: «¿Pitaj mamä? ¿Pitaj wauguicuna?» ⁴⁹ Purishijnincunata ricärir, niran: «Jamcuna mamä, wauguicuna canqui. ⁵⁰ Pi-maypis janaj pachačhu Papänipa shungun munashanta rurajcunaga mamäwan, wauguíwan, paníwanmi tincun.»

13

Murupacujwan tincuchiypa willapashan

San Marcos 4.1-9; San Lucas 8.4-8

¹ Chay junaj wasipita aywacur, jatun püsu cantunčhu Jesús jamacuycuran.
² Jamaraycaptin, achcaj runa ćhayapurán. Chay-chicajta ricar, willapäcunananpaj bütiman

jigacurcuran. Runacunam ichanga püsupa cantullančhu juturpaycaran. ³ Chaymi imawanpis tincuchiyllapa tantiyachir, Jesús niran:

«Juc runash murupacuj aywaran. ⁴ Machiptinshi, waquin muru caminuman čhayasha. Caminuman čhayajta pichuysacunash pashacurcusha. ⁵ Waquin murunash jarapshu allpaman čhayasha. Jarapshu captinshi, juclla wiñacarcamusha. ⁶ Ichanga janallančhu sapin captin inti rupaptinshi, chaquicäcusha. ⁷ Waquin murunash shata-shataman čhayasha. Shata atayäcurcurshi, muru wiñamujtapis jarwashtärachisha. ⁸ Waquin murunash alli allpaman čhayasha. Sumajshi wayusha. Juc murullapitash waquin wayusha juc paćhacta (100), waquinnash sujta čhuncata (60), waquinnash quimsa čhuncata (30). ⁹ Rinriyujmi canqui. Tantiyacunquiman.»

Tincuchiypa willapashanpita tantiyachishan

San Marcos 4.10-12; San Lucas 8.9-10

¹⁰ Purishijnincunana lädunman ashurcur, Jesústa tapuran: «¿Imanirtaj tincuchiyllapa willapäcunqui?» nir.

¹¹ Jesúna niran: «Jamcunata mayna tantiyachishcaj: ‹Maquinčhu cawananchipaj Tayta Diosninchí shuyaraycämancchi› nir. Waquincunatam ichanga mana tantiyachirächu.

¹² Wiyacuptin, pitapis Tayta Diosninchí sumaj tantiyachinga. Mana wiယacujcunatam ichanga ichicllata tantiyashallantapis jungaycachinga. ¹³ Chaymi imawanpis tincuchiyllapa tantiyachi sumaj tantiyacunapaj. Ichanga ima-imata rurashätapis ricaycarsi, ñawiyaj-tucun. Wiyaycämarsi, rinriyaj-tucun. Mana tantiyaj-tucunchu. ¹⁴ Chayrämi willacuj Isaíaspa shimin čharcucan. Yarpashanta Tayta Diosninchí musyachiptin, Isaías unayna niran:

«Wiyajcuna wiယaycarsi, mana tantiyacunchu.

Ricajcuna ricaycarsi, tantiyayta mana munanchu.

¹⁵ Cay runacuna rumi shungum.

Rinriyuj carsi, upa-tucun mana wiyananpaj.

Ñawiyuj carsi, japrä-tucun mana ricananpaj.

Alli shungu carmi ichanga ñawiyuj cashpan
rurashäta ricar, tantiyacunman.

Rinriyuj cashpan shimita wiyar, tantiyacunman.

Shungunman čhayaptin, juchata aparicushanpitapis wanacunman.

Nuwapis tucuypita allchacächiman.*

¹⁶ «Purishimajcuna, jamcunaga cushicärinquiman. Llapan rurashäta ricanayquipäpis, shimita wiyanayquipäpis Tayta Diosninchí yanapaycäshunqui. ¹⁷ Sumaj tantiyacunquiman. Unay willacujcunapis, Tayta Diosninchita manchapacuj runacunapis ricanayta munaran. Ima-imata rurashätapis ricayta munaran. Shimütapis wiyayta munaran. Ichanga mana camäpacuranchu.

Murupacujpita tantiyachishan

San Marcos 4.13-20; San Lucas 8.11-15

¹⁸ «Canan murupacujwan tincuchiypa willapashajta sumaj tantiyacuy. ¹⁹ Caminu chucru shungu runacunawan tincun. Chucru shungu runacuna Tayta Diosninchipa shimita wiyarpis shungunman mana čhayaptin, mana tantiyacunchu. Chaymi yan-galla tantiyacushallantapis supay jungaycachin Tayta Diosninchipa witicunapaj.

²⁰ «Jarapshu allpana janan shungu runawan tincun. Paycuna cushi-cushilla Tayta Diosninchipa shimita čhasquicun. ²¹ Chaypis mana sapichashan-jina janan shungulla. Chaymi Tayta Diosninchita wiyacushan-janan ñacaycuna čhayapuptin, witicurin. Mana ićhipunchu.

* **13:15** Isaías 6.9-10.

²² «Shata wiñanan allpana tincupacaj runawan tincun. Paycuna Tayta Diosninchipa shiminta wiyan. Wiyarsi, cay pachačhu imapäpis alläpa yarpačhacur, jillayllata ashir tincupacan. Chaymi Tayta Diosninchipa shiminta wiyash carsi, Tayta Diosninchipa shungun munashanta mana ruranchu.

²³ «Alli allpana wiyacuj runawan tincun. Paycuna Tayta Diosninchipa shiminta sumaj tantiyacur, manchapacur cawan. Juc murulla alli wayushan-jina allita rurar cawan. Alli muruga wayun pačhacta (100), waquinna sujta čhuncata (60), waquinna quimsa čhuncata (30).»

Rīguwan jyujiwapita tincuchiypa willapashan

²⁴ Yapay tincuchiypa willapäcur, Jesús nirán: «Tayta Diosninchipa maquinčhu cawaypita tantiyachishayqui. Juc runash čacranman rīguta murusha. ²⁵ Llapan puñucashancamansi chiqui runa chacayllapa aywarcur, jyujiwata rīgu murushan jananman mururisha. Jinarcurshi jishpicusha.

²⁶ «Rīgu atayar shicshiyta jallaycuptinshi, jyujiwapis shicshiyta jallaycusha.

²⁷ Mincaynincunanash čacrayujta tapusha: «Tayta, alli murullata murushcanqui, ¿au? ¿Imanaypataj jyujiwaga wiñamusha?» nirshi. ²⁸ Čacrayujnash nirán: «Chiquimashpan juc runa murupaycamasha.» Mincaynincunanash tapuran: «¿Llupiramushächu?» nir.

²⁹ Čacrayujnash nirán: «Mana. Jiwata llupiptiqui, rīgupis llupicäcungapaj. ³⁰ Rīguwan tallushalla pugunancaman cacuchun. Puguptin, rutüshimajcunata nishaj: «Puntata jyujiwacunallata shuntarcur, wancuy. Jinarcur rupachiy. Rīgutam ichanga wasíman shuntay.» » »

Ñäpus muruwan tincuchiypa willapashan

San Marcos 4.30-32; San Lucas 13.18-19

³¹ Yapay tincuchiypa willapäcur, Jesús nirán: «Tayta Diosninchipa maquinčhu cawajcuna ñäpus muruwan tincun.* Juc runash wirtanman ñäpusta mururan. ³² Chay muruga llapan murupitapis mas acapallah. Wiñamurshi ichanga, waquin jačhacunapitapis mas atayan. Yüranpis sumaj atayäcurcun. Callapancunačhüpis pichuysacunasi jishcun.»

Libadürawan tincuchiypa willapashan

San Lucas 13.20-21

³³ Yapay tincuchiypa willapäcur, Jesús nirán: «Tayta Diosninchipa maquinčhu cawajcuna libadürawan tincun. Tantata rurananpaj juc warmi quimsa arüba arinatash libadürawan chapusha. Chapurächisha llapan arinata jacachinancamansi.»

Tincuchiyllapa willapäcunapaj cashan

San Marcos 4.33-34

³⁴ Juturashan runacunata imawanpis tincuchiyllapa Jesús willapäcuran. Imapis tincuchinapaj mana captin, jinalla mana tantiyachijchu. ³⁵ Chaymi juc willacuj rimashan čharcuran. Tayta Diosninchi rimachiptin, unayna nirán:

«Imawanpis tincuchiyllapa willapäcushaj.

Shungulläčhu musyashäta willapäcushaj.

Cay pachata camashanpita-pacha mana musyachishäta tantiyachicushaj.» *

Jyujiwapita tantiyachishan

³⁶ Chaypita llapan runata jaguiycur, wasinman Jesús cuticuran. Wasipina purishijnincuna nirán: «¿Imamantaj čhacračhu murupacushan jyujiwata tincuchishcanqui?»

* **13:31** Israel marcačhu wiñaj ñäpus ricsishanchi ñäpuswan mana tincunchu. Chay ñäpus wiñar, quimsa ricracaman atayan. * **13:35** Salmo 78.2.

³⁷ Jesúsnra niran: «Tayta Diosninchia caáchamasha. Rígu muruj runawan tincü. ³⁸ Chacrama llapan runawan tincun. Rígu muruna Tayta Diosninchipa maquinčhu cawajcunawan tincun. Juyu jiwanra supaypa maquinčhu cawajcunawan tincun. ³⁹ Chiquimajna supaywan tincun. Rutuy junajna cay pacha ushyacaywan tincun. Rutujcunana anjilcunawan tincun.

⁴⁰ «Juyu jiwa ninawan rupachishan-jina cay pacha ushyacánan junajčhu canga. ⁴¹ Tayta Diosninchipa caáchan carmi, llapan runacunata maquičhu purichii. Chaymi anjilcunata caáchamushaj waquin runata raquinanpaj. Runa-masinta juchaman jančhash captin, juchačhu arush captin, shuntarcur ñacayman jaycuringa. ⁴² Ratataycaj ninaman jaycuringa. Chayčhu atayparaj waganga. Juyupa ñacar, quiruntapis učhunga. ⁴³ Tayta Diosninchipa shiminta wiyacujcunam ichanga Tayta Diosninchipa ñaupančhu cuyaylapaj juturanga. Inti achicyashan-niraj ricacanga. Rinriyujmi canqui. Tantiyacunquiman.

Pamparaj jillaywan tincuchiypa willapashan

⁴⁴ «Tayta Diosninchipa maquinčhu caway čacračhu jillay pamparajwan tincun. Juc runash čacračhu jillay pamparajta tarir, jinallanman yapay pampaycun. Jinarcurshi cushicuylawan jillay pamparaj čacrata rantin. Rantinanpášhi quiquinpa imancunatapis ushyaypa ranticuycun.

Achic-achicyaycaj rumiwan tincuchiypa willapashan

⁴⁵ «Tayta Diosninchipa maquinčhu caway achic-achicyaycaj rumiwan tincun. Ranticujcunash sumaj achicyaycaj rumita ashin. ⁴⁶ Sumaj achic-achicyaycaj rumita tarirshi, llapan imancunatapis ranticuycun. Llapanninta ranticuycurshi, achic-achicyaycaj rumita rantin.

Ridiwan tincuchiypa willapashan

⁴⁷ «Tayta Diosninchipa maquinčhu caway ridiwan tincun. Ridita yacuman jitarga, tucuy-niraj piscädutash charin. ⁴⁸ Ridiman piscädu juntaptin, pallgamanshi jurgun. Jinarcurshi acran. Allicajtash canistaman wiñan. Mana allicajcunatašh ichanga wicaparin. ⁴⁹ Chaynuymi canga cay pacha ushyacaptin. Anjilcuna shamur, Tayta Diosninchipa shiminta wiyacujcunatapis, juyu runacunatapis acranga. ⁵⁰ Juyu runacunataga ratataycaj ninaman jaycuringa. Chayčhu atayparaj waganga. Juyupa ñacar, quiruntapis učhunga.»

⁵¹ Chaura llapanta willapariycur, Jesús tapuran: «¿Yačhachishäta llapantachu tantiyashcanqui?» nir. Paycunana niran: «Au. Tantiyashcämi, Tayta.» ⁵² Jesúsnra niran: «Tayta Diosninchipa maquinčhu cawayta yačhacuna wasiyuj runawan tincun. Wasiyuga allitash jipirächin. Pascar, mushujcunatapis, unay-cajcunatapis ricachicunshi.»

Nazaret marcačhu Jesús willapäcushan

San Marcos 6.1-6; San Lucas 4.16-30

⁵³ Tincuchiypa willapäcurecur, Jesús aywacuran. ⁵⁴ Marcanman cuticur, shuntacána wasičhüna willapäcuran. Runacuna tantiyayta mana atipar, tapunacurcaycaran: «Jesús sumaj yačhan, ¿au? ¿Mayčhüray llapanta yačhacusha? ¿Imanuyparaj Tayta Diosnillanchi camacächishancunata ruran? ⁵⁵ Payga carpintiru Josépa wamrallan, ¿au? Mamanpis, ¿manachu María? Waguincunapis Santiago, José, Simón, Judas, ¿au? ⁵⁶ Panincunawanpis waran-warán tincuycanchi, ¿manachu? Jinan runa caycar, ¿imanuyparaj llapanta yačhacusha?»

⁵⁷ Chaynuv nir Jesústa pampaman čhuraran. Jesúsnra niran: «May-chayčüpis alli ñawinpa Tayta Diosninchipa willacujninta rican. Yurishan marcačhumi ichanga marca-masincunapis, yawar-masincunapis pampaman čhuran. Ricaytapis mana munanchu.»

⁵⁸ Runacuna payman mana yupachicushanpita Tayta Diosninchia camacächiyinpa mana imatapis ruranchu. Juc-ishcay jishyačhucunallata allchacächiran.

14

*Ushyachicuj Juanta wañuchishan
San Marcos 6.14-29; San Lucas 9.7-9*

¹ Chay wichan Galilea marcacunata mandaj Herodes Jesús ima-imata rurashantapis mayaran. ² Wiyashpan yanapajnincunata niran: «‘Jesús’ nishan runa Ushyachicuj Juanchi wañushanpita cawarircamusha. Chaychi munayniuj ricarimusha Tayta Dios-nillanchi camacächishancunata rurananpaj.»

³⁻⁴ Ushyachicuj Juanta piñacushallanpita quiquin mandaj Herodes unayna mancurnarcachir, carsilman wiçgachish caran. Juan piñacurunaj: «Tayta Herodes, mama Herodíasga wauguiqui Felipupa warminmi. Wauguiquipa warminta ama jiçhunquimanchu» nir.

⁵ Mandaj Herodes wañurachiyta munarsi, runacunata manchacuran. Runacuna niran: «Ushyachicuj Juan Tayta Diosninchipa willacujnинmi.»

⁶ Juc junaj mandaj Herodes diyanta tünaran. Tünaçhu mama Herodíaspa jipash-ninraj sumaj jachwaptin, mandaj Herodes cushicuran. ⁷ Sumaj cushicur, jipashta niran: «Shunguyqui munashanta mañacamay. Munaptiqui, imätapis juycushayquim.»

⁸ Jipashna maman shacyächiptin, mandaj Herodesta niran: «Ushyachicuj Juanpa umanta mañacushayqui. Juclla matiwan macyamay.»

⁹ Chaura mandaj Herodes juyupa llaquicäcuran. Llaquicursi, jurpancunapa ñaupançhu aunish cashpan mañacushanta ćharcuchiran. ¹⁰ Chaymi mincaynincunata caçharan Juanpa umanta rugunanpaj. ¹¹ Mincaynincunana Juanpa umanta änir matillawan jipashta macyaycuran. Jipashna mamanta juycuran. ¹² Juanpa purishijnincuna aywarcur ayanta shuntaran. Pampaycäriran. Jinarcur Jesústa willaran.

*Pichga waranga runata Jesús jarashan
San Marcos 6.30-44; San Lucas 9.10-17; San Juan 6.1-14*

¹³ Juanta wañuchishanta mayar, Jesús bütiman jigarcuran. Püsuta chimpas, chunyaj pachaman aywacuran. Shuyninpa aywacushanta mayar, chay-tucuy marcapita runacuna ćhaquillapa tariparan. ¹⁴ Bütipita Jesús llucshirir achcaj runata ricar, llaquiparan. Jishyaćhucunatapis allchacächiran.

¹⁵ Pacha chacanaycaptin, purishijnincuna Jesústa niran: «Chunyaj pachaçhu carcaycanchi. Pachapis chacanaycan. Runacuna marcacunaman aywacuchun micuyta rantircur micunananpaj.»

¹⁶ Jesúsnra niran: «Ama aywacuchunchu. Jamcuna jaranguiman.» ¹⁷ Paycunana niran: «Pichga tantatawan ishcay piscädullata chararcaycä.» ¹⁸ Jesúsnra niran: «Mä, apamuy.»

¹⁹ Jinarcur llapan runata pashpallaman jamachiran. Pichga tantatawan ishcay piscäduta aptacurcur janaj pachaman ricärir, niran: «Taytallau Tayta, ima allish tarichillämashcanqui.» Nircur tantacunata paquircur-paquircur, purishijnincunata macyaran. Paycunana llapan runata jararan. ²⁰ Runacunana puchupacushancaman micuran. Micurcuptin, puchupacushanta ćhunca ishcaywan (12) canista juntataraj shuntaran. ²¹ Micujcunata yupaptin, ullgulla pichga waranga-yupay (5,000) caycaran. Warmicunatawan wamracunatam ichanga mana yuparanchu.

*Yacu jananpa Jesús aywashan
San Marcos 6.45-52; San Juan 6.16-21*

²² Jinarcur chimpapa ñaupacärinanpaj purishijnincunata bütiman Jesús jigachiran. Nircur llapan runata wasinman-caman cutircachiran. ²³ Llapan aywacuriptin, quiquil-lanna Jesús puntaman aywaran Tayta Diosninchita mañacunananpaj. Mañacuycaptillan, pachapis chacacäcuran.

²⁴ Purishijnincunana bütowan jatun püsu ćhaupinta aywaycaran. Chicchinpa wacmancayman purichicuycaran. Wayrapis chapacačhaycaran. ²⁵ Pacha waraycaptillan, yacu janallanpa Jesús taripaycaran.

²⁶ Purishiñincunana yacu jananpa taripaycajta ricar mancharir; japačhacärian: «Alma shaycämun» nir.

²⁷ Jesúsna niran: «Ama manchacamaychu. Quiquimi caycä.» ²⁸ Pedruna niran: «Tayta, rasunpa quiquipi cashpayqui, yacu janallanpa shamunäpaj camacächiy.» ²⁹ Jesúsna: «Shamuy, ari» nir Pedruta jayaran. Payna bütipita llucshirir, yacu janallanpa Jesúsman aywaran. ³⁰ Yacu büchiypa-büchicurcupintim ichanga, mancharicäcuran. Mancharir, yacu rurinman challpucäcuycaran. Chaymi japačhacuran: «Washämay, Washämay, Tayta» nir. ³¹ Jesúsna juclla maquinpita Pedruta jurguran: «Janan shungulla runa, ¿imanirtaj mana yupachicamanquichu?» nir.

³² Ishcanin bütiman jigacurcupin, wayrapis čhawacäcuran. ³³ Bütičhu aywajcunana Jesúspa ñaupanman jungurpacuycuran: «Rasunpa Tayta Diosninchipa Wawan canqui» nir.

Genesaret quinrančhu jishyačhucunata Jesús allchacächishan

San Marcos 6.53-56

³⁴ Jatun püsuta chimparir, Genesaret marcaman čhayaran. ³⁵ Chay runacuna Jesústa ricsicucur, chay-tucuypa willanacärian. Chaymi jishyačhucunata Jesúsman apamuran. ³⁶ Jishyačhucunana mañacuran: «Tayta Jesús, müdanayquipa cantullantapis yatay-cachillämay, ari» nir. Yataycujcuna änir allchacäcuran.

15

Jucha ruray runapa shungunpita ricarishan

San Marcos 7.1-23

¹ Chaypita waquin fariseucunawan Moiséspa shiminta yačhajcuna Jerusalén mar-capita čhayarcur, Jesústa tapuran: ² «¿Imanirtaj purishiñiquicuna auquillunchicuna yačhachishanta jungaycun? Maquinta awicurinman. Janra maquinwan micur, Tayta Diosninchipa ricay ñawinčhu llutanta ruraycan» nir.

³ Jesúsna tapuran: «¿Imanirtaj Tayta Diosninchipa shiminta jungaycur, auquilluyquicuna yačhachishushayquita čharcurcaycanqui? ⁴ Tayta Diosninchipa shimin nin: «Mamayqui-taytayquita alli ricanqui. Maman-taytanta ashllijcuna ama cawachun-pishchu.»* ⁵ Jamcunam ichanga mamayqui-taytayquita mana yanapänayqui-cashan nircaycanqui: «Cananga imätapis llapantam Tayta Diosninchipa maquinman čhurashcä. Yanapänajpaj mana puchunnachu.»

⁶ «Chaynuy nir pipis maman-taytanta mana yanapänanpaj shimiaycanqui. Auquilluyquicuna yačhachishushayquita rurar, Tayta Diosninchipa shiminta pampaman čhurarcaycanqui. ⁷ Janan shungulla carcaycanqui. Rasullantačhari Tayta Diosninchiri machiptin, willacuj Isaías unayna niran:

⁸ «Cay runacuna shimillanwan alliman čhuramaj-tucun. Shungunmi ichanga juccunata manchapacun.

⁹ Janan shungulla alliman čhuraman.

«Tayta Diosninchipa shimin allim» nirpis, runa yarpashallanta willapäcun.»*

¹⁰ Chaynuy nir llapan runata jayarcur, Jesús niran: «Llapaniqui wiymay. Shimüta sumaj tantiyacuy. ¹¹ Shiminchiwan micushanchiga, upushanchiga mana juchata apari-cachimanchichu. Shungunchičhu llutanta yarpashanchita rimarmi ichanga, Tayta Diosninchipa ricay ñawinčüpis jucha aparicuymán čhayachimanchi.»

¹² Purishiñincunana Jesúsman witircur, willaran: «Rimashayquita wiyar, fariseucuna ullgusham» nir. ¹³ Jesúsna niran: «Juyu jiwata sapintinta llupirir čhacrapita wicapashan-jina paycunatapis janaj pachačhu tiyaj Papäni illarachinga. ¹⁴ Chaymi fariseucunata

* **15:4** Éxodo 20.12; Deuteronomio 5.16; Éxodo 21.17; Levítico 20.9. * **15:9** Isaías 29.13.

ama rimapaychu. Paycunaga japra-masinta pushaycaj-jina. Pipis japra-masinwan pushanacur, ishcanin učhcuman tunicun.»

¹⁵ Chaura Pedro niran: «Tayta, micuypita rimashayquita tantiyachimay, ari.»

¹⁶ Jesúsna niran: «¿Jamcunapis manachu tantiyacärinquiraj? ¹⁷ Runa micushan pačhallaman čhayan. Micucurcur, ishpacurin. ¹⁸ Runa shungunčhu yarpashanmi ichanga juchaman čhayachin. Llutanta rimar, Tayta Diosninchipa ricay ñawinčhüpis juchata aparicun.

¹⁹ «Runa shungunčhu yarpačhacun juchata rurananpaj, runa-masinta wañuchicun nanopaj, majanta jananpachinanpaj, warmi-pačha runa-pačha cananpaj, suwacun nanopaj, llullapäcun nanopaj, pipa washantapis rimananpaj. ²⁰ Shungun yarpashanta rurar, Tayta Diosninchipa ricay ñawinčhüpis juchata aparicun. Maquinta mana awicullar micurmi ichanga, mana juchatachu aparicun. Tayta Diosninchitapis mana pampamanchu čhuran.»

Jäpa warmipa wamranta Jesús allchacächishan

San Marcos 7.24-30

²¹ Chaypita aywacur, Tiro marca quinranman, Sidón marca quinranman Jesús čhayaran. ²² Chay quinrančhu Canaán marca warmi tiyanan. Jäpa warmi carsi Jesústa ricar, japariyা niran: «Taytallau Tayta, unay mandaj Davidpa willcan canqui. Llaquipaycallämay, ari. Warmi wamräta supay pucllacusha. Juyupa ñacaycächin.» ²³ Yapariryaparir mañacuptinsi, Jesús mana wiyaj-tucuranchu. Puríshijnincunana niran: «Tayta Jesús, yanapaycuptiquíchi, alli canga. Japariyা mañacuycäshunqui.»

²⁴ Jesúsna niran: «Ujracash uysha-jina captin, Israel runacunallaman Tayta Diosninchicačhamasha, ¿au?»

²⁵ Warmina Jesúspa ñaupanman jungurpacuycur, mañacuran: «Tayta, yanapaycallämay, ari» nir. ²⁶ Chaura jäpa runacunata allguwan tincuchir, Jesús niran: «Wamracuna micushanta jičhurir allguta jaranchi mana camacanchu.» ²⁷ Warmina niran: «Rassllanta rimashcanqui, Tayta. Allgucunam ichanga wamracuna cačhapacushallantapis micucun.» ²⁸ Jesúsna niran: «Mamacha, allita rimashcanqui. Llapan shunguyquiwan yupachicamanqui. Mañacamashayqui camakan.» Niptin, juchluss warmipa wamran allchacäcuran.

Jishyačhucunata Jesús allchacächishan

²⁹ Chaypita Galilea püsu cantullanpa Jesús aywaran. Pataman yagaycur, jamacuycuran. ³⁰ Jamaraycaptin, achcaj runa čhayapuram. Wijrucunatapis, cumllucunatapis, jaſracunatapis, upacunatapis čhayachiran. Ima jishya charish captinsi, Jesúspa ñaupanman čhayachiran. Payna llapanta allchacächiran. ³¹ Upacuna rimaptin, cumllucuna allchacaptin, wijrucuna alli puriptin, jaſracuna ricaptin, runacuna jatunpa cushicuran. Tayta Diosninchita alliman čhuraran: «Israel runacunapa Tayta Diosnin sumaj munayniyuj» nir.

Čhuscu waranga runata jarashan

San Marcos 8.1-10

³² Puríshijnincunata shuntarcur, Jesús niran: «Cay runacunata llaquipämi. Quimsa junajna puríshiyämachi. Micunänäpis mana canchu. Micünillata wasinman cačhaptinchi, shungunpis ushyacäcunga.»

³³ Puríshijnincunana niran: «Chunyaj pachačhu carcaycanchi. ¿Cayčhu tantata tarishuwanchuraj? Runacunapis chay-chicajmi caycan.»

³⁴ Jesúsna tapuran: «¿Ayca tantatataj chararcaycanqui?» nir. Tapuptin, niran: «Jančhis tantatawan ishcay-quimsa piscädullata.»

³⁵ Chaynuy niptin, llapan runata pampallaman jamachiran. ³⁶ Jančhis tantata, piscäduta aptacurcur, Jesús niran: «Taytallau Tayta, ima allish tarichillämashcanqui.»

Jinarcur paquircur-paquircur, puríshijnincunata macyaran. Paycunana llapan runata aypuran.

³⁷ Runacunana puchupacushancaman micupacäriran. Puchupacushanta shuntaptin, jančhis canistamanraj juntaran. ³⁸ Micucunata yupaptin, ullgulla čhuscu waranga (4,000) caran. Warmitawan wamracunatam ichanga mana yuparanchu. ³⁹ Micucurcuptinna, llapan runata Jesús niran: «Wasiquicunaman cuticäriy.» Quiquinmi ichanga bütiman jigarcur, Magadán quinranman chimparan.

16

Jesústa ashipashan

San Marcos 8.11-13; San Lucas 12.54-56

¹ Juc cuti fariseucunawan saduceucuna Jesúsman čhayaran. Achäquita ashipashpan niran: «Tayta Diosninchi camacächiynipa mä, imallatapis ruray.»

² Jesúsnra niran: «Pacha lliuyaraptin: «Wara usyanga» nir rimapäcunqui. ³ Yana pucutayta ricar: «Canan tamyanga» nir rimapäcunqui. Tamyanantapis, usyanantapis tantiyanqui. Tayta Diosninchi cačhamashantam ichanga mana tantiyacunquichu, ¿au? ⁴ Jamcuna juchallačhu arunqui. Jananpachicuj carcaycanqui. Tayta Diosninchi camacächiynipa imallatapis ruranäta munaptiquisi, mana imatapis rurashächu. Tantiyayta munar, unay willacuj Jonáspa willapanta yarparanquiman.» Chaynuy nir Jesús aywacuran.

Libadürawan fariseucunata tincuchishan

San Marcos 8.14-21

⁵ Chaypita puríshijnincuna-ima Jesús Galilea püsuta chimparan. Puríshijnincunam ichanga micuy apayta jungaycäriran. ⁶ Jesúsnra niran: «Sumaj tantiyacunquiman. Fariseucunapa, saduceucunapa libadüranta ama čhasquipanquichu.»

⁷ Puríshijnincunana quiquin-puralla parlanacäriran: «Tantata mana apamushanchipitačhi wiyächipaycämanchi» nir.

⁸ Tapunacuycashanta musyar, Jesús niran: «¿Imanirtaj: «Tanta mana canchu» ninacucaycanqui? ¿Manachu yupachicamanqui? ⁹ ¿Pichga tantallata pichga waranga (5,000) runacunapaj aypächishäta jungaycushcanquinachu? Puchupacushanta, ¿ayca canista juntatataj shuntarayqui? ¿Tantiyayta manachu atipanqui? ¹⁰ ¿Jančhis tantallata čhuscu waranga (4,000) runapaj aypächishäta jungaycushcanquinachu? Puchupacushancunata, ¿ayca canista juntatataj shuntarayqui? ¹¹ ¿Imanirtaj mana tantiyacunquirächu? «Fariseucunapa, saduceucunapa libadüranta yatarunquiman» nirga, mana tantapächu rimaycarä.»

¹² Chayrämi puríshijnincuna tantiyacurisha. Jesús mana libadürapächu rimaycaran; manchäga fariseucunapa, saduceucunapa yarpashanta mana čhasquicunapaj.

Jesús Washäcuj cashanta Pedro rimaricushan

San Marcos 8.27-30; San Lucas 9.18-21

¹³ Chaypita Cesarea Filipo marca quinranman puríshijnincunawan Jesús aywaran. Aywarcaycashančhu puríshijnincunata tapuran: «Runacuna, ¿imatataj yarpan Tayta Diosninchi cačhamushan Washäcujpita?» nir. ¹⁴ Chaura puríshijnincuna niran: «Waqin runash nin: «Ushyachicuj Juan.» Waquinnash: «Elías» nin. Waquinnash: «Jeremías» nin. Waquinnash: «Pi carpis, Tayta Diosninchipa willacujnин canga» nin.»

¹⁵ Chaura quiquinunata Jesús tapuran: «Jamcunapäga, ¿pitaj cä?» nir. ¹⁶ Simón Pedruna niran: «Washäcujmi canqui. Cawaj Tayta Diosninchipa Wawanmi canqui.»

¹⁷ Jesúsnra niran: «Jonáspa wawan Simón, cushicunquiman. Janaj pachapita Papäni yanapashcashunqui pii cashätapis musyanayquipaj. Runapa shiminpitachu mana musyashcanqui.

¹⁸ «Rasunpa Pedro canqui. (Pedro» ninanga: «rumi» ninanmi.) Pedro, jutucay irmänucunata ricanayquipaj churashayqui. Paycunata supaypis mana ičhipungachu. Irmänucuna wañurpis, chacaj pachallačhu mana imaysi tiyacungachu. ¹⁹ Canan lläbi charaj-jina llapan irmänucuna maquiquičhu cawanga. Pipis cay pachačhu Tayta Diosninchipa maquinčhu cawayta munaptin, ricanqui. Mičhashayquita janaj pachačüpis Tayta Diosninchi mičhanga. Aunishayquitapis auninga.» ²⁰ Jinarcur purišhijnincunata piñaparan: «Tayta Diosninchi cačhamushan Washäcu cashäta pitapis ama willapan-quichu» nir.

*Wañuyman chayananta Jesús musyachicushan
San Marcos 8.31-9.1; San Lucas 9.22-27*

²¹ Chay junajpita-pacha purišhijnincunata Jesús niran: «Jerusalén marcemannay aywanä. Aywaptiga, mayur runacuna, mayur cüracuna, Moiséspay shiminta yačhaj runacuna juyupa ñacachimanga. Wañuchimanga. Wañuchimaptinsi, quimsa junajta Tayta Diosninchi cawarachimanga.»

²² Pedruna yatalla jayarcur, Jesústa piñacuran: «Tayta, rimashayqui ama camacächunchu. Tayta Diosninchipis ama camacächichunchu» nir.

²³ Jesúsnra ullgüparan: «Pedro, Supaymi canqui. Washata ayway. Chapata ama ruramaychu. Tayta Diosninchipa shiminta charcunäta mičhaycämanqui. Imatapis munapashayquitaga runacunalla ashin. Tayta Diosninchipa shungun yarpashanwan ichanga mana tincunchu» nir.

²⁴ Jinarcur purišhijnincunata Jesús niran: «Pipis purišhimaya munar, quiquinpa shungun munashanta ama ruranmanchu. Manchäga nuwa-janan ñacachiptinsi, rusčhu wañuchiptinsi shimita wiyacuchun. ²⁵ Ñacaytapis, wañuytapis manchacur maquicchu puriyta mana munar, ushyacayman chayangapaj. Maquicchu purir llapanninta jaguijcunam ichanga imaycamanpis Tayta Diosninchipa maquinčhu cawanga. ²⁶ Sumaj rícu yata tarirpis ushyacayman chayaptin, rícu cayninga, ¿imapäraj alli? ¿Rícu cayninga Tayta Diosninchipa ñaupanman chayachingachuraj? ²⁷ Washäcu car Tayta Diosninchi cačhamaptin, anjilcunawan-ima achic-achicyaycar shamushaj. Llapan runata Tayta Diosninchipa shiminta wiyacushanman-tupu tarichishaj. Wiyacujcunata alli cawayta tarichishaj. Mana wiyacujcunata ichanga ñacayman jaycushaj. ²⁸ Sumaj tantiya-cunquiman. Tayta Diosninchipa cačhan cashpä shamushaj llapan runata maquicchu purichinäpaj. Waquinniquiga manaraj wañullarmi, cutimunäta ricanquipaj.»

17

*Juc-nirajman Jesús ticracerishan
San Marcos 9.2-13; San Lucas 9.28-36*

¹ Chaypita sujta junajta Pedruta, Santiaguta, Santiagupa wauguin Juanta pushacur-cur, puntaman Jesús jígaran. ² Puntačhu quimsan purišhijnincunalla ricapaycaptin, achic-achicyaycajman Jesús ticraceriran. Inti-jinaraj jajllan achic-achicyäcurcuran. Müdananpis yuraj llutpiman ticraceriran. ³ Unay willacuj Moiséswan Elíaspis ricaripar-cur, Jesúswan parlaycaran.

⁴ Chaura Pedro niran: «Tayta Jesús, caychüga alli juyäcuymi. Munaptiqui, quimsa tacmata rurarishaj: jucta jumpaj, jucta Moiséspaj, jucta Elíaspaj.»

⁵ Pedro rimaycaptillan, quimsanta achic-achicyaycaj pucutay chapacurcuran. Pucutay rurinpitana Tayta Diosninchi nimuran: «Jesúsga cuyay Wawämi. Shungüman tincun. Shiminta wiyacuy.»

⁶ Rimamushanta wiyar, purišhijnincuna manchariywan pampaman llashtacaycäriran.

⁷ Paycunata yatacur, Jesús niran: «Jatariy. Ama manchariychu.» ⁸ Niptin, ri-cačhacerishančhu quiquillantana Jesústa ricaran. Pipis mana carannachu.

⁹ Puntapita yarpaycämushančhu purišhijnincunata Jesús willaparan: «Tayta Diosninchí cačhamasha. Canan ricashayquita pitapis ama willapanquichu wañushäpita manaraj cawarimushäcaman» nir. ¹⁰ Chaynuy niptin, paycuna tapuran: «¿Imanirtaj Moiséspa shiminta yačhajcuna willacun: ‘Elías shamushanpitara Washäcu shamunga’ nir?»

¹¹ Chaura Jesús niran: «Au, rasunpa Elías cutimur, runacunata anyapanga Tayta Diosninchipa shungun munashannuy cawanapaj. ¹² Chaypis tantiyacunquiman. Elías mayna shamusha. Shamuptinsi, runacuna mana ricsij-tucur shimintapis mana čhasquiranchu. Manchäga shungun munashallanta ruraran. Elíasta ñacachishan-jina ñacachimanga Tayta Diosninchipa cačhan caycaptisi.»

¹³ Chayrämi purišhijnincuna tantiyacuriran Elíaspaj rimar, Ushyachicuj Juanpaj rimay-cashanta.

Supay pucllacush wamrata Jesús allchacächishan

San Marcos 9.14-29; San Lucas 9.37-43

¹⁴ Puntapita yarpur runacuna juturpashanman čhayaptin, juc runa Jesúspa ñaupanman jungurpacuycuran: ¹⁵ «Tayta, llaquipämär yanapaycallämay, ari. Wamräta wañupay charin. Juyupa ñacan. Ninamanpis, yacumanpis yaparir-yaparir tunin. ¹⁶ Waquin purišhijniquicunata mañacurä allchacächinanpaj. Ichanga mana camäpacuranchu» nir.

¹⁷ Jesúsnra niran: «Jamcuna Tayta Diosninchiman mana yupachicunquichu. Juchal-lačhpis arunqui. ¿Imaycamanraj tantiyachishayqui? Mana yupachicamaptiquim, yamacashcäna.» Wamrapa papänintana niran: «Wamrayquita mä, apamuy.»

¹⁸ Wamranta čhayachiptin Jesús piňacuptin, wamrata supay cačhariycuran. Wamrana allchacash ricacuran.

¹⁹ Chaypita purišhijnincuna pacayllapa Jesústa tapuran: «¿Imanirtaj nuwacuna supayta jarguya mana camäpacushcächu?» nir.

²⁰ Chaura Jesús niran: «¿Imanirtaj Tayta Diosninchiman mana yupachicunquichu? Sumaj tantiyacunquiman. Yangallapis yupachicurga, tagay jatun puntata ninquiman: ‘Caypita washaman witicuy.» Niptiqui, änir witicunman. Imapis sasa mana cangachu.

²¹ (Chay-niraj supayta ayünunpawan Tayta Diosninchita mañacurraj jargunqui.)*

Wañuyman čhayananta yapay Jesús musyachicushan

San Marcos 9.30-32; San Lucas 9.43-45

²² Galilea quinranpa puriycashančhu purišhijnincunata Jesús niran: «Tayta Diosninchí cačhamasha. Chaypis juc runa charimar, juyu runacunapa maquinman čhayachimanga.

²³ Paycunana wañuchimanga. Quimsa junajtam ichanga cawarimushaj.» Niptin, purišhijnincuna juyupa llaquicuran.

Tayta Diosninchipa wasinpaj jillayta čhurashan

²⁴ Cafarnaún marcaman purišhijnincunawan Jesús čhayaptin, jillayta shuntajcuna Pedrura tapuran: «Mandajniqui, ¿manachu jillayta čhuran Tayta Diosninchipa wasinpaj?» nir.

²⁵ Pedruna niran: «Au. Čhuran.»

Wasiman cutir mana rimaptinraj, Jesús tapuran: «Simón Pedro, cay pachačhu caycaj auturdäcuna, ¿pitataj jillayta čhurachin: castancunatachu, jäpa runacunatachu?»

²⁶ Tapuptin, Pedro niran: «Jäpa runacunamat.» Jesúsnra niran: «Chaura castancuna jillayta mana čhuranchu, ¿au? ²⁷ Ima captinpis, jillayta čhurachij mana ullgüpämänanchipaj čhurashun. Juclla yacuman ayway. Punta-caj piscädu charishayquipa shiminta quičharir, juc jillayta tarinquipaj. Ishcaninchipaj jillayta čhuray.»

18

Alli ricash cayta ashijcunapita tantiyachishan

San Marcos 9.33-37; San Lucas 9.46-48

* ^{17:21} Waquin Bibliačhu cay birsículu mana canchu.

¹ Chay junajlla purishijnincuna Jesústa tapucuran: «Tayta Diosninchipa maquinchüga, ¿mayganitaj mayur cayman chayashaj?» nir.

² Tapuptin, juc wamrata jayarcur purishijnincunapa chaupinman ichichiran. ³ Jinarcur niran: «Sumaj tantiyacunquiman. Tayta Diosninchipa maquinchu cawanayquipaj wamracuna-jina imatapis mana yarpačhacullar cawanquiman. ⁴ Cay pachačhu wamracuna mana alli-tucushannuy cawaptiquiraj, janaj pachačhpis Tayta Diosninchu sumaj alli ñawinpa ricashunquipaj. ⁵ Yupachicamashayqui-janan cay-niraj wamrata alli ricar, nuwatapis alli ñawiquipa ricarcaycämanqui.

⁶ «Wamra-jina llapan shungunwan nuwaman yupachicamajcunata juchaman jančhajcuna wañuyman chayachun. Jatun-caray marayta cuncanman wallgaparcur, yacu ruri-ruricaman wicaparinman.

⁷ «Cay pachačhu imanayllapapis runa juchaman chayan. Juchanpita ñacanga. Runamasinta juchaman jančhacujcunam ichanga llaquipaypaj ñacanga.

⁸ «Maquiquipis, chaquiquipis juchata aparicachishuptqui muturir, wicaparinquiman. Maquiyaj, chaquiyaj caycar juchata mana aparicurna, Tayta Diosninchipa maquinchu imaycamanpis cawanquipaj. Maquiyuj, chaquiyuj caycar juchačhu aruptiquim ichanga, mana upij ninaman Tayta Diosninchu jaycurishunquipaj. ⁹ Ñawiui juchata aparicachishuptqui ujtirir, caruman wicaparinquiman. Ñawiynaj caycar juchačhu mana cawaycarna, Tayta Diosninchipa maquinchu imaycamanpis cawanquipaj. Ñawiuj caycar juchačhu cawaptiquim ichanga, mana upij ninaman Tayta Diosninchu jaycurishunquipaj.

Ujracash uyshawan tincuchiypa willapashan

San Lucas 15.3-7

¹⁰⁻¹¹ «Pipis wamra-jina llapan shungunwan nuwaman yupachicuptin, pampaman ama churanquichu. Yupachicamajcunata ricaj-anjilcuna Papänipa ricay ñawinchu cawarcaycan. Quiquinpa ñaupančhumi janaj pachačhu cawarcaycan.

¹² «Mä, yarpačhacushun. Juc runapash pačhac (100) uyshan caran. Jucta ujraycur, manachu waquinta juc pachaman jutuycur ujrashanta ashir purin? ¹³ Uj rash uyshanta tariycurshi, jatunpa cushicun. Isgun čunca isgunwan (99) uysha captinsi ujracashta tariptin, shungunpis jatunpash cushicun. ¹⁴ Janaj pachačhpis chaynuymi. Papäniui pipis ujracänanta mana munanchu. Llapan wawancunata llaquipan.

Irmänupa juchanta jugananpaj tantiyachishan

San Lucas 17.3

¹⁵ «Maygan irmänupis juchata aparicush captin, watucunqui. Chayar, quiquillanta piňacunqui. Piňacushayquita wiyacuptin, allina ricanacunqui. ¹⁶ Mana wiyacuptin, jucishcay irmänuta jayachinqui. Tayta Diosninchipa shiminčhpis nin: ‹Ishcay-quimsa runa wiyacuptin, piňacunqui.›* ¹⁷ Paycunata mana wiyacuptinmi ichanga, jutucaj irmänucunata willanqui. Irmänucuna piňacuptinpis mana wiyacuptinga, jargurinquiman: ‹Tayta Diosninchita mana manchapacunchu. Chiqui runa› nir.

¹⁸ «Sumaj tantiyacunquiman. Cay pachačhu mana wiyacujcunata jargushayquita Tayta Diosninchispis janaj pachačhu jargunga. Wiyacujcunata časquishayquita Tayta Diosninchispis čhasquinga. ¹⁹ Ishcaniqui parlanacuriycur maňacuptiqui, Papäni sumaj yanapäšhunqui imatapis ruranayquipaj. Cay pachačhu parlanacuptiqui, janaj pachačhpis wiyashunquipaj. ²⁰ Ishcay-quimsajllapis yupachicamashayqui-janan jutucaptiqui, jamcunawan caycäshaj.»

²¹ Chaura Pedro tapuran: «Tayta, juc irmänu juchačhu arur jagayächimaptin, ¿ayca cuticamantaj juchanta jungashaj? ¿Jančhis cuticamanchuraj?» nir. ²² Jesúsna niran:

* **18:16** Deuteronomio 19.15.

«Janchis cutillaga ama; manchaga imay-imaypis juchanta junganquiman. Janchis chunca janchiswan (77) cutipis juchanta junganquiman.

Jucha aparicushanta yarparäcupita tantiyachishan

²³ «Tayta Diosninchipa maquinchu purichimashanchita tincuchiypa willapäshayqui. Juc jatun patrunshi capuralnincunata jayachiran. Paycunatash jayachiran jillayninta cutichinanpaj. ²⁴ Cutichinan junaj chayamuptinshi, juc jaga-tucuj capuralninta jayachisha. Chay runa mana yupayti atipaypäshi jagan caran. ²⁵ Cutichiyta mana camäpacuptinshi, murucuncunata patrunnin nirian: «Jagäta cutichimänanpaj cay runata ranticuyucuy. Wamrancunatapis, warmintapis, llapan imancunatapis ranticucuy. Chay jillaywanraj jagäta cutichimanga.» ²⁶ Chayshi jaga runa jungurpacuycur mañacuran: «Taytallau tayta, tarishäcaman shuyaycallämay, ari. Tarir, llapanta cutichilläshayqui» nir. ²⁷ Mañacuptinshi, llaquipar jillayninta mana shuntarannachu. «Ama cutichimaynachu» nirshi caçhariycuran.

²⁸ «Patrunninpa wasinpita llucshirir, capural-masinwannash tincusha. Capural-masinga juc paçhaclash (100) jagan caran. Chayshi cuncanpita charircur, awicaçhärir ullgüparan: «¿Jagäta cutichimanquichu? ¿Manachu cutichimanquipis?» nir. ²⁹ Jucninnash jungurpacuycur mañacuran: «Ichicllata shuyaycallämay, ari. Taripacurir, llapallanta cutichilläshayqui» nirshi. ³⁰ Jucninnash ichanga shuyayta mana munar, juclla carsilman wiçhgachisha. Mana llaquipällarshi, jaganta cutichinancaman wiçhgachiran.

³¹ «Waquin capural-masincunash chayta ricar, juyupa llaquiparan. Patrunninman aywarcurshi, llap-llapanta willaycuran. ³² Patrunninnash juyu capuralninta jayachiran: «Juyu canqui. Chay-chica jagä captiquisi, mañacamaptiqui: «Ama cutichimaynachu» nishcaj. Jagäta mana shuntashcänachu. ³³ Llaquipashaj-jina jampis capural-masiquita llaquipanquiman caran.» ³⁴ Patrunnin sumaj ullgüpariycurshi, carsilman wiçhgachiran: «Llapan jagäta cutichimashancaman sumaj wascapamay» nir.

³⁵ «Sumaj tantiyacunquiman. Ticshaparänacur irmänuuyquipa juchanta yarparäcupiqui, Papänipis juchayquita yarparäcunga. Mana imaysi jungangapächu.»

19

Majayjcuna mana raquicänanpaj willapashan

San Marcos 10.1-12; San Lucas 16.18

¹ Willapäcurir, Galilea quinranpita Judea quinranmanna Jesús aywacuran. Jordán mayu chimpanman chayaran. ² Achcaj runapis jipanpa aywaran. Pipis jishyaçhu caycaptin, Jesús allchacächiran.

³ Waquin fariseucunana achäquita ashipar, Jesústa tapuran: «¿Imallapitasi warminpita runa raquicänan camacanchu?» nir.

⁴ Jesúsna nirian: «¿Tayta Diosninchipa shiminta jungashcanquinachu? Shiminchu nin: «Cay pachata, janaj pachata camar, warmitapis, ullgutapis Tayta Diosninchu ruraran.»* ⁵ Chaynuypis nin: «Runa warmita ashir, maman-taytanpa maquinpita llucshicunman. Warmillanwanna ujllanacärinman juc shungulla cawanapaj.»* ⁶ Ishcaj carsi, juc shungullana cawan. Chaymi Tayta Diosninchim majachacächishanta runa mana raquicächinmanchu.»

⁷ Fariseucunana nirian: «Chaynuypis nin: «Chaynuypis nin: ¿imanirtaj Moisés auniran: «Actaman jamaycachir warmiquiwan raquicar, jargurinquiman» nir?»

⁸ Jesúsna nirian: «Chucru shungu car nishayqui-nishayqui rurashayquipita raquicänayquita Moisés auniran. Tayta Diosninchim ichanga runa warminwan raquicänanta imaypis mana munanchu.

* **19:4** Génesis 1.27; 5.2. * **19:5** Génesis 2.24.

⁹ «Jucwan jananpachishuptiquiraj, majayquita jargurinquiman; manchäga mana. Juchan mana caycaptin warmiquita jaguiriycur, juc warmitapis ama ashinqui manchu. Chayta rurar, jananpachiycanqui.»

¹⁰ Purishijnincunana Jesústa niran: « Warminwan runa chaynuy cawaptin, mana majachacayllačhu jumpi, ¿au?» ¹¹ Jesúsnra niran: «Llapan runa majanwan cawanman. Chaypis Tayta Diosninchita camacächiptin, waquin mana majananchu. ¹² Waquinga mana majananchu chicla yurishpan, waquinna capash cashpan. Waquinmi ichanga mana majananchu Tayta Diosninchipa shiminta willapäcur puricunan cashpan. Shimita tantiyayta atiparraj, majynajlla cawanquiman.»

Wamracunapaj Tayta Diosninchita mañacapushan

San Marcos 10.13-16; San Lucas 18.15-17

¹³ Waquin runacunana Jesúzman ćhayaran: «Maquiquian yatacur mallwa wamräcupaj Tayta Diosninchita mañacapamay, ari» nir. Wamracunata ćhayachijta ricarmi ichanga, purishijnincuna piñacuran.

¹⁴ Jesúsnra niran: «Ama mićhaychu. Wamracunata apamuchun. Shacamuchun. Wamra alli shungu cawashan-jina runacunallapis Tayta Diosninchiman yupachicushpan maquinčhu cawan.» ¹⁵ Wamracunapäna mañacapuram. Maquinwan yatacur niran: «Taytallau Tayta, cay wamracunata sumaj yanapaycullay» nir. Jinarcur Jesú aywacurañ.

Puchuy-puchuy janančhu cawaj runawan Jesús parlshan

San Marcos 10.17-31; San Lucas 18.18-30

¹⁶ Juc cuti juc runa Jesúzman ćhayarcur, tapuran: «Tayta, ¿ima allitataj ruräman Tayta Diosninchipa ñaupančhu imaycamanpis cawanäpaj?» nir.

¹⁷ Jesúsnra niran: «¿Imanirtaj allita ruranayquipaj tapumanqui? Tayta Diosnillanchim alli. Ñaupančhu imaycamanpis cawanayquipaj paypa shiminta wiycunquiman.»

¹⁸ Chay runana tapuran: «¿Ima-imatataj wiycüman?» nir. Jesúsnra niran: «Ama wañuchicunquichu. Majayquita ama jananpachinquichu. Ama suwacunquichu. Runamasiquita ama tumpanquichu. ¹⁹ Mamayqui-taytayquita alli ricanquiman. Quiquiqui alli ricacushayqui-jina runa-masiquitapis alli ricanquiman.»*

²⁰ Chaura niran: «Chaycunata llapantam ćharcushcä. ¿Imarätaj pishíman?»

²¹ Jesúsnra niran: «Llap-llapanta ćharcuya munarga, llapan charashayquicunata rantic-uycur pishipacujcunata aypurir, purishimay. Chayraj Tayta Diosninchipa maquinčhu imaycamanpis cawanquipaj.»

²² Chaynuy niptin, shungun ishquicäcuran. Puchuy-puchuy janančhu cawashpan juyupa llaquish aywacuran.

²³ Purishijnincunatana Jesúsnra niran: «Sumaj tantiyacunquiman. Puchuy-puchuy janančhu cawajcuna Tayta Diosninchipa maquinčhu cawanapaj sumaj sasa.

²⁴ «Camillu» nishan jatun-caray uywa aujapa ñawinpa yaycuya mana jushan-jina puchuy-puchuy janančhu cawajcunapis Tayta Diosninchipa maquinčhu cawayta mana junchu.»

²⁵ Chaura chayta wiyar, purishijnincuna mancharicäcuran: «Chaynuy captin, ¿piraj Tayta Diosninchipa ñaupanman ćhayanga?» nir.

²⁶ Llapanta ricapärir Jesúsnra niran: «Runacuna ushyacajllam. Chaymi alli cawarpis, sasächicun. Tayta Diosninchipämi ichanga imapis mana sasachu. Payga munayniujmi pitapis ñaupanman ćhayachinapaj.»

²⁷ Pedruna niran: «Tayta, nuwacuna llapan imäcunatapis jaguiycurmí purishiycaj. Chayta rurashäpita, ¿imataraj ćhasquishaj?»

* ^{19:19} Éxodo 20.12-16; Deuteronomio 5.16-20; Levítico 19.18.

²⁸ Jesúsnra niran: «Sumaj tantiyacunquiman. Tayta Diosninchca caćhamasha. Payga cay pachata mushujman ticrachishan wicanpita-pacha llapanta mandapti, jamcunapis mandashimanquipaj. Israel runacuna chunca ishcaywan (12) casta captin, llapanta maquiquichu purichinquipaj. ²⁹ Nuwa-raycur imancunata jaguijcuna paćhac (100) janapaytana chasquinga. Paycunaga wasinta, mayurnincunata, shullcancunata, manta, taytanta, wawancunata, chacrancunata chasquinga. Tayta Diosninchipa ñaupanman chayarpis, mana ushyacaj cawaytapis taringa. ³⁰ Ima captinpis, sumaj tantiyacunquiman. Cay pachačhu achcaj runa alli ricash captinsi, Tayta Diosninchipa ñaupanman chayar, mana alli ricashnachu canga. Waquincunatam ichanga Tayta Diosninchca alli ñawinpa ricanga runa-masin pampaman churash captinsi.»

20

Piyuncunawan tincuchiypa willapashan

¹ Mä, tincuchiypa tantiyachishayqui. «Piyunta ashij-yupay Tayta Diosninchipis runacunata maquinman shuntan. Juc runash tutu-tutalla piyuncunata ashiran chacranchu arushinanpaj. ² «Juc jurnalta pagashayqui» nirshi llapanta aruchiran.

³ «Chajchá inti-yupayshi chacrayuj runa yapay ricaćhacuj aywaran. Marcačhu jitara runacunata ricarshi, ⁴ niran: «Arushimay. Arupacushayquipita juc jurnalta pagashayqui.» Niptin, änirshi chay runacuna arushij aywaran.

⁵ «Chacrayuj runa tarishanman-tupush piyunta aruj caćharan waquinta lasdusi, waquintanash jatun mallway. ⁶ Tacsha mallwaypis chacrayuj runa yapayshi marcaman aywaran. Runacuna jitarpacuycaja tarir, tapusha: «Imanirtaj jitarpacuycanqui? ¿Manachu aruyniqui can? ¿Juyaytachu jitarpacunqui?» nirshi. ⁷ Chay runacunash niran: «Pillasi mana mincacamashapishchu.» Chacrayuj runana niran: «Arushimay. Chacräman ayway.» Niptin, paycunapis änirshi aywaran.

⁸ «Chacaruptinnash, capuralninta chacrayuj niran: «Piyunninchicunata jayarcuryarcu llapanta pagay. Jipata chayamulta puntata paganqui. Tutapita arujcunata ushyanantaraj paganqui.» ⁹ Piyuncunana chacrayuj pagashantash chasquiran. Tacsha mallway aruj yaycucunapis juc jurnaltash chasquiran. ¹⁰ Chaynuy pagaptinshi, tutapitapacha arujcuna achcata chasquiya yarparaycaran. Chaynuy yarparcaycarsi, juc jurnaltash chasquiran. ¹¹ Chayllata chasquirshi, chacrayuja jagayapar niran: ¹² «Jipataraj chayamujcuna juc chajchalla arusha. Juc chajchalla arush caycaptin, imanirtaj juc jurnaltaraj pagashcanqui? Nuwacunam ichanga rasunpa juyayta arushcä. Juyayta arupti, shanaypis wapchamasha. Sumaj uticashcä.»

¹³ «Chayshi chacrayujna niran: «Tayta mishti, mana llutantachu rurashcä. Jamwan juc jurnalta paganajpaj parlashcanchi. Rimashä-jina pagashcay. ¹⁴ Cananga paguyquita chasquicurcur, aywacuyna. Shungü munaptin, jamcunata pagashä-jina junajraj aruymay yaycamujcunatapis pagayta munä. ¹⁵ Quiquipa jillaynita imatapis ruracumán, eau? Ama jaticämuychu. Alli shungu caycaptipis, mallaj carcaycanqui.»

¹⁶ «Canan sumaj tantiyacuy. Waquin runa pampaman churash captinsi, Tayta Diosninchca alli ñawinpa ricanga. Waquincunam ichanga alli ricash captinsi, Tayta Diosninchipa ñaupanman chayar, mana alli ricashnachu canga.»

Quimsa cutipana wañuyman chayananta Jesús musyachicushan San Marcos 10.32-34; San Lucas 18.31-34

¹⁷ Jerusalén marcaman wicanpaya aywarcaycashanchu chunca ishcaywan purishijnincunallata shuntarcur, Jesús niran: ¹⁸ «Jerusalén marcaman aywaycashanchita musyanqui. Tayta Diosninchca caćhamasha. Chaypis waquin runacuna mayur cüracunapa maquinman, Moiséspa shiminta yaćhajcunapa maquinman chayachimanga. Paycuna wañuyman jitarpamanga. ¹⁹ Wañuchimänanpaj jäpa runacunapa maquinman

Chayachimanga. Ashllir ushyamanga. Juyupa wascamanga. Ruschu wañuchimanga. Wañuchimaptinsi, quimsa junajta Tayta Diosninchicawarachimanga.»

Munayniuj cayta ashijcunapita tantiyachishan

San Marcos 10.35-45

²⁰ Wamran Santiagutawan Juanta pushacurcur, Zebedeupa warmin Jesúsman chayaran. Ñaupanman jungurpacuycur, Jesús niran: «Tayta, mañacushäta aumay, ari.»

²¹ Jesúsna tapuran: «¿Imačhütaj yanapäshayqui?» nir. Tapuptin, niran: «Tayta, mayur mandaj cayman chayar, wamräcumatapis mandäshishunayquipaj churapaycamanqui, ari. Jucninta diricha-caj läduyquiman jamachi; jucnintana isquirda-caj läduyquiman.»

²² Wamrancunatana Jesús niran: «Imata mañacaycämashayquitapis mana musyanquichu. Tapushayqui. Nuwata-jina juyupa ñacarcachir imamanpis chayachishuptiqui, ¿ičhipunquimanchuraj?» nir. Paycunana niran: «Au. Ičipushämi.»

²³ Jesúsna niran: «Rasunpa ñacashä-jina ñacanquipaj. Mandäshimänayquipaj churanajmi ichanga mana camacanchu. Chayga Papäniipa maquinchú caycan. Paymi quiquin acracushanta diricha-caj lädümanpis, isquirda-caj lädümanpis jamachinga.»

²⁴ Santiaguwan Juan mañacushanta wiyar, chuncaj puríshij-masincuna ullgucaycärriran.

²⁵ Chaura llapanta jayaycur, Jesús niran: «Jäpa runacuna juc-niraj cawashanta musyanqui. Paycuna Tayta Diosninchita mana manchapacunchu. Mandajnincunapis ullgurcur-ullgurcur, nishan-nishan marca-masincunata imatapis rurachin.»

²⁶ «Jamcunam ichanga chaynuy ama canquimanchu. Munayniuj cayta munar, llapan-taraj yanapanquiman. ²⁷ Mandaj cayta munar, llapanpa manduntaraj ruranquiman.

²⁸ Tayta Diosninchicáchamasha. Chaypis mana munayniuj cayta ashirchu shamushcä; manchäga pii-maytapis yanapänäpaj. Tayta Diosninchipa maquinchú cawananpaj cawaynipa chaniñwan may-may runata jishpichishaj.»

Ishcaj japra runata Jesús allchacächishan

San Marcos 10.46-52; San Lucas 18.35-43

²⁹ Jericó marcapita Jesús aywacuptin, achcaj runa jipanta aywacuran. ³⁰ Jesús ayway-cashanta wiyar, caminu wajtallanchú jamarraj ishcaj jaþracunapis jayacuran: «Unay mandaj Davidpa willcan Jesús, llaquipaycallämay, ari» nir. ³¹ Runacunana ullgüparan: «Upälla» nir. Chaypis callpacuycurraj jaþracuna jayacuycaran: «Unay mandaj Davidpa willcan Jesús, llaquipaycallämay, ari» nir.

³² Chaynuy jayacuptin, Jesús ičhicuycuran. Nircur jaþracunata jayarcur, tapuran: «¿Imallačhütaj yanapäshayqui?» nir. ³³ Jaþracunana niran: «Tayta, ñawi ricananta munä.» ³⁴ Jaþracunata llaquipar, Jesús ñawincunata yataycuran. Yataycuptin, ñawin quičhacäcuran. Ricashpan Jesústana puríshiran.

21

Jerusalén marcaman Jesús chayashan

San Marcos 11.1-11; San Lucas 19.28-40; San Juan 12.12-19

¹ Jerusalén marcaman mana chayallar, Betfagé marcemannapura puríshijnincunawan Jesús chayaran. Betfagé marca Ulíbus punta chaquinchú caycaran. Ishcaj puríshijnincunata cačharna, ² Jesús niran: «Wac chimpa tacsha marcaman aywariycuy. Chayar, mallwayuj büruta tarinquipaj. Watarashanpita pascarir, apacamunqui.»

³ «Pascaycaptiqui pipis mičhäshuptiqui, ninqui: «Mandamajnitätash mañanqui. Cuitirachipamushayqui.»»

⁴ Llapantapis ruraran juc willacujpa shimin charcucänanpaj. Willacujga unay niran:

⁵ «Jerusalén marca runacunata ninqui: «Mä, ricay.»

Mandajniqui shaycämun.

Lluta runa-jina bürun muntash shaycämun.

Manta bürun muntash shaycämun.»^{*}

⁶ Chaura Jesúspa shiminta wiyacur, puríshijnincuna llapanta ruraran. ⁷ Wawantinta büruta Jesúsman aparan. Jacuncunata shawaparcur, Jesústa muntachiran.

⁸ Bürun muntash Jesús aywaycaptin, runacuna cusicuywan jacuncunatapis, jačhapa rámancunatapis caminuman mashtapuram.

⁹ Jesúspa jipanta, ñaupanta aywajcunapis cusicushpan japarpararan:
«Taytallau Tayta, washaycallämay, ari.

Unay mandaj Davidpa willcanta washaycullächun.

Tayta Diosninchchi cačhamushan runa alli ricash caycullächun.

Janaj pachačhu cawaj Tayta Diosninchita alliman čhurayculläshun» nir.*

¹⁰ Jinan Jerusalén marcaman čhayaptin, runacuna wichayapa-uraypa rimacullaran:
«¿Piraj cay runa?» nir. ¹¹ Jesúswan purijcunam ichanga niran: «Cay runa willacuj Jesúsmi. Galilea quinran Nazaret marcapita shamusha. Tayta Diosninchipa shimintam willapäcun» nir.

Tayta Diosninchipa wasinpita ranticucunata jargushan

San Marcos 11.15-19; San Lucas 19.45-48; San Juan 2.13-22

¹² Tayta Diosninchipa wasinpa sawanninman yaycurirna, ranticucunatapis, rantipacujcunatapis Jesús jarguriran. Jillay rucapacuj runacunapa mísancunatapis sajtar ushyariran. Jillaynintapis mashtar ushyariran. Paluma ranticucunapa jamacunancunatapis wicapar ushyariran. ¹³ Llapanta wicapar niran:

«Tayta Diosninchipa shiminčhu nin:

«Wasiga mañacamajcunallapämi.»

Jamcunam ichanga suwapa mačhayninman ticrachishcanqui.»*

¹⁴ Tayta Diosninchipa wasillančhu caycaptin, japracunawan wijrucuna Jesústa čhayapuram. Payga llapanta allchacächiran. ¹⁵ Tayta Diosninchchi camacächiynipa runacuna imaypis mana ricashancunata Jesús ruraptin, wamracunapis cusicushpan niran:
«Unay mandaj Davidpa willcan alli ricash caycullächun.» Jesústa alliman čhuraptin, mayur cüracunawan Moiséspa shiminta yačhajcuna ullgucaycäriran. ¹⁶ Ullgur, Jesústa tapuran: «¿Wamracuna imata rimashantapis manachu wiyanqui?» nir. Jesúnsna niran:
«Au, wiyashcä. Jamcunapis wiyamay. Tayta Diosninchipa shiminta liguishcanqui, ¿au?
Isquirbirächishančhu nuwapaj rimar nin:

«Sinčhi wamracunapis, chuchučhu waguiraj wamracunapis alliman čhurananta quiquin

«Tayta Diosninchchi camacächisha.»*

¹⁷ Paycunata jaguiycur Betania marcamanna Jesús pachacuj aywacuran.

Jígus yüra chaquicäcunapaj Jesús mañacushan

San Marcos 11.12-14, 20-26

¹⁸ Warannin tuta Jerusalén marcaman Jesús cutiptin, yargay chariran. ¹⁹ Caminu lädunčhu jígus yürata ricar, wayuyninta ashij aywaran. Čhayar, wayuyninta mana tariranchu. Üjallanta tariran. Chaymi jígus yürata niran: «Cananpita mana imaypis wayunquipänachu.» Niptin, chaquicäcuran.

²⁰ Chaquicäcuja ricar, puríshijnincuna mancharicäcuran: «¿Imanirraj yüra juclla chaquicäcusha?» nir.

²¹ Jesúnsna niran: «Sumaj tantiyacunquiman. Mana llutäpacullar Tayta Diosninchiman yupachicur, mana jígus yürallatachu chaquichinquipaj. Manchäga puntacunatas yacu

* **21:5** Zacarías 9.9. * **21:9** Salmo 118.25-26. * **21:13** Isaías 56.7; Jeremías 7.11. * **21:16** Salmo 8.2-3.

püsuman witirachinquipaj. Llapanta camäpacunquipaj. ²² Llapan shunguyquiwan Tayta Diosninchita mañacur, chasquinquipaj.»

Jesús munayniyuj cashan

San Marcos 11.27-33; San Lucas 20.1-8

²³ Chaypita Tayta Diosninchipa wasinman yaycurir, Jesús willapäcuran. Mayur cüracunawan mayur runacuna Jesústa tapuran: «Tayta, ¿pitaj cačhamushcashunqui? ¿Pipa munaynwantaj imacunatapis ruraycanqui?» nir.

²⁴ Jesúsnra nirán: «Nuwapis mä, tapucushayqui. Willamaptiqui, pí cačhamashantapis willashayqui. ²⁵ Juanta ushyachicunapaj, ¿pitaj cačhamusha: Tayta Diosninchichu, runa-masillanchu? Mä, willamay.»

Chaura quiquin-pura parlanacäriran: «〈Tayta Diosninchipa cačhamusha〉 niptinchi: 〈¿Imanirtaj mana wiycushcanquichu?〉 nimäshun. ²⁶ 〈Runa-masinthicunalla cačhamusha〉 niptinchi, runacuna wañuchimäshun.» Runacuna Ushyachicuj Juanta chasquicush caran: «Tayta Diosninchipa willacujnini» nir. ²⁷ Chaymi Jesústa nirán: «Tapumashayquita mana musyächu.» Chaura Jesúspis nirán: «Maná camäpacuptiqui, nuwapis pí cačhamashanta mana willashayquichu.»

Wamracunawan tincuchiypa willapashan

²⁸ Jananmanpis: «Mä, tapushayqui» nir tincuchiypa willapar, Jesús nirán: «Juc runapash ishcay wamran caran. Jichpa wamrantash nirán: 〈Wawallau, canan junaj übasta uryamuy.〉 ²⁹ Wamrannash nirán: 〈Maná aywashäpächu.〉 〈Maná aywashäpächu〉 nirpis yarpačhacurirshi, aruj aywaran. ³⁰ Shullca wamrantapis arujshi cačharan. Cačhaptin, juclash auniran. Chaypis manash aywaranchu.

³¹ «Canan mä, tapushayqui. ¿Maygan wamrantaj papäninpa shiminta čharcusha?» Niptin: «Jichpa wamran» nipäcuran. Jesúsnra nirán: «Sumaj tantiyacunquiman. 〈Chiqui runacunapis, wayrapacuj warmicunapis juchallačhu arun. Mana imaysi Tayta Diosninchipa maquinčhu juyangachu〉 nirpis llutanta yarpaycanqui. Yarpačhacurirga, Tayta Diosninchipa maquinčhu cawanga; jamcunam ichanga mana. ³² Ushyachicuj Juan: 〈Tayta Diosninchipa shiminta wiycuy〉 nir willapäshuptiquisi, mana wiycushcanquichu. Juchayquipita mana wanacushcanquichu. Chiqui runacunawan wayrapacuj warmicunam ichanga wiycusha. Juchanpita wanacushanta ricaycarsi, mana yarpačhacushcanquichu. Tayta Diosninchipa shiminta mana chasquicushcanquichu.»

Čhacrayujwan tincuchiypa willapashan

San Marcos 12.1-12; San Lucas 20.9-19

³³ Yapay tincuchiypa willapäcur, Jesús nirán: «Juc čhacrayuj runash übasta mururan. Ushyaypash pirgaran. Übasta japchinanpäpis püsutash ruraran. Čhacranta täpananpänash türü wasita pирgachiran. Jinarcur čhacra runacunata allimshaycurshi, juclä marcpa aywacuran. ³⁴ Übas pallay čhayamuptin, uywaynincunataš cačhacuran: 〈Dirichüta shuntamuy〉 nirshi. ³⁵ Cačhancuna čhayaptinshi, allimshacuj runacuna juc cačhanta magaran. Juctanash wañuy cachiran. Juctanash sajmar ushyaran. ³⁶ Chaura čhacrayuj juc uywaynincunatanash cačhacuran. Chaynuyllash paycunatapis allimshacujcuna ushyaran. ³⁷ Chayshi čhacrayuj quiquinpa wamranta cačhacuran: 〈Quiquipa wamräta manchapacungam〉 nirshi. ³⁸ Čhacrayujpa wamranta ricarshi ichanga, allimshacujcuna quiquin-puralla parlanacäriran: 〈Papänin tagay wamrallanpaj llapan imancunatapis jaguipaycunga. Chaymi wañurachishun. Chaura cay čhacra nuwanchipaj canga〉 nir. ³⁹ Chaynuy nirshi, čhacrayujpa wamranta charipäcuran. Čhacranpita jargurcurshi, wañuy cachiran. ⁴⁰ Canan mä, willamay. Čhacrayuj cutimur, ¿imataraj ruranga chay čhacra runacunata?» ⁴¹ Paycunana nirán: «Chay čhacra runacunata mana llaquipällar

wañurachinga. Chacranta alli runacunatana allimshaycunga. Allimshaycunga ĉacrapa wawanta cutichijcunallata.»

⁴² Jesúsnra nirán: «¿Tayta Diosninchipa shíminta manachu liguishcanqui? Shíminchú niycan:

«Wasi rurajcuna: «Cay rumi mana allichu» nir wicapashantapis Tayta Diosninchí simintuta jallarachinanpaj churasha.

Chayta quiquin Tayta Diosninchí camacächisha. Chaypita cusicurcaycanchi.*

⁴³⁻⁴⁴ «Sumaj tantiyacunquiman. Mana wiyaçuptiqui, Tayta Diosninchipis caçhariycushunquipaj. Wiyaçuj runacunatam ichanga maquinchú purichinga. Wiyaçucunaga Tayta Diosninchipa shungun munashanta ruranga.»*

⁴⁵ Fariseucunawan mayur cüracuna wiyaçhipaycashanta tantiyacuriran. ⁴⁶ Chaura juclla Jesústa chariyta munaran. Ichanga achcaj runa juturaptin, mancharishpan mana chariranchu. Runacuna Jesústa čhasquicuran: «Tayta Diosninchipa willacujnin» nir.

22

Majachacay tünawan tincuchiypa willapashan

San Lucas 14.15-24

¹ Yapay imawanpis tincuchiyllapa willapäcur, Jesús nirán: ² «¿Imanuytaj maquinchú Tayta Diosninchí cawachimäshun? Mä, tantiyacushun. Juc mandaj runapa ullgu wamran majachacaptinshi, sumaj camaricuran. ³ Jinarcurshi sribintincunata caçhacuran: «Jayachishä runacuna micuj shamuchunna» nirshi. Tünaman jayaycächiptinsi, manash aywaranchu.

⁴ «Mana aywaptinshi, yapay waquin sribintincunata caçhacur nirán: «Jayachishä runacunata shamunanpaj willanqui: «Micupacärinayquipäshi aywanqui. Camaricushal-lanash caycan. Allinnin türucunatapis, wanllannin wäcacunatapis pishtashana. Ju-clash majachacay tünaman aywanqui» nir.» ⁵ Jayachishan runacunash ichanga upatucäriran. Waquinnash čacraman aruj aywacuran. Waquinnash rantipacuj aywacuran.

⁶ Waquinnash mandaj runapa sribintincunata ashllir ushyaran. Wañuy cachiran.

⁷ «Chayshi mandaj runa juyupa ullgucäcuran. Murucuncunatanash caçharan: «Wañuchicucunata wañurachimuy. Marcantapis rupachiypa ushyariy» nirshi.

⁸ Jinarcurnash, juc sribintincunata nirán: «Wamrä majachacänanpaj micuy mayna čhayash caycan. Jayachimushäcunatam ichanga upa-tucushanpita mana jayachimümanchu caran. ⁹ Cananga lluta runacuna cashan-cajman ayway. Tincushayqui runata jayachimuy majachacay tünaman shamunanpaj.» ¹⁰ Chayshi sribintincuna čaquin čhayashanpa aywacäriran. Tincushan runatash allicunatapis, juyucunatapis micupacuj pusharan. Wasi juntash runacunana jutucaran.

¹¹ «Tünaman čhayajcunata ricananpäshi quiquin mandaj runa yaycuriran. Yaycuriptin, juc runash mana rucacullar jamaraycaran. ¹² Chayshi tapuriran: «Tayta mishti, ¿imanay-pataj majachacay tünaman rucacünilla yaycamushcanqui?» nirshi. Tapuptin, imata niytapis manash camäpacuranchu. Upällash cacuran. ¹³ Chayshi sribintincunata nirán: «Maquin-čhaquinta mancurnarcur wajtaman wicapay. Chacajman jaycuriy. Chaychú atayparaj waganga. Juyupa ñacar, quiruntapis učhunga.»

¹⁴ «Canan tantiyachishayqui. Tayta Diosninchí llapan runata jayachin. Chaypis acracushancunallatam maquinchú purichinga.»

Jillayta churananpaj tapucushan

San Marcos 12.13-17; San Lucas 20.20-26

* ^{21:42} Salmo 118.22-23. * ^{21:43-44} Waquin Bibliačhu nin: «Wicapash rumiman pipis tacacur, ushyacanga. Chay rumi juc runapa jananman shicwar, nitiringa.» Waquin Bibliačhu mana canchu: «San Lucas 20.18-pitash yapasha» nir.

¹⁵ Chaypita fariseucuna parlanacuran Jesústa achäquita ashipänanpaj. ¹⁶ Chaymi fariseu-masincunatawan, mandaj Herodespa purishijnincunata Jesúzman cačharan. Paycuna Jesústa tapuran:

«Tayta, alli shungu cashayquita musyä. Pitapis Tayta Diosninchipa shimillanta willapanqui. Llapan runata alli ricanqui. ¹⁷ Chaymi tapucushayqui. ¿Mandaj Césarpaj jillayta čhurashuwanchuraj, manachuraj?» nir.

¹⁸ Jesúsmi ichanga achäquita ashipaycashanta musyar niran: «Janan shungulla runacuna, ¿imanirtaj maquichacamaya munanqui? ¹⁹ Mandajta págashayqui jillayta mä, ricachimay.» Chaura jillayta apapuram.

²⁰ Jesúsnra tapuran: «¿Pipa liträtunta jillaychu caycan? ¿Pipa jutinta isquirbiraycan?» nir. ²¹ Paycunana niran: «Mandaj Césarpa.» Jesúsnra niran: «Mandaj Césarpata Césarpaj čhuray. Tayta Diosninchipata Tayta Diosninchipaj čhuray.»

²² Niptin, ima rimapacuytapis mana camäpacuranchu. Upällallana aywacäriran.

Wañushcuna cawarimunapita tapucushan

San Marcos 12.18-27; San Lucas 20.27-40

²³ Chay junajlla saduceu runacunapis Jesúzman čhayaran. Paycuna yarpaj: «Wañushcuna mana cawaringapächu» nir. Chaymi niran: ²⁴ «Tayta Jesú, isquirbisančhu Moisés niran: <Runa wañucur warminta wawaynajllata jaguiptin, wañucuj runapa wauguillan biyüdawan majachacanman. Mushuj majanwan tarishan wamrata wañucuj runanpa jutinta apanga.>* ²⁵ Canan mä, tapucushayqui. Jančhis wauguish caran. Juc wauguish warmiwan majachacaran. Ichanga warminta mana mirachillarshi wañucuran. Wañuptin, juc-caj wauguinnash biyüdawan majachacaran. ²⁶ Juc warmillawan majachacarcur-majachacarcur, chay jančhis waugui wañucuran.

²⁷ Llapan wañushanpa jipantaräshi warmipis wañucuran.

²⁸ «Tayta, mä, willamay. Wañushanpita cawarcamur, chay warmi, ¿maygan wauguipa warmintaj canga jančhiswan majachacash caycar? ¿Llapanpachuraj warmin canga?»

²⁹ Jesúsnra niran: «Jamcuna llutanta yarparcaycanqui. Tayta Diosninchipa shimintapis, munayniuj cashantapis mana tantiyanquichu. ³⁰ Cawarimuj runacuna warmi ull-gupis mana majachacanganachu. Manchäga janaj pachačhu anjilcuna-jina cawangapaj. ³¹ Wañushcuna cawarimunanta mayna Tayta Diosninchipa musyachicuran. ¿Manachu shiminta liguishcanqui? Shiminčhu nin: ³² <Unay auquilluyqui Abraham, Isaac, Jacob wañush carsi, cawaycan. Tayta Diosninchipa caycapti, manchapacaycäman.» Cawaycajcu-nalla Tayta Diosninchita manchapacun; wañushcuna mana.»

³³ Chaura Jesúspa shiminta wiyar, runacuna jatunpa cushicuran.

Allicaj yačhachicuytapa tapucushan

San Marcos 12.28-34

³⁴ Saduceucunata upällachishanta mayaycur, fariseu runacuna jutucaran. ³⁵ Moiséspa shiminta yačhajnin fariseucunana achäquita ashipashpan Jesústa tapuran: ³⁶ «Tayta, Moisés isquirbisan llapan yačhachicuycunapita, ¿maygantaj allicaj yačhachicuy?» nir.

³⁷ Jesúsnra niran: «<Llapan shunguyquian Tayta Diosninchita manchapacäriy.>*

³⁸ Caymi llapan yačhachicuycunapita mas allicaj. ³⁹ Juc-cajpis chay-nirajilla. <Quiquipi alli ricacushayqui-jina runa-masiquitapis alli ricanquiman.>* ⁴⁰ Ishcan yačhachicuycunata čharcurga, Tayta Diosninchipa shimintapis, willacujcunapa shimintapis llapantana čharcuycanqui.»

Washäcuj Jesú mandaj Davidpa willcan cashan

San Marcos 12.35-37; San Lucas 20.41-44

* **22:24** Deuteronomio 25.5-10. * **22:37** Deuteronomio 6.5. * **22:39** Levítico 19.18.

⁴¹ Fariseucuna juturaycaptin, Jesús tapuran: ⁴² «¿Pipa willcanraj Washäcuj canga?» nir. Paycunana niran: «Unay mandajninchí Davidpa willcallanmi.» ⁴³⁻⁴⁴ Jesúsna niran: «Salmos libruchú nin: ‹Espíritu Santu rimachiptin, quiquin mandaj David niran: ‹Tayta Diosninchí Washäcujnita nisha:»

«Mandäshimänayquipaj diricha-caj läduman jamacuy cuncharyuyquicunata pampaman churanäcaman.

Nishayqui-nishayqui munashayquita rurachinquipaj.» » *

⁴⁵ «Chaynuy niycaptin, ¿Washäcujga rasunpachuraj Davidpa willcallan canga? ¿Runapa wamranchuraj canga? Au, paypitam. Chaypis quiquin mandaj David manchapacur, Taytachacuycan.»

⁴⁶ Jesús tapuptin, pipis mana rimacuranchu. Chay junajpita-pacha pipis mana tapuparannachu.

23

*Fariseucunawan Moiséspa shiminta yačhajcunata Jesús piňapashan
San Marcos 12.38-40; San Lucas 11.37-54; 20.45-47*

¹ Chaypita juturaj runacunatapis, purishijnincunatapis willapar, Jesús niran:

² «Fariseucunawan Moiséspa shiminta yačhajcuna Moisés-jina yačhaj ricarin. Shiminta sumaj yačhachicun. ³ Chaymi willapäcushanta wiyanquiman. Llupinpam ichanga ama jatinquichu. Paycunaga ishcay căram. Allita rimarsi, shiminta mana charcunchu. ⁴ Runacunata tucuy-tucuya yačhachin. Čharcunan sasacunatapis yačhachin. Quiquincunam ichanga juc maquillasi mana yanaparcunchu. ⁵ Runa ricanallanpämi Tayta Diosninchipa shiminta jatun-jatunta isquirbircur, ricranman, urcunman watacun. Jacunpa puntančhu jatusaj-jatusaj waytashcunata watacun runacuna: ‹Tayta Diosninchita sumaj manchapacun, ¿au?» nir ninanpaj.» *

⁶ «Micupacuj jayachiptinpis, allillata jarana ashin. Shuntacäna wasiman aywarpis, ñaupa-ñaupallačhu jamayta ashin. ⁷ Läsacunačüpis llapan runa manchapacunallanta munan. ‹Taytallau tayta, yačhajmi canqui» ninallanta ashin.

⁸ «Paycuna-jinam ichanga ama canquimanchu. ‹Taytallau tayta» nir manchapacushushayqui mana camacanchu. Manchäga juc taytallapita car, payllata manchapacunquiman. Juc shungulla cawanquiman. ⁹ Cay pachačhu pitapis ama taytachacunquiman. Manchäga janaj pachačhu cawaj Tayta Diosnillanchita taytachacunquiman. Payllam Taytayqui. ¹⁰ Chaynupis pitapis ama taytachacunquichu: ‹Jamlia yačhaj canqui» nir. Washäcuj canäpaj Tayta Diosninchita cačhamash captin, nuwallata taytachacamanquiman. ¹¹ Alli ricash cayta munar, runa-masiquitaraj sumaj yanapanquiman. ¹² Sumaj tantiyacunquiman. Alli-tucujcunata Tayta Diosninchita pampaman čhuranga. Maquinčhu cawajcunatam ichanga alliman čhuranga.

¹³ «Moiséspa shiminta yačhajcuna, fariseucuna, ishcay căra canqui. Llaquicärinquiman. Juyupa ñacanquipaj. Yačhaj carsi, Tayta Diosninchita mana manchapacunquichu. Shimintatapis runa-masiquicunata mana yačhachinquichu. Manchäga Tayta Diosninchipa shungun munashannuy cawayta munarcaycaptin, mičharcaycanqui.

¹⁴ «Moiséspa shiminta yačhajcuna, fariseucuna, ishcay căra canqui. Llaquicärinquiman. Juyupa ñacanquipaj.* ¹⁵ May-chayman čhayarpis aunishunayquita munallar, tucuya ruwanqui: ‹Moiséspa shiminta yačhajcunawan fariseucuna yarpashannuyla cawashun» nir.

* **22:43-44** Salmo 110.1. * **23:5** Tayta Diosninchipa shiminta isquirbircur urcunman, ricranman watacunapaj tantiyachimanchi Deuteronomio 6.8; 11.18; jacunpa puntančhu waytashcunata watacunapaj tantiyachimanchi Números 15.37-40; Deuteronomio 22.12 * **23:14** Waquin Bibliačhu birsiculu 14-čhu nin: «Jamcunaga biyüda warmicunapa imancunatapis ushyapaycanqui. Jinarcur chapacunallayquipaj may üra Tayta Diosninchita mañacuj-tucunqui.» Waquin Bibliačhu mana canchu: «San Marcos 12.40-wan San Lucas 20.47-tawan tincuchir yapasha» nir.

Runa aunircushuptiqui, supaypa jipanpana jančhanqui. Juyu caycaptiquisi, paycunapa juyu cayninman mana tincunquipächu.

¹⁶⁻¹⁷ «Yačhajcuna, fariseucuna, jabra-yupay canqui. Llaquicärinquiman. Juyupa ñacanquipaj. Upa cayniquowan imatapis mana tantiyashpayqui waquincunata tantiyachiycanqui. Chaymi ninqui: ‹Tayta Diosninchipa wasinčhu čurashanchi cuyachicuyninchicuna manchapacuypaj. Chaymi shiminchi čharcucänanpaj camacächinga. Tayta Diosninchipa wasinmi ichanga mana manchapacuypächu. Shiminchi čharcucänantapis mana camacächingachu.› Upa runa carcaycanqui. ¿Manachu musyanqui cuyachicuyninchicuna Tayta Diosninchipa wasinčhüräj manchapacuypaj cashanta? ¹⁸⁻¹⁹ Chaynuypis ninqui: ‹Tayta Diosninchita jarashanchicuna manchapacuypaj. Chaymi shiminchi čharcucänanpaj camacächinga. Tayta Diosninchita jaranchi tullpam ichanga mana manchapacuypächu. Shiminchi čharcucänantapis mana camacächingachu.› Upa runa canqui. ¿Manachu musyanqui jarayninchipis Tayta Diosninchipa tullpančhüräj manchapacuypaj cashanta? Payga ishcanta alli rican. ²⁰ Sumaj tantiyacunquiman. Pipis: ‹Shimiña čharcucächinanpaj Tayta Diosninchita jaranchi tullpa manchapacuypämi› nirga, tullpatapis jarayninchita manchapacuycan. ²¹ Pipis: ‹Shimiña čharcucächinanpaj Tayta Diosninchipa wasin manchapacuypämi› nirga wasintinta Tayta Diosninchitapis manchapacuycan. ²² Pipis: ‹Shimiña čharcucächinanpaj janaj pacha manchapacuypämi› nirga munayniyuj Tayta Diosninchitapis manchapacuycan. Payga janaj pachapita llapan runata maquinčhu puriycächin.

²³ «Moiséspa shiminta yačhajcuna, fariseucuna, ishcay căra canqui. Llaquicärinquiman. Juyupa ñacanquipaj. Alli ricash cayta munar, llapan imayquicunapitapis Tayta Diosninchipaj raquinqui. Irbabuynatasi, añistasi, cuminustasi raquinqui. Chaypis Tayta Diosninchipa shiminta mana llapan shunguyquiwanchu čharcuycanqui. Mana paypa shungun munashannuylachu cawaycanqui. Runa-masiquitapis mana llaquipanquichu. Tayta Diosninchitapis mana manchapacunquichu. Paypa-cajta raquir, allita rurarcaycanqui. Ichanga imatapis allillata ruranquiman. Shiminta sumaj-sumaj čharcunquiman.

²⁴ «Yačhaj carpis, upa canqui. Runa ricanallanpaj alli-tucunqui. Tayta Diosninchipa ricay ñawinčhumi ichanga juchačhu aruycanqui. Yacuta upunayquipaj acapalla chus-pita jurgurpis, ‹camillu› nishan jatun-caray uywantinta upurcaycanqui.

²⁵ «Moiséspa shiminta yačhajcuna, fariseucuna, ishcay căra canqui. Llaquicärinquiman. Juyupa ñacanquipaj. Mati janallan mayllash-niraj carcaycanqui. Runapa ricay ñawinčhu juchaynaj-tucursi, juchačhu arunqui. Mallaj caycar, suwacuyllačhu arunqui. Shunguyqui munashallanta ashir purinqui. ²⁶ Upacuna, Tayta Diosninchshi shunguyquita musyapan. Shiminta wiyacunquiman. Wiyacuptiqui, runacunapis allina ricashun-quipaj.

²⁷ «Moiséspa shiminta yačhajcuna, fariseucuna, ishcay căra canqui. Llaquicärinquiman. Juyupa ñacanquipaj. Michu-niraj canqui. Jananpita ricaptinchi, cuyayllapaj mīchu. Rurinčhumi ichanga millanaypaj ayapa tulluncuna ismuycan. ²⁸ Chay-niraj canqui. Runa ricashunallayquipaj alli-tucunqui. Tayta Diosninchipa shimintam ichanga wiyaytapis mana munanquichu. Jucha aparicuyllata shunguyqui yarparaycan.

²⁹ «Moiséspa shiminta yačhajcuna, fariseucuna, ishcay căra canqui. Llaquicärinquiman. Juyupa ñacanquipaj. Tayta Diosninchita manchapacujcunapa, unay willacujnincunapa michuncunata yapay rurarcaycanqui. Yarparānayquipaj, cuyayllapaj cananpaj picharcaycanqui. ³⁰ Jananmanpis ninquiraj: ‹Auquillunchicuna cawashan wíchan cawarga, willacujcunata mana wañuchishuwanchu caran.› ³¹ Chaypis wañuchicujcunapa wawan cashayquita shimillayqui musyachicuycan. ³² Michunta pichar: ‹Auquillúcuna willacujcunata wañuchir, allita rurasha› nir rurarcaycanqui.

Cananpis yačhachishushayquinylla mä, ruray. ³³ Supapya wawan car, wañuchicuj curu-jina canqui. Chaymi Tayta Diosninchí ninaman jaycushunquipaj. Chacaj pachapita jishpiyta mana camäpacunquipächu. ³⁴ Sumaj tantiyacunquiman. Tayta Diosninchipa shiminta willapäcunapaj achcajtam cačhamushaj. Willacujcunatapis, yačhachicucunatapis, Moiséspa shiminta yačhajcunatapis cačhamushaj. Jamcunam ichanga waquinta ruschüräj wañuchinquipaj. Waquintana shuntacäna wasicunačhu wascar ushyanquipaj. Waquintana marcan-marcan jaticačhar ushyanquipaj.

³⁵ «Tayta Diosninchipa shiminta wiယacujcunata wañuchicur, auquilluyquicuna wañuchicushantapis aparicunquipaj. Juchanta aparicunquipaj wiယacuj Abelta wañuchishanpita-pacha Baraquíaspa wamran Zacaríasta wañuchishancaman. Payta Tayta Diosninchipa wasi puncunčhu, tullpa wajtallančhu wañuchishcanqui. ³⁶ Sumaj tantiyacunquiman. Auquilluyquicuna wañuchishanpita jamcunatana Tayta Diosninchí ñacachishunquipaj.»

Jerusalén marca runacunata Jesús llaquipashan San Lucas 13.34-35

³⁷ Jerusalén marca runacunata llaquipar, Jesús niran: «Jerusalénllau Jerusalén, ¿imanirtaj Tayta Diosninchipa willacujnincunata wañuchinqui? ¿Imanirtaj caéhancunata sajmar ushyanqui? Chipsancunata maman ujllananpaj shuntashan-jina shuntaya munashcaj. Munaptisi, wasguipämashcanqui. ³⁸ Chay-niraj cashayquipita marcayquipis ragäman ticranga. ³⁹ Nuwatapis mana ricamanquipänachu. «Tayta Diosninchipa cačhamushan runa alli ricash caycullačhun» nir čhasquicamashpayquim ichanga, imayllapis ricamanquipaj.»*

24

Tayta Diosninchipa wasinta jučhurachinanta musyachicushan San Marcos 13.1-2; San Lucas 21.5-6

¹ Tayta Diosninchipa wasinpita Jesús llucshiycaptin, puríshijnincuna niran: «Tayta, mä, ricay. Achic-achicyaycaj rumicunawan Tayta Diosninchipa wasinta pирgasha. Sumaj cuyayllapaj, ¿au?»

² Jesúsna niran: «Au, llapanca ricaycanchi. Chaypis sumaj tantiyacunquiman. Imayllaga llapan ricashayqui ushyacanga. Rumiwan pirgararsi, llapanmi jučhurachish canga.»

Runacuna imaman čhayanačta musyachicushan San Marcos 13.3-23; San Lucas 21.7-24; 17.22-24

³ Chaypita Ulíbus puntačhu Jesús jamaraycaptin, puríshijnincuna rinrillančhu tapuran: «Tayta, ¿imaytaj Tayta Diosninchipa wasinta jučhurachinga? ¿Imanaypataj shimiqui čharcucänantapis, cay pacha ushyacänantapis musyashaj?» nir.

⁴ Jesúsna niran: «Pipis pantachishurunquiman. ⁵ Achcaj pantachicujcuna shamunga: «Tayta Diosninchipa cačhamushan Washäcuji cä» nir. Achcaj čhasquicamajta pantachinga.

⁶ Wacčhu-cayčhu wañuchinacuy jatariptinpis, ama mancharinquichu. Chaycunarač cangapaj. Chaypis cay pacha mana ushyacangarächu. ⁷ Cay pacha ushyacänanpäga marcan-marcan wañuchinacungapaj. Mučhuy captinpis, yargaywan runacuna wañunga. Chaytucuyčüpis pacha juyupa sicsicyanga. ⁸ Chaypis runacuna mana ushyacangarächu. Manchäga ñacayllarämi jallaringa.

⁹ «Čhasquicamashayqui-janan juyu runacunapa maquinman čhayachishunquipaj. Ñacachishunquipaj. Wañuchishunquipaj. Llapan runa chiquishunquipaj. ¹⁰ Achcaj runa: «Jesúspa shiminta čhasquicushcä» nirpis, wasguimanga. Quiquin-puralla wañuymanpis jitapanacunga. Chiquipänacunga.

* ^{23:39} Salmo 118.26.

¹¹ «Juchalláchu arujcuna jataringa: ‹Tayta Diosninchipa shiminta willacü› nir. Achcajta pantachinga. ¹² Runacunana Tayta Diosninchipa shiminta wiyyayta mana munar, juyuyanga. Mana llaquipänacunganachu. ¹³ Ima captinpis, jipaman ama cutircunquichu. Mana yamacällar shimita wiyyacuptiqui, imaycamanpis maquinchú Tayta Diosninchchi cawachishunquipaj. ¹⁴ May-chaychüpis llapan runata shimií willapäcush canga: ‹Tayta Diosninchchi maquinchumi llapan runata cawachiyta munan. Alli willapäta wiyyaptinraj, cay pacha ushyacänan chayamunga› nir.

¹⁵ «Willacuj Danielpa shiminta sumaj tantiyacärinquiman. Payga unayna niran: ‹Chiqui runacuna yaycapur, Tayta Diosninchita wasintinta pampaman churanga. Manchapacushantapis iéchichinga.› Millanaypaj rurashancunata ricar, ¹⁶ juclla jishpicärinquiman. Judea quinranchú tiyajcuna puntacunaman jishpicärinman. ¹⁷ Wasi puncučhu caycar, ruriman ama yaycunquimanchu. Imayquicunatapis ama jurgunquimanchu. ¹⁸ Chacrapitapis wasiquiman ama cutinquimanchu. Müdanayquita ama shuntanquimanchu.»

¹⁹ «Ñacachishan wican jishyaj warmicunapis, pishi wamrayujcunapis cuyapaypaj ñacanga. ²⁰ Chaymi jishpinayqui junaj tamya wicanman mana chayanapaj, diyawardaman mana chayanapaj Tayta Diosninchita mañacäri. ²¹ Chay wican juyupa ñacay canga. Chaynuj ñacay imaypis mana caranchu Tayta Diosninchchi cay pachata camashanpita-pacha. Chaynuypis yapay mana imaysi cangapänachu. ²² Wamrachacushancunata llaquipar, Tayta Diosninchchi chay ñacay junajcunata wallcayächinga. Manchäga pipis mana wañuypita jishpinmanchu.

²³ «Chaymi pipis: ‹Mä, ricay. Tayta Diosninchchi caáchamushan Washäcuñinchchi shamusha. Chayaycämun› nir nishuptiquisi, ama chasquipanquichu. ²⁴ Chay wican Washäcuñtucujcuna, willacuj-tucujcuna ricarimungapaj. Munayniuj car, tucuya ruranga runacunata riguichinanpaj. Imaysi runa mana ricashancunatapis ruranga. Chayta rurar, Tayta Diosninchchi acracushan runacunatapis waquinta pantachinga. ²⁵ Canan sumaj tantiyacunquiman. Willapänajpaj cashanta mayna willapashcaj.»

²⁶ «Chaymi: ‹Washäcuñinchchi chunyajchú caycan› nishuptiqui, ama aywanquichu. ‹Wasi ruričhumi Washäcuñinchchi pacaraycan› nishuptiquipis, ama chasquipanquichu.

²⁷ «Tayta Diosninchchi caáchamasha. Cutimuptiga, illaguta llapan ricashan-jina llapllapanmi ricamanga. ²⁸ Rimaypis purin. ‹Siucacunash micunanta ricar, maymanpis jutucan.› Cutimushätapis llapan runa mayanga.»

Tayta Jesúspa cutimunanpita musyachicushan

San Marcos 13.24-37; San Lucas 17.26-30, 34-36; 21.25-33

²⁹ «Juyupa ñacaycuna chawarcuptillan,
Inti wañucäcunga.
Quillapis mana achicyämunganachu.
Istrillacunapis shicwamunga.

Janaj pachapis juyupa tapsinga.*

³⁰ «Chaypitara cutimunäta mayanquipaj. Llapan runa mancharir, waganga. Chay junaj Tayta Diosninchchi caáchamaptin, munayniuj car, pucutay jananchú achic-achicyaycar cutiycämujta ricamanquipaj.

³¹ «Tayta Diosninchina anjilcunata caáchamunga. Paycunana curnítanta sumaj suynachimur, chay-tucuypita Tayta Diosninchchi acracushan runacunata shuntamunga. Janaj pachapa cantunpita juc-caj cantuncaman shuntamunga.

³² «Jígas yürawan tincuchiypa tantiyacushun. Yüran chillguiptin, tamya quilla jallaycunanta musyanchi. ³³ Chay-jina llapan willapashäcuna chärcuptin, cutimunä caycashanta tantiyacärinquipaj. ³⁴ Sumaj tantiyacunquiman. Waquinniquipa ricay ñawiquíchú llapan

* ^{24:29} Isaías 13.10; 34.4.

čarcucanga. ³⁵ Janaj pachapis, cay pachapis ushyacanga. Shimími ichanga mana jungacangachu. Llapanmi čarcucanga.

³⁶ «Cutimunä junajta Tayta Diosninchi pitapis mana musyachishachu. Anjilnincunatapis, nuwatapis mana musyachimashachu. Quiquin Taytallanchim musyaraycan.

³⁷ «Sumaj tantiyacunquiman. Tayta Diosninchi caćhamasha. Yapay caćhamänan wichanga Noé cawashan wican-jina runacuna cawarcaycangapaj. ³⁸ Noé cawashan wican lücu tamya mana jallarishancaman runacuna cawashanwan cawacurcaycaran. Jauca micucuran. Upucuran. Waquinga majachacaycaran. Bütiman Noé jigacurcuptinmi ichanga, lücu tamya jallacuycuran. ³⁹ Chaycaman runacuna imatapis mana yarpaćhacullar cawaran. Yacu čhayar janančhu ricacuptin llapan wañur, ushyacayman čhayaran. Chay-jina Tayta Diosninchi caćhamaptin, cutimushä wicanpis runacuna cawashanwan cawarcaycangapaj.

⁴⁰ «Cutimunä junaj ishcaj runa čhacračhu arurcaycaptin, juc-cajllata shuntacushaj. Jucnintam ichanga jaguiycushaj. ⁴¹ Ishcaj warmi agacurcaycaptinpis, juc-cajllata shuntacushaj. Jucnintam ichanga jaguiycushaj.

⁴² «Chaymi ricchaycar imaypis cawanquiman. Nuwam Taytayqui caycä. Imay üra cutimunätapis mana musyanquichu. ⁴³ Sumaj tantiyacunquiman. Wasiman suwa yaycunanta musyar, wasiyuj mana puñucunmanchu. Manchäga suwa suwapänanpita ricchaycar waranman. ⁴⁴ Chaymi jamcunapis mayaj-mayajlla shuyarpaycämanquiman. Tayta Diosninchipa caćhan cashpä mana yarpashpita cutimushaj.»

Mincaywan tincuchiypa willapashan

San Lucas 12.41-48

⁴⁵ «Mä, sumaj tantiyacunquiman. ¿Mayganquiraj alli mincayman, tantiyacuj mincayman tincunquiman? Mincay alli captin, tantiyacuj captin, capural cananpäshi wasiyuj čhuranga. Capuralga mincay-masincunata sumajshi rican. Jaran. ⁴⁶ Capuralninpá shimenta čharcuptin wasiyuj cutimur, allipash ricanga. ⁴⁷ Sumaj tantiyacunquiman. Allita rurashanpita, capuralpa maquinmanna llapanta čhuranga. ⁴⁸ Jyu capuralshi ichanga shungullančhu yarpaćhacunman: «Wasiyuj mana cutimungarächu» nir. ⁴⁹ Chayshi mincay-masincunata magar ushyan. Micur, upyallar juyan. ⁵⁰ Wasiyuj mana musyash junajčhu illajpita cutiramunga. ⁵¹ Llutanta rurashanpitash jyu mincayninta mana cuyapapya wascar ushyanga. Jarguringa: «Jyu-masiquicunawan juyämuy» nirshi. Chayčhu atayparaj waganga. Juyupa ñacar, quiruntapis učhunga.

25

Čhuncaj jipashwan tincuchiypa willapashan

¹ «Tayta Diosninchi maquinčhu purichimashanchipita tincuchiypa tantiyachishayqui. Juc cutičħuši čhuncaj jipash achquinwan-caman majachacaj müsuta shuyarpaycaran. ² Pichgaj jipashnash yarpay-sapa caran; pichgajnash pishi-yarpayyuj. ³ Pishi-yarpayyuj jipashcuna achquinwan puriptinsi, wira wiñacunanta manash purichiranchu. ⁴ Yarpay-sapa jipashcunash ichanga achquinta, wira wiñacunantinta purichicäriran. ⁵ Majachacaj müsu juclla mana čhayaptinshi, jipashcunata puñunay chariran. Llapanshi puñucäcuran.

⁶ «Pullan-pagas čhayamuptinna, juc runash jayacuriran: «Majachacaj müsu yaycämumna. Časquicäriyna» nirshi. ⁷ Chayshi jipashcuna achquinta camaricäriran.

⁸ Pishi-yarpayyuj jipashcunash yarpay-sapa jipashcunata niran: «Achquiga upicäcuycannam. Wirayquita challicallämay.» ⁹ Yarpay-sapa jipashcunash niran: «Chalinacurga, llapanchi pishipacushunpaj. Wirata munar, ranticujcunaman aywariycunquiman.»

¹⁰ «Chayshi wira rantij aywashancaman majachacaj müsu ́hayaran. Majachacay tünaman achquin rataycajcuñallataш yacyuchiran. Jinarcur wasipa puncuntash wičhgacurcuran.

¹¹ «Chaypita pishi-yarpay jipashcunanash cutimur, puncupita jayacuran: ‹Taytallau tayta, puncuyquita quičchapaycallämäy, ari› nirshi. ¹² Majachacaj müsunash wasi ruripita nimuran: ‹Mana ricsillajchu. ¿Piraj cacullanquipis?›

¹³ «Yarpay-sapa jipash-jina jamcunapis camaricushalla cawanquiman. Cutimunäta mana musyanquichu. Mana yarpashpita cutimushaj.

Jillary ́chasquij piyuncunawan tincuchiypa willapashan

San Lucas 19.11-27

¹⁴ «Sumaj tantiyacunayquipaj tincuchiypa willapäshayqui. Juc runash carupa aywacunapaj quimsa uywaynincunata jayachiran. Paycunapa maquinmanshi llapan imancunatapis ́churaycuran. ¹⁵ Callpanta tantiyaycur-tantiyaycur, llapallantash jaguipurran. Juc uywaynintash jaguipurran pichga waranga (5,000) jillayta, juctanash ishcay waranga (2,000) jillayta, juctanash juc waranga (1,000) jillayta. Jinarcur carupash aywacurán.

¹⁶ «Pichga waranga (5,000) jillayta ́chasquijnash juclla aruchiran. Aruchiptionshi, wawallan pichga waranga (5,000) llucshiran. ¹⁷ Chay-jinash ishcay waranga (2,000) jillayta ́chasquijpis aruchishanpita wawallanta ishcay warangata (2,000) shuntaran. ¹⁸ Juc waranga (1,000) jillayta ́chasquijnash ichanga pachata učhuriycur pacaycuran. Manash aruchiranchu.

¹⁹ «Unayllatanash wasinman runa cutiran. Jinarcur uywaynincunataш jayachiran jillayninta wawantinta shuntanapaj. ²⁰ Pichga waranga (5,000) jillayta ́chasquijnash niran: ‹Tayta, pichga waranga (5,000) jillayta jaguipamashcanqui. Wawanpis pichga (5,000) warangata mirasha. Wawantintam cutiycächij. Cayllä callan.› ²¹ Runanash niran: ‹Allita rurashcanqui. Ichicllatapis alli ricashayquipita achcatana jaguipushayqui. Canan tünashun. Micupacushun.›

²² «Ishcay waranga (2,000) jillayta ́chasquijnash niran: ‹Tayta, ishcay waranga (2,000) jillayta jaguipamashcanqui. Wawantapis ishcay warangata (2,000) shuntashcä. Wawantintam cutiycächij. Jillayllä.› ²³ Runanash niran: ‹Allita rurashcanqui. Wall-callatapis alli ricashayquipita achcatana jaguipushayqui. Canan tünashun. Micupacushun.›

²⁴ «Juc waranga (1,000) jillayta ́chasquijnash niran: ‹Tayta, manchacuypa runa cashayquita musyä. Jamashalla imatapis ́chasquinqui. Mana murupacuycarsi, achca-achcata shuntayta munanqui. Mana arucuycarsi, chay-chicata pallayta munanqui. ²⁵ Chaymi manchacurä. Manchacurmi, jillayniquitapis mana yatapashcächu. Manchäga pachata učhcurullar pacaycurä. Catay jillayniqui.›

²⁶ «Chayshi runa niran: ‹Juyu runa canqui. Jilla. Jamashalla achca-achcata shuntayta musyaycar, ²⁷ jillay mirachijcunallamanpis jillaynita ́churanquiman caran. Cutimur, wawantinta shuntacüman caran.› ²⁸ Waquin uywaynincunatanash niran: ‹Waranga jillayninta jičhurir, ́chunca waranga (10,000) charaj-cajta juycuy. ²⁹ Sumaj wiymay. Wiyacamaptin, pitapis yanapäshaj. Paycuna may-mayta charangapaj. Mana wiymaca-majcunatam ichanga ichicllata charashantapis jičhushaj. ³⁰ Jilla uywaytaga wajtaman wicay. Chacajman jaycuriy. Chayčhu atayparaj waganga. Juyupa ñacar, quiruntapis učhunga.›

Runacunapa juchanta jurgapänan junajpita willapashan

³¹ «Tayta Diosninchipa cačhan car, anjilcunawan-ima cutimushaj. Jatun auturdä-jina achic-achicyaycar mandajpa jamacunanchu jamashaj. ³² Llapan marcapita runacuna ñaupäman jutucanga. Llapan jutucaption, capshicunapa ́chaupinpita uyshata raquiycaj-yupay shimiña wiymacunata raquicurishaj. ³³ Wiyacamajcunata alli ricar, diricha-caj

lädüman raquicurishaj. Mana wiacamajcunatam ichanga juyu ñawíwan ricar, isquirdacaj lädüman raquirishaj.

³⁴ «Jatun auturdä carmi, wiyacujcunata nishaj: «Papäni alli ricashunqui. Paypa maquinchüna caway. Cay pachata camashanpita-pacha maquinchü cawanayquipaj shuyaraycäshunqui. ³⁵ Yargaycajta ricaycämar, jaramashcanqui. Yacunaycajta ricaycämarpis, upuchimashcanqui. Jurpay-tucur puriptipis, pachächimashcanqui. ³⁶ Müdanaynajta ricaycämarpis, ushtucunäpaj camaripamashcanqui. Jishyaptipis, carsilchü wičhgaraptipis, watucallämashcanqui.»

³⁷ «Chaura wiyacuj runacuna tapumanga: «Tayta, ¿imaytaj yargaycajta ricar, jarallahcaj? Yacunaycajta ricar, ¿imaytaj upuchillashcaj? ³⁸ Jurpay-tucur puriptiqui, ¿imaytaj pachächillashcaj? Müdanaynajta ricar, ¿imaytaj camaripullashcaj? ³⁹ Jishyaycaptiqui, carsilchü wičhgaraptiqui, ¿imaytaj watucullashcaj?» nir. ⁴⁰ Canan sumaj tantiyacunquiman. Wiyacamaj irmänucunata tarichir yanapar, quiqiüta yanapämashcanqui. Nuwa-janan paycunata yanapashcanqui runa-masincuna mana alli ricacaptinsi.

⁴¹ «Jinarcur mana wiyacujcunata chapata rurar nishaj: «Juyu runacuna, ricaytasi mana munallajchu. Ratataycaj ninaman jaycushayqui. Mana ushyacaj ninata Tayta Diosninchı camarisha supay-masintincunapaj. ⁴² Yargaycaptisi, mana jaramashcanquichu. Yacunaycaptisi, mana upuchimashcanquichu. ⁴³ Jurpay-tucur puriptisi, mana pachächimashcanquichu. Müdanaynaj caycaptisi, ushtucunäpaj mana camaripamashcanquichu. Jishyaycaptisi, carsilchü wičhgaraycaptisi, mana watucamashcanquichu.»

⁴⁴ «Chaura mana wiyacujcunapis tapumanga: «Tayta, yargaycajta, yacunaycajta, jurpay-tucur puriycajta, müdanaynajta imaypis mana ricashcajchu. Jishyaycashayquitapis, carsilchü wičhgaraycashayquitapis mana musyashcächu. Ricar-imarga, yanapajmanmi caran.» ⁴⁵ Nuwana nishaj: «Sumaj tantiyacunquiman. Wiyacamajcunata mana alli ricashpayqui mana yanaparga, nuwatapis mana yanapämashcanquichu.»

⁴⁶ «Chaymi mana wiacamajcuna imaycamanpis ñacangapaj. Wiyacamajcunatam ichanga maquinchü imaycamanpis Tayta Diosninchı cawachinga.»

26

Jesústa charinanpaj parlanacushan San Marcos 14.1-2; San Lucas 22.1-2; San Juan 11.45-53

¹ Willapäcuriycur, purishijnincunallatana Jesús niran: ² «Canapita ishcay junajllata Pascua fiesta jallaycunga. Fiestačhu Tayta Diosninchipa cačhan caycaptisi, runacuna charimanga rusčhu wañuchimänanpaj.»

³ Chay junajcuna mayur cüra Caifás mandaj cüra-masincunata, mayur runacunata, yačhajcunata wasinman jayachiran. ⁴ Parlanacur, llapan auniran tumpayllapa Jesústa charircur wañuchinanpaj. ⁵ Chaypis waquinga mana munaranchu: «Fiestačhu ama wañuchishunchu. Runacuna ticraparamäshuwan» nir.

Jesústa pirjümita warmijaycapushan San Marcos 14.3-9; San Juan 12.1-8

⁶ Betania marcaman čhayar, Simónpa wasinčhu Jesús micupacuycaran. Simón jaračhu jishyapita allchacash captin: «Jaračhu Simón» nir ricsij. ⁷ Micupacuycaptin, butilla pirjümin aptash warmi čhayaran. Chay pirjümi sumaj čhaninyuj caran. Butillata quičharir, Jesúspa umanman jaycapuriran.

⁸ Jesúspa purishijnincunana ullgucäcuran: «¿Imapäraj pirjümita usuchisha? ⁹ Ama usuchimanchu caran. Manchäga pishipacujcunata aypunanpaj čhaninčhu ranticunman caran» nir.

¹⁰ Jesúsmi ichanga niran: «Ama rimapaychu. Cay warmi llaquipämär, allita rurasha. ¹¹ Pishipacujcunata imaypis ricanquipaj. Nuwatam ichanga waran-warana mana rica-manquipänachu. ¹² Chaymi cay warmi allita rurasha. Cawaycaptillä, pampamänanpaj armachimasha. ¹³ Sumaj tantiyacunquiman. May-chaychüpis Tayta Diosninchipa alli willacuyninta willapäcur, cay warmi allita rurashantapis willacunga. Mana jungacangachu.»

Judas Iscariote Jesústa ticrapushan

San Marcos 14.10-11; San Lucas 22.3-6

¹⁴ Chay junajlla Judas Iscariote Jesúspa puríshijnin caycarsi, mayur cüracunaman aywaran. ¹⁵ Chayarcur niran: «Jesústa charishipty, ¿imatataj jumanquiman?» Paycunana quimsa chunca (30) jillayta yupapuran. ¹⁶ Chay junajpita-pacha charij-charijllana Judas caycaran maychüpis Jesústa charinanpaj.

Puríshijnincunawan Pascua micuya Jesús micushan

San Marcos 14.12-25; San Lucas 22.7-23; San Juan 13.21-30; 1 Corintios 11.23-26

¹⁷ Pascua fiesta jallariran. Chay fiestaáhu Israel runacuna libadüraynaj tantata micuj. Acrashan cashnitapis pishtaj. Chay junaj puríshijnincuna Jesústa tapuran: «Tayta, ¿maychütaj Pascua micuya camaricamushaj?» nir. ¹⁸ Jesúnsna niran: «Jerusalén marcaman ñaupay. Juc runapa wasinman chayar, ninqui: ‹Tayta Jesú caáchamasha. Warasi-chicasí wañucunganash. ¿Maychütäshi wasi jäcuycan puríshijnincunallawan Pascua micuya micunananpaj?»

¹⁹ Puríshijnincunana änir marcaman chayar, Jesúspa shiminman-tupu llapantapis tariran. Chayllaáhu Pascua micuya camaricuran.

²⁰ Chacas-chacasna chunca ishcaywan puríshijnincunawan micunananpaj Jesú jamacuycuran. ²¹ Micurcaycashanáhu niran: «Sumaj tantiyacunquiman. Mayganiquipis ticrapamar, wañuyman jitarpamanquipaj.» ²² Chaura llaquicäcur, jucnin-jucninpis Jesústa tapuran: «Tayta, ¿nuwachuraj? ¿Nuwachuraj?» nir.

²³ Jesúnsna niran: «Nuwanchiwan iwal micujmi wañuyman jitarpamanga. ²⁴ Tayta Diosninchchi caáchamasha. Quiquin camacächiptin, wañuyman chayashaj shimin charcucänanpaj. Jitarpamaj runam ichanga juyupa ñacanga. Ama yurinmanpishchu caran.»

²⁵ Wañuyman jitarpuya yarpaj Judaspis niran: «Tayta, ¿nuwachuraj?» Jesúnsna niran: «Shimillayquipita musyä.»

²⁶ Micurcaycashanáhu tantata aptacurcur, Jesú niran: «Taytallau Tayta, ima allish tarichillämashcanqui.» Jinarcur tantata paquircur-paquircur, puríshijnincunata aypuran: «Catay. Micupacuy. Cay tanta quiquími caycä.» nir.

²⁷ Chaypita bïnuyuj cüpata aptacurcur, niran: «Taytallau Tayta, ima allish tarichillämashcanqui.» Jinarcur puríshijnincunata aypuran: «Cayllapita llapaniqui upuchinacuy. ²⁸ Cay bïnu yawarními. Washänaj-raycur wañuyman chayapti, yawarni jiíchanga. Yawarníwanraj parlanacushanta Tayta Diosninchchi charcucaycächin. Pi-maypa juchantapis jungaycur, alli ñawinpana ricashunqui. ²⁹ Sumaj tantiyacunquiman. Cananpita bïnuta mana upushänachu. Llapanchita Papänipa maquinman jishpichimaptinchiraj, mushuj bïnuta upushunpaj.»

Pedro wasguinanta Jesús musyachicushan

San Marcos 14.26-31; San Lucas 22.31-34; San Juan 13.36-38

³⁰ Micupacuya ushyariycur, Tayta Diosninchita alliman churashpan cantarir, Ulibus puntaman awyacäriran.

³¹ Chaychüna puríshijnincunata Jesú niran: «Canan pagas llapaniqui jaguiraycamanquipaj. Mana yupachicamanquipänachu. Tayta Diosninchipa shiminpis nin: ‹Uysha michijta wañuchishaj.»

Wañuy cachipti, uyshancuna mashtaypa-mashtar aywacunga.»*

³² «Cawarircamurmi ichanga Galilea marcaman ñaupashaj.»

³³ Pedruna niran: «Lapan jaguirishuptiquipis, mana imaysi jaguirishayquipächu.»

³⁴ Jesúsna niran: «Pedro, sumaj tantiyacunquiman. Canan chacayllasi wasguimanquipaj. Mana ricsij tucumanquipächu. Gällu manaraj cantaptillansi, quimsa cutiparaq wasguimanquipaj.»

³⁵ Pedruna niran: «Mana imaypis wasguishayquichu. Ishcaninchitapis jina wañuchimäshun.» Llapan puríshijnincunapis Pedro-jina niran: «Mana wasguishayquichu.»

Getsemaní chacračhu Jesús mañacushan

San Marcos 14.32-42; San Lucas 22.39-46

³⁶ Chaypita «Getsemaní» nishan chacraman puríshijnincunawan Jesús aywaran. Chayar, niran: «Washanijéhu Tayta Diosninchita mañacushäcaman cayllačhu jamapäriy.»

³⁷ Chaynuy nir Pedrutawan Zebedeupa ishcay wamrantapis pusharan. Paycunapa ricay ñawinčhu jatunpa llaquicuran. Shungun ishquicäcuptin, niran: ³⁸ «Llaquicuy juyupa chayapamasha. Wañuy janächüna. Yanagaycallämay, ari. Waräshimay.»

³⁹ Jinarcur carushman aywarcur pachacaman jungurpacuycur, Jesús mañacuran: «Papä, camacaptin, shuyarämaj ñacay ama chayapamanmanchu. Jishpiyta munaptisi, shungü munashan ama camacächchunchu. Manchäga munashayquinuylla llapanpis cay-cullächun» nir.

⁴⁰ Cutircur, quimsaj puríshijnincunata puñuycajta tariran. Chaymi Pedruta niran: «¿Puñucuycanquichu? ¿Manachu juc ürallasi yanagämanqui? ⁴¹ Ricchay-llapa. Mana wasguimänayquipaj Tayta Diosninchita mañacäriy. Allita yarparsi, ushyacajllam carcay-canqui.»

⁴² Jinarcur yapay Tayta Diosninchita mañacuj aywacuran: «Papällau Papä, ñacanä camacaptin, munashayquinuylla jina ñacashäpis» nir.

⁴³ Yapay puríshijnincunaman cutircur, puñucashta tariran. Wañuypa puñunay chariptin, puñucurcaycaran.

⁴⁴ Chaura puñuycajta jaguiycur yapay Tayta Diosninchita mañacuj aywacuran. Mañacushan-jinalla quimsa cutipa mañacuran.

⁴⁵ Yapay puríshijnincunaman cutircur, niran: «¿Puñurcaycanquičhim? ¿Jitarpaycanquičhim? Juyu runacuna chayamushana. Tayta Diosninchipa cačhan caycaptisi, charimanga. ⁴⁶ Jataripacuyna. Wañuyman jitarpamaj runa jananchichünam. Aywapushun.»

Jesústa rīsu charishan

San Marcos 14.43-50; San Lucas 22.47-53; San Juan 18.2-11

⁴⁷ Jesús rimaycaptillan, puríshijnin cashpansi Judas chayapuram. Mayur cüracunawan mayur runacuna cačhaptin, chay-chicaj runa aywaran jirunwan-caman, tucsicunanwan-caman.

⁴⁸ Judas mayna nish caran: «Macallarcushä runa Jesúsmi canga. Mana cačharillar, charicurcunqui» nir.

⁴⁹ Chaymi juclla Jesústa macallarcur, wamayaran: «Taytallau tayta» nir.

⁵⁰ Jesúsna niran: «Wawallau, yarpashayquita juclla ruray.» Chaynuy niptin, Jesústa charicarcäriran.

⁵¹ Chaura Jesúspa juc puríshijninna cuchillunta jurgurir, mayur cürapa uywayninpa rinrinta rugupariran.

⁵² Jesúsna niran: «Cuchilluta churaycuy. Ama jugariychu. Cuchilluta jugarijcuna cuchilluwan tuçish wañunga. ⁵³ Papäničta mañacupti, washämänanpaj čunca ishcaywan (20) batallun anjilcunatapis juclla cačharamunman. ⁵⁴ Chaypis mana mañacushächu. Jina wañuchimächun Tayta Diosninchipa unay willacujnincunapa shimin chercucänanpaj.»

* **26:31** Zacarías 13.7.

⁵⁵ Llapan runatana Jesús niran: «¿Imatataj yarpanqui? ¿Suwa cashätachu? ¿Imanirtaj jiruyquiwan-jiruyquiwan, cuchilluyquiwan-cuchilluyquiwan shamushcanqui? Waran-waran Tayta Diosninchipa wasinčhu tantiyachicuycaja ricamashcanqui. ¿Imanirtaj mana charimashcanquichu? ⁵⁶ Ichanga Tayta Diosninchipa shimin čarcucänanpämi charimashcanqui. Unay willacujcuna llapanta musyachicuran.»

Niycaptillan, purišhijnincuna jishpicäriran. Japallantana Jesústa jaguiycäriran.

Mayur Israel runacunapa sisyuninman Jesústa apashan

San Marcos 14.53-65; San Lucas 22.54-55, 63-71; San Juan 18.12-14, 19-24

⁵⁷ Charijcunana Jesústa aparan mayur cüra Caifáspa wasinman. Chaychéhu Moiséspa shiminta yačhajcunawan mayur runacuna shuntacaran.

⁵⁸ Jesúspa caru jipallanta aywar, sawan ruricaman Pedro yaycuran. Ruričhu Jesús imaman čhayanantapis ricananpaj Tayta Diosninchipa wasinta täpajcunawan jamacucaran.

⁵⁹ Wasi ruričhu mayur cüracunawan llapan mayur Israel runacuna tumpajcunata ashircaycaran Jesústa wañuchinanpaj. ⁶⁰ Ichanga mana tariranchu. Imata tumparpis, juchanta mana tariranchu. Mayllantana ishcaj runa niran: ⁶¹ «Chay runash nisha: <Tayta Diosninchipa wasinta jučhurachíman. Jinarcur, quimsa junajllačhu jatarachiáman.» »

⁶² Chaynuy tumpaptin mayur cüra jatarcur, Jesústa tapuran: «¿Manachu rimacunqui? ¿Rasunpachu rimashcanqui?»

⁶³ Chaynuy tapuptinsi, Jesús mana rimacuranchu. Chaura mayur cüra niran: «Cawaj Tayta Diosninchipa ricay ñawinčhu caycanchi. Mä, willamay. ¿Tayta Diosninchipa Wawanchu canqui? ¿Cačhamushan Washäcučhu canqui?»

⁶⁴ Jesúsnra niran: «Rimashcanquinam. Chaypis Tayta Diosninchipa cačhan cashpä willashayqui: <Cananpita mandäshinäpaj Munayniuj Tayta Diosninchipa diricha-caj lädunčhu jamashaj. Pucutay janančhu cutiyämujta ricamanquipaj.> »*

⁶⁵ Chaura mayur cüra ullgucäcuran. Müdanantapis račhir ushyarir japariran: «Quiquin Tayta Diosninchita apäriyacan. Shiminpita wiyashcanchi. Tistiguta mana ashishun-nachu. ⁶⁶ Waquiniqui, ¿manachu rimacunqui?» Chaynuy tapuptin, llapan runa juc shimilla niran: «Wañuchicächun.»

⁶⁷ Waquin runa Jesústa tuwapur ushyaran. Waquinna lajyar ushyaran. Waquinna magaran: ⁶⁸ «¿Pitaj lajyashcashunqui? Tayta Diosninchichi cačhamushan Washäcučhu caycar, mä, willamay» nir.

Jesústa Pedro wasguishan

San Marcos 14.66-72; San Lucas 22.56-62; San Juan 18.15-18, 25-27

⁶⁹ Pedro sawančhu jamaraycaptin, cürapa uywaynin jipash aywarcur, niran: «Galilea runa Jesúswan purishcanqui, ¿au?» ⁷⁰ Pedrum ichanga llapanpa ñaupančhu wasguiran: «Mana. Imatash rimacullanquipis» nir.

⁷¹ Chaynuy nir sawan wajtapa llucshicuran. Cürapa juc-caj uywaynin jipashna Pedruta ricar, llapan runata willaran: «Cay runa Nazaret marca Jesúspa purišhijnin» nir.

⁷² Pedruna niran: «Mana. Jesús pí cashantapis mana musyächu. Tayta Diosninchipa ricay ñawinčhu rimaycä.»

⁷³ Mayllanta jinan runacunana Pedruta niran: «Galilea runa canqui, ¿au? Rimacuynil-layqui musyachicuycan.»

⁷⁴ Chaura Pedro ullgucäcuran: «Chay runata mana ricsüchu. ¿Piraj cacullanpis? Llul-lacuptiga, jina Tayta Diosninchichi ñacaycachimächun» nir. Rimaycaptillan, gällu cantariy-curan.

* **26:64** Daniel 7.13.

⁷⁵ Chayraj Pedro yarpäriran: «Mana ricsij tucumanquipächu. Gällu manaraj cantaptillansi, quimsa cutipa wasguimanquipaj» nishanta. Jesúspa shiminta yarpärir wajtaman llucshiycur, llaquicuywan juyupa wagaran.

27

Mandaj Pilatupa dispächunman Jesústa apashan San Marcos 15.1; San Lucas 23.1-2; San Juan 18.28-32

¹ Pacha wararcuptin, mayur cüracunawan mayur runacuna yapay jutucaran. Sisyunčhu Jesústa imanuypa wañuchinanpaj parlanacäriran. ² Jinarcur Jesústa sumaj watacurcur, mandaj Pilatupa dispächunman aparan.

Judas Iscariote wañushan

³ Jesús wañuyman čhayananata musyar, chigaypa Judas llaquicuran. Chaymi wañuyman jitarpushanpita wanacuran. Quimsa čhunca (30) jillayta čhasquishantapis mayur cüracunatawan mayur runacunata cutiycachiran: ⁴ «Tayta Diosninchipa ricay ñawinčhu juchata aparicushcä. Jesús mana juchacush caycaptinsi, wañuyman jitarpushcä» nir. Paycunana niran: «Mana imanämanpishchu. Quiquipitana.» ⁵ Chaura jillay čhasquishantapis Tayta Diosninchipa wasin ruriman machirir aywacuran. Carushta aywaycur, maticuriran.

⁶ Mayur cüracunana jillayta shuntarcur, parlanacäriran: «Cay jillayta Tayta Diosninchita jarashan cuyachicuyninwan mana talluchishuwanchu. Wañuchicuj runapa jillayninta mana čhasquishuwanchu» nir. ⁷ Parlanacuriycur, jäpa runacuna pampacunandanpaj čhacrata rantiran. Chay čhacrapa jutin caran: «Allpa manca pampa.» ⁸ Canancamanpis chay čhacrata ricsin: «Yawar pampa» nir. ⁹ Llapanpis camacaran willacuj Jeremíaspa shimin čharcucänanpaj. Payga unayna niran:

«Waqin Israel runacunapa shiminta čharcur, runata wañuchishanpita quimsa čhunca (30) jillayta juturan.

¹⁰ Chay jillayllawan «Allpa manca pampa» nishanta rantiran.
Tayta Diosninchipa shiminpita llapanpis camacaran.»*

Jesústa mandaj Pilato tapupashan

San Marcos 15.2-5; San Lucas 23.3-5; San Juan 18.33-38

¹¹ Dispächuman čhayachiptin, mandaj Pilato Jesústa tapuran: «¿Rasunpachu Israel runacunapa mandajnin canqui?» nir. Jesúsnra niran: «Quiquipim rimashcanqui.»

¹² Mayur cüracunawan mayur runacunana tucuy-tucuypita Jesústa tumparan. Jesúsmi ichanga mana rimacuranchu. ¹³ Chaura mandaj Pilato Jesústa tapuran: «Ima-imata nishuptiquipis, ¿manachu rimacunqui?» nir. ¹⁴ Jesúsmi ichanga imatapis mana rimacuranchu. Chaymi mandaj Pilato mancharicäcuran.

Jesústa rusčhu wañuchinanpaj aunishan

San Marcos 15.6-20; San Lucas 23.13-25; San Juan 18.38-19.16

¹⁵ Pascua fiestačhu runacuna mañacuptin, watan-watan mandaj Pilato juc rísuta cačharij. ¹⁶ Chay wican juyu runa Barrabás rísu wičgaraycaran. Juyu cashanta lapan runa musyaran. ¹⁷ Chaymi mandaj Pilato lapan runata tapuran: «¿Maygantataj cačharishaj: Barrabástachu, «Washäcuj» ricsishan Jesústachu?» nir. ¹⁸ Jesústa chiquir mayur runacuna apapushanta mandaj Pilato mayna musyaycaran.

¹⁹ Dispächučhu caycaptillan, mandaj Pilatuta warmin willachiran: «Chay runa juchata mana aparicushachu. Imatapis ama ruraychu. Chacay chiquita suyñushcä» nir.

²⁰ Chaycaman mayur cüracunawan mayur Israel runacuna lapan runata shimiyanan: «Barrabásta cačhariy. Jesústa wañuy cachiy» nir mañacärinanpaj. ²¹ Chaymi mandaj Pilato:

* ^{27:10} Zacarías 11.12-13.

«¿Mayganta cačharinätataj munanqui?» nir tapuptin, runacuna: «Barrabásta cačhary» nir mañacuran. ²² Mañacuptin, mandaj Pilato tapuran: ««Washäcuj» ricsishan Jesústa, ¿imanäshätaj?» nir. Runacunana llapallan japariyapa niran: «Rusčhu wañuchicächun.» ²³ Mandaj Pilatuna yapay tapuran: «¿Imachütaj juchata aparicusha?» Runacunana sumaj japariran: «Rusčhu wañuchicächun.»

²⁴ Runacuna sumaj ullgucarcäriptin, ima ruraytapis mandaj Pilato mana camäpacurannachu. Chaymi llapan ricay maquinta yacuwan awicuran: «Cay runata wañuchiption, nuwapa juchä mana cangachu. Munashayquita imatapis mä, ruracäri» nir. ²⁵ Chaura llapan runa niran: «Cay runa wañuchishanpita nuwacunana, wamräcuna juchata aparicushaj.»

²⁶ Chaymi mandaj Pilato Barrabásta cačhariycuran. Jesústam ichanga sumaj wascachiriycur, murucuncunata inčigaran rusčhu wañuchinanpaj.

²⁷ Murucucuna mandajninpa sawanninman Jesústa yaycuchiran. Jinarcur llapan murucu-masincunata shuntachiran. ²⁸ Jalapačhar, Jesústa ushyaran. Asipänan cashpan mandajpa puca jacunta jacuparan. ²⁹ Umanmanpis curünata jatiparan, ichanga cashata pilltarellular. Diricha-caj maquinmanpis shugush garutillata aptaparan. Jinarcur ūapanman jungurpacaycärir ashllir ushyaran. Alliman čuraj-tucuran: «Israel runacunapa mandajnin alli ricash caycullächun» nir. ³⁰ Jananmanpis tuwapur ushyaran. Shugushwan umančhu wirur ushyaran.

³¹ Pampaman čurariycur, puca jacunta jičuriran. Quiquinpa müdananta ushtuparcur, rusčhu wañuchinanpaj aparan.

Jesústa rusčhu wañuchishan

San Marcos 15.21-32; San Lucas 23.26-43; San Juan 19.17-27

³² Jesústa wañuchinanpaj apaycashančhu Cirene marca Simónwan tincuran. Simóntana Jesús apashan rusta apachiran.

³³ Chayaran «Gólgota» nishan pachaman. Rimayninčhu: «Gólgota» ninanta: «Calabíra pata» nir ricsin. ³⁴ Usuncachicuj jampitawan bínuta tallurcachir, Jesústa upuchiyyta munaran. Malliycur, mana upuranchu.

³⁵ Rusman läbaycur, murucucuna surtita jitaran Jesúspa müdananta mayganinpis apacunapaj.* ³⁶ Jinarcur jamacuycur täparan. ³⁷ Imapita wañuchishanpis musyacänanpaj rus jananman isquirbiran: «Cayga Jesús, Israel runacunapa mandajnin» nir.

³⁸ Jesústawan ishcaj suwatapis iwal rusman läbaran: jucninta diricha-caj lädunman, jucninta isquirda-caj lädunman.

³⁹ Chay quinranpa purij runacuna Jesústa pampaman čuraran. Ashllishpan umanta awir ⁴⁰ niran: «Tayta Diosninchipa wasinta jučurachirshi, quimsa junajllata pirgaypa jatarachinqui. Tayta Diosninchipa Wawan carga, wañuypita mä, jishpiy. Ruspita mä, yarpamuy» nir.

⁴¹ Mayur cüracunapis, mayur runacunapis, Moiséspa shiminta yačhajcunapis Jesústa pampaman čurar, niran: ⁴² «Waqin runacunata cawarachishash. Quiquinmi ichanga jishpiyta mana junchu. Israel runacunapa mandajnin carga, ruspita mä, yarpamuchun. Yarpamuptin, shiminta čhasquicushunčhi. ⁴³ Tayta Diosninchimansi yupachicuran. «Tayta Diosninchipa Wawanmi cä» nishash. Tayta Diosninchipi llaquipar, mä, wañuypita jishpichichun.»

⁴⁴ Lädunčhu läbaraj suwacunapis Jesústa ashllir ushyaran.

Jesús wañushan

San Marcos 15.33-41; San Lucas 23.44-49; San Juan 19.28-30

* ^{27:35} Waquin Bibliačhu yapashpan nin: «Unay willacujpa shimin čharcunapaj surtitaraj jitaran mayganin apananpäpis. Willacujga unayna niran: «Surtita jitarcurred müdanäta apanga.» » Salmo 22.18.

⁴⁵ Lasdüsipita mallwaycaman pacha chacacäcuran. ⁴⁶ Mallwayna Jesús japačhacuran: «Elí, Elí, ¿lamá sabactani?» nir. Rimayninčhu: «Elí, Elí, ¿lamá sabactani?» ninanga: «Taytallau Tayta, ¿imanirtaj jaguiraycamashcanqui?» ninanmi.*

⁴⁷ Japačhacuptin, wiyačuna niran: «Mä, wiyašun. Tayta Diosninchipa unay willacujnín Elíastačhim jayacuycan.» ⁴⁸ Juc runana juclla shigui bínuman shaputa ushmarcachir shugushman watarcur, Jesústa shuguchiya munaran. ⁴⁹ Waquin runam ichanga ricaparcaycaran: «Ama yanapaychu. Má, ricapášun. Rasunpachush Elías shamunga ruspita jishpichinanpaj» nir.

⁵⁰ Jesúsmi ichanga sumaj japarir, wañucäcuran.

⁵¹ Wañucäuptin, Tayta Diosninchipa wasinčhu chaparaj bayítapis janapita uraypa callacäcuran. ⁵² Pachapis sicsicyacurcuran. Chagacunapis shillicäcuran. Michucunapis quičhacäcuran. Tayta Diosninchita wiyačunaga wañush caycashančhusi achcaj cawaricarcamuran. ⁵³ Cawarimur, pamparashan učhcipita llucshiramuran. Paycunapis Jesús cawarimushanpita Jerusalén marcaman aywaran. Achcaj runa ricaran.

⁵⁴ Pacha sicsicyaptin, Jesústa tāpaj capitapis, murucucunapis juyupa manchariran: «Cay runa rasunpa Tayta Diosninchipa Wawan casha» nir.

⁵⁵ Jesústa yanapar Galilea marcapita-pacha aywāshij warmicunapis carullapita ricapaycaran. ⁵⁶ Ricapaycaran Magdalena marcapita María, Santiagoawan Josépa maman María, Zebedeupa warmin-ima.

Jesústa pampashan

San Marcos 15.42-47; San Lucas 23.50-56; San Juan 19.38-42

⁵⁷ Pacha chacanaycaptin, mandaj Pilatuman Arimatea marcapita José aywaran. Payga puchuy-puchuy janančhu cawaj runa caran. Jesúswanpis purij. ⁵⁸ Chayarcur, mandaj Pilatuta niran: «Jesústa pampachicushaj.» Mañacuptin, murucuncunata: «Apacuchun» nir auniran.

⁵⁹ Chaura ayanta shuntaycur, tacshash bayítawan José pituran. ⁶⁰ Jinarcur quiquin pampacunananpaj učhcuchishan chagaman pampaycuran. Chayman pitapis mana pamparanrächu. Puncuntapis jatun rumiwan chapachiran. Nircur aywacuran.

⁶¹ Pamparaycaptin, Magdalena marca Mariawan Josépa maman María pamparashan ñaupančhu jamaraycaran.

⁶² Diyawarda tutana Pascua fiesta camaricuy junaj ushyarcuptinna, mayur cüracunawan fariseucuna parlanacuriycur, mandaj Pilatuman aywaran. ⁶³ Chayar, niran: «Tayta, llulla Jesús cawaycällar niran: «Quimsa junajpita cawarimushaj.»

⁶⁴ Chaymi pamparashanta quimsa junajcaman tāpachiy. Manchä purishijnincuna ayanta suwacurunman. Jinarcur runacunata willapanga: «Wañushanpita Jesús cawarimusha» nir. Chaynuy llullacuptin, llapan shungunwanna runacuna čhasquicunga.» ⁶⁵ Mandaj Pilatuna niran: «Murucucunaga maquiquičhumi. Jesús pamparashanta sumaj tāpachun.»

⁶⁶ Niptin, murucucunawan aywar, Jesús pamparashanta chaparaj rumita chäpaypa chapaycuran. Murucucunatapis tāpananpaj čhuraran.

28

Jesús cawarimushanpita willacushan

San Marcos 16.1-8; San Lucas 24.1-12; San Juan 20.1-10

¹ Diyawarda ushyarcuptin dumingu warariycaptillan, Magdalena marca Mariawan juc-caj María Jesús pamparashanman aywaran.

² Illajpita pacha juyupa sicsicyacurcuran. Janaj pachapitapis Tayta Diosninchipa anjlinin čhayamuran. Anjilna učhcu chaparaj rumita witircachir, jananman jamacuycuran.

* ^{27:46} Salmo 22.1.

³ Payga illagu-jina achic-achicyaran. Müdananpis rajupa-niraj yuraj llutpi caran. ⁴ Täpaj murucucunana juyupa mancharicäcuran. Wañush-jina jitacäcuran.

⁵ Warmicunatana anjil niran: «Ama manchariychu. Ruschu wañuj Jesústa ashiycashayquita musyä. ⁶ Caychu pampacush carsi, mana cannachu. Shiminmantupu Tayta Diosninchi cawarachimusha. Mä, aya pamparashanta ricay.

⁷ Canan purishijnincunata juclla willamuy. Cawarishantapis, Galilea quinranman ñaupaycashantapis willanqui. Chaychümi tincunquipaj. Imatapis ama tapupämaynachu. Llapantana willashcaj.»

⁸ Warmicunana mancharir, pamparashanpita aywacullaran. Chaypis shungun achi-cyacäcuptin, juclla Jesúswan purij-masincunata willaj aywacuran.

⁹ Aywarcaycaptin, Jesús ricaripuran: «¿Allillachu caycanqui?» nir. Wamayaptin, Jesúspa ́chaquinta macallacurcur alliman ́churaran. ¹⁰ Jesúsna niran: «Ama manchariychu. Purishimajnïcunata willaraycamuy. Galilea marcaman aywachun. Chaychümi tincushun.»

Murucucunata llullacachishan

¹¹ Warmicuna aywacuriptin, pamparashanta täpaj murucucunapis waquinga marcaman cuticuran. Mayur cüracunata llapallanta willaparan. ¹² Chaura mayur cüracunawan mayur runacuna parlanacuran. Sumaj parlanacuriycur, murucucunata achca jillayta juycuran: ¹³ «Pitapis willanqui: ‹Nuwacuna puñuycapti purishijnincuna chacaypa sharcamur, Jesúspa ayanta suwapaycamasha› nir. ¹⁴ Mandaj Pilato mayaptin, parlapushayqui mana imamanpis ́chayanayquipaj. Mana wascashunayquipaj amachashaj» nir. ¹⁵ Chaura murucucuna jillayta ́chasquicurcuran. Mayur runacuna yáchachishallanta runacunata willaparan. Rimashanga Israel runacunapa yarpayninchú canancamanpis jinalla cun.

Purishijnincunata Jesús cachacushan

San Marcos 16.14-18; San Lucas 24.36-49; San Juan 20.19-23

¹⁶ Chaura Galilea quinranman Jesús ricsichishan puntáchu tincunananpaj ́chunca jucwan (11) purishijnincuna aywaran. ¹⁷ Jesústa ricar waquin tantiyayta mana camäpacursi, llapallan alliman ́churaran. Waquincunam ichanga llutäpacuycaran.

¹⁸ Paycunawan juturar, Jesús niran: «Janaj pachatapis, cay pachatapis maquíman Tayta Diosninchi ́churasha. ¹⁹ Cananga jamcunapis chay-tucuyman aywanquiman. May marcachüpis shimiña willapäcunqui. Shimiña wiyacujcunata Tayta Diosninchipa jutinčhu, Wawanpa jutinčhu, Espíritu Santupa jutinčhu ushyachinqui. ²⁰ Wiyacunananpaj ima-imata willapashätapis llapanta tantiyachinqui. Cay pacha ushyacänancaman ricaycäshayqui.»

Jesúspa willapanta San Marcos willacushan

Tantiyacunanchipaj:

Marcos cay libruta isquirbiran. Paypa juc-caj jutin caran Juan Marcos (Hechos 12.12). Payga Jesúspa willapanta willacur, Pablutawan Bernabíta puríshiran. Chaynuypis Pedruta puríshiran Jesúspita willapäcuptin (1 San Pedro 5.13). Marcospita musyayta munar, liguinqui: Hechos 12.25; 13.5; 15.36-39; Colosenses 4.10; 2 Timoteo 4.11.

Marcos isquirbisan wican irmänucuna sumaj ñacaycaran. Jesúsman yupachicuption, waquin runacuna chiquir ushyaran. Chaypis irmänucunata shacyächiran.

San Marcos isquirbiran:

Jesús ushyacushanpita, Supay maquichacuya camashanpita: *San Marcos 1.1.13.*

Galilea quinranchu Jesús willapäcushanpita, Tayta Diosninchi camacächiyninpa imatapis rurashanpita: *San Marcos 1.14-7.23.*

Jäpa runacunapa marcancunachu Jesús willapäcushanpita, Tayta Diosninchi camacächiyninpa imatapis rurashanpita, Jesús Washäcu cashanta Pedro musyachicushanpita, juc-nirajman Jesús tigracurishanpita: *San Marcos 7.24-9.50.*

Jerusalén marcapa aywar Jesús willapäcushanpita, Tayta Diosninchi camacächiyninpa imatapis rurashanpita: *San Marcos 10.1-11.10.*

Jerusalén marcachu Jesús willapäcushanpita, Tayta Diosninchi camacächiyninpa imatapis rurashanpita: *San Marcos 11.11-13.37.*

Jesústa ñacachishanpita, wañuchishanpita, cawarachimushanpita, janaj pachaman shuntacushanpita: *San Marcos 14.1-16.20.*

Jesúspita Ushyachicuj Juan willacushan

San Mateo 3.1-12; San Lucas 3.1-9, 15-17; San Juan 1.19-28

¹ Cay libruchu isquirbiraycan Tayta Diosninchi acracushan Jesucristupa alli willapan. Jesúsga Tayta Diosninchipa Wawan. Caynuy jallarin.

² Unay willacujnín Isaíaswan musyachicur, Tayta Diosninchi niran:

«Má, wiymay.

Juc runa ñaupapäshunquipaj.

Quiquinta caçhashaj.

Paymi runacunata willapäcungapaj camaricushalla shuyaräshunayquipaj.

³ Chunyajchümi jayacuypa willacuycan:

⟨Taytanchi shamunanpaj camaricuy.

Caminuta pichay.

Wicsu caminucunatapis allchay» nir.»*

⁴ Chaura Isaías musyachicushan čharcuptin, chunyaj pachačhu runacunata Juan anyaparan. Llapanta anyapar, niran: «Tayta Diosninchipa shiminta wiycäriy. Juchapita wanacäriy. Ushyacäriy. Chayrämi Tayta Diosninchi llapan juchayquita junganga.»

⁵ Achcaj runa Jerusalén marcapita, Judea quinran marcacunapitapis aywaran Juan willapäcushanta wiyaj. Jucha aparicushanta mana pacaptin, Jordán mayúchu Juan ushyachiran.

⁶ Juanpa müdanan camillupa ajchanpita caran; sinturunninpis jarachapita. Chunyajchu tarishan chucluscunallatawan munti abijapa mishquillanta micuj.

⁷ Runacunatana willapaj: «Juc runa shamunga. Payga munayniyujmi. Llanguinta llushtipuyllatapis manchapacü. ⁸ Jamcunata yacullawan ushyachicuycä. Shamuj runam ichanga Espíritu Santuwan ushyachishunquipaj» nir.

* ^{1:3} Malaquías 3.1; Isaías 40.3.

*Jesústa Juan ushyachishan**San Mateo 3.13-17; San Lucas 3.21-22*

⁹ Chay wichan Galilea quinran Nazaret marcapita Juan ushyachicushan-cajman Jesúspis aywaran. Paytapis Jordán mayučhu Juan ushyachiran. ¹⁰ Ushyacuriycur yacupita llucshiramur, janaj pacha quičhacämujta Jesús ricaran. Espíritu Santuna palumajina jananman yarpamuran. ¹¹ Janaj pachapita rimamushanpis wiycämuran: «Cuyay Wawämi canqui. Shungümanmi sumaj tincunqui» nir.

*Jesústa Supay maquichacuyta camashan**San Mateo 4.1-11; San Lucas 4.1-13*

¹² Chaypita Espíritu Santu charicurcur, chunyaj pachaman Jesústa aparan. ¹³ Micucuj uywacuna tiyanančhu čhuscu čhunca (40) junaj juyaptin, Supay maquichacuyta munaran. Anjilcunam ichanga Jesústa pishishanta tarichiran.

*Jesús willapäcuya jallaycushan**San Mateo 4.12-17; San Lucas 4.14-15*

¹⁴ Ushyachicuj Juanta carsilman wičhgachishanpita-pacha Galilea marcacunamanna Jesús aywacuran. Chay marcacunačhu Tayta Diosninchipa alli willacuyninta willapäcuran. ¹⁵ Willapäcur niran: «Tayta Diosninchichi shuyaraycämanchinam. Maquinčünam purichimäshun. Jucha aparicushayquicunapita wanacäriy. Tayta Diosninchiman yupachicäriy. Alli willacuyninta wiycäriy.»

*Purishinanpaj čhuscuj piscädu charicunata Jesús jayashan**San Mateo 4.18-22; San Lucas 5.1-11*

¹⁶ Galilea püsü cantunpa aywaycashančhu Jesús ricaran Simóntawan wauguin Andrésta. Piscädu charij car, ridinta yacuman jitarcaycaran. ¹⁷ Paycunata Jesús niran: «Purishimay. Piscäduta charishayqui-jina runacunata shuntanquipaj Tayta Diosninchipa maquinčhu cawananpaj.» ¹⁸ Chaura ridinta jaguiriycur, Jesúswan aywacuran.

¹⁹ Washanija aywaycashančhüna Santiagutawan Juanta bütillačhu ridinta allcharcaycajta tariran. Paycunapa taytan caran Zebedeo. ²⁰ Jesús jayaptin, papänintawan mincaynincunata bütinčhu jaguiycur, aywacärian.

*Supay puillacushan runata Jesús allchacächishan**San Lucas 4.31-37*

²¹ Chaypita Cafarnaún marcaman aywacärian. Diyawarda junaj shuntacäna wasiman yaycurir, Tayta Diosninchipa shiminta Jesús willapäcuran. ²² Willapäcushanta wiyar, runacuna sumaj cushicärian: «Moiséspa shiminta yačhajcuna willapäcushanta mana tantiyanchichu. Jesús willapäcushanmi ichanga shungunchiman sumaj čhayan» nir.

²³ Chay shuntacäna wasičhu supay puillacushan runapis caycaran. Supay ri-machiptin, japarir niran: ²⁴ «Nazaret runa Jesús, ¿imatataj ashiycanqui? ¿illarachimajchu shamushcanqui? Pi cashayquitapis musyä. Tayta Diosninchipa Wawanmi canqui. Acracuyninmi canqui.» ²⁵ Jesúsna supayta piñacuran: «Upälla. Chay runata cačhary» nir.

²⁶ Chaura supay runata waňunajpaj tapsirir, juyupa japarir, aywacuran.

²⁷ Chayta ricar, llapan runa juyupa manchariran. Jucnin-jucnin ninacuran: «¿Imatataj ricanchi? ¿Imatataj wiyanchi? Cananraj munayniyuj runata ricanchi. Supaycunata jarguptinpis, aywacun.» ²⁸ Chaynuy Jesús ima-ima rurashanpis llapan Galilea marca-cunačhu juclla mayacaran. Quiquin-pura runacuna willanacärian.

*Simónpa suydanta Jesús allchacächishan**San Mateo 8.14-15; San Lucas 4.38-39*

²⁹ Shuntacäna wasipita aywacur Santiagutawan Juanta pushacurcur, Jesús aywaran Simónpawan Andréspa wasinman. ³⁰ Čhayaptin, juclla willaran: «Tayta Jesús, Simónpa

suydan wayllaywan jishyaycan» nir. ³¹ Chaura jishyajman chayar, maquinpita jatarcachiran. Jatarcachiptin, wayllay caćhariycuran. Jinarcur yanucuriycuran jarananpaj.

*Jishyaćhucunata Jesús allchacächishan
San Mateo 8.16-17; San Lucas 4.40-41*

³² Chacanaycaptinna, runacuna jishyaćhucunata Jesúsman apamuran. «Diyawarda ushyacashanam» nir tucuy-niraj jishyaćhucunata, supay pucllacushancunata chayachiran. ³³ Simónpa marca-masincunapis llapan-yupay wasi puncunčhu juturpaycaran. ³⁴ Chaymi tucuy-niraj jishyawan jishyaćhucunata achcajta Jesús allchacächiran. Waquin runacunapita pucllacuj supaycunatapis jarguran. Pi cashantapis musyaptin, supaycunata mana rimachiranchu.

*Galilea marcacunaćhu Jesús willapäcushan
San Lucas 4.42-44*

³⁵ Chaca-chacalla marcapita llucshir, chunyaj pachaman Jesús aywaran Tayta Diosninchita mañacuj. ³⁶ Chaura puríshij-masincunawan Jesústa ashij Simón aywaran.

³⁷ Taripar, niran: «Tayta, llapan runa ashircaycäshunqui.» ³⁸ Jesúsnra niran: «Washa marcacunamanpis aywashun Tayta Diosninchipa alli willacuyninta willapäcuj. Chaypámi shamushcä.»

³⁹ Chaymi Galilea quinrančhu marcan-marcan Jesús puriran. Shuntacäna wasicunaćüpis Tayta Diosninchipa alli willacuyninta willapäcuran. Supaycunatapis runacunapita jarguran.

*Jaraćhu jishyawan runata Jesús allchacächishan
San Mateo 8.1-4; San Lucas 5.12-16*

⁴⁰ Jaraćhu jishyawan runana Jesúspa ñaupanman jungurpacuycur, mañacuran: «Llaquipämashpayqui allchacaycachillämay. Tayta Diosninchipa ricay ñawinčhüpis alli cayta munä» nir. ⁴¹ Mañacuptinga, llaquipashpan maquinwan yataycur, Jesús niran: «Llaquipajmi. Allchacayna.» ⁴² Chaynuy niptin, jaraćhu jishyawan jishyaycashančhu allchacäcuran. Tayta Diosninchipa ricay ñawinčhüpis allina caycaran. ⁴³ Chaura pitapis mana willapällar aywacunapaj Jesús piñaparan: ⁴⁴ «Pitapis ama willapanquichu. Manchäga cüraman ayway allina cashayquita ricashunayquipaj. Moiséspa shiminta chayrämäi llapanpa ricay ñawinčhu alli canquipaj» nir.

⁴⁵ Chaynuy willapaptinpis, willacuraycar aywacuran. Chaura chay-tucuyčhu mayacaran. Chaynuypa Jesús llapan runa ricay may marcamanpis mana yaycurannachu. Marca wajtancunallaćhüna puricuran. Runacunam ichanga chay-tucuypita Jesúsman shamuran.

2

*Cumllucash runata Jesús allchacächishan
San Mateo 9.1-8; San Lucas 5.17-26*

¹ Chaypita ishcay-quimsa junajtana Cafarnaún marcaman Jesús yapay cutiran. Wasinčhu caycashanta musyar, ² achcaj runa shuntacaran. Wasi puncu pampapis mana jäcurannachu. Jesúsnra Tayta Diosninchipa alli willacuyninta willapäcuycaran. ³ Chaynuy juturpaycaptin, quirmallawan cumllucash runata chuscu runa chayachimuran.

⁴ Wasi junta runa juturpaycaptin, Jesúspa ñaupanman yaycuchiyya mana camäpacuranchu. Chaymi wasi jananman jigarcur, ućhcuriycäriran. Jinarcur Jesúsman quirmantinta warcuyllapa yarpuchiran. ⁵ Paycuna llapan shungunwan yupachicushanta musyar, cumllucash runata Jesús niran: «Wawallau wawa, juchayquicunata jungashcänam.»

⁶ Chaura Moiséspa shiminta yačhajcuna shungullančhu ullguran: ⁷ «Cay runa, ¿imanirtaj chaynuy riman? Chaynuy rimarga, Tayta Diosninchita apäriyacan. Juchanchita Tayta Diosnillanchi junganman» nir.

⁸ Yarpashanta musyar, Jesús tapuran: «¿Imanirtaj llutanta yarparcaycanqui? ⁹ Mä, tapushayqui. ¿Cumllucash runata allchacächichu, jucha aparicushanta jungacächichu sasa? ¹⁰ Canan tantiyacunquiman. Tayta Diosninchchi cay pachaman cačhamasha. Munayniujmi cä pipa juchantapis jungacächinápaj.» Cumllucash runatana niran: ¹¹ «Jatariy. Quirmayquita shuntacurcur, wasiquiman cuticuy.»

¹² Chaura cumllucash runa jataricurcuran. Quirmanta apacurcur, llapan ricay llucshicuran. Chaynuypa llapan runa cushicushpan Tayta Diosninchita alliman čhuraran: «Canan ricashanchita mana imaypis ricashcanchichu» nir.

Levita Jesús jayashan

San Mateo 9.9-13; San Lucas 5.27-32

¹³ Chaypita Galilea püsu cantunpa Jesús yapay aywaycaran. Runacunapis achcaj ricäcu aywaran. Paycunatam Jesús yačhachiran. ¹⁴ Aywaycashančhu Alfeupa wamran Levita ricaran.* Leviga Roma marcapa mandajninpaj jillayta shuntaycaran. Ricar, Jesús niran: «Leví, puríshimay.» Niptin, Jesústa Leví puríshiran.

¹⁵ Chaypita Levípa wasinčhu puríshijnincunawan Jesús micurcaycaran. Waquin juchačhu arujcunawanpis, jillayta shuntajcunawanpis micurcaycaran. Chay-niraj runacuna achcajmi Jesústa puríshiran. ¹⁶ Moiséspa shiminta yačhaj fariseucunana Jesústa chiquipashan ricaran juchačhu arujcunawan jillayta shuntajcunawan micurcaycajta. Chaymi Jesúspa puríshijnincunata tapuran: «¿Imanirtaj juchačhu arujcunawan, jillayta shuntaj chiqui runacunawan Jesús micun?» nir.

¹⁷ Jamuraptin, Jesúspis niran: «Jishyačhucunallah jampicujta ashin. Mana jishyarga, mana ashinchu. Chay-jina nuwapis juchačhu arujcunata Tayta Diosninchiman cutichij shamushcä. Manam: <Juchaynajmi cä> nijcunatachu ashiycä.»

Ayünupita tapunacushan

San Mateo 9.14-17; San Lucas 5.33-39

¹⁸ Juc cuti Ushyachicuj Juanpa puríshijnincunapis, fariseucunapis ayünashpan Tayta Diosninchita mañacurcaycaran. Chaymi waquin runacuna Jesústa tapuran: «Ushyachicuj Juanpa puríshijnincunapis, fariseucunapa puríshijnincunapis ayünashpan Tayta Diosninchita mañacun. Puríshijniquicunam ichanga, ¿imanirtaj mana ayünanchu?» nir. ¹⁹ Chaynuy niptin quiquinman tincuchicur, Jesús niran: «Warmi ashishijcuna manash llaquishachu ayünan. Manchäga cushishash micupacärin. Majachacaj müsuta yanagaycar, manash ayünanmanchu. ²⁰ Warmi ashij müsuta jičhuptinshi ichanga, ayünangapaj. Jatunpash llaquicungapaj.»

²¹ «Chaynupis mauca müdanata mushuj račhipawan manash pipis jiranmanchu. Mushujwan jiraptin, jintishpan mauca müdanatapis jatunpanash račhirachin. ²² Bínuta puguchinanpäpis manash pipis chaquish jaracha putuman wiñanmanchu. Bínú pugur, chaquish jaracha pututa pashtarachinshi. Pashtaptin, bínupis ushyacäcunshi. Jaracha putupis račhicäcunshi. Chayshi llullu bínuta llullu jaracha putumanraj wiñan.»

Diyawardáchu ríguta shipishan

San Mateo 12.1-8; San Lucas 6.1-5

²³ Diyawarda junaj rígu cantunpa puríshijnincunawan Jesús aywaycaran. Puríshijnincuna ríguta shipircur-shipircur, maquinčhu cupacačharcaycaran. ²⁴ Chaymi fariseucuna Jesústa tapuran: «¿Mä, arushanta ricanquichu? ¿Imanirtaj diyawardáchu

* ^{2:14} Levítaga waquincuna ricsin: «Mateo» nir. San Mateo 9.9-ta ricay.

purishijniquicuna ríguta cupacačharcaycan? Diyawardačhu Tayta Diosninchipa shiminta čharcummi, mana arunchichu» nir.

²⁵ Chaura Jesús niran: «¿Auquillunchi David imata rurashantapis manachu musyanqui? Tayta Diosninchipa shiminta liguiycarsi, ¿yargaywan David imata rurashantapis manachu tantiyacushcanqui? ²⁶ Mayur cüra Abiatar caycashan wican yangay chariptin Tayta Diosninchipa wasinman yaycurir, jarashan tantanta David micuran. Cüracunalla micunan caycaptinsi, yanaguincunawanraj David micupäcuran.

²⁷ «Mä, wihamay. Tayta Diosninchipi diyawardata camacächiran runacuna jamaycunapaj, mana chay junajta manchapacunapächu. ²⁸ Tayta Diosninchipi cačhamasha. Chaymi diyawarda maquīčhu. Diyawardačhu runa imata rurananpäpis, imata mičhänäpäpis maquīčhumi caycan.»

3

Maquin wañush runata Jesús allchacächishan

San Mateo 12.9-14; San Lucas 6.6-11

¹ Juc cuti shuntacäna wasiman Jesús čhayaran. Chayčhu maquin wañush runapis caycaran. ² Ricapacujcunana Jesústa ricaparcaycaran: «Diyawarda caycaptin, mä, allchacächishingachush. Allchacächishallanmi achäqui canga» nir.

³ Maquin wañush runatana Jesús niran: «Llapan ricashunayquipaj íchiy.» ⁴ Waquin runatana tapuran: «Diyawardačhu, ¿allitachu, llutantachu rurashuwan? ¿Washāšhuwanchu? ¿Wañucuchun nishuwanchu?» nir. Tapuptin, llapan upällacaycäriran.

⁵ Chaura Jesús ricapacujcunata ullgush ricapäriran. Rumi shungu captin, sumaj llaquicuran. Maquin wañush runatana niran: «Maquiquita chutapacuy.» Chutapacuriptin, maquin allchacäcuran. ⁶ Fariseucunam ichanga juclla aywarcur, mandaj Herodespa yanapajnincunawan parlanacuran imanuypapis Jesústa wañuchinanpaj.

Achcaj runa Jesúsman aywashan

⁷ Chaypita püsu cantunman purishijnincunawan Jesús aywacuran. Jipantana achcaj Galilea runacuna aywaran. Judea quinranpitapis aywaran. ⁸ Jesús ima rurashancunata mayar, chay-tucuypita runacuna aywaran. Aywaran Judea quinranpita, Jerusalén marcapita, Idumea quinranpita, Jordán mayu wajtanpita, Tiro marca quinranpita, Sidón marca quinranpita. ⁹ Chaymi purishijnincunata Jesús niran: «Runacuna quičhquipämashpanchi lluchcamänanchipita bütita camariy.»

¹⁰ Achcajta allchacächish caycaptin, jishyačhucuna Jesúsman imanuypapis aywaj yatayllapis yataycunapaj. ¹¹ Jesústa ricashpan supay puillacushan runacunapis jungurpacuycur, japariypa niran: «Jamga Tayta Diosninchipa Wawanmi canqui.» ¹² Niptin, pí cashantapis mana musyachicunapaj Jesús sumaj piñacuran.

Čhunca ishcaywan cačhancunata Jesús acracushan

San Mateo 10.1-4; San Lucas 6.12-16

¹³ Chaypita puntaman Jesús aywaran. Chayčhu shungunman tincushancunata shuntaran. Shuntaptin, ¹⁴⁻¹⁵ čhunca ishcaywanta (12) acracuran purishinanpaj, shiminta willapäcunapaj, supaycunata jargunapaj. Paycunata acracuran cačhancunapaj.

¹⁶ Čhunca ishcaywan acracushancuna caycaran: «Pedro» nishan Simón, ¹⁷ Zebedeupa wamran Santiaguwan Juan. Paycunatam jutichaparan: «Boanerges» nir. «Boanerges» ninanga: «Räyupa wamrancuna» ninanmi. ¹⁸ Andrés, Felipe, Bartolomé, Mateo, Tomás, Alfeupa wamran Santiago, Tadeo, «Marcanpaj nanachicuj» nishan Simón, ¹⁹ Judas Iscariote. Payga Jesústa wañuyman jitarpuran.

*Jesústa pampaman churashan**San Mateo 12.22-32; San Lucas 11.14-23; 12.10*

²⁰ Chaypita purishijnincunawan Jesú wasinman cuticuran. Yapay achcaj runa shunta-captin, micunananpápis mana jäcuranchu. ²¹ Chayta mayaycur, yawar-masincuna ay-war-an apacunapaj: «Supaychi puillacusha» nir runacuna rimaptin. ²² Jerusalén mar-capita chayaj Moiséspa shiminta yačhajcunapis nircaycaran: «Mayur supay Beelzebulta jayararshi, supaycunata jarguycan. Mana Tayta Diosninchitachu jayaraycan.»

²³ Chaynuy niptin, Jesú jayapar, tincuchiypa willaparan: «Quiquin Supay, ¿imanuyparaj quiquinta jargucunman? ²⁴ May marcačhüpis quiquin-pura ticrapanacur, wacpacaypash aywacärin. ²⁵ May wasičhüpis majanwan ticrapanacur, raquicaymanshi chayan. ²⁶ Chay-jina mayur supaypis supay-masinwan ticrapanacur, ima ruraytapis mana camäpacunmanchu. Ushyacaymanpis chayanga. ²⁷ Juc runash wasiman yaycapur, wasiyujpa imancunatapis suwacun. Ichanga callpayuj runataräshi mancurnan. Jinacurräshi imancunatapis ushyajpaj apacun.

²⁸ «Sumaj tantiyacunquiman. Runacunapa llapan juchantapis, tucuy-jinanpa pampaman churashantapis Tayta Diosninchchi junganga. ²⁹ Espíritu Santuta ashllir ushyaptinmi ichanga, mana jungangachu. Juchanta aparicushalla imaypis cawanga.» ³⁰ Jesú chaynuy niran: «Supaypa maquinchhu purin» nir tumpashanpita.

*Mamanwan wauguincuna Jesústa ashishan**San Mateo 12.46-50; San Lucas 8.19-21*

³¹ Chaynuy willapäcuycaptin, Jesúspa mamanwan wauguincuna chayaran. Jawallapita jayachiran. ³² Juturpaycajcunana niran: «Tayta Jesú, mamayquiwan wauguiquicunash jawačhu shuyarpaycäshunqui. Ashishunquish.»

³³ Chaura Jesú tapuran: «¿Pitaj mamä? ¿Pitaj wauguicuna?» ³⁴ Juturpaycajcunata ricärir, niran: «Jamcuna mamä, wauguicuna canqui. ³⁵ Pipis Tayta Diosninchipa shungun munashanta rurajcunaga mamäwan, wauguicunawan, panicunawanmi tincun.»

4

*Murupacujman tincuchiypa willapashan**San Mateo 13.1-9; San Lucas 8.4-8*

¹ Chaura yapayna jatun püsu cantunchhu Jesú yačhachicuycaran. Achcaj runa jutu-captin, bütiman jigacurcuran willapäcunapaj. Runacunam ichanga yacu cantullanchhu juturpaycaran. ² Bütipitana Jesú imawanpis tincuchiyllapa tantiyachir, niran:

³ «Sumaj wiyamay. Juc runash murupacuj aywaran. ⁴ Machiptinshi, waquin muru caminuman chayasha. Caminuman chayajta pichuysacunash pashacurcursha. ⁵ Waquin murunash jarapshu allpaman chayasha. Jarapshu captinshi, juclla wiñacarcamuran. ⁶ Ichanga janallanchhu sapin captin, inti rupaptinshi, chaquicäcusha. ⁷ Waquin murunash shata-shataman chayasha. Shata atayäcurcurshi, muru wiñamujtapis jarwashtärachisha. Chayshi wiñarsi, mana wayushanachu. ⁸ Waquin murunash alli allpaman chayasha. Sumajshi wayusha. Waquin juc murullapitash wayusha quimsa chuncata (30); waquinshi sujta chuncata (60); waquinnash pačhacta (100).»

⁹ Willapäcuriycur, Jesú niran: «Rinriyumi canqui. Tantiyacunquiman.»

*Tincuchiypa willapashanpita tantiyachishan**San Mateo 13.10-17; San Lucas 8.9-10*

¹⁰ Runacuna aywacuriptin, chunca ishcaywan purishijnincunawan waquin jatirajnincunawa Jesústa tapuran: «Tincuchiypa willapäcushayquita mä, tantiyachimay» nir.

¹¹ Jesúnsna niran: «Jamcunata mayna tantiyachishcaj: «Maquinchhu cawananchipaj Tayta Diosninchchi shuyaraycämachi» nir. Mana wiyacujcunatam ichanga tincuchiyllapa tantiyachii. ¹² Tayta Diosninchipa shiminchhu nin:

«Ricaycarpis, ñawiynaj-tucun.
Wiyaycarpis, rinriynaj-tucun.
Shimita wasguiptinga,
jucha aparicushantapis Tayta Diosninchchi mana jungangachu.» *

Murupacujpita tantiyachishan

San Mateo 13.18-23; San Lucas 8.11-15

¹³ Chaypita Jesús niran: «Jamcunapis, ¿manachu tantiyanqui tincuchiypa willapäcushäta? Mana tantiyaycarga, ¿imanuyparaj llapan willapäcushäcunata tantiyanqui?

¹⁴ «Murupacuj murushan Tayta Diosninchipa shiminwan tincun. ¹⁵ Caminuman muru shicwashan-jina shimin achcaj runaman chayan. Ichanga wiyashantapis Supay juclla jungaycachin.

¹⁶ «Jarapshu allpaman muru shicwashan-jina shimin waquin runaman chayan. Shiminta wiyar, cushishalla chasquicun. ¹⁷ Ichanga jarapshu chakračhu mana sapichashan-jina shungunmanpis mana chayanchu. Chaymi runa ñacayman chayar, Tayta Diosninchita wiycushan-janan jaticačchar ushyaptin, juclla jungaycun.

¹⁸ «Shata-shataman murushan-jina shimin waquin runaman chayan. Shiminta wiyarpis ¹⁹ chapa mana pishiptin, Tayta Diosninchipa shimin nishannuya mana cawanchu. Imapäpis alläpa yarpačhacur, rícuayllata ashir, shungun munashallanta ashir, tincupacan.

²⁰ «Alli allpaman murushan-jina shimin waquin runaman chayan. Paycuna shiminta wiyar, llapan shungunwanmi chasquicun. Juc muru alli wayur, quimsa chuncata (30), sujta chuncata (60), pačhacta (100) juc shicshillačhu wayushan-jina Tayta Diosninchipa shimin nishallanta rurar cawan.»

Achquian tincuchiypa willapashan

San Lucas 8.16-18

²¹ Yapaypis tincuchiypa Jesús niran: «Achquita ratarcachir, pipis manash manca rurinman, cäma chaquimman churanmanchu. Manchäga patacmanshi churan llapanta achicyänanpaj. ²² Sumaj tantiyacunquiman. Runacuna shungullanchu pacarächishanpis mayacanga. Imata yarpashanpis unayllata musyacanga. ²³ Rinriyujmi canqui. Tantiyacunquiman.

²⁴ «Canan willapashäta sumaj tantiyacunquiman. Tantiyacushayquiman-tupu Tayta Diosninchipis tantiyachishunquipaj. Sumaj-sumaj tantiyachishunquipaj. ²⁵ Chaymi wiyacuptin, pitapis Tayta Diosninchchi sumaj tantiyachinga. Mana wiyacujcunatam ichanga, ichillata tantiyashallantapis jungaycachinga.»

Muru wiñamujwan tincuchiypa willapashan

²⁶ Yapay Jesús niran: «Tayta Diosninchipa maquinčhu juyaypita tantiyacushun. Juc runash chacraman muruta mururan. ²⁷ Murushanpita pashtamur, wiñamun. Runa pagaspa puñurpis, junajpa ricsharpis, muruta manash pashtachimunmanchu. Manash wiñachimunmanpishchu. Imanuy pashtashantapis, wiñamushantapis manash musyanchu. ²⁸ Allpalla pashtachimun. Tullunta wiñachin. Shicshichin. Puguchin. ²⁹ Puguptinna: «Murushäpa wawanta shuntashäna» nir rutun.»

Ñäpus muruwan tincuchiypa willapashan

San Mateo 13.31-32; San Lucas 13.18-19

³⁰ Yapay tincuchiypa willapäcur, Jesús niran: «¿Imawanraj Tayta Diosninchipa maquinčhu cawajcunata tincuchishuwan? ¿Imawan tincuchiyparaj tantiyacushuwan?»

* **4:12** Isaías 6.9-10.

³¹ Paypa maquinčhu cawajcuna ñäpus muruwan tincun.* Chay muruga llapan murupitapis mas acapallash. ³² Muruptinshi ichanga, wirtačhu sumaj wiñan. Waquin jačhacunapitasi atayayta llallin. Callapancunapis ata captin, pichuysacuna llantucushpan jishucärin.»

Tincuchiyllapa willapäcunapaj cashan

San Mateo 13.34-35

³³ Runacuna sumaj tantiyacunapaj imawanpis tincuchiyllapa Jesús willapäcuran. ³⁴ Imatapis tincuchiyllapa tantiyachicuj. Jinalla mana tantiyachijchu. Puríshijnincunatam ichanga yatalla sumaj tantiyachiran.

Wayranpawan tamyata Jesús čhawachishan

San Mateo 8.23-27; San Lucas 8.22-25

³⁵ Chay junajlla pacha chacanaycaptin, puríshijnincunata Jesús niran: «Yacu püsuta chimpashun.» ³⁶ Chaynuy niptin, runacunata: «Aywallä» nir bütowan Jesústa apacuran. Waquin büticunapis jipanta aywaran. ³⁷ Aywarcaycaptin, shucucuy wayra ricacamuran. Yacuna büchiypa-büchir bütiman yaycuycaran. ³⁸ Jesúsmi ichanga jipaman aywaycur jawanacurcur, puñucash caycaran.

Chaura puríshijnincuna juyupa mancharir, Jesústa ricchachiran: «Tayta, yacuman challpuycanchina. ¿Manachu imasi jucunqui?» nir. ³⁹ Chaura riccharir, wayratawan yacuta piñacur Jesús niran: «Čhawayna. Ama büchiypa-büchiynachu.» Chaura wayra čhawacäcuran. Yacupis puñucäcuran. ⁴⁰ Puríshijnincunatana niran: «¿Imanirtaj mancharish carcaycanqui? ¿Tayta Diosninchipa maquinčhu cawashanchita manachu yupachicunqui?»

⁴¹ Paycunana juyupa mancharishpan quiquin-pura tapunacäriran: «¿Piraj cay runa? Piñacuriptin, shucucuy wayra čhawacäcun. Yacupis puñucäcun» nir.

5

Geresa quinrančhu supay pucllacushan runata Jesús allchacächishan

San Mateo 8.28-34; San Lucas 8.26-39

¹ Püsuta chimpacur, Geresa quinranman čhayaran. ² Bütipita Jesús yarpuriptin, supay pucllacushan runa pantyunpita llucshiramuran. ³ Chay runaga runa pamparashan mačhaycunallačhu tiyacuj. Cadinawan wataptinpis, račhir ushyarij. ⁴ Achca cuti maquinčhaquinpita cadinawan wataptinsi, račhirij. Pipis mana ičhipujchu. ⁵ Payga pagas-junajta, chaga quinranpa, runa pamparashan mačhaycunapa japaraycar puricuj. Quiquinpis ruminawan tacacuj. Cuchucuj.

⁶ Carushéchu ricärir waracaylla aywarcur, Jesúspa ñaupanman jungurpacuycuran. ⁷ Llapan callpanwan japarir niran: «Llapanta Camaj Tayta Diosninchipa Wawan Jesús, ¿imanirtaj ashipämanqui? Ama ñacaycachimaychu.» ⁸ Chaynuy ninanpäga mayna Jesús niran: «Supay, cay runata cačharyi.» ⁹ Jesúsnra tapuran: «¿Imataj jutiqui?» Tapuptin, niran: «⟨Batallun⟩ jutí chay-chicaj cashpä.» ¹⁰ Nircur llapan supaycuna yaparir-yaparir Jesústa mañacuran: «Cay quinranpita ama jarguycamaychu» nir.

¹¹ Chaura chagapa janallančhu chay-chica cuchi pagupacurcaycaran. ¹² Chaymi supaycuna mañacuran: «Tagay cuchicunata pucllacunäpaj aunimay, ari» nir. ¹³ Chaymi mañacushanta Jesús auniran. Auniptin supaycuna runata cačhariycur, cuchicunatana pucllacuran. Cuchicunana jishyayar, chagapita yacuman jigapurcuran. Llapallan shugupacaypa wañuran. Cuchicunaga ishcay waranga-ima (2,000) caran. ¹⁴ Cuchi michijcunana mancharish jishpicäriran. Aywaycur čhacracunačüpis, marcačüpis imallata ricashantapis willacuran. Chaymi runacuna imanuy cashantapis ricaj shamuran.

* ^{4:31} Ricanqui San Mateo 13.31 nishanta.

¹⁵ Jesúzman ́chayar, supaycuna puclacushan runata allchacashtana tariran. Jamaraycaranna. Müdanashana caycaran. Chaynuya ricaycur, juyupa manchariran. ¹⁶ Ricajcunaga ́chayamuj runacunata willaparan imanuy allchacashantapis, cuchicuna imaman ́chayashantapis. ¹⁷ ́Chayamuj runacunana Jesústa mañacuran: «Cay marcapita aywacuy, ari» nir.

¹⁸ Mañacuptinga, bütiman jigaran aywacunapaj. Allchacaj runam ichanga Jesústa mañacuran: «Tayta, pushacamay, ari» nir. ¹⁹ Chaypis Jesú niran: «Mana camacanchu. Wasiquiman cuticuy, ari. Yawar-masiquicunata Tayta Diosninchi llaquipar allchacächishushayquipita llapanta willapay.» ²⁰ Chaura Decápolis marcacuna quinranpana chay runa willacuräcur puriran: «Jesús allchacächimasha» nir. Willacuptin, llapan runa manchariran.

*Jairupa wamrantapis, yawar-apaywan jishyaj warmitapis Jesús allchacächishan
San Mateo 9.18-26; San Lucas 8.40-56*

²¹ Chaura bütiwan wac chimpaman Jesú ́chayaptin, achcaj runa shuntacaran. Jesúspis yacu pallgallančhu caycaran. ²² Niycaptillan, Jairo ́chayaran. Payga shuntacäna wasíchu mayur runa caran. Jesúspa ñaupanman jungurpacuycur, ²³ mañacuran: «Tayta, wasíman aywashun. Warmi wamrä wañuycan. Yatayllapis maquiuiwan yataycunquiman wamrä allchacänanpaj. Chayllawan cawanga» nir.

²⁴ Mañacuptin, Jesú aywaran. Achcaj runa aywaycaptin, Jesústa juyupa quićhquipaycaran. ²⁵ Čunca ishcaywan (12) watana yawar-apaywan jishyaj warmipis tallucash aywaycaran. ²⁶ Warmiga jampicujcunawan jampicur imancunatapis ushyapacashana caycaran. Pipis mana allchacächiranchu. Manchäga alläpana čuracaycaran. ²⁷ Jesú munayniyuj cashanta mayar runacunapa ́chaupinpa yaycurir jipallanpita tariparcur, Jesúspa müdananta yataycuran: ²⁸ «Müdanallantapis yatar, allchacashämi» nir. ²⁹ Yataycuptillan, yawar-apaynin änir ́chawacäcuran. Janan ancashyacäcushantapis quiquin mayaran.

³⁰ Munayninwan pitapis allchacächishanta Jesúspis mayariran. Chaymi ticrarcur, tapuran: «¿Pitaj yataycamasha?» nir. ³¹ Chaura purišijnincuna niran: «Achcaj runa quićhquipaycäshuptiquiga, ¿imanirtaj tapumanqui: ¿Pitaj yataycamasha?» nir?» ³² Pipis yatashanta musyananpaj Jesú jinalla ricaycaran. ³³ Warmina manchariywan sicsicyaycar, Jesúspa ñaupanman jungurpacuycuran. Imanir yatashantapis llapanta willaycuran.

³⁴ Jesúsnra niran: «Wawallau wawa, yupachicamashayquipita allchacashcanqui. Mana yarpaćhacullarna wasiquiman cuticuy. Mana jishyanquinapishchu» nir.

³⁵ Jesú rimayta mana ushyaptillan, Jairupa wasinpita caćhacuna ́chayamuran. Jairuta niran: «Tayta, wamrayqui wañucäcushana. ¿Imapänataj tayta Jesústa pushanquipis?»

³⁶ Mana wiyaj-tucullar, Jesú niran: «Tayta Jairo, ama llaquicuychu. Nuwaman yupachicamanquiman.» ³⁷ Chaura waquin runacunata jaguiycur, Pedruta, Santiagutawan wauguin Juanta pusharan.

³⁸ Jairupa wasinman ́chayarna, atarcayc妖cunata tariran. ³⁹ Chaymi yaycurir, Jesú niran: «¿Imanirtaj atarcaycanqui? Wamra mana wañushachu. Manchäga puñucashalla caycan.»

⁴⁰ Chaynuya niptin, täpajcuna Jesústa asiparan. Jesúsmi ichanga atarcayc妖cunata jawaman jarguran. Aya chutarashanman pushashan purišijnincunatapis, Jairutapis, warmintinta yaycuchiran. ⁴¹ Ruriman yaycurir maquinpita charircurna, wañush wamra jipashta niran: «Talitá cum.» Rimayninčüga: «Talitá cum» ninantam: «Ricchayna wamra» nin.

⁴² Chaynuy niptin, juclla jataricurcuran. Puripacuranna. Chay wamra jipashga čhunca ishcaywan (12) watatana aywaycaran. Chayta ricar, runacuna juyupa manchariran. ⁴³ Jesúsnra runacunata piñacuran: «Cawarishanta pitapis ama willapanquichu. Wamrayquitapis jaray» nir.

6

*Nazaret marcačhu Jesúis willapäcushan
San Mateo 13.53-58; San Lucas 4.16-30*

¹ Chaypita aywar, marcanman purishijnincunawan Jesúis cuticuran. ² Diyawarda junaj shuntacána wasíchu willapäcuran. Wiyajcunana tantiyayta mana atipar, tapunacurcaycaran: «¿Maychüray llapanta yačhacusha? ¿Piray yačhachisha? ¿Imanuyparaj Tayta Diosnillanchi camacächishancunata ruran? ³ Cay runa, ¿manachu carpintiru? ¿Manachu Maríapa wamran? ¿Manachu wauguincunapis Santiago, Jose, Judas, Simón? Panincunapis, ¿manachu carcaycan?» nir. Chaynuy nir Jesústa pampaman čhuraran.

⁴ Jesúsnra niran: «May-chaychüpis alli ñawinpa Tayta Diosninchipa willacujninta rican. Yurishan marcačhumi ichanga marca-masincunapis, yawar-masincunapis pampaman čhuran. Ricaytapis mana munanchu.» ⁵ Chaymi marcančhüga Tayta Diosninchchi camacächiyinpia imatapis mana rurarannachu. Juc-ischcay jishyačhucunallata maquinwan yatayllapa allchacächiran. ⁶ Marca-masincuna mana čhasquicuptin, juyupa llaquicuran: «¿Imanirraj mana čhasquicamanchu?» nir.

*Čhunca ishcaywan cačhancunata Jesúis cačhacushan
San Mateo 10.5-15; San Lucas 9.1-6*

Chaypita marcan-marcan Tayta Diosninchipa shiminta willapäcur, Jesúis puriran. ⁷ Čhunca ishcaywan purishijnincunata ishcay-caman-ischcay-caman willapäcuj cačharan. Cačhar, niran: «Nuwipita munayniuj caycanqui supaycunata jargunayquipaj. ⁸⁻⁹ Imatapis ama apanquichu. Ama apanquichu jipita, mircapata, jillayta, rucanayquita. Garutilayquita apanqui. Llanguillayquita jaticunqui.

¹⁰ «Juc wasiman čhayashpayqui jucläpa aywacushayquicaman jinallančhu pacharäcunqui. ¹¹ Čhayashayqui marcačhu mana čhasquishuptiqui, mana wiyashuptiqui, aywacunqui. Čaquiuita pichacurir aywacunqui: «Mana čhasquimashayquipita ñacayman čhayanquipaj» nir.»

¹² Chaura purishijnincuna wacpa-caypa aywar, willapäcuran: «Jucha aparicuypita wanacäriy» nir. ¹³ Pucllacuj supaycunatapis jarguran. Jishyačhucunatapis wirawan jampir, achcajta allchacächiran.

*Ushyachicuj Juanta wañuchishan
San Mateo 14.1-12; San Lucas 9.7-9*

¹⁴ Chay wichan mandaj Herodes Jesúis ima-imata rurashantapis mayaran. Runacuna wichaypa-uraypa rimar niycaran: «Ushyachicuj Juančhi wañushanpita cawarircamusha. Chayčhi munayniuj ricarimusha Tayta Diosnillanchi camacächishancunata rurananpaj.» ¹⁵ Waquinnash nircaycaran: «Willacuj Elíasčhi.» Waquinnash niycaran: «Unay willacujcuna-jinačhi ricarimusha.» ¹⁶ Chaura chay rimashancunata mayar, mandaj Herodespis niran: «Rasunpa Juančhi canga. Umanta quiqüi ruguchish caycapti, cawarimush canga.»

¹⁷ Ushyachicuj Juanta piñacushallanpita quiquin mandaj Herodes unayna mancurnarcachir, carsilman wičhgachish caran.

¹⁸ Juan piñacurunaj: «Tayta Herodes, mama Herodíasga wauguiqui Felipupa warminmi. Wauguiquipa warminta ama jičhunquimanchu» nir.

¹⁹ Chaynuy nishanpita mama Herodías Juanta wañuylla chiquiparan. Wañuchiyya munarpis, mana camäpacuranchu ²⁰ quiquin mandaj Herodes chapaptin. Payga manchapacuran: «Juanga juchaynaj runam. Tayta Diosninchipa maquinchú juyan» nir. Chaymi Juan rimashan shungunman mana tincuptinsi, cushish wiyapararan.

²¹ Chaura chay wican mandaj Herodespa diyan chayamuran. Chaymi tünata rur-rar, yačhänacushancunata, murucuncunapa mandajnincunata, Galilea quinran mayur runacunata jarananpaj jayachiran. Chay junajraj mama Herodías yarpashan camacaran. ²² Jurpancunawan mandaj Herodes micurcaycaptin, llapanpa ricay ñawinchú mama Herodíaspas jipashninraj sumaj jachwaran. Jachwar, llapan jurpantinta mandaj Herodesta cusicachiran. Chaymi jipashta mandaj Herodes niran: «Shunguyqui munashanta mañacamay. Munaptiqui, imätapis jucushayquim.» ²³ Chaynuylla yaparir-yaparir auniran: «Imata mañacamaptiquipis, jushayquim. Marcäcunatapis pullanta juy-cujmanmi» nir. ²⁴ Chaynuy niptin, jipashga mamanta tapuran: «¿Imatataj mañacushaj?» nir. Maman Herodíasnira niran: «Ushyachicuj Juanpa umanta mañacuy.» ²⁵ Jipashna juclla mandaj Herodesta niran: «Ushyachicuj Juanpa umanta mañacushayqui. Juclla matiman wiñarcur, macyamay.»

²⁶ Chaura mandaj Herodes juyupa llaquicäcuran. Llaquicursi, jurpancunapa ñaupanchú aunish cashpan shiminta mana cutircuranachu. ²⁷ Manchäga juc murucunta cačharan Juanpa umanta apapunanpaj. Chaymi murucuga carsilman aywarcur, Juanpa umanta ruguriran. ²⁸ Jinarcur matiwan aparcamur, jipashta juycuran. Jipashna mamanta macyaycuran. ²⁹ Chaura Juanta wañuchishanta mayar, puríshijnincuna ayanta shuntaycur, pampaycäriran.

Pichga waranga runata Jesús jarashan

San Mateo 14.13-21; San Lucas 9.10-17; San Juan 6.1-14

³⁰ Chaura Jesús cačhacushancuna cutimuran. Chayar, imata rurashantapis, imata yačhachishantapis willaparan. ³¹ Parlanacurcaycaptin, achcaj runa chayapuran. Chaymi jamaycunapäpis, micunapäpis mana jäcuranchu. Chaynupa cačhacushancunallata niran: «Jucläman aywashun. Yata jamapärishun.» ³² Chaymi quiquinuncalla yata bütiwan chunyaj pachaman aywacäriran.

³³ Mayman aywashantapis musyar, chay-tucuy marcapita runacuna chaquillapa tariparan. Jesús chayaptin, shuyarpaycaranna.

³⁴ Bütipita llucshirir achcaj runata ricar, Jesús llaquiparan: «Cay runacunata pipis mana ricanchu. Ujracash uysha-yupay carcaycan» nir. Llaquipar, sumaj willapäcuran.

³⁵ Pacha chacanaycaptin, puríshijnincuna Jesústa niran: «Chunyaj pachačhu carcaycanchi. Pachapis chacanaycan.» ³⁶ Runacuna marcacunaman aywacuchun micuyta rantircur micunapaj.»

³⁷ Jesúsnra niran: «Jadcuna jaranguiman.» Paycunana tapuran: «¿Tanta rantimuj aywanätarächu munanqui? Llapanta jaranchipäga ishcay pačhac (200) jurnalpa čhaninwanrämi tantata rantish aypanga» nir. ³⁸ Jesúsnra tapuran: «¿Ayca tantatataj chararcaycanqui? Mä, ricamuy» nir. Ricaycamurna, niran: «Pichga tantallawan ishcay piscädullam caycan.»

³⁹ Chaura Jesús niran: «Pashpallaman runacunata shuntaycur-shuntaycur jamachiy.»

⁴⁰ Chaymi runacunata jamachiran pačhac-caman (100), pichga čunca-caman (50).

⁴¹ Jinarcur pichga tantatawan ishcay piscädulta aptacurcur, janaj pachaman Jesús ricäriran: «Taytallau Tayta, ima allish tarichillämashcanqui» nir. Nircur tantacunata paquircur-paquircur, ishcay piscädutapis račhircur-račhircur, puríshijnincunata macyaran aypucunapaj.

⁴² Llapan runacuna puchupacushancaman micuran. ⁴³ Micurcuptin, purishijnincuna puchupacushanta chunca ishcaywan (12) canista juntataraj shuntaran. ⁴⁴ Micujcunaga ullgucunalla pichga waranga-ima (5,000) caycaran.

*Yacu jananpa Jesús aywashan
San Mateo 14.22-27; San Juan 6.16-21*

⁴⁵ Jinarcur Betsaida chimpapa ñaupacärinapaj purishijnincunata bütiman Jesús jigachiran. Runacunatana niran: «Wasiquicunaman cuticäriy.» ⁴⁶ Llapan aywacuptin, Tayta Diosninchita mañacuj puntaman aywacuran.

⁴⁷ Pacha chacanaycaptin, purishijnincuna püsu chaupillantaraj aywaycaran. Jesúsmi ichanga paycunawan mana aywaranchu. ⁴⁸ Wayra chapaycahaycaptin, büti apayta ñacarcaycashanta Jesús ricaran. Pacha waraycaptillan, yacu janallanpa purishijnincunata Jesús taripayacaran.

⁴⁹ Purishijnincunana yacu jananpa taripaycajta ricärir, mancharir japačhacärian: «Alma shaycämun» nir. ⁵⁰ Llapan manchariran. Jesúsmi ichanga niran: «Ama manchacamaychu. Quiquimi caycä.» ⁵¹ Chaynuy nir bütiman jigarcuptin, wayrapis chawacäcuran. Purishijnincunam ichanga tantiyacuya mana atiparanchu. ⁵² Achcaj runapaj tantata aypächiptinsi, Jesús munayniyuj cashanta mana tantiyacuranrächu. Yarpaynincunapis pishiranraj chucru shungu cashpan.

*Genesaret quinrančhu jishyačhucunata Jesús allchacächishan
San Mateo 14.34-36*

⁵³ Jatun püsuta chimparir, Genesaret marcaman chayaran. Chayar, püsu cantunman bütinta wataran. ⁵⁴ Bütipita yarpuriptillan, runacuna Jesústa ricsiriran. ⁵⁵ Ricsircur, chay-tucuypa willanacärian. Chaura Jesús maymanpis chayashanman jishyačhucunata quirmallawan wintuypa chayachiran. ⁵⁶ Jatun marcacunamanpis, tacsha marcacunamanpis, chacracunamanpis runa juturashanman jishyačhucunata chayachiran: «Tayta Jesús, müdanayquipa cantullantapis yataycachillämay, ari» nir. Yatajcunana änir allchacäcuran.

7

*Runapa shungunpita jucha ruray ricarishan
San Mateo 15.1-20*

¹ Chaura chaypita Jerusalén marcapita fariseucunapis, Moiséspa shiminta yačhajcunapis Jesúsman shamuran achäquita ashipaj. ² Chayamur Jesúspa purishijnincuna maquinta awicünilla micurcaycajta ricar, jamurparan: «Tayta Diosninchita mana manchapacunchu» nir. ³ Fariseucunaga, Israel runacunaga unay auquilluncuna yačhachicushanta mana jungajchu. Maquinta mana awicullar, imatapis mana micujchu. ⁴ Rantipacuj aywashanpita cutimurpis, armacuriycurraj micuj. Cüpatapis, puyñutapis, mancatapis awij, Tayta Diosninchipa ricay ñawinčhu alli cayta munar.*

⁵ Chaymi Fariseucunawan Moiséspa shiminta yačhajcuna Jesúsman tapuran: «¿Imanirtaj purishijniquicuna auquillunchicuna yačhachishanta jungaycun? Maquinta awicurinman. Janra maquinwan micur, Tayta Diosninchipa ricay ñawinčhu llutanta ruraycan» nir.

⁶ Chaura Jesús niran: «Janan shungulla carcaycanqui. Rasullantačhari Tayta Diosninchiri machiptin, willacujnin Isaías unayna niran:
<Cay runacuna shimillanwan alliman churamaj-tucun.
Shungunmi ichanga juccunata manchapacun.

⁷ Janan shungulla alliman churaman.

«Tayta Diosninchipa shimin alli» nirpis, runa yarpashallanta willapäcun.**

* ^{7:4} Waquin Bibliačhu yapash: «mashtacutapis chajchuj» nir. * ^{7:7} Isaías 29.13.

⁸ «Chay-jina jamcunapis Tayta Diosninchipa shiminta jungaycur, runacunapa shimplanta ́charcurcaycanqui.»

⁹ Jananmanpis Jesús niran: «Quiquipucunapa yáchacashayquita ruranayqui-cashan Tayta Diosninchipa shiminta jungaycárishcanqui. ¹⁰ Paypa shiminta musyachicurmí Moisés niran: «Mamayqui-taytayquita alli ricanqui. Maman-taytanta ashllijcuna ama cawachunpishchu.»* ¹¹ Jamcunam ichanga mamayqui-taytayquita mana yanapánayqui-cashan nircaycanqui: «Cananga llapan imätapis Tayta Diosninchipa maquinman ́churashcä. Yanapánajpaj mana puchunnachu.» ¹² Pipis maman-taytanta yanapánanta mícharcaycanqui. ¹³ Yarpashayquita rurar, Tayta Diosninchipa shiminta pampaman ́churarcaycanqui. Quiquipucunapa shimplayquita yáchaycáchinqui: «Wac-niraj, cay-niraj rurashun» nir.»

¹⁴ Chaynuy nir llapan runata jayarcur, Jesús niran: «Llapaniqui wiyamay. Shimüta sumaj tantiyacuy. ¹⁵ Shiminchiwan micushanchiga, upushanchiga mana juchata aparicachimanchichu. Shungunchíhu llutanta yarpashanchim ichanga Tayta Diosninchipa ricay ñawinchüpis jucha aparicuyman ́chayachimanchi. ¹⁶ Rinriyujmi canqui. Tantiyacunquiman.»

¹⁷ Chaynuy yáchachicuya ushyarcur, wasiman yaycuptin, puríshijnincuna tapuran: «Tayta, ¿imanirtaj tincuchiypa yáchachicushcanqui?» nir. ¹⁸ Chaura Jesús niran: «¿Jamcunapis manachu tantiyacárinquiraj? ¿Runa micushancuna mana juchata aparicachishanta manachu tantiyacunqui? ¹⁹ Micushanchi mana llutantachu yarpächimanchi. Páchallaman yaycun. Jinarcur ishpacurinchi.» Chaynuy willapar, micuy mana juchata aparicachishanta tantiyachiran.

²⁰ Jananmanpis niran: «Runa shungunchu yarpashanmi ichanga juchaman ́chayachin. ²¹ Shungunchu yarpáchacun juchata rurananpaj, warmi-pácha runa-pácha cananpaj, suwacunananpaj, runata wañuchinanpaj, ²² majanta janapachinanpaj, yargaj cananpaj, chiquicunananpaj, llullapácunananpaj, shungun munashallanta rurananpaj, jucpa imantapis munapánanpaj, washata rimananpaj, alli-tucunananpaj, mana tantiyacuj cananpaj. ²³ Chaycuna runapa shungunchu yurimuptin, Tayta Diosninchipa ricay ñawinchüpis juchata aparicun.»

Jäpa warmipa wamranta Jesús allchacächishan

San Mateo 15.21-28

²⁴ Chaypita awyacur, Tiro marca quinranmanna Jesús ́chayaran. Juc wasiman ́chayar pachacuran ́chayashanta pipis mana musyananpaj. Runacunam ichanga pachashanta mayaran. ²⁵ Supay puclacushan warmi wamrapa mamanpis Jesús ́chayashanta mayaran. Juclla ́chayarcur, ñaupanman jungurpacuycuran: «Tayta, yanapaycallámay. Wamrätä supay puclacusha. Allchacaycachipallámay, ari» nir. ²⁶ Chay jäpa warmi Sirofenicia marcapita caran. Griego rimayta rimaj. Wamranpaj Jesústa mañacapuram: «Supayta jarguy» nir.

²⁷ Chaura jäpa runacunata allguwan tincuchir, Jesús niran: «Wamracuna micushanta jíchurir allguta jaranchi mana camacanchu.» ²⁸ Warmina niran: «Rasullanta rimashcanqui, Tayta. Allgucunam ichanga wamracuna cáchapacushallantapis micucun.»

²⁹ Jesúsnra niran: «Shimiqui allim. Canan cuticuyna, ari. Wamrayquita supay cáchariyushanam.» ³⁰ Chaynuy niptin, wasinman cuticuran. ́Chayar, wamranta cämáchu paucapacuycaja tariran. Supaypis cáchariyushana caran.

Upa runata Jesús allchacächishan

³¹ Chaura Sidón-Tiro quinranpita llucshicur, Decápolis marca quinranman ́chayaran. Chay quinran Galilea püsuwan tincuraycaran. ³² Chaychú caycaptin, acllu-acllu rimaj upa runata ́chayachimuran: «Maquiquwan yataycapallámay. Allchacaycachipallámay» nir.

* **7:10** Éxodo 20.12; 21.17.

³³ Chaynuy mañacuptin, runacunapita carushman ashurcachir, caru-wiyaj runapa rinrinman didunta Jesús jatiran. Tuwayninwan jallunta yataycuran. ³⁴ Janaj pachapa ricärirna, llaquipar niran: «Efatá.» Rimayninchú: «Efatá» ninanta: «Quiúhacay» ninan.

³⁵ Chaynuy niptin, rinrin wiyyaranna. Jallunpis allchacäcuranna. Allina rimaran. ³⁶ Runacunatana Jesús niran: «Pitapis ama willapanquichu.» Willacunanta miúhaycaptinsi, shiminta mana chapacuranchu. ³⁷ Jatunpa cùshicushpan nircaycaran: «Llapantapis allitam ruran. Upacunatapis wiyyachin. Rimachin.»

8

Chuscu waranga runata jarashan

San Mateo 15.32-39

¹ Chay junajcuna achcaj runa shuntacaran. Micunapaj imapis mana caranchu. Chaymi puríshijnincunata shuntarcur, Jesús niran: ² «Cay runacunata llaquipámi. Quimsa junajna puríshiyämanchi. Micunapápis mana canchu. ³ Micünillata wasinman-caman caúhapti, aywaycaptillan, shungunpis ushyacanga. Waquin carupita shamusha.»

⁴ Puríshijnincunana niran: «Chunyaj pachaúhu carcaycanchi. ¿Cayúhu tantata tarishuwanchuraj?» ⁵ Jesúsna tapuran: «¿Ayca tantatataj chararcaycanqui?» nir. Tapuptin, niran: «Janchis tantallata.»

⁶ Chaynuy niptin, llapan runata pampallaman Jesús jamachiran. Janchis tantata aptarcurna, Tayta Diosninchita niran: «Taytallau Tayta, ima allish tarichillämashcanqui.» Jinarcur paquircur-paquircur, puríshijnincunata macallaran runacunata aypunapaj. Paycunana llapan runata aypuran. ⁷ Ishcay-quimsa acapa piscäducunatapis charaycaran. Chay piscäducunatapis aptarcurna, niran: «Ima allish tarichillämashcanqui, Tayta.» Jinarcur aypucachiran.

⁸ Runacunana puchupacushancaman micupacärian. Puchupacushanta shuntaptin, janchis canista juntataraj puchuran. ⁹ Micujcunaga chuscu waranga-ima (4,000) caran. Micucurcuptinna, llapan runata Jesús niran: «Wasiquicunaman cuticäriy.» ¹⁰ Jinarcur puríshijnincunawan bütiman jigarcurna, Dalmanuta quinranman chimpaman aywacuran.

Jesústa ashipashan

San Mateo 16.1-4; San Lucas 12.54-56

¹¹ Chaura fariseucuna chayaycur, Jesústa achäquita ashiparan. Tincupar niran: «Tayta Diosninchí camacächiynipa mä, imallatapis ruray.» ¹² Chaura llaquicushpan wiyyächipaya Jesús niran: «¿Imanirraj achäquita ashipämaj shamunqui? Sumaj tantiyacunquiman. Tayta Diosninchí camacächiynipa imallatapis ruranäta munaptiquisi, mana imatapis rurashächu.» ¹³ Chaymi fariseucunata jaguiycur, bütowan chimpaman aywacuran.

Libadürawan fariseucunata tincuchishan

San Mateo 16.5-12

¹⁴ Jesúspa puríshijnincuna micuy apayta jungaycärian. Juc tantallata bütíchu apaycaran. ¹⁵ Aywarcaycashanchú Jesús piñaparan: «Fariseucunapa, mandaj Herodespa libadüranta ama chasquipanquichu» nir. ¹⁶ Puríshijnincunana quiquin-puralla parlanacärian: «Tantata mana apamushanchipitaúhi wiyyächipayämanchi» nir.

¹⁷ Tapunacuycashanta musyar, Jesús niran: «¿Imanirtaj: ‘Tanta mana canchu’ ninacurcaycanqui? Ricaycarpis, ¿manachu tantiyacunquiraj? ¿Chucru shunguchu canqui?»

¹⁸ Tantata aypächishäta ricaycarpis, japrak-nirajmi carcaycanqui. Tayta Diosninchipa shiminta willacuycaptispis, upa-nirajmi carcaycanqui. ¿Llapanta jungashcanquichuraj?

¹⁹ ¿Imanirtaj pichga tantallata pichga waranga (5,000) runacunapaj aypächishäta manachu yarparanqui? Chay junaj, ¿ayca canistatataj puchupacushanta shuntarayqui?» Puríshijnincunana niran: «Chunca ishcaywanta.» ²⁰ «Janchis tantata chuscu waranga

(4,000) runacunapaj aypächishäpita, ¿ayca canista juntatataj shuntarayqui?» Paycunana: «Jančhistam» niran. ²¹ Jesúsnra niran: «Chaycunata ricaycarpis, ¿manachu tantiyacärinquiraj?»

Betsaida marcačhu japra runata Jesús allchacächishan

²² Chaypita Betsaida marcaman chayaran. Chayéhu carcaycaptin, japra runata chayachimuran: «Maquiquwan yataycapallämäy. Allchacaycachipallämäy, ari» nir.

²³ Chaura maquinpita charicurcular, marca wajtanman Jesúspusharan. Ñawinčhu tuwapuran. Maquinwan yataran. Nircur tapuran: «¿Imallatapis ricanquichu?» nir.

²⁴ Rama-ramalla ricashpan: «Runacunata yüra-niraj puriycajta ricä» niran.

²⁵ Yapay maquinwan yatarcuptin, sumaj ricačhacurishančhu allina ricaran. Ñawin allchacäcuranna.

²⁶ Jesúsnra niran: «Marcaman mana yaycullar wasiquiman cuticuy.»

Jesús Washäcu cashanta Pedro rimariycushan

San Mateo 16.13-20; San Lucas 9.18-21

²⁷ Chaypita Cesarea Filipo marca quinranman puríshijnincunawan Jesúspuríshijnincunawan. Aywarcaycashančhu puríshijnincunata tapuran: «Runacunapäga, ¿pitaj caycä?» nir. ²⁸ Chaura niran: «Waqin runash nin: Ushyachicuj Juan.» Waquinash: «Elías» nin. Waquinash: «Pi carpis, Tayta Diosninchipa willacujnanganga» nin.»

²⁹ Chaura quiquinuncunata Jesúspuríshijnincunata: «Jamicunapäga, ¿pitaj caycä?» nir. Pedruna niran: «Washäcuji canqui. Tayta Diosninchipi cačhamushcashunqui.» ³⁰ Chaura mana willacunapaj Jesúspuríshijnincunata sumaj willaparan.

Wañuymán chayananta Jesús musyachicushan

San Mateo 16.21-28; San Lucas 9.22-27

³¹ Chaypita puríshijnincunata Jesúsniran: «Tayta Diosninchipi cačhamasha. Chaypis sumajraj ñacashaj. Mayur runacunapis, mayur cüracunapis, Moiséspa shiminta yačhajcunapis wasguimanga. Juyupa ñacachimanga. Wañuchimanga. Chaypis quimsa junajta Tayta Diosninchipi cawarachimanga.» ³² Chaynuy nir mana chapacullarna willapäcuran.

Pedruna yata jayarcur, piñacuran. ³³ Chaura Jesúspis waquin puríshijnincunaman ricärir, ullgüparan: «Pedro, Supaymi canqui. Washata ayway. Chapata ama ruramaychu. Tayta Diosninchipa shiminta čharcunäta mičhaycämanqui. Imatapis munapashayquita runacunalla ashin. Tayta Diosninchipa shungun yarpashanwanmi ichanga mana tincunchu» nir.

³⁴ Chaypita llapan juturajcunatapis, puríshijnincunatapis jayarcur, Jesúsniran: «Pipis puríshimaya munar, quiquinpa shungun munashanta ama ruranmanchu. Manchäga nuwa-janan ñacachiptinsi, rusčhu wañuchiaptinsi, shimiña wiyacuchun. ³⁵ Ñacaytapis, wañuytapis manchacur maquičhu puriyta mana munar, ushyacayman chayangapaj. Maquičhu purir llapanninta jaguijcunam ichanga, alli willacuynita wiyacucunam ichanga, imaycamanpis Tayta Diosninchipa maquinčhu cawanga.»

³⁶ «Sumaj ríçuyayta tarirpis ushyacayman chayaptin, ríçu cayninga, ¿imapäraj alli? ³⁷ ¿Ríçu cayninga Tayta Diosninchipa ñaupanman chayachingachuraj? ³⁸ «Tayta Diosninchipi cačhamasha. Pipis shimiña mana wiyacuptin jananpachicuj car, juchačhu arujcunapa ñaupančhu wasguimaptin, nuwapis janaj pachapita achicachicyaycar cutimur wasguishämi. Cutimuptiga, Tayta Diosninchipa anjilnincunapis achic-achicyaycar yanagämanga.»

¹ Jananmanpis Jesúsniran: «Sumaj tantiyacunquiman. Tayta Diosninchipi munayniyuj cashpan llapan runata maquinčhu purichinga. Chayta waquinquipis manaraj wañullarmi ricanquipaj.»

*Juc-nirajman Jesús ticracerishan
San Mateo 17.1-13; San Lucas 9.28-36*

² Chaypita sujta junajta Pedruta, Santiaguta, Juanta pushacurcur puntaman Jesús jigaran. Puntachu quimsan purišijnincunalla ricapaycaptin, achic-achicyaycajman Jesús ticraceriran. ³ Müdananpis llutpi utcunuy achicyaypa achicyacurcuran. Chaynuy pí tacshacurpis, mana yurajyächinchu. ⁴ Unay willacuj Elíaswan Moiséspis ricariparcur, Jesúswan parlaycaran.

⁵⁻⁶ Chaura purišijnincuna juyupa mancharicäcuran. Rimapacuytapis mana camäpacuranchu. Chaypis Pedro sumaj mana yarpačhacullar niran: «Tayta Jesús, caychüga alli juyäcuymi. Quimsa tacmata rurarishaj: jucta jumpaj, jucta Moiséspaj, jucta Elíaspaj.» ⁷ Chaynuy ricapaycaptillan, quimsanta pucutay chapacurcuran. Pucutay rurinpitana Tayta Diosninchi nimuran: «Jesúsga cuyay Wawämi. Shiminta wiycuy.» ⁸ Purišijnincunana ricačhacurishančhu quiquillanta Jesústa ricaran. Waquin mana carannachu.

⁹ Puntapita yarpaycämushančhu purišijnincunata Jesús willaparan: «Tayta Diosninchi cačhamasha. Canan ricashayquita pitapis ama willapanquichu wañushäpita manaraj cawarimushäcaman» nir. ¹⁰ Quimsan musyajcuna pitapis mana willaparanchu. Ichanga quiquin-puralla parlanacäriran: «¿Imanuparaj wañushanpita cawarimunga?» nir.

¹¹ Chaynuy niptin, paycuna tapuran: «¿Imanirtaj Moiséspa shiminta yačhajcuna willacun: ‹Elías shamushanpitaj Washäcu shamunga› nir?» ¹² Chaura Jesús niran: «Au, rasunpa Elías cutimur, runacunata anyapanga Tayta Diosninchipa shungun munashanuy cawanapaj. Chaypis Tayta Diosninchipa shimin isquirbirashančhu nin: ‹Tayta Diosninchipa cačhan captinsi, Washäcuja runacuna ñacachinga. Pampaman čhurar, wasguingapaj.›» ¹³ Chaypis tantiyacunquiman. Elías mayna shamusha. Paytapis Tayta Diosninchipa shiminčhu isquirbirashan-jina tucuya rurasha. Juyupa ñacachisha.»

*Supay pucillacush wamrata Jesús allchacächishan
San Mateo 17.14-21; San Lucas 9.37-43*

¹⁴ Chaura waquin purišijnincunaman cutir, achcaj runa juturpaycajta tariran. Purišijnincunana Moiséspa shiminta yačhajcunawan tincupänacurcaycaran. ¹⁵ Jesústa ricar, wamayar juclla tariparan.

¹⁶ Chaura Jesús tapuran: «¿Imapitataj tincupänacurcaycanqui?» nir. ¹⁷ Juc runana čaupipita nimuran: «Tayta, supay upayächishan wamräta apallämushcä.» ¹⁸ Charir, maychüpis sajtaj ushyan. Lausallana shiminpita aycun. Quirunta cačh-cačhyaylla učhun. Uyutacäcun. Waquin purišijniquicunata mañacurä supayta jargunapaj. Ichanga mana camäpacuranchu.»

¹⁹ Jesúsna niran: «Jamcuna Tayta Diosninchiman mana yupachicunquichu. ¿Imaycamanraj tantiyachishayqui? Mana yupachicamaptiquim, yamacashcäna.» Wamrapa papänintana niran: «Wamrayquita mä, apamuy.»

²⁰ Chaura apapuptin Jesústa ricärir, supay wamrata sajtaj ushyariran. Chaymi wamra jučhpacačharanraj. Lausallata ajturaj. ²¹ Chaura wamrapa papäninta Jesús tapuran: «¿Imaypita-pachanataj jishyan?» nir. Tapuptin, niran: «Mallwa cashanpita-pacha.» ²² Achca cutina wañuchiya munar, ninamanpis, yacumanpis jitarpuran. Tayta, camäpacur, llaquipaycallämay. Yanapaycallämay, ari.»

²³ Chaura Jesús niran: «¿Imanirtaj: ‹Camäpacur, yanapaycallämay› nimanqui? Tayta Diosninchiman yupachicuptinchi, paymi llapantapis camacächin.» ²⁴ Chaura wamrapa papänin juclla niran: «Payman yupachicümi. Sumaj yupachicunäpaj yanapaycallämay, ari.»

²⁵ Chay-chicaj runa jutucarcaycajta ricar, Jesús supayta piñacuran: «Upayächicuj supay, cay wamrata cačharyi. Imaypis ama cutimuynachu» nir. ²⁶ Chaura wamrata

caáchariycuran. Sajtar ushyarir, japarir, supay aywacuran. Wamraga wañush-jina jitacäcuran. Chutaraycajta ricar, waquin runacuna: «Wañucäcushanam» ninacäriran.

²⁷ Maquinpita Jesús chutariptinmi ichanga, wamra iúchicurcuran.

²⁸ Chaypita juc wasiman Jesús yaycuran. Puríshijnincunana pacayllapa tapuran: «¿Imanirtaj nuvacuna supayta jarguyta mana camäpacushcächu?» nir. ²⁹ Chaura niran: «Chay-niraj supayta Tayta Diosninchita mañacurraj jargunchi.»

Wañuyman chayananta yapay Jesús musyachicushan

San Mateo 17.22-23; San Lucas 9.43-45

³⁰ Chaypita Galilea quinranpa Jesús aywaycaran. Pipis musyananta mana munaranchu. ³¹ Manchäga puríshijnincunallata tantiyachir niran: «Tayta Diosninch caáchamasha.

Chaypis juc runa charimar, juyu runacunapa maquinman chayachimanga. Paycunana wañuchimanga. Quimsa junajtam ichanga cawarimushaj.»

³² Puríshijnincunam ichanga tantiyayta mana atiparanchu. Tapucuytapis manchacuran.

Alli ricash cayta ashijcunapita tantiyachishan

San Mateo 18.1-5; San Lucas 9.46-48

³³ Chaypita Cafarnaún marcaman chayaran. Wasinman yaycurir, puríshijnincunata Jesús tapuran: «¿Imanirtaj tincupänacushcanqui?» nir. ³⁴ Tapuptin, llapan upällacaycäriran. Aywaycashančhu mayna tincupänacush caycaran: «¿Mayganchiraj mayur cayman chayashun?» nir.

³⁵ Chaymi Jesús chunca ishcaywan puríshijnincunata niran: «Pipis mayur cayta munar, jipata purij cachun. Llaparpa mandu-rurajnjnraj cachun.» ³⁶ Jinarcur llaparpa ricay ñawinčhu wamrata jayarcur margacurcur, ³⁷ niran: «Yupachicamashan-janan wamracunata alli ricajcuna nuwatapis alli ricaman. Nuwata alli ricamar, caáchamaj Tayta Diosninchitapis alli rican.»

Tincupäcuwan yanapäcuwpita rimashan

San Mateo 10.42; San Lucas 9.49-50

³⁸ Jinarcur Juan niran: «Tayta, nimashayquinylla supayta jarguycajta ricapäcuwcä. Chaypis mana puríshimaptinchi, mičhapäcuwcä.» ³⁹ Jesúsna niran: «Ama mičhanquimanchu. Pipis yupachicamashan-janan Tayta Diosnillanchi camacächishancunata rurar, mana ashlimangachu. ⁴⁰ Mana chiquimashpanchi yanapaycämanchi. ⁴¹ Pipis: «Washäcu Jesúspa puríshijnin canqui» nir yacullatasi macyaycushuptiqui, Tayta Diosninchipis alli ricar ayninta cutichinga.»

Juchaman mana chayananpaj piñapashan

San Mateo 18.6-9; San Lucas 17.1-2

⁴² «Wamra-jina llapan shungunwan nuwaman yupachicamajcunata juchaman jančhajcuna wañuyman chayachun. Jatun-caray marayta cuncanman wallgaparcur yacu ruri-ruricaman wicaparinman.

⁴³⁻⁴⁴ «Maquiqui juchata aparicachishuptiqui, muturinquiman. Ishcay maquiyuj caycar chacaj pachaman aywanayquipita alli canman juc-caj maquiyujlla cawaptiqui. Chacaj pachačhu nina imaypis mana upingachu.* ⁴⁵⁻⁴⁶ Čaquiui juchata aparicachishuptiqui, muturinquiman. Ishcay čaquiuij caycar chacaj pachaman aywanayquipita alli canman juc-caj čaquiuijlla cawaptiqui. ⁴⁷ Ñawiqui juchata aparicachishuptiqui, ujtirin-quiman. Ishcay ñawiyuj caycar chacaj pachaman aywanayquipita alli canman juc-caj ñawiyujlla manchaparcur cawaptiqui. Tayta Diosninchita manchapacur, maquinčhu cawachishunquipaj.

⁴⁸ «Chacaj pachačhu aycha curucuna mana wañunchu.

* **9:43-44** Unay-unay Bibliačhu birsiculu 44-tapis, 46-tapis mana caranchu. Jipataraj birsiculu 48-wan tincunanpaj yapasha.

Ninapis mana upinchu.*

⁴⁹ «Pitapis juchaman jančhajcunata llapantam illararachinga cačhi ruparishan-jina.

⁵⁰ «Cačhipis sumaj alli. Puchguynin illariptinmi ichanga, ¿yapay puchguyninman cutichinquimanchuraj? Mana. Chaymi cačhi alli cashan-jina jamcunapis Tayta Diosninchipa shungun munashannuylla cawanquiman. Alli ricanacur, juc shungulla cawanquiman.»

10

Majayjcuna mana raquicānanpaj willapashan

San Mateo 19.1-12; San Lucas 16.18

¹ Cafarnaún marcapita Judea quinranman aywacur, Jordán mayuta Jesús chimparan. Chayčhu achcaj runa jutucaptin, imaypis yačhachicushannuylla yačhachiran. ² Waquin fariseucuna achäquita ashipar, Jesústa tapuran: «¿Runa warminpita raquicānan camacanchu?» nir. ³ Jesúsna tapuran: «Moiséspa shimin, ¿imanirantaj?» ⁴ Fariseucunana niran: «Paymi auniran: <Actaman jamaycachir, warmiquiwan raquicar, jargurinquiman> nir.»*

⁵ Jesúsna niran: «Chucru shungu captiqui shiminta isquirbir, raquicānayquita Moisés auniran. ⁶ Chaypis cay pachata camashan wican Tayta Diosninchipa warmitapis, ullgutapis ruraran.* ⁷ Runa warmita ashir, maman-taytanpa maquinpita llucshicuman. ⁸ Warmillanwan juyar, ujllarānacun juc shungulla cawananpaj. Ishcraj cashpansi juc shungulla cawan. ⁹ Chaymi Tayta Diosninchipa majachacächishanta runa mana raquicächinmanchu.»

¹⁰ Chaura wasiman čhayar, purišhijnincunapis Jesústa tapucuran. ¹¹ Tapuctin, Jesús tantiyachiran: «Juc runa majanta jaguiriycur juc warmiwan majachacarga, juchata aparicun. Unay-caj warminta jananpaycächin. ¹² Juc warmipis majanta jaguiriycur juc runawan majachacarga, juchata aparicun. Unay-caj majanta jananpaycächin» nir.

Wamracunapaj Tayta Diosninchita mañacapushan

San Mateo 19.13-15; San Lucas 18.15-17

¹³ Waquin runacunana Jesúsman čhayaran: «Yataycur mallwa wamräcupaj Tayta Diosninchita mañacapamay, ari» nir. Wamracunata čhayachija ricarmi ichanga, purišhijnincuna piñacuran.

¹⁴ Mičhaycajta ricar, Jesús piñacuran: «Ama mičhaychu. Wamracunata apamuchun. Shacamuchun. Wamra alli shungu cawashan-jina alli shungu runacunalla Tayta Diosninchiman yupachicushpan maquinčhu cawan. ¹⁵ Sumaj tantiyacunquiman. Tayta Diosninchipa maquinčhu cawanayquipaj wamracuna-jina wiycunquiman. Manchäga maquinčhu mana cawanquipächu» nir. ¹⁶ Jesúsna wamracunata margarcur-margarcur, umanta maquinwan yataycur-yataycur mañacapuram: «Taytallau Tayta, cay wamracunata sumaj yanapaycullay» nir.

Puchuy-puchuy janančhu cawaj runa Jesúswan parlashan

San Mateo 19.16-30; San Lucas 18.18-30

¹⁷ Chaypita Jesús aywacunananpaj caycaptin, juc runa juclla čhayarcur, jungurpacuycur tapuran: «Alli Tayta, ¿imatataj ruráman Tayta Diosninchipa ñaupančhu imaycamanpis cawanäpaj?» nir.

¹⁸ Jesúsna niran: «¿Imanirtaj: <Alli> nimanqui? Tayta Diosnillanchi alli. ¹⁹ Paypa shiminta musyanqui. Ama waňuchicunquichu. Majayquita ama jananpachinquichu. Ama suwacunquichu. Runa-masiquita ama tumpanquichu. Ama llullapäcunquichu.

* **9:48** Isaías 66.24. * **10:4** Deuteronomio 24.1-4. * **10:6** Génesis 1.27.

Mamayqui-taytayquita alli ricanqui.»^{*} ²⁰ Chaura nirán: «Tayta, wamra cashápita-pacha chaycunata llapallantam óharcushcä.»

²¹ Chaynuy niptin, alli ñawinpa ricapärir, Jesús nirán: «Jucrämi pishiñhunqui. Llapan imayquicunatapis ranticuycur pishipacujcunata aypurir, puríshimay. Chayrämi imaycampis Tayta Diosninchipa maquinchhu cawanquipaj.» ²² Chaynuy niptin, runapa shungun ishquicäcuran. Puchuy-puchuy jananchhu juyashpan juyupa llaquish aywacuran.

²³ Chaura Jesús ricachacurir, puríshijnincunatana nirán: «Puchuy-puchuy jananchhu cawajcuna Tayta Diosninchipa maquinchhu cawanapaj sumaj sasa.» ²⁴ Niptin, puríshijnincunapis mancharicäcuran. Chaymi Jesús nirán: «Wawacuna, Tayta Diosninchipa maquinchhu cawayga sumaj sasa. ²⁵ «Camíllu» nishan jatun-caray uywa aujapa ñawinpa ushtuya mana jushan-jina puchuy-puchuy jananchhu cawajcunapis Tayta Diosninchipa maquinchhu cawayta mana junchu.»

²⁶ Chaynuy niptin, puríshijnincuna juyupa mancharicäcuran: «Chaynuy captin, ¿piraj Tayta Diosninchipa ñaupanman óhayanga? ¿Piraj jishpichish canga?» nir. ²⁷ Llapanta ricapärir, Jesús nirán: «Runacunaga ushyacajllam. Chaymi alli cawarpis, sasächicun. Tayta Diosninchipämi ichanga imapis mana sasachu. Payga munayniyujmi pitapis ñaupanman óhayachinanpaj.»

²⁸ Pedruna nirán: «Tayta, nuwacuna llapan imäcunatapis jaguiycurmi, puríshiycaj.» ²⁹ Jesúsnra nirán: «Sumaj tantiyacunquiman. Pipis nuwa-raycur, Tayta Diosninchipa alli willacuyninta willapäcunan-raycur wasinta, mayurnincunata, shullcancunata, mamanta, taytanta, wamrancunata, óhacracunata jaguiycujga ³⁰ cay pachačhu pačhac (100) janapaytam taringa. Ñacash caycarsi, wasincunata, mayurnincunata, shullcancunata, mamancunata, wamrancunata, óhacracunatapis taringa. Tayta Diosninchipa ñaupanman óhayarpis, mana ushyacaj cawaytapis taringa. ³¹ Ima captinpis, sumaj tantiyacunquiman. Cay pachačhu achcaj runa alli ricash captinsi, Tayta Diosninchipa ñaupanman óhayar, mana alli ricashnachu canga. Waquincunatam ichanga Tayta Diosninchí alli ñawinpa ricanga runa-masin pampaman óhurash captinsi.»

Quimsa cutipana wañuyman óhayananta Jesús musyachicushan San Mateo 20.17-19; San Lucas 18.31-34

³² Chaura Jerusalén marcaman Jesús wicheyapa ñaupaptin, puríshijnincunapis mancharish aywaycaran. Waquin jatirajcunapis mancharish aywarcaycaran. Chaura óchunca ishcaywan puríshijnincunallata shuntarcur, imamanpis óhayananta willar, Jesús nirán: ³³ «Jerusalén marcaman aywaycashanchita musyanqui. Tayta Diosninchí cačhamasha. Chaypis waquin runacuna mayur cüracunapa maquinman, Moiséspashiminta yačhajcunapa maquinman óhayachimanga. Paycunaga wañuyman jitarpamanga. Wañuchimänanpaj jápa runacunapa maquinman óhayachimanga. ³⁴ Jápa runacunana pampaman óhayachimanga. Tuwapamanga. Wascamanga. Wañuchimanga. Wañuchimaptinsi, quimsa junajta cawarimushaj.»

Munayniyuj cayta ashijcunapita tantiyachishan San Mateo 20.20-28

³⁵ Chaura Zebedeupa wamran Santiaguwan Juan Jesúsmán ashurcur nirán: «Tayta, mañacushäta aumimay, ari.» ³⁶ Chaura Jesús tapuran: «¿Imáčhütaj yanapäshayqui?» nir. ³⁷ Tapuptin, nirán: «Tayta, mayur mandaj cayman óhayar, nuwacunatapis mandäšhinajpjaj óhayramay. Jucníta diričha-caj läduyquiman jamachimay; jucnítana isquirdacaj läduyquiman.»

³⁸ Jesúsnra nirán: «Imata mañacaycämashayquitapis mana musyanquichu. Tapushayqui. Juyupa ñacarcachir wañuchimashan-jina rurashuptiqui, ¿ičhipunquimanchuraj?»

³⁹ Paycunana nirán: «Au. Ičhipushämi.» Jesúsnra nirán: «Rasunpam ñacashä-jina ñacanquipaj.»

* **10:19** Éxodo 20.12-16; Deuteronomio 5.16-20.

Wañushä-jina wañunquipaj. ⁴⁰ Chaypis mandäshimänayquipaj čhuranaj mana camacanchu. Chaytaga Tayta Diosnillanchi camacächisha. Paymi acracushancunata diricha-caj lädümánpis, isquirda-caj lädümánpis jamachinga.»

⁴¹ Santiaguwan Juan mañacushanta wiyar, čhuncaj purishij-masincuna ullgucaycäriran. ⁴² Chaura llapanta jayaycur, Jesús niran: «Jäpa runacuna juc-niraj cawashanta musyanqui. Paycuna Tayta Diosninchita mana manchapacunchu. Mayur auturdänincunapis ullgurcur-ullgurcur, nishan-nishan marca-masincunata imatapis rurachin. ⁴³ Jamcunam ichanga chaynuy ama canquimanchu. Munayniyuj cayta munar, llapantaraj yanapanquiman. ⁴⁴ Mandaj cayta munar, llapanpa manduntaraj ruranquiman. ⁴⁵ Tayta Diosninchita cačhamasha. Chaypis mana munayniyuj cayta ashirchu shamushcä; manchäga pü-maytapis yanapänäpaj. Tayta Diosninchipa maquinčhu cawananpämi cawaynipa čhaninwan may-may runata jishpichishaj.»

Japra Bartimeuta Jesús allchacächishan

San Mateo 20.29-34; San Lucas 18.35-43

⁴⁶ Chaypita Jericó marcaman čhayaran. Marcapita purishijnincunawan Jesús aywacuptin, runacunapis achcajmi aywähiran. Caminu wajtallančhu Timeupa wamran japra Bartimeo mañapacuycaran. ⁴⁷ Nazaret runa Jesús aywaycashanta wiyar, sumaj jayacuran: «Unay mandaj Davidpa willcan Jesús, llaquipaycallämäy, ari» nir. ⁴⁸ Runacunana ullgüparan: «Upälla» nir. Chaypis callpacuycurraj jayacuran: «Unay mandaj Davidpa willcan Jesús, llaquipaycallämäy, ari» nir.

⁴⁹ Ichiycur, japrata Jesús jayachiran. Jayajcunana Bartimeuta niran: «Ama manchacuychu. Jucllash aywanqui. Jayaycäshunqui.» ⁵⁰ Chaura jacunta jitariycur, juclla Jesúsman aywaran. ⁵¹ Chayaptin, Jesús tapuran: «¿Imallačhütaj yanapäshayqui?» nir. Japrana niran: «Tayta, ñawi ricananta munä.» ⁵² Chaura Jesús niran: «Cuticuyna. Yupachicamashayquipita allchacashcanqui.» «Allchacashcanqui» niptin, rasunpa ricaran. Ricar, Jesús aywashanpa aywaran.

11

Jerusalén marcaman Jesús čhayashan

San Mateo 21.1-11; San Lucas 19.28-40; San Juan 12.12-19

¹ Jerusalén marcaman Jesús yaycupaycar, Betfagé marcaman, Betania marcaman čhayaycaran. Chay marcacuna quinrančhu Ulíbus punta caran. Ishcaj purishijnincunata cačhar, Jesús ² niran: «Wac chimpa tacsha marcaman aywariycuy. Čhayar, manta büruta tarinquipaj. Pipis mana muntacunrächu. Watarashanpita pascarir, apacamunqui. ³ Pascaycaptiqui pipis mičhäshuptiqui, ninqui: «Mandamajnitätash mañanqui. Cutirachipamushayqui.» »

⁴ Chaynuy niptin, purishijnincuna aywaran. Čhayar, wasi puncučhu büru wataraycajta tariran. Pascapacuycaptin, ⁵ waquin runa tapuran: «¿Imapätaj büruta pascaycanqui?» nir. ⁶ Chaura Jesús nishanta willaptin, mana mičharannachu.

⁷ Chaura büruta Jesúsman aparan. Jacuncunata shawaparcur, Jesússta muntachiran.

⁸ Bürun muntash Jesús aywaycaptin runacuna cushicuywan jacuncunatapis, jačhapa rämancunatapis caminuman mashtapuram. ⁹ Jesúspa jipanta-ñaupanta aywajcunapis cushicushpan japarpararan:

«Taytallau Tayta, washaycallämäy, ari.

Tayta Diosninchita cačhamushan runa alli ricash caycullächun.

¹⁰ Ima allish unay mandaj David mandashan marcata jatarachinanpaj shamusha.

Janaj pachačhu cawaj Tayta Diosninchita alliman čhuraycalläshun» nir.*

* **11:10** Salmo 118.25-26.

¹¹ Jerusalén marcaman Jesús ́hayarna, Tayta Diosninchipa wasinman yaycuran. Sumaj ricapacurir pacha chacanaycaptinna, Betania marcaman ́chunca ishcaywan puríshijnincunawan-imá cuticäriran.

Jígus yúra chaquicäcunapaj Jesús mañacushan

San Mateo 21.18-19

¹² Warannin Betania marcapita Jesús llucshiptin, yargay chariran. ¹³ Carushnijchú jíguspa yúran birdiraycaja ricäriran. Chaymi wayuynin ashij aywaran. ́Hayar, wayuyninta mana tariranchu. Wayunan wican mana ́hayamuptinraj, üjallanta tariran.

¹⁴ Chaymi jígus yúrata Jesús niran: «Cananpita mana wayunquipánachu. Wayuyniquita pipis mana imaysi micunganachu.» Wiyächipaya nishanta puríshijnincunapis wiyan.

Tayta Diosninchipa wasinpita rantipacujcunata jargushan

San Mateo 21.12-17; San Lucas 19.45-48; San Juan 2.13-22

¹⁵ Jerusalén marcaman ́hayar, Tayta Diosninchipa wasinmanna Jesús aywaran. Wasinpa sawanninpita ranticujcunatapis, rantipacujcunatapis jarguran. Jillay ruacapacuj runacunapa mísancunatapis jillaynintinta sajtar ushyaran. Paluma ranticujcunapa jamanancunatapis wicapar ushyaran. ¹⁶ Tayta Diosninchipa wasinpa sawanninchú ima-imata rantipaj purichinantapis mičharan.

¹⁷ Llapanta wicapar, runacunata tantiyachiran: «Tayta Diosninchipa shiminchú nin: ‘Wasiga chay-tucuy marcapita sharcamur mañacamajcunallapámi.’»* Jamcunam ichanga suwapa mačhayninman ticrachishcanqui» nir.

¹⁸ Allita willapácuption, runacuna Jesústa alliman ́churaran. Payta manchapacuranna. Chaymi mayur cüracunawan Moiséspa shiminta yačhajcuna mancharicäcushpan Jesústa imanuypa wañuchinanpápis ashiran.

¹⁹ Pacha chacanaycaptinna, marcapita puríshijnincunawan Jesús aywacuran.

Tayta Diosninchiman yupachicuypita tantiyachishan

San Mateo 21.20-22

²⁰ Warannin tuta aywar, jígus yúra sapincaman chaquiraycajtana ricaran. ²¹ Chaura Jesús nishanta yarpárir, Pedro niran: «Tayta, mà, ricay. Chapata rurashayqui jígus yúra chaquicäcusha.»

²² Jesúsnra niran: «Imatapis mañacur, Tayta Diosninchiman sumaj yupachicuy. ²³ Sumaj tantiyacunquiman. Yupachicurga, tagay puntatapis ninquiman: ‘Caypita yacu püsuman jígacurpu.» Lapan shunguyquiwan yupachicur niptiqui, änirmi tagay punta yacuman jígacurpungapaj. ²⁴ Tayta Diosninchita mañacur lapan shunguyquiwan yupachicur, mañacushayquita ́chasquinquipaj. ²⁵ Tayta Diosninchita mañacuycashayquičhu pitapis ja-gayächishayquita yarpárir, wanacuy. Llapanta jungay. ²⁶ Chaynuypa janaj pachačhu tiyaj Tayta Diosninchipis lapan jucha aparicushayquita jungangapaj.»

Jesús munayniuj cashan

San Mateo 21.23-27; San Lucas 20.1-8

²⁷ Chaypita Jerusalén marcaman cutircur, Tayta Diosninchipa wasin puncunchú Jesús puriycaptin, mayur cüracuna, Moiséspa shiminta yačhajcuna, mayur runacunapis

²⁸ tapuran: «¿Pitaj cačhamushcashunqui? ¿Pipa munayniwantaj imacunatapis ruraycanqui?» nir.

²⁹ Jesúsnra niran: «Nuwapis mà, tapucushayqui. Willamaptiqui, pí cačhamashantapis willashayqui. ³⁰ Juanta ushyachicunapaj, ¿pitaj cačhamusha: Tayta Diosninchichu, runa-masillanchu? Mä, willamay. Willamaptiqui, willashayqui.»

³¹ Chaura quiquin-pura parlanacäriran: «‘Tayta Diosninchchi cačhamusha’ niptinchi: ‘¿Imanirtaj mana wiycushcanquichu?’ nimäshun. ³² ‘Runa-masinchicunalla cačhamusha’ niytapis mana camäpacunchichu.» Runacunaga Ushyachicuj Juanta

* **11:17** Isaías 56.7.

Chasquicush caran: «Tayta Diosninchipa willacujnинmi» nir: ³³ Chaymi Jesústa niran: «Tapumashayquita mana musyächu.» Chaura Jesúspis niran: «Mana camäpacuptiqui, pii caáchamashanta nuwapis mana willashayquichu.»

12

Chacrayujwan tincuchiypa willapashan San Mateo 21.33-46; San Lucas 20.9-19

¹ Chaura tincuchiypa willapäcur Jesús niran: «Juc čacrayuj runash übasta mururan. Ushyaypash pirgaran. Übasta japchinanpäpis püsutash ruraran. Čacranta täpananpänash türi wasita pircachiran. Jinarcur čacra runacunata allimshaycurshi, juclä marcapa aywacuran.

² «Übas pallay čhayamuptin, uywaynintash caáchacuran: <Dirichüta shuntamuy> nir.
³ Cačha čhayaptin allimshacuj runacuna sumaj magaraycärirshi, jinallata jarguriran.
⁴ Chaura čacrayuj juc uywaynintanash caáchacuran. Paytapis sajmaycällarshi, umanta račhipariran. Ashllir ushyaran. ⁵ Chaura čacrayuj juc uywaynintanash caáchacuran. Paytapis wañuy cachiran. Chaypis čacrayuj runa achcajtärashi caáchacuran. Paycunatapis waquintash magaran. Waquintanash wañuy cachiran.

⁶ «Chaypita jucsi caycasharäshi caáchacunapaj. Yarpačhacuriycurshi, cuyay wawanta caáchacuran: <Quiquipa wamräta manchapacungam> nir. ⁷ Čacrayujpa wamranta ricarshi ichanga, allimshacujcuna quiquin-puralla parlanacäriran: <Tagay wamrallanpämi llapan imancunatapis papänin jaguipaycunga. Chaymi wañurachishun. Chaura cay čacra nuwanchipaj canga.> ⁸ Chaynuy nirshi, čacrayujpa wamranta charipäcuran. Wañuy cachiran. Ayantanash čacranpita wicapariran.»

⁹ Willapariycur, Jesús tapuran: «Canan mä, willamay. Čacrayuj cutimur, ¿imataraj ruranga chay čacra runacunata? Chay čacra runacunata wañurachinga. Čacrantapis juctana allimshacunga. ¹⁰ ¿Tayta Diosninchipa shiminta manachu liguishcanqui? Shiminčhu niycan:

<Wasi rurajcuna: «Cay rumi mana allichu» nir wicapashantapis Tayta Diosninchisimintuta jallarachinapaj čurasha.»

¹¹ Chaytaga quiquin Tayta Diosninchichi camacächisha.

Chaypitam cushicurcaycanchi.»*

¹² Mayur cüracunawan yačhajcuna wiyächipaycashanta tantiyacuriran. Chaymi Jesústa juclla chariyta munaran. Ichanga achcaj runa juturpaycaptin, mana chariranchu. Runacunata manchacuran. Chaymi jaguiycur aywacuran.

Jillarya čuranganpaj tapucushan San Mateo 22.15-22; San Lucas 20.20-26

¹³ Chaypita fariseucuna achäquita ashipashpan ishcay-quimsa fariseumasincunawan mandaj Herodespa purishijnincunata Jesúzman cačharan. ¹⁴ Jesúzman čayar, paycuna niran:

«Tayta, alli shungu cashayquita musyä. Pitapis Tayta Diosninchipa shimmillanta willapanqui. Llapa runata alli ricanqui. Chaymi tapucushayqui. ¿Mandaj Césarpaj jillarya čurashuwanchuraj, manachuraj? ¿Čuranganchi camacanchuraj, manachuraj?»

¹⁵ Jesúsmi ichanga achäquita ashipashanta musyar, niran: «¿Imanirtaj maquichacamayta munarcaycanqui? Jillaryniquita mä, ricachimay.» ¹⁶ Chaura jillarya apapuram. Jesúnsna tapuran: «Jillarychu, ¿pipa liträtuntaj caycan? ¿Pipa jutintaj isquirbiraycan?» nir. Paycunana niran: «Mandaj Césarpa.» ¹⁷ Jesúnsna niran: «Mandaj Césarpata Césarpaj čuray. Tayta Diosninchipata Tayta Diosninchipaj čuray.» Niptin, mancharishpan ima rimapacuytapis mana camäpacurannachu.

* ^{12:11} Salmo 118.22-23.

*Wañushcuna cawarimunanpita tapucushan**San Mateo 22.23-33; San Lucas 20.27-40*

¹⁸ Chaypita saduceu runacunana Jesúzman ćhayaran. Paycuna yarpaj: «Wañushcuna mana cawaringapächu» nir. Chaymi Jesústa niran: ¹⁹ «Tayta Jesú, Moiséspa shiminchú nin: <Runa wañucur warminta wawaynajllata jaguiptin, wañucuj runapa wauguilan biyüdawan majachacanman.* Mushuj majanwan wamrata tarishanna wañucuj runanpa jutinta apanga.» ²⁰ Canan mä, tapucushayqui. Jančhis wauguish caran. Juc wauguish warmiwan majachacaran. Ichanga warminta mana mirachillarshi wañucuran. ²¹ Chaura juc-caj wauguinnash warmiwan majachacaran. Ichanga mana mirachillarshi wañucuran. Chaynuyllash juc wauguiwan, juc wauguiwan majacha-casha. ²² Juc warmillawan majachacarcur-majachacarcurshi, chay jančhis waugui wañucuran. Ichanga mayganpis warmita mana mirachillarshi, wañucuran. Llapan wañushanpa jipantaräshi warmipis wañucuran. ²³ Tayta, mä, willamay. Wañushanpita cawarircamur, chay warmi, ¿maygan wauguipa warmintaj canga jančhiswan majacha-cash caycar? ¿Llapanpa warminchuraj canga?»

²⁴ Jesúsnra niran: «Jamcuna llutanta yarparcaycanqui. Tayta Diosninchipa shimentapis, munayniyuj cashantapis mana tantiyanquichu. ²⁵ Cawarimuj runacuna mana ma-jachacanganachu. Anjilcuna-jina mana ushyacanganachu. ²⁶ Wañushcuna cawarimunanta mayna Moisés musyachicuran, ¿au? Isquirbirashan libručhu nin: <Shira-shiračhu Tayta Diosninchí niran: «Moisés, unay auquilluyqui Abraham, Isaac, Jacob wañush carsi, cawaycan. Tayta Diosnin caycapti, manchapacaycäman.» »* ²⁷ Tayta Diosninchita cawajcunalla manchapacun; mana wañushcunachu. Chaymi jamcuna llutanta yarparcaycanqui.»

*Allicaj yaćhachicuypita tapucushan**San Mateo 22.34-40*

²⁸ Tapupajcunata tantiyachishanta wiarmi Jesúzman ashurcur, Moiséspa shimenta yaćhaj runana tapucuran: «Tayta, llapan yaćhachicuycunapita, ¿maygantaj allicaj yaćhachicuy?» nir.

²⁹ Chaura Jesú niran: «<Israel runacuna, wiycäriy. Tayta Diosninchí jucnayllam. Juc mana canchu. ³⁰ Llapan shunguyquiwan Tayta Diosninchita manchapacäriy.* ³¹ Jananmanpis: <Quiquiqui alli ricacushayqui-jina runa-masiquitapis alli ricanquiman.» Cay ishcan yaćhachicuypita mas allicajga mana cannachu.»*

³² Chaura Moiséspa shimenta yaćhaj runa niran: «Allim, tayta. Rasullanta rimashcanqui. Rasunpa jucnaylla Tayta Diosninchí. Juc mana canchu. ³³ Llapan shungunchiwan Tayta Diosninchita manchapacushun. Quiquinchi alli ricacushanchi-jina runamasinchitapis alli ricashuwan. Chaura Tayta Diosninchí alli ricamäshun cuyachicuyninchita, jaracuyninchita mana ćhuraptinchisi.»*

³⁴ Chaura yaćhaj runa allita rimashanta wiyar, Jesú niran: «Tayta Diosninchipa maquinchú-yupayna cawaycanqui.» Chaynuy nishanpita pipis mana tapuparannachu.

*Washäcuj Jesú mandaj Davidpa willcan cashan**San Mateo 22.41-46; San Lucas 20.41-44*

³⁵ Chaura Tayta Diosninchipa wasinchéhu willapäcuycashančhu Jesú niran: «¿Imanirtaj Moiséspa shimenta yaćhajcuna riman: <Washäcuja unay mandajninchí Davidpa will-canmi» nir? ³⁶ Espíritu Santu rimachiptin, quiquin David niran:

<Tayta Diosninchí Washäcujiña nisha:

«Mandäshimänayquipaj diricha-caj lädüman jamacuy cunčharyuyquicunata pampaman ćhuranäcaman.

* **12:19** Deuteronomio 25.5-10. * **12:26** Éxodo 3.2-6. * **12:30** Deuteronomio 6.4-5. * **12:31** Levítico 19.18.

* **12:33** Oseas 6.6.

Nishayqui-nishayqui munashayquita rurachinquipaj» nir.*

³⁷ «Chaynuy niptin, Washäcuj, ¿rasunpachuraj Davidpa willcallan canga? ¿Runapa wawanchuraj canga? Au, paypitam. Chaypis quiquin mandaj David manchapacur, Taytachacuycan.»

Jesús willapäcuptin, runacuna cushish wiyaparaycaran.

*Moisés pa shiminta yačhajcunata Jesús piñapashan
San Mateo 23.1-36; San Lucas 11.37-54; 20.45-47*

³⁸ Yačhachishpan Jesús niycaran: «Moisés pa shiminta yačhajcunapa llupinpa ama jatinquichu. Paycuna ru capäcushalla läsacunačhu purin runacuna manchapacunapaj.

³⁹ Shuntacäna wasicunačüpis ñaupa-ñaupallačhu jamayta ashin. Micupacuj jayachiptinpis, allillata jarana nanta munan. ⁴⁰ Majan wañupacush warmicunapa imancunatapis ushyapan. Jinarcur, Tayta Diosninchita sumaj mañacuj-tucun. Paycunata Tayta Diosninchí sumaj ñacachinga.»

*Biyüda warmi cuyachicuyninta čurashan
San Lucas 21.1-4*

⁴¹ Tayta Diosninchipa wasinčhu caycar, jillay čuracuna ñaupančhu Jesús jamaraycaran. Jillay čurajcunata ricapaycaran. Puchuy-puchuy janančhu tiyaj runacuna chay-chica jillayta čuraran. ⁴² Biyüda warmipis pishipacuyčhu juyaycar, ishcay čhaniynaj-yupay jillayta čuraran.

⁴³ Chayta ricar, purišhijnincunata Jesús niran: «Sumaj tantiyacunquiman. Pi-

shipacuyčhu juyaycaj biyüda warmi čurashanman waquin čurashan mana tincunchu.

⁴⁴ Waquin runa jillaynin puchuptinraj, čurasha. Cay warmim ichanga pačhallanpaj charashantapis llapanta čurasha.»

13

*Tayta Diosninchipa wasinta jučhurachinanta musyachicushan
San Mateo 24.1-2; San Lucas 21.5-6*

¹ Tayta Diosninchipa wasinpita llucshiycahančhu juc purišhijnin Jesústa niran: «Tayta, mä, ricay. Achic-achicyaycaj rumicunawan Tayta Diosninchipa wasinta pirgasha. Sumaj cuyayllapaj, ¿au?» ² Jesúsnra niran: «Musyachishayqui. Imanylla lapan ricashayqui ushyacanga. Rumiwan pirgararsi, llapanmi jučhurachish canga.»

*Runacuna imaman čayananta musyachicushan
San Mateo 24.3-28; San Lucas 21.7-24; 17.22-24*

³ Chaypita Ulibus puntaman Jesús aywacuran. Chayčhu Tayta Diosninchipa wasinman ricajčhu jamaraycaptin, Pedro, Santiago, Juan, Andrés tapuran: ⁴ «Tayta Jesús, ¿imaytaj Tayta Diosninchipa wasinta jučhurachinga? ¿Imanaypataj shimiqui čharcucänanta musyashaj?» nir.

⁵ Jesúsnra niran: «Pipis pantachishurunquiman. ⁶ Achcajmi shamunga: «Nuwata shuyaraycämanqui. Washäcujmi caycä» nir. Achcaj runatam pantachinga.

⁷ «Wacčhu-cayčhu wañuchinacuy jatariptinpis, ama manchacärinquichu. Chaycunara jangapaj. Chaypis cay pacha mana ushyacangarächu. ⁸ Cay pacha ushyacänanpäga marcan-marcan wañuchinacungapaj. Chay-tucuyčüpis pacha juyupa sicsicyanga. Mučhuy captinpis, yargaywan runacuna wañunga. Chaypis runacuna mana ushyacangarächu. Manchäga ñacayllarämi jallaringa.

⁹ «Quiiquicunapis sumaj tantiyacunquiman. Čhasquicamashayqui-janan mayur Israel runacunapa maquinman čhayachishunquipaj. Shuntacäna wasicunaman rišu apachishunquipaj. Chayčhu sumaj wascashunquipaj. Roma auturdäcunamanpis

* **12:36** Salmo 110.1.

chayachishunquipaj. Wacpa-caypa purichishuptiquipis, shimiuita ama amucurcunquchu. Manchäga pii-maytapis nuwapita willapanqui. ¹⁰ Cay pacha manaraj ushyacaptin, Tayta Diosninchipa alli willacuyninta chay-tucuy marcaçhu willapäcunga.

¹¹ «Auturdäcunaman chayachishuptiqui, ama llutäpacunquchu: <¿Imataraj rimashaj?> nir. Manchäga Tayta Diosninchichi shimiuitiman churashallanta rimanquipaj. Espíritu Santu rimachishunquipaj. Mana quiuiqui yarpashayquitinanachu rimanquipaj.

¹² «Nuwata chasquicamashan-janan waugui-pura auturdäcunamanpis chayachinacunga. Papäninpis wamrancunata wañuyman chayachinga. Wamrancunapis maman-taytanta chiquir, wañuyman jitarpunga. ¹³ Chasquicamashayqui-janan llapan runa chiquishunquipaj. Mana yamacällar shimiita wiyacuptiqui, imaycamanpis maquinchhu Tayta Diosninchichi cawachishunquipaj.

¹⁴ «Tayta Diosninchipa unay willacujnин isquirbishanta liguir, sumaj tantiyacärinquiman. Tayta Diosninchipa wasinta pampaman churaptin, manchapacushantapis iichichtin, Judea marcacunapita puntacunaman juella jishpicäriy. ¹⁵ Wasi puncučhu caycar, ruriman ama yaycunquimanchu. Imayquicunatapis ama jurgunquimanchu. ¹⁶ Chacrapitapis wasiquiman ama cutinquimanchu. Müdanayquita ama shuntanquimanchu.

¹⁷ «Ñacachishan wican jishyaj warmicunapis, pishi wamrayujcunapis cuyapaypaj ñacanga. ¹⁸ Chaymi jishpinayqui junaj tamya wicanman mana chayanapaj, Tayta Diosninchita mañacäriy. ¹⁹ Chay wican juyupa ñacay canga. Tayta Diosninchichi cay pachata camashanpita-pacha chaynuy ñacay mana imaypis caranchu. Chaynuyjis yapay mana imaysi cangapänachu. ²⁰ Wamrachacushancunata llaquipar, Tayta Diosninchichi chay ñacay junajcunata wallcayächinga. Manchäga pipis mana wañuypita jishpinmanchu.

²¹ «Chay wican pantachicujcuna pantachishurunquiman: <Mä, ricay. Tayta Diosninchichi cačhamushan Washäcujninchichi shamusha. Mä, ricay. Washäcujninchichi chayaycämun> nir. Chaynuy nishuptiquisi, ama chasquianquchu. ²² Chay wican Washäcuj-tucujcuna, willacuj-tucujcuna ricarimungapaj. Munayniyuj car, tucuya ruranga runacunata riguichinanpaj. Chayta rurar, Tayta Diosninchichi acracushan runacunatapis waquinta pantachinga. ²³ Canan sumaj tantiyacunquiman. Willapänajpaj cashanta mayna willapashcraj.

Tayta Jesúspa cutimunanpita musyachicushan San Mateo 24.29-35, 42, 44; San Lucas 21.25-36

²⁴ «Juyupa ñacaycuna chawarcuptillan, inti wañucäcunga. Quilla mana achicyanganachu.

²⁵ Istrillacuna shicwamunga. Janaj pachapis juyupa tapsinga.* ²⁶ Chay junajmi Tayta Diosninchichi cačhamaptin, nuwata ricamanquipaj munayniyuj car, pucutay janančhu achic-achicyaycar cutiycämujta.* ²⁷ Tayta Diosninchichi anjilnincunata cačhamunga acrashan runacunata chay-tucuypta shuntamunanpaj. Shuntanga janaj pachapa cantunpita juc-caj cantuncaman.

²⁸ «Jigus yürawan tincuchiypa tantiyacushun. Yüran chillguiptin, tamya quilla jalaycunanta musyanchi. ²⁹ Chay-jina willapashäcuna charcuptin, cutimunä caycashanta tantiyacärinquipaj. ³⁰ Sumaj tantiyacunquiman. Waquinniquipa ricay ñawiquičhu llapan charcucanga. ³¹ Janaj pachapis, cay pachapis ushyacanga. Shimimi ichanga mana jungacangachu. Llapanmi charcucanga.

³² «Cutimunä junajta Tayta Diosninchichi pitapis mana musyachishachu. Wawan captisi, mana musyachimashachu. Janaj pachačhu tiyaj anjilcunatapis mana musyachishachu. Quiquin Taytallanchim musyaraycan.

* **13:25** Isaías 13.10; 34.4. * **13:26** Daniel 7.13.

³³ «Cutimunäta mana musyaycar, camaricushalla cawanquiman. ³⁴ Sumaj tantiya-cunayquipaj tincuchiypa willapäshayqui. Juc wasiyujshi aywacuya yarpar, mincayn-incunata jaguipusha llapanta imatapis rurananpaj. Wasi täpajtana ricačhacuyccänanpaj jaguisha. ³⁵ Chaymi ricchaycar imaypis cawanquiman. Wasiuj imay cutimunan-tapis mana musyanquichu. Čhayaramunman pacha chacarcuptillanpis, pullan-pagaspis, wallpa-wagaypis, pacha-waraypis. ³⁶ Mana yarpashpita čhayamur, puñuycajta tarishu-runquiman. ³⁷ Chaymi mayganiquipis Tayta Diosninchita ama yamacanquichu. Llapaniqui mayaj-mayaylla shuyämanqui.»

14

Jesústa charinanpaj parlanacushan

San Mateo 26.1-5; San Lucas 22.1-2; San Juan 11.45-53

¹ Chay wíchan Israel runacunapa «Libadüraynaj tanta» nishan fiesta jallarinanpaj ishcay junajllana pishiycaran. Chay fiestata ricsij: «Pascua» nir. Cüracunapa mandajniwan Moiséspa shiminta yačhajcuna yarpačhacuycaran Jesústa chariycur wañurachinanpaj. ² Waquinna niycaran: «Fiestačhu ama charishunchu. Chariptinchi, runacuna ullgucäcur ticraparamäshuwan.»

Warmi pirjümita Jesústa jaycapushan

San Mateo 26.6-13; San Juan 12.1-8

³ Betania marcačhu «Jaračhu» nishan Simónpa wasinčhu Jesús micupacurcaycaptin, butilla pirjümin aptash warmi čhayaran. Chay pirjümi sumaj čhaninyuj caran. Butillata quičharir, Jesúspa umanman jaycapuriran. ⁴ Chayta ricar, waquin jurpacuna ullgucäcur quiquin-puralla parlanacuran: «¿Imapäraj pirjümita usuchisha? Ama usuchinmanchu caran. ⁵ Manchäga quimsa pačhac (300) junaj aruypa čhaninčhu ranticunman caran. Jinarcur pishipacujcunata aypunman caran.» Chaynuy nir warmita chiquiparan.

⁶ Jesúsmi ichanga niran: «Ama rimapaychu. ¿Imanirtaj tincupanqui? Umäman jaycapamar, allitam rurasha. ⁷ Pishipacujcunata imaypis ricanquipaj. Yanapayta munar, imaypis yanapanquiman. Nuwatam ichanga waran-waran mana ricamanquipänachu. ⁸ Chaymi cay warmi allita rurasha. Cawaycaptillä, pampamänanpaj armachimasha. ⁹ Sumaj tantiyacunquiman. May-chayčüpís Tayta Diosninchipa alli willacuyninta willapäcur, cay warmi allita rurashantapis willacunga. Mana imaysi jungacangachu.»

Judas Iscariote Jesústa ticrapushan

San Mateo 26.14-16; San Lucas 22.3-6

¹⁰ Chaura Judas Iscariote Jesúspa purišhijnin caycarsi, mayur cüracunaman aywaran: «Jesústa charishishayqui» nir. ¹¹ Judas nishanta wiyar sumaj cushicur: «Jillayta jushayqui» niran. Chay junajpita-pacha charij-charijllana Judas caycaran mayčüpís Jesústa charinanpaj.

Purišhijnincunawan Pascua micuya Jesús micushan

San Mateo 26.17-29; San Lucas 22.7-23; San Juan 13.21-30; 1 Corintios 11.23-26

¹² Chaypita Pascua fiesta jallariran. Chay fiestačhu Israel runacuna libadüraynaj tantata micuj. Acrashan cashnitapis pishtaj. Chay junaj purišhijnincuna Jesústa tapuran: «Tayta, ¿mayčhütaj Pascua micuya camaricamushaj?» nir.

¹³ Chaura Jesús ishcaj purišhijnincunata cačhar, niran: «Jerusalén marcaman čhayaptiqui, puyñullawan runa yacuta apaycajta ricanquipaj. Jipallanta aywanqui. ¹⁴ Wasiman yaycuptin, wasiyujta ninqui: ‘Tayta Jesús cačhamasha. ¿Mayčhütäshi wasi jäcuycan purišhijnincunallawan Pascua micuya micupacunanpaj?’ ¹⁵ Quiquin camarishal-lata jäcuj altusninta ricachishunquipaj. Chayllačhu pishijcunata camaricunqui.»

16 Purishijnincunana änír marcaman chayar, Jesúspa shiminman-tupu llapantapis tariran. Chayllačhu Pascua micuya camaricuran.

17 Chacas-chacasna chunca ishcaywan purishijnincunawan Jesús chayaran.

18 Micurcaycashančhu niran: «Sumaj tantiyacunquiman. Mayganiquipis ticrapamar, wañuyman jitarpamanquipaj.» **19** Chaura llaquicäcur, jucnин-jucnин Jesústa tapuran: «¿Nuwachuraj? ¿Nuwachuraj?» nir. **20** Chuncia ishcaywan purishijnincunatana Jesús niran: «Nuwanchiwan iwal micujmi wañuyman jitarpamanga. **21** Tayta Diosninchi cačhamasha. Quiquin camacächiptin, wañuyman chayashaj shimin charcucänanpaj. Jitarpamaj runam ichanga juyupa ñacanga. Chaymi ama yurinmanpishchu caran.»

22 Micurcaycashančhu tantata aptacurcur, Jesús niran: «Taytallau Tayta, ima allish tarichillämashcanqui.» Jinarcur tantata paquircur-paquircur, purishijnincunata aypuran: «Catay. Cay tanta quiquími caycä» nir. **23** Chaypita bñuyuj cùpata aptacurcur, niran: «Taytallau Tayta, ima allish tarichillämashcanqui.» Jinarcur macyaptin, llapan upuchi-nacuran. **24** Jesúsnra niran: «Cay bñu yawarními. Washänaj-raycur wañuyman chayapti, yawarní jičhanga. Yawarniwanraj parlanacushanta Tayta Diosninchi charcucaycächin. **25** Sumaj tantiyacunquiman. Cananpita bñuta mana upushänachu. Llapanchita Tayta Diosninchi maquinman jishpichimaptinchiraj, mushuj bñuta upushaj.»

Pedro wasguinanta Jesús musyachishan

San Mateo 26.30-35; San Lucas 22.31-34; San Juan 13.36-38

26 Micupacuya ushyariycur, Tayta Diosninchita alliman churashpan cantarir, Ulíbus puntaman aywacäriran. **27** Chaychüna Jesús niran: «Canan pagas llapaniqui jaguiraycamanquipaj. Tayta Diosninchipa shiminpis nin: «Uysha michijta wañuchishaj.

Wañuy cachipti, uyshancuna mashtaya-mashtar aywacunga.»*

28 «Cawarircamurmi ichanga, Galilea marcaman ñaupashaj.»

29 Pedruna niran: «Lapan jaguirishuptiquipis, mana imaysi jaguirishayquipächu.»

30 Jesúsnra niran: «Pedro, sumaj tantiyacunquiman. Canan chacaylla wasguimanquipaj. Mana ricsij tucumanquipächu. Ishcay cutipa gällu manaraj cantaptillan, quimsa cutipa wasguimanquipaj.» **31** Pedruna niran: «Mana imaypis wasguishayquichu. Ishcaninchitapis jina wañuchimäshun.» Lapan purishijnincunapis Pedro-jina niran: «Mana wasguishayquichu.»

Getsemaní chacračhu Jesús mañacushan

San Mateo 26.36-46; San Lucas 22.39-46

32 Chaypita «Getsemaní» nishan chacraman purishijnincunawan Jesús aywaran. Chayar, niran: «Washanijčhu Tayta Diosninchita mañacushäcaman cayllačhu jamapäriy.» **33** Chaynuy nir Pedruta, Santiaguta, Juanta pusharan. Paycunapa ricay ñawinčhu jatunpa llaquicuran. Shungun ishquicäcuptin, niran: **34** «Llaquicuy juyupa chayapamasha. Wañuy janäčhüna. Yanagaycallämay, ari. Waräshimay.»

35 Jinarcur carushman aywarcur pachacaman jungurpacuycur Tayta Diosninchita mañacur, Jesús niran: «Papällau Papä, camacaptin, shuyarämaj ñacay ama chayamächunchu. **36** Jampäga imapis mana sasachu. Shuyarämaj ñacaypita jishpichimay, ari. Jishpiyta munaptipis, shungü munashan ama camacächunchu. Manchäga munashayquinylla llapanpis caycullächun.»

37 Jinarcur quimsaj purishijnincunaman cutir, puñuycajta tariran. Chaymi Pedruta niran: «Simón, ¿puñucuycanquičhim? ¿Manachu juc ürallasi ricchashcanqui? **38** Ricchayllapa. Mana wasguimänayquipaj Tayta Diosninchita mañacäriy. Allita yarparsi, ushyacajllam carcaycanqui.» **39** Jinarcur mañacushan-cajman yapay cutiran. Mañacushannuylla

* **14:27** Zacarías 13.7.

yapay mañacuran. ⁴⁰ Cutir, yapay puñucashta tariran. Wañuypa puñunay chariptin, puñucurcaycaran. Chaymi ima niytapis mana camäpacuranchu.

⁴¹ Quimsa cuticu cutirna, Jesús niran: «¿Puñurcaycanquiçhim? ¿Jitarpaycanquiçhim? Jataripacuyna. Juchaçhu aruj runacuna chayamushana. Tayta Diosninchipa caçhan caycaptisi, charimanga. ⁴² Jataripacuyna. Wañuyman jitarpamaj runa jananchiçhünam. Aywaphun.»

Jesústa rísu charishan

San Mateo 26.47-56; San Lucas 22.47-53; San Juan 18.2-11

⁴³ Jesús rimaycaptillan, purishijnin cashpansi Judas chayapurán achcaj runata pushacurcur. Mayur cüracunapis, Moiséspa shiminta yaçhajcunapis, mayur runacunapis caçhaptin, chay-chicaj runa aywaran jirunwan-caman, tucsicunanwan-caman. ⁴⁴ Judas mayna nish caran: «Macallarcushä runa Jesúsmi canga. Charircur mana caçharillar, apacunqui.» ⁴⁵ Chaymi chayaycur juclla Jesústa macallarcur, wamayaran: «Taytallau tayta» nir. ⁴⁶ Chaura Jesústa charicarcárran. ⁴⁷ Jesúspa juc purishijninna cuchillunta jurgurir, mayur cürapa uywayninpa rinrinta rugupariran.

⁴⁸ Llapan runata Jesús niran: «¿Imatataj yarpanqui? ¿Suwa cashätachu? ¿Imanirtaj jiruyquiwan-jiruyquiwan, cuchilluyquiwan-cuchilluyquiwan shapäcamushcanqui? ⁴⁹ Waran-waran Tayta Diosninchipa wasinçhu ricamashcanqui. Paypa shiminta ricay ñawiquiçhu tantiyachishcä. ¿Imanirtaj mana charimashcanquichu? Ichanga Tayta Diosninchipa shimin chaycucänanpämi charimashcanqui.» ⁵⁰ Purishijnincunam ichanga jishpicárran. Japallantana Jesústa jaguiycárran.

⁵¹ Jesústa apacuptin, bayitawan pitushalla juc müsu jipanta aywaycaran. Chaura müsutapis chariran. ⁵² Chariptin, piturashan bayítata jaguiycur, jalapaçhalla jishpicuran.

Mayur Israel runacunapa sisyunninman Jesústa apashan

San Mateo 26.57-68; San Lucas 22.54-55, 63-71; San Juan 18.12-14, 19-24

⁵³ Chaypita mayur cüraman Jesústa aparan. Mayur cürapa wasinman cüracuna, mayur runacuna, Moiséspa shiminta yaçhajcuna shuntacaran. ⁵⁴ Pedrupis Jesúspa caru ji-pallanta aywar sawan ruricaman yaycuran. Chaychú Tayta Diosninchipa wasinta täpajcunawan mashacurcaycaran.

⁵⁵ Chaura mayur cüracuna, llapan mayur Israel runacuna Jesústa wañuchinanpaj achäquita ashircaycaran. Ichanga mana tariranchu. ⁵⁶ Achcaj tumparpis, quiquin-puralla apaycaçhänacuran. Rimashancuna mana tincuranchu. ⁵⁷ Waquin runa Jesústa tumpar niran: ⁵⁸ «Cay runash nisha: <Runacuna rurashan Tayta Diosninchipa wasinta juçhuchishaj. Jinarcur, quimsa junajllaçhu jatarachishaj runa mana aruycaptinsi.» ⁵⁹ Chaynuy nirpis, quiquin-puralla apaycaçhänacuran.

⁶⁰ Chaynuy tumpaptin, mayur Israel runacunapa ricay ñawinçhu mayur cüra jatarcur, Jesústa tapuran: «¿Manachu rimacunqui? ¿Rasunpachu rimashcanqui?» nir. ⁶¹ Jesúsmi ichanga imatapis mana rimacuranchu. Chaura mayur cüra yapay tapuran: «Mä, willamay. ¿Tayta Diosninchipa Wawanchu canqui? ¿Caçhamushan Washäcuçhu canqui?» nir. ⁶² Jesúnsna niran: «Au. Nuwam caycä. Caçhan cashpämi mandäshinäpaj Munayniyuj Tayta Diosninchita iwal jamashaj. Pucutay janançhu cutiyämujta ricamanquipaj.»*

⁶³ Chaura mayur cüra ullgucuycuran. Quiquinpa müdanantapis raçhir ushyarir, japiro: «Tistiguta mana munanchinachu. ⁶⁴ Shiminpita musyanchi Tayta Diosninchita apäriyacashanta.» Chaynuy niptin, juc shimillaraj niran: «Wañuchicächun.»

⁶⁵ Chaypita waquin runa Jesústa tuwapur ushyaran. Ñawinta chaparcur, magaran: «Tayta Diosninchipa willacujnин carga, ¿pitaj cutashcashunqui? Mä, willamay» nir. Tayta Diosninchipa wasin täpajcunapis lajyar ushyaran.

* ^{14:62} Salmo 110.1; Daniel 7.13.

*Jesústa Pedro wasguishan**San Mateo 26.69-75; San Lucas 22.56-62; San Juan 18.15-18, 25-29*

⁶⁶ Pedro sawan ruričhu caycaptin, mayur cürapa uywaynin jipash čhayaran. ⁶⁷ Mashacuycajta tarir sumaj ricapärir, niran: «Nazaret runa Jesúswan purishcanqui, ¿au?» ⁶⁸ Pedrum ichanga wasguipar, niran: «Chay runata mana ricsichu. Imatash rimacullanquipis.» Chaynuy nir puncuman llucshicuran.

⁶⁹ Chaypita uyway jipash Pedruta ricar, yapay llapanta willaran: «Cay runa Jesúspa puríshijnin» nir. ⁷⁰ Pedro yapay wasguiran. Mayllantana jinan runacunapis Pedruta niran: «Jampis Galilea runa caycanqui. Rasunpa Jesústa puríshishcanqui, ¿au?» ⁷¹ Chaura Pedro ullgucäcuran: «Chay runata mana ricsichu. ¿Piraj cacullanpis? Llullacuptiga, Tayta Diosninchi jina ñacachimächun» nir.

⁷² Niycaptillan, ishcay cutipa gällu cantariran. Chayraj Pedro yarpäriran: «Mana ricsij tucumanquipächu. Gällu ishcay cutipa manaraj cantaptillan, quimsa cutipa wasguimanquipaj» nishanta. Jesúspa shiminta yarpärir shungun ishquicäuptin, juyupa wagaran.

15*Mandaj Pilatupa dispächunman Jesústa apachishan**San Mateo 27.1-2, 11-14; San Lucas 23.1-5; San Juan 18.28-38*

¹ Pacha wararcuptin, mayur cüracuna, mayur runacuna, Moiséspa shiminta yačhajcuna jutucaran. Sisyunčhu parlanacarcärir, llapan mayur Israel runacuna Jesústa watashta mandaj Pilatuman aparan.

² Čhayachiptin, mandaj Pilato Jesústa tapuran: «¿Rasunpachu Israel runacunapa manda-jnin canqui?» nir. Jesúnsna niran: «Quiquiquim rimashcanqui.» ³ Chaura mayur cüracuna tucuy-tucuypita Jesústa tumparan. ⁴ Chaymi mandaj Pilato yapay Jesústa tapuran: «¿Imata nishuptiquipis, manachu chapacunqui?» nir. ⁵ Chaynuy niptinsi Jesús mana rimacuptin, mandaj Pilato ima ruraytapis mana camäpacuranchu.

*Jesústa rusčhu wañuchinanpaj aunishan**San Mateo 27.15-31; San Lucas 23.13-25; San Juan 18.38-19.16*

⁶ Pascua fiestačhu runacuna mañacuptin, watan-watan mandaj Pilato juc rísuta cačcharij. ⁷ Chay wichan jyu Barrabás rísu wičhgaraycaran magacushanpita, wañuchicushanpita. ⁸ Chaymi achcaj runa mandaj Pilatuta mañacuran: «Watan-watan cačharishayqui-jina juc rísuta cačchariy, ari» nir. ⁹ Chaura mandaj Pilato tapuran: «¿Israel runacunapa mandajnintachu cačharishaj? Paypa maquinčhüshi cawanqui» nir. ¹⁰ Chiquipayllawan Jesústa mayur cüracuna apashanta mandaj Pilato mayna musyaycaran. ¹¹ Mayur cüracunana achcaj runata shimiyanan: «Barrabásta cačchariy» nir mañacärinapaj. ¹² Yapay mandaj Pilato tapuran: «¿Israelcunapa mandajnin ricsishayqui Jesústa, ¿imanäshätaj?» nir. ¹³ Tapuptin, runacuna japariran: «Rusčhu wañuchicächun» nir. ¹⁴ Mandaj Pilatuna niran: «¿Imačhütaj juchata aparicusha?» Paycunam ichanga: «Rusčhu wañuchicächun» nir sumaj japarpararan.

¹⁵ Mandaj Pilato Israel runacuna alli ricananta munar, Barrabásta cačhariycuran. Jesústana sumaj wascaraycähir, murucuncunata inčhigaran rusčhu wañuchinanpaj.

¹⁶ Murucucunana mandajninpa sawanninman Jesústa yaycuchiran. Jinarcur llapan murucu-masincunata shuntachiran. ¹⁷ Jesústa pampaman čhurar puca jacuta jacuparan. Umanmanpis cashapita pilltarellular curünata jatiparan. ¹⁸ Asipänan cashpan niran: «Israel runacunapa mandajnin alli ricash caycallächun.» ¹⁹ Jananmanpis shugushwan umančhu wirur ushyaran. Tuwapuran. Jungurpacuycur, alliman čhurajtucuran.

²⁰ Pampaman čhurariycur, puca jacunta jičhuriran. Quiquinpa müdananta ushtuparcur, rusčhu wañuchinanpaj aparan.

*Jesústa rusčhu wañuchishan**San Mateo 27.32-44; San Lucas 23.26-43; San Juan 19.17-27*

²¹ Jesústa wañuchinapaj apaycashančhu Cirene marcapita Simónwan tincuran. Chacrapita cutiycämuptin, paytana Jesús apashan rusta murucucuna apachiran. Simónga Alejandrupawan Rufupa taytan caran.

²² Murucucunana «Gólgota» nishan pachaman Jesústa čhayachiran. «Gólgota» ninantam rimayninčhu: «Calabira pata» nin. ²³ Usuncachicuj jampitawan bínuta tallurcachir, Jesústa upuchiyyta munaran. Paymi ichanga mana upuranchu. ²⁴ Rusman läbaycur, murucucuna surtita jitaran Jesúspa müdananta mayganinpis apacunanpaj.

²⁵ Čhajčha intiman mana čhayaptillan, rusman Jesústa läbaran. ²⁶ Imapita wañuchishanpis musyacänanpaj rus jananman isquirbiran: «Cayga Israel runacunapa mandajnin» nir.

²⁷ Jesústawan ishcaj suwatapis iwal rusman läbaran: jucninta diričha-caj lädunman, jucnintana isquirda-caj lädunman.

²⁸ Chaynuypa Tayta Diosninchí isquirbichishan čharcuran: «Juchačhu arujta-jina runacuna ricanga» nir.*

²⁹ Chay quinranpa purij runacunapis Jesústa pampaman čhuraran. Ashllishpan umanta awir niran: «Jamga Tayta Diosninchipa wasinta jučhurachir, quimsa junajllatash jatarachinqui, ¿au? ³⁰ Canan mä, wañuypita jishpiy. Ruspita mä, yarpamuy.»

³¹ Mayur cüracunapis, Moiséspá shiminta yačhajcunapis Jesústa pampaman čhurar, quiquin-pura ninacuran: «Payga waquin runacunata jishpichishačhi. Quiquinpis jishpiyta mana junchu. ³² Tayta Diosninchipa cačhamushan Washäcuj caycarga, Israelpa mandajnin carga, ruspita yarpamunman. Yarpamuja ricarraj, shiminta čhasquicushun.» Rusman ishcaj läbaraj runapis Jesústa ashllir ushyaran.

*Jesús wañushan**San Mateo 27.45-56; San Lucas 23.44-49; San Juan 19.28-30*

³³ Chaypita lasdüsipita mallwaycaman pacha chacacäcuran. ³⁴ Mallwayna Jesús japačhacuran: «Eloí, Eloí, ¿lammá sabactani?» nir. Rimayninčhu: «Eloí, Eloí, ¿lammá sabactani?» ninanga: «Taytallau Tayta, ¿imanirtaj jaguiraycamashcanqui?» ninanmi.*

³⁵ Japačhacuptin, wiyajcuna niran: «Mä, wiyyashun. Tayta Diosninchipa unay willacujnin Elíastačhim jayacuycan.» ³⁶ Juc runana shigui bínuman shaputa ushmarcachir shugushman watarcur, Jesústa shuguchiyyta munaran. Shuguchishpan niran: «Mä, ricapāshun. Rasunpachush Elías shamunga ruspita jurgunapaj.» ³⁷ Jesúsmi ichanga sumaj jeparir, wañucäcuran.

³⁸ Wañucäcuptin, Tayta Diosninchipa wasinčhu chaparaj bayítapis janapita uraypa callacäcuran. ³⁹ Imanuy wañucäcushantapis ricar, murucucunapa capitannin niran: «Cayruna rasunpa Tayta Diosninchipa Wawan casha.»

⁴⁰ Warmicunapis carushllapita ricapaycaran. Ricapaycaran Magdalena marcapita Mariapis, shullca-caj Santiagupawan Josépa maman Mariapis, Salomépis. ⁴¹ Paycuna Jesústa yanapar purishiran Galilea marcacunačhu puriptin. Jesúswan Jerusalén marcaman aywaj warmicunapis achcaj ricapaycaran.

*Jesústa pampashan**San Mateo 27.57-61; San Lucas 23.50-56; San Juan 19.38-42*

⁴² Diyawardaman čhayanán junaj chacanaycaptin, ⁴³ Arimatea marca José mana manchacullar mandaj Pilatumán aywaran: «Jesústa pampachicushaj» nir. Payga mayur cürapa mandäshij-masin carpis, Tayta Diosninchipa maquinčhu juyayta munaran.

* ^{15:28} Isaías 53.12. Waquin unay Bibliačhu cay birsiculu mana taricanchu. * ^{15:34} Salmo 22.1.

⁴⁴ Pampachicunanpaj mañacuptin, mandaj Pilato yarpačhacuran: «¿Wañushanachuraj?» nir. Chaymi jayarcachir, murucucunapa capitanninta tapuran. ⁴⁵ «Au, wañushanam» niptin, mandaj Pilato Joséta auniran: «Pampachicuy, ari» nir.

⁴⁶ Auniptin ruspita ayata jurgurcur, rantishan bayítawan José pituran. Jinarcur runa pampacunan chaga učhcuman čhuraycuran. Učhcum puncutana rumiwan chaparcuran.

⁴⁷ Mayman pampashantapis ricapaycaran Magdalena marca Maríawan Josépa maman María.

16

Jesús cawarimushanpita willacushan

San Mateo 28.1-10; San Lucas 24.1-12; San Juan 20.1-10

¹ Diyawarda ushyarcuptin, Magdalena marcapita María, Santiagupa maman María, mama Salomé ayata chaquichij pirjümita rantiran. ² Dumingu warariycaptillan, Jesús pamparashanman aywaran: ³ «¿Piraj chaparaj rumita witichipämäshun?» nir.

⁴ Čhayaptin jatun carpis, rumi witiraycaranna.

⁵ Pamparashan učhcuman yaycuriptin, diricha-caj lädunčhu achic-achicyaycaj yuraj müdanash müsu jamaraycaran. Chayta ricar, warmicuna mancharicäcuran.

⁶ Manchariptin, müsu niran: «Ama manchariychu. Ruschu wañuj Nazaret marca Jesústa ashircaycanqui, ¿au? Cayčhu pamparash carsi, mana cannachu. Mayna cawarisha.

⁷ Canan cuticuy. Jesúspa purišijnincunata willar, Pedrutasi ninqui: «Galilea quinranman ñaupashana. Quiquin nishannylla chayčhu tincunquipaj.» » ⁸ Warmicunana manchariywan sicsicyaycar jishpicuran. Manchariyllawan imatapis mana willacuranchu.

Magdalena marcapita Mariata Jesús ricaripushan

San Juan 20.11-18

⁹ Chaura dumingu tuta waraycaptillan, Jesús cawarimuran. Cawarcamur, puntata Magdalena marcapita Mariata ricaripurán. Paypita jančhis supayta jargush caran.

¹⁰ Jesúspa purišijnincuna juyupa llaquicur wagarcaycaptin: «Jesús ricaripamasha.

¹¹ Cawaycan. Rasunpa ricashcä» nir María willaptinsi, mana yupachicuranchu.

¹² Chaypita ishcaj purišijnincuna čhacrapa aywaycaptin, juc-nirajnash Jesús ricaripuran. ¹³ Paycunapis purišij-masincunata willaran: «Jesús ricaripamasha» nir. Willaptin-pis, mana yupachicuranchu.

Purišijnincunata Jesús cačhacushan

San Mateo 28.16-20; San Lucas 24.36-49; San Juan 20.19-23

¹⁴ Chaypita čunca jucwan (11) purišijnincuna micupacurcaycaptin, Jesús ricaripurán. Piñacuran: «Cawarimushäta willaycäshuptiqui, ¿imanirtaj mana yupachicamashcanquichu? ¿Imanirtaj chucru shungu carcaycanqui?» nir.

¹⁵ Jinarcur niran: «Canan chay-tucuy marcacunaman ayway. Tayta Diosninchipa alli willacuyninta llapanta willapäcunqui. ¹⁶ Pipis yupachicamar ushyacur, alli cawayta taringa. Mana yupachicamajcunatam ichanga Tayta Diosninchchi ñauquinga. ¹⁷ Pipis yupachicamar, Tayta Diosninchchi camacächiyinpa supaycunata jargunga. Juc-niraj rimaycunata rimanga. ¹⁸ Wañuchicuj curucunata charirpis, wañuchicuj jampita upurpis, mana wañungachu. Maquinwan yataptin, jishyačhucunapis allchacangam.»

Janaj pachaman Jesústa shuntacushan

San Lucas 24.50-53

¹⁹ Jesús willapäcurniptin, janaj pachaman Tayta Diosninchchi shuntacuran. Payta mandäshinanpaj diricha-caj lädunman Tayta Jesús jamacuran.

²⁰ Purishiñincunana Jesúspita chay-tucuyčhu willapäcuran. Willapäcunananpaj Tayta Jesús sumaj yanaparan. Ima-imatapis rurananpaj camacächiran. Shiminta wiyar, rurashancunata ricar, runacuna Jesús willapäcushancunata tantiyacuran.

Jesúspa willapanta San Lucas willacushan

Tantiyacunanchipaj:

Lucas cay librutapis, Hechos librutapis isquirbiran. Payga jampicuj caran. Jesúspita tantiyachicunancapaj sumaj tapucachärir isquirbiran. Jesúspita Pablo willapäcuptinpis, purishiran.

Cay libruta «Teófilo» nishan runapäshi Lucas isquirbiran. «Teófilo» ninanga: «Tayta Diosninchita manchapacuj» ninan. Chaynuy captin, juc runallaman isquirbishanta mana musyanchichu. Waquin yačhajcuna nin: «Tayta Diosninchita manchapacujcuman isquirbisha.»

Lucas isquirbiran:

Tayta Teófiluta wamayashanpita: *San Lucas 1.1-4.*

Ushyachicuj Juan yurishanpita, Jesús yurishanpitawan wiñashanpita: *San Lucas 1.5-2.52.*

Jesús willapäcuya jallaycushanpita, ushyacushanpita, Supay maquichacuya camashanpita: *San Lucas 3.1-4.13.*

Galilea quinranéhu Jesús willapäcushanpita, Tayta Diosninchchi camacächiyninpa imata rurashanpita: *San Lucas 4.14-9.50.*

Jerusalén marcapa aywar Jesús willapäcushanpita, Tayta Diosninchchi camacächiyninpa imata rurashanpita: *San Lucas 9.51-19.44.*

Jerusalén marcačhu Jesús caycashanpita: *San Lucas 19.45-21.38.*

Jesústa ñacachishanpita, wañuchishanpita, cawarachimushanpita, janaj pachaman shuntacushanpita: *San Lucas 22.1-24.53.*

Jallarinan

¹⁻⁴ Tayta Teófilo, nuwa Lucas cay libruta isquirbiycämü jallaycunancapita-pacha Jesúspa willapanta sumaj musyanayquipaj. Paypa willapanta achcaj runa isquirbiran ricajcunata tapucurir-tapucurir. Ricajcunata quiquinuncunata Jesús cačhacuran Tayta Diosninchipa shiminta willapäcur purinanpaj. Chaymi nuwapis cay libruta isquirbiycämü camacächiypa imanuy cashancunatapis sumaj tapucachärir. Cay libruta liguir, llapan willapäshushayqui rasun cashanta, mana rasun cashantapis musyanquipaj.

Juan yurinanta anjil musyachicushan

⁵ Judea marcacuna mandaj Herodespa maquinéhu caycashan wican Zacarías jutiyuj cüra caran. Warmin caran Isabel. Paycunapa auquillunpis cüra caran. Zacarías caran Abías cüra casta. Warmin Isabelna caran Aarón cüra casta. ⁶ Zacaríaswan Isabel Tayta Diosninchipa shiminta wiyacur, cuyay-munaypaj cawaj. ⁷ Chaypis Isabel wawata mana tarij warmi cashpan wamran mana caranchu. Jananmanpis ishcan chacha caran.

⁸ Zacarías arunan junaj čhayamuptin, Abías cüra-masinwan Tayta Diosninchipa wasinman aywaran. ⁹ Cüra-masincuna yačhacashan-jina surtita jitaptin, Zacaríasman čhayaran. Chaymi Tayta Diosninchipa wasin rurinman Zacarías yaycuran insinsuwan saumachinanpaj. ¹⁰ Insinsuwan saumachishancaman jawallačhu runacuna Tayta Diosninchita mañacurcaycaran. ¹¹ Saumaycächiptin, Tayta Diosninchchi cačhamushan anjil ricaripurán insinsuta rupachicuna tullpapa diricha-caj lädunčhu.* ¹² Zacarías juyupa mancharicäcuran. Ima ruraytasi mana camäpacuranchu.

¹³ Anjil niran: «Zacarías, ama manchacamaychu. Mañacushayquita Tayta Diosninchchi wiyasha. Warmiqui Isabel ullgu wamrata jishyacunga. Jutinta: ‘Juan’ nir čhurapanqui.

¹⁴ Jatunpa cushicachishunquipaj. Wamrayqui yuriptin, achcaj runa cushicungapaj.

* ^{1:11} «Diricha-caj lädunčhu» nishanta Israel runacuna tantiyaj alli ricash cashanta.

¹⁵ Tayta Diosninchipa ricay ñawinčhu wamrayqui allillata ruranga. Manasi yurillar, Espíritu Santupa maquinčhu cawanga. Imaypis mana mačhanmanchu. ¹⁶ Israelmasiquicunata anyapanga juchanpita wanacunananpaj, Tayta Diosninchita wiycunananpaj. ¹⁷ Unay willacuj Eliás-jina cawanga. Maquinčhu purichir munayniyuj cananpaj Tayta Diosninchchi sumaj yanapanga. Chaynuy cawashpan Tayta Diosninchchi cačhamushan Washäcujtapis ñaupapämunga. Wamrayqui willapäcuptin, runacunapis wamrancunawan llaquinacäringa. Rumi shungucunapis Tayta Diosninchita wiycäringa. Chayraj llapan runa Tayta Diosninchchi acracushan runata camaricushalla shuyaranga. Acracushan runa Washäcuj canga.»

¹⁸ Chaura anjilta Zacarías tapuran: «Rasunpa wamrä cananta, ¿imanuyparaj musyashaj? Auquinna caycä, warmipis chachana» nir. ¹⁹ Anjilna niran: «Tayta Diosninchipa cačha-anjilnin caycä. Paypa ñaupančhu puri. Gabrielmi jutü. Quiquin cačhamasha alli willapata willapänajpaj. ²⁰ Cananga shimita mana čhasquicushayquipita wamrayqui yurinancaman rimaytapis mana pashtachinquipächu. Chaypis rimashäga čharcunga.»

²¹ Chaycaman runacuna puncučhu shuyarpaycaran: «¿Imanirraj Zacarías mana llucshimunchu?» nir. ²² Tayta Diosninchipa wasinpita llucshiramur, Zacarías rimayta mana pashtachiranchu. Maquillanwan tantiyachiyyta munaran. Chaymi runacuna tantiyacuran ruričhu imasi ricaripushanta.

²³ Tayta Diosninchipa wasinčhu ima ruraynintapis ushyaycur, wasinman Zacarías cuticuran. ²⁴ Chaypita warmin Isabel jishyaj ricacur, pichga quilla wasillančhu cacuran.

²⁵ Shungullančhu niran: «Tayta Diosninchchi yanapämasha wamrata tarinäpaj. Cananga mana pipis pampaman čhuramangachu.»

Jesús yurinanta anjil musyachicushan

²⁶ Sujta quillaryujna Isabel jishyaj caycaptin, Tayta Diosninchchi anjil Gabrielta cačharan Galilea quinrančhu Nazaret marcaman Mariata willachij. ²⁷ María runa yatäni caycar, Joséwan majachacänanpaj parlaraycächiran. José caran unay mandaj Davidpa willcan.

²⁸ Anjil ricariparcur, niran: «María, ¿allillachu caycanqui? Alli ñawinwan Tayta Diosninchchi ricashcashunqui. Maquinčhu cawaycanqui.» ²⁹ Chaura María mancharicäcuran: «¿Imanirraj chaynuy niman?» nir.

³⁰ Anjilna niran: «María, ama manchacuychu. Alli ñawinwan Tayta Diosninchchi ricasunqui. ³¹ Jishyaj ricacunquipaj. Ullgu wamrayqui yuringapaj. Jutintapis: ‹Jesús› nir čhurapanqui. ³² Mayur runa canga. Llapan runa ninga: ‹Llapanta Camaj Tayta Diosninchipa Wawan.› Auquillun David mandashan-jina mandaj cayman Tayta Diosninchchi čhuranga. ³³ Jacobpa willcan Israel runacuna maquinčhu cawanga. Mandaj cayninpita imaypis mana llucshingachu.»

³⁴ Anjiltana María tapuran: «Runa yatäni caycar, ¿imanaypataj wawata taríman?» nir. ³⁵ Anjilna niran: «Jishyaj ricacunayquipaj Llapanta Camaj Tayta Diosninchchi camacächiptin, Espíritu Santu čhayapushunquipaj. Llantucurcushunquipaj. Chaymi Tayta Diosninchchi acracush captin, wamrayquita ninga: ‹Tayta Diosninchipa Wawan.›

³⁶ Tiyayqui Isabelpis chachana caycarsi, jishyaj caycan. Wawaynaj cashanpita pampaman čhurash captinpis, sujta quillana pačhayuj caycan. ³⁷ Tayta Diosninchipaj imapis mana sasachu. Payga llapallanta camacächin.»

³⁸ Mariana anjilta niran: «Tayta Diosninchipa maquinčhu cawä. Nishayquinylla camacächun.» Chaynuy niptin, anjil aywacuran.

Isabelta María watucushan

³⁹ Chaypita María juclla camaricuriycur, puntan-puntan Judá quinrančhu juc marcaman aywaran. ⁴⁰ Zacaríaspa wasinman čhayar, tiyan Isabelta wamayaran. ⁴¹ María wamayaptin pačhančhu caycällar, Isabelpa wamra cuyuriran. Espíritu Santu rimachiptin sumaj cushicushpan wiychipaypa Isabel niran: ⁴² «María, chay-chicaj warmi captinsi,

ima allish Tayta Diosninchchi jamlata acracushcashunqui. Wamrayquitapis acracusha. Ishcaniquita yanapayculläshunqui. ⁴³ ¿Imaraj carä Washäcuja maman watucamänanpäga? ⁴⁴ Watucamar shimiuita wiyapti, wamräsi cushicuylawan pačhäčhu cuyuriran. ⁴⁵ Tayta Diosninchipa shiminta aunishayquipita cushish cawai-aywanqui.»

- ⁴⁶ Chaura María niran:
«Lapan shungüwan Tayta Diosninchita alliman čhurä.
- ⁴⁷ Jatunpa cushicü. Tayta Diosninchchi Washäcuji.
- ⁴⁸ Runacuna pampaman čhuramaptinsi, Tayta Diosninchchi llaquipämasha.
Cananpita llapan runa ninga:
«Ima allish Tayta Diosninchchi Maríata acracusha. Imaraj cushicun.»
- ⁴⁹ Mana tantiyashäcunata Munayniuj Tayta Diosninchchi camacächisha.
Payga manchapacuypämi. Imatapis allillata ruran.
- ⁵⁰ Manchapacujcunata imaypis Tayta Diosninchchi llaquipan.
- ⁵¹ Munayniuj cayninwan imatapis camacächin.
Sumaj-tucujcunata mashtaypa-mashtar ushyarin.
- ⁵² Alli-tucuj mandajcunata jargun.
Pampaman čhurashcunata alliman čhuran.
- ⁵³ Puchuy-puchuy janančhu cawajcunata pishipacuymán čhuran.
Pishipacuycchu cawajcunata puchupacushancaman tarichin.
- ⁵⁴ Maquinčhu cawaptinchi, Israel runa-masintiña yanapaycäman.
Imaypis llaquipaycämanchi.
- ⁵⁵ Auquillü Abrahamta aunishan-jina,
willcancunata aunishan-jina imaypis mana jungamangachu.
Canancamanpis yanapaycäman.»
- ⁵⁶ Quimsa quilla-yupay tiyan Isabela wasinčhu María juyaran. Jinarcur wasinpa cuticuran.

Ushyachicuj Juan yurishan

⁵⁷ Quillan čhayamuptin, Isabel ullgu wamranta jishyacuran. ⁵⁸ Jishyacuptin, castancunapis, ricsinacushancunapis watucuran. Jatunpa cushicuran: «Ima allish Tayta Diosninchchi yanapashcashunqui wawata tarinayquipaj» nir.

⁵⁹ Wamra pusaj junayuj captin yačhachishancunata čharcur, mallwata jiruran.* Papäninpa jutinwan tincunananpaj: «Zacarías» nir jutichayta munaran. ⁶⁰ Maman niran: «Maná. Juanmi jutinga.» ⁶¹ Runacunam ichanga niran: «Juan jutiyuj castayquicunapis mana canchu.» ⁶² Chaymi ima jutinta čhurapänanpäpis maquillanwan tantiyachir, Zacaríasta tapuran. ⁶³ Tapuptin, papilta mañarcur: «Juanmi jutin» nir isquirbiran.* Chaura llapan mancharicäcuran. ⁶⁴ Zacaríasnra rimariran. Tayta Diosninchita alliman čhuraran.

⁶⁵ Chaura Zacaríaspas castancuna, Isabela castancuna sumaj manchariran. Rimay čhayaptin, Judea quinrančüpis runacuna manchariran. ⁶⁶ Chay willapata mayar, yarpačhacuran: «¿Imapäraj Isabela wamran yurisha? Llapan alli ricanga» nir. Isabela wamranta Tayta Diosninchchi yanapaycashanta llapan runa musyaran.

Zacarías Tayta Diosninchita alliman čhurashan

⁶⁷ Espíritu Santu rimachiptin Tayta Diosninchchi yarpashanta musyachicur, Zacarías niran:

⁶⁸ «Ima allish Tayta Diosninchchi Israel runacunata mana junganchu.
Payga shamusha nuwanchita jishpichimänanchipaj.

* **1:59** Čhacračhu uywata jirur, catpin rinrinta, waquin čhupanta. Chay-jina Israel runacunapis Tayta Diosninchipa shiminta čharcur, ullgupa ishpacunarpa jarachanta cuchuparij. * **1:63** Unay Bibliačhu nin: «tabla.» Israel runacuna tacshalla tablaman papil-nirajta lagaj isquirbinanpaj papil mana captin.

- 69 Wiyacuj Davidpa castallanpita
munayniyuj runata jatarachisha washämänanchipaj.
- 70 Chaynuy cananpaj unay willacujnincunawan Tayta Diosninchi musyachicuran.
- 71 Musyachimaranchi ñacachicuj runacunapita washämänanchitapis,
chiquicuj runacunapita jishpichimänanchitapis,
72 auquillunchicunata llaquipar aunishanta ñarcucänantapis.
- 73 Auquillunchi Abrahamta Tayta Diosninchi auniran
74 allilla cawananchipaj,
chiqui runacunapita jishpichimänanchipaj.
- Maquinchu cawaycar,
75 shungun yarpashallanta rurashunpaj.
- Wañuyman ñhayashanchicaman llapan juchapita wanacushunpaj.»
- 76 Wamran Juanta Zacarías niran:
«Wawallau wawa, jamta:
 ⟨Llapanta Camaj Tayta Diosninchipa willacujnин nishunquipaj.
 Washäcuja ñaupapanquipaj.
 Runacunata willapanquipaj Washäcuja shuyaränanpaj.
 77 Tantiyachinquipaj: ⟨Tayta Diosninchi juchanchita jungaycur, washämäshunpaj
 nir.»
- 78 «Inti jigamuptin pacha achicyashan-jina shungunchipis achicyacäcunga llaquipäcuj
 Tayta Diosninchi Washäcuja caáchamuptin.
- 79 Tayta Diosninchita mana wiyacur, llapanchi wañuy jananchu cawaycanchi.
Washäcuj shamurmi ichanga, alli cawayta tarichimäshun. Yanapämäshun Tayta Dios-
 ninchipa maquinchu manchapacur cawananchipaj.»
- 80 Chaura wiñashanman-tupu Juan runayaran. Espíritu Santu shacyächiptinpis, Tayta
Diosninchipa shungun munashannuyla cawaran. Ichanga yatalla tiyacuran. Tayta
Diosninchipa shiminta Israel-masincunata willapayta jallaycurraj llapan ricay puriran.

2

Jesús yurishan

San Mateo 1.18-25

1-2 Jesús yurishan wican mandaj Augusto llapan Roma marcacunata maquinchu
puriycächiran. Siria marcata ricananpána mandaj Quirinuta ñurash caran. Paymi
Israelcunatapis yupachiran mandaj Augusto: «Maquiúchu juyaj runacunata llapanta
yupachiy» niptin.

3 Ypacänanpaj llapan runa yurishan marcanman-caman cutiran. 4-5 Chaymi Josépis
warmin Maríawan aywaran Galilea quinranchu Nazaret marcapita Judá quinranchu
Belén marcacaman. Chay marca unay auquillun Davidpa marcan caran. Davidpa
yawar-masin cashpan Josépis Belén marcaman aywaran. Warmin María quillanchüna
caycaran.

6-7 Belén marcachu pachacuna wasi mana jäcuptin, uywacunapa wasillanman
pachacuran. Nanay chariptin, jichpanta María jishyacuran. Inchanawan piturcur
jinallanchu wamranta ujllacurcuran.

Uyshürucunata anjil ricaripushan

8 Chay chacay Belén wajtanchu uyshürucuna uyshancunata täparcaycaran. 9 Tayta Dios-
 ninchichi caáchamuptin, illajpita anjil achic-achicyaycar ricaripurán. Achicyacurcuptin,
uyshürucuna juyupa manchariran.

10 Anjil niran: «Ama manchacamaychu. Alli willapata apamushcä. Cay willapata
wiyar, achcaj runa cushicäringa. 11 Mandaj Davidpa marcanchu Jishpichicujniqui yur-
isha. Paymi Washäcujniqui, Taytayqui. Payta Tayta Diosninchi caáchamusha maquinchu

purichishunayquipaj, imapitapis washäshunayquipaj. ¹² Mä, ayway. Chayar, uywapa wasinčhu inčhanawan pintushta tarir, willashaj rasun cashanta tantiyacunquipaj.»

¹³ Anjil willaycaptillan, illajpita chay-chicaj anjilcuna ricacamuran. Tayta Diosninchita llapan alliman čhuraran: ¹⁴ «Janaj pachačhu Tayta Diosninchchi alli ricash cay-cullächun. Cay pachačüpis wiyacuj runacuna allilla cawachun» nir.

¹⁵ Anjilcuna janaj pachaman cuticuptin, uyshirucuna ninacuran: «Juclla Belén marcaman aywashun. Tayta Diosninchita willachimashanchita ricamushun.» ¹⁶ Juclla Belén marcaman aywar, rasunpa Josétawan Mariata tariran. Mallwa wamrantapis uywacunapa wasillančhu ujllaraycaran. ¹⁷ Mallwa wamrata tariycur, willaran: «Cay mallwa yurinanpaj mayna anjil musyachimaran» nir. ¹⁸ Uyshirucuna willaptin, llapan sumaj cushicäriran. ¹⁹ Maríam ichanga llapantapis shungunman čhuracuran mana jungananpaj.

²⁰ Uyshirucuna anjil nishallanta tariycur, Tayta Diosninchita alliman čhuraycar cushish cuticuran.

²¹ Chaypita pusaj junajyuja mallwa wamrata jirur, maman-taytan jutinta čhuraparan: «Jesús» nir. Jutichananpaj manaräsi jishyaj ricariptillan, Mariata anjil musyachirunaj.

Tayta Diosninchipa wasinman mallwa Jesústa apashan

²² Jishyacushanpita awicunan junaj čhayamuptin Moiséspá shiminta čharcur, majantin María Jerusalén marcaman aywaran. Wamrantapis aparan Tayta Diosninchipa maquinman čhuraj. ²³ Moiséswan Tayta Diosninchita shiminta musyachiran. Shiminčhu nin: «Jichpa ullgu wamrata Tayta Diosninchipa maquinman čhuranqui.»*

²⁴ Jananmanpis nin: «Cuyachicuyniquitapis apanqui ishcay pülla palumata, manchäga ishcay wampata.» Chaymi Maríawan José Tayta Diosninchipa shiminta čharcuran.

²⁵ Chay wican Jerusalén marcačhu Simeón jutiyuj runa tiyan. Tayta Diosninchipa ricay ñawinčüpis, runa-masincunapa ricay ñawinčüpis alli cawaran. Israel-masintinta Tayta Diosninchita jishpichinantapis shuyäcuycaran. Payga Espíritu Santu maquinčhu cawaj. ²⁶ Chaymi Espíritu Santu shacyächiptin, Tayta Diosninchita cačhamushan Washäcuja ricashancaman cawananta musyaran. ²⁷ Espíritu Santu shacyächiptin, Tayta Diosninchipa wasinman aywaran. Maríawan Josépis Tayta Diosninchipa shiminta čharcur. ²⁸ Maríawan José tincur Jesústa margacurcur, Simeón Tayta Diosninchita alliman čhuraran:

²⁹ «Taytallau Tayta, maquiquičhu cawaycä.

Allina wañucümanpis.

Shimiquitapis čharcushcanquina.

³⁰ Ñawíwan Washäcuja ricashcä.

³¹ Washäcuja cačhamushayquita llapan runa musyanga.

³² Pí cashayquitapis jäpa runacuna tantiyacunga.

Israel-masicunapis alli ricash cayta taringa» nir.

³³ Simeónpa shiminta wiyar, Joséwan María tantiyayta mana atiparanchu: «Imanuyraj canga, ¿au?» nir. ³⁴ Paycunata Tayta Diosninchipa maquinman čhurar, Simeón niran: «María, wiyamay. Wawayqui waquin Israel-masinchicunata alli cawayta tarichingapaj. Waquintam ichanga llaquicuyman čhayachingapaj. Tayta Diosninchchi cačhamush captinsi, shiminta willaptinsi, runacuna wasguinga. ³⁵ Llapan runata imallata yarpashantapis musyapanga. María, cuchillu tucsishushayqui-jina shunguyquipis nanangaraj llapanta ricaptiqui.»

³⁶ Tayta Diosninchipa wasinčhu chacha warmi Anapis caycaran. Papänin caran Fanuel. Auquillun caran Aser. Chacha Anaga Tayta Diosninchipa willacujnin caran.

* ^{2:23} Éxodo 13,2, 12.

Janchis watalla majanwan juyaycuran. ³⁷ Majan wañucuptin, piwanpis mana yapapacurannachu. Manchäga pagas-junajpis Tayta Diosninchipa wasillanchu cawaj. Manchapacur, ayünaj. Mañacuj. Payga pusaj chunca chuscuwan (84) watatana aywaycaran. ³⁸ Simeón rimayta ushyarcuptin Anana Jesústa ricar, Tayta Diosninchita alliman churaran. Juturpaj runacunata niran: «Cay mallwa nuwanchi-raycur shamusha. Washäcujnинchi. Jerusalén marcantinchita jishpichimäshunpaj.»

³⁹ Joséwan María Tayta Diosninchipa shiminta llapanta charchuriycur, wasinman cuticuran. Paycunapa wasin Galilea quinran Nazaret marcaéhu caran. ⁴⁰ Wawanpis wiñashanman-tupu runayaran. Yarpayninmanpis chayaran. Llaquipashpan Tayta Diosninchipis sumaj yanapaycaran.

Tayta Diosninchipa wasinchu yačhajcunawan Jesús parlanacushan

⁴¹ Jesúspa maman-taytan watan-watan aywaj Jerusalén marcaman Pascua fiestaman. ⁴² Chunca ishcaywan (12) watayyuj caycaptin, Jesústapis Pascua fiestaman pusharan. ⁴³ Pascua fiesta ushyaptin, marcanpa cuticäriran. Jerusalén marcaéhu Jesús caycashantam ichanga maman-taytan mana musyaranchu. ⁴⁴ Manchäga runacunawan tallucash aywaycashanta yarparan.

Juc junaj aywaycashanchu castancunata tapucur, ricsinacushancunata tapucur, Jesústa ashiran. ⁴⁵ Ashirpis mana tarir, Jerusalén marcacaman cuticuran. ⁴⁶ Quimsa junajtaraj Tayta Diosninchipa wasinchu Moiséspa shiminta yačhajcunawan tapunacur-caycajta Jesústa tariran. ⁴⁷ Tapunacuptin Jesús allipa cutichiptin, runacuna cushicuran.

⁴⁸ Tapunacuycajta tariycur, maman-taytanpis tantiyayta mana atiparanchu. Maman niran: «Wawallau, ¿imanirtaj cayta ruramashcanqui? Papániquian ishcani yarpačhacuycar ashiycashcaj.» ⁴⁹ Jesúnsna niran: «Mama, ¿imanirtaj ashiycämashcanqui? ¿Manachu musyanqui Papániipa wasinchu caycänäta?» ⁵⁰ Paycunam ichanga imata rimashantapis mana tantiyaranchu.

⁵¹ Chaypita Nazaret marcaman maman-taytanwan Jesús cuticuran. Maman-taytanta wiyyacuran. Mamanga Jerusalén marcaéhu Jesús imata rurashantapis shungunman churacuran.

⁵² Chaura wiñashanman-tupu Jesús yarpay-sapayaran. Tayta Diosninchipis, runamasincunapis alli ñawinpa ricaran.

3

Jesúspita Ushyachicuj Juan willacushan

San Mateo 3.1-12; San Marcos 1.1-8; San Juan 1.19-28

¹⁻² Ushyachicuj Juan chunyaj pachaéhu tiyashan wican chunca pichgawan (15) watana llapan Roma marcacunata Tiberio César mandaycaran. Paymi Judea marcacunata Poncio Pilatupa maquinman churaran. Galilea marcatana Herodespa maquinman churaran. Itureawan Traconítide marcatana Herodespa wauguin Felipupa maquinman churaran. Abilene marcatana Lisaniaspa maquinman churaran. Israel runacunana Anáspawan Caifáspa maquinchu cawaran. Paycuna Jerusalén marcaéhu mayur cüra caran. Chay wican Zacaríaspa wamran Juanta Tayta Diosninchí niran: «Shimiña willacamuy.»

³ Chaymi Jordán mayu quinranchu Juan anyapäcuran: «Tayta Diosninchipa shiminta wiyyacäriy. Juchapita wanacäriy. Ushyacäriy. Chayrämi Tayta Diosninchí llapan juchayquita junganga» nir. ⁴ Anyapäcuran unay willacuj Isaíaspa shimin charcucänanpaj. Payga unayna niran:

«Chunyajchu juc runa jayacuypa willacuycan:
⟨Taytanchi shamenanpaj camaricuy.
Caminuta pichay.

Wicsu caminucunatapis allchay.

⁵ Mana camaricurga, rajra-rajra-jina caycanqui.

Punta-punta-jina caycanqui.

Wicsu-wicsu caminu-jina caycanqui.

Chaymi llapan juchapita wanacäriy.

⁶ Tayta Diosninchí caáchamushan Washäcuja llapan runa ricanga.

Washäcuja jishpichimäshun» nir.»*

⁷ Ushyacuj ćhayajcunata Juan nirán: «Supaya wawancuna, ushyacurpis juchallaćhu aruptiqui, Tayta Diosninchí ñacachishunquipaj. Mana jishpinquipächu. ⁸ Wanacushayqui musyacänanpaj Tayta Diosninchita manchapacur allillata rurar caway. Ama chapacunquichu: Israelcunata Abrahampá willcan cashanchipita Tayta Diosninchí alli ricamanchi» nir. Abrahampá willcan cananpágä rumitapis Tayta Diosninchí ticrarachinman wiyacuj cananpaj. ⁹ Ushyacurpis juchapita mana wanacuptiqui, Tayta Diosninchí jargurishunquipaj. Yüratapis mana sumaj wayuptin, jächawan muturij-muturijllana shuyaranchi. Muturir, ninaman jaycurinchi.»

¹⁰ Chaura runacuna Juanta tapuran: «¿Imatataj ruráman?» nir. ¹¹ Tapuptin, Juan nirán: «Ishcay janapay müdanayqui captin, juc-cajta pishipacujta juycunquiman. Micuy captin, ashija tarichinquiman.»

¹² Roma marcapa mandajninpaj jillayta shuntajcunapis tapucuran: «Tayta, ¿imatataj ruráman?» nir. ¹³ Juanna nirán: «Aycatapis shuntanayquipaj nishallanta shuntanquiman.» ¹⁴ Waquin murucucunapis tapucuran: «¿Imatataj ruráman?» nir. Juanna nirán: «Jillayta jurgunayqui cashallan runacunata ama manchachinquichu. Pitapis ama tumpanquichu. Mandajniqui págashushallayquita aypächicunqui.»

¹⁵ Runacuna shungullanéhu yarpaćhacuycaran: «Juanga Tayta Diosninchí caáchamushan Washäcuji canga, ¿au?» nir. ¹⁶ Chaymi Juan nirán: «Mana Washäcuju cä. Nuwa yacullawan ushyachicuyca wanacushayqui musyacänanpaj. Washäcuju ichanga Espíritu Santuwanpis, ninawanpis ushyachishunquipaj. Payga munayniyuj. Llanguinta llushtipyllatapis manchapacü. ¹⁷ Wanacujcunata alli ñawinwan Tayta Diosninchí rican. Juchaćhu arujcunatam ichanga mana upij ninaman jaycuringa. Sumaj tantiyacärinquiman. Ríguta wapyarpis, punshanta ruparachin. Muruntam ichanga wasinman shuntacun.»

¹⁸ Ushyachicuj Juan Tayta Diosninchipa shiminta sumaj willapäcuran. Runacunata tucuy-jinanpa shacyächiran. ¹⁹ Mandaj Herodestam ichanga sumaj piñacuran wauquin Felipupa warmin Herodíasta jičhushanpita, juchallaćhu arushanpita. ²⁰ Piñacuptin, mandaj Herodes Juanta wičhgachiran. Wičhgachir, jucha aparicushanpa jananmanpis mastaraj juchata aparicuran.

Jesústa Juan ushyachishan

San Mateo 3.13-17; San Marcos 1.9-11

²¹ Mandaj Herodes manaraj wičhgachiptillan, runacunata ushyaycächishanéhu Jesústapis Juan ushyachiran. Ushyacuriycur, Tayta Diosninchita Jesús mañacuycaran. Niycaptillan, janaj pacha quićhacäcamuran. ²² Espíritu Santu paluma-niraj Jesúsman ćhayamuran. Janaj pachapita nimuran: «Cuyay Wawämi canqui. Shungüman sumaj tincunqui.»*

Jesúspa unay auquilluncunapita musyachicushan

San Mateo 1.1-17

²³ Quimsa ćhunca (30) watata aywaycashanćhürat Tayta Diosninchipa shiminta willapäcyta Jesús jallaycuran. Runacuna yarparan: «Jesúsga Josépa wamranmi canga» nir.

* **3:6** Isaías 40.3-5. * **3:22** Waquin Bibliaćhu nin: «Cananmi cawachishcraj.»

Josépa papänin caran Helí.

²⁴ Helípa papäninna caran Matat.

Matatpa papäninna caran Leví.

Levípa papäninna caran Melqui.

Melquípa papäninna caran Janaí.

Janaípa papäninna caran José.

²⁵ Josépa papäninna caran Matatías.

Matatíaspá papäninna caran Amós.

Amóspa papäninna caran Nahúm.

Nahúmpa papäninna caran Eslí.

Eslípa papäninna caran Nagai.

²⁶ Nagaipa papäninna caran Maat.

Maatpa papäninna caran Matatías.

Matatíaspá papäninna caran Semeí.

Semeípa papäninna caran José.

Josépa papäninna caran Judá.

²⁷ Judápa papäninna caran Joanán.

Joanánpa papäninna caran Resí.

Resípa papäninna caran Zorobabel.

Zorobabelpa papäninna caran Salatiel.

Salatielpa papäninna caran Nerib.

²⁸ Neribpa papäninna caran Melqui.

Melquípa papäninna caran Adí.

Adípa papäninna caran Koram.

Koramapa papäninna caran Elmada.

Elmadapa papäninna caran Er.

²⁹ Erpa papäninna caran Jesús.

Jesúspa papäninna Eliecer.

Eliecerpa papäninna caran Jarim.

Jarimpa papäninna caran Matat.

³⁰ Matatpa papäninna caran Leví.

Levípa papäninna caran Simeón.

Simeónpa papäninna caran Judá.

Judápa papäninna caran José.

Josépa papäninna caran Jonán.

Jonánpa papäninna caran Eliaquim.

³¹ Eliaquimpa papäninna caran Milea.

Mileapa papäninna caran Mená.

Menápa papäninna caran Matatá.

Matatápa papäninna caran Natán.

³² Natánpa papäninna caran David.

Davidpa papäninna caran Jesé.

Jesépa papäninna caran Obed.

Obedpa papäninna caran Booz.

Boozpa papäninna caran Salomón.*

Salomónpa papäninna caran Najaón.

³³ Najaónpa papäninna caran Aminadab.

Aminadabpa papäninna caran Admín.

Admínpa papäninna caran Arní.

* **3:32** Waquin Bibliačhu Salomónpaj nin: «Sala.»

Arnípa papäninna caran Esrón.
 Hesrónpa papäninna caran Farés.
 Faréspa papäninna caran Judá.
³⁴ Judápa papäninna caran Jacob.
 Jacobpa papäninna caran Isaac.
 Isaacpa papäninna caran Abraham.
 Abrahampa papäninna caran Tara.
 Tarapa papäninna caran Najor.
³⁵ Najorpa papäninna caran Seruc.
 Serucpa papäninna caran Ragau.
 Ragaupa papäninna caran Falec.
 Falecpa papäninna caran Eber.
 Eberpa papäninna caran Sala.
³⁶ Salapa papäninna caran Cainam.
 Cainampa papäninna caran Arfaxad.
 Arfaxadpa papäninna caran Sem.
 Sempa papäninna caran Noé.
 Noépa papäninna caran Lamec.
³⁷ Lamecpa papäninna caran Matusalén.
 Matusalénpa papäninna caran Henoc.
 Henocpa papäninna caran Jared.
 Jaredpa papäninna caran Malaleel.
 Malaleelpa papäninna caran Cainam.
³⁸ Cainampa papäninna caran Enós.
 Enóspa papäninna caran Set.
 Setpa papäninna caran Adán.
 Adánta Tayta Diosninchí camaran.

4

*Jesústa Supay maquichacuyta camashan
 San Mateo 4.1-11; San Marcos 1.12-13*

¹ Jordán mayupita llucshirir, Espíritu Santupa maquinchú Jesús puriran. Chunyaj pachaman Jesústa Espíritu Santu aparan. ² Chuscu čhunca (40) junaj micuyta mana mallir, Jesús yargaran. Supay maquichacuyta munar ³ niran: «Tayta Diosninchipa Wawan car, cay rumita tantaman mä, ticrarachiy.»* ⁴ Chaynuy niptin, Jesús niran: «Tayta Diosninchipa shimin nin: «Runa mana tantallawanchu cawan.»»*

⁵ Chaypita jatunnin puntaman Jesústa Supay aparan. Jatun marcacunata imaycancunatawanpis ricachiran. ⁶ Jinarcur niran: «Ricashayqui marcacunata mandanayquipaj čhurajman. Ima-aycancunapis nuwapam. Cay marcacunapis nuwapam. Maquičhu charä. Munar, pitapis juycümanmi. ⁷ Ñaupáman jungurpaycur alliman čhuramaptiqui, llapan marcacunata juycushayqui.» ⁸ Jesúsna niran: «Tayta Diosninchipa shimin nin: «Tayta Diosnillanchita manchapacunquiman. Paypa maquillančhu cawan-quiman.»»*

⁹ Chaypita Jerusalén marcaman Jesústa Supay aparan. Tayta Diosninchipa wasinpa siswanman ičhichiran. Jinarcur niran: «Tayta Diosninchipa Wawan car, pachaman mä, jigacurpuy. ¹⁰ Tayta Diosninchipa shimin nin: «Tayta Diosninchí anjilnincunata

* ^{4:3} Deuteronomio 8.3. * ^{4:4} Unaypita-pacha waquin Biblia yapan: «Manchäga Tayta Diosninchipa shiminta wiyacur cawan» nishanta. Waquin Bibliačhu mana yapanchu. * ^{4:8} Deuteronomio 6.13.

caáchamunga washäshunayquipaj. ¹¹ Chaquiqui rumiman mana tacacunapäpis maquinwan charishunquipaj. »* ¹² Jesúsna niran: «Tayta Diosninchipa shimin nin: ‹Tayta Diosninchita maquichacuya ama camanquimanchu.›»*

¹³ Jesústa maquichacuya mana camäpacur, Supay aywacuran: «Imayllaga maquichacushayquiraj» nir.

Jesús willapäcuya jallaycushan

San Mateo 4:12-17; San Marcos 1:14-15

¹⁴ Espíritu Santupa maquinchhu cawashpan Galilea marcacunaman Jesús cuticuran. Chay-tucuychhu runacuna Jesúspa willapanta mayaran. ¹⁵ Shuntacäna wasicunačhu Tayta Diosninchipa shiminta Jesús willapäcuptin, runacuna sumaj cushicuran: «Allita yačhachicun, ¿au?» nir.

Nazaret marcačhu Jesús willapäcushan

San Mateo 13:53-58; San Marcos 6:1-6

¹⁶ Wiňashan Nazaret marcaman Jesús čhayaran. Diyawarda junaj shuntacäna wasiman yačhacashannylla aywaran. Tayta Diosninchipa shiminta liguinanpaj ičhicuycuran.

¹⁷ Unay willacuj Isaías isquribishan libruta macyaran. Libruta quičhar liguiy munashanta tarir, liguiran:

¹⁸ «Maquinchhu Espíritu Santu purichiman.

Pishipacujcunata alli willapata willapänäpaj čhuramasha.

Cačhamasha ñacajcunata willapänäpaj,

japracunapa ñawinta quičhanäpaj,

juyu runapa maquinchhu cawajcunata washänäpaj.

¹⁹ Cačhamasha: ‹Canan watapita-pacha Tayta Diosnинchi llaquipämanchi› nir willapänäpaj.»*

²⁰ Liguiyta ushyaycur, libruta wičhgarcuran. Libru macyaj runata cutiyachiran. Jinarcur tantiyachinanpaj jamacuycuran. Llapallan juturajcuna ricapacurcuran.

²¹ Willapäcur Jesús niran: «Liguishä canan junajmi čharcusha. Tayta Diosninchipa unay willacujnin nuwapaj yarpar isquribiran.»

²² Jesús sumaj alli rimaptin, llapan runa cushicushpan alli ricaran. Waquinmi ichanga pampaman čhurar niran: «Cayga Josépa wamrallan, ¿au?» ²³ Jesúsna niran: «Rimay purishan-jinačhi: ‹Jampicuj carga, quiquiraj allchacanquiman› nimänayquipaj carcaycanqui, ¿au? ¿Imanirtaj yarparcaycanqui: ‹Cafarnaún marcačhushi jishyačhucunata allchacächishcanqui. Cayčüpis allchacächinquiñan› nir?»

²⁴ «Sumaj tantiyacunquiman. Yurishan marcačhu Tayta Diosninchipa willacujnincunata marca-masincuna pampaman čhuran. Ricaytapis mana munanchu. ²⁵⁻²⁶ Sumaj tantiyacunquiman. Unay willacuj Elías cawashan wican tamya mana shicwaptin, quimsa wata pullan mučhuy caran. Chaypis Israel biyüdacunata Tayta Diosninchipa mana yanaparanchu. Manchä Sidón quinrančhu Sarepta marcacaman willacujnin Elíasta cačharan biyüdata yanapänänpaj. ²⁷ Unay willacuj Eliseo cawashan wicanpis Israel runacuna achcajmi jaračhu jishyawan cawaran. Chaypis Israel runacunata mana allchacächiranchu. Manchä Siria runa Naamánllata mana Israel runa captinsi, Tayta Diosninchipa allchacächiran.»

²⁸ Jesús tincupaptin, shuntacäna wasinčhu juturajcuna chigaypa ullgucaycäriran.

²⁹ Ullguyllawan Jesústa aparan chagapita jitarpuycunapaj. Paycunapa marcan pata janančhu caycaran. ³⁰ Tangarinanpaj apaycaptin runacunapa ricay ñawinpita llucshir, Jesús aywacuran.

* **4:11** Salmo 91:11-12. * **4:12** Deuteronomio 6:16. * **4:19** Isaías 6:1-2.

Supay puclacushan runata Jesús allchacächishan
San Marcos 1.21-28

³¹ Galilea quinrančhu Cafarnaún marcaman čhayar, diyawardacunačhu Tayta Diosninchipa shiminta Jesús willapäcuran. ³² Sumaj willapäcuptin, runacuna sumaj cusicäriran: «Jesús willapäcushan shungunchiman sumaj čhayan» nir.

³³ Shuntacäna wasíchu supay puclacushan runapis caycaran. Supay rimachiptin, japarir niran: ³⁴ «Ačhačhau, Nazaret runa Jesús. ¿Imatataj ashiycanqui? ¿illarachimajchu shamushcanqui? Pi cashayquitapis musyä. Tayta Diosninchipa Wawan canqui. Paypa acracuynin canqui.» ³⁵ Jesúsna piñacuran: «Upälla supay. Chay runata cačharyi» nir. Chaura llapan ricay runata sajtarillar, supay aywacuran. ³⁶ Runa allina caycashanta ricar, llapan runa juyupa mancharicäcuran. Jucnin-jucnin ninacuran: «¿Imatataj ricanchi? ¿Imatataj wiyanchi? Payga munayniyujtaj. Juc shimilla supaycunatapis jargun. Jarguptin, aywacun» nir. ³⁷ Chay quinrančhu Jesús ima-imá rurashanpis mayacaran. Quiquin-pura runacuna willanacäriran.

Simónpa suydanta Jesús allchacächishan
San Mateo 8.14-15; San Marcos 1.29-31

³⁸ Shuntacäna wasipita Simónpa wasinman Jesús aywaran. Čhayaptin, willaran: «Simónpa suydan wayllaywan jishyaycan. Allchacächiy, ari» nir. ³⁹ Lädunman ashuycur jishyata piñacuriptin, wayllay cačharyicuran. Chaura jatarcur, yanucuriycuran jaranan-paj.

Jishyachucunata Jesús allchacächishan
San Mateo 8.16-17; San Marcos 1.32-34

⁴⁰ Chacanaycaptin: «Diyawarda ushyashana» nir jishyačhucunata Jesúsman apamuran. Maquinwan Jesús yataycuptin, llapan jishyačhucuna allchacäcuran. ⁴¹ Waquin runapita supaycunatapis jarguran. Supaycuna llucshir japariran: «Jesús, Tayta Diosninchipa Wawanmi canqui» nir. Jesúsmi ichanga piñaparan. Tayta Diosnинchi cačhamushan Washäcu cashanta musyaptin, mana rimachiranchu.

Galilea marcacunačhu Jesús willapäcushan
San Marcos 1.35-39

⁴² Chaca-chacalla marcapita llucshir, chunyaj pachaman Jesús aywaran Tayta Diosninchita mañacuj. Chaypis achcaj runa ashiran. Taripar, niran: «Tayta, ama aywacuychu, ari.» ⁴³ Jesúsmi ichanga niran: «Tayta Diosninchichi shuyarämashanchita juclä marcacunačhüpis willapäcunä. Payga maquinčhu cawananchita munan. Shungun munashanta willapäcur purinäpaj cačhacamasha.»

⁴⁴ Chaymi Judea quinrančhu marcan-marcan Jesús puriran. Shuntacäna wasicunačhüpis Tayta Diosninchipa shiminta willapäcuran.

5

Purishinanpaj piscädu chariycunata Jesús jayashan
San Mateo 4.18-22; San Marcos 1.16-20

¹ Genesaret püsü cantunčhu Jesús willapäcuptin, chay-chicaj runa jutucaj Tayta Diosninchipa shiminta wiyananpaj.* Runacuna quiquin-pura tacanacujraj. ² Yacučhu ishcay bütü ičhiraycaja Jesús ricaran. Piscädu chariycuna bütipita yarpurir, ridinta tacsharcaycaran. ³ Bütitä ricar, Simónpa bütinman jigaran: «Simón, bütiquiwan washanijman apamay» nir. Jinarcur büticahu jamacuycullar, llapan runata willapäcuran.

⁴ Rimayta ushyarcur, Simónta niran: «Simón, püsü čhaupinman aywashun. Piscäduta charinayquipaj jundunnin yacuman ridiquita jitanquiman-llapa.» ⁵ Simónna niran: «Tayta, warayllata piscapäcushcä. Ichanga mana jucnayllatapis charishcächu. Chaypis

* ^{5:1} Genesaret püsupa juc-caj jutin Galilea püsü caran.

shimiquita wiyar, mä, yapay ridita jitashaj.» ⁶ Jesúspa shiminta wiyanur ridinta yacunman jitar, änit may-may piscäduta chariran. Ridinpis račhinasharaj. ⁷ Chaymi piscädü charij-masincunata maquinwan Simón jayaran. Chaura juc-caj bütitapis aparan yanapänanpaj. Juc-caj bütita čhayachiptin, ishcan bütiman piscädü juntaran. May-may piscäduta wiñaptin, bütipis yacuman challpunaycaran.

⁸⁻¹⁰ Chay-chica piscäduta ricar, Simón Pedro, Juan, Jacobo, yanapajnincunapis mancharicäcuran. Simón Pedruna Jesúspa ñaupanman jungurpacuycur, niran: «Tayta, manchacujmi. Witicunquiman. Jucha-sapa car, ñaupayquičhu caytapis pingacü.»

Jesúsna niran: «Simón Pedro, ama manchariychu. Piscäduta charishayqui-jina runacunata shuntanquipaj Tayta Diosninchipa maquinčhu cawananpaj.» ¹¹ Chaura jinan üra bütita yacupa pallganman ičhiycachir llapan imancunatapis jaguiriycur, Jesúswan aywacuran.

Jaračhu jishyaj runata Jesús allchacächishan

San Mateo 8.1-4; San Marcos 1.40-45

¹² Juc marcačhu Jesús caycaptin, jaračhu jishyawan runa čhayapuram. Ñaupanman uysucuycuran: «Tayta Jesús, llaquipämashpayqui allchacaycachillämay, ari. Tayta Diosninchipa ricay ñawinčüpis alli cayta munä» nir. ¹³ Llaquipashpan maquinwan yataycur, Jesús niran: «Llaquipajmi. Allchacayna.» Niptin, jaračhu jishya illaricäcuran. Allchacäcuran. ¹⁴ Jinarcur Jesús niran: «Ama pitapis willapanquichu. Manchäga allina cashayquita ricashunayquipaj cüraman ayway. Moiséspa shiminta ēharcur, cuyachicuyniquitapis Tayta Diosninchita jaray. Chayraj llapanpa ricay ñawinčhu alli canquipaj.»

¹⁵ «Ama willanquichu» niptinsi, Jesúspa willapan chay-tucuyčhu mayacaran. Tayta Diosninchipa shiminta wiyatia munar, allchacayta ashir, may-may runacuna shuntacaran. ¹⁶ Achcaj shuntacaptinsi, chunyaj pachaman Jesús witicuj Tayta Diosninchita mañacunanpaj.

Cumllucash runata Jesús allchacächishan

San Mateo 9.1-8; San Marcos 2.1-12

¹⁷ Juc junajčhu Jesús willapäcuptin, fariseucunapis, Moiséspa shiminta yačhaj runacunapis jamarpaycaran. Paycunaga Galilea marcacunapita, Judea marcacunapita, jinan Jerusalén marcapita shamuran Jesúspa shiminta wiyananpaj. Tayta Diosninchchi camacächiptin, jishyačhucunata Jesús allchacaycächiran. ¹⁸⁻¹⁹ Waquin runana quirmallawan cumllucash runata čhayachiran. Ichanga wasi junta runa caycaptin, Jesúspa ñaupanman yaycuchiya mana camäpacuranchu. Chaymi wasi jananman ji-garcur tijata ashuraycächir, učhcuriycäriran. Jinarcur Jesúspa ñaupanman warcuyllapa quirmantinta yarpuchiran. ²⁰ Paycuna llapan shungunwan yupachicushanta musyar, cumllucash runata Jesús niran: «Wawallau wawa, juchayquicunata jungashcäna.»

²¹ Chaura fariseucunawan Moiséspa shiminta yačhajcuna shungullančhu ullguran: «¿Imanaycantaj cay runa? Tayta Diosninchita apäriyacan. Juchanchita Tayta Diosnillanchi junganman» nir.

²² Yarpashanta musyar, Jesús tapuran: «¿Imanirtaj llutanta yarparcaycanqui? ²³ Mä, tapushayqui. ¿Allchacächichyu, jucha aparicushanta jungacächichyu sasa? ²⁴ Canan tantiyacunquiman. Tayta Diosninchchi cay pachaman cačhamasha. Munayniyujmi cä pipa juchantapis jungacächinäpaj.»* Cumllucash runatana niran: «Mä, wiyanay. Jatariy. Quirmayquita shuntacurcur, wasiquiman cuticuy.» ²⁵ Cumllucash runana llapan

* ^{5:24} Daniel cawashan wican Israel runacunata maquinčhu Babilonia runacuna purichiran. Ñacachiran. Israel runacunana jishpiyta munaran. Marcanta llaquiparan. Daniel 7.13-ta liguir, juc washäcuj runata Tayta Diosninchchi cačhamunanta tantiyarmi ichanga cushicuran. Washäcujtana shuyaran. Jesúsnra Daniel isquivbishanta yarpärir, musyachicuran Tayta Diosninchipa cačhan cashanta, washäcuj cashanta. Chayta musyachicuptin, castillänučhu nin: «el Hijo del Hombre».

ricay jataricurcuran. Quirmanta apacurcur, wasinman cuticuran: «Ima allish Tayta Diosninchí allchacächimasha» nir.

²⁶ Llapan runacunapis jatunpa cusicuran. Tayta Diosninchita alliman churaran: «Canan ricashanchicunata mana imaypis ricashcanchichu» nir.

Levita Jesús jayashan

San Mateo 9.9-13; San Marcos 2.13-17

²⁷ Chaypita llucshircur, Leví jutiyuj runata Jesús ricaran. Levíga Roma marcapa mandajninpaj jillayta shuntaycaran. Ricar, Jesús niran: «Leví, puríshimay.» ²⁸ Niptin llapan imantapis jaguiriycur, Jesústana Leví puríshiran.

²⁹ Levípa wasinchéuna Jesústa alliman churar, sumaj micupäcuran. Jillayta shuntajmasinwanpis, waquin chay-niraj runacunawanpis micurcaycaran. ³⁰ Fariseucunawan Moiséspa shiminta yačhajcunam ichanga Jesústa pampaman churar puríshijnincunata tapuran: «¿Imanirtaj jillayta shuntaj chiqui runacunawan, juchačhu arujcunawan micupäcunqui?» ³¹ Jamuraptin, Jesúspis niran: «Jishyačhucunallah jampicujta ashin. Mana jishyarga, mana ashinchu. ³² Chay-jina nuwapis juchačhu arujcunata Tayta Diosninchiman cutichij shamushcä. Juchaynajmi cä» nijcunatachu mana ashiycä.»

Ayünupita tapunacushan

San Mateo 9.14-17; San Marcos 2.18-22

³³ Waquin runa Jesústa tapucuran: «Tayta, Ushyachicuj Juanpa puríshijnincunapis, fariseucunapa puríshijnincunapis ayünashpan Tayta Diosninchita mañacuj. Puríshijniquicunam ichanga pačhanta mana yargächinchi» nir. ³⁴ Chaynuy niptin quiquinman tincuchicur, Jesús niran: «Warmi ashishjcuna manash llaquishachu ayünan. Manchäga cushishash micupacärin. ³⁵ Warmi ashij müsuta jičhuptinshi ichanga, ayünangapaj. Jatunpas llaquicungapaj.»

³⁶ Yapay tincuchiypa willapar, Jesús niran: «Mauca müdanata mushuj račhipawan manash pipis jiranmanchu. Mushujwan jiraptin, jintishpan mauca müdanatapis shiullirachinshi. Mushuj müdanapis učhcucäcunshi. ³⁷ Bínuta puguchinanpäpis manash pipis chaquish jaracha putuman wiñanmanchu. Bínú pugur, chaquish jaracha pututa pashtarachinshi. Pashtaptin, bínupis ushyacäcunshi. Jaracha putupis račhicäcunshi. ³⁸ Llullu jaracha putuman wiñaptinshi ichanga, bínú sumaj pugun. ³⁹ Pugush bínuta malliycur, shigui bínuta pipis manash upunnachu: «Pugush bínú sumaj mishquin» nir.»

6

Diyawardačhu ríguta shipishan

San Mateo 12.1-8; San Marcos 2.23-28

¹ Juc diyawarda junaj rígu puguraycaj cantunpa puríshijnincunawan Jesús aywaycaran. Puríshijnincunaga ríguta shipircur-shipircur cupacačhärir, učhuran. ² Waquin fariseucuna tapuran: «¿Imanirtaj diyawardačhu ríguta cupacačharcaycan? Diyawardačhu Tayta Diosninchipa shiminta churcur, mana arunchichu» nir.

³ Chaura Jesús niran: «¿Auquillunchi David imata rurashantapis manachu musyanqui? Tayta Diosninchipa shiminta liguiycarsi, ¿yargaywan David imata rurashantapis manachu tantiyacushcanqui? ⁴ Yargay chariptin Tayta Diosninchipa wasinman yaycurir, jarashan tantanta micuran. Cüracunalla micunan caycaptinsi, yanaguincunawanraj David micupäcuran. ⁵ Tayta Diosninchí cačhamasha. Chaymi diyawardapis maquíčhu caycan. Diyawardačhu runa imata rurananpäpis, imata mičhänäpäpis maquíčhumi caycan.»

Maquin wañush runata Jesús allchacächishan

San Mateo 12.9-14; San Marcos 3.1-6

6 Juc junajpis diyawardáchu shuntacäna wasiman aywarcur; Jesús willapäcuran. Diricha-caj maquin wañush runapis caycaran. **7** Fariseucunawan Moiséspa shiminta yačhajcuna achäquita ashishpan ricapaycaran: «¿Diyawarda caycaptin, maquin wañush runata mä, allchacächingachush? Allchacächiptinga, chaylla achäqui canga» nir.

8 Fariseucunapa shungunta musyar, maquin wañush runatana Jesús niran: «Lapan ricashunayquipaj íchiy.» Maquin wañush runa änir llapan ricananpaj íchiran. **9** Jinarcur Jesús niran: «Taytacuna, tapucushayqui. Diyawarda captinsi, ¿allitachu, llutantachu rurashuwan? ¿Washäshuwanchu? ¿Wañucuchun nishuwanchu?»

10 Lapanman ricärir, maquin wañush runatana Jesús niran: «Maquiquita chutapacuy.» Chutapacuriptin, maquin allchacäcuran. **11** Diyawardaáchu allchacächishanta ricaycur, fariseucuna ullgucarcäriran. Jesústa wañurachinanpaj parlanacuran.

*Chunca ishcaywan cačhacunata Jesús acracushan
San Mateo 10.1-4; San Marcos 3.13-19*

12 Chay wichan Jesús aywaran puntaman Tayta Diosninchita mañacuj. Warayllata Tayta Diosninchita mañacuran. **13** Pacha wararcuptin, puríshijnincunata shuntaran. Llapanta shuntaycur, chunca ishcaywanta (12) acrakuran cačhacunapaj. Paycunata jutichaparan: «Cačhacuna» nir.* **14** Cačhananpaj acrakuran: «Pedro» nishan Simónta, Simónpa wauguin Andrésta, Santiaguta, Juanta, Felipita, Bartolomíta, **15** Mateuta, Tomásta, Alfeupa wamran Santiaguta, «Marcapaj nanachicuj» nishan Simónta, **16** Santiagupa wauguin Judasta, Judas Iscariotita. Judas Iscariote Jesústa wañuyman jitarpuran.*

*Achcaj jishyačhucunata Jesús allchacächishan
San Mateo 4.23-25*

17 Puntapita pampaman yarpurcur, cačhancunallawan Jesús ičhicaycäriran. Chayčhu waquin puríshijnincunapis, Judea quinran runacunapis, jinan Jerusalén runacunapis, lamar cantunčhu tiyaj Tiro runacunapis, Sidón runacunapis juturpaycaran.

18 Lapan juturpaycaran Jesúspa shiminta wiyananpaj. Jishyačhucunatapis apamuran allchacächinanta munar. Jesús llapanta allchacächiran. Supay puclacushan runacunatapis allchacächiran. **19** Chaymi pí-maypis Jesústa yatarcuya munaj. Payga munayninwan llapanta allchacächiran.

*Jesús willapäcushan
San Mateo 5.1-12*

20 Puríshijnincunata ricapärir, Jesús niran:
«Pishipacujcuna, cusicärinquiman. Tayta Diosninchí yanapaycäshunqui. Maquinčhu cawaycächishunqui.

«Yargayčhu cawajcuna, cusicärinquiman. Maquinčhu Tayta Diosninchí purichishunqui.

«Yargayčhu cawajcuna, cusicärinquiman. Shunguyqui munashantapis tarichishunqui.

«Llaquish cawajcuna, cusicärinquiman. Tayta Diosninchí yanapaycäshunqui. Cushishalla cawachishunquipaj.

22 «Wiyacamashayqui-janan runacuna chiquishuptiquisi, ashllishuptiquisi, ricayta mana munashuptiquisi, cusicärinquiman. Nuwatapis runacuna chiquimasha Tayta Diosninchí cačhamash caycaptinsi. **23** Imata rurashuptiquisi, sumaj cusicärinquiman. Tayta Diosninchí alli cawayta shuyaraycächishunqui. Unay willacujnincunata alli cawayta tarichishan-jina tarichishunquipaj. Chay wichanpis marca-masiqicuna unay willacujcunata juyupa ñacachiran.»

* **6:13** Castillánučhu Jesúspa puríshijnincunata: «discípulos» nin. Paycuna Tayta Diosninchipa shungun munashanta Jesúspita yačhacusha. Waquillanta Jesús acracusha cačha cananpaj. Cačhacunata castillánučhu nin: «apóstoles.» * **6:16** Griego rimayčhu: «Santiagupa Judasnín» niptin, waquin yačhajcuna yarpan Santiagupa wamran cashanta.

²⁴ Waquin runacunatam ichanga Jesús nirán:

«Puchuy-puchuy janančhu cawajcuna, llaquicärinqui man. Ñacayman Tayta Diosninchi chayachishunquipaj. Cay pachačhu alli cawayta mayna tarishcanqui.

²⁵ «Micuy janančhu cawajcuna, llaquicärinqui man. Yargayman Tayta Diosninchi chayachishunquipaj.

«Asicačhar cawajcuna, llaquinacärinqui man. Ñacayman Tayta Diosninchi chayachishunquipaj. Atayparaj waganquipaj.

²⁶ «Alli ricash cayllata ashijcuna, llaquicärinqui man. Ñacayman Tayta Diosninchi chayachishunquipaj. Unay wichanpis llutan willacujcunata alli ricash cayllata ashiptin, marca-masiquicuna llapanmi alli ricaran.»

Chiquicujpita willapashan

San Mateo 5.38-48; 7.12

²⁷ Puríshijnincunata Jesús nirán: «Shimīta sumaj wiycunqui man. Runacuna chiquipäshuptiquisi, llaquipanqui man. Alli ñawiquiwan ricar, yanapanqui man.

²⁸ Chapata rurashuptiquisi, Tayta Diosninchita mañacapunqui. Chiquishuptiquisi, mañacapunqui. ²⁹ Juc-caj jaillaryquičhu lajyashuptiqui, juc-cajlätana camapunqui. Punchuyquita jičhushuptiqui, camsayquitapis jaguipayucunqui man. ³⁰ Imatapis mañacushuptiqui, tarichinquiman. Jičhushuptiqui, cutichishunayquita ama shuyaranqui manchu.

³¹ «Alli ricashunayquita munashayqui-jina runa-masiquitapis alli ricanqui man.

³² Juchačhu arujcunapis yačhänacushallanwan llaquipänacun. Yačhänacushallayquiwan llaquipänacur, ¿rasunpachuraj llaquipayta yačhanqui? Mana. Aynillanta cutiycächinqui.

³³ Juchačhu arujcunapis yanapäcu-j-masillanwan yanapänacun. Yanapäcu-j-masillayquiwan yanapänacur, ¿rasunpachuraj yanapayta yačhanqui? Mana. Aynillanta cutiycächinqui.

³⁴ Juchačhu arujcunapis challicuj-masillanwan challinacun achcata čhasquiyta munar. Challicuj-masillayquiwan challinacur, ¿rasunpachuraj challicuj cayta yačhanqui? Mana. Aynillanta cutiycächinqui.

³⁵ «Chiquishuptiquisi, llaquipanqui man. Alli ñawiquiwan ricar, yanapanqui man. Pitapis chalir, cutichishunayquitaraj ama shuyaranqui manchu. Chaynuy alli cawashayquipita Llapanta Camaj Tayta Diosninchita sumaj alli ricashunquipaj. Paypa wawan cashayquipis musyacanga. Payga llapan runata llaquipan juchačhu aruptinsi, mana imasi jucuptinsi. ³⁶ Tayta Diosninchita alli shungu cashan-jina llapan runata llaquipanqui man. Aynillanta cutiycächinqui.»

Jamurpaypita tantiyachicushan

San Mateo 7.1-5

³⁷ Jananmanpis Jesús nirán: «Runa-masiquita pampaman mana čhuraptiqui, Tayta Diosninchipis pampaman mana čhurashunquipächu. Mana llaquipänacuptiqui, Tayta Diosninchipis mana llaquipäshunquipächu. Runa-masiquipa juchanta jungaptiqui, Tayta Diosninchipis juchayquita junganga. ³⁸ Runa-masiquita llaquipar yanapaptiqui, Tayta Diosninchipis llaquipäshunquipaj. Yanapäshunquipaj. Payga ima-imata rurashanchitapis ricaycan. Llaquipänacushayquiman-tupu Tayta Diosninchipis llaquipäshunquipaj. Puchuy-puchuy imatapis tarichishunquipaj.»

³⁹ Tantiyacunapaj tincuchiypa Jesús nirán: «Japra runa japra-masinta manash pushanmanchu. Pushanacur, ishcaninshi učhcuman shicwan. ⁴⁰ Jipa wamracuna mayur runacuna yarpashanta manash yarpanrächu. Llapapaj uman aypaptinshi ichanga, mayur runacuna yarpashantana yarpanga.

⁴¹ «Juchačhu aruycar runa-masiqui llutanta ruraptin, ama jamurpanqui manchu. Quiquipa ñawiquičhu cullu jatiraycaptin, ¿jucpa ñawinpita pujrita jurgapun-quimanchuraj? Mana. ⁴² Manchäga ñawiquipitaraj culluta jurgunqui man jucpa

ñawinpita pujrita jurgapunayquipaj. Juchaynaj-tucuj carcaycanqui. Ñawiquipitaraj culluta jurgunquiman runa-masiquipa ñawinpita pujrita jurgapunayquipaj. Chay-jina juchačhu cawaycarga, jucpa juchanta ama jurgapanquichu.»

Wayuyninpita ricsichicushan

San Mateo 7.17-20; 12.33-35

⁴³ «Yüra juc casta yürapa wayuyninta mana wayunchu. ⁴⁴ Yürata wayuyninpa ric-sinchi. Durashnuta mana wangurpitachu pallanchi. Übasta mana shirapitachu pal-lanchi. ⁴⁵ Yüra-jina runacunapis ricsican. Tayta Diosninchita manchapacuj runa Tayta Diosninchipa shungun munashallanta ruran. Juchačhu aruj runam ichanga quiquinpa shungun yarpashallanta ruran. Runa shungun yarpashanman-tupu allitapis, mana allitapis riman.»

Wasi rurajcunawan tincuchishan

San Mateo 7.24-27

⁴⁶ «¿Imanirtaj: ‹Taytallau Tayta› nimarpis, shimita mana wiycunquichu? ⁴⁷⁻⁴⁸ Juc runa čhasquicamar shimita wiyacuptin, shungü munashanta ruraptin, alli wasita rurajwan tincuchi. Wasita alli rurar, chucruman čhayashancaman simintuta ujtin. Jinarcur rumiwan simintuta jallarachin. Chaymi llujlla čhayarsi, wasita mana jučhuchinchu. ⁴⁹ Shimita mana wiyacujcunatam ichanga ñushya allpallaman wasinta jatarachijwan tincuchi. Chaymi llujlla čhayar, jučhurachin. Wasinpis ushyacäcun.»

7

Capitanpa uywayninta Jesús allchacächishan

San Mateo 8.5-13; San Juan 4.43-54

¹ Runacunata willapäcuriycur, Cafarnaún marcaman Jesús cuticuran. ² Chay marcačhu Roma murucucunapa capitannin juyaran. Capitanpa cuyay uywaynin juyupa jishyay-caran. Wañunaycaran. ³ Chaymi Jesús čhayamushanta mayar, mayur Israel runacunata capitan cačhacuran: «Jesústa ruwacamuy. Uywaynita allchacächinanpaj shamuchun» nir. ⁴ Mayur runacuna Jesúzman čhayar, änir mañacuran: «Tayta, capitanta yanapaptiqui, alli canga. Uywayninta allchacächiy, ari. ⁵ Israel runa captinchisi, alli ñawinpa ricamanchi. Quiquinmi shuntacäna wasitapis rurachisha» nir.

⁶ Chaynuy niptin, capitanpa wasinpana Jesús aywäshiran. Wasiman yaycupaycaptin, mincaynincunata capitan cačharan: «Tayta Jesús, wasiman ama čhayamunquimanchu. Manacaj runa car, pingacü. ⁷ Chaymi quiqiüpis mana shamushcächu. ‹Allchacächun› niptiqui, uywaynii allchacäcunga. Mana aywanayquirächu. ⁸ Nuwapis jucpa maquinčhu juyä. Quiqiüpis maquičhu murucucunata purichü. Chaymi: ‹Shamuy› nipti, shamun. ‹Ayway› nipti, aywan. Llapan mincayni shimita wiycun» nir.

⁹ Capitanpa shimita wiyar, Jesús jatunpa cusicuran. Jatirpaj runacunatana niran: «Jäpa runa caycarsi, llapan shungunwan chay capitan manchapacaman; Israel-masinhicunam ichanga janan shungulla.»

¹⁰ Chaura capitanpa cačhancuna cuticäriran. Wasinman čhayar, capitanpa uywayninta allchacashtana tariran.

Biyüdapa wamranta Jesús allchacächishan

¹¹ Manasi aycällatana Naím marcaman Jesús aywaran. Purishijnincunapis, runacunapis may-may aywäshiran. ¹² Marcaman čhayaycashančhu chay-chicaj runa ayata apaycajwan tincuran. Juc biyüdapa japallan wamran wañush caran.

¹³ Biyüdata llaquipar, Jesús niran: «Mamallau mama, ama wagaynachu, ari.»

¹⁴ Matancajcunata ičhicachir quirmata yataycur, niran: «Müsitu, ricchapacuy.» ¹⁵ Chaura müsupis cawaricurcur, rimapacuranna. Mamantana Jesús niran: «Catay wawayqui. Cawarishana.»

¹⁶ Runacuna sumaj mancharicäcuran. Tayta Diosninchitapis alliman čhuraran: «Wawan caycaptinchi, Tayta Diosninchı yanapaycämanchı. Munayniuj willacujninta cačhamusha» nir. ¹⁷ Judea quinran runacunapis, chimpan quinrančhu tiyaj runacunapis ayata Jesús cawarachimushanta mayaran.

*Ushyachicuj Juanpa purišijnincuna tapucushan
San Mateo 11.2-19*

¹⁸ Quiquinpa purišijnincuna willaptin, Ushyachicuj Juanpis Jesús ima-imata rurashal-lanta musyaran. Chaymi ishcaj purišijninta jayarcachir, cačhacuran: ¹⁹ «Jesústa tapumuy: <Jamchush Tayta Diosninchı cačhamushan Washäcuj caycanqui? Juctarächush shuyäcärishaj?» nir. ²⁰ Juanpa cačhancuna čhayar, änir tapuran: «Tayta Jesús, Ushyachicuj Juan cačhamasha. Jamchush Tayta Diosninchı cačhamushan Washäcuj caycanqui? Juctarächush shuyäcärishaj?» nir.

²¹ Juanpa cačhancuna čhayaptin, jishyačhucunata, supay pucllacushancunata, japracunata Jesús allchacaycächiran. ²² Chaymi tapuptin, niran: «Jucta ama shuyanquimanchu. Manchäga llapan ricashayquita, llapan wiwashayquita Juanta willar ninqui: <Japracuna ricaycanna.

Wijrucunapis alli puriyacanna.

Jaračhu jishyajcunapis allchacaycanna.

Upacunapis wiwashayquita.

Wañushcunapis cawariycanna.

Pishipacujcunatapis Tayta Diosninchipa alli willapanta willapäcuyacanna.»

²³ Chaymi Tayta Diosninchipa cačhan cashäta mana wasguijcuna sumaj cusicärinman.

Imaman čhayaptinsi, paycunata Tayta Diosninchı sumaj yanapan.»*

²⁴ Chaura Ushyachicuj Juanpa cačhancuna cuticuriptin, juturashan runacunata Jesús niran: «Jamcunapis chunyaj pachaman aywar, Juanpa shiminta wiwashayquim, ¿au? Payga imatapis mana manchacujchu. Mana ishcay-quimsatachu rimaj. ²⁵ ¿Imamanraj aywashcanqui? ¿Alli müdanashtachu tarishcanqui? Mana. Alli müdanashta achic-achicyaycaj wasillačhu juyaycajta tarinqui. Jatun auturdäcunalla alli-alliga cawan. ²⁶ ¿Pi runataraj ashishcanqui? Chunyaj pachačhu Juanpa shiminta wiwashayquim, Tayta Diosninchipa willacujninin cashanta tantiyacärishcanqui. Payman waquin willacujcunapis mana tincunchu. ²⁷ Juanta cačhamunanpaj unayna Tayta Diosninchı musyachicuran. Shiminčhu nin:

<Cačheta ūaupapäshunayquipaj juc runata ūaupachishaj.

Runacunata willapäcungapaj camaricushalla shuyaräshunayquipaj» nir.*

²⁸ «Sumaj wiwashaycallämay. Chay-chicaj runa carsi, Ushyachicuj Juanman mayganpis mana tincunchu. Chaypis maygan runa mana alli ricash caycaptinsi, Tayta Diosninchipa maquinčhu cawajcunaman Juanpis mana tincunchu.

²⁹ «Juanpa shiminta wiwashayquim, runacuna llapan-yupay ushyacuran. Jillayta shuntaj chiqui runacunapis Tayta Diosninchipa shiminta čhasquir, juchapita wanacurcur ushyacäriran. ³⁰ Fariseucunawan Moiséspa shiminta yačhajcunam ichanga mana ushyacuran. Tayta Diosninchı llaquipaycaptinsi, mana wiwashayquim. Maquinčhu puriyta mana munar, wasguiparan.»

³¹ Chaymi wiyächipar Jesús niran: «Canan wican runacunata, ¿imamanraj tincuchińman?

³² Yupay-tucuj wamracunawančhi tincuchishaj. Upa wamracuna-jina mana imatapis tantiyacunchu.

<Cusicuywan jachwashun» nir quinata tucapaptinpis, mana jachwanchu.

<Llaquicuywan wagashun» niptinpis, mana waganchu.

* ^{7:23} Isaías 29.18; 35.5-6. * ^{7:27} Malaquías 3.1.

³³ «Chay-jina Ushyachicuj Juan, tantata mana micujchu. Bünutapis mana mallishachu. Chaypis Juanta ashllishcanqui: «Supay puclacusha» nir. ³⁴ Nuwatapis Tayta Diosninchi cačhamasha. Llapanta micü. Bünutapis upü. Chaypis ashllircaycämanqui: «Shincanaraycullar, pačhan-raycullar purin. Juchačhu arujcunawanpis, jillayta shuntaj chiqui runacunawanpis purin» nir. ³⁵ Imata rimarsi, Tayta Diosninchi yarpashanta pipis mana chapanmanchu. Shiminta wiyacujcunaga ricsipalla cawan.»

Fariseu runa Simónpa wasinman Jesús aywashan

³⁶ Juc junajčhu fariseu Simón jutiyuj runa Jesústa jayachiran: «Micupacuj aywashun» nir. Chaymi wasiman čhayar, Jesúspis micupacunapaj jamacuycuran. ³⁷ Jesúspis micupacuycashanta mayar, marca-pingay warmipis butilla pirjümin aptash čhayaran. ³⁸ Jesúspa čhaquinman jamacuycur, sumaj wagaran. Wiguinpis Jesúspa čhaquinta ushmaran. Ajchanwan chaquichipuran. Mucharan. Jananmanpis pirjümita jaycapuriran. ³⁹ Jayachij fariseu runana yarparan: «Tayta Diosninchipa willacujnин carga, jucha-sapa warmi cashanta Jesús musyanman. Yatananpitapis witicunman» nir.

⁴⁰ Yarpashanta tantiyar, Jesús niran: «Simón, mä, tapucusayqui.» Niptin, Simónpis niran: «¿Imallataraj, Tayta?»

⁴¹ Tincuchiypana Jesús niran: «Ishcaj runash juc runapa jagan caran. Jucnинshi pichga pačhacta (500) jaga-tucuran, jucninnash pichga čhuncallata (50). ⁴² Jagan cutichiya mana camäpacuptinshi, ishcaninta niran: «Jaganchi ushyaräcuchun. Ama cutichimaynachu» nir. Cananga mä, willamay. ¿Maygantaj jillayuj runata sumaj llaquinga?»

⁴³ Tapuptin, Simón niran: «Achcata jaga-tucush-cajchi, Tayta.» Jesúnsna niran: «Au. Rasullanta rimarcushcanqui.» ⁴⁴ Warmita ricärir, niran: «Simón, cay warmita ricacunquiman. Wasiquiman čhayamupti, čhaquita mayllacunäpaj yacuta mana camapämashcanquichu. Cay warmim ichanga wiguiwanraj čhaquita chajchurcur ajchanwan pichapämasha. ⁴⁵ Čhayamupti, mana wamayämashcanquichu. Cay warmim ichanga sumaj wamayämasha. Jamaycushäpita-pacha čhaquitaraj muchasha. ⁴⁶ Čhayamupti, umäta wirawan mana pajpapämashcanquichu. Cay warmim ichanga pirjümitaraj čhaquiman jaycapamasha. ⁴⁷ Sumaj tantiyacunquiman. Marca-pingay captinsi, warmipa juchantapis llapanta Tayta Diosninchi jungasha. Chaymi sumaj llaquipäman. Juchaynaj-tucujcunam ichanga janan shungulla Tayta Diosninchita manchapacun.»

⁴⁸ Jinarcur warmita niran: «Lapan juchayquita jungashcä.» ⁴⁹ Simónpa wasinčhu juturaj runacuna Jesúspa shiminta wiyar, yarpačhacuran: «¿Piraj cay runa? Jucha apari-cushantapis jungacächin» nir. ⁵⁰ Jesúnsna warmita niran: «Yupachicamashayquipita Tayta Diosninchipa maquinčhüna cawaycanqui. Paymi yanapäshunqui allilla cawanayquipaj. Cuticuyna.»

8

Jesústa yanapaj warmicunapita rimashan

¹ Marcan-marcan purir čhunca ishcaywan cačhancunawan Jesús willapäcuran: «Maquinčhu cawananchipaj Tayta Diosninchi shuyaraycämanchi» nir. ² Allchacächishan warmicunapis Jesústa yanapar puriran. Magdalena Maríapis purishiran. Paypita jančhis supayta Jesús jargush caran. ³ Susanapis, Juanapis, waquin warmicunapis purishiran. Juanaga mandaj Herodespa capuralnin Cuzapa warmin caran. Warmicunaga charashancunawan Jesústa tarichiran.

Murupacujman tincuchiypa willapashan

San Mateo 13:1-9; San Marcos 4:1-9

⁴ Juc junajčhu chay-tucuy marcapita runacuna jutucaran Jesústa ricäcunapaj. Chay-chicajta ricar tincuchiypa willapar, Jesús niran:

⁵ «Juc runash murupacuj aywaran. Machiptinshi, waquin muru caminuman ́hayasha. Caminuman ́hayajta runacuna lluchcar ushyasha. Pichuysacunapis pashacurcusha.

⁶ Waquin murunash jarapshu allpaman ́hayasha. Jarapshu captinshi juclla wiñarsi, chaquicäcusha. ⁷ Waquin murunash shata-shataman ́hayasha. Shata atayäcurcurshi, muru wiñamujtapis jarwashtärachisha. ⁸ Waquin murunash alli allpaman ́hayasha. Sumajshi wayusha. Waquin juc murullapitash juc paćhacta (100) wayusha.»

Willapäcuriycur, wiyächipapya Jesús niran: «Rinriyujmi canqui. Tantiyacunquiman.»

Tincuchiypa willapashanpita tantiyachishan

San Mateo 13.10-17; San Marcos 4.10-12

⁹ Purishiñinincuna Jesústa tapuran: «Tincuchiypa willapäcushayquita mä, tantiyachimay» nir. ¹⁰ Jesúsnra niran: «Mayna tantiyachishcaj: ‹Maquinchhu cawananchipaj Tayta Diosninchu shuyaraycämanchi› nir.* Paypa shungun munashanta sumaj tantiyachishcaj. Mana wiyacujcunatam ichanga tincuchiyllapa tantiyachí wiyaycarpis, ricaycarpis, mana tantiyacunapaj.

Murupacujpita tantiyachishan

San Mateo 13.18-23; San Marcos 4.13-20

¹¹ «Tincuchiypa willapashäta sumaj tantiyacuy. Muruga Tayta Diosninchipa shiminwan tincun. ¹² Caminuna chucru shungu runawan tincun. Chucru shungucuna Tayta Diosninchipa shiminta wiyarpis shungunman mana ́hayaptin, mana tantiyacunchu. Chaymi yangalla tantiyacushallantapis supay jungaycachin Tayta Diosninchipa witicunapaj. Witicur, Tayta Diosninchita mana wiyacunchu. Maquinchüpis mana cawanchu. ¹³ Jarapshu allpana janan shungu runawan tincun. Paycuna cushi-cushilla Tayta Diosninchipa shiminta ́chasquicun. Chaypis mana sapichashan-jina janan shungulla. Chaymi Tayta Diosninchita wiyacushan-janan ñacaycuna ́hayapuptin, witicurin. Mana ičhipunchu. ¹⁴ Shata wiñanan allpana tincupacaj runawan tincun. Paycuna Tayta Diosninchipa shiminta wiyan. Wiyarsi, imapäpis alläpa yarpaćhacur, jillayllata ashir, shungun munashallanta ashir, tincupacan. Chaymi Tayta Diosninchipa shiminta wiyash carsi, Tayta Diosninchipa shungun munashanta mana ruranchu. ¹⁵ Alli allpana wiyacuj runawan tincun. Paycuna alli shungu cashpan Tayta Diosninchipa shiminta sumaj tantiyacur, manchapacur cawan. Ñacarpis, Tayta Diosninchipa mana witicunchu. Chaymi juc murulla alli wayushan-jina allita rurar cawan.»

Achquiwan tincuchiypa willapashan

San Marcos 4.21-25

¹⁶ Jananmanpis Jesúsnra niran: «Achquita ratarcachir, manash pipis manca rurinman, cäma ́chaquinman ́churanmanchu. Manchäga patacmansi ́churan llapanta achiçyänapaj. ¹⁷ Willapashätapis imayllasi llap-llapanmi tantiyacunga. Mana pacacangachu. ¹⁸ Chaymi sumaj tantiyacunquiman. Wiyacuptin, pitapis Tayta Diosninchu sumaj tantiyachinga. Mana wiyacujcunatam ichanga ichicllata tantiyashallantapis, jungaycachinga.»

Mamanwan wauguincuna Jesústa ashishan

San Mateo 12.46-50; San Marcos 3.31-35

¹⁹ Rimaycaptillan, Jesúspa mamanwan wauguincuna ́hayaran. Ichanga achcaj runa caycaptin, tincuya mana camäpacuranchu. ²⁰ Chaymi juc runa willaran: «Tayta Jesú, mamayquiwan wauguiquicunash jawačhu shuyarpaycäshunqui. Jamwan tincuytash munaycan» nir. ²¹ Jesúsnra niran: «Tayta Diosninchipa shiminta wiyacujcunaga pii-maypis mamäwan wauguicunawanmi tincun.»

* **8:10** Isaías 6.9-10.

*Wayranpawan tamyata Jesús ́chawachishan
San Mateo 8.23-27; San Marcos 4.35-41*

²² Juc junajchú: «Yacu püsuta chimpashun» nir puriñshijnincunawan-ima Jesús bütiman jigaran. ²³ Aywarcaycashanchú Jesús puñucäcuran. Puñucäushancaman shucucuy wayra ricacamusha. Yacu büchiypa-büchir bütiman yaycuycaran. Wañuy jananchú caycaran. ²⁴ Chaura puriñshijnincuna Jesústa ricchachiran: «Tayta Jesús, wañuy jananchichüna» nir. Jatarcur, yacutawan wayrata Jesús piñacuran. Piñacuptin, shucucuy wayra ́chawacäcuran. Yacupis puñucäcuran.

²⁵ Puríshijnincunatana niran: «¿Imanirtaj mancharinqui? ¿Janan shungullachu Tayta Diosninchiman yupachicunqui?» Puríshijnincuna quiquin-pura parlanacäriran: «¿Piraj cay runa? Piñacuriptin, shucucuy wayra ́chawacäcun. Yacupis puñucäcun» nir.

*Geresa quinranchú supay pucllacushan runata Jesús allchacächishan
San Mateo 8.28-34; San Marcos 5.1-20*

²⁶ Püsuta chimpar, Geresa quinranman puriñshijnincunawan Jesús ́chayaran.* Chay quinran Galilea marca chimpanchú caran. ²⁷ Bütipita llucshiriptin, Geresa runa Jesústa ́chayapuram. Chay runa supaypa maquinchú purir, jalapačhalla puricuj. Wasičhüpis mana juyajchu. Manchäga pantyunllačhu juyäcuj. ²⁸ Jesústa ricar ñaupanchú jungurpacuycur, japariran: «Llapanta Camaj Tayta Diosninchipa Wawan Jesús, ¿imanirtaj ashipämanqui? Ama ñacaycachimaychu» nir.

²⁹ Jesús jarguptin, supaycuna japarish caran. Pucllacush captin, runa juyuyash caran. Cadinawan maquin-čhaquinta wancurcur runa täpaptinpis, račhirij. Chunyaj pachamanpis supay apacuj.

³⁰ Chaura: «¿Imanirtaj ashipämanqui?» niptin, Jesús tapuran: «¿Imataj jutiqui?» nir. Tapuptin, chay-chicaj supay cashpan: «Batallun jutü» niran. ³¹ Jesústa llapan supay mañacuran: «Chacaj pachaman ama jitarpaycamaychu, ari» nir. ³² Chagapa janallanchú chay-chica cuchi pagupacurcaycaran. Chaymi supaycuna Jesústa mañacuran: «Cay runata cačharir, cuchicunatana pucllacushaj» nir. Chaynuj mañacuptin, Jesús auniran. ³³ Auniptin runata cačhariycur, cuchicunata pucllacuran. Cuchicunana jishyayar, cha-gapita yacuman jigapurcuran. Shugupacaypa llapan wañuran.

³⁴ Chaura chayta ricar, cuchi michijcuna juclla marcanman jishpicäriran. Aywaycur, ́chacracunačhüpis, marcačhüpis imallata ricashantapis llapanta willacuran. ³⁵ Runacuna ricäcuj aywacullaran. Jesúsman ́chayar, supaycuna pucllacushan runata allchacashta tariran. Müdanashana caycaran. Jesúspa ñaupallanchú jamaraycaran. Chaynujta ricaycur, juyupa manchariran.

³⁶ Ricajcuna ́chayamuj runacunata willaparan supay pucllacushan runata Jesús imanuypa allchacächishantapis. ³⁷ Geresa marca runacuna manchacur, Jesústa niran: «Tayta, cay marcapita aywacuy, ari.» Niptin bütiman jigarcur, cuticuran.

³⁸ Mana llucshiptillan, allchacaj runa Jesústa mañacuran: «Pushacamay, Tayta» nir. Jesúsna ³⁹ niran: «Mana camacanchu. Wasiquiman cuticuy, ari. Llapan runata willapanquiman: Tayta Diosninchi yanapämasha» nir.» Chaura marcanman cutircur, willacuran: «Jesús allchacächimasha» nir.

*Jairupa wamrantapis, yawar-apaywan jishyaj warmitapis Jesús allchacächishan
San Mateo 9.18-26; San Marcos 5.21-43*

⁴⁰ Chaura püsü chimpanman Jesús ́chayaptin, shuyaj runacuna sumaj cushicuran.

⁴¹ Niycaptillan, Jairo ́chayaran. Payga shuntacäna wasičhu mayur runa caran. Jungurpacuycur, Jesústa mañacuran: «Tayta, wasiinan aywashun. ⁴² Japallan warmi wamrä wañucuycan. ́Chunca ishcaywan watayujllarämi» nir.

* ^{8:26} Chay quinranta waquin runa ricsij: «Geresa» nir; waquinna: «Gadara» nir.

Jairuwan aywaycaptin achcaj runa aywar, Jesústapis quićquiparan. ⁴³ Čunca ishcaywan watana yawar-apaywan jishyaj warmipis tallucash aywaycaran. Warmiga jampicujcunawan jampicur, imancunatapis ushyapacaran. Pipis mana allchacächiranchu. ⁴⁴ Chaymi jipallanpita tariparcur, Jesúspa müdananta yataycuran. Yataycuptillan, yawar-apaynin čawacäcuran. ⁴⁵ Chaura Jesús tapucuran: «¿Pitaj yataycamasha?» nir. Niptin, llapan runa niran: «Mana nuwachu. Mana nuwachu.» Pedruna niran: «Achcaj runa quićquipaycäshuptiqui, ¿imanirtaj tapumanqui: ¿Pitaj yataycamasha?» nir? ⁴⁶ Jesúsna niran: «Shuyninpa pipis yataycamasha. Yatamajtaga munayniwanmi allchacächishcä.»

⁴⁷ Warmina pacacuya mana camäpacur, sicsicyaycar Jesúspa ñaupanman jungurpacuycuran. Llaparpa ñaupanchu juyupa jishyashantapis, Jesúspa müdananta yataycur allchacäcushantapis willacuran. ⁴⁸ Jesúsna niran: «Wawallau wawa, yupachicamashayquipita allchacashcanqui. Mana yarpačhacullarna, wasiquiman cuticuy.»

⁴⁹ Jesús rimayta mana ushyaptillan, Jairupa wasinpita cačha čhayamuran. Jairuta niran: «Tayta, wamrayqui wañucäcushana. ¿Imapänataj tayta Jesústa pushanquipis?»

⁵⁰ Nishanta wiyar, Jesús niran: «Tayta Jairo, ama llaquicuychu. Nuwaman yupachicamanquiman. Wamrayqui allchacanga.»

⁵¹ Jairupa wasinman čhayaptin, aya chutarashanman yaycuchiran wañucuj wamrapa maman-taytanta, Pedruta, Santiaguta, Juanta. Waquincunatana mana yaycuchi-ranchu. ⁵² Wasi puncučhu runacuna wagarcaycaran. Atarcaycaran. Jesúsna niran: «Ama wagaychu. Wamra mana wañushachu. Manchäga puñucashalla caycan.»

⁵³ Täpajcuna wamra rasunpa wañushanta musyashpan Jesústa asiparan. ⁵⁴ Wañush wamra jipashta maquinpita charircur, Jesús niran: «Wamra, ricchay.» ⁵⁵ Chaura alman cutiptin, cawaricurcuran. Cawaricurcupinti, niran: «Jaray.» ⁵⁶ Wamrapa maman-taytan juyupa manchariran. Jesúsna niran: «Wamrayquita cawarachishäta pitapis ama willapanquichu.»

9

Čunca ishcaywan cačhancunata Jesús cačhacushan

San Mateo 10.5-15; San Marcos 6.7-13

¹ Čunca ishcaywan cačhancunata shuntaycur cargunman čhuraycur, Jesús niran: «Nuwapita munayniuj caycanqui supaycunata jargunayquipäpis, jishyačhucunata allchacächinayquipäpis.» ² Nircur cačharan Tayta Diosninchipa shiminta willapäcunananpaj, jishyačhucunata allchacächinanpaj. Cačhar niran: «Willapäcur ninqui: <Maquinčhu purichimänanchipaj Tayta Diosninchchi shuyaraycämanchi> nir. ³ Purir, imatapis ama apanquichu. Ama apanquichu: garutiquitasi, jipiquitasi, mircapayquitasi, jillayniquitasi, rucanayquitasi. ⁴ Juc wasiman pachacur, jucläpa aywacushayquicaman jinallančhu pachäräcunqui. ⁵ Čhayashayqui marcačhu mana čhasquishuptiqui, čhaquiquita pichacurir aywacunqui: <Mana čhasquicamashayquipita ñacayman čhayanquipaj> nir:*

⁶ Chaymi marcan-marcan purir cačhancuna Tayta Diosninchipa shiminta willapäcärian. Jishyačhucunatapis allchacaycähiran.

Ushyachicuj Juanta wañuchishan

San Mateo 14.1-12; San Marcos 6.14-29

⁷ Chay wichan Galilea marcacunata mandaj Herodespis Jesús ima-imata rurashan-tapis mayaran. Ichanga tantiyayta mana atiparanchu. Jesús pí cashanta mana musyar, runacuna wichaypa-uraypa rimar niycaran: «Ushyachicuj Juančhi wañushanpita cawarimusha.» ⁸ Waquinshi nircaycaran: «Willacuj Elíasčhi.» Waquinash niycaran: «Unay willacujcunačhi maygan carsi, cawarimusha.» ⁹ «Ushyachicuj Juančhi

* ^{9:5} San Mateo 10.14 tantiyachicushanta ricay.

cawarimusha» niptin, mandaj Herodes niran: «Ushyachicuj Juanpa umanta quiqui ruguchish caycapti, ¿piraj chay Jesús? Chay runata ricsicüman» nir Jesúswan tincuyta sumaj munaran.

*Pichga waranga runata Jesús jarashan
San Mateo 14.13-21; San Marcos 6.30-44; San Juan 6.1-14*

¹⁰ Cačhancuna willapäcur purishanpita Jesúsman cutiran. Imata rurashancunatapis willaran. Jesúsna paycunata pushacurcur, Betsaida marcaman aywacuran: «Yata juyapärishun» nir. ¹¹ Shuyninpa aywacuptinsi aywashanta musyar, chay-chicaj runa Jesústa tariparan. Jesúsna tucuy-jinanpa tantiyachiran Tayta Diosninchipa maquinčhu cawananpaj. Jishyačhucunatapis allchacächiran.

¹² Pacha chacanaycaptin, puríshijnincuna Jesústa niran: «Chunyaj pachačhu carcaycanchi. Runacuna marcacunaman micuy ashij aywacuchun. Pachacunapäpis ashimunman.» ¹³ Chaynuy niptin, Jesús niran: «Jamcuna jaranguiman.» Paycunana niran: «Pichga tantallatawan ishcay piscädullata charaycä. Chay-chicaj runata jaranchipaj, ¿tanta rantimuj aywanätarächu munanqui?» ¹⁴ Runacuna pichga waranga-ima (5,000) juturpaycaran. Chaypis puríshijnincunata Jesús niran: «Llapan runata pichga čunca-caman (50) jamachiy.»

¹⁵ Jesúspa shiminta wiyacur, llapanta jamachiran. ¹⁶ Jesúsna pichga tantatawan ishcay piscäduta aptarcur, mañacuran: «Taytallau Tayta, ima allish tarichillämashcanqui» nir. Nircur tantacunata paquircur-paquircur, piscäduta račhircur-račhircur, puríshijnincunata macyaran llapanta jarananpaj. ¹⁷ Runacuna puchupacushancaman micuran. Micucurcuptin, puchupacushanta čunca ishcaywan (12) canista juntataraj shuntaran.

*Jesús Washäcuj cashanta Pedro rimaricushan
San Mateo 16.13-19; San Marcos 8. 27-29*

¹⁸ Juc junajčhu Jesús quiquillan Tayta Diosninchita mañacuycaran. Niycashančhu puríshijnincunata tapuran: «Runacunapaj, ¿pitaj cä?» nir. ¹⁹ Paycuna niran: «Waqin runash nin: <Ushyachicuj Juan.› Waquinash nin: <Elías.› Waquinash nin: <Pi carpis, Tayta Diosninchipa unay willacujnin canga. Cawarircamurčhi puriyan.› » ²⁰ Chaura quiquincunata Jesús tapuran: «Jamcunapäga, ¿pitaj cä?» nir. Pedruna niran: «Washäcujmi canqui. Tayta Diosninchi cačhamushcashunqui.» ²¹ Chaura Jesús sumaj piñaparan: «Tayta Diosninchi cačhamashan Washäcuj cashäta pitapis ama willapanquichu» nir.

*Waňuyman čhayana nanta Jesús musyachicushan
San Mateo 16.20-28; San Marcos 8.30-9.1*

²² Puríshijnincunata Jesús niran: «Tayta Diosninchi cačhamasha. Chaypis sumajraj ñacashaj. Mayur runacunapis, mayur cüracunapis, Moiséspa shiminta yačhajcunapis wasguimanga. Waňuchimanga. Chaypis quimsa junajta Tayta Diosninchi cawarachimanga.»

²³ Jinarcur llapan runata Jesús niran: «Pipis puríshimayta munar, quiquinpa shungun munashanta ama ruranmanchu. Manchäga nuwa-janan ñacachiptinsi, rusčhu waňuchiptinsi, waran-warán shimiña wiyacuchun. ²⁴ Ñacaytapis, waňuytapis manchacur maquičhu puriyta mana munar, ushyacayman čhayangapaj. Maquičhu purir llapanninta jaguijcumam ichanga imaycamanpis Tayta Diosninchipa maquinčhu cawanga. ²⁵ Sumaj ricuyayta tarirpis ushyapacayman čhayaptin, rícu cayninga, ¿imapäraj alli? Llapan imancunapis ushyacanga. Quiquinpis ñacayman čhayanga.»

²⁶ «Tayta Diosninchi cačhamasha. Pipis shimiña mana wiyacushpan wasguimaptin, nuwapis janaj pachapita achic-achicyaycar cutimur, wasguishaj. Cutimupti, Tayta Diosninchipa anjilnincunapis achic-achicyaycar yanagämanga. ²⁷ Sumaj tantiyacunquiman. Tayta Diosninchi llapan runata maquinčhu purichinga. Chaynuy cananta waquinniqui manaraj waňullar ricanquipaj.»

*Juc-nirajman Jesús ticracerishan
San Mateo 17.1-8; San Marcos 9.2-8*

²⁸ Chaypita pusaj junajta-ima Tayta Diosninchita mañacuj Jesús aywaran. Pedruta, Santiaguta, Juanta pushacurcur, puntaman jigaran. ²⁹ Tayta Diosninchita mañacuycaptin, Jesúspa jajllanpis, müdananpis achic-achicyaj yurajman ticraceriran. ³⁰⁻³¹ Unay willacuj Moiséwan Elíaspis ricaripuran. Paycunapis achic-achicyaycaran. Jesúswan parlaycaran. Cay pachapita aywacur Jerusalén marcachu imaman chayanantapis Jesústa willaparan.

³² Niycashanchu Pedro, Santiago-ima, Juan-ima puñucäcuran. Ricchapacurirmi ichanga, achic-achicyaycajta Jesústapis, ishcaj runacunatapis ricaran. ³³ Moiséwan Elías aywacuya jallaycuptin, mana yarpačacullar Pedro rimariran: «Tayta Jesús, caychüga alli juyäcumi. Quimsa tacmata rurarishaj: jucta jumpaj, jucta Moiséspaj, jucta Elíaspaj.»

³⁴ Pedro rimaycaptillan, quimsanta pucutay chapacurcuran. Jesúspa purishijnincuna juyupa manchariran. ³⁵ Pucutay rurinpita Tayta Diosninchini nimuran: «Jesúsga Wawämi. Payllata acracushcä. Shiminta wiyacuy.»

³⁶ Rimashan chawacäcuptin, quiquirllantana Jesústa ricaran. Chay wichan quimsaj purishijcuna imata ricashantapis mana willacuranchu.

*Supay puclacush wamrata Jesús allchacächishan
San Mateo 17.14-21; San Marcos 9.14-29*

³⁷ Warannin junaj puntapita yarpamuptin, achcaj runa Jesústa taripaj aywaran. ³⁸ Runa chauinpita juc runa jayacuran: «Tayta Jesús, yanapaycallämay. Wawämi fiacaycan. Chaylla wamräpis. ³⁹ Charir, supay japarächin. Tapsir ushyan. Pushgayta ajtuchin. Sajtar ushyan. Mana cačharinchu. ⁴⁰ Supayta jargunanpaj waquin purishijniquicunata mañacurä. Ichanga mana camäpacuranchu» nir. ⁴¹ Chaynuy mañacuptin, Jesús niran: «Jamcuna Tayta Diosninchiman mana yupachicunquichu. Juchallačhpis aruycanqui. ¿Imaycamanraj tantiyachishayqui? Mana yupachicamaptiqui, yamacashcä.» Nircur wamrapa papäninta niran: «Wamrayquita mä, apamuy» nir.

⁴² Wamranta chayacächiptin, supay pampaman sajtaran. Tapsir ushyariran. Chaymi supayta Jesús piñacuran. Piñacuriptin, supay aywacuran. Chaura wamrana allchacäcuran. Allchacashtana papäninwan tincuchiran. ⁴³ Tayta Diosninchini allchacächishanta ricar, llapan runa mancharisha: «¿Imatataj ricanchi? Tayta Diosninchini munayniyuj, ¿au?» nir.

*Wañuyman chayananta yapay Jesús musyachicushan
San Mateo 17.22-23; San Marcos 9.30-32*

Runacuna mancharish caycaptin, purishijnincunallata Jesús niran: ⁴⁴ «Rimashäta sumaj wiyacunqui. Ama junganquichu. Tayta Diosninchini cačhamasha. Chaypis juc runa charimar, juyu runacunapa maquinman chayachimanga.»

⁴⁵ Purishijnincunam ichanga mana tantiyaranchu. Tayta Diosninchini mana camacächiptin, tantiyacuya mana camäpacuranchu. Tapucuytapis manchacuran.

*Alli ricash cayta ashicunapita tantiyachishan
San Mateo 18.1-5; San Marcos 9.33-37*

⁴⁶ Juc junaj Jesúspa purishijnincuna mayur runa cayta ashir, piñanacuran. ⁴⁷ Shungun munashanta tantiyar, juc wamrata Jesús jayaran. Lädullanman ičhiycachir, ⁴⁸ niran: «Pipis yupachicamashan-janan wamracunata alli ricar, nuwatapis alli ricaman. Alli ricamarga, cačhamaj Tayta Diosninchitapis alli rican. Chaymi sumaj tantiyacunquiman. Pampaman churash runacunata alli ricarraj, mayur runa cayman chayanquipaj.»

*Tincupäcujwan yanapäcujpita rimashan
San Marcos 9.38-40*

⁴⁹ Juan Jesústa niran: «Tayta, nimashayquinylla supayta jarguycajta ricapäcushcä. Chaypis mana puríshimaptinchí, mičhapäcushcä.» ⁵⁰ Jesúsnra niran: «Ama mičhanquimanchu. Mana chiquimashpanchi yanapaycämancchi.»

Santiagutawan Juanta Jesús piñacushan

⁵¹ Tayta Diosninchí janaj pachaman shuntanapaj wallcana pishiptin, Jerusalén marcaman aywananpaj Jesús camaricuran. ⁵² Ñaupanta caáchacuran: «Pachacunanchipaj Samaria quinranchú camaricunqui» nir. ⁵³ Jerusalén marcaman aywaycashanta musyarmi ichanga Samaria runacuna pachächiyta mana munaranchu. ⁵⁴ Chaura puríshijnin Santiaguwan Juan niran: «Tayta Jesús, Samaria runacunata nina tamyawan ushyarachishun, ¿au?» * ⁵⁵ «Ushyarachishun, ¿au?» tapuptin, Jesús piñacuran.* ⁵⁶ Chaypita juclä marcapa aywacäriran.

Jesúswan puriyta munajcuna

San Mateo 8.19-22

⁵⁷ Aywacurcaycaptin, juc runa Jesústa niran: «Tayta, aywashayquipa aywayta munä. Maypapis purimushun.» ⁵⁸ Jesúsnra niran: «Atujcunapis mačhayninchú tiyan. Pichuysacunapis jishuyuj. Nuwapam ichanga Tayta Diosninchipa caáchan captisi, mayman čayanäpäpis wasi mana canchu.»

⁵⁹ Juc runatapis Jesús niran: «Puríshimay.» Chaura mana munaranchu: «Tayta, papänitaraj ricashaj. Wañucuptin, pampaycurraj puríshishayqui» nir. ⁶⁰ Jesúsnra niran: «Papäniqui chapata ama rurashunquimanchu. Juclla puríshimay. Wañushta wañushmasincuna pampachun. Tayta Diosninchipa shiminta willacuj aywashun. Payga shuyaraycämancchi maquinchú purichimänanchipaj.»

⁶¹ Juc runana Jesústa niran: «Tayta, nuwapis aywähishayqui. Ima captinpis, ichicllata shuyaycallämay. Mamä taytätaraj willaycamushaj.» ⁶² Jesúsnra niran: «Yapyajcuna jipaman tictarir, wicsu-wicsu yapan. Tayta Diosninchipa shiminta llapan shunguyquiwan wiyanquiman; ama janan shungullaga.»

10

Jančhis čhunca ishcaywan puríshijnincunata Jesús caáchacushan

¹ Chaypita jančhis čhunca ishcaywan (72) puríshijnincunata acracyan caáchacunapaj. Ishcaycaman-ischcaycaman caácharan: «Čhayanä marcacunaman ñaupay» nir. Nircur tincuchiypa niran: ² «Micuy puguraycay-yupay chay-chicaj runa Tayta Diosninchipa shiminta wiyaj-wiyajlla shuyarpaycan. Shiminta willacujcunam ichanga wallcajlla. Chaymi willacujcuna juclla yapacämunanpaj Tayta Diosninchita mañacäriy. Shiminta čhasquicujcunata shuntamunan carcaycan. ³ Ichanga sumaj tantiyacäriy. Shimitä willacuptiqui, runacuna chiquishunquipaj. Uyshata liyun rurinman jaycurij-yupay caáchaycay. Aywayna. ⁴ Shimitä willapäcuj aywar, jillayniquitapis, jipiquitapis, rucanayqui llanguiquitapis ama apanquichu. Piwanpis caminučhu tincur, ama mayräcunquichu.

⁵ «Juc wasiman čhayar: <¿Jaucallachu? Allilla juyaycullay> nir wamayanqui. ⁶ Allilla cawayta munar čhasquishuptiqui, Tayta Diosninchispis yanapanga allilla cawanapaj; mana čhasquishuptiquim ichanga, mana. ⁷ Pachächishuptiqui, chay wasillačhu pachacunqui. Wasin-wasin ama purinquichu. Jarashuptiqui, llapanta čhasquicunqui. Shimitä willacujcunaga micush-upush cawanana camacan.

⁸ «May marcačhüpis jarashuptiqui, čhasquicunqui. ⁹ Jishyačhucunatapis allchacächinqui. Willapanqui: <Tayta Diosninchí shuyaraycämancchi. Maquinčhuna purichimäshun> nir.»

* ^{9:54} Waquin Bibliačhu 2 Reyes 1.9-ta yarpärir nin: «Elías unay rurashan-jina.» * ^{9:55} Waquin Bibliačhu yapor nin: «Tayta Diosninchí yarpashanta mana tantyanquichu. Tayta Diosninchí caáchamaptin, mana runacunata illarachinäpächu shamushcä; manchäga runacunata jishpichinalläpaj» nir.

¹⁰ «Juc marcaáhu mana ́chasquishuptiquim ichanga, llapanta ninqui: ¹¹ Tayta Diosninchí shuyaraycämanchi. Maquinchüna purichimäshun. Jamcunam ichanga wasguishcanqui. Chaymi ñacayman ́chayanquipaj. Jamcunata mana ricanäpaj ́chaquítapis pichacurir aywacü. Shimita ama junganquichu.» ¹² Sumaj tantiyacunquiman. Cay pacha ushyacaptin Sodoma runacunata ñacachirpis, Tayta Diosninchí llaquipangaraj. Payta wasguipajcunatam ichanga mana llaquipällar ñacachinga. ¹³ Corozaín runacuna, Betsaida runacuna, Israel runa captiquisi, juyupa Tayta Diosninchí ñacachishunquipaj. Pay camacächiyinpa shiminta willapaycaptisi, jishyáchucunata allchacaycächiptisi, chaychicaj runata jaraycaptisi, supaycunata jarguycaptisi, maquinchú cawayta mana munashcanquichu. Jäpa Tiro marca runacunawan jäpa Sidón marca runacunam ichanga jishyáchucunata allchacächishäta ricar, supaycunata jargushäta ricar, mayna Tayta Diosninchipa shiminta ́chasquicur juchanpita wanacunman caran. Wanacushan musyacänanpaj llaquicuywan mayna waganman caran. Umanman uéhpata pičhucunman caran. Jaćga müdananta ushtucunman caran. ¹⁴ Chaymi Tiro runacunatawan Sidón runacunata Tayta Diosninchí yangallaraj ñacachingapaj. Jamcunatam ichanga ricaycarsi mana wanacushayquipita cay pacha ushyacashan junaj juyupa ñacachishunquipaj. ¹⁵ Cafarnaún runacuna: «Janaj pachaman aywashaj» niptiquisi, yarpashayqui mana camacangachu. Chacaj pachaman Tayta Diosninchí jargushunquipaj.»

¹⁶ Jinarcur caćhancunata niran: «Shimiuita wiယacujcuna nuwatapis, Tayta Diosninchitapis wiယacun. Shimiuita mana wiယacujcunam ichanga nuwatapis, caćhamaj Tayta Diosninchitapis wasguiyacan.»

Caćhacushancuna cutishanpita willacushan

¹⁷ Juc junajchú janćhis ćhunca ishcaywan (72) caćhacuna cushish cutiran. Jesúswan tincur, niran: «Tayta, shimiuita wiယacur jargupti, supaycunapis änir, aywacun.» ¹⁸ Jesúna niran: «Jarguptiqui, supaycunapa mandajninta janaj pachapita shicwamushanta ricashcä. Räyu-jina pampaman shicwamusha. ¹⁹ Jamcunata munayniuj canayquipaj ćhurashcaj. Chaymi supaycunapis mana ićhipushunquipächu. Wañuchicuj curucunatapis, alacrancunatapis lluchcar ushyarinquipaj.* ²⁰ Chaypis supayta jargushayquipita alläpa ama cushićärinquimanchu. Cushicurga, Tayta Diosninchipa wawan cashayquipita cushicunquiman. Janaj pachaáhu acta librunchüpis jutiquicuna isquirbiraycanna.»

Tayta Diosninchawan Wawan Jesúsla ricsinacushan

San Mateo 11.25-27; 13.16-17

²¹ Niycaptillan Espíritu Santu shacyächiptin, Jesúspa shungun achicyacäusha. Chaymi niran: «Papällau Papä, jatunpa cushicü. Alli shungu runacunata wamra-jina wiယacuj captin, yarpashayquita musyachishcanqui. Yaćhaj-tucujcunatam ichanga shunguyqui yarpashanta mana musyachishcanquichu. Cay pachapis, janaj pachapis maquiquichu caycan. Shunguyqui munashanta llapanta camacächishcanqui, Papä.»

²² Jinarcur llapan runata niran: «Papäni llap-llapanta maquüiman ćhurasha. Wawan cashäta Papäni musyan. Wawan carmi, Papäni pí cashantapis musyä. Yanapaptiraj, pipis Papäni pa shungunta musyapanga.»

²³ Chaypita purishijnincunallata niran: «Cushicärinquiman. Llapan rurashäta ri-canayquipaj Tayta Diosninchí yanapaycäshunqui. ²⁴ Sumaj tantiyacunquiman. Unay willacujcunapis, mandajcunapis ricamayta munaran. Ima-imata rurashätapis ricayta munaran. Shimütapis wiယayta munaran. Ichanga mana camäpacuranchu.»

Samaria runa llaquipäcuj cashanpita rimashan

* ^{10:19} Wañuchicuj curupaj, alacrancuj rimar, waquin runa supaywan tincuchishanta tantiyan.

²⁵ Moiséspa shiminta yačhaj runa achäquita ashipällar, Jesústa tapucuran: «Tayta, ¿imatataj ruräman Tayta Diosninchipa maquinčhu imaycamanpis cawanäpaj?» nir.

²⁶ Jesúsnra niran: «Moiséspa shiminta musyanqui, ¿au? ¿Imanintaj liguishayqui?»

²⁷ Chaura niran: «Moisés isquirbisančhu nin: «Lapan shunguyquian Tayta Diosninchita manchapacäriy.* Quiquipi alli ricacushayqui-jina runa-masiquitapis alli ricanquiman.»»

²⁸ Jesúsnra niran: «Rasullanta rimashcanqui. Rimashayquita čharcur, Tayta Diosninchipa maquinčhu imaycamanpis cawanquipaj.» ²⁹ Chaypis alli llucshiyta munar, yačhaj runa Jesústa tapuran: «¿Pitaj runa-masi?» nir.

³⁰ Chaura tincuchiypa willapar, Jesús niran: «Juc junajshi Israel runa Jerusalén marcapita Jericó marcaman aywaycaran. Asaltanticunash shuyaycur, lapan imancunatapis jičhuran. Müdanantapis jičhuran. Wañunashancamanshi magaran. Chutaraycajtash jaguiycuran.

³¹ «Mayllanta mana yarpashpita cürapis aywaycaran. Runa chutaraycajta ricar carunijpa tumarcurshi, aywacuran. ³² Cura yanapaj runapis chay quinranpa aywaycaran. Runa chutaraycajta ricar carunijpa tumarcurshi, aywacuran.

³³ «Samaria runapis chay quinranpa aywaycaran. Runa chutaraycajta ricarshi ichanga, sumaj llaquipasha. ³⁴ Juclash charipacusha. Jirincunatapis jampircurshi watapasha.* Bürunman jigarcachirshi, wasiman apasha. Sumaj ricasha. ³⁵ Waranin tuta wasiyujta nisha: «Cay runata ricapaycallämay. Catay jillay. Pishiqtin-imaptin, jillayniq-uita čhurapamanqui. Cutimur, cutichilläshayqui» Jinarcurshi Samaria runa aywacusha.»

³⁶ Willapayta ushyarcur, yačhaj runata Jesús tapuran: «¿Maygantaj runa-masinta llaquipasha? ¿Cürachu? ¿Cura yanapajchu? ¿Samaria runachu?» nir. ³⁷ Moiséspa shiminta yačhajna niran: «Llaquipar yanapaj-cajmi.» Jesúsnra niran: «Cananpita llaquipäcuj runa-jina jampis runa-masiquita llaquipanquiman.»

Martapawan Maríapa wasinman Jesús čhayashan

³⁸ Jerusalén marcapa aywaycashančhu juc marcaman purišijnincuna-ima Jesús čhayaran. Martapa wasinman čhayaptin, pachächiran. ³⁹ Martapa ñaňan caran María. Jesús willapäcuptin, jamacuycur María sumaj wiycuran. ⁴⁰ Martam ichanga wasi rurayninwan tincuypa-tincuycaran. Chaymi Jesústa niran: «Tayta, ñaňäta piňacamuy. Yanapamächun. Quiquilläta ima ruraytapis jaguiparamasha.»

⁴¹ Jesúsnra niran: «Martallau Marta, ¿imanirtaj warminqui? Wasi rurayniquicunallawan tincuypa-tincuycanqui. Allipaj willapashäta mana wiyatia munanquichu. ⁴² Maríam ichanga sumaj wiycuycan. Wiycushanta shungunpita pipis mana jičhungapächu.»

11

Tayta Diosninchita mañacuypita tantiyachishan San Mateo 6.9-15; 7.7-11

¹ Juc junaj Tayta Diosninchita Jesús mañacuycaran. Mañacuya ushyarcuptin, juc purišijnin niran: «Tayta Jesús, Tayta Diosninchita mañacunäpaj yačhachimay, ari. Ushyachicuj Juan purišijnincunata yačhachishannylla yačhachimay.» ² Jesúsnra niran: «Tayta Diosninchita mañacur ninqui:

«Papäninchi,

Llapanpis manchapacuyculläshunqui.

Maquiquíchu cawaycachillämay.

³ Waran-waran cawanäpäpis tariycachillämay, ari.

⁴ Juchäcunatapis ama yarparaynachu.

* **10:27** Deuteronomio 6.5. Levítico 19.18. * **10:34** Unay Israel runacuna ulibus wirawan, bñuwan jampicuj.

Manchäga chiquimajcunata alli ricashäpita alli ricaycallämäy.
Juchaman chayanätapis ama camacaycachillaychu.. »

⁵ Jananmanpis Jesús nirán: «Pullan-pagasshi ricsinacushayquita jayacunquiman: «Tayta, quimsa tantallata mañacushayqui. ⁶ Ricsinacushä runa yargaycar chayamusha. Jaranäpaj mana imäpis canchu» nir. ⁷ Jayacuptiquish, nishunquiman: «Ama rimapämäychu. Puncü wičgaraycan. Wamräcumapis puñuycan. Mana jatarimümanchu.» ⁸ Chaypis yaparir-yaparir jayacuptinshi, jatarimunman. Mañacushantash tarichinman. Jatarimunga manash ricsinacushayquipitachu, manchäga: «Runacuna pampaman churamanga» nishpan.

⁹ «Chay-jina mañacuptiqui, Tayta Diosninchí jushunquipaj. Ashiptiqui, tarichishunquipaj. Puncupita jayacuptiqui, quičhapushunquipaj. ¹⁰ Mañacujcuna čhasquin. Ashijcunapis tarin. Puncupita jayacujcunatapis quičhapun.»

¹¹ «Wamrayqui yarganar piscäduta mañacushuptiqui, ¿wañuchicuj curuta jaranguimanchuraj? ¹² Runtuta mañacushuptiqui, ¿alacranta jaranguimanchuraj? ¹³ Jamcuna jucha-sapa carcaycarsi, wamrayquicunata allita jaranqui. Tayta Diosninchipis llaquipäcuj. Mañacuptiqui, janaj pachačhu caycashpan alli-allillata tarichishunquipaj. Espíritu Santupa maquinčüpís purichishunquipaj.»

Jesústa pampaman čhurashan

San Mateo 12.22-30; San Marcos 3.20-27

¹⁴ Juc cuti upayächicuj supayta Jesús jarguran. Jarguriptin, upa runa rimariran. Upa runa rimariptin, llapan runa manchariran. ¹⁵ Waquin runam ichanga Jesústa pampaman čhurar, nirán: «Supaycunapa mandajnin Beelzebulta jayararshi, supaycunata jarguycan. Mana Tayta Diosninchitachu jayaraycan.»*

¹⁶ Waquin runana achäquita ashipashpan Jesústa nirán: «Tayta Diosninchí camacächiyninpa mä, imallatapis ruray.»

¹⁷ Supay yanapashanta yarpaptin, tincuchiypa Jesús nirán: «May marcačhüshi quiquin-pura ticrapanacur, wacpa-caypa aywacärin. May wasičhüpís majanwan ticrapanacur, raquicaymanshi chayan. ¹⁸ Chaymi mayur supaypis supay-masinwan ticrapanacur, ima ruraytapis mana camäpacunmanchu, ¿au? Chaynuy captin, ¿imanirtaj Beelzebulta jayarar supaycunata jargushäta yarpanqui? ¹⁹ Mä, tapushayqui. Waquin-niqui supayta jargur, ¿pita jayarartaj jarguycanqui? ¿Tayta Diosninchitachu, supaytachu jayaraycanqui? «Tayta Diosninchita» nimaptiqui, tumparcaycämashayquita tantiyacushaj.»

²⁰ «Sumaj tantiyacunquiman. Tayta Diosninchí camacächiyninpa supaycunata jargur, Tayta Diosninchí munayniuj cashanta musyachicuyca. Chayta ricar, tantiyacunquiman maquinčhüna Tayta Diosninchí runacunata puriyäčchishantapis. ²¹ Tincuchiypa willapäshayqui. Callpayuj runa garutinwan wasinta täpaptin, pipis manash yaycunchu. ²² Sumaj-sumaj callpayuj runa ricarimurshi ichanga garutintapis jičhurir, wicaparinga. Maquinpita imantapis jičhurirshi, jucninta-jucninta raquiparinga. Nuwapis sumaj callpayuj runa-jina supaycunata jarguyca.»

²³ «Tayta Diosninchí cačhamashanta mana čhasquicuya munar, chiquircaycämamanqui. Tayta Diosninchipa maquinman runacunata shuntayta mana yanapämär, chapata rurarcaycämamanqui.»

Runaman supay cutishanpita willapashan

San Mateo 12.43-45

²⁴ «Supay imata rurashantapis tantiyacunquiman. Runapita jargush car, chunyajčhüshi purin. Jamaytapis manash tarinchu. Mayčhüpís jamayta mana tarir,

* ^{11:15} Supaypa mandajninta achca jutiwan ricsir nin: «Beelzebul, Satanás, Lúcifer, Diablo.» «Satanás» nir: «chiquiniycan.»

yarpačacun: «Chay runaman cuticushaj» nirshi. ²⁵ Cutirshi, chay runata pichapacush wasita-jina, jäcuycaj wasita-jina tarin. ²⁶ Chayshi jančhis mas jyu supay-masincunata pushacurcur, runačhu tiyananpaj cutin. Supaycuna cutiptin, jyu cashanpita masnash runa juyuyacäcun.»

²⁷ Jesús rimaycaptillan, llapanpa čhaupinpita juc warmi jayacuran: «Tayta Jesús, mama mayqui imaraj cushicun. Ima allish jishpichishcashunqui.» ²⁸ Jesúsna niran: «Lapan wiyyacujcuna cushish cawan. Shiminta wiyyacuptin, pitapis Tayta Diosninchi yanapan.»

Jesústa ashipashan

San Mateo 12.38-42; San Marcos 8.12

²⁹ Chay-chicaj runa shiminta wiyananpaj jutucaptin, Jesús niran: «Jyu runa carcaycanqui. Tayta Diosninchi camacächiyninpa imallatapis ruranäta munarcaycanqui. Tantiyayta munar, unay willacuj Jonáspa willapanta yarparanquiman. ³⁰ Chaypis unay willacuj Jonás imamanpis čhayashallanta ricanquipaj. Paytaga Tayta Diosninchi cačharan Nínive marca runacunata willapaj. Jonásta cačhashan-jina nuwatapis cačhamasha canan wíchan runacunata willapänäpaj. Tantiyacuya munar, ricamanquipaj. ³¹ Sumaj tantiyacunquiman. Cay pacha ushyacaptin, llapan runata jucha aparicushanpita Tayta Diosninchi ñauquiptin, Saba marca mandaj warmipis cawarimunga. Paymi ñauquishunquipaj: «Mandaj Salomónpa shiminta wiyyar, Tayta Diosninchi llaquipäcuj cashanta tantiyacushcä. Jamcunam ichanga mana tantiyacärishcanquichu» nir. Chay warmi carupita-pacha shamuran mandaj Salomón rimashanta wiyananpaj. Wiyyar, Tayta Diosninchipa shiminta čhasquicuran. Mandaj Salomón yačhaj carsi, nuwaman mana tincushachu. Chaypis shimiča wiyyacuya mana munanquichu. ³² Cay pacha ushyacaptin, Nínive marca runacunapis cawarimunga. Paycuna ñauquishunquipaj: «Tayta Diosninchipa shiminta mana wiyyacushcanquichu» nir. Nínive runacuna Jonás willapäcuptin, wanacäriran. Jonás Tayta Diosninchipa willacujnин carsi, nuwaman mana tincunchu. Chaypis shimiča wiyyacuya mana munanquichu.»

Achquiman Jesúspa shimin tincuchishan

San Mateo 5.15; 6.22-23

³³ «Achquita ratarcachir, pipis manash pacaycunmanchu. Manchäga patacmanshi čhuran llapanta achquipänanpaj.»

³⁴ «Achquiga shimiwan tincun. Ñawinchiwan llapantapis ricanchi. Ñawinchi achquita ricaptin, shungunchipis achicyacäcun. Shunguyquiman shimičhayaptin, Tayta Diosninchipa shungun munashanta tantiyacunquipaj. Shunguyquiman mana čhayaptinmi ichanga, jucha aruyllačhu cawanquipaj. ³⁵ Chaymi Tayta Diosninchipa shungun munashanta sumaj tantiyacunquiman. Ama upa-tucunquimanchu. ³⁶ Tayta Diosninchipa shiminta llapan shunguyquian wiyyacur, manchapacur cawanquiman. Tayta Diosninchipa maquinčhu cawashayquita llapan runa musyanga. Achäquitapis mana taringachu pampaman čhurashunayquipaj.»

Fariseucunatawan Moiséspa shimin yačhajcunata Jesús piňapashan

San Mateo 23.1-36; San Marcos 12.38-40; San Lucas 20.45-47

³⁷ Rimayta ushyarcuptin, juc fariseu runa Jesústa wasinman pusharan: «Micupacushun» nir. Wasiman čhayar, maquinta mana awicullar micunianpaj Jesús jamacuyucuran. ³⁸ Maquinta mana awicuptin, fariseu runa jamurparan: «Tayta Diosninchita mana manchapacur, yačhacashanchitapis mana čharcunchu» nir.

³⁹ Jesúsna niran: «Tayta, fariseu-masiquicunawan janallan awish mati-niraj carcaycanqui. Runa ricanallanpaj alli-tucunqui. Mallaj cashayquita shunguyqui musyaraycan. Jucha rurayllapaj wañunqui. ⁴⁰ Upa-rinri canqui. Tayta Diosninchi mana janalanchitachu camasha. Manchäga shungunchitapis camasha. ⁴¹ Tayta Diosninchi alli ricashunayquipaj wacchacunataraj llapan shunguyquian yanapanquiman.»

⁴² «Fariseucuna, llaquicärinquiiman. Juyupa ñacanquipaj. Alli ricash cayta munar; llapan imayquicunapitapis Tayta Diosninchipaj raquinqui.* Irbabuynatasi, rüdatasi, caldu jačhatasi raquinqui. Chaypis runa-masiquita mana llaquipanquichu. Tayta Diosninchitapis mana manchapacunquichu. Paypa-cajta raquir, allita ruraycanqui. Ichanga llapan shunguyquiwanpis manchapacunquiman. Runa-masiquitapis alli ricanquiman.»

⁴³ «Fariseucuna, llaquicärinquiiman. Juyupa ñacanquipaj. Shuntacäna wasiman čayar, ñaupa-ñaupallačhu jamayta ashinqui. Läsacunačhüpis llapan runa manchapacushunayquita munanqui.»

⁴⁴ «Fariseucuna, llaquicärinquiiman. Juyupa ñacanquipaj. Waquin runacuna shunguyqui ima-niraj cashantapis mana musyar: «Alli runa» nishunqui. Chaypis mëchu-jina carcaycanqui. Jananga alli. Rurinčhüna aya ismuycan.»

⁴⁵ Jesús piñacuptin, Moiséspa shiminta yačhaj runa jataricurcuran: «Tayta, fariseu-masicunata piñacur, nuwacunatapis ashlliycamanqui» nir.

⁴⁶ Jesúsna niran: «Moiséspa shiminta yačhajcuna, llaquicärinquiiman. Juyupa ñacanquipaj. Runacunata tucuy-tucuya yačhachinqui. Čarcunan sasa-cajcunatapis yačhachinqui. Quiquicunam ichanga juc maquillasi mana yanapanquichu.»

⁴⁷ «Moiséspa shiminta yačhajcuna, llaquicärinquiiman. Juyupa ñacanquipaj. Unay auquilluyquicuna Tayta Diosninchipa willacujnincunapa shiminta mana wiyacur, wañuy cachiran. Jamcunana unay willacujcunapa mëchunta picharcaycanqui. Ichanga shiminta mana wiyacärinquiichu. ⁴⁸ Mëchunta pichar: «Auquillucción willacujcunata wañuchir, allita rurasha» nir yarpacaycanqui. Auquilluyquicuna wañuy cachisha. Jamcuna mëchunta pichaycar, auquilluyquicunapa llupinparaj aywarcaycanqui: «Allipämi wañush» nir.»

⁴⁹ «Chaychi Tayta Diosninchipis niran: «Shimita willapäcunapaj willacujnincunatapis, cačhäcunatapis, achcajta cačhamushaj. Paycunata waquinta wañuchinquipaj. Waquinta marcan-marcan jaticačhar ushyanquipaj.» ⁵⁰ Willacujninta wañuchir, cay pacha camashanpita-pacha wañuchicushantapis aparicunquipaj. ⁵¹ Aparicunquipaj Abelta wañuchishanpita-pacha Zacaríasta wañuchishancaman. Payta Tayta Diosninchipa wasi puncunčhu, tullpa wajtallančhu wañuchiran. Paycunata wañuchishanpita jamcunatana Tayta Diosninchí ñacachishunquipaj.»

⁵² «Moiséspa shiminta yačhajcuna, llaquicärinquiiman. Juyupa ñacanquipaj. Yačhaj carsi, Tayta Diosninchipa shiminta mana manchapacunquichu. Runa-masiquitapis mana yačhachinquiichu. Manchäga Tayta Diosninchipa shungun munashannuy cawayta munarcaycaptin, mičharcaycanqui.»

⁵³ Rimayta ushyarcur wasipita llucshir, Jesús aywacuran. Chay junajpita-pacha Moiséspa shiminta yačhajcunawan fariseucuna ullgucarcäriran. Achäquita ashipällar, jucta-jucta Jesústa tapupaj. ⁵⁴ Achäquita ashiparan: «Llutanta rimaptin, wañuy cachishun» nir.

12

*Shungullančhu mana pacarächinanpaj willapashan
San Mateo 10.26-27*

¹ Runacunam ichanga yupaysi mana atipaypaj jutucaran Jesús spa shiminta wiyanapaj. Quiquin-puraraj tacanacuranpis. Chaymi Fariseucunapa shiminta libadürawan tin-cuchir, purishijnincunallata Jesús niran: «Fariseucunapa libadüranta ama čhasquipanquichu. Paycuna ishcay căra runa. ² Runacuna shungullančhu pacarächishanpis mayacanga. Imata yarpashanpis unayllata musyacanga. ³ Chaymi shunguyqui pacarächishanpis llapanpa rinrinman čhayanga. Pacayllapa rurashayquitapis llapan musyanga.»

* ^{11:42} Čhuncapita jucta Israel runacuna Tayta Diosninchipaj raquij. Castillänučhu: «diezmo» nin.

*Mana manchacullar willapäcunananpaj shacyächishan**San Mateo 10.28-31*

⁴ «Wawacuna, chiqui runacuna wañuchishunayquita ama manchacunquichu. Wañuchishushpayquisi almayquita mana wañuchingachu. ⁵ Tayta Diosninchitam ichanga manchapacärinquiman. Payga munayniyuj wañuyman jitarpushunayquipäpis, almayquita chacaj pachaman jaycunampäpis. ⁶ Manchapacuptiqui, Tayta Diosninchu mana jungashunquipächu. Acapalla pichuysacuna mana čhaninchu. Chaypis Tayta Diosninchu llapan pichuysata rican. ⁷ Acapalla pichuysata ricaycar, ¿jungashunquimanchuraj? Mana. Tayta Diosninchipa maquinčhu cawaycanqui. Payga mana imaysi jungashunquipächu. Ajchayquitapis yuparaycächin. Chaymi imatapis ama manchacuychu. Jamcunaman pichuysacunapis mana tincunchu.

*Shiminpita imatapis tarinanpaj cashan**San Mateo 10.32-33; 12.32; 10.19-20*

⁸ «Sumaj wiycunquiman. Tayta Diosninchu cačhamasha. Chaymi runacunapa ñaupančhu: ‹Jesúspa shiminta čhasquicushcä› nir willacuptiqui, Tayta Diosninchipa anjilnincunapa ñaupančhu nuwapis willacushaj: ‹Rasunpa maquičhu purin› nir. ⁹ Runata manchacur wasguimaptiquim ichanga, nuwapis Tayta Diosninchipa anjilnincunapa ñaupančhu wasguishayqui.

¹⁰ «Tayta Diosninchipa cačhan caycaptisi ashllimaptiquisi, Tayta Diosninchu juchayquita junganga. Espíritu Santuta ashllir ushyaptiquim ichanga, mana jungangachu.

¹¹ «Wawacuna, watacurcur shuntacäna wasiman apashuptiqui, Israel mayur cüracunaman apashuptiqui, mayur runacunaman apashuptiqui, ama llutäpacunquichu: ‹¿Imataraj rimashaj? ¿Imanayparaj chapacushaj?› nir. ¹² Paycuna rimachishuptiqui, Espíritu Santu shimiquiman čhurashallanta rimanquipaj.»

Puchuy-puchuy janančhu cawaj runapa willapan

¹³ Juc runa llapanpa čhaupinpita Jesústa mañacuran: «Tayta, wauguillä papäni jaguishan čhacrata charicurcusha. Raquipamächun, ari» nir. ¹⁴ Mañacuptin, Jesús niran: «Wau-guiquwan jíchunacushayquita ricanä mana camacanchu.» ¹⁵ Jinarcur llapan runata niran: «Imapäpis mallaj ama canquimanchu. Alli cawananchipaj mana rüçuyänanchirächu.»

¹⁶ Jinarcur juc willapata willapar, Jesús niran: «Puchuy-puchuy janančhu cawaj runapash čhacran achca caran. Murupacushanpis may-maytash wayuran. ¹⁷ Micuyninta may-mayta shuntarcur, mayman čhuraytapis manash camäpacuranchu. ¹⁸ Chayshi sumaj yarpačhacuran: ‹Tacshalla wasicunata jučhurachishaj. Jinarcur llapanta jutunäpaj jatuncaray wasicunata rurachishaj. ¹⁹ Jutucushäga achca watapaj aypämanga. Micuy mana pishiňmangapächu. Upunäpaj canga. Cushishallana juyäshaj› nirshi. ²⁰ Tayta Diosninchishi ichanga niran: ‹Upa rinri canqui. Canan chacay wañuy čhayapushunqui. Jutucushayquitapis jucmi micunga.› »

²¹ Willapariycur, Jesús niran: «Chay-niraj mallajcuna Tayta Diosninchita jungaycun. Tayta Diosninchita jungajcuna imata rurashantapis mana musyanchu.»

*Tayta Diosninchu wawanta ricashan**San Mateo 6.25-34*

²² Chaypita purišijnincunallata Jesús niran: «Wiyaycallämay. Ama llaquicunquichu: ‹¿Imawanraj cawashaj? ¿Imataraj micushaj? ¿Imataraj ushtucushaj?› nir. ²³ Cawaycar pačhayquipaj pishiptynsi, janayquipaj pishiptynsi, ama llaquicunquichu. ²⁴ Mä, pichuysacunata ricacushun. Paycuna manash murupacunchu. Manash pallapacunchu. Murutapis manash čhuracunchu. Imatapis mana ruraycaptinsi, Tayta Diosninchu micunanta camapan. Pichuysacunata camapaycar, ¿pishičhishunquimanchuraj? Mana. Manchäga tarichishunquipaj.» ²⁵ «May-jina llaquicurpis wañuy čhayamuptin, mana jishpinquipächu:

«Cawapärishäraj» nirsi. ²⁶ Chaynuy caycaptin, ¿imapäräj llaquicunqui: «¿Imawanraj cawashaj? ¿Imataraj micushaj? ¿Imataraj ushtucushaj?» nir?»

²⁷ «Waytacunatapis mä, ricacushun. Waytacuna mana arucuycarshi, mana puchcacuy-carshi, cuyayllapaj waytaran. Wayta cuyayllapaj cashanman unay mandaj Salomónpis mana tincuranchu achic-achicyaycaj müdanash caycarsi. ²⁸ Waytacuna juc-ishcay junajllapaj. Juc junaj cuyayllapaj waytaran. Warannin capllupäna chaquicäcun. Nircur tullpallačhu ushyacäcun. Chaypis Tayta Diosninchi cuyayllapaj waytachin. Chaynuy caycaptin, ¿jamcunata Tayta Diosninchi pishüchishunquimanchuraj? Mana. Chaymi sumaj yupachicärinquiman.»

²⁹ «Ama llaquicunquimanchu: «¿Imataraj micushaj? ¿Imataraj upushaj?» nir. ³⁰ Tayta Diosninchiman mana yupachicujcunalla may marcačhu juyarpis, chaycu-napaj llaquicun. Jamcunam ichanga Tayta Diosninchiman yupachicunqui. Payga imalla pishüshushayquitapis mayna musyaycan. ³¹ Chaymi maquillančhu cawan-quiman. Shungun munashallanta rurar cawanquiman. Maquinčhu purichishush-payqui pishüshushayquitapis tarichishunquipaj.»

³² «Wawacuna, ama manchacuychu, ari. Yupashalla captiquisi, alli ricashush-payqui Tayta Diosninchi acracushcashunqui maquinčhu purinayquipaj. ³³ Chaymi imayquicunatapis ranticuycur, pishipacujcunata yanapay. Shungun munashallanta ruraptiqui, Tayta Diosninchipis alli cawayta tarichishunquipaj. Tarichishuptiquiga, pipis mana jíchushunquipächu. Suwapis mana suwapäshunquipächu. Puyupis mana ushyapäshunquipächu. ³⁴ Sumaj tantiyacunquiman. Runaga shungun munashallanta imatapis yarparäcun.»

Jesús cutimunanta shuyaränanpaj tantiyachishan

³⁵ «Wawacuna, mincay-jina achquiqui ratachipacushalla, ricaj-ricajlla shuyarämanquiman. ³⁶⁻³⁸ Sumaj tantiyacunquiman. Juc runash warmi ashiyman aywar, mana yarpashpita wasinman cutin. Pullan-pagaspis, waränanpis cutinmanshi. Imay üra cutiptinpis, alli mincayga ricaj-ricajllash shuyan. Puncta tacariptin, juclash quičchapun. Ricchaycar shuyaptinshi, wasiyupis sumaj cushicun. Chayshi juclla alli müdananta rucacurir, mincaynintaraj jaran: «Ricchaycar shuyämar, allita rurashcanqui» nir.»

³⁹ Juctapis Jesús niran: «Wasinman suwa yaycunanta musyar, pipis manash puñucunmanchu. Manchäga suwa imancunatapis apananpita ricchaycarshi waran.

⁴⁰ Jamcunapis ricchaycaj-jina camaricushalla shuyarcaycämanquiman. Tayta Diosninchipa cačhan cashpä mana yarpashpita cutimushaj.»

Mincaywan tincuchiypa willapashan

San Mateo 24.45-51

⁴¹ Chaura Pedro tapucuran: «Tayta, ¿nuwacunallatachu tantiyaycächimanqui? ¿Llap-pan runatachu willapaycanqui?» nir. ⁴² Jesúsna niran: «Mä, tantiyacunquiman. ¿Mayganiquiraj alli mincayman, tantiyacuj mincayman tincunquiman? Mincay alli captin, tantiyacuj captin, capural cananpäshi wasiyuj čhuranga. Capuralga mincay-masincunata sumajshi rican. Jaran. ⁴³ Capuralnin shiminta čharcuptin wasiyuj čhayar, allipash rican. ⁴⁴ Sumaj tantiyacunquiman. Allita rurashanpita capuralpa maquinman llapanta čhuranga.»

⁴⁵ «Juyu capuralshi ichanga shungullančhu yarpačacunman: «Wasiyuj mana cutimungarächu» nir. Chayshi mincay-masincunata warmitapis, ullgutapis magar ushyan. Micur, upyallar juyäcun. ⁴⁶ Chaypis wasiyuj runa mana yarpashpita cutiramunga. Llutanta rurashanpitash juyu mincayninta mana cuyapaypa wascar ushyanga. Jarguringa: «Juyu-masiquicunawan juyämuy» nirshi.»

⁴⁷ «Wasiyupja shiminta wiaycarsi mana camaricuptin, llutanta ruraptin, chigay-pash ñacachinga. ⁴⁸ Mana musyayninwan llutanta ruraptinshi ichanga, yangallaraj ñacachinman. Wawacuna, sumaj tantiyacunquiman. Llapan runata Tayta Diosninch mincacun. Chaypis jamcunata capuralta-jina ñurashcashunqui. Chaymi alli mincay-jina llapantapis allillata ruranquiman.»

*Jesús-janan runacuna tincupänacushan
San Mateo 10.34-36*

⁴⁹ «Cay pachaman ninawan ushyacächij-yupay shamushcä. Ichanga mayna ninapis ratariycanman. ⁵⁰ Chaypis quiquiraj juyupa ñacashaj. Ñacayman ñhayayta musyar, juyupa llaquicü. Juclla ushyacächun.

⁵¹ «Shunguyquiúchu ama yarpanquichu: «Cay pachaman Jesús shamusha alli cawayta tarichimänanchipaj» nir. Runacuna mana alli cawayllaúchüchu cawanga. Manchäga ñasquicamashayqui-janan tincupänacuyúchu cawanquipaj. ⁵² Juc wasíchu quiquin-puralla tincupänacunga. Chiquinacunga. ⁵³ Papäninpis ullgu wamranta chiquinga. Wamranpis papäninta chiquinga. Mamanpis warmi wamranta chiquinga. Warmi wamranpis mamanta chiquinga. Suydanpis llumchuyninta chiquinga. Llumchuyninpis suydanta chiquinga. Ñasquicamashan-janan mana ñasquicucuna chiquinga.»

*Jesústa ashipashan
San Mateo 16.1-4; San Marcos 8.11-13*

⁵⁴ Chaypita llapan runata Jesús piñaparan: «Yana pucutayta ricar: «Tamyanga» ninqui. Änir, tamyan. ⁵⁵ Urapa wayrämuttin: «Usyanga» ninqui. Änir, usyan. ⁵⁶ Janan shungu runacuna, tamyanantapis, usyanantapis tantiyanqui. Ricay ñawiquíchu Tayta Diosninch mincacächiynipa ima-imata rurashätapis, ¿imanirtaj tantiyayta mana atipan-quichu?»

⁵⁷ «Chaynuy caycaptin, ¿imanirtaj Tayta Diosninchipa shungun imata munashantapis mana tantiyacunquichu? ⁵⁸ Tincuchiypa tantiyachishayqui. Pipis dimandashuptiqui, jatunman mana ñayallar, juclla ushyacächinquiman. Manchäga juiswan charichishunquipaj. Juisga wardiyacunawan carsilman apachishunquipaj. ⁵⁹ Carsilpita llap-llapanta pägarraj llucshimunquipaj.»

13

Wanacunanpaj piñapashan

¹ Chay wichallan waquin runa Jesústa willaran: «Tayta, ¿mandaj Pilato waquin Galilea runacunata wañuchishanta musyashcanquichu? Cuyachicuynincunata jaraptinshi, Tayta Diosninchipa wasiníchu wañuy cachisha. Yawarninpis pishtashan uywapa yawarninwan tallucashash» nir.

² Willaptin, Jesús niran: ««Chay Galilea runacuna jatun jucha aparicushan-pitaachi wañusha» nir yarparcaycanqui, ¿au? ³ Chaypis ama chapacunquichu. Jucha aparicuypita mana wanacurga, paycuna-jina wañuya tarinquipaj. ⁴ Chaynuypis: «Jerusalén marcachu Siloé turi juçhuptin, ñunca pusajwan (18) runacuna wañusha jatun jucha aparicushanpitaachi» nir yarparcaycanqui, ¿au? ⁵ Chaypis ama chapacunquichu. Jucha aparicuypita mana wanacurga, paycuna-jina wañuya tarinquipaj.»

Mana wayuj jígus yürawan tincuchiypa willapashan

⁶ Tincuchiypa willapar, Jesús niran: «Juc runapa ñacranchüshi mana wayuj jígus yüra caran. Wayuyninta ashirshi, jucnayllatasi mana tariranchu. ⁷ Chayshi mincayninta niran: «Quimsa watana mana wayunchu. Ñacralata wayaycan. Mana wayuycaptin, juclla muturiy.» ⁸ Mincayninthi ichanga niran: «Tayta, juclla ama mutushunrächu. Juc watacamanraj shuyaycushun. Ujtipärir, sapincunaman chullpata jaycapäshaj.»

⁹ Chullpata jaycupapti, wayunmanpishchi. Mana wayuptinmi ichanga, muturishunpaj.»

Curcu warmita Jesús allchacächishan

¹⁰ Diyawarda junaj juc shuntacäna wasíhu Tayta Diosninchipa shiminta Jesús willapäcuycaran. ¹¹ Supay curcuyächishan warmipis caycaran. Wäcacashalla puriran. Čunca pusajwan (18) watana ñacaycaran. ¹² Warmita ricar jayarcur, Jesús niran: «Mamacha, jishya cačharishcashunquinam.» ¹³ Chaynuy nir maquinwan yataycuran. Warmina dirichacäcur, Tayta Diosninchita alliman čhuraran.

¹⁴ Diyawardačhu curcu warmita allchacächiptin, shuntacäna wasipa mayur runa ullgucäcuran: «Sujta junaj arunchi. Alli diyáchu shamunquiman allchacächishunayquipaj. Diyawardačhu ama shamunquimanchu» nir.

¹⁵ Jesúsna niran: «Janan shungu runa, ¿imanirtaj alli-tucunqui? Quiquiquicunapis diyawardačhu bürüyquitawan türuyquita pascariycur, yacuta upuchinqui. ¹⁶ Uywata cačharishayqui-jina cay warmitapis cačharishcä. Auquillunchi Abrahampa willcan captinsi, yawar-masinchi captinsi, čunca pusajwan (18) watana mayur supay ñacaycächisha. Ñacaycächiptin, ¿manachu allchacächishuwan diyawarda captinsi?»

¹⁷ Jesúspa shiminta wiyar, chiqui runacuna pingayman čhayaran. Waquin runacunam ichanga Jesús allita rurashanpita jatunpa cushicuran.

Ñäpus muruwan tincuchiypa willapashan

San Mateo 13.31-32; San Marcos 4.30-32

¹⁸ Tincuchiypa willapäcur, Jesús niran: «¿Imawanraj Tayta Diosninchipa maquinčhu cawajcunata tincuchishuwan? ¹⁹ Paypa maquinčhu cawajcuna ñäpus muruwan tincun.* Juc runash wirtanman ñäpusta murusha. Acapalla muru captinsi, yüranshi atayäcurcusha. Callapancunačüpis pichuysacuna jishucärisha.»

Libadürawan tincuchiypa willapashan

San Mateo 13.33

²⁰ Yapaypis tincuchiypa willapäcur, Jesús niran: «¿Imawanraj Tayta Diosninchipa maquinčhu cawajcunata tincuchishuwan? ²¹ Paypa maquinčhu cawajcuna libadürawan tincun. Juc warmish ichiclla libadürawan ishcay aruba arinata chapusha. Ichiclla carpis, llapan arinatash jacachisha.»

Quićqui puncuwan tincuchishan

San Mateo 7.13-14, 21-23

²² Jerusalén marcapa aywar, Jesús marcan-marcan puriran Tayta Diosninchipa shiminta willapäcuraycur. ²³ Willapäcuptin, juc runa tapuran: «Tayta, ¿rasunpachu wallcajlla Tayta Diosninchipa maquinčhu cawanga?» nir.

²⁴ Jesúsna niran: «Quićqui puncupa callpacuycur yaycushayqui-jina callpacunquiman Tayta Diosninchipa maquinčhu cawanayquipaj. Juc junajman ama jitapanquichu. Achcaj runa maquinčhu cawayta munangapaj. Ichanga mana llapanchu camäpacunga. ²⁵ Sumaj tantiyanquiman. Wasiyuj puncunta wičhgacurcuptin, pipis mana yaycunnachu. Chaymi juclla Tayta Diosninchipa shiminta wiycunquiman. Manchäga llaquicuywan ninquipaj: «Wasillaryqui, Tayta. Puncuyquita quićchapaycallämäy» nir. Jayacuptiquisi: «Mana ricsillajchu. ¿Maypitash cacullanquipis? nishunquipaj. ²⁶ Chaura ninquipaj: «Tayta, ¿imanirtaj mana ricsimanquichu? ¿Micur, upur puriycaptinchisi, mana ricsimanquichu? Marcäcunačüpis Tayta Diosninchipa shiminta willacushayquita wiyashcä.» ²⁷ Chaypis nishunquipaj: «Mana ricsillajchu. ¿Maypitash cacullanquipis? Juchačhu arujcuna, ricaytapis mana munallajchu. Washata ayway.» »

* **13:19** San Mateo 13.31 nishanta ricanqui.

²⁸ «Puncupita jargushuptiqui, carullapita auquillunchi Abrahamta, Isaacta, Jacobta, Tayta Diosninchipa unay willacujnincunatapis ricanquipaj. Paycunata Tayta Diosninchipa ñaupančhu ricar, atayparaj waganquipaj. Juyupa ñacar quiruyquitapis učhunquipaj. ²⁹ Tayta Diosninchipa maquinčhu cawajcunam ichanga chay-tucuypita jutucanga. Llapanmi Tayta Diosninchipa ñaupallančhu micupacungapaj. ³⁰ Chay junaj allitucujcunata Tayta Diosninchichi pampaman čhuranga. Wiyacujcunatam ichanga alliman čhuranga runa-masincuna pampaman čhurash captinsi.»

Jerusalén marca runacunata Jesús llaquipashan

San Mateo 23:37-39

³¹ Waquin Fariseucuna čhayarcur, Jesústa niran: «Tayta, jucläman aywacuy. Mandaj Herodesshi wañuchishunayquipaj yarpaycan.» ³² Jesús niran: «Chay atuj-jina Herodesta willay: ‹Ishcay-quimsa junajllana supaycunata jargushaj. Jishyačhucunatapis allchacächishaj. Warantin llapanta čharcushaj.› ³³ Ima captinpis, Jerusalén marcamanraj čhayashaj. Jerusalén marcallačhu Tayta Diosninchipa willacujnincunata wañuchin.»

³⁴ Jerusalén marca runacunata llaquipar, Jesús niran: «Jerusalénllau Jerusalén, ¿imanirtaj Tayta Diosninchipa willacujnincunata wañuchinqui? ¿Imanirtaj cačhancunata wañuchinqui? Chipsancunata maman ujllananpaj shuntashan-jina shuntayta munashcaj. Munaptisi, wasguipämashcanqui. ³⁵ Chay-niraj cashayquipita marcayquipis ragäman tictranga. Nuwatapis mana ricamanquipänachu. ‹Tayta Diosninchichi cačhamushan runa alli ricash caycullächun› nir čhasquimashpayquim ichanga imayllapis ricamanquipaj.»*

14

Jakash runata Jesús allchacächishan

¹ Diyawarda junaj mayur fariseu runa Jesústa jayachiran micupacunanpaj. Waquin fariseu-masincuna achäquita ashipällar ricapaycaran. ² Ricapaycaptin, Jesúspa ñaupanman maquin-čhaquin jakash runa ičhicuycuran. ³ Jakash runata ricar, fariseucunatawan Moiséspa shiminta yačhajcunata Jesús tapuran: «Diyawardačhu, ¿jishyačhuta allchacächishuwanchu?» nir. ⁴ Paycunam ichanga upällacuycuran.

Mana rimacuptin, jakash runata Jesús allchacächishan. Jinarcur wasinman cačharcuran.

⁵ Fariseucunatana niran: «Diyawarda captin, wamrayqui, türuyqui yacu püsuman shicwaptin, ¿manachu utgaylla jurgurinquiman?» ⁶ Tapuptinsi, upällalla cacuran.

Micupacuyman jayachishanta piňapashan

⁷ Micupacuj čhayaj fariseucuna ñaupa-ñaupallačhu jamayta ashiycaran. Chaymi tantiyachicur Jesús niran: ⁸ «Warmi ashiyman jayachishuptiqui, ñaupa-ñaupačhu jamayta ama ashiniquichu. Ñaupačhu jamaraycaptiquish mayur runa čhayamuptin, ⁹ wasiyuj nishunquiman: ‹Jipaman witicuy mayur runata jamachinäpaj.› Chayrämi pingaytucush jipaman witicunquipaj.

¹⁰ «Chaymi pipis jayachishuptiqui, jawa-jawallačhu jamacunquiman. Jawačhu caycaptiqui, wasiyuj: ‹Ruriman yaycushun› nir ñaupaman jamachishuptiquim ichanga, llapan alli ricashunquipaj. ¹¹ Tayta Diosninchichi alli-tucujcunata pingayman čhuran. Tantiyacujcunatam ichanga alliman čhuran.»

¹² Micupacunanpaj jayachij runatana Jesús niran: «Micuya jaracur, ricsinacushayquicunallata, yawar-masiquicunallata, puchuy-puchuy janančhu cawajcunallata ama jayachiniquichu. Micurcachiptiquipis quiquiritaraj jayarcachir, ayniquita cutichishunquipaj. ¹³ Micuya jaracur, wacchacunata, cumllucunata, wijrucunata, japracunata jayachiniquiman. ¹⁴ Paycunata micurcachiptiqui, quiquin Tayta Diosninchichi ayniquita cutichishunquipaj. Cutichishunquipaj shiminta wiyacujcunata cawarachishan junaj. Chaura jatunpa cushicunquipaj.»

* **13:35** Salmo 118.26.

*Micupacuy tünawan tincuchiypa willapashan**San Mateo 22.1-10*

¹⁵ Jesúspa shiminta wiyar, juc jurpa nirán: «Tayta Diosninchipa maquinchhu cawar quiquinwan iwal micur, imaraj cushicushun, ¿au?»

¹⁶ Chaynuy niptin, Jesús nirán: «Juc runash micuya camaricush caran. Jurpuncunatapis achcajtash jayachiran. ¹⁷ Micuy chayaptin, sirbintincunata caácharan: <Jayachishä runacuna micuj shamuchun> nirshi. ¹⁸ Jurpuncunash ichanga jayachiptinsi, mana aywaranchu. Juc runash nirán: <Rantishä chacrata ricamushaj. Mana atipashächu.> ¹⁹ Juc-cajnash nirán: <Pichga yunta türuta rantirü. Sumajraj ricashaj. Mana atipashächu.> ²⁰ Jucninnash nirán: <Chayraj majachacashcä. Mana atipashächu.> Llapan jayachishancuna aywayta mana munashpan chapacuran.»

²¹ «Sirbinticunash wasiyujta llapanta willaycuran. Wasiyuj ullgur, nirán: <Canan micupacärinanchipaj tarishayqui runata juella jayamuy. Wacchacunatapis, macllucunatapis, wijrucunatapis, jaþracunatapis jayamuy.> ²² Sirbinticuna nishannuya ruraran. Jinarcur wasiyujta nirán: <Tayta, nimashayquicunata jayamushcä. Chaypis wasiqui jäcuycanraj.> ²³ Chaura wasiyuj nirán: <Chaquiqui chayashanpa ayway. Tincushayqui runacunata imanuypapis pushamuy wasíchu juntay-juntay micupacunanchipaj. ²⁴ Jayachishä wasgujcunam ichanga jaracushäta imaysi mana mallingapächu.»

*Jesúspa llupinpa ayway sasa cashan**San Mateo 10.37-38*

²⁵ Jesús aywaptin, achcaj runa aywähiran. Chaymi íchiycur Jesús nirán: ²⁶ «Pipis puríshimaya munar, llapan shungunwan puríshimächun. Mamanpis, taytanpis, warminpis, wamrancunapis, yawar-masincunapis jipaman ama cutichinmanchu.

²⁷ Shimita wizacujcuna imanuy ñacarsi, ruschu wañuyman chayarsi, ricay ñawiéchu alli cawanman. Manchäga puríshimaya mana camäpacungachu.

²⁸ «Sumaj tantiyacushun. Wasi rurajcunapis wasinta mana jallaycachillarshi, aypäpacunanta, mana aypäpacunantapis sumaj yarpaáchacun. ²⁹ Jallarishan wasita mana ushyaptinga, runacuna pampamansi churan: ³⁰ <Mana aypäpacuycar, chican-caray wasita jallarachisha. Upa runa> nir.

³¹ «Yapaypis yarpaáchacushun. Čunca waranga (10,000) murucucuna ishcay čunca waranga (20,000) murucucunata maganacur, manash íchipunmanchu. ³² Ičhipuya mana camäpacurshi, mayur mandaj caáhacunman: <Ama maganacushunchu. Allilla cawashun> nir. ³³ Chaymi yaparir-yaparir yarpaáchacunquiman. Puríshimaya munar llapanta jaguiriycur, nuwallata puríshimanquiman.

³⁴ «Caáchipis sumaj alli. Ichanga puchguynin illariptin, ¿puchguyninman yapay cutich-inquimanchuraj? Mana. ³⁵ Allpatapis mana jamyayächinnachu. Chullpamanpis mana talluchinnachu. Chaymi wicaparin. Rinriyuj carga, shimiita sumaj wizacunquiman.»

15*Ujracash uyshawan tincuchiypa willapashan**San Mateo 18.10-14*

¹ Jesús rimaycaptin, jillayta shuntaj chiqui runacunapis, waquin juchaáhu arujcunapis shiminta wiyananpaj jutucaran. ² Chaymi fariseucunawan Moiséspa shiminta yaáhajcuna Jesústa jamurparan: «¿Imanirtaj juchaáhu arujcunawan Jesús talluran? Iwal micunpis» nir. ³ Tincuchiypa willapar Jesús nirán:

⁴ «Juc runapash paáhac (100) uyshan caran. Jucta ujraycur, ¿manachu waquinta juc pachaman jutuycur ujrashan-cajta ashin tarishancaman? ⁵ Tarir, aparicurcurshi cushish wasinman apacun. ⁶ Llapan yawar-masincunatawan bisinuncunata jayachin:

〈Tünashun. Ujracash uyshäta tarirü» nirshi. ⁷ Juchaáhu aruj runa wanacuptinpis, taricash uyshapaj cusicushan-jina Tayta Diosninchipis, anjilcunapis cusicun. Isgun čunca isgunwan (99) alli runa captinsi juc juchaáhu aruj runa wanacuptin, janaj pachaáhu llapan sumaj cusicärin.»

Ujracash jillaywan tincuchiypa willapashan

⁸ Yapapjis tincuchiypa willapar Jesú斯 niran: «Juc warmish čunca jillayta chararan. Jucta ujraycur achquita ratachicuycurshi, pichananpawan tarishancaman ashin. ⁹ Tariycur, llapan yawar-masincunata, bisinuncunata jayachin: 〈Tünashun. Ujracash jillayniáta tarirü» nirshi. ¹⁰ Juchaáhu aruj runa wanacuptin, taricash jillaypaj cusicushan-jina Tayta Diosninchipa anjilnincunapis cusicun.»

Wawanta llaquipaj runawan tincuchiypa willapashan

¹¹ Juctapis tincuchiypa willapar Jesú斯 niran: «Juc runapash ishcay wamran caran. ¹² Shullca wamranshi taytanta niran: 〈Papä, čacrayquita račhishun. Dirichüta raquipaycamay.〉 Chaura papänin ishcantash ricachiran.

¹³ «Shullca wamranga manasi aycallatash imancunatapis ranticuycuran. Jinarcur caru marcapash aywacuran. Caruáhu shungun munashallanta rurarshi, jillaynintapis llapanta ushyaran. ¹⁴ Jillayninta ushyashallantash mučhuypis jallacuycuran. Chaura micunanpaj imapis manash caranchu. ¹⁵ Imansi mana captin arupacuya ashir, juc runaman čhayaran. Chay runa cuchillatash michichiran. ¹⁶ Mučhuy captin, juyupash yargaran. Cuchipa micuynintapis munaparan. Ichanga pipis manash jararanchu.

¹⁷ «Chayräshi yarpačhacuran: 〈Papäniápa piyunniñcuna micuy jananáhu cawan. Nuwam ichanga yargapita wañuyca. ¹⁸ Chaymi papäniñman cuticushaj. Čhayar, nishaj: «Papä, juchata aparicushcä. Shimiquitapis, Tayta Diosninchipa shimintapis mana wiyacushcächu. ¹⁹ Cananga piyunllayquipis cacushaj. Jucha-sapa caycapti, ama: 〈Wawä canqui» nimanquimanchu» nirshi. ²⁰ Yarpačhacuriycur, änir papäninman cuticuran. Wamranta caruta shaycamuja ricar, papänin jucllash tariparan. Llaquipashan macallacurcuran. ²¹ Mushéhincu wamrannash niran: 〈Papä, juchata aparicushcä. Shimiquitapis, Tayta Diosninchipa shimintapis mana wiyacushcächu. Jucha-sapa caycapti, ama: 〈Wawä canqui» nimaychu. ²² Papäninnash piyunniñcunata niran: 〈Wawä ushtucunapaj mushuj müdanata, llanguita, surtijata juclla apamuy. ²³ Micupacunanchipäpis manta türituta pishtay. Canan tünashun. ²⁴ «Wañucush canga» niycaptipis, wamrä cutircamusha. Illarish carpis, taricasha.〉 Chayshi mushéhincu wamra cutiyninta tüna jallacuycuran.

²⁵ «Shullcan čhayaptin, mayur wauguin čacračhüshi aruycaran. Wasiman yayucashančhüshi tünaycajta wiyan. ²⁶ Chaura papäninpa piyunniñtash jayaran: 〈¿Wasičhu imataj caycan?» nir. ²⁷ Piyunnash niran: 〈Shullcayqui taricasha. Alli čhayamusha. Cusicushpan papäniqi manta türitutapis pishtachisha.〉

²⁸ «Chaura mayur wauguin juyupa ullgurshi, wasiman čhayaptapis mana munaranchu. Chaymi llucshircur, papänin jayaran. ²⁹ Jayaptinsi mana munarshi, niran: 〈Papä, chaychica wata maquiquíhu juyä. Shimiquitapis llapanta wiyacushcä. Chaypis mana juc capshillatapis jumashcanquichu tünata rurar micupacunäpaj. ³⁰ Ñuñushniquipämi ichanga allinnin türitutaraj pishtaycachishcanqui. Payga runan-runan puricuj warmicunawanshi llapan jillayniquita ushyasha.〉

³¹ «Papäninnash niran: 〈Wawallau wawa, rasunpa maquíchu juyaycanqui. Chaymi llapan imäcunapis maquiquíchu caycan. ³² Shullcayquim ichanga wañushpita-jina cutircamusha. Ujracashpita-jina taricasha. Chaymi shungü achicyacäcuptin, tünananchi camacan.»

16

Yarpay-sapa capuralwan tincuchiypa willapashan

¹ Tincuchiypa willapar, purishijnincunata Jesús niran: «Puchuy-puchuy jananchu cawaj runash llapan imancunatapis capuralpa maquinman churaran. Chaypitarashi capuralnin suwapashanta mayaran. ² Chaura capurnalninta jayarcursi tapuran: «Suwapaycämashayquita runacuna willamasha. Mä, ima-imata charashallätapis willamay. Canancamalla arushcanqui» nir.

³ «Chaynuy niptinshi, shungullanchu capurnalnir yarpačhacuran: «Jargumaptin, ¿imawanraj cawashaj? Chakra aruyta mana jüchu. Mañapacuytapis pingacü. ⁴ Cananga ima ruraytapis musyäna. Yarpashäta rurapti aruy mana captinsi, marca-masicuna alli ricamanga» nir.»

⁵ «Yarpačhacuriycurshi, patrunninpa jaga-tucuj runacunata jayachiran. Juc chayaptin, tapuran: «¿Aycataj patrunni pa jagan caycanqui?» nir. ⁶ Jaga runanash niran: «Ishcay pačhac (200) läta wiram jagan caycä.» Capurnalnash niran: «Cananga papilta rurashun pullallanta patrunni ta cutichinayquipaj. Pačhac (100) läta wirallatana cutichinqui. ⁷ Chaypita juc jagatash tapuran: «¿Aycataj patrunni pa jagan caycanqui?» nir. Jucninnash niran: «Ishcay waranga (2,000) aruba rígum jagan caycä.» Capurnalnash niran: «Cananga papilta rurashun waquillanta patrunni ta cutichinayquipaj. Waranga pichga pačhac (1,500) aruba rígullatana cutichinqui.»»

⁸ «Chaura capurnalnir ima-imata rurashantapis mayar, patrunninshi niran: «Capuralniga llutanta ruraycarsi, yarpay-sapa. Sumaj cuyachicusha marca-masin alli ricananpaj.»»

Tincuchiypa willapariycur, purishijnincunata Jesús niran: «Juchačhu arujcuna Tayta Diosninchita mana manchapacorsi, quiquin-pura alli ricanacuya yačhan. Jamcunam ichanga alli ricanacuya mana yačhanquirächu: «Tayta Diosninchipa wawan caycanchi» nirsi. ⁹ Sumaj tantiyacunquiman. Cay pachačhu llapanwan alli ricanacunquiman. Jillayniqui captin, runa-masiquita yanapanquiman. Ushyapacaptiquisi, janaj pachačhu imaycamanpis Tayta Diosninchipa ūapančhu cawanayquipaj.»

¹⁰ «Sumaj wiyačunquiman. Ichicllata suwacur, achcatapis runa suwacun. Ichicllatapis mana yatapacur, achcatapis mana yatapacunchu. ¹¹ Sumaj tantiyacunquiman. Runa-masiquipa jillayninta yatapacuptiqui, imancunata pampata ruraptiqui, Tayta Diosninchipis mana yupachicushunquipächu. ¹² Jucpa imancunata yatapacuptiqui, pampata ruraptiqui, Tayta Diosninchipis irinsayquita mana jushunquipächu.»

¹³ «Juc mincaylla ishcaj patrunpa maquinčhu mana cawanmanchu. Ishcanwan shungun mana tincunmanchu. Ishcajpa maquinčhu cawar, juc-cajpita carupayllapa purir, juc-cajllaman jillicunga. Juc-cajta pampaman churara, juc-cajta alli ūawinwan ricanga. Jamcunapis jillayllaman yarparar, Tayta Diosninchita jungaycärinquipaj.»

¹⁴ Fariseucuna jillay-raycullar imatapis ruran. Chaymi Jesúspa shiminta wiyan, ashllir ushyaran: «Yangalla rimacun» nir. ¹⁵ Jesúsna niran: «Runacunapa ricay ūawillančhu jamcuna juchaynaj-tucunqui. Alli runa nishuptiquisi, Tayta Diosninchchi musyapäshunqui. Yarpashayquita millanäcun.»

¹⁶ «Ushyachicuj Juan willapäcushan wichancaman runacuna Moiséspa shimintapis, unay willacujcunapa shimintapis wiyačuran. Cananmi ichanga Tayta Diosninchipa shiminta willacuyca. Maquinčhu cawachinäpaj cačhamasha. Waquin runa imanuypapis llapan shungunwan shimita wiyačurcayan.»

¹⁷ «Cay pachawan janaj pacha ushyacaptinsi, Moiséspa shimin mana ichicllapis jungacangapächu. Llapanta charcucänan.»

¹⁸ «Juc runa majanta jaguiriycur juc warmiwan majachacar, juchata aparicun. Raquicash warmiwan majachacarpis, jucpa warminta llallipaycan.»

Lázarupawan puchuy-puchuy janančhu cawaj runapa willapan

¹⁹ Juc willapata willapar, Jesús niran: «Juc runash puchuy-puchuy janančhu cawar, achic-achicyaj müdanallata ushtucuj. Waran-waranshi tünaj. Sillullatash micuj.

²⁰ Puchuy-puchuy janančhu cawaj runapa wasin puncunéhünash pishipacuyčhu cawaj jiri ushyash Lázaro jitaraycaran. ²¹ Jirintasi allgucunash llajwar ushyaran. Yargaypita wañurshi, Lázaro yarpačhacuran: «Puchuy-puchuy janančhu cawaj runapa usupallantasi micurcüman» nir. ²² Unayllata Lázaro wañucuranshi. Wañucuptin, anjilcunash janaj pachaman Abrahampa ñaupanman shuntacuran. Manasi aycällatas puchuy-puchuy janančhu cawaj runapis wañucuranshi. Wañucuptin, pampaycuranshi.

²³ «Puchuy-puchuy janančhu cawash runa chacaj pachačhu ñacaycashančhüshi Lázaruta ricaran Abrahamwan-imá janaj pachačhu jamaraycámujta. ²⁴ Ricarshi, Abrahamta jayacuran: «Tayta Abraham, llaquipaycallämay. Lázaruta cačhamuy. Maquinta ushmarcachir, shamuchun jallüta ushmarcachinanpaj. Cay ninačhu juyupa ñacaycä» nir.

²⁵ «Abrahamnash niran: «Wawallau wawa, ¿pachačhu cawashayquita yarpanquirächu? Pachačhu puchuy-puchuy janančhu cawashcanqui. Cananmi ichanga ñacaycanqui. Lázaruna pachačhu ñacash carsi, canan allíčhu caycan. ²⁶ Jananmanpis chimpayta mana camäpacüchu. Jatun rajra raquiraycámanchi. Chaymi wacman-cayman pipis mana chimpanmanchu.»

²⁷ «Chaura puchuy-puchuy janančhu cawaj runash niran: «Tayta Abraham, jatunpa mañacuycushayqui. Papänipa wasinman Lázaruta cačhaycullay. ²⁸ Wauguicuna pichgajraj cawaycan. Wauguicuna juchata ama aparicuchunnachu. Mana piñacamuptin, ñacayman paycunapis chayamunga.» ²⁹ Abrahamnash niran: «Wauguiquicuna Moiséspa shimintapis, Tayta Diosninchipa willacujnincunapa shimintapis musyan. ¿Imanirtaj mana wiycunchu?» ³⁰ Puchuy-puchuy janančhu cawaj runanash niran: «Tayta Abraham, paycunapa shimillanta mana wiycunmanchu. Wañushanpita cawarircamur piñapaptimí ichanga, rasunpa wanacäringa.»

³¹ «Abrahamnash niran: «Moiséspa shiminta, willacujcunapa shiminta mana wiycur, wañushanpita cawarircamur piñapaptinsi, manam wiycungapishchu.» »

17

Juchaman mana chayananpaj piñapashan

San Mateo 18.6-7, 21-22; San Marcos 9.42

¹ Purishijnincunata Jesús niran: «Imallapis canga runa juchaman chayananpaj. Chaypis juchaman jančhacujcunata chigaypa Tayta Diosninchí ñacachinga. ² Wamra-jina llapan shungunwan nuwaman yupachicujcunata juchaman jančhajcunaga wañuyman chayachun. Jatun-caray marayta cuncanman wallgaparcur, yacu ruri-ruricaman wicaparinman. ³ Chaymi juchaman ama jančhanacunquichu.

«Runa-masiqui juchata aparicuptin, piñacunqui. Piñacushayquita wiycuptin, allina ricancunqui. Juchanta ama yarparanquinachu. ⁴ Juc junajllačhu jančhis cutipis juchata aparicuriycur: «Maná llutanta rurashänachu» nishuptiqui, imaypis junganquiman. Alli ñawiquiwan ricanquiman.»

⁵ Cačhancuna Tayta Jesústa mañacuran: «Tayta, llapan shungüwan yupachicunajpaj yanapaycallämay» nir.

⁶ Jesúsna niran: «Yangallapis yupachicur, tagay jatun yürata ninquiman: «Caypita washaman witicuy.» Niptiqui änir, llupicäcur jatun yacu püsucamansi witicaramunman.

⁷ «Piyuncuna yapyashanpita, michipacushanpita chayaptin, patron manash ninchu: «Jamacuy. Micushun.» ⁸ Manchäga nin: «Canan yanucaraycamuy. Micucurcuptiraj, micunqui.» ⁹ Nishanta llapanta ruraptinsi, manash ninchu: «Ima allish yanapämashcanqui.»

¹⁰ Chay-jina jamcunapis Tayta Diosninchipa maquinčhu cawarcaycanqui. Shungun munashanta rurar, ninquiman: «Tayta Diosninchipa maquinčhu cawaycā. Nimashallanta imatapis rurashcā.»

Chuncaj jaračhu jishyawan jishyajcunata Jesús allchacächishan

¹¹ Jerusalén marcaman aywar, Galilea uranpa, Samaria uranpa Jesús yarpuran.

¹² Juc marcaman čhayacaptin, čuncaj jaračhu jishyawan jishyajcuna ricaripuran.

¹³ Carullapita jayacuran: «Tayta Jesús, llaquipaycallämay, ari. Allchacaycachillämay» nir. ¹⁴ Jesúsna niran: «Cüracunaman ayway. Allchacashayquita ricachiy.» Cüraman aywaycashallančüna jaračhu jishyawan jishyajcuna änir allchacäcuran.

¹⁵ Jucnин allchacashanta tantiyacurir, cushish cuticullaran. Sumaj wiyächipaya Tayta Diosninchita alliman čhuraran: «Taytallau Tayta, ima allish llaquipämashcanqui» niycar. ¹⁶ Jesúspa ñaupanman čhayar, jungurpacuycuran: «Tayta Jesús, ima allish allchacächimashcanqui» nir. Jesúsman cutij runaga Samaria runa caran.

¹⁷ Jesúsna juturajcunata tapuran: «¿Manachu čuncaj jaračhu jishyawan jishyajcuna allchacasha? Waquin, ¿maytaj? ¹⁸ ¿Cay jäpa runallachu Tayta Diosninchita alliman čhuran? Waquinga Israel runa caycarsi, Tayta Diosninchita jungaycushačhi» nir.

¹⁹ Jungurparaj jäpa runata niran: «Jatariy. Yupachicamashayquipita allchacashcanqui. Aywacuyna.»

Tayta Diosninchipa maquinčhu cawaypita tantiyachishan

San Mateo 24.23-28, 36-41

²⁰ Waquin fariseucuna Jesústa tapuran: «¿Imaypitataj Tayta Diosninchipa maquinčhu cawashun?» nir. Jesúsna niran: «Maquinčhu cawashanchita musyananchipaj mana Tayta Diosninchitarächu ricananchi. ²¹ Mana pipis ninmanchu: «Cayčhu runacunata maquinčhu puriycächin. Washačhu maquinčhu puriycächin.» Mana ricarpis, waquininchí Tayta Diosninchipa maquinčhu cawarcaycanchi.»

²² Jinarcur purišijnincunata Jesús niran: «Ñacay captin, maquičhu cawapäriytasi munanquipaj. Washänajtapis munanquipaj. Chaypaj Tayta Diosninchicačhamasha. Ichanga mana ricamanquipänachu. ²³ Tayta Diosninchipa cačhan cayčhu caycan» nishuptiquisi: «Washačhu caycan» nishuptiquisi, ashij ama aywanquichu. ²⁴ Cutimupti, illaguta llapan ricashan-jina llapan runa ricamanga. ²⁵ Chaypis cananllaraj runacuna wasguimanga. Ñacachir ushyamanga.

²⁶ «Sumaj tantiyacunquiman. Tayta Diosninchicačhamasha. Yapay cačhamänan wichen runacuna cawashanwan cawarcaycangapaj. Noé cawashan wichenpis runacuna chaynuy cawarcaycaran. ²⁷ Lücu tamya mana jallarishancaman runacuna cawashanwan cawacurcaycaran. Jaucalla micucurcaycaran. Upucurcaycaran. Waquinpis majachacaycaran. Bütiman Noé jigacurcupintmi ichanga, lücu tamya jallacuycuran. Yacu limbucurcupint, llapan runa shugupacaypa wañuran. ²⁸ Lot cawashan wichenpis runacuna cawashanwan cawarcaycaran. Cushish micucuran. Upucuran. Rantipacuran. Murupacuran. Wasintapis rurapacuran. ²⁹ Sodoma marcapita Lot llucshicuriptinmi ichanga, nina tamya jallacuycuran. Llapan runata ushyaran. ³⁰ Tayta Diosninchicačhamaptin, cutimushä junajpis runacuna cawashanwan cawarcaycangapaj.

³¹ «Chay junaj wasi puncullačhu caycarsi, ruriman ama yaycunmanchu. Imancunatis apis ama jurgunmanchu. Chacrapitapis wasiman ama cutinmanchu. ³² Lotpa warmin imaman čhayashanta jungarunquiman. Payga jipaman ticrärishančhu cačhi rumiman ticracuriran. ³³ Pipis shungun munashallanta rurar, ushyacayman čhayangapaj. Shimitä wiyacurmi ichanga runa ñacachiptinsi, wañuchiptinsi, imaycamanpis Tayta Diosninchipa maquinčhu cawangapaj.

³⁴ «Chay junaj juc cämalláchu ishcaj puñuycaptin, juc-cajllata shuntacushaj. Jucnintam ichanga jaguiycushaj. ³⁵ Ishcaj warmi agacurcaycaptinpis, juc-cajllata shuntacushaj. Jucnintam ichanga jaguiycushaj.»*

³⁶ Chaura purishiijnincuna Jesústa tapucuran: «¿Maymantaj cutimuj aywanqui?» nir.

³⁷ Jesúsna niran: «Rimaypis purin. «Siucacunash micunanta ricar, maymanpis jutucan.» Cutimushätapis llapan runa mayanga.»

18

Tayta Diosninchita mañacuypita tantiyachishan

¹ Purishiijnincuna mana yamacällar Tayta Diosninchita mañacunanpaj willapar, tinuchiypa Jesús niran: ² «Juc marcachushi juyu juis caran. Tayta Diosninchita manash manchapacujchu. Runa-masintapis manash llaquipajchu. ³ Biyüda warmipis dimandacurshi puriycaran. Waran-waranshi juisman aywaj: «Dimandüta julla ushyacaycachipämay, ari» nir. ⁴ Juisga manash wiyaj-tucuranchu. Chaypita unayllatash yarpačhacuran: «Mana Tayta Diosninchipitachu cawä. Runa-masipis mana imanämanchu. ⁵ Chaypis cay warmita umäta mana nanächinanpaj mañacamashanta wiyashaj. Waran-warana mana yaycaycämunanpaj yanapaycushaj» nir.»

⁶ Willapariycur, Jesús niran: «Juyu juispita tantiyacunquiman. Juyu carsi, biyüda mañacushanta wiyashash. Washashash. ⁷ ¿Chayrächuraj Tayta Diosninchchi mana wiyashunquimanchu? Acracushan wawan caycaptiqui, ¿upa-tucungachuraj? Mana. ⁸ Pagas-junajpis mana yamacällar mañacuptiqui, julla washäshunqui. Chaypis janaj pachapita washänäpaj Tayta Diosninchchi cačhamaptin, ¿cay pachačhu tiyaj runacuna Tayta Diosninchipa maquinčhüchuraj cawaycangapaj?»

Ishcaj runapa willapan

⁹ Alli-tucuj runacuna juchaynaj-tucur waquinta pampaman čhuraptin, wiyächipaypa Jesús niran: ¹⁰ «Ishcaj runash Tayta Diosninchipa wasinman aywaran. Juc-caj caran fariseu, juc-cajna jillayta shuntaj chiqui runa. ¹¹ Fariseu runaga ičhicuycurräshi Tayta Diosninchita mañacuran: «Taytallau Tayta, jatunpa cushicullä. Waquin runa-jinachu mana juchata aparicü. Mana suwacüchu. Llutanta mana rurächu. Warmitapis mana jananpachichu. Tagay chiqui runa-jinachu mana caycä. ¹² Manchäga allillata rurä. Simänačhu ishcay cuti ayunä. Gänashäman-tupu jampa-cajta raquir, wasiquiman čhurä» nirshi.

¹³ «Jillayta shuntaj runash ichanga juyupa llaquicuran. Pingacuywan uysucuycur mañacuran: «Taytallau Tayta, llaquipaycallämay, ari. Pasaypa jucha-sapa runa cä» nir.»

¹⁴ Willapariycur, Jesús niran: «Tayta Diosninchchi chiqui runata llaquiparan. Juchantapis jungaycuran; fariseu runatam ichanga mana. Alli-tucujcunata Tayta Diosninchchi pampaman čhuran. Mana alli-tucujcunatam ichanga alliman čhuran.»

Wamracunapaj Tayta Diosninchita mañacapushan

San Mateo 19.13-15; San Marcos 10.13-16

¹⁵ Waquin runacuna Jesúzman čhayaran: «Yataycur mallwa wamräcupapaj Tayta Diosninchita mañacapamay, ari» nir. Wamracunata čhayachijta ricarmi ichanga, purishiijnincuna piñacuran.

¹⁶ Chaura Jesús niran: «Ama mičhaychu. Wamracunata apamuchun. Shacamuchun. Wamra alli shungu cawashan-jina alli shungu runacunallapis Tayta Diosninchiman yupachicushpan maquinčhu cawan. ¹⁷ Sumaj tantiyacunquiman. Tayta Diosninchipa maquinčhu cawanayquipaj wamracuna-jina wiyacunquiman. Manchäga mana camäpacunquipächu.»

* ^{17:35} Waquin Bibliačhu yapasha: «Ishcaj runa arupacuycaptin, juc-cajllata apacushaj. Jucnintam ichanga jaguiycushaj» nir.

*Puchuy-puchuy janančhu cawaj runawan Jesús parlashan
San Mateo 19.16-30; San Marcos 10.17-31*

¹⁸ Mayur Israel runa Jesústa tapuran: «Alli Tayta, ¿imatataj ruräman Tayta Diosninchipa ñaupančhu imaycamanpis cawanäpaj?» nir.

¹⁹ Jesúsnra niran: «¿Imanirtaj: ‘Alli’ nimanqui? Tayta Diosnillanchi alli. ²⁰ Moisés isquirbishanta musyanqui. Shiminčhu nin: ‘Majayquita ama jananpachinquichu. Ama wañuchicunquichu. Ama suwacunquichu. Runa-masiquita ama tumpanquichu. Mamayqui-taytayquitapis alli ricanquiman.» *

²¹ Chaura mayur runa niran: «Wamra cashäpita-pacha chaycunata llapallanta čharcushcä.»

²² Jesúsnra niran: «Jucrämi pishishunqui. Llapan imayquicunatapis ranticuycur, wachacunata aypuriy. Jinarcur purishimay. Chayraj imaycamanpis Tayta Diosninchipa maquinčhu cawanquipaj.» ²³ Chaynuy niptin, shungun ishquicäcuran. Puchuy-puchuy janančhu cawashpan juyupa llaquicuran.

²⁴ Llaquicuja ricar, Jesúsnra niran: «Puchuy-puchuy janančhu cawajcuna Tayta Diosninchipa maquinčhu cawananpaj sumaj sasa. ²⁵ ‘Camillu’ nishan jatun-caray uywa aujapa ñawinpa ushtucuya mana jushan-jina puchuy-puchuy janančhu cawajcunapis Tayta Diosninchipa maquinčhu cawayta mana junchu.»

²⁶ Chaura wiyajcuna parlanacäriran: «Chaynuy caycaptin, ¿piraj Tayta Diosninchipa ñaupanman čhayanga?» nir.

²⁷ Jesúsnra niran: «Runacuna ushyacajlla. Chaymi alli cawarpis, sasächicun. Tayta Diosninchipämi ichanga imapis mana sasachu. Payga munayniyuj pitapis ñaupanman čhayachinanpaj.»

²⁸ Pedruna niran: «Tayta, nuvacuna llapan imäcunatapis jaguiycur, purishiycaj.»

²⁹ Jesúsnra niran: «Sumaj tantiyacunquiman. Tayta Diosninchipa maquinčhu cawayta munaywan wasinta, majanta, mayurnincunata, shullcancunata, mamantaytanta, wamranta jaguijcunata ³⁰ ima-imapis mana pishingachu. Tayta Diosninchipa ñaupanman čhayarpis, mana ushyacaj cawaytapis čhasquingapaj.»

Quimsa cutipana wañuyman čhayananta Jesús musyachicushan

San Mateo 20.17-19; San Marcos 10.32-34

³¹ Chaypita čhunca ishcaywan purishijnincunata shuntarcur, Jesúsnra niran: «Jerusalén marcaman aywaycanchi. Unay willacujcuna nuwapaj rimashan llapan čharcanga. Runacunata washänäpaj Tayta Diosninchichi cačhamasha. ³² Chaypis Jerusalén marcačhu Israel-masicuna Roma runacunapa maquinman čhayachimanga. Paycuna pam-paman čhuramanga. Ashllir ushyamanga. Tuwapamanga. ³³ Sumaj wascamanga. Wañuchimanga. Wañuchimaptinsi, quimsa junajta cawarimushaj.» ³⁴ Purishijnincunam ichanga Jesúsnra rimashanta mana tantiyaranchu. Umanman mana yaycuranchu.

*Japra runata Jesús allchacächishan
San Mateo 20.29-34; San Marcos 10.46-52*

³⁵ Jerusalén marcaman aywaycashančhu Jericó marcaman Jesúsnra čhayaran. Marca yaycunančhu japra runa mañapacuycaran. ³⁶ Achcaj runa čhayashanta mayar, japra runa tapucuran: «¿Imataj caycan?» nir. ³⁷ Runacuna willaran: «Nazaret marca Jesúsnra shaycämun» nir. ³⁸ Chaura japra runa jayacuran: «Unay mandaj Davidpa willcan Jesúsnra, llaquipaycallämay, ari» nir. ³⁹ Ñaupaj runacuna ullgüparan: «Upälla» nir. Chaypis japra runa yapay callpaycur-callpaycur jayacuran: «Unay mandaj Davidpa willcan Jesúsnra, llaquipaycallämay, ari» nir.

⁴⁰ Ičhiycur, japrata Jesúsnra jayachiran. Čhayachiptin, tapuran: ⁴¹ «¿Imallačhütaj yanapäshayqui?» nir. Japrana niran: «Tayta, ñawi ricananta munä.» ⁴² Chaynuy

* ^{18:20} Éxodo 20.12-16; Deuteronomio 5.16-20.

niptin, Jesús niran: «Ricay. Yupachicamashayquipita allchacashcanqui.» ⁴³ Niptin, änir, ñawin quičacäcuran. Ñawin ricaptin, Jesústa puríshiran: «Ima allish Tayta Diosninchí allchacächimasha» nir. Waquin runacunapis japra runa allchacashanta ricar, Tayta Diosninchita alliman čhuraran.

19

Zaqueupa willapan

¹ Jericó marcaman Jesús čhayaran. ² Chay marcačhu Zaqueo jutiyuj runa tiyaran. Payga jillayta shuntaj runacunapa mandajnin car, puchuy-puchuy janančhu cawaran. ³ Jesús aywaycashanta mayar, Zaqueo sumaj ricayta munaran. Chaypis chay-chicaj runapa čhaupinčhu Jesús aywaycaran. Zaqueo tacshalla cashpan ricayta mana camäpacuranchu. ⁴ Mana camäpacur ñauparcur, juc yüraman jigacurcuran. Jesús yüra čhaquinpa aywanan caran. ⁵ Yüra čhaquinpa aywaycashančhu čhuquircur Jesús niran: «Zaqueo, yarpamuy. Wasiquičhu pachächimänayqui camacan.» ⁶ Zaqueuna juclla yarpuran. Cushi-cushilla wasinman pusharan.

⁷ Chaura waquin runacuna Jesústa jamurparan: «Juchačhu aruj runapa wasinčhüčhi pachacunga» nir. ⁸ Micupacurir, llapanpa ñaupančhu Zaqueo niran: «Tayta Jesús, wacchacunata imäcunatapis pullanta raquipushaj. Pipa imallantapis suwapash carga, čhuscu janapayyuja cutichishaj.» ⁹ Jesúna niran: «Zaqueo, auquilluyqui Abraham-jina wiycushayquipita yawar-masintiquita Tayta Diosninchí wamrachacushcashunqui. Juchayquitapis mana yarparanganachu. ¹⁰ Tayta Diosninchí cačhamasha. Juchačhu arujcunata ashircur, Tayta Diosninchiman cutichij shamushcä.»

Jillay čhasquij piyuncunawan tincuchiypa willapashan

¹¹ Jesúspa shiminta wiyaj runacuna yarpaycaran: «Tayta Diosninchipa maquinčhüna Jesús purichimäshun. Roma marca runacunata jargushun» nir. Llutanta yarpaptin Jerusalén marcaman čhayaycashančhu tincuchiypa willapar, Jesús niran: ¹² «Juc runash auturdä cananpaj čhuraptin, mayur auturdäman aywaran. Carguntawan sillonuta čhasquij caru marcacamanräshi aywaran. ¹³ Manaraj llucshirshi, čuncaj piyunnincunata jayachiran: «Cay jillayta cutimunäcaman mirachinqui. Llapaniquita chay-chicata jaguipuycaj» nir. ¹⁴ Marca-masincunash ichanga ricaytapis mana munaranchu. Chayshi mayur auturdäman waquinta cačhuraran: «Auturdä čhurashayqui runa cargunta ama čhasquinmanchu. Ricaytapis mana munallächu» nir.

¹⁵ «Chaypis mayur auturdä cargunmanshi čhuraran. Silluntapis cačhapuran. Chaura marcanman cutircurshi, piyunnincunata jayachiran: «Jillayníta mirachishcanquichullapa?» nir. ¹⁶ Punta čhayaj piyunninnash niran: «Tayta, jillayníqui čunca janapayta mirasha.» ¹⁷ Auturdänash niran: «Allita rurashcanqui. Ichicllatapis alli ricashayquipita čunca marcata maquiquiman čhurashaj.» ¹⁸ Juc-caj piyunninnash niran: «Tayta, jillayníqui pichga janapayta mirasha.» ¹⁹ Auturdänash niran: «Jampis allita rurashcanqui. Pichga marcata maquiquiman čhurashaj.»

²⁰ «Juc-caj piyunninnash jamurpar niran: «Tayta, catay jillayníqui. Jillayníquita mana yatapashcächu. Jipilläman jatircushcä. ²¹ Manchacuypa runa canqui. Jamashalla imatapis čhasquiyta munanqui. Mana murupacuycarsi, achca-achcata shuntayta munanqui. Chaymi manchacurä.» ²² Chaura auturdä runanash niran: «Manacaj runa canqui. Shimillaryui jitarpushcashunqui. Jamashalla imatapis shuyarashäta musyaycar, mana arucuycar achca-achcata shuntayta munashäta musyaycar, ²³ jillayníta jillay mirachijcunallamanpis jutunquiman caran. Cutimur, wawantinta shuntacüman caran.» ²⁴ Waquin piyunnintanash niran: «Jillay charashallantapis jičhurir, čunca janapaypa mirachij-cajta juycuy.»

²⁵ «Piyunnincunash niran: ‹Tayta, chay runa čunca janapayta jillayta charaycan.»
²⁶ Auturdä runanash niran: ‹Wiyacuptin, pitapis Tayta Diosninchi sumaj tantiyachinga. Mana wiycujcunatam ichanga ichicllata tantiyashallantapis jungaycachinga.
²⁷ Auturdä cayman yaycunäta mana munaj runatana apamuy. Ricay ñawičhu llapanta wañurachiy.» »

*Jerusalén marcaman Jesús Čhayashan
San Mateo 21.1-11; San Marcos 11.1-11; San Juan 12.12-19*

²⁸ Willapäcuya ushyarcu, mana jamallar Jerusalén marcaman Jesús aywaycaran.
²⁹ Betfagé marcaman, Betania marcaman čhayaycaran. Chay quinrančhu Ulibus punta caran. Ishcaj purišijnincunata cačhar, ³⁰ Jesús niran: «Wac chimpa tacsha marcaman aywariyucu. Čhayar, manta büruta tarinquipaj. Pipis mana muntacunrächu. Watarashanpita pascarir, apacamunqui. ³¹ Pascaptiqui pipis mičhäshuptiqui, ninqui: ‹Mandamajnütash mañanqui.» »

³² Puríshijcunana aywar, Jesúspa shiminman-tupu büruta tariran. ³³ Pascapacuycaptin, runacuna niran: «¿Imapätaj bürüta pascaycanqui?» ³⁴ Paycuna niran: «Mandamajni Jesússtash mañanqui.»

³⁵ Chaura büruta Jesúsman aparan. Jacuncunata shawaparcur Jesússta muntachiran.
³⁶ Bürun muntash Jerusalén marcaman Jesús aywaycaptin, runacuna cushicuywan jacuncunatapis caminuman mashtapuram. ³⁷ Jerusalén marcaman ricänan Ulibus punta uranpa yarpuptin, Jesúspa purišijnincuna llapanmi cushicäriran: «Tayta Diosninchi sumaj munayniyuj. Camacächiptin, Jesús jishyačhucunata allchacächisha. Supaycunatapis jargusha. Wañushcunatapis cawarachisha» nir. ³⁸ Llapallan cushicuywan japarparan:

«Tayta Diosninchi cačhamushan mandaj runa alli ricash caycullächun.
 Maquinčhu allilla purichimächun.

Janaj pachačüpis jatunpa cushicullächun» nir.*

³⁹ Runacuna cushicuptinsi, waquin fariseucuna Jesússta piñacuran: «Tayta, purišijniquicunata upällachiy» nir. ⁴⁰ Jesúsna niran: «Upällachipti, ruminapis cushicuywan rimarinman.»

⁴¹⁻⁴² Jerusalén marcaman yaycupaycashančhu marcata ricapärir, Jesús wagaran: «Jerusalén runacuna, allilla cawanayquita Tayta Diosninchi munan. Wasguimaptiquim ichanga tantiyacunayquita mana camacächishachu. ⁴³ Imayllaga juyupa ñacanquipaj. Cunčharyuyquicuna chapaycur-chapaycur magashunquipaj. ⁴⁴ Wasiqicunatapis ushyaypa jučhurachinga. Llapaniquita wañurachishunquipaj. Marcayquitapis ragällata jaguiyunga. Juyupa ñacanquipaj washänajta mana munashayquipita. Tayta Diosninchi cačhamashanta mana tantiyacushcanquichu» nir.

*Tayta Diosninchipa wasinpita rantipacujcunata jargushan
San Mateo 21.12-17; San Marcos 11.15-19; San Juan 2.13-22*

⁴⁵ Jerusalén marcaman čhayar, Tayta Diosninchipa wasinpa sawanninman Jesús yaycuran. Sawanpita ranticujcunata jargur ushyaran. ⁴⁶ Llapanta wicapar niran: «Tayta Diosninchipa shiminčhu nin: ‹Wasiga mañacamajcunallapaj.»* Jamcunam ichanga suwapa mačhayninman tigrachishcanqui.»

⁴⁷ Waran-waran Tayta Diosninchipa wasinčhu Jesús willapäcuran. Mayur cüracuna, Moiséspa shiminta yačhajcuna, mayur runacunam ichanga achäquita ashiycaran wañuchinanpaj. ⁴⁸ Chaypis mana tariranchu. Runacuna Jesússta mana cačhariranchu. Shiminta sumaj wiycaycaran.

* **19:38** Salmo 118.26. * **19:46** Isaías 56.7.

20

Jesús munayniyuj

San Mateo 21.23-27; San Marcos 11.27-33

¹ Juc cuti Tayta Diosninchipa wasinčhu Jesús willapácuycaran: «Shimita wiycáriy. Maquinčhüna Tayta Diosninchi purichimäshun» nir. Mayur cüracuna, Moiséspa shiminta yačhajcuna, mayur runacuna čhayarcur, Jesústa ² tapuran: «Tayta, ¿pitaj cačhamushcashunqui? ¿Pipa munaynинwantaj imacunatapis ruraycanqui?» nir.

³ Jesúsna niran: «Nuwapis mä, tapucushayqui. Willamaptiqui, nuwapis willashayqui.

⁴ Juanta ushyachicunapaj, ¿pitaj cačhamusha: Tayta Diosninchichu, runa-masillanchu? Mä, willamay.» ⁵ Chaura quiquin-pura parlanacáriran: «〈Tayta Diosninchi cačhamusha〉 niptinchi: 〈¿Imanirtaj mana wiycushcanquichu?〉 nimäshun. ⁶ 〈Runa-masinchicunalla cačhamusha〉 niptinchi, runacuna sajmaypa wañuchimäshun» nir. Runacuna Ushyachicuj Juanta čhasquicush caran: «Tayta Diosninchipa willacujnin» nir. ⁷ Chaymi Jesústa niran: «Tapumashayquita mana musyächu.» ⁸ Chaura Jesúspis niran: «Mana camäpacuptiqui, pí cačhamashanta nuwapis mana willashayquichu.»

Chacrayujwan tincuchiypa willapashan

San Mateo 21.33-44; San Marcos 12.1-11

⁹ Chaypita tincuchiypa willapäcur, Jesús niran: «Juc čacrayuj runash übasta mururan. Jinarcur čacra runacunata allimshaycurshi, juclä marcaman juyaj aywacuran.»

¹⁰ «Übas pallay čhayamuptin, uywaynintash cačhacuran: 〈Dirichüta shuntamuy〉 nir. Cačha čhayaptin allimshacuj runacuna sumaj magariycärirshi, jinallata jarguriran.

¹¹ Chaura čacrayuj juc uywaynintanash cačhacuran. Allimshacujcunana chaytapis ashlliran. Magar ushyarirshi, jinallata jarguran. ¹² Chaura čacrayuj juc uywaynintanash cačhacuran. Paytapis magar ushyariycurshi, jarguriran.»

¹³ «Chaura čacrayuj yarpačhacuran. Yarpačhacuriycurshi, niran: «Cuyay wamräta cačhacushaj. Paytaga manchapacunga» nir. ¹⁴ Čacrayujpa wamranta ricarshi, al-limshacujcuna quiquin-puralla parlanacáriran: 〈Papäninga tagay wamrallanpaj llapan imancunatapis jaguinga. Chaymi wañurachishun. Chaura cay čacra maquinchičhüna canga〉 nir. ¹⁵ Chaynuy nirshi, čacrayujpa wamranta charipäcuran. Čacranpita jargurcurshi, wañuy cachiran.

«Canan mä, willamay. Čacrayuj cutimur, ¿imataraj ruranga chay čacra runacunata?»

¹⁶ Chay čacra runacunata wañurachinga. Čacrantapis juctana allimshaycunga.»

Jesúspa shiminta wiyar, runacuna niran: «Chayta rurananchita Tayta Diosninchi ama camacächichunchu.» ¹⁷ Llapan runata ricapärir Jesús niran: «Chaura Tayta Diosninchipa shimin imapätaj niyan:

〈Wasi rurajcuna:

«Cay rumi mana allichu» nir wicapashantapis

Tayta Diosninchi simintuta jallarachinanpaj čhurasha.*

¹⁸ «Wicapash rumiman pipis tacacur, ushyacanga.

Runapa jananman rumi shicwar, nitiringa.»*

¹⁹ Mayur cüracunawan Moiséspa shiminta yačhajcuna wiycashanta tantiyacuriran. Chaymi Jesústa juclla chariyta munaran. Ichanga achcaj runa juturpaycaptin, runacunata manchacushpan mana chariranchu.

Jillayta čhurananpaj tapucusshan

San Mateo 22.15-22; San Marcos 12.13-17

* **20:17** Salmo 118.22. * **20:18** Isaías 8.14-15.

²⁰ Chaypis Jesústa charircur; Roma auturdäpa maquinman óhayachiya munaran. Ichanga achäquita mana tariranchu. Chaymi achäqui ashijcunawan watgachiran allitucullar tapunanpaj. ²¹ Achäquita ashijcuna Jesústa tapuran:

«Tayta, alli shungu cashayquita musyä. Pitapis Tayta Diosninchipa shimillanta willapanqui. Llapan runata alli ricanqui. ²² Chaymi tapucushayqui. ¿Mandaj Césarpaj jillayta óhurashuwanchuraj, manachuraj?» nir.

²³ Achäquita ashipashanta musyashpan Jesús niran: ²⁴ «Jillayniquita mä, ricachimay. Jillaychü, ¿pipa liträtuntaj caycan? ¿Pipa jutintaj isquirbiraycan?» Tapuptin, paycuna niran: «Mandaj Césarpa.» ²⁵ Jesúsna niran: «Mandaj Césarpata Césarpaj óhuray. Tayta Diosninchipata Tayta Diosninchipaj óhuray.»

²⁶ Achäqui ashijcuna ima rimapacuytapis mana camäpacuranchu. Runa ricay pantachiyta mana camäpacur: «Jesús allita riman, ¿au?» nir upällacaycäriran.

Wañushcuna cawarimunapita tapucushan

San Mateo 22.23-33; San Marcos 12.18-27

²⁷ Chaypita waquin saduceu runacuna Jesúsman óhayaran. Paycuna yarpaj: «Wañushcuna mana cawaringapächu» nir. Chaymi Jesústa niran: ²⁸ «Tayta Jesús, Moiséspa shimin nin: «Runa wañucur warminta wawaynajllata jaguiptin, wañucuj runapa wauguillan biyüdanwan majachacanman. Mushuj majanwan wamrata tarishan wañucuj runanpa jutinta apanga.»* ²⁹ Canan mä, tapucushayqui. Janchis wauguish caran. Juc wauguish warmiwan majachacaran. Ichanga warminta mana mirachillarshi wañucuran. ³⁰ Chaura juc-caj wauguinnash chay warmiwan majachacaran. Paypis mana mirachillarshi wañucuran. ³¹ Chay warmillawan majachacarcur-majachacarcur mana mirachillar, janchis waugui wañucuran. ³² Jipantaräshi warmipis wañucuran. ³³ Tayta, mä, willamay. Wañushanpita cawarcamur, chay warmi, ¿maygan wauguipa warmintaj canga janchiswan majachacash caycar? ¿Llapanpa warminchuraj canga?»

³⁴ Jesúsna niran: «Cay pachačhu cawashancamalla runacuna majachacan. ³⁵ Tayta Diosninchi acracushan runacuna cawarimur, janaj pachačhu mana majachacanganachu. ³⁶ Wañuymans yapay mana óhayanganachu. Cawarachishancunata wawanpana Tayta Diosninchi ricanga. Anjilcuna-jina mana ushyacangachu. ³⁷ Wañushcuna cawarinanta mayna Moisés musyachicuran. Isquirbisan libručhu willamanchi. Shira-shiračhu Tayta Diosninchi niran: «Moisés, unay auquilluyqui Abraham, Isaac, Jacob wañush carsi, cawaycan. Tayta Diosnin caycapti, manchapacaycäman.»* ³⁸ Cawaycajcunalla Tayta Diosninchita manchapacun; wañushcuna mana. Maquinčhu cawajcuna wañush carsi, cawaycan. ³⁹ Chaura waquin Moiséspa shiminta yačhajcuna niran: «Tayta, allita rimashcanqui.» » ⁴⁰ Chaypita-pacha pipis mana tapuparanchu.

⁴¹ Jesúsna niran: «¿Imanirtaj runacuna riman: «Washäcu unay mandajnинchi Davidpa willcan» nir? ⁴² Salmos libručhu quiquin David nin:

«Tayta Diosninchi Washäcuñita nisha:

«Mandäshimänayquipaj diričha-caj lädüman jamacuy

⁴³ cunčharyuyquicunata pampaman óhuranäcaman.

Nishayqui-nishayqui munashayquita rurachinquipaj.» *

⁴⁴ «¿Washäcu, rasunpachuraj Davidpa willcallan canga? ¿Runapa wamranchuraj canga? Au, paypitam. Chaypis quiquin mandaj David manchapacur, Taytachacuycan.»

Moiséspa shiminta yačhajcunata Jesús piňapashan

San Mateo 23.1-36; San Marcos 12.38-40; San Lucas 11.37-54

* **20:28** Deuteronomio 25.5-10. * **20:37** Éxodo 3.6. * **20:43** Salmo 110.1.

⁴⁵ Llapan runapa ricay ñawinčhu purišijnincunata Jesús niran: ⁴⁶ «Moiséspa shiminta yačhajcunapa llupinpa ama aywanquichu. Paycuna alli-tucullar ruçapäcushalla purin. Pi-maypis manchapacunanta munan. Shuntacána wasichüpis, micupacuychüpis ñaupa-ñaupallačhu jaman. ⁴⁷ Biyüdacunapa imancunatapis ushyapan. Jinarcur alli-tucur Tayta Diosninchita mañacuj-tucun. Chaypita Tayta Diosninchita sumaj ñacachinga.»

21

*Biyüda warmi cuyachicuyninta čhurashan
San Marcos 12.41-44*

¹ Tayta Diosninchipa wasinčhu puchuy-puchuy janančhu cawajcuna cuyachicuyninta čhurajta Jesús ricapaycaran. ² Biyüda warmipis pishipacuyčhu cawar, ishcay čhaniynaj-yupay jillayta čhurashanta ricaran. ³ Chayta ricar, purišijnincunata Jesús niran: «Sumaj tantiyacunquiman. Waccha biyüda mas achcata čhurasha puchuy-puchuy janančhu cawajcunapita. ⁴ Paycuna achcata čhurarpis, puchupacushallanta čhurasha. Waccha biyüdam ichanga llapan charashallantapis čhurasha. Chayllawan cawanán caran.»

*Tayta Diosninchipa wasinta jučhurachinanta musyachicushan
San Mateo 24.1-2; San Marcos 13.1-2*

⁵ Waquin runa parlaycaran: «Achic-achicyaycaj ruminawan Tayta Diosninchipa wasinta pirkasha. Sumaj cuyayllapaj, ¿au? Runacuna cuyachicuynintapis čhurasha Tayta Diosninchipa wasin achic-achicyaycaj cananpaj» nir. Jesúsna niran: ⁶ «Sumaj ricacuy. Imayllaga llapan ricashayqui ushyaypa ushyacanga. Rumiwan pirkararsi, llapanmi jučhurachish canga.»

*Runacuna imaman čhayananta musyachicushan
San Mateo 24.3-28; San Marcos 13.3-23*

⁷ Waquin runa Jesústa tapuran: «Tayta, ¿imaytaj Tayta Diosninchipa wasinta jučhuchinga? ¿Imanaypataj shimiQUI čharcucänanta musyashaj?» nir.

⁸ Jesúsna niran: «Pipis pantachishurunquiman. Achcaj runa shamunga: ‹Tayta Diosninchipa cačhamushan Washäcuj caycä. Cay pacha ushyacangana› nir. Imata nishuptiquisi, ama čhasquipanquichu. ⁹ Wacčhu-cayčhu wañuchinacuy jatariptinpis, ama mancharin-quichu. Chaycunaraç cangapaj. Chaypis cay pacha mana ushyacangarächu.

¹⁰ «Cay pacha ushyacänanpäga marcan-marcan wañuchinacunga. ¹¹ Chay-tucuychüpis pacha juyupa sicsicyanga. Mučhuy captinpis, yargaywan runacuna wañunga. Juyu jishyapis timpuringa. Janaj pachačüpis mana ricashanchicunata ricar, mancharinquipaj. Sicsicyanquipaj. ¹² Chaycunaman mana čhayaptillayqui, jaticačhar ushyashunquipaj. Čhasquicamashayqui-janan mayur Israel runacunapa maquinmanpis, carsilcunamanpis čhayachishunquipaj. Roma auturdäcunamanpis, mandajcunapis rišu apashunquipaj.

¹³ «Wacpa-caypa purichishuptiquisi, shimiQUITA ama amucurcunquichu. Manchäga pi-maytapis nuwapita willapanqui. ¹⁴ Ama yarpačhacunquichu: ‹Chapacunäpaj, ¿imataraj rimashaj?› nir. ¹⁵ Chapacunayquipaj quiqiümi yarpächishayqui. Yarpächishäta rimaptiqui, pipis mana ičhipushunquipächu. Pipis mana achäquita taringachu.

¹⁶ «Čhasquicamashayqui-janan mamayqui-taytayquisi, wauguiquicunasi, yawar-masiquicunasi chiquishunquipaj. Paycunapis auturdäcunapa maquinman čhayachishunquipaj. Waquinniquita wañuchishunquipaj. ¹⁷ Čhasquicamashayqui-janan llapan runa chiquishunquipaj. ¹⁸ Chaypis ama llaquicunquichu. Tayta Diosninchita mana jungashunquipächu. Maquinpita mana pipis jurgushunquipächu. ¹⁹ Chaymi jipaman ama cutircunquichu. Mana yamacällar shimiTA wiycuptiqui, imaycamanpis maquinčhu Tayta Diosninchita cawachishunquipaj.

²⁰ «Tayta Diosninchipa wasin jučhunanpaj wallcana pishiptin, jäpa murucucunapis Jerusalén marcaman čhayapunga. ²¹ Chayta ricar Judea quinrančhu tiyar, puntacunaman jishpicäriy. Marcačhu tiyar, čhacracunaman jishpicäriy. Čhacrapitapis marcayquiman ama cutiychu. ²² Chay wichan shiminman-tupu Tayta Diosninchchi mana wiycujcunata ñacachinga.

²³ «Ñacachishan wichan llapan Israel runacuna juyupa ñacanga. Jishyaj warmicunapis, pishi wamrayujcunapis cuyapaypaj ñacanga. ²⁴ Waquin runa cuchur ushyash wañunga. Waquintana watacurcur ushyashta jäpa marcacunaman apanga. Jäpa runacuna Jerusalén marcata ñacachir ushyanga Tayta Diosninchchi jitashan junajcaman.»

*Tayta Jesúspa cutimunanpita musyachicushan
San Mateo 24.29-35, 42-44; San Marcos 13.24-37*

²⁵ «Intipis, quillapis, istríllacunapis juc-nirajman ticracuringa. Lamar yacupis bunyaypa-bunyaptin, may-chayčüpís runacuna mancharinga. Tantiyaytapis mana atipangachu. ²⁶ Janaj pachatapis Tayta Diosninchchi tapsir ushyaringa. Chaymi runacuna manchariyllawan wañucäcungaraj: «¿Imamanraj čhayashun, au?» nir. ²⁷ Chay junaj Tayta Diosninchchi cačhamaptin munayniyuj caycar, pucutay janančhu achic-achicyaycar cutiycämujta ricamanquipaj.* ²⁸ Rimashäcuna Čharcuptin, cushicärinquiman. Ama llaquicärinquimanchu. Washänäpämi cutiramushaj.»

²⁹ «Jígus yúrawan tincuchiypa tantiyacushun. ³⁰ Yüran chillguiptin, tamya quilla jallaycunanta musyanchi. ³¹ Chay-jina willapashäcuna Čharcuptin, cutimunä caycashanta tantiyacärinquipaj. Cutimupti, maquinčhüna Tayta Diosninchchi runacunata purichinga. ³² Sumaj tantiyacunquiman. Waquinniquipa ricay ñawiquíchu llapan Čharcucanga. ³³ Janaj pachapis, cay pachapis ushyacanga. Šimümi ichanga mana imaysi jungacangapächu.»

³⁴ «Chaymi sumaj tantiyacärinquiman. Shunguyqui munashallanta ama ruranquichu. Upyllačhu ama cawanquichu. Cay pachačhu cawanayquipaj yarpačhacullar jungaycamärunkiman. Mana yarpashpita cutiramushaj. ³⁵ Cay pachaman cutimushä junaj pipis mana jishpingachu. Wiyacamajcunata washäshaj; juchačhu arujcunatam ichanga mana. ³⁶ Chaymi Tayta Diosninchipa cačhan capti, cutimunäta shuyaj-shuyajlla cawanquiman. Mana yamacällar Tayta Diosninchita mañacunqui jishpichishunayquipäpis, ñaupäman cushish čhayachishunayquipäpis.»

³⁷ Waran-waran Tayta Diosninchipa wasinčhu Jesús willapäcuran. Chacaypam ichanga Ulíbus punta quinrančhu pachacuran. ³⁸ Runacunapis waran-waran tutalla aywaran Tayta Diosninchipa wasinman Jesúspa shiminta wiyaj.

22

*Jesústa charinanpaj parlanacushan
San Mateo 26.1-5, 14-16; San Marcos 14.1-2, 10-11; San Juan 11.45-53*

¹ Chay wichan Israel runacunapa «Libadüraynaj tanta» nishan fiestan yaycaycämuran. Chay fiestata ricsij: «Pascua» nir. ² Chay junajcuna mayur cüracunawan Moiséspa shiminta yačhajcuna parlanacuran: «Jesústa pacayllapa wañurachishun» nir. Runacunata manchacur, pacayllapa wañuchiyya munaran.

³ Supayna Judas Iscariotita maquichacur yarpächiran Jesústa wañuyman jitarpunapaj. Chaymi Jesúspa puríshijnin carsi, ⁴ mayur cüraman, Tayta Diosninchipa wasinta täpacunapa capitanninman aywaran: «Jesústa charishishayqui» nir. ⁵ Chaura paycuna jatunpa cushicur: «Jillarya jushayqui» nir. ⁶ Chay junajpita-pacha charij-charijllana caycaran runa mana caycaptin mayčüpís Jesústa charinanpaj.

* **21:27** Daniel 7.13.

Puríshijnincunawan Pascua micuyta Jesús micushan

San Mateo 26.17-29; San Marcos 14.12-25; San Juan 13.21-30; 1 Corintios 11.23-26

⁷ Pascua fiesta änir chayamuran. Chay fiestachu Israel runacuna libadüraynaj tantata micuj. Acrashan cashnitapis pishtaj. ⁸ Jesúsna Pedrutawan Juanta cačharan: «Mä, ayway. Pascua micuyta camaricamuy» nir. ⁹ Paycuna tapuran: «¿Maychütaj camaricamushaj?» nir.

¹⁰ Jesúsna niran: «Jerusalén marcaman chayaptiqui, puyñullawan runa yacuta apaycajta ricanquipaj. ¹¹ Jipallanta aywanqui. Wasiman yaycuption, wasiyuja ninqui: ‹Tayta Jesús cačhamasha. ¿Maychütäshi wasi jäcuycan puríshijnincunallawan Pascua micuya micunapaj?» ¹² Paynam camarishallata jäcuj altusninta ricachishunquipaj. Chayllačhu pishijcunata camaricunqui.»

¹³ Chaynuy niptin, puríshijnincuna aywar, Jesúspa shiminman-tupu llapantapis tariran. Chayllačhu Pascua micuya camaricuran.

¹⁴ Chacas-chacasna cačhancunawan micunapaj Jesús jamacuycuran. ¹⁵ Nircur niran: «Wañuy mana chayapamaptillan, llapaniquwan Pascua micuya sumaj munashcä. ¹⁶ Cananpita Pascua micuya mana micushänachu. Llapanchita Tayta Diosninchi maquinman jishpichimaptinchiraj, yapay micushunpaj.»

¹⁷ Chaypita bünuyuj cùpata aptacurcur niran: «Taytallau Tayta, ima allish tarichillämashcanqui.» Cačhancunatana niran: «Cay cùpallapita llapaniqui upuchinacuy. ¹⁸ Sumaj tantiyacunquiman. Cananpita bünuta mana upushänachu. Llapanchita Tayta Diosninchi maquinman jishpichimaptinchiraj, upushaj.»

¹⁹ Chaypita tantata aptacurcur, niran: «Taytallau Tayta, ima allish tarichillämashcanqui.» Jinarcur tantata paquircur-paquircur, aypuran: «Catay. Cay tanta quiquími caycä. Jamcuna-raycur wañuyman chayashaj. Chaymi tantata paquipanacur, washänaj-raycur wañuyman chayashäta yarparämanqui» nir.

²⁰ Micuya ushyarcur juc bünuyuj cùpata aptacurcur, niran: «Cay bïnu yawarnimi. Washänaj-raycur wañuyman chayapti, yawarni jičhanga. Yawarniwanraj parlanacushanta juctana Tayta Diosninchi charcucaycächin.»

²¹ «Nuwanchiwan micujmi wañuyman jitarpamanga. ²² Tayta Diosninchi cačhamasha. Quiquin camacächiptin, wañuyman chayashaj shimin charcucänanpaj. Jitarpamaj runam ichanga juyupa ñacanga.» ²³ Chaura cačhancuna tapunacuran: «¿Mayganinchiraj wañuyman jitarpushun?» nir.

Munayniuj cayta ashijcunapita rimashan

²⁴ Chaypita Jesúspa cačhancuna mandaj cayta ashishpan quiquin-puralla piñanacuran.

²⁵ Chaymi Jesús niran: «Jäpa runacuna juc-niraj cawashanta musyanqui. Paycuna Tayta Diosninchita mana manchapacunchu. Mandajnincunapis ullgurcur-ullgurcur, nishan-nishan marca-masincunata imatapis rurachin. Pipis apärinanta mana munanchu. Allitucushpán pipis: ‹Llaquipäcuj runa› ninanta munan. ²⁶ Jamcunam ichanga chaynuy ama canquimanchu. Mayur runa carpis, ama mayur-tucunquimanchu. Mandaj carpis, llapanta yanapanquiman. ²⁷ Mä, tapucushayqui. Runacuna, ¿pitataj alli ñawinwan rican: mísáchu jamajtachu, micuy jaracujtachu? Mayur runa captin, mísáchu jamajta alli rican, ¿au? Chaypis nuwaga llapaniquita jarashcaj.»

²⁸ «Ñacapacuptisi, jamcuna shacyächimashcanqui. Mana cačharaycamashcanquichu.

²⁹ Chaymi mandaj canápaj Papäni churamashan-jina nuwapis mandaj canayquipaj churashayqui. ³⁰ Mandaj carga, jamarashäčhu jamachishayquipaj. Micushäčhu micunquipaj. Čhunca ishcaywan casta Israel-masiqicunatapis maquiquiman churashaj. Paycunata mandanquipaj.»

Pedro wasguinanta Jesús musyachicushan

San Mateo 26.31-35; San Marcos 14.27-31; San Juan 13.36-38

³¹ Chaypita Simón Pedruta Jesús niran: «Simónllau Simón, wiacamashayquitapis, mana wiacamashayquitapis llapaniquita mayur Supay musyapayta munaycäshunqui.* Quiquin Tayta Diosninchita mañacusha musyapäshunayquipaj.

³² Maquichacushunquipaj. Chaypis mayna Tayta Diosninchita mañacushcä maquinpita mana witicunayquipaj. Chaymi wanacurir, willacuj-masiqunata shacyächinqui.»

³³ Pedruna niran: «Tayta, wiéhgachishuptiquisi, wañuchishuptiquisi, mana imaysi jaguirishayquipächu.»

³⁴ Jesúsna niran: «Pedro, mana ricsij tucumanquipächu. Gällu mana cantaptillan, quimsa cutiparaj wasguimanquipaj.»

Imaman chayanantapis musyachicushan

³⁵ Chaypita caéhancunata Jesús niran: «Ñaupata wallguiynajta, jipiynajta caéhäräj. ¿Imallasi pishishcashunquichu?» Paycunana niran: «Mana imapis pishiimashachu.»

³⁶ Jesúsna niran: «Cananmi ichanga camaricuy. Jillayniquita, jipiiquita camaricuy. Cuchilluyqui mana captin punchuyquita ranticucur, juc cuchilluta rantiy. ³⁷ Sumaj wiyamay. Nuwapaj Tayta Diosninchipa shiminchhu nin:

⟨Juchaáhu aruja-jina runacuna ricanga.»*

Rimashan chayamunanpaj wallcallana pishin.»

³⁸ Caéhancunana niran: «Tayta, ishcay cuchilluta charaycä.» Jesúsna niran: «Amana rimashunchu. Mana tantiyamanquichu.»

Getsemani chacraáhu Jesús mañacushan

San Mateo 26.36-46; San Marcos 14.32-42

³⁹ Chaypita imapis aywashan-jina puríshijnincunawan-ima Ulíbus punta quinranman Jesús cuticuran. ⁴⁰ Pacharanman chayar, niran: «Mana wasguimänayquipaj Tayta Diosninchita mañacäriy.»

⁴¹ Carushman aywaycur jungurpacucur, mañacuran: ⁴² «Papä, camacaptin, shuyarámaj ñacay ama chayapämanmanchu. Jishpipta munaptisi, shungü munashan ama camacächunchu. Manchäga munashayquinylla llapanpis caycullächun» nir.

⁴³ (Llaquish mañacuycaptin anjil chayarcur, Jesústa shacyächiran. ⁴⁴ Payga juyupa llaquicur, llapan shungunwan Tayta Diosninchita mañacuran. Jananpitapis yawar-jinaraj südaynin shuturan.)*

⁴⁵ Mañacuya ushyaycur, puríshijnincuna juturashanman cutiran. Paycuna llaquicuylawan puñucäcuran. ⁴⁶ Chaymi niran: «¿Puñurcaycanquiéhim? Ricchapacuy. Mana wasguimänayquipaj Tayta Diosninchita mañacäriy.»

Jesústa rísu charishan

San Mateo 26.47-56; San Marcos 14.43-50; San Juan 18.2-11

⁴⁷ Jesús rimaycaptillan, puríshijnin cashpansi Judas chayapuran achcaj runata pushacurcur. Jesústa wamayaj-tucur macallarcuran.

⁴⁸ Jesúsna niran: «Judas, ¿Tayta Diosninchipa caéhan caycaptichu, wamayämaj tum-paylla wañuyman jitarpaycamanqui?»

⁴⁹ Charinanta musyar, puríshijnincuna niran: «Tayta Jesús, ¿cuchilluwanchu washäcushun?» ⁵⁰ Chaynuy nir jucnin mayur cürapa uywayninpä dirichicaj rinrinta rugupariran. ⁵¹ Jesúsna niran: «Ama ruraychu.» Jinarcur runapa rinrinta yataycullar, allchacärachiran.

⁵² Jesústa charij aywarunaj mayur cüracuna, Tayta Diosninchipa wasinta täpajcuna, mayur runacuna. Paycunata Jesús niran: «¿Imatataj yarpanqui? ¿Suwa cashätachu?»

* ^{22:31} Pedrupa juc-caj jutin caran: «Simón.» * ^{22:37} Isaías 53.12. * ^{22:44} Waquin Bibliaáhu cay birsiculucuna mana canchu.

¿Imanirtaj jiruyquiwan-jiruyquiwan, cuchilluyquiwan-cuchilluyquiwan shamushcanqui? ⁵³ Waran-waran Tayta Diosninchipa wasinčhu ricamashcanqui. ¿Imanirtaj mana charimashcanquichu? ¿Imanirtaj supay purishan üra shamushcanqui? Supay sha-cyächishuptiqui munashanta rurar, shamushcanqui. Chaypis Tayta Diosninchiraj lla-panta camacächisha.»

Jesústa Pedro wasguishan

San Mateo 26.57-58, 69-75; San Marcos 14.53-54, 66-72; San Juan 18.12-18, 25-27

⁵⁴ Jesústa charircur, mayur cürapa wasinman aparan. Caru jipallanta Pedrupis aywaran. ⁵⁵ Waquin runacuna cürapa wasinman chayar sawan rurinčhu ninata ratarcachir, mashacuycaran. Pedrupis mashacuycaran. ⁵⁶ Mashacuycaja ricapärir, cürapa uywaynin jipash niran: «Cay runapis Jesúswan purij runa.» ⁵⁷ Pedrum ichanga wasguiran: «Mana ricsichu» nir.

⁵⁸ Mayllanta juc runapis Pedruta ricar, wiyächipapya niran: «Jampis Jesústa puríshishcanqui, ¿au?» Pedruna niran: «Mana.»

⁵⁹ Chaypita mana aycällatasi juc runapis niran: «Cay runa Galilea marca runam, ¿au? Jesúswan purish canga.»

⁶⁰ Pedruna yapay wasguiran: «Mana. Imatash rimacullanquipis» nir. Rimaycaptillan, gällu cantariycuran.

⁶¹ Jesúnsna ticrarcur, Pedruta ricäriran. Ricäriptin, Pedro yarpäriran: «Mana ricsij tucumanquipächu. Gällu manaraj cantaptillan, quimsa cutipa wasguimanquipaj» nishanta. ⁶² Tayta Jesúspa shiminta yarpärir sawan wajtaman llucshiycur, llaquicuywan juyupa wagaran.

Jesústa pampaman čurashan

San Mateo 26.67-68; San Marcos 14.65

⁶³ Täpaj runacuna Jesústa puclacur ushyaran. Wascaran. ⁶⁴ Ñawinta chaparcur, magar ushyaran: «¿Pi magashushayquitapis musyanquichu?» nir. ⁶⁵ Tucuya ashllir ushyaran.

Mayur Israel runacunapa sisyunninman Jesústa apashan

San Mateo 26.59-66; San Marcos 14.55-64; San Juan 18.19-24

⁶⁶ Pacha wararcuptin, mayur runacuna, mayur cüracuna, Moiséspa shiminta yačhajcuna jutucaran. Mayur Israel runacunapa sisyunninman Jesústa aparan.

⁶⁷ Paycuna Jesústa tapuran: «Mä, willamay. ¿Tayta Diosninchichi cačhamushan Washäcučchu canqui?» nir. Jesúnsna niran: «(Au. Nuwa caycä) niptisi, mana čhasquicamanquimanchu. ⁶⁸ Imallata tapuptijsi, mana willamanquimanchu. ⁶⁹ Imata yarpaptiquisi, Tayta Diosninchichi cačhamasha. Cananpita Munayniyuj Tayta Diosninchipa diričha-caj lädunčhu jamashaj mandäshinäpaj.»*

⁷⁰ Jesúspa shiminta wiyar, llapan ullgucäcuran: «¿Jamchush Tayta Diosninchipa Wawan canqui?» nir. Jesúnsna niran: «Rasullanta rimashcanqui.»

⁷¹ Paycunana niran: «Tistiguta ama ashishunnachu. Wañuchinanchipaj quiquinpa shimillan jitarpuycusha. Shiminpita musyanchi Tayta Diosninchita apärishanta.»

23

Mandaj Pilatupa dispächunman Jesústa apashan

San Mateo 27.1-2, 11-14; San Marcos 15.1-5; San Juan 18.28-38

¹ Jinarcur mayur Israel runacuna Jesústa aparan mandaj Pilatuman. ² Dispächunman čhayachir, niran: «Cay runa marca-masicunatash shimiayacan Roma auturdäcunata ticrapunapaj. Mandaj Césarpaj jillayta čhuranantapis manash munanchu. Mandaj carshi,

* **22:69** Salmo 110.1.

quiquinpa maquinchú purichimäshun. Washämänanchipäshi cargunman Tayta Diosninchi churasha.»

³ Mandaj Pilato Jesústa tapuran: «¿Rasunpachu Israel runacunapa mandajnin canqui?» nir. Jesúsnra niran: «Quiquipi rimashcanqui.»

⁴ Mayur cüracunatawan llapan runata mandaj Pilato niran: «Tantiyapti, cay runa mana juchallicushachu.» ⁵ Paycunam ichanga niran: «Rasunpa, llapan Judea runata shimiaycan. Galilea quinranpita-pachash jallaycamusha. Caychüpis shimiayacashash.»

⁶ Chaura mandaj Pilato tapuran: «¿Cay runa rasunpachu Galilea quinranpita?» nir.

⁷ Galilea runa cashanta willaptin, mandaj Herodesman Jesústa apachiran. Mandaj Herodesga Galilea marcapa mandajnin caycar, chay junajcuna Jerusalén marcačhu caycaran.

⁸ Jesústa chayachiptin, mandaj Herodes sumaj cushicuran. Unaypita-pacha willapanta mayar, Jesúswan tincuyta munaran. Runacuna willash caran: «Jesús jishyačhucunata allchacaycächin. Supaycunata jargun. Wañushcunatas cawarachin. Tayta Diosninchi camacächiptinshi, llapanta ruraycan» nir. Chaynuy willaptin, mandaj Herodespis imatapis ricayta munaran. ⁹ Chaymi tucuy-tucuyta Jesústa tapuran. Jesúsmi ichanga imatapis mana rimacuptinsi, mayur cüracunawan Moiséspa shiminta yačhajcuna tucuy-tucuypta tumpaycaran.

¹¹ Mandaj Herodespis, murucuncunapis Jesústa pampaman churaran. Asipänan cashpan jatun auturdäpa achic-achicyaycaj müdananta ushtuparan. Jinarcur mandaj Pilatupa dispächunman cutichiran. ¹² Chay junaj mandaj Herodeswan mandaj Pilato chiquinacuycashančhu allina ricanacuran.

Jesústa rusčhu wañuchinanpaj aunishan

San Mateo 27.15-26; San Marcos 15.6-15; San Juan 18.39-19.16

¹³ Mandaj Pilatuna mayur cüracunata, mayur runacunata, pampa runacunata jayachiran. ¹⁴ Jinarcur niran: «Jamcuna: «Roma auturdäcunata ticrapunanchipaj shimiasha» niptiquisi, juchanta mana taríchu. Ricay ñawiquičhu sumaj tapurpis, llutan rurashanta mana taríchu. ¹⁵ Mandaj Herodespis juchallicushanta mana tarishachu. Chaymi dispächüman cutichimusha. Canan cay runa juchata mana aparicushanta musyanchi. Wañuchinanchipäpis achäqui mana canchu. ¹⁶⁻¹⁷ Chaymi sumaj wascariyullar, cačhariycushaj.»*

¹⁸ Mandaj Pilatupa shiminta wiyar, llapan runa juc shimillawan japariran: «Barrabásta cačharyi. Jesústam ichanga wañuchiyy» nir. ¹⁹ Barrabásga Jerusalén marcačhu auturdäcunata ticrapushanpita, wañuchicushanpita wičgaraycaran.

²⁰ Mandaj Pilato Jesústa cačhariycuya munar, runacunata yapay parlaparan.

²¹ Runacunam ichanga japarpaycaran: «Jesústa rusčhu wañuchicächun. Rusčhu wañuchicächun.»

²² Mandaj Pilato yapapjis niran: «¿Llutanatächu rurasha wañuchinäpaj? Wañuchinanchipaj juchallicushanta mana taríchu. Chaymi sumaj wascariyullar, cačhariycushaj.»

²³ Runacuna llapan shungunwan japarparan: «Rusčhu wañuchicächun» nir.

²⁴ Japarpaycällar, mandaj Pilatuta aunichiran. ²⁵ Aunichiptin, ticrapuj captinsi, wañuchicuj captinsi, mañacushannuylla Barrabásta cačhariycuran. Jesústam ichanga rusčhu wañuchinanpaj cačhapaycuran.

Jesústa rusčhu wañuchishan

San Mateo 27.32-44; San Marcos 15.21-32; San Juan 19.17-27

* ^{23:16-17} Waquin Bibliačhu yapasha: «Israel marcačhu watan-watan Pascua fiestačhu juc rüsuta cačharinyaj» nir.

²⁶ Jesústa wañuchinanpaj apaycashanáhu Cirene marcapita Simónwan tincuran. Payga chacrapita cutiycaran. Charircur, Simónwan murucucuna rusta matancachiran. Jesúspa jipallanta rusnin matancash aywaran.

²⁷ Ricäcujcunapis chay-chicajmi aywaran. Waquin warmicuna llaquicuywan atar aywaran. ²⁸ Wagajta ricar, Jesús niran: «Jerusalén warmicuna, nuwapaj ama wagaychu. Manchága quiquipuicunapaj, wamrayquicunapaj waganquiman. ²⁹ Chigaypa ñacay chayamungapaj. Chaymi runacuna ninga: ‹Ima alliraj waquin warmicuna wawata mana tariranchu. Mana jishyacuranchu. Chuchunanpápis wamran mana caranchu.› ³⁰ Juyupa ñacay chayamuptin juclla wañucuriya munar, llapan runa ningapaj: ‹Chagacunallasi nitiycamanman. Jućhucunallapis ushyaramanman.›* ³¹ Mä, wiycäriy. Juchaynaj caycapti runacuna ñacaycächimaptin, ¿imanuyraj Tayta Diosninchi juchallačhu aruj runacunata ñacachinga?»

³² Jesústa wañuchinanpaj apaycar, ishcaj juyu runatapis wañuchinanpaj apaycaran. ³³ «Calabíra» nishan pataman chayar, murucucuna rusman Jesústa läbaran. Juyucunatapis jucninta diricha-caj lädunman, jucnintana isquirda-caj lädunman läbaran. ³⁴ (Rusčhu läbaraycashanáhu Jesús niran: «Papä, cay runacunapa juchanta jungaycullay, ari. Mana musyayniwan rurashanta ama yarparaychu.») Chaypita murucucuna surtita jitaran Jesúspa müdananta mayganinpis apacunapaj.

³⁵ Runacuna imata rurashantapis llapanta ricaparan. Mayur runacuna Jesústa pampaman churar niran: «Waquin runacunata cawarachishash. Washäcuj cananpaj Tayta Diosninchi acracushan captin, quiquillan ruspita mä, yarpamuchun» nir.

³⁶ Murucucunapis Jesústa pampaman churar. Shigui bïnuta upuchir, niran: ³⁷ «Israel runacunapa mandajnin car, wañuypita mä, jishpiy.» ³⁸ Rus janančüna isquirbiraycaran: «Cayga Israel runacunapa mandajnin» nir.

³⁹ Lädunčhu läbaraj runapis jucnín Jesústa ashlliran: «Washäcuj car, ruspita mä, jishpiy. Nuwacunatapis jishpichimanquiman» nir.

⁴⁰ Juc-cajläninčhu läbarajmi ichanga jucninta piñacuran: «Quimsaninchita wañuycächimanchi. Chaypis, ¿Tayta Diosninchita manachu manchapacunqui? ⁴¹ Nuwanchita juchanchipita wañuycächimanchi. Jesúsmi ichanga ima juchatapis mana aparicushachu» nir. ⁴² Jinarcur Jesústa niran: «Tayta, llapan runata maquiquičhu purichir, nuwatapis ama jungamanquichu, ari.» ⁴³ Jesúsnra niran: «Sumaj tantiyacunquiman. Canan junajmi Tayta Diosninchipa ñaupanman chayashun. Alli cawayčhu juyashunpaj.»

Jesús wañushan

San Mateo 27.45-56; San Marcos 15.33-41; San Juan 19.28-30

⁴⁴ Lasdüsipita mallwaycaman pacha chacacäcuran. ⁴⁵ Intipis wañucäcuran. Tayta Diosninchipa wasinčhu chaparaj bayítapis pullanpa callacäcuran. ⁴⁶ Jesúsnra sumaj japariran: «Papä, almallä maquiquičhu caycan» nir.* Chaynuy nir wañucäcuran.

⁴⁷ Chayta ricar, murucucunapa capitannin Tayta Diosninchita alliman churar: «Cay runa rasunpa juchaynaj casha» nir. ⁴⁸ Ricaj runacuna jatunpa llaquish wasinmancaman cuticäriran: «Llutanta rurashcanchi» nir. ⁴⁹ Jesúswan yačhänacushancunam ichanga carullačhu ičhirpaycaran. Galilea marcapita purishij warmicunapis ricaparcaycaran.

Jesústa pampashan

San Mateo 27.57-61; San Marcos 15.42-47; San Juan 19.38-42

⁵⁰⁻⁵¹ Judea quinran Arimatea marcačhu José tiyaran. Payga alli runa caran. Tayta Diosninchipa shungun munashallanta rurar cawaj. Paypa maquinčhu cawayta yarparpis, sumaj manchapacuj. Mayur Israel runa caycarsi Jesústa wañuchinanpaj

* **23:30** Oseas 10.8. * **23:46** Salmo 31.6.

parlanacuptin, mana auniranchu. ⁵² Chaymi mandaj Pilatumán aywar, José niran: «Jesúspa ayanta apacushaj pampachicunäpaj.»

⁵³ Mandaj Pilato aunircuptin, ruspita ayata yarpuchiran. Jinarcur bayitawan piturcur, uchcu rurinman pampaycuran. Chay uchcuman pipis mana pampacusharächu.

⁵⁴ Pampacushan junaj runacuna camaricuycaran diyawarda captin, warannin jamanapaj.* ⁵⁵ Galilea warmicunapis Joséta aywáshiran Jesústa pampajta ricananpaj. Mayninman pampashantapis sumaj ricaparan. ⁵⁶ Jinarcur wasinman cutiycur, aya jananman jaycunapaj pirjümicunata camaricuran.* Chaypis diyawarda captin, mana aparanchu. Manchäga Moiséspá shiminta wiyacur, jamaran.

24

Jesús cawarimushanpita willacushan

San Mateo 28.1-10; San Marcos 16.1-8; San Juan 20.1-10

¹ Dumingu warariycaptillan, warmicuna pirjümin apacurcur, Jesús pamparashanman aywaran. ² Chayaptin, chaparaj rumi witiraycajta tariran. ³ Pamparashan uchcuman yaycurir, ayata mana tariranchu. ⁴ Warmicuna ima yarpačhacuytapis mana camäpacuranchu. Niycaptin ishcaj runa müdananpis achic-achicyaycar, ricaripuran. ⁵ Manchacuywan uysuraycaptin, ricaripushan runa niran: «¿Pitataj ashiycanqui? Cawaj runa wañushcunapa chaupinchu mana canchu. ⁶ Ashishayqui runa mana caychüchu caycan. Manchäga cawarishana. Galilea marcačhu caycällar,⁷ nishurayqui: ‹Tayta Diosninchí cačhamash captinsi, juchačhu arujcunapa maquinman runacuna čhayachimanga. Rusčhu wañuchimanga. Wañuchimaptinsi, quimsa junajta cawarimushaj.› » ⁸ Chayta wiyar, warmicuna Jesúspa shiminta yarpäriran.

⁹ Chaymi pamparashanpita cutircur, čhunca jucwan cačhacunatawan waquin purišijnincunatapis llapallanta willaran. ¹⁰ Willacuj warmicuna caran Magdalena María, Juana, Santiagupa maman María, waquin warmicunapis. ¹¹ Warmicuna willacuptin, cačhacuna mana riguiranchu: «Jinam rimacurcaycan» nir.

¹² Waquin mana riguiptinsi, Jesús pamparashanman Pedro aywacullaran. Mačhay rurinman watgaycur, pitushan bayita juturaycajllata ricaran. Chaura yarpačhacuycar wasipa cuticuran.

Emaús marcaman aywaycajcunata Jesús ricaripushan

San Marcos 16.12-13

¹³ Chay junajlla Jesúspa ishcaj purišijnincuna Jerusalén marcapita Emaús marcaman aywaycaran. Jerusalén marcapita Emaús marcaman ishcay üra puriylla caran.

¹⁴ Imapis cashancunata rimaräcur aywaycaptin, ¹⁵ quiquin Jesús tariparcur aywáshiran.

¹⁶ Paycunam ichanga mana ricsiranchu.

¹⁷ Jesúsna tapuriran: «¿Imataj rimarcaycanqui?» nir. Chaura llaquish ičhicaycäriran.

¹⁸ Cleofás jutiyuj runana Jesústa tapuran: «¿Jerusalén marcačhu pacharaycar, imatapis mana musyanquichu? ¿Janyancuna ima cashantapis manachu mayashcanqui?» nir.

¹⁹ Jesúsna tapuran: «¿Imataj casha?» nir.

Paycuna niran: «Nazaret marca Jesústa wañuy cachisha. Payga Tayta Diosninchipa willacujn car, sumaj willapäcuran. Jishyačhucunatapis allchacächiran. Supaycunatapis jarguran. Tayta Diosninchipa ricay ñawinčüpis, runa-masincunapa ricay ñawinčüpis alli cawaran. ²⁰⁻²¹ Israel marca-masinti payman yupachicuycarä: ‹Jäpa runacunapa maquinpita Jesús jishpichimäshun› nir. Chaypis marcanchipa mayur cürancunawan mayur runacuna rusčhu wañuy cachisha. Wañuy cachishanpis cananwan quimsa junajna.

* ^{23:54} Nuwanchipaj pacha waraptillan, juc junaj jallarin. Israelcunapämi ichanga inti jigacuruptillan, jallarin.

* ^{23:56} Čhacra runacuna wañushta alli ricar, waytata čhurapan. Israelcunam ichanga ayaman pirjümita jaycapun.

²² «Jananmanpis chaca-chacalla Jesús pamparashanman aywaj warmicuna cutircamur manchachimasha. ²³ Jesúspa ayanta manash tarishachu. Ricariparcurshi, anjilcuna nisha: ‹Jesús cawaycan.› ²⁴ Warmicuna willacuptin, waquinni aywasha. Čhayaptin, änirshi Jesúspa ayan mana carannachu. Quiquin Jesústapis manash ricarannachu.»

²⁵ Jesúsnra niran: «¿Upa-jina tantiyacuya manachu atipanqui? ¿Unay willacujcunapa shimin shunguyquiman manachu čhayaran? ²⁶ ¿Manachu musyarayqui Washäcuj ñacariycurraj Tayta Diosninchipa achic-achicyaycaj wasinman cutinanta?» ²⁷ Washäcuj cashanta tantiyacunapaj Tayta Diosninchipa shiminta ima-imapis isquirbirashanta Jesús sumaj willaparan. Moisés isquirbisanpita unay willacujcuna isquirbisanwan-caman tantiyachicuran.

²⁸ Emaús marcaman čhayaycar, Jesús ñaupacuran. ²⁹ Ñaupacuya camaycuptin, paycuna niran: «Ama aywacuychu. Pachapis chacanaycan. Cayllačhu pachacushun.»

Chaynuy niptin, Jesús auniran. Paycunawan pachacuran. ³⁰ Micunapaj jamaraycashančhu tantata aptarcur, Jesús niran: «Taytallau Tayta, ima allish tarichillämashcanqui.» Jinarcur paquircur-paquircur aypuran. ³¹ Chayraj ishcaj puríshijnincuna Jesús cashanta tantiyacuriran. Jesúsmi ichanga illaricäcuran. ³² Chaura quiquin-pura ninacäriran: «Parlaräcur aywähimaptinchi, Tayta Diosninchipa shimin isquirbirajta willapämaptinchi, ¿manachu shungunchisi shacya-shacyalla ricacuran?»

³³ Chaymi Jerusalén marcaman juclla cuticäriran. Čayar, čunca jucwan cačhacunatapis, waquin puríshijcunatapis juturpaycajta tariran. ³⁴ Juturpajcunapis niran: «Nuwacunapis Tayta Jesús rasunpa cawarishanta musyäna. Simón Pedrutapis ricaripusha.» ³⁵ Chaura Emaús marcapita cutijcunapis aywähishanta willaran: «Jesúswan caminučhu tincushcä. Ichanga tantata paquiriptinraj tantiyacärishcä» nir.

Puríshijnincunata Jesús ricaripushan

San Mateo 28.16-20; San Marcos 16.14-18; San Juan 20.19-23

³⁶ Emaús marcapita cutijcuna rimaycaptillanraj, llapanpa čhaupinčhu Jesús ricacuran. (Nircur niran: «Allilla juyaycullay, ari.»)* ³⁷ Chaura llapan mancharicäcuran: «Almata-imatačhi ricaycanchi» nir. ³⁸ Jesúsmi ichanga niran: «¿Imanirtaj mancharinqui? ¿Imanirtaj llutäpacuycanqui? ³⁹ Almagá aychaynaj, tulluynaj. Nuwam ichanga aychayuj, tulluyuj caycä. Maquii čhaquiña sumaj ricay. Rasunpa musyanayquipaj mä, yataycamay. Quiquimi caycä.» ⁴⁰ (Chaynuy nir čhaquintawan maquinta ricachiran.)

⁴¹ Llapan juturajcunawan puríshijnincuna sumaj cushicuran. Chaypis tantiyacuya mana atiparanchu. Chaymi Jesús niran: «¿Imallapis micunanchipaj caycanchu?»

⁴² Chaura cancash piscäduta jararan. (Abijapa mishquintapis jararan.) ⁴³ Jaraptin, llapanpa ricay ñawinčhu micuran.

⁴⁴ Micucurcur, niran: «Unay willaparaj: ‹Nuwapaj Tayta Diosninchipa shimin rimashan llapanmi čharcucänan. Moisés isquirbisančhüpis, unay willacujcuna isquirbisančhüpis, Salmos isquirbisančhüpis nuwapaj riman› nir.» ⁴⁵ Chaypita sumaj tantiyachir niran: ⁴⁶ «Tayta Diosninchipa shimin isquirbirashančhu nin: ‹Washäcuj ñacar, wañuyman čhayanga. Quimsa junajta cawaringa.» ⁴⁷ Nuwapita chay-tucuy marcačhu willapäcunga. Shimüta wiyacur pipis wanacuptinga, llapan juchanta Tayta Diosninchipa jungaycur alli ñawinwanna ricanga. Chaymi jamcunapis willapäcur purir, Jerusalén marcapita-pacha jallarinqui. ⁴⁸ May marcačhüpis ricamashayquita, wiyamashayquita willapäcunqui. ⁴⁹ Chaypis Jerusalén marcapita ama llucshinquirächu. Papäni aunishan-jina Espíritu Santuta cačhamushaj shacyächishunayquipaj.»

Janaj pachaman Jesús aywacushan

San Marcos 16.19-20

* ^{24:36} Jinčha caynuy captin () musyachimanchi waquin Bibliačhu čhaupinčhu isquirbiraycashan mana cashanta.

⁵⁰ Chaypita llapan purishijnincunata Betania marcapa Jesús pusharan. Maquinta jugarcur, mañacuran: «Taytallau Tayta, llapanta alli ñawiquiwan ricaycullay, ari. Llapallančhu yanapaycullay.» ⁵¹ Mañacuycashallančhu aywacuran. (Janaj pachaman Jesústa apacuran. ⁵² Apacuptin purishijnincuna jungurpacuycur, Jesústa manchapacuran.) Jinarcur Jerusalén marcaman cushishalla cuticăriran. ⁵³ Chayčhu waran-waran Tayta Diosninchipa wasillančhu Tayta Diosninchita alliman čhuraran.

Jesúspa willapanta San Juan willacushan

Tantiyacunanchipaj:

Juan cay libruta isquirbiran. Chaynuypis isquirbiran: 1 San Juan, 2 San Juan, 3 San Juan, Apocalipsis. Payga piscädu charij runa caran. Chaypis Jesús acracuran purishinampaj, cačhacunampaj. Jesústa purishir, Tayta Diosninchipa Wawan cashanta Juan tantiyacuran. Chaymi Jesús tincuchicushanpita isquirbiran. Payga tincuchicuran Tayta Diosninchipa shiminta camacächicujwan, achquiwan, uysha michijwan, cawachicuj tantawan. Chaynuypis Jesúslla Tayta Diosninchiman chayachimanchi. Munayniuj cashantapis tantiyachimanchi. Payga Washäcuñinchi. Chaymi Jesús imaimata rurashantapis, tantiyachicushantapis Juan isquirbiran runacuna Jesúsman yu-pachicunampaj.

Juan isquirbiran:

Jesús quiquin Tayta Diosninchichi cashanpita, cay pachatawan janaj pachatapis Tayta Diosninchawan camashanpita, cay pachaman shamushanpita: *San Juan 1.1-18*.

Tayta Diosninchichi camacächiyninpa Wawan cashanta Jesús musyachicushanpita, willapäcushanpita: *San Juan 1.19-12.50*.

Purishijnincunawan purir Jesús willapäcushanpita: *San Juan 13.1-17.26*.

Jesústa ñacachishanpita, wañuchishanpita, cawarachimushanpita: *San Juan 18.1-21.25*.

Jallarinan

¹ Manaraj imapis caycaptillan, Tayta Diosninchipa shiminta Camacächicuj cawaycaran. Shiminta Camacächicuj Tayta Diosninchawan jucnaylla caran. Camacächicujga Tayta Diosninchim.

² Manaraj imapis caycaptillan, Camacächicujwan-ima Tayta Diosninchichi cawaycaran.

³ Paywanmi llapan imacunatapis Tayta Diosninchichi camaran. Payllapita llap-llapanpis caycan.

⁴ Paylla cawachicuj. Achqui-jina Tayta Diosninchichi pii cashantapis runacunata tantiyachin.

⁵ Achicyapämashpanchi Tayta Diosninchipa shungun munashanta tantiyachimanchi.

Jucha aparicujcunam ichanga chacajchu juyar, quiquinpa shungun munashallanta ruran.

Achquita wañuchishan-jina Camacächicujtapis wañurachiya munaran.

Ichanga mana camäpacuranchu.

⁶ Tayta Diosninchichi juc runata cačhamuran. Cačhamushan runa Juanmi caran. Pay willapäcuran:

⁷ «Camacächicujman llapan runa yupachicunampaj willacamuy. Payga achqui-yupay» nir.

⁸ Juan mana achquichu caran. Manchäga achqui pii cashantapis tantiyachicuj shamurran.

⁹ Achqui-yupay Camacächicuj cay pachaman shaycamuran llapan runata Tayta Diosninchipa shiminta musyachinanpaj.

¹⁰ Tayta Diosninchipa shiminta Camacächicuj cay pachačhu caycaran.

Cay pachatapis quiquin camaran.

Runacunam ichanga pii cashantapis mana ricsiranchu.

¹¹ Camacächicujga Israel marcačhu yuriran.

Chaypis marca-masincuna mana čhasquicuranchu.

Manchäga wasguiparan.

¹² Payta čhasquicujcunatam ichanga Tayta Diosninchichi wamrachacun:

«Wawämi canqui» nir.

¹³ Camacächicujman yupachicuptin, pii-pitapis Tayta Diosninch'i wamrachacun. Ichanga mana runapa shungun munashanpitachu, mana runa churiyäcushanpitachu, mana warmi mirashanpitachu, manchäga quiquinpa shungun munaptin, pitapis wamrachacun.

¹⁴ Tayta Diosninch'ipa shiminta Camacächicuj runa-masinchi yuriran. Cay pacha'chu cawaran.

Sumaj munayniuj cashanta nuwacuna ricashcä.

Tayta Diosninch'ipa japallan Wawan cashantapis tantiyacushcä.

Llaquipäcu'mi caran.

Shiminta ćharcujmi caran.

¹⁵ Camacächicujpita rimar, Juan niran: «<Shaycämun> nishä runa caychüna caycan. Puntata yurish captisi mana yuriptillä, cawaycaran. Mayurni cashpan alli ricash canan camacan.»

¹⁶ Pay-raycur Tayta Diosninch'i llaquipämashpanchi sumaj-sumaj yanapaycämanchi.

¹⁷ Unayga Tayta Diosninch'ipa shiminta ima-imata ćharcunanchipäpis Moisés tantiyachimanchi. Cananmi ichanga Jesucristu tantiyachimanchi Tayta Diosninch'i llaquipäcu'mi cashantapis, shungun yarpashantapis. ¹⁸ Quiquin Tayta Diosninch'ita pipis mana imaypis ricashachu. Wawallanta ricasha. Payga Tayta Diosninch'i. Jesúsga Tayta Diosninch'wanpis juc shungulla cawan. Chaymi Tayta Diosninch'i imanuy-imanuy cashantapis tantiyachimanchi.

Ushyachicuj Juan willacushan

San Mateo 3.11-12; San Marcos 1.7-8; San Lucas 3.15-17

¹⁹ Chaura Juan willapäcu'mi, cüracunawan, Leví runacunawan, Jerusalén marca mayur runacuna tapuchiran: «¿Pitaj caćhamushcashunqui?» nir. ²⁰ Tapuptin, Juan mana chapacuranchu. Manchä juclla niran: «Mana Tayta Diosninch'i caćhamushan Washäcu'chu cä.»

²¹ Yapaypis tapuran: «¿Pitaj caćhamushcashunqui? ¿Tayta Diosninch'ipa unay willacujnin Elías-jinachu canqui?» nir. Juanna niran: «Mana Elías-jinapishchu cä.»

Yapaypis tapuran: «¿Tayta Diosninch'i ćhurashan Willacujchu canqui?» nir. Juanna: «Mana» niran. ²² Chaura yapay tapuran: «¿Pitaj caćhamushcashunqui? Pi cashayquitapis mä, willamay caćhamaj runacunata willänäpaj» nir. ²³ Juanna niran: «Unay willacuj Isaíaspa shimin ćharcucänanpaj shamushcä. Paypa shimin nin: «Chunyajéchu juc runa jayacuypa willacuyca: «Taytanchi shamunanpaj wicsu caminuta allchay» nir.» *

²⁴ Chaypis fariseucunapa caćhancuna Juanta yapay tapuran: ²⁵ «Washäcu'jispi's mana carga, Elíaspi's mana carga, Tayta Diosninch'i ćhurashan Willacujpis mana carga, ¿imanirtaj ushyachicuyca:» nir.

²⁶ Juanna niran: «Pipis Tayta Diosninch'ipa maquin'chu cawayta munar juchapita wanacuptin, yacullawan ushyachicuyca. Chaypis mana ricsishanchi runa marcanchi'chu puriycan. ²⁷ Jipäta shamuptinsi, payga munayniujmi. Llanguinta llushtipuyllatapis manchapacü.» *

²⁸ Juanta tapurunaj chimpa'chu-caj Betabará marca ćhaquin'chu.* Juanga runacunata ushyachirunaj Jordán mayu'chu.

Washäcu'j Jesústa Juan ricsichicushan

²⁹ Warannin junaj Jordán mayuman Jesús ćhayaycaran. Payta ricar, llapan runata wiyächipaya Ushyachicuj Juan niran: «Mä, ricay. Paymi Tayta Diosninch'i caćhamushan

* ^{1:23} Isaías 40.3. * ^{1:27} Israel runacuna alli ricashpan jurpanpa llanguinta llushtipuj ćhaquinta maylapunananpaj. Ichanga manacaj uywaynin runawan mayllachij. * ^{1:28} Waquin Biblia'chu nin: «Betania marca» nir.

runa. Payga uysha-yupay wañuyman ñhayanga llapan runapa juchanta aparicur. ³⁰ Paypaj willacurä: «Jipäta shamuj runa munayniyujmi. Puntata yurish caycaptisi mana yuriptillä, mayna cawaycaran» nir. ³¹ Quiquüpis mana ricsishcächu. Chaypis Israel-masintinchì ricsicunanchi-raycur yacuwan ushyachicuycashcä.»

³² Jananmanpis Juan niran: «Janaj pachapita Espíritu Santu paluma-jina Jesúsman ñhayamujta ricashcä. ³³ Washäcuji pi cashantapis mana musyashcärächu. Yacuwan ushyachij cañhamaj Tayta Diosninchim ichanga nimaran: «Espíritu Santuwan maquinchú Washäcuja purichishaj. Paypis Espíritu Santuwan pitapis ushyachinga maquiñchu purinapaj.» ³⁴ Nuwaga ñawíwanraj llapanta ricashcä. Tayta Diosninchipa Wawan cashanta musyä.»

Puríshinanpaj waquin runata Jesús jayashan

³⁵ Warannin junajpis Juan ishcaj puríshijnincunawan-ima jinallanchú caycaran. ³⁶ Jesús aywaycajta ricar, Juan niran: «Tagaymi Tayta Diosninchí cañhamushan runa. Payga uysha-yupay.» ³⁷ Chaynuy niptin, Juanpa puríshijnincuna Jesústa jaticurcuran. ³⁸ Jaticurcuptin tictarcjur, Jesús niran: «¿Imatataj ashinqui?» Paycuna niran: «Yaçhaj tayta, ¿maychütaj tiyanqui?» Rimayninchú: «Yaçhaj tayta» ninanta: «Rabbí» nin. ³⁹ Jesúsna niran: «Shamuy. Ricsichishayqui, ari.» Aywar, Jesús tiyashanman ñhayaran. Tacsha mallwayna caycaptin, jinallanchú pachacäriran.

⁴⁰ Jesústa aywähijcuna jucnín caran «Simón» nishan Pedrupa wauguin Andrés. Paymi Ushyachicuj Juan willapáculanta wiyacuran. ⁴¹ Andrésna wauguin Simónta tarir, willaran: «Tayta Diosninchí acracushan Washäcuwan tincushcä» nir. «Washäcuji» niananta hebreo rimaychú: «Mesías» nin; Griego rimaychüna: «Cristo» nin. ⁴² Nircur Jesúsman pusharan. Ñhayachiptin, Simónta sumaj ricapárir, Jesús niran: «Juanpa wamran Simón canqui, ¿au? Cananpita jutiqui canga: «Pedro.» » «Pedro» ninanpaj: «Kefas» nir jutichaparan. «Kefas» ninanga: «rumi» ninanmi.*

Puríshinanpaj Felipitawan Natanaelta Jesús jayashan

⁴³ Warannin junaj Galilea quinranman aywayta Jesús yarparan. Felipiwan tincur, niran: «Puríshimay.» ⁴⁴ Felipiga Betsaida marcapita caran. Andréswan Pedrupis chay marcallapita caran. ⁴⁵ Felipina Natanaelta tarir, willaran: «Washäcuwan tincushcä. Paypaj Moiséspa shiminpis, unay willacujcunapa shiminpis riman. Washäcuji Jesúsga Nazaret marca Josépa wawan» nir. ⁴⁶ Natanaelna niran: «¿Nazaret marcachú alli runa yurinmanchí?» Felipina niran: «Ricanayquipaj mä, aywashun, ari.» ⁴⁷ Natanael ñhayacaptin, Jesús niran: «Paymi rasunpa unay auquillunchi Israelpa willcan. Payga llullacuytapis mana yaçhanchu.» ⁴⁸ Natanaelna tapuran: «¿Imanuypataj pi cashätapis musyanqui?» nir. Chaura Jesús niran: «Manaräpis Felipiwan tincuptillayqui, ricashcaj. Jigus yüra ñchaquinchú jamaraycarayqui.» ⁴⁹ Natanaelna wiyächipaya niran: «Taytallau tayta, rasunpa Tayta Diosninchipa Wawan canqui. Israelcunapa mandajnin canqui.» ⁵⁰ Jesúsna niran: «¿Jigus yüra ñchaquinchú ricashcaj, nishalläpitachu yupachicamanqui? Wara-warantinraj sumaj-sumaj tantiyacunquipaj.» ⁵¹ Jinarcur niran: «Sumaj tantiyacunquiman. Cañhan capti, Tayta Diosninchí sumaj ricaman.* Jamcuna janaj pachata quiçharaycajta ricanquipaj. Anjilcunapis waquinga nuwapita jigarcaycanga. Waquinna janaj pachapita nuwaman yarpurcaycämunga.»

2

Majachacaychú yacuta bñuman Jesús tictrachishan

* ^{1:42} Waquin Bibliachú: «Cefas» nin. * ^{1:51} Jesús Tayta Diosninchí cañhamushan car, quiquin Tayta Diosninchí-jina imatapis ruraran. Shimintapis willacuran. Chaymi jutichacuran: «Runapa Wawan» nin. Castillanúchú: «el Hijo del Hombre» nin.

¹ Chaypita quimsa junajta Galilea quinran Caná marcačhu juc runa warmita ashiran. Jesúspa mamanpis warmi ashiyčhu caycaran. ² Jayachish captin, purišhijnintin Jesúspis warmi ashiyčhu caycaran. ³ Warmi ashiyčhu bïnu ushyacäcuran. Ushyacäcuptin, maman Jesústa niran: «Bïnu ushyacäcushana.» ⁴ Jesúnsna niran: «Mamallau mama, ¿imanirtaj jaticanqui? Pi cashätapis ricsichicunä junaj mana čhayamunrächu.» ⁵ Chaypis Jesúspa maman sibinticunata niran: «Wawä Jesús nishanta llapanta ruranqui.» ⁶ Chay wasíchu rumipita sujta urpu caycaran. Cada urpuman yaycuj pačhac (100) litru-yupay yacu. Israelcuna Tayta Diosninchipa ricay ñawinchu alli cayta munar, urpucunačhu yacuta wiñarächij. Chay yacullawan mayllacuj. ⁷ Jesúnsna sibinticunata niran: «Urpucunaman yacuta juntachiy.» Chaura änir yacuta juntachiran. ⁸ Juntarcachiptin, Jesús niran: «Wall-callata čhagarcur, mayur sibintiman apay.» Nishanta änir ruraran. ⁹ Mayur sibintina mallircuran. Ichanga maypita jurgamushantapis mana musyaranchu. Waquin sirbintilla yacupita bïnuman ticrachishanta musyaraycaran. Chaura mayur sibinti warmi ashij müsuta jayarcur niran: ¹⁰ «Llapanpis puntata alli bïnuta runata upuchin. Sumaj upucurcuptinraj, shigui bïnuta upuchin. Jammi ichanga ushyacänancaman pugush bïnuta čhurarächicushcanqui, ¿au?» ¹¹ Chayraj Jesús munayniyuj cashanta musyachicuran. Galilea quinran Caná marcačhu yacuta bïnuman ticrachishanta ricar, Tayta Diosninchipa maquinčhu Jesús purishanta purišhijnincuna tantiyacuran. Llapan shungunwanna Jesúsman yupachicuran.

¹² Chaypita Cafarnaún marcaman mamanwan, wauguincunawan, purišhijnincunawan-imá Jesús aywacuran. Chaychüna ishcay-quimsa junaj juyapäriran.

*Tayta Diosninchipa wasinpita rantipacujcunata jargushan
San Mateo 21.12-13; San Marcos 11.15-17; San Lucas 19.45-46*

¹³ Israel runacunapa Pascua fiestan yaycaycämuptin, Jesúspis Jerusalén marcaman aywaran. ¹⁴ Čhayaptin, Tayta Diosninchipa wasinpa sawanninčhu runacuna türucunata, uyshacunata, palumacunata ranticurcaycaran. Jillaytapis rucanacurcaycaran. ¹⁵ Jesúnsna wascata aptacurcur, Tayta Diosninchipa wasinpa sawanninpita uyshantinta, türuntinta jarguran. Jillaynincunatapis mashtariran. Mísancunatapis sajtar ushyariran. ¹⁶ Paluma ranticujcunatapis niran: «Imayquicunatapis jurguy. Papäniipa wasinčhu mana ranticunayquipächu.» ¹⁷ Chaynuy ruraptin, purišhijnincuna Tayta Diosninchipa shiminta yarpäriran. Shiminčhu nin: «Tayta, wasiqui-raycur imamanpis čhayäman.»* ¹⁸ Mayur Israel runacunam ichanga niran: «¿Pitaj čhurashcashunqui jargumänayquipaj? Tayta Diosninchichi caéhamushayquita musyanäpaj mä, imatapis ruray.» ¹⁹ Jesúnsna niran: «Mä, Tayta Diosninchipa wasinta jučhurachiy. Nuwam ichanga quimsa junajllačhu cashganman jatarachishaj.» ²⁰ Mayur runacunana niran: «Tayta Diosninchipa wasinta čhuscu čhunca sujtawan (46) watataraj rurayta ushyash caran. ¿Imanaypash quimsa junajllata yapay jatarachinquiman?» ²¹ Tayta Diosninchipa wasinpaj rimarpis, wañushanpita cawarimunanpaj Jesús rimaycaran. ²² Wañushanpita Jesús cawarimuptinraj, purišhijnincunapis chaynuy nishanta yarpäriran. Chayrämi Jesúsma shiminpis, Tayta Diosninchipa shiminpis shungunman čhayaran.*

Llapan runapa shungunta Jesús musyapashan

²³ Jerusalén marcačhu Pascua fiesta wichan Tayta Diosninchipa shamushanta Jesús musyachicuran. Ima-imatapis rurashanta ricar, achcaj runa Jesúsman yupachicuran. Jesúsmi ichanga shungunta musyar, paycunaman mana yupachicuranchu. ²⁴⁻²⁵ Payga runapa shungunta musyaparan pipis mana willaycaptillan, rurashantapis mana ricaycällar.

* ^{2:17} Salmo 69.9. * ^{2:22} «Tayta Diosninchipa shimin» ninanta castillänučhu: «Escritura» nin.

3

Yapay yuriypita Jesús tantiyachicushan

¹ Chay marcaáchu Nicodemo jutiyuj runa tiyan. Mayur fariseu runa caycaptin, Israel-masincuna alli ñawinpa ricaran. ² Juc chacay Jesúsman aywaran. Chayar, niran: «Yáchaj tayta, Tayta Diosninchipa caćhan car, shiminta willapäcuycanqui. Camacächiyninpa tucuy-jinanpa runacunatapis yanapaycanqui. Rurashayquicunata runa mana ruranmanchu. Chaymi caćhamushushayquita nuwacuna musyä.»

³ Jesúsna niran: «Sumaj tantiyacunquiman. Tayta Diosninchipa maquinčhu imaypis cawanayquipaj yapayraj yurinayqui.»

⁴ Nicodemuna tapuran: «Auquis runa caycar, ¿imanaypataj yapay yuríman? ¿Yapay yurinäpaj mamäpa paćhanman cutimanchuraj?» nir.

⁵ Chaura Jesús niran: «Sumaj tantiyacunquiman. Pipis Tayta Diosninchipa maquinčhu cawayta munar, yacupitapis, Espíritu Santupitapis yurinman. ⁶ Maman-taytanpita yurijcuna wañucujlla. Espíritu Santupita yurijcunam ichanga Tayta Diosninchipa maquinčhu cawan. ⁷ Ama yarpaćhacuychu: ‹Yapayraj yuriy› nipti. ⁸ Wayrata mayarsi, maypita shamushantapis, maypa aywashantapis runacuna mana musyanchu. Chayjina Espíritu Santu pii-piña cawachishantapis runacuna mana musyanchu.»

⁹ Chaura Nicodemo niran: «Tayta, shimi qui umäman mana yaycunchu.»

¹⁰ Jesúsna niran: «Moiséspa shiminta Israel-masiquicunata willapaycarsi, ¿manaáhi tantiyacunquichu? ¹¹ Sumaj tantiyacunquiman. Musyashäta, ricashäta nuwacuna willacü. ¿Imanirtaj jamcuna shimiáta mana chasquicunquichu? ¹² Ricashallayquita willapaycaptisi mana chasquicur, ¿imanuyparaj chasquicunquiman janaj pachapita willapapti? ¹³ Janaj pachaman jigarcur, pipis mana willacuj cutimunmanchu. Nuwam ichanga Tayta Diosninchipa caćhan car, janaj pachapita yarpamushcä. ¹⁴ Unayga chaqui pachačhu brunsipita curuta rurarcur, Moisés jugarächiran. Chay-jina nuwatapis Tayta Diosninchipa caćhan caycaptisi, jugarachimanga.* ¹⁵ Pipis nuwaman yupachicamaptin, mana ushyacaj cawayta taringa.»

Llapan runata Tayta Diosninchichi llaquipashan

¹⁶ Tayta Diosninchichi llapan runata llaquipashpan cay pachaman japallan Wawanta caćhamuran. Pipis Wawanman yupachicur, ushyacayman mana chayangapächu. Manchäga imaycamanpis cawanga. ¹⁷ Tayta Diosninchichi Wawanta caćhamuran mana ñacayman runacunata chayachinanpächu; manchäga llapanta jishpichinanpaj. Paylla jishpichimäshun. ¹⁸ Chaymi Wawan Jesúsman yupachicuptinchi, Tayta Diosninchipis alli ñawinwan ricamanchi. Mana yupachicuptinmi ichanga, pitapis juyu ñawinwan rican. Ñacaymanpis mayna chayachisha japallan Wawanman mana yupachicushanpita. ¹⁹ Runacunapa shungunta musyapänanpaj Tayta Diosninchichi Jesústa caćhamuran. Paymi achqui-jina Tayta Diosninchipa shungunta musyachicuran. Juchačhu arujcunam ichanga chacajčhu-jina cawayllata munaran. Achquičhu cawayta mana munashanjina, Tayta Diosninchitapis mana wiyacuranchu. Chaymi Jesústapis wasguiparan. ²⁰ Llapan juchallačhu arujcuna achquita chiquin. Ricaytapis mana munanchu jucha aparicushanta mana taripunanpaj. ²¹ Tayta Diosninchipa shungun munashannuy cawajcunam ichanga achquiman witipushan-jina Jesúsman witipun. Paycuna allita rrar cawaptin, Tayta Diosninchipa maquinčhu cawaycashantapis runacuna musyanga.

Jesúspita Ushyachicuj Juan willacushan

²² Chaypita Judea quinranman purišhijnincunawan-ima Jesús aywaran. Chay quinrančhu runacunata ushyachishpan juyaran. ²³ Ainón marca rajračhu achca yacu captin, Juanpis runacunata ushyachiycaran. Ainón marcaga Salín marcapa washlällančhu

* **3:14** Números 21.4-9.

caran. Ushyachicuycashanta mayar, waquin runa ushyacuj aywaran. ²⁴ (Juan ushyachicuycaran carsilman manaraj wičhgaptillan.)

²⁵ Chaura Ushyachicuj Juanpa purishijnincuna juc Israel runawan tincupänacuran: «¿Imanayparaj juchanchita ushyacächishuwan Tayta Diosninchi alli ricamänanchipaj?» nir. ²⁶ Chaymi Juanta willaran: «Tayta, Jordán mayu chimpanché tincushayqui runa ushyachicuycan. Chay-chicaj runa aywarcaycan. Paypaj: <Washäcuj> nir willacurayqui, ¿au?» nir.

²⁷ Ushyachicuj Juanna niran: «Runa imatapis ruran. Chaypis Tayta Diosninchi camacächiptinraj, allimanpis éhayan. ²⁸ Jamcunata mayna willashcaj: <Mana Tayta Diosninchi cačhamushan Washäcujchu cä. Manchäga Washäcuj Jesúshamunanta willacujlla cačhamasha.> ²⁹ Jipash müsu majachacaptinshi majachacächij runa yanagar, munashanta camacächin. Yanagashpanshi sumaj cushicun. Chay-jina Jesúspa ñaupanché aywar, sumaj cushicü. ³⁰ Jesúllata llapanpis taytachacunan. Nuwam ichanga jungacaypa aywaná.

³¹ «Janaj pachapita shamujman pipis mana tincunchichu. Nuwanchim ichanga cay pachačhu yurish car, pishi-yarpaylla caycanchi. Rimanchipis cay pachačhu cawanallanchipaj. Janaj pachapita shamujmi ichanga munayniyuj. ³² Chaymi janaj pachačhu ricashancunata, wiyashancunata willacuycan. Willacuptinpis, waquin runa shiminta mana éhasquinchu. ³³ Washäcuj Jesúspa shiminta éhasquicurmí ichanga, Tayta Diosninchipa shimintapis aunin: <Tayta Diosninchiga shiminta éharcun> nir.

³⁴ «Tayta Diosninchipa cačhan car, shimintapis Jesúspas willapácun. Sumaj yanapashpan maquinchüpís Espíritu Santu purichin. ³⁵ Wawan Jesústa llaquishpan alli ñawinwan Tayta Diosninchi rican. Chaymi llap-llapanta paypa maquinman éhurasha. ³⁶ Pipis Wawanman yupachicur, mana ushyacaj cawayta tarishana. Wawanpa shiminta mana wiyacuptinmi ichanga, maquinchéhu Tayta Diosninchi mana cawachingachu. Manchäga juyu ñawinwan ricar, imaycamanpis ñacachinga.»

4

Samaria marcapita warmiwan Jesúspas parlashan

¹ Chaura fariseucuna imata rimaycashantapis Jesúspas mayaran. Paycuna rimaycaran: «Jesúspa purishijnincuna achcayaycan. Ushyachicuj Juan ichicllata ushyachiran; Jesúsmi ichanga sumaj achcajta» nir. ² Chaypis mana quiquin Jesúschu runacunata ushyachiran; manchä purishijnincunalla. ³ Chaura fariseucuna rimaptin, Judea quinranpita Galilea quinranman purishijnincunawan-ima Jesúscuticuran. ⁴ Galilea marcacunaman éhayanapaj Samaria quinranparaj aywanan caran. ⁵ Chaymi Samaria quinranchéhu Sicar marca ñaupanman éhayaran. Chay quinran caran Jacobpa wamran Josépa éhacran. ⁶ Jacob učhcuchishan püsuman lasdüsi éhayar, uticash cashpan Jesúspas jamacuycuran. ⁷⁻⁸ Chaycaman purishijnincuna rantipacuj aywaran. Marcaman rantipacuj aywacushal-lanta Samaria warmi yacu jurguj püsuman éhayaran. Jesúsnas warmita niran: «Yaculayqui.»

⁹ Israel runacunawan Samaria runacuna juyupa chiquinacuptin, ricanacuytapis mana munaranchu. Chaymi Samaria warmi Jesústa niran: «Israel runa caycar, ¿imanirtaj yacuta mañacamani? ¿Samaria warmi cashäta manachu musyanqui?» ¹⁰ Jesúsnas niran: «¿Manachu musyanqui Tayta Diosninchi llaquipácuj cashanta? ¿Pi cashätapis manachu musyanqui? Yacuta mañacamaptiqui, cawachicuj yacuta tarichijman.»

¹¹ Warmina niran: «Yacu ruričhüräj caycan. Jurgamunayquipápis mana imayquisi canchu. ¿Maypitaraj cawachicuj yacuta jurgapamanquiman? ¹² Unay auquillunchi Jacobshi cay püsuta učhcuchiran. Nuwacunata jaguipamaran. Quiquinpis, wamrancunapis, uywancunapis cay püsullapitash yacuta upuran. ¿Jamräčhüräj payman tincunquiman?»

¹³ Chaura Jesús niran: «Tincuchiypa tantiyachishayqui. Cay püsupta yacuta upujcuna imaypis yacunaycangapaj. ¹⁴ Nuwa jushä yacuta upurmi ichanga, imaypis mana yacunanganachu. Manchä yacupa ñawin pashtamushan-jina quiquinchü cawachicuj yacu pashtamunga. Cawachicuj Tayta Diosninchchi maquinchü imaycamanpis cawachimäshun.» ¹⁵ Chaura warmi niran: «Imaypis mana yacunänäpaj, cay püsumanpis yacucuj mana cutimunäpaj mä, yacuyquita jumay ari, tayta.»

¹⁶ Jesúsna niran: «Majayquita pushamuy.» ¹⁷ Chaura warmi niran: «Majä mana canchu.» Jesúsna niran: «Rasullanta rimashcanqui. ¹⁸ Runa rucachijmi canqui. Pichgajwan juyashcanqui. Canan-cajwanmi ichanga puripänacuycanqui. Chaymi: «Majä mana canchu» nir mana llullacushcanquichu.»

¹⁹ Chaura Samaria warmi niran: «Tayta Diosninchipa shiminta willacuj canqui, ¿au? ²⁰ Unay auquillücuna tagay puntachürat Tayta Diosninchita alliman churaj. Jamcunam ichanga Israel runa car, ninqui: «Jerusalén marcallaçhu llapan runapis Tayta Diosninchita alliman churanman.» » ²¹ Chaura Jesús niran: «Mamallau, sumaj tantiyacunquiman. Juc junaj chayamuptin, Tayta Diosninchita manchapacunapaj runa tagay puntamansi, Jerusalén marcamsi mana aywangachu. ²² Samaria marca-masintiqui manchapacursi, Tayta Diosninchchi pí cashantapis mana musyanquichu. Nuwacunam ichanga musyä. Washämajninchü Israel runacunapita llucshimungapaj. ²³ Tayta Diosninchita alliman churananchi junajcuna chayamushana. Chaymi Tayta Diosninchita llapan shungunwan manchapacujcunata Espíritu Santu yanapaycan. Cawachicuj Tayta Diosninchchi shungun yarpashanta musyachicujmi. ²⁴ Espíritu Santu yanapaptin, Tayta Diosninchipa shungun munashannuy pipis manchapacunman. Tayta Diosninchchi cawachicuj caycaptin, shungun munashanta musyachicuj caycaptin, llapan shungunwan pipis manchapacunman.»*

²⁵ Chaura warmi niran: «Washäcu shamenanta musyä. Shamur, Tayta Diosninchipa shungun yarpashanta tantiyachimäshunpaj.» (Washäcu ricsij: «Cristu» nir.) ²⁶ Niptin, Jesús niran: «Nuwa Washäcu mi cä. Quiquian parlaycanqui.»

²⁷ Samaria warmiwan Jesús parlaycaptin, micuya rantij aywamushanpita purishijnincuna chayaran. Samaria warmiwan parlaycajta tariycur, mancharicäcuran. Ichanga imata parlashantapis mana tapuparanchu. Chaypis shimin rurillançhu parlaran: «Tagay warmi, ¿imatataj ashiyan? ¿Imanirtaj paywanraj Jesúspis parlaycan?» nir.

²⁸ Warmina yacu puyñunta jaguiycur, wasinman cuticullaran. Marca-masincunata niran: ²⁹ «Yacu püsuçhu juc runa caycan. Imanuy-imanuy cawashallätapis llapanta willaramasha. Aywashun-llapa ricanayquipaj. ¿Manachuraj Tayta Diosninchchi caçhamushan Washäcu?» nir. ³⁰ Chaymi llapan runa Jesúspis aywaran.

³¹ Manaraj chayaptillan, purishijnincuna Jesústa niran: «Tayta, micucurcuy, ari.»

³² Jesúsna niran: «Micuyni caycan. Jamcunam ichanga mana tantiyanquichu.»

³³ Purishijnincunana quiquin-pura tapunacuran: «¿Piraj micuya apapämusha?» nir.

³⁴ Jesúsna niran: «Tayta Diosninchchi caçhamasha. Chaymi shungun munashanta rurapti, paçhäpis mana yarganchu. Paypa shimita chärcur, sumaj cushicü. ³⁵ Rimaypis purin: «Murushanchipita chuscu quillataräshi micuy pugun» nir. Chaypis micuy jarwaraycan. Mä, sumaj ricaçhacuriy. May-may runacuna caycan. ³⁶ Micuy shuntajcuna pägunta chasquin. Shuntarcuptin, murujpis, shuntajpis sumaj cushicun. Chay-jina Tayta Diosninchipa shimita willacujpis, runacunata tantiyachijpis sumaj cushicun: «Shimita chasquicujcuna Tayta Diosninchchi maquinchü imaycamanpis cawanga» nir. ³⁷ Juc rimaypis purin: «Jucshi murun. Jucshi shuntan» nir. ³⁸ Juc runacuna murupacur ñacasha. Jamcunata juc murushanman shuntaj caçhashcay. Juc arucushallanman aywaj-aywanqui.»

* ^{4:24} Griego rimaychü: «Tayta Diosninchiga espíritum» nir cawachicuj cashanta tantiyachimanchi.

³⁹ Chaura Samaria runacuna warmipa shiminta wiyar, Jesúsman yupachicuran. Warmi mayna nish caran: «Imanuy-imanuy cawashallätapis llapanta willaramasha» nir. ⁴⁰ Chaynuypa Samaria runacuna chayar, Jesústa niran: «Tayta, juyapärishun, ari» Chaymi ishcay junaj Jesús juyaran. ⁴¹ Chaychu juyaptin quiquinpa shiminta wiyar, achcaj runa Jesúsman yupachicuran. ⁴² Chaymi Samaria warmita llapan runa niran: «Canan mana shimillayquipitachu payman yupachicü. Manchäga rinrïwan quiquinpa shiminta wiyashcä. Chaymi Washäcu cashanta musyä. Payga llapan runata washanga.»

Mandaj runapa wamranta Jesús allchacächishan

San Mateo 8.5-13; San Lucas 7.1-10

⁴³ Samaria marcachu ishcay junaj juyapärir, Galilea quinranman Jesús cuticuran. ⁴⁴ Pay nirunaj: «Yurishan marcachu marca-masincuna Tayta Diosninchipa willacujn-incunata pampaman churan. Ricaytapis mana munanchu.» ⁴⁵ Chaypis Galilea quinranman chayaptin, runacuna cushish chasquicäriran. Paycuna Pascua fiestaman aywar, Jerusalén marcachu Jesús ima-imata rurashantapis ricarunaj.

⁴⁶ Yacuta bñuman ticrachishan Caná marcaman Jesús chayaran. Chaychu juc Roma marcapita mandaj runa caycaran. Cafarnaún marcachu chay mandajpa wamran juyupa jishyaycaran. ⁴⁷ Chaymi: «Judea quinranpita Galilea quinranman Jesús chayamusha» niptin, taripaj aywaran. Chayar, mañacuran: «Tayta Jesús, wawäta allchacächipallämay, ari. Wasíman aywashun. Wawä wañuycan» nir. ⁴⁸ Jesúsna niran: «¿Yupachicamänayquipaj allchacächinätarächu munarcaycanqui? ¿Tayta Diosninchichi camacächishanta camacächinätarächu shuyarcaycanqui?» ⁴⁹ Mandaj runam ichanga niran: «Tayta, manaraj wamrä wañushancaman juclla aywashun.» ⁵⁰ Jesúsna niran: «Cuticyna. Wamrayqui allchacashana.» Mandaj runana änir Jesúspa shiminman yupachicur, wasinpa cuticuran. ⁵¹ Chayaycaptin, mincaynincuna tariparan: «Wamrayqui allchacashana» nir. ⁵² Mandaj runana tapuran: «¿Imay ürataj allchacasha?» nir. Paycunana willaran: «Janyan inti tumariycaptin, allchacasha» nir. ⁵³ Mandaj runana niran: «Janyan caynuy üra Jesús nimaran: «Wamrayqui allchacashana.» » Chaymi quiquin mandaj runapis, wasinpa Jesúsman yupachicuran. ⁵⁴ Judea quinranpita cutircur, ishcay cutipa Galilea quinranchu Jesús musyachicuran Tayta Diosninchipa maquinchu cawashanta.

5

Cumllucash runata Jesús allchacächishan

¹ Chaypita unayllata Jerusalén marcachu fiesta caycaptin, Jesúspis aywaran. ² Jerusalén marcpa puncunta jucta ricsiran: «Uysa llucshinan puncu» nir. Puncupa ñaupanchu armacuna püsu caycaran. Hebreo rimaychu: «Beteda» nij.* Püsuta chuscu curidur tumaraycaran. Juc curidurna pullanta raquiran. ³⁻⁴ Curidurcunachu jishyačhucunapis, japracunapis, wijrucunapis, cumllucashcunapis juturpaycaran.*

⁵ Chaychu juc runapis jitaraycaran. Payga quimsa chunca pusajwan (38) watana jishyaycaran. ⁶ Unaylla jishyashanta musyar, Jesús tapuran: «¿Allchacayta munan-quimanchu?» nir. ⁷ Jishyačhu runana niran: «Au, tayta, allchacayta munä. Ichanga anjil yacuta cuyuchiptin, mana pipis canchu yacuman yaycachimänanpaj. Imaypis yaycuya munapti, jucmi llalliraman.» ⁸ Chaura Jesús niran: «Jatariy. Mashtacuyquita shuntacurcur, aywacuyna.» ⁹ Chaynuy niptin, allchacäcuran. Änir, mashacunta shuntacurcur, aywacuran.

Allchacashan junaj diyawarda caran. Diyawardačhu Israel runacuna mana ima aruytapis rurajchu. ¹⁰ Chaymi mayur Israel runacuna allchacaj runata piñacuran: «Diyawarda

* ^{5:2} Beteda marcata waquin Bibliačhu: «Betzatá» nin; waquinchüna: «Betsaida.» * ^{5:3-4} Waquin Bibliačhu ichicllata yapasha: «Paycuna shuyarpaycaran janaj pachapita anjil sharcamur, yacuta cuyuchinanta. Yacuta cuyuchiptin, mayganpis puntata yacuman yaycur, allchacäcu» nir.

caycaptin, mashtacuyqui aysash ama purinquimanchu» nir. ¹¹ Allchacaj runana niran: «Allchacächimaj runa nimasha: ‹Mashtacuyquita shuntacurcur, aywacuy.› » ¹² Chaura mayur Israel runacuna tapuran: «¿Pitaj nishcashunqui: ‹Mashtacuyquita shuntacurcur, aywacuy?›» ¹³ Allchacaraycachir juturaj runacunaman yaycurir, Jesús illaricäcuran. Chaymi allchacaj runa pí allchacächishantapis mana musyaranchu.

¹⁴ Mayllanta Tayta Diosninchipa wasinčhu allchacaj runawan Jesús tincuran. Tincur, niran: «Allchacash caycar, juchata ama aparicuynachu. Yapay juchata rurar, imamanräshi čhayanquipäsi.»

¹⁵ Allchacaj runa aywarcur, mayur Israel runacunata willaycuran: «Jesús allchacächimasha» nir. ¹⁶ Chaymi mayur Israel runacuna Jesústa chiquir jatiparan: «Diyawardačhu allchacächir arushanpita imamanpis čhayanman» nir. ¹⁷ Jesúsmi ichanga chapacuran: «Nuwapis, Papänipis mana jamaräcushächu. Chaymi diyawarda captinpis, Tayta Diosninchichi-ima runacunata yanapaycäshaj» nir. ¹⁸ Chaura mayur Israel runacuna Jesústa wañurachiya munaran: «Diyawarda junajčhu cumllu runata allchacächisha. Jananmanpis: ‹Tayta Diosninchipa Wawan caycä› nir quiquin Tayta Diosninchawan tincuchicuycan.»

Tayta Diosninchipa Wawan Jesús munayniyuj cashan

¹⁹ Chaura Jesús niran: «Sumaj tantiyacunquiman. Tayta Diosninchipa Wawan car, Papänipa shungun munashallanta rurä. Papäní shacyächimashallanta, ricacushalläta imatapis rurä. ²⁰ Tayta Diosninchichi shungunman tincupti, llaquipäman. Shungun munashanta musyachiman. Mana cumllu runallatachu allchacächishaj. Manchäga mana ricashayquicunata rurapti, tantiyacuya mana atipanquipächu. ²¹ Tayta Diosninchichi munayniyujmi wañushcunata cawarachinanpaj. Nuwapis, Wawan cashpä munayniyuj cä shungüman tincucunata cawachinäpaj. ²² Llapan runa Tayta Diosninchipa maquinčhu cawan. Cananga wañuyman čhayachinäpäpis, cawachinäpäpis maquiman llapanta čhurasha. ²³ Tayta Diosninchichi munan quiquina manchapacushan-jina nuwatapis manchapacamänanta. Quiquinmi cačhamasha. Chaymi pipis nuwata mana manchapamar, Tayta Diosninchitapis mana manchapacunchu.

²⁴ «Sumaj tantiyacunquiman. Shimüta wiယajcuna Tayta Diosninchichi cačhamashanta čhasquicur, mana ushyacaj cawayta tarishana. Tayta Diosninchichi imaycamanpis cawachinga. Juchantapis mana jurgapanganachu wañuyman čhayachinanpaj. ²⁵ Canan tantiyacunquiman. Tayta Diosninchita mana wiယacujcuna wañush-yupay caycan. Shimüta wiယar čhasquicamajcunatam ichanga Tayta Diosninchipa Wawan car, imaycamanpis cawachishaj. Cawachinä wican čhayamushana. ²⁶ Tayta Diosninchichi cawachicujmi. Nuwapis Wawan car, cawachicuj cä. ²⁷ Cačhan capti, llapan runata maquiman čhurasha cawachinäpäpis, wañuyman jitarpunäpäpis. ²⁸ Ama mancharinquichu. Imay junajlla wañushcunapis shimüta wiyang. ²⁹ Pamparashanpita cawarimunga. Tayta Diosninchipa shungun munashanta rurajcuna maquinčhu imaycamanpis cawanga. Juchallačhu arujcunam ichanga cawarimurpis, imay-imaypis ñacayllaman čhayanga.»

Munayniyuj cashanta Jesús musyachicushan

³⁰ «Nuwa mana shungü munashallantachu rurä; manchäga Tayta Diosninchipa shungun munashanta. Quiquinmi cačhamasha. Paypa shiminta čharcur, waquin runata mana ushyacaj cawayta tarichishaj. Waquintana ñacayman jitarpushaj. ³¹ Tayta Diosninchichi cačhamashanta mana shimilläpitachu rimä. Ishcay tistigu caycaptinraj, čhasquicamanquiman. ³² Cačhan cashäta quiquin Tayta Diosninchipis musyachicuycan. Payga llullacuya mana yačhanchu.

³³ «Pí cashätapis musyanayquipaj Ushyachicuj Juanmanraj cačhacamushcanqui, ¿au? Payga rasullanta nuwapita willashcashunqui. ³⁴ Rasunpa Tayta Diosninchipa cačhan caycä. Rasunpa cashäta musyachicunäpaj tistiguta mana ashüchu. Ima

captinpis, Tayta Diosninchí washäshunayquipäpis, maquinchú cawanayquipäpis Juan willapäcushanta yarpaycächij. ³⁵ Ushyachicuj Juan achqui achicyashan-jina Tayta Diosninchipa shiminta willacur, shamenäta musyachicuran. Paywan tincur, jatunpa cushicupärishcanqui. ³⁶ Tayta Diosninchí cačhamashanta mana Ushyachicuj Juanllachu musyachicun; manchä quiquin Tayta Diosninchispis musyachicuycan. Chaymi camacächiynipa jishyačhucunata allchacaycächii. Supaycunatapis jarguycä. Chayta ruranápaj cačhamasha. ³⁷ Cačhan cashäta quiquin Tayta Diosninchí musyachicusha. Jamcunam ichanga shiminta mana wiwashcanquichu. Quiquinwan mana ricanacushcanquichu. ³⁸ Cačhamashanta mana čhasquicuptiqui, shiminpis shunguyquiman mana čhayanchu.

³⁹ «Jamcuna mana ushyacaj cawayta yarpar, Tayta Diosninchipa shiminta sumaj liguinqui. Paypa shimin sumaj nuwapita willacun. ⁴⁰ Chaypis mana ushyacaj cawayta tarinayquipaj mana wiacamánquichu. Manchä wasguircaycämánqui. ⁴¹ Runacunapa ricay ñawinčhu mana alli caytachu ashiycä. ⁴² Jamcunata musyapä. Mana llapan shunguyquiwanchu Tayta Diosninchita wiacyucanqui. ⁴³ Papänipa Wawanmi caycä. Paypita shamushcä. Jamcunam ichanga mana čhasquicamanquichu. Juc runa shungun yarpashanta rimaptinmi ichanga, juclla čhasquicärinqui. ⁴⁴ Quiquipi-puralla alli ricanacuyta ashinqui. Tayta Diosninchawan alli ricanacuytam ichanga imasi mana jucunquichu. Imasi mana jucurga, paypa shungun munashannuychu mana cawaycanqui. ⁴⁵ Chaypis mana nuwachu Tayta Diosninchipa ñaupančhu juchayquita jurgapushayqui; manchä quiquin Moisés mi. Jamcuna: «Moisés pa shiminta llapanta čharcushcä. Chaymi Tayta Diosninchí alli ñawinwan ricamanga» nirpis, mana llap-llapantachu čharcushcanqui. Chaymi payga juchayquita jurgapushunquipaj. ⁴⁶ Moisés pa shimin sumaj nuwapita riman. Chaymi Moisés pa shiminta čhasquicar, nuwamanpis yupachicamanquiman. ⁴⁷ Moisés pa shiminta mana čhasquicur, ¿imanuyparaj shimiyan yupachicunquiman?»

6

Pichga waranga runata Jesús jarashan

San Mateo 14.13-21; San Marcos 6.30-44; San Lucas 9.10-17

¹ Chaypita Galilea püsuta Jesús chimparan. Galilea püsuta ricsij: «Tiberíades püsü» nir. ² Tayta Diosninchí camacächiynipa jishyačhucunata allchacächiptin, achcaj runa Jesústa jatirpararan. ³ Paymi ichanga purišhijnincunallawan pataman jamaj aywacäriran. ⁴ Chay wíchan Israel runacunapa Pascua fiestan čhayaycämuran. ⁵ Chaymi achcaj runa čhayajta ricar, Jesús niran: «Felipe, ¿maypitara tantata rantimushun achcaj runapaj?» ⁶ Shungunta musyapayta munar, yarparan: «¿Mä, imaningash Felipe?» nir. Quiquinmi ichanga imata ruranantapis musyaranna. ⁷ Chaura tapuptin, Felipe niran: «Ichic-ichicllatapis jarananchipaj ishcay pačhac (200) jurnalpa čhaninwanrächi tantata rantish aypanga.» ⁸ Simón Pedrupa wauguin Andrés na niran: ⁹ «Juc wamra pichga sibäda tantatawan ishcay piscädullata charaycan. Chayllaga llapan runapaj mana aypangachu.» Andrés pis Jesústa purišhiran. ¹⁰ Jesúsnra niran: «Llapan runata jamachiy.» Chaura runacuna pashpallaman jamacuran. Yupaptin, ullgulla pichga waranga-ima (5,000) caycaran. ¹¹ Chaura Jesús tantata aptacurcur, niran: «Taytallau Tayta, ima allish tarichillämashcanqui» nir. Jinarcur tantatapis, piscädutatapis llapan runata aypuran. Runacunana puchupacushancaman micuran.

¹² Runacuna puchupacushancaman micucurcuptin, purišhijnincunata Jesús niran: «Puchupacushanta shuntay. Ama usuchishunchu.» ¹³ Pichga sibäda tanta puchupacushanta shuntaptin, čhunca ishcaywan (12) canista juntataraj shuntaran. ¹⁴ Pichga tantata chay-chicajpaj aypäčhishanta ricacuycur, runacuna cushicuran: «Payga Tayta Diosninchipa willacujnin canga. Ricarimunanta Moisés musyachicuran» nir. ¹⁵ Chaynuy

nir mayur mandaj cananpaj shuyninpa ćhurayta munaran. Chayta musyar, Jesús quiquillan wichaypa witicuran.

Yacu jananpa Jesús aywashan

San Mateo 14.22-27; San Marcos 6.45-52

¹⁶ Chacas-chacasna Jesúspa purishijnincuna püsuman cutiran. ¹⁷ Jesúsmi ichanga mana ćhayaranrächu. Chaypis purishijnincuna bütiman jigarcur, chacashana Cafarnaún marcapa llucshicuran. ¹⁸ Yacu püsu wayra pücaptin, büchiypa-büchiycaran. ¹⁹ Juc liwata aywar-caycaskanchüna Jesús yacu jananpa taripaycajta ricaran. Chaymi llapan manchariran. ²⁰ Jesúsmi ichanga niran: «Ama manchacamaychu. Quiquimi caycä.» ²¹ Chaura bütiman jigachiyta munaran. Niycaptillan, büti Cafarnaún marcaman ćhayaran.

Tantawan Jesús tincuchicushan

²² Warannin tutu püsu cantullanchu pachacujcuna parlanacuran: «Jucnayllataj büti caran, ¿au? Chay bütiwan Jesús mana aywashachu. Purishijnincunalla chimparan» nir. ²³ Chaypita ishcay-quimsa büticuna Tiberíades marcapita ćhayaran. Jesús tantata achcajpaj aypächishan quinranchéhu ićhicaycäriran. ²⁴ Chaura Jesúspis, purishijnincunapis mana ćhayaptin, Cafarnaún marcaman ashij aywacäriran.

²⁵ Tarir, Jesúsna tapuran: «Yaćhaj Tayta, ¿imaytaj shamushcanqui?» nir. ²⁶ Jesúsnra niran: «Sumaj tantiyacunquiman. Mana Tayta Diosninchipa maquinchu cawashäta tantiyashpayquichu ashircaycämanqui; manchäga tanta-raycullarmi. ²⁷ Paćhallayquita ama ashinquimanchu. Manchäga mana ushyacaj cawayta tarinayquipaj shimita wiyanquiman. Tayta Diosninchichi alli ñawinpa ricamar, caćhamasha. Mana ushyacaypa cawachinäpaj pitapis maquiman ćhurasha.»

²⁸ Chaura runacuna tapuran: «Tayta, ¿imatataj ruráman Tayta Diosninchipa shungun munashanta ruranäpaj?» nir. ²⁹ Jesúsnra niran: «Tayta Diosninchichi caćhamashanta ćhasquicunayquita munan.» ³⁰ Chaura tapuran: «Tayta Diosninchichi caćhamushushayquita auninäpaj, munayniyuj cayníquitaraj mä, musyachicuy. Tayta Diosninchichi camacächiyninpa mä, imatapis ruray. ³¹ Unay auquillunchicuna chaqui pacha quinranchéhu manäta micuran.* Moisés isquirbirashanchüpis nin: «Tayta Diosninchichi ricarachishan tantata micuran.»»

³² Chaura Jesús niran: «Sumaj tantiyacunquiman. Mana Moiséschu janaj pacha tantata shicwachimusha; manchäga quiquin Papäni. Paymi cawachicuj tantata tarichishunqui. ³³ Chay tantata janaj pachapita caćhamusha llapan runata cawachinanpaj.» ³⁴ Chaura runacuna niran: «Chay tantata waran-waran jaraycallämay, ari.»

³⁵ Jesúsnra niran: «Cawachicuj tanta caycä. Tayta Diosninchipa caćhan cashäta ćhasquicur, mana imaypis yarganquipächu. Yupachicamar, mana imaypis yacunanquipächu. ³⁶ Jamcuna ricsimanqui. Tayta Diosninchichi caćhamashantam ichanga mana auninquichu. ³⁷ Alli ricashancunatam Tayta Diosninchichi maquichu cawachinga. Pipis ćhasquicamaptin, maquichu charäshaj. Mana wasguipäshächu. ³⁸ Tayta Diosninchichi caćhamasha mana quiqiü yarpashäta ruranäpächu; manchäga quiquinpa shungun munashanta ruranäpaj. Chaypämi janaj pachapita shamushcä. ³⁹ Tayta Diosninchichi munashanta ćharcunä camacan. Chaymi pipis maquichu cawar, mana jishpipämanmanchu. Manchäga ushyacay junajchéhu llapanta cawarachimushaj. ⁴⁰ Llapan runa mana ushyacaj cawayta tarinanta Papäni munan. Chaymi pipis musyapämär yupachicamarga, mana ushyacaj cawayta tarin. Ushyacay junajchüpis Tayta Diosninchipa Wawan cashpä yupachicamajcunata cawarachimushaj.»

⁴¹ Tincuchiypa rimar: «Tayta Diosninchichi caćhamashan tanta caycä» niptin, Israel runacuna ullgucucuycuran. Chaymi niran: ⁴² «Payga Josépa wamran Jesúlla. Maman-taytan pü cashantapis ricsinchi. ¿Imanirtaj: Janaj pachapita shamushcä niycämanchi?»

* **6:31** Nehemías 9.15. Manäpita musyayta munar, Éxodo 16.4–36-ta liguinqui.

⁴³ Chaura Jesús niran: «Ama jamurpämaychu. ⁴⁴ Tayta Diosninchi caáchamasha. Mana camacächiptin, pipis mana nuwaman yupachicungachu. Yupachicamajcunatam ichanga ushyacay junaj cawarachishaj. ⁴⁵ Unay willacujcunapa shiminpis nin: ‹Tayta Diosninchi llapan runata tantiyachinga.›* Chaymi Tayta Diosninchipa shiminta wiyar shungunman chayaptin, nuwatapis chasquicaman. ⁴⁶ Mana pipis Tayta Diosninchita ricashachu. Paypita shamush carmi ichanga Tayta Diosninchawan ricsinacü. ⁴⁷ Sumaj tantiyacunquiman. Pipis nuwaman yupachicur, mana ushyacaj cawayta tarishana. ⁴⁸ Chaypitam nishcä: ‹Nuwa cawachicuj tanta caycä.› ⁴⁹ Unay auquilluyquicuna chaqui pacha quinranchú manäta micurpis, wañuya tariran. ⁵⁰ Janaj pachapita shamuj tantata micujcunam ichanga mana ushyacaj cawayta tarin. ⁵¹ Nuwa cawachicuj tanta caycä. Janaj pachapita Tayta Diosninchi caáchamasha. Cay tantata micujcuna mana ushyacaj cawayta taringa. Tantapita rimarga, quiquipaj rimaycä. Llapan runata cawachinä-raycur wañuyman chayashaj.»

⁵² Chaura Israel runacuna tincupänacuran: «¿Tantata micushanchi-jina quiquintarächi micushun?» nir. ⁵³ Jesúsna niran: «Sumaj tantiyacunquiman. Tayta Diosninchi caáchamasha. Quiquita mana micur, yawarniña mana upur, wañush-yupay carcaycanqui. ⁵⁴ Quiquita micur, yawarniña upur, Tayta Diosninchipa maquinchú imaycamanpis cawarcaycanqui. Ushyacay junajchüpis cawarachimushayqui. ⁵⁵ Quiquimi cawachicuj micuy caycä. Yawarnipis cawachicuj yacu caycan. ⁵⁶ Quiquita micujcuna, yawarniña upujcuna shungüwan tincun. Paycunawan alli ricanacü. ⁵⁷ Tayta Diosninchi cawachicujmi. Payga caáchamasha. Paypita cawaycä. Chaymi chasquicamajcunata quiquita micuptin, cawachishaj. ⁵⁸ Mä, sumaj tantiyacuy. Janaj pachapita Tayta Diosninchi caáchamasha. Chaymi: ‹Cawachicuj tanta caycä› ni. Unay auquilluyquicuna manäta micursi, wañuyman chayaran. Chasquicamajcunam ichanga mana ushyacaj cawayta taringa.» ⁵⁹ Cafarnaún marcapi shuntacäna wasíchu Jesús llapantapis willapäcuran.

Tayta Diosninchipa shimin cawachicuj cashan

⁶⁰ Chaura Jesúspa shiminta wiyar, waquin jatirajnincuna parlanacuran: «Jesús imatash rimacullanpis. Mana tantiyanchichu» nir. ⁶¹ Jamurpashanta musyar, Jesús niran: «¿Rimashä nanäshunquichu? ⁶² Tayta Diosninchi caáchamasha. Janaj pachaman cuticupti, ¿imaninquimanraj? ⁶³ Tayta Diosninchi Espíritu Santuwan cawachimanchi; mana runa-masinchichu. Cawachicuj Tayta Diosninchipa shiminta willapaycaj. ⁶⁴ Chaypis waquinniqui mana aumimanquichu.» Pi-pi chasquicunantapis, pi wañuyman jitarpunantapis Jesús mayna musyaran. ⁶⁵ Chaymi niran: «Tayta Diosninchi camacächiptinraj, pipis yupachicamanga.»

⁶⁶ Chaura achcaj runa wasinman-caman cuticäriran. Jesústa mana puríshirannachu. ⁶⁷ Achcaj runa aywacuptin, chunca ishcaywan (12) puríshijnincunatapis niran: «Munar, jamcunapis cuticunquiman.» ⁶⁸ Simón Pedruna niran: «Tayta, nuwacuna jamllata wiycushayqui. Imaycamanpis cawanäpaj willapämashcanqui. ⁶⁹ Jamllaman yupachicü. Tayta Diosninchi caáchamushcashunqui. Acracushan Washäcujnинmi canqui.» ⁷⁰ Chaura Jesús niran: «Puríshimänayquipaj chunca ishcaywanta acracushcaj. Chaypis jucniqi supaymi canqui.» ⁷¹ «Supaymi canqui» nirga, Judaspaj rimaycaran. Paymi Simón Iscariotipa wamran caran. Judasga Jesústa wañuyman jitarpuran puríshinanpaj acracush caycaptinsi.

7

Runacuna Jesústa wasguishan

¹ Chaypita-pacha Galilea quinrallanchú marcan-marcan Jesús puriran. Mayur Israel runacuna wañuchinanpaj ashiycaptin, Judea quinranman mana aywaranchu.

* ^{6:45} Isaías 54.13.

2-3 Tacma ruray fiesta ́hayacämuptin, wauguincuna Jesústa niran: «Judea quinran Jerusalén marcaman fiestata ruraj aywanquiman. Tayta Diosninchipa maquinchú purir, ima-imata rurashayquitapis llapan jatiräshujniquicuna ricanman. ⁴ Llapan runa ricsimänanchita munar, llapan ricay imatapis ruranchi. Runa captiqui, jamtapis llapan runa ricashunquiman.» ⁵ Wauguincuna chaynuy niran Jesústa Tayta Diosninchí caéhamushanta mana ́chasquicur. ⁶ Jesúnsna niran: «Mana aywashärächu. Tayta Diosninchí caéhamashanta mana musyachicümanrächu. Jamcunam ichanga juclla aywanquiman. ⁷ Pipis mana chiquishunquichu. Jucha aparicushanta jurgapaptimi ichanga, chiquiman. ⁸ Jamcunalla fiestaman ayway. Aywanä mana camacanrächu.» ⁹ Chaynuy nir Galilea quinranpita Jesús mana llucshiranrächu.

Jerusalén marcačhu Tacma ruray fiestaman Jesús aywashan

10 Wauguincuna fiestaman aywacuriptin, Jesúspis pacayllapa aywaran. Pitapis mana willaparanchu. **11** Fiestačhu mayur Israel runacuna Jesústa ashiycaran: «¿Maychüraj chay runa jatiraycan?» nir.

12 Pampa runacunapis Jesús-janan tincupänacurcaycaran. Waquin runa Jesúspaj niran: «Pay alli runa.» Waquinna niran: «Mana. Runacunata pantaycáchin.» **13** Ichanga mayur Israel runacunata manchacushpan pacayllapa parlanacurcaycaran.

14 Pullan fiestačhu caycaptinna, Tayta Diosninchipa wasinman Jesús aywaran. Willapäcuya jallaycuran. **15** Yarpay-sapa cashanta tantiyar, mayur runacuna manchariran: «Cay runa mana istudiash caycarchi, llapanta musyan» nir. **16** Jesúnsna niran: «Tayta Diosninchí caéhamasha. Paypa shiminta willapäcuyca; mana shungü munashal-lantachu. **17** Wiyacujcuna Tayta Diosninchipa shiminta willacushäta tantiyacunga. Mana umä yarpashallantachu rimaycä. **18** Shungun munashallanta willapäcujcuna quiullan alli-tucun. Nuwam ichanga mana llullacüchu. Manchä Tayta Diosninchí yarpashallanta willapäcuyca. Payllata alliman ́churashun. **19** Taytacuna, Moiséspa shiminta ́chasquicushcanqui, ¿au? ́Chasquicush carga, ¿imanirtaj mana ́charcunquichu? ¿Imap-itataj wañuchimaya ashiycanqui?» **20** Chaura runacuna japariran: «¿Piraj wañuchiyya munaycäshunqui? Supay puillacushcashunqui» nir. **21** Jesúnsna niran: «¿Diyawardačhu jishyačhuta allchacächishalläpitachu wichaypa-uraypa rimarcaycanqui? **22** Mä, tan-tiyacushun. Moiséspa shiminchú nin: «Ullgu wamra yuriptin, pusaj junajyuillata jirunqui.» Chaymi jirucuy junaj ́hayamuptin diyawarda captinsi, jiruyčhu aruycanqui. Ullgu wamrata jirunanpaj Tayta Diosninchí auquillunchi Abrahamta, Isaacta, Jacobta willaparan. Jipataraj Moisés yuriran. **23** Moiséspa shiminta ́charcunayqui-cashan diyawar-dačhüpis jiruyčhu aruycar, ¿imanirtaj diyawardačhu jishyačhu runata allchacächishäpita chiquircaycämánqui? **24** Imatapis sumaj mana tantiyar, ama rimacunquimanchu. Sumajraj tantiyacunquiman.»

Washäcuj cashanta Jesús musyachicushan

25 Waquin Jerusalén runacuna Jesúspaj parlaran: «Mayur runacuna tagay runata wañuchiyya munarcaycan, ¿au? **26** Canan llapanpa ñaupančhu willapäcuptinsi, mana rima-panchu, ¿au? ¿Mayur runacunapis ́chasquicushachuraj: «Tayta Diosninchí caéhamushan Washäcuj» nir? **27** Payga mana Washäcuj canmanchu; manchäga marca-masillanchi. Washäcuj shamuptinmi ichanga, maypita ricarimunantapis mana musyashunchu» nir.

28 Chay wican Tayta Diosninchipa wasinčhu Jesús willapäcuycaran. Chaymi runacuna wasguipashanta wiyan, wiyanchipaya niran: «May marcačhu yurishätapis, pii cashätapis musyanqui. Ichanga mana shungü munashanta rurarchu puriyca. Shiminta ́charcushpan Tayta Diosninchí caéhamasha. Jamcuna Tayta Diosninchí pii cashan-tapis mana musyanquichu. **29** Nuwam ichanga ricsinacü. Paypita cawä. Quiquin caéhamasha.» **30** Chaynuy niptin, runacuna ullgucäcuran. Risu charicurcuya munaran.

Tayta Diosninchim ichanga mana camacächiranchu. ³¹ Waquin runacuna Jesúspa shimenta čhasquicur, niran: «¿Jesús rurashanta lluta runa rurangachuraj? Mana. Payga Washäcujčhi canga. Tucuya rurar, Tayta Diosninchipa maquinčhu purishanta musyachicun.»

Fariseucuna Jesústa chariyta munashan

³² Runacuna parlanacushanta mayar, fariseucunapis, mayur cüracunapis ullgucurcururan. Tayta Diosninchipa wasinta täpacunata niran: «Jesústa risu chariy.» ³³ Jesúna niran: «Unayllaraj juyapärishun. Jinarcur cačhacamajman cuticushaj. ³⁴ Ashimashpayquipis mana tarimanquipächu. Mayman aywashämänpis mana čhayamunquipächu.»

³⁵ Chaura mayur runacuna tapunacuran: «Mana tarinanchipaj, ¿mayparaj aywacunga? ¿Jucläčhu tiyaj marca-masinchicunamanchuraj willapaj aywanga? ¿Jäpa runacunat-achuraj willapämunga? ³⁶ ¿Imanirtaj nimanchi: «Ashimashpayquipis mana tarimanquipächu. Mayman aywashämänpis mana čhayamunquipächu» nir?»

Cawachicuj yacuwan Jesú tincuchicushan

³⁷ Tacma ruray fiestačhu ushyanan junajraj jatun diya caran. Chay junaj llapan wiyananpaj tincuchiypa Jesú niran: «Pipis yacunar, mañacamächun mishquilla upunanpaj. ³⁸ Tayta Diosninchipa shiminpis nin: «Nuwaman yupachicamajcuna mana yacunangachu. Nuwapita upuptin, quiquinuncapita cawachicuj yacu pashtamunga.» ³⁹ Chaynuy tantiyachicur, tincuchiyllapa Espíritu Santupita rimaycaran. Ichanga Espíritu Santuta mana cačhamuranrächu. Jesú waňushanpita cawarcamur janaj pachaman cuticurraj, Espíritu Santuta cačhamunan caran. Cačhamuptinraj, Jesúzman yupachicujcunata Espíritu Santu maquinčhu purichinga.

Jesús-janan runacuna apaycačhäncushan

⁴⁰ Jesúspa shimenta wiyar, waquin runa niran: «Jesús Tayta Diosninchipa willacujnincanga.» ⁴¹ Waquinna niran: «Payga Washäcuj canga.» Waquinnam ichanga niran: «Galilea marcapita Washäcuja mana yurimunmanchu, ¿au? ⁴² Tayta Diosninchipa shiminpis nin: «Washäcuja unay mandaj Davidpa yawar-masillanpita yuringa. Paypa marcan Belén marca.» ⁴³ Runacuna Jesú-janan wicheyapa-uraypa rimaran. Mayganinpis mana tantiyanacuranchu. ⁴⁴ Chaymi waquin runa Jesústa chariyta munaran. Ichanga pipis mana yataparanchu.

Mayur runacuna Jesúspa shimenta mana čhasquicushan

⁴⁵ Tayta Diosninchipa wasinta täpacuna cutiptin, fariseucunawan mayur cüracuna tapuran: «¿Imanirtaj Jesústa mana charishcanquichu?» nir. ⁴⁶ Chaura täpacuna niran: «Payga rasunpa Tayta Diosninchipa shimenta willapäcun. Payman pipis mana tincunchu.» ⁴⁷ Fariseucunana niran: «¿Jamcunapis Jesúspa shimenta čhasquicurcushcanquičhi? ⁴⁸ Nuwacunam ichanga mayur cüra cashpä, fariseu cashpä imanillarpis mana čhasquicushächu. ⁴⁹ Upa runacunalla paypa shimenta čhasquicun. Moiséspa shimenta pampaman čhurashanpita paycunata Tayta Diosninchichi ñacayman čhayachinga.» ⁵⁰ Chaura chacaypa Jesúzman aywaj Nicodemo mayur Israel runa carpis, niran: ⁵¹ «Moiséspa shimin nin: «Pitapis ñacachinayquipaj juchantaraj sumaj ashinqui.» Chaymi sumajraj tapupäshun.» ⁵² Waquin fariseucunana niran: «¿Jampis Galilea marcapita Washäcuj ricarimunantachu riguinqui? Tayta Diosninchipa shimenta mä, sumaj liguiy. Willacujcunapis Galilea marcapita mana ricarimunmanchu.» ⁵³ Chaypita llapan runa wasinmancaman cuticäriran.*

* ^{7:53} Unay-unay Bibliačhu: «Janapachicuj warmi» nishan willapa Juan 7.53–8.11 mana taricanchu. Jipataraj yapacasha.

8

Jananpachicuj warmipita rimashan

¹ Jesúsmi ichanga Ulíbus puntaman aywacuran. ² Warannin tuta-tutalla Jerusalén marcaman cutiran. Tayta Diosninchipa wasinčhu achcaj runawan tincur, sumaj willapäcuycaran. ³ Willapaycaptin, Moiséspa shiminta yačhajcunawan fariseu runacuna juc warmita Jesúsman čhayachiran. Chay warmita runanta jananpachir, juc runawan cacuycajta tarirunaj. Čhayarcachir, llapanpa ricay ñawinčhu Jesústa niran: ⁴ «Cay warmita jucwan cacuycajta tarishcä. ⁵ Moiséspa shimin nin: ‹Majayuj caycar jucwan cacuptin, sajmaycällar wañuchinqui.› ¿Imaninquitaj jam?» ⁶ Paycuna achäquita ashillar tapuran. Chaymi Jesús pachaman uysucuycur, díduwan isquirbiran. ⁷ Yaparir-yaparir tapuptin, íchircur niran: «Mayganiquipis juchaynaj cashpayqui mä, sajmay.»

⁸ Chaynuy nir, yapay uysucuycuran. Pachaman isquirbiran. ⁹ Chaura Jesúspa shiminta wiyar, mayur runacuna aywacuran. Jipanta müsucunapis llucshicuran. Quiquillantana warmita jaguiycuran. ¹⁰ Ichéhircur, warmitana Jesús niran: «Juchayquita ashijcuna aywacushana.» ¹¹ Warmina niran: «Au. Aywacusha.» Jesúsna niran: «Nuwapis juchayquita mana ashipäshayquinachu. Canan wasiquiman cuticuy. Ichanga juchata ama aparicunquichu.»

Achquian Jesús tincuchicushan

¹² Juc cuti llapan runata Jesús niran: «Cay pachapa achquinmi cä. Chaymi Tayta Diosninchipa shungun yarpashanta llapan runata musyachicuyca. Shimita wiyacur, mana chacajčhu-jinachu juchačhu cawanquipaj; manchäga achquičhu-jina alli cawayta tarinquipaj.»

¹³ Fariseucunana niran: «Alli-tucuycanqui. Yangalla rimaycanqui.» ¹⁴ Chaura Jesús niran: «Rimashäta mana čhasquicuptiquisi, rasullanta rimaycä. Pipa maquinčhu cawashätapis, pí cačhamashätapis musyä; jamcunam ichanga mana. Maypita shamushätapis, mayman cuticushätapis mana musyanquichu. ¹⁵ Jamcuna ñawiqui ricashallanta: ‹Alli, ‹Mana alli› ninqui. Pitapis ricapanqui; nuwam ichanga mana. ¹⁶ Pitapis: ‹Alli, ‹Mana alli› niyta munar-imarga, rasun-cajta nishaj. Mana quiquilläpitachu imatapis rurä. Manchäga cačhamaj Papäni yanapáman llapantapis rasun-cajta ricanäpaj. ¹⁷ Jamcunapaj Moisés isquirbishanpis nin: ‹Ishcaj tistigu ricaptinraj, rasunpa cashan musyacan.› ¹⁸ Pí cashätapis rasunpa cashan musyacänanpaj quiquími niycä. Cačhamaj Papäni pis musyacächin.» ¹⁹ Chaura tapuran: «Papäni qui, ¿maychütaj caycan?» nir. Jesúsna niran: «Jamcuna Papäni wampis, nuwawanpis mana yačhänacunquichu. Sumaj ricsinacuycaptinchi, Papäni pí cashantapis musyanquiman.» ²⁰ Jesús llapantapis willapäcuycaran Tayta Diosninchipa wasinčhu, cuyachicuyunata jutunan ñaupallanpi. Llapanpa ricay ñawinčhu willapäcupinsí Tayta Diosninchí mana camacächiptinraj, Jesúsna mana chariranrächu.

²¹ Jananmanpis Jesús niran: «Tayta Diosninchí shuntacamanga; jamcunatam ichanga mana. Ashimarsi, mana tarimanquipächu. Juchata aparicushayquipita wañuya tarinquipaj.» ²² Chaura mayur Israel runacuna niran: «Wañucuriyta yarparčhi: ‹Mana tarimanquipächu› niyca, ¿au?» ²³ Jesúsna niran: «Jamcuna cay pachačhu yurish car, shunguyqui munashallanta ruranqui. Nuwam ichanga janaj pachapita shamush car, Tayta Diosninchipa shungun munashallanta rurä. Jamcuna wañucujlla canqui; nuwam ichanga mana. ²⁴ Chaymi nishcaj: ‹Juchayqui aparicushalla wañunqui. Cawachicuj cashäta mana aunirga, wañuyllaman čhayquipaj.›» ²⁵ Chaura tapuran: «¿Pitaj canqui?» nir. Jesúsna niran: «Pí cashätapis mayna willashcaj. ²⁶ Jucha-sapa cashayquipita sumajraj jurgapáman. Jamcunapita rimäman. Shimita mana čhasquicuptiquisi, cačhamajpa shiminta wiyashpä llapantapis rasullanta rimä. Payga imatapis rasullanta rimaptin, llapan runata willapä.»

²⁷ Tayta Diosninchipa maquinchhu cawashanta Jesús tantiyachiptinsi, mayur runacuna mana tantiyacuranchu. ²⁸ Chaura Jesús niran: «Jugarachimaptinraj, Papäni cačhamashanta tantiyacunquipaj. Chayraj Washäcu cashäta musyanquipaj. Papäni tantiyachimashallanta rimashäta, shungü munashallanta imatapis mana rimashäta tantiyacunquipaj. ²⁹ Paypa maquinchhu cawä. Sumaj ricamar, mana cačharimanchu. Nuwapis shungun munashallanta imatapis rurä.» ³⁰ Chaynuy niptin, achcaj runa Jesústa čhasquicuran: «Taytallau tayta, Washäcuji canqui» nir.

Tayta Diosninchipa wawancuna wiyacunanpaj cashan

³¹ Shiminta čhasquicuj Israelpunata Jesús niran: «Shimiña wiyacur, shungüman tincunqui. Maquichümi purinquipaj. ³² Čhasquicamaptiqui, jucpa maquinpita jurgushayqui Tayta Diosninchipa maquillanchhu purinayquipaj.» ³³ Chaura Jesústa ticrapuran: «Auquillunchi Abrahamta quiquin Tayta Diosninchchi wamrachacuran. Abrahampa willcan carcaycä; mana jucpa uywayninchu. ¿Imanirtaj: <Jucpa maquinpita jurgushayqui nimanqui?» nir.

³⁴ Jesúsnra niran: «Sumaj tantiyacunquiman. Pipis juchallačhu arur, uyway jucpa maquinchhu cawashan-jina juchacachicuj supapya maquinchhu cawan. ³⁵ Uywayga mana wasiyujpa wamranchu. Wamranmi ichanga taytanpa wasinpita imaypis mana llucshinchu. ³⁶ Chaymi Tayta Diosninchipa Wawan cashpä washaptij, supapya maquinchhu mana cawanquipänachu. ³⁷ Abrahampa willcan cashayquita musyä. Chaypis shimiña mana čhasquicunquichu. Manchäga wañuchimaya munarcaycanqui. ³⁸ Papäni yačhachimashallanta willapaycaj. Jamcunapis taytayqui yačhachishushayquillata rurarcaycanqui.»

³⁹ Chaura niran: «Abrahampa willcan carcaycä. Payga taytämi.» Jesúsnra niran: «Rasuypa Abrahampa willcan cashpayqui Abraham-jina cawanquiman. ⁴⁰ Jamcunam ichanga Tayta Diosninchipa shimiña willapaptijsi, wañuchimaya ashircaycanqui. Abraham mana imaypis wañuchicuranchu. ⁴¹ Taytayquiga jucmi. Taytayqui rurashan-jina rurarcaycanqui.» Chaura paycuna niran: «Mana jucpa churinchu cä. Tayta Diosninchipa wawanmi carcaycä.»

⁴² Jesúsnra niran: «Tayta Diosninchipa wawan caycar, nuwatapis alli ñawiquipa ricamanquiman. Paymi cačhamasha. Mana shungü munashanta rurarchu puriyä. ⁴³ Chaypis upa-tucur, shimiña mana čhasquicunquichu. Tantiyacuya mana munar, willapashäta mana wiyacunquichu. ⁴⁴ Llapantapis ruranqui supapya maquinchhu cawar. Paymi taytayqui. Paypa shungun munashallanta imatapis rurarcaycanqui. Taytayqui supayga unaypita-pacha wañuchicuj. Llullacuj. Rasun-caj rimaytapis mana junchu. Llullacuylata shungun yarpan. Llulla cashpan runacunatapis llullacachin. ⁴⁵ Chaymi shimiña mana čhasquicunquichu. Rasunpa Tayta Diosninchipa shimiña willapaycaj. Paypa shimin rasullanta riman. ⁴⁶ Ima juchatapis mana aparicushcächu. Munar, mä, mayganiquipis ashipämanquiman. Tayta Diosninchipa shimiña willacuptisi, mana yupachicamanquichu. ⁴⁷ Tayta Diosninchipa wawancuna shimiña cushish wiyacun. Jamcunam ichanga jucpa churinchu cashpayqui imasi mana jucunquichu.»

⁴⁸ Chaura chaynuy niptin, Israel runacuna Jesústa ashllir ushyaran: «Samaria runapa churinchu canqui. Supay puclacushcashunqui» nir. ⁴⁹ Jesúsnra niran: «Mana puclacamashachu. Manchäga Papäni alliman čhuraycä. Jamcunam ichanga pampaman čhuraycämanqui. ⁵⁰ Pitapis mana mañacüchu: <Alliman čhuramay> nir. Tayta Diosninchim ichanga alliman čhuramänayquita munan. Paymi ima-imata rurashanchitapis jurgapämäshun. ⁵¹ Sumaj tantiyacunquiman. Shimiña wiyacujcuna wañuyman mana imaypis čhayangachu.» ⁵² Chaura runacuna niran: «Supay puclacushcashunqui, ¿au?

Auquillunchi Abrahampis, unay willacujcunapis llapanmi wañucuran. Chaypis niycanqui: «Shimüta wiyacujcuna wañuyman mana imaypis chayangachu.»⁵³ Auquillunchi Abrahampis, unay willacujcunapis Tayta Diosninchipa shiminta sumaj-sumaj wiyacuran. Chaypis wañuya tariran. Paycunata apärinayquipaj, ¿pitaj canqui?»

⁵⁴⁻⁵⁵ Jesúsna niran: «Quiquillä alli-tucupti, pipis mana alli ricamanmarchu. Papänimi ichanga alliman churaycäman. Paypa maquinchu cawä. Jamcunam ichanga: «Tayta Diosninchita manchapacü» nirpis, mana wiyacunquichu. Nuwam ichanga wiyacü. «Wiyacü» nir rasun-cajta rimaycä. Mana jamcuna-jinachu llullacuyca.»⁵⁶ Auquilluyqui Abraham shamunäta musyar, jatunpa cushicuran. Ricamar, sumaj-sumaj cushicuran.»⁵⁷ Chaura runacuna niran: «Pichga chunca (50) watatapis mana ushyanquirächu. ¿Imanupataj auquillunchi Abrahamta ricsinquiman caran?»⁵⁸ Jesúsna niran: «Sumaj tantiyacunquiman. Abraham manaraj yuriptin, cawaycarä. Cawajmi cä.»⁵⁹ «Cawajmi cä» niptin, runacuna sajmariyta munaran. Chaypis achcaj runapa chauipinman yaycur, Jesús illaricäcuran. Tayta Diosninchipa wasinpita aywacuran.

9

Japra runata Jesús allchacächishan

¹ Aywacuycashanchu yuriyininpita-pacha japra runata Jesús tariran. ² Chaymi purishijnincuna tapuran: «Tayta Jesús, ¿imanirtaj cay runa japra yurisha? ¿Maman-taytan jucha-sapa cashanpitachu, quiquinpa juchanpitachu?» nir. ³ Jesúsna niran: «Mana quiquinpa juchanpitachu, mana maman-taytanpa juchanpitachu; manchäga Tayta Diosninchimunayniyuj cashanta runacuna musyananpämi.»⁴ Cay pachačhu cashäcaman cačhamaj Tayta Diosninchipa shungun munashanta rurashun. Aywacupti, ima ruraytapis mana camäpacunquipächu. ⁵ Cay pachačhu cashäcaman achqui achicyashan-jina Tayta Diosninchipa shiminta willacuycäshaj. Shungun munashantapis ruraycäshaj.»

⁶ Chaynuy nir Jesús tuwayllanwan mituta ruraran. Nircur japrapa ñawinta pičuparan. ⁷ Pičuparcur, niran: «Siloé püsuman aywaycur, mayllacuy.» Rimayninchu: «Siloé» ninan: «Cačhamusha» ninanmi. Japra runana änir mayllacuran. Ñawinta mayllacurir, ricaycarna cuticuran.

⁸ Chaura bisinuncuna, ricsinacushancuna niran: «Tagay runa mañapacuj japra, ¿au?» ⁹ Waquin niran: «Au, paymi.» Waquinna niran: «Mana paychu. Ichanga pay-nirajmi.» Quiquinna niran: «Chay japra carä.»¹⁰ Chaura tapuran: «¿Imanupataj ñawiqui quičhacasha?» nir. ¹¹ Allchacaj runana niran: «Mituwan ñawita Jesús pičupamasha. Jinarcur Siloé püsučhu ñawita mayllacunäpaj cačhamasha. Mayllacushallä ñawi quičhacäcusha.»¹² Chaura tapuran: «¿Maychütaj chay runa caycan?» nir. Tapuptin, niran: «Mana musyächu.»

¹³⁻¹⁴ Mituta rurarcur japra runata Jesús allchacächishan junajga diyawarda caran. Chaymi chay runata fariseucunaman aparan. ¹⁵ Fariseucunana allchacaj runata tapuran imanuypa ñawin quičhacashantapis. Tapuptin, niran: «Ñawita mituwan pičupamasha. Mayllacuripi, ricarä.»¹⁶ Fariseucunana niran: «Chay allchacächij runa Tayta Diosninchita mana manchapacunchu. Diyawardačhu allchacächir, juchačhu aruycan.» Waquincunana niran: «Jucha-sapa caycar, ¿imanaypataj jishyačhuta allchacächinman? Tayta Diosninchchi jucha-sapata mana yanapanmanchu.» Chaynuy nir quiquin-pura apaycačhänacuran. ¹⁷ Chaura yapay tapuran: «Ñawiquita quičhaj runapaj, ¿imatataj yarpanqui?» Tapuptin, niran: «Tayta Diosninchipa willacujnini canga.»

¹⁸ Mayur Israel runacunam ichanga mana riguiranchu: «Llullacuycanqui. Mana japrachu cashcanqui» nir. Chaymi allchacaj runapa maman-taytanta jayarcachir,

tapuran: ¹⁹ «¿Cay runa rasunpachu wamrayqui? ¿Rasunpachu japa yuriran? ¿Imanuy-pataj allchacasha?» nir. ²⁰ Chaura maman-taytan niran: «Au, wamrämi. Rasunpa yurishanpita-pacha japa caran. ²¹ Ichanga imanuypa allchacashantapis, pí allchacächishantapis mana musyächu. Payga auquisna. Sumaj musyayta munar, quiquinta tapunquiman.»

²²⁻²³ «Payga auquisna. Sumaj musyayta munar, quiquinta tapunquiman» niran mayur runacunata manchacushpan. Mayur runacuna mayna parlanacuran: «Pipis Jesústa: <Washäcujninch> nir čhasquicuptin, shuntacäna wasipita jargushun. Ama ri-calläshunpishchu» nir.

²⁴ Chaypis mayur runacuna ñawin quičhacaj runata yapay tapuran: «Tayta Diosninchic ricaycämanchim. Canan rasullanta willamay. Chay Jesús jucha-sapa cashanta musyä.»

²⁵ Chaura allchacaj runa nir: «Jucha-sapa cashantapis, mana cashantapis mana musyächu. Japa captipis, ñawi quičhacashallanta musyä. Ricaycäna.»

²⁶ Chaypis yapayraj tapuran: «¿Imatataj rurasha ñawiqui quičhacänanpaj?» nir.

²⁷ Chaura nir: «Mayna willashcaj. Willaptipis, mana riguinquichu. ¿Imanirtaj yaparir-yaparir tapupaycämanqui? ¿Jamcunapis Jesústachu jaticurcuya munarcaycanqui?»

²⁸ Chaura ashllir mayur runacuna nir: «Jucha-sapa runaman yupachicunqui. Jatiraycanquipis. Nuwacunam ichanga Moiséspa shimillanman yupachicü. ²⁹ Payga Tayta Diosninchipa shiminta willacuran. Jesústam ichanga mana ricsillächu. Pipa wawanraj cacullanpis.»

³⁰ Allchacaj runana nir: «¿Imataraj rimacunquipis? Pipa wawan cashanta mana musyaptiquisi, paymi ñawita quičhasha. ³¹ Juchačhu arujcunata Tayta Diosninchima yanapashanta musyanchi. Wiyacujcunallatam, manchapacujcunallatam yanapan. ³² Yurijninpita-pacha japrata allchacächishanta imaypis mana wiyashcanchichu. ³³ Chaymi Tayta Diosninchipa Wawan cashanta musyä. Manchäga imatapis mana ruranmanchu.»

³⁴ Chaura mayur runacuna nir: «Yurishayquipita-pacha marca-pingay caycar, ¿piraj canqui piñapämänayquipaj?» Shuntacäna wasipitapis jarguran: «Ricaytapis mana munalajchu» nir.

³⁵ Allchacächishan runata jargushanta Jesúspis mayaran. Chaymi allchacaj runawan tincur, nir: «¿Tayta Diosninchic cačhamushan Washäcujman yupachicunquichu?» nir.

³⁶ Allchacaj runana nir: «Au, tayta. Ichanga, ¿pitaj Washäcuj canga?» ³⁷ Jesúsnira: «Washäcujmi cä. Mayna ñawiquitapis quičhashcä.»

³⁸ Chaura Jesúspa ñaupanman jungurpacuycur, alliman čhuraran: «Jammanmi yupachicü, Tayta» nir.

³⁹ Jesúsnira: «Cay pachaman shamushcä llapan runapa shungunta musyapänäpaj. Tayta Diosninchipa maquinčhu cawanapaj japracunapa ñawinta quičhashaj. Ricajcunapa ñawintam ichanga chapashaj.» ⁴⁰ Jesúspa shiminta wiyar, waquin fariseucuna niran: «¿Japráchi carcaycä?»

⁴¹ Jesúsnira: «Rasunpa japa caycar, mana juchayujchu canquiman. Ricaycämar mana aunicashayquipitam ichanga, juchayuj carcaycanqui.»

10

Uyshiruwan tincuchiypa willapashan

¹⁻² Chaura Jesús niran: «Sumaj tantiyacunquiman. Suwacunash, asaltanticunash chicuta wacman-cayman jiwirir, uyshaman yaycun. Uysha michijshi ichanga puncunpa yaycun. ³ Michijpa shiminta chicu täpajpis, uyshacunapis wiyanishi. Llapan uyshantapis jutinpa-caman jayan. ⁴ Chicupita jurgurir, uyshancunata jaticun. Uyshancunapis

michijta ricsir, ñaupallantash aywan. ⁵ Mana ricsishcunataš ichanga manchacun. Jayaptinpis, jishpirshi aywacärin.»

⁶ Tincuchiypa Jesús willapaptinsi, fariseucuna mana tantiyacuranchu.

⁷ Chaymi runata uyshawan tincuchir, Jesús niran: «Sumaj tantiyacunquiman. Uyshapa chicunpa puncun-yupay caycä. Uyshacuna maquiüchu purin. ⁸ Ñaupata purijcuna michij-tucursi, suwa casha. Asaltanti casha. Chaymi uyshacuna mana wiyyashachu. ⁹ Nuwaga puncu-yupay caycä. Uyshacuna maquiüchu puriptin, sumaj ricä. Pipis nuwaman yupachicur, Tayta Diosninchipa maquinüchu cawanga. Imapitapis washäshaj. Cawananpaj imatapis mana pishichishächu. ¹⁰ Suwacuna suwacullar, uyshacunata wañuchillar purin. Nuwam ichanga llapaniquita alli cawayta tarichinajpaj shamushcä. Cushi-cushilla cawayta tarichishayqui.»

¹¹ «Alli michij caycä. Llaquipäcuj cä. Llaquipäcuj michijga uyshancuna-raycur wañuytapis tarin. ¹² Paytacushan uyshata michijcunam ichanga liyunta ricar, jishpir aywacärin.* Quiquinpa uywan mana captin, cačhariycur aywacun. Chaura liyun uyshata apacun. Waquin uyshacuna wacpa-caypa jishpicärin. ¹³ Paytacushan michipacujpis jishpir aywacun. Uyshata liyun micuptinsi, mana imasi jucunchu. ¹⁴ Nuwam ichanga alli michij caycä. Uyshäcuna shimita ricsin. Nuwapis llapanta ricsi. ¹⁵ Chay-jinapis Tayta Diosninchawan sumaj ricsinacü. Chaymi uyshäcuna-raycur imamanpis čhayäman. ¹⁶ Uyshäcuna mana juc pachallačhüchu caycan. Jucläčhüpis caycan. Paycunapis shimita ricsinga. Imayllaga juc pachallaman llapanta shuntashaj. Nuwalla llapanta michishaj. ¹⁷ Uyshäcunata wañuy-caway llaquipapti, Tayta Diosninch sumaj llaquipäman. Wañuya tarirsi, cawarishaj. ¹⁸ Mana pipis wañuchimangachu. Manchäga quiquiri wañuymanpis aywaphushaj. Wañuypis, cawaypis maquiüchu caycan. Papäni llapantapis maquiüman čhurasha.»

¹⁹ Chaura chaynuy niptin, Israelcuna yapay quiquin-pura apaycačhänacuran. ²⁰ Waquin niran: «¿Imapätaj Jesúspa shimita wiyyashunpis? Supay pucllacusha. Jishyayächisha.» ²¹ Waquinna niran: «Mana supaychu rimaycächin. ¿Yuriyinpita-pacha japrata supay allchacächinmanchuraj?»

Jesús Washäcuj cashanta wasguishan

²² Jerusalén marcačhu Tayta Diosninchipa wasinpa diyanta fiestata rurashan wican sumaj jasay caran.* ²³ Paypa wasinüchu «Salomónpa curidurnin» nishan curidurčhu Jesús puriycaran. ²⁴ Shuntacarcur, Israelcuna tapupäcuran: «¿Imaycamantaj yarpačhacuyman čhuramanqui? Tayta Diosninch cačhamushan Washäcuj caycar, juclla willamay» nir.

²⁵ Jesúsnra niran: «Mayna willashcaj. Willaptipis, mana čhasquicunquichu. Papäni camacächiptin, jishyačhucunata allchacächishäpis, runacunata jarashäpis Washäcuj cashäta musyacaycächin. ²⁶ Jamcunam ichanga Tayta Diosninchita wasguipar, shimita mana wiyyacunquichu. Mana uyshächu canqui. ²⁷ Uyshäcunam ichanga shimita wiyyacun. Paycunata ricsimi. Jatishäpa aywan. ²⁸ Mana ushyacaj cawaytapis tarichi. Ushyacayman imaypis mana čhayangachu. Maquiüpta pipis mana jičhumangachu. ²⁹⁻³⁰ Papäniwan juc shungulla cawä. Payga llap-llapanpita mas munayniyujmi. Shimita wiyyacujcunata maquiüman čhurasha ricanäpaj. Maquiüchu cawar, Papäniipa maquinchüpis cawaycan. Chaymi Papäniipa maquinpita pipis mana jičhungachu.»

³¹ Chaynuy niptin, mayur Israel runacuna rumita chariran Jesústa sajmananpaj. ³² Jesúsnra niran: «Papäni camacächiptin, jishyačhucunata allchacächishäta, supaycunata jargushäta, chay-chicaj runata jarashäta ricashcanqui, ¿au? Cananga, ¿allita rurashäpitachu wañuchimayta munarcaycanqui?»

* **10:12** «Liyun» nishanchita castillanučhu: «lobo» nin micucuj jačha allgu-niraj cashanpita. * **10:22** Achquicuy fiestačhu pusaj junajta tünapäcur, Israel runacuna sumaj cushicun: «Tayta Diosninchipa wasin allina caycan» nir.

³³ Mayur runacunana niran: «Mana allita rurashayquipitachu wañuchishayqui; manchäga Tayta Diosninchita apärishayquipita. Runalla caycar, Tayta Diosninchitucuycanqui.»

³⁴ Jesúsna niran: «¿Shiminchu Tayta Diosnichi manachu nin: *<Nuwa-jina carcaycanqui>*?* ³⁵ Unay wican shiminta čhasquicuptin, Tayta Diosnichi niran: *<Nuwa-jina carcaycanqui.› Paypa shiminta pipis juc-nirajman mana rucanmanchu.* ³⁶ Quiquinmi acracamasha. Cay pachaman cačhacamasha. Chaymi: *<Tayta Diosninchipa Wawan caycä nipti, ama ullgunquimanchu: Tayta Diosninchita apäriycan› nir.* ³⁷ Imata rurashäpis Papänipa shungunwan mana tincuptinmi ichanga, shimitapis ama čhasquicunquimanchu.

³⁸ Shimüta mana aunirpis Papän camacächiptin, ima-imatapis rurashäta auninquiman. Camacächiyninpa jishyačhucunatapis allchacächishcä. Supaycunatapis jargushcä. Runacunatapis jarashcä. Chaymi Papänwan juc shungulla cawashäta tantiyacunquiman.»

³⁹ Chaura yapay Jesústa chariyta munaran. Chariyta munaptinsi, llucshir aywacuran.

⁴⁰ Chaypita Juan ushyachicushan quinranman Jesú cuticuran. Ishcay-quimsa simäna Jordán mayu chimpanchu juyaran. ⁴¹ Chay-chicaj runa Jesústa čhayapuran. Paycuna quiquin-puralla ninacuran: «Tayta Diosnillanchi camacächishancunata Ushyachicuj Juan mana ruraranchu. Jesúspaj rimashanmi ichanga llapanpis čharcucaycan.» ⁴² Chaymi achcaj runa Jesústa čhasquicuran: «Payga Tayta Diosnichi cačhamushan Washäcuj» nir.

11

Lázaruta Jesús cawarachimushan

¹ Betania marcachu Lázaro jutiyuj runa tiyan. Juyupa jishyaycaran. Panin caran Maríawan Marta. ² Maríaga Tayta Jesúspa čhaquinman pirjümita jaycapurir, ajchanwan chaquipush carunaj. ³ Chaura turin Lázaro juyupa jishyaptin, Maríawan Marta Jesúzman cačhacuran: «Tayta, yačhänacushayqui Lázaro juyupa jishyaycan» nir. ⁴ Cačha willaptin, Jesú niran: «Chay jishya Lázaruta mana wañuchingachu. Manchäga achäquilla canga Tayta Diosnichi munayniuj cashantapis, nuwa munayniuj cashätapis runacuna tantiyacunapaj.»

⁵ Jesúsga Lázaruwani, Martawan, Maríawan sumaj yačhänacuran. ⁶ Chaypis: «Lázaro jishyaycan» nir willaptin, mana aywaranchu. Ishcay junajraj jinallanchu juyapärran.

⁷ Ishcay junajpitaj purišhijnincunata niran: «Yapay Judea quinranman cutishun.»

⁸ Paycunana niran: «Tayta, janyancunarätaj sajmaya wañuchiyya munashurayqui. ¿Imamantaj cutishun?»

⁹ Jesúna niran: «Intipis juyayta achicyan. Achicyaptin junajpa purir, mana tacacunchichu. Chay-jina Tayta Diosninchipa maquinchu purir, imamanpis mana čhayashunchu. ¹⁰ Chacaptinmi ichanga pipis purir, tacacun. Chay-jina shungun munashanta rurar, juchačhu arujcuna ñacayta taringa. ¹¹ Canan Judea quinranman aywananchi camacan. Yačhänacushanchi Lázaro puñucäcusha. Ricchachij aywashun.»

¹² Puríshijnincunana niran: «Tayta, puñucash caycar, allina riccharamunga, ¿au?»

¹³ «Lázaro puñucäcusha» nir tincuycächiran: «Wañush» ninanta. Puríshijnincunam ichanga rasunpa puñucashallanta tantiyaran. ¹⁴ Chaymi Jesú niran: «Lázaro wañusha.»

¹⁵ Jishya wañuycachiptin, ima allish mana ricashcächu. Ima captinpis, aywashun ricaj. Canan munayniuj cashäta ricar, llapan shunguyquian yupachicamanquiman.»

¹⁶ Chaura Tomás niran: «Nuwanchipis aywashun Jesúswan iwal wañunanchipaj.» Tomásta: «Milli» nir ricsiran.

¹⁷ Betania marcaman čhayaycar, Lázaro čhuscu junaj pamparaycashanta mayaran.

¹⁸ Jerusalén marcapita Betania marcaman pullan liwalla caran. ¹⁹ Chaymi wañupacush captin, achcaj runa Martatawan Maríata yanagaj aywaran.

* **10:34** Salmo 82.6.

²⁰ Jesú斯 ́hayaycashanta musyar, María mana llucshiranchu. Martam ichanga tari-paran. ²¹ Jesústa niran: «Juclla shamunquiman caran, Tayta. Turí mana wañunmanchu caran. ²² Ima captinpis, jamman yupachicü. Ima-imata mañacuptiquisi, Tayta Diosninchi wiyyashushayquita musyä.»

²³ Jesúnsna niran: «Turiqui cawarimunga.» ²⁴ Martana niran: «Cawarinanta musyä. Ichanga llapan wañushcuna cawarimunan junajchüraj cawarimunga.»

²⁵ Jesúnsna niran: «Nuwaga cawarachicujmi cä. Wañushcunatapis cawarachimi. Shimüta ́chasquicujcuna wañurpis, cawarimunga. ²⁶ Maquichu cawajcunata, ́chasquicamajcunata imaysi mana cacharishächu. ¿Rasunpa yupachicamanquichu?»

²⁷ Chaura Marta niran: «Aumi, Tayta. Tayta Diosninchipa Wawan canqui. Paymi cay pachaman caéhamushcashunqui. Washäcuji canqui.» ²⁸ Jinarcur ñañan Maríaman cuticur, rinrillanchú willaran: «Tayta Jesú斯 ́hayamushana. Jayaycäshunqui» nir. ²⁹ Chaura juclla María aywaran. ³⁰ Jesúsmi ichanga marcaman manaraj ́hayasharächu. Martawan tincushan pachallachüraj caycaran. ³¹ Wasinpitá juclla María llucshiptin, yanagajcunapis jipanta aywaran: «Wagajchi pantyunman aywaycan» nir. ³² Maríana Jesústa tariparcur ñaupanman jungurpacuycur, niran: «Juclla shamunquiman caran, Tayta. Caychú caycaptiqui, turí mana wañunmanchu caran.» ³³ Maríapis, yanagajcunapis ataptin, Jesúspa shungunpis llaquicuywan ishquicäcuran.

³⁴ Chaymi tapuran: «¿Maynimantaj Lázaruta pampashcanqui?» nir. Paycunana niran: «Ricanayquipaj shamuy, Tayta.» ³⁵ Willaptin, Jesúspis wagaran. ³⁶ Wagaptin, runacuna niran: «Sumajchári Lázaruwan yachänacuran.» ³⁷ Waquinna niran: «Japra runatapis allchacaycachir, ¿manachuraj Lázarutapis allchacächinman caran? Wañuypita jishpichinman caran, ¿au?»

³⁸ Chaura pushaptin, Lázaro pamparashan chaga uéhcuman Jesú斯 juyupa llaquish ́hayaran. Uéhcuta jatun rumi chaparaycaran.

³⁹ Jesúnsna niran: «Rumita witichiy.» Martana niran: «Tayta, turí éhuscu junajna pamparaycan. Asyariycannachi.»

⁴⁰ Jesúnsna niran: «Mayna willashcaj. Yupachicamar, Tayta Diosninchipi munayniyu cashanta ricanquipaj.»

⁴¹ Chaura runacuna rumita witirachiran. Jesúnsna janaj pachapa ricärir, wiyyächipaypa niran: «Papällau Papä, ima allish mañacushäta wiyyamanqui. ⁴² Imaypis wiyyamashayquita musyä. Caéhacamashayquitapis cay runacuna tantiyacunanta munä.»

⁴³ Nircur jayacuriran: «Lázaro, llucshimuy» nir. ⁴⁴ Lázaruna uéhcupita llucshiramuran. Umanpis, maquinwan ́chaquinpis pitush caran. Llucshiramuptin, Jesú斯 niran: «Pascapuy. Purichunna.»

⁴⁵ Lázaruta cawarachiptin, Maríata yanagaj Israel runacunapis achcajmi Jesúzman yupachicuran.

Jesústa charinanpaj parlanacushan

San Mateo 26.1-5; San Marcos 14.1-2; San Lucas 22.1-2

⁴⁶ Waquin runam ichanga fariseucunaman aywaycur, Jesú斯 imata rurashan-tapis willaran. ⁴⁷ Chaura mayur Israel runacunapa sisyuninpaj llapan mayur cüracunapis, fariseucunapis shuntacaran: «¿Imatataj rurashun? Chay runa Tayta Diosnil-lanchi camacächishancunata ruraycan. Japracunatapis allchacächin. Jishyaéhucunatapis allchacächin. Wañushcunatapis cawarachin. ⁴⁸ Chapata mana ruraptinchi, llapan runa Jesúzman yupachicunga. Yupachicuptin, Roma mandaj runa ullgucäcunga. Murucun-cunata caéhamunga. Murucucunaga Tayta Diosninchipa wasinta juéhurachinga. Marca-masinchita-ima wañurachimäshun» nir.

⁴⁹⁻⁵⁰ Mayur cüra Caifásna llapan mayur Israel runacunata piñaparan: «Upam carcaycanqui. Imatapis mana tantiyacunquichu. Marca-masinchita-ima ama

wañuchimäshuwanchu. Llapanchi-raycur juc runalla wañunman.» Mayur cüra cashpan chay wata llapan cüra-masinta maquinčhu Caifás purichiran.

⁵¹⁻⁵² Payga mana yarpaypachu rimaran. Manchäga chay wata mayur cüra cashpan Tayta Diosninchi yarpächiptin, cüra-masinta shimiyan. Llapan Israel runacunata washänan-raycur Jesús wañuyman čhayananta quiquin Tayta Diosninchi camacächiran. Ichanga mana Israel runacuna-raycurlachu wañuyman čhayanga; manchäga llapan runata washänan-raycur. Paycuna may-chayčhu juyarpis, Tayta Diosninchipa wawan cashpan maquinčhu cawanga. ⁵³ Chay junajpita-pacha mayur Israel runacuna parlanacuran Jesústa wañuchinanpaj. ⁵⁴ Chaymi marca-masincuna ricay Jesús mana puriranchu. Manchäga mana musyachicullar Efraím marcaman aywacuran. Efraím marcaga chunyaj pacha wajtallančhu caycaran. Chay quinrallančhu purishijnincunawan juyaran.

⁵⁵ Chay wíchan Pascua fiesta čhayacämuran. Chaymi wacpita-caypita Israel runacuna Jerusalén marcaman aywarcaycaran fiestapaj camaricuj. Camaricuran Tayta Diosninchi alli ricananta munar. ⁵⁶ Jesústapis ashircaycaran. Chaymi Tayta Diosninchipa wasinčüpis tapunacurcaycaran: «¿Fiestaman shamungachuraj, manachuraj?» nir. ⁵⁷ Fariseu runacunawan mayur cüracuna mayna runacunata nish caran: «Mayčüpis Jesústa ricar-imarga, juclla willaycamanqui charichinäpaj.»

12

Warmi pirjümita Jesústa jaycapushan San Mateo 26.6-13; San Marcos 14.3-9

¹ Pascua fiestapaj sujta junaj pishiycaptin, Betania marcaman purishijnincunawanima Jesús aywaran. Chay marcačhu Lázaruspis tiyan. Paytaga wañushanpita Jesús cawarachimush caran. ² Jesús čhayaptin, micupacunanpaj yanucuran. Marta jaracuptin, Lázaruspis Jesúswan-ima micurcaycaran. ³ Micurcaycaptin, María alli pirjümita čhayachiran.* Tacshalla butillan captinsi, sumaj čhaninyuj caran. Pirjümita Jesúspa čhaquinman jaycapurir, ajchanwan chaquichipuran. Wasi junta pirjümi asyacurcuran. ⁴ Chaura Jesústa wañuyman jitarpuj Judas Iscariote niran: ⁵ «¿Imapätaj alli cuyayllapaj pirjümita jičhacächinqui? Juc wata aruypa čhaninčhu ranticunman caran. Chay jillayta wacchacunata, pishipacujcunata aypunman caran.» Judas Iscariote Jesúspa purishijnin caycarpis, ⁶ mana pishipacujcunata llaquiparchu rimaran; manchäga suwa cashpan. Paymi Jesúspa tisurirun caran. Ichanga wallca-wallcalla jillayta raquicurij. ⁷ Chaura Jesús niran: «Pirjümita jičhapämänanta ama mičhanquchu. Cawaycaptillä, pampacunäpaj armaycächiman. ⁸ Pishipacujcunatawan wacchacunata imaypis ricanquipaj. Nuwatam ichanga waran-waran mana ricamanquipächu.»

⁹ Betania marcačhu Jesús caycashanta mayar, chay-chicaj Israel runacuna aywaran. Mana Jesúsllamanchu aywaran; manchäga Lázarusapis ricäcuj. Payta Jesús cawarachish caran. ¹⁰⁻¹¹ Lázaruta cawarachishanpita runacuna cüracunapa shimita mana čhasquirannachu; manchäga Jesúspa shimillanta. Payllaman yupachicuran. Chaymi mayur cüracuna Lázarusapis, Jesústapis wañurachiya munaran.

Jerusalén marcaman Jesús Čhayashan San Mateo 21.1-11; San Marcos 11.1-11; San Lucas 19.28-40

¹² Warannin Jerusalén marcačhu chay-chicaj runa fiestata rurananpaj caycashančhu Jesús čhayacashantapis mayaran. ¹³ Mayar, runacuna palmapa üjanta cuchuran. Jesústa čhasquicuj llucshir, cushicushpan japarpararan:
«Taytallau Tayta, washaycallämay, ari.*

* ^{12:3} «Nardo» nishan pirjümita jačchapita ruraj. * ^{12:13} «Washaycallämay, ari» ninanta castillänučüpis, griego rimayčüpis: «Hosanna» nin.

Tayta Diosninchi caćhamushan runa alli ricash caycullächun.
Israel runacunapa mandajnin alli ricash caycullächun» nir.

14 Jesúsnra Tayta Diosninchipa shimin ĉarcucänanpaj mañacushan manta bürun muntash čhayaran. Tayta Diosninchipa shiminčhu isquirbiraycan:

15 «Jerusalén marca runacuna,
Ama manchariychu.
Mandajniqui shaycämun.

Manta bürullan muntash yaycaycämun» nir.*

16 Chay wíchan puríshijnincunapis Jesúsnra mandaj cashanta mana tantiyaranchu. Cawarircamur janaj pachaman aywacuptinraj, Jesúsnra rurashancuna Tayta Diosninchipa shiminčhu isquirbisanwan tincushanta yarpäriran. **17** Lázaruta Jesúsnra cawarachishanta ricajcunam ichanga willacur cushish purircaycaran: «Wañush Lázaruta Jesúsnra jayaptin, pamparaycashan ućhcupita cawaycaj llucshimuran» nir. **18** Chaymi: «Tayta Diosninchí sumaj Jesústa yanapan» nir waquin runacunapis Jerusalén marcapita Jesústa ĉasquij llucshiran. **19** Fariseucunam ichanga ninacuran: «Llapan runa payman yupachicun. ¿Canan imatataj rurashun? ¿Pínaraj nuwanchita alli ricamäshun?» nir.

Muruta pampashanwan tincuchiypa willapashan

20 Pascua fiesta caycaptin, jäpa runacunapis Jerusalén marcaman aywaran Tayta Diosninchita alliman čhuraj.* **21** Jäpa runacuna Felipita nirán: «Jesústa ricsichimay, ari.» Felipiga Galilea quinran Betsaida marcapita caran. **22** Felipina Andrésta willaran. Ishcaninna Jesústa willaran. **23** Willaptin, Jesúsnra nirán: «Cananga Tayta Diosninchipa caćhan cashäta llapan runa musyanga. Llapanmi alliman čhuramanga. **24** Sumaj tantiyacunquiman. Rígu muruta mana pampaptinchí, manash wiñamunchu. Murullash jitaräcun. Pampaptinchish ichanga wañush-yupay captin, mamayrunta mana ricanchinachu. Wiñamurshi ichanga, atayar sumaj wayun. **25** Jamcunapis shunguyqui munashallanta rurar mana wiyacamar, ushyacayman čhayanquipaj. Shunguyqui munashanta jungaycur shimiña wiyacurmi ichanga, cay pachačüpis, janaj pachačüpis mana ushyacaypa cawanquipaj. **26** Maquicchu cawayta munar, wiyacamar nuwa-jina cawanquiman. Wiyacamar, čhayashäman čhayanquipaj. Wiyacamaptiqui, Papänipis allíchu jurgushunquipaj.

27 «Cananga juyupa llutäpacuyca. ¿Imataraj rurashaj? «Papä, wañuypita washaycallämay» niyta munarsi, mana nishächu. Papänipa shungun munashallanta ruranäpaj cay pachaman shamushcä. **28** Chaymi Papänita imaypis alliman čhurashaj.»

Chaura janaj pachapita nimuran: «Munayniuj cashäta mayna musyachicushcä. Yappypis musyachicushämi.» **29** Chayta wiyar, waquin juturajcuna nirán: «Räyu-imáchi pashtamusha.» Waquinna nirán: «Anjil-imáchi rimamusha.»

30 Jesúsnra nirán: «Mana nuwatachu jayacamasha. Manchäga jamcunata jayacamusha sumaj tantiyacunayquipaj. **31** Canan llapan runapa shungunta Tayta Diosninchí musyapanga. Supayta jargunga. Cay pachačhu mandaj cayninta jičhunga. **32** Jugarachimaptin, janaj pachaman Tayta Diosninchí shuntacamaptin, camacächishaj llapan runa yupachicamänanpaj.»

33 «Jugarachimaptin» nir imanuypapis rusčhu wañuyman čhayananta musyachicuycaran. **34** Runacunana nirán: «Tayta Diosninchipa shiminta isquirbir, Moisés nirán: «Washäcuja imaycamanpis cawanga.» Jammi ichanga niycanqui: «Tayta Diosninchipa caćhan captisi, rusčhu jugarachimanga.» ¿Pitaj canqui? Mä, Tayta Diosninchipa caćhamushan Washäcuja tantiyachimay.»

* **12:15** Zacarías 9.9. Griego rimayčhu Israel runacunapita tincuchiypa rimar, nin: «Síonpa warmi wamrancuna.» «Síon» nir, Jerusalén marcata yarpaj. «Warmi wamrancuna» nir, llapan Israel runacunata yarpaj. * **12:20** Israel runacuna: «griegos» nij jäpa runacunapa yarpayninpis, rimayninpis juc-niraj captin.

³⁵ Jesúsnra niran: «Ishcay-quimsa junajlla ricanacushun. Achqui achicyashan-jina Tayta Diosninchipa shungun munashanta tantiyachishayqui. Chaymi shimita sumaj wiyaçunquiman. Manchä chacay chayapushunquipaj. Chacaypa purijcuna imamanpis chayashanta mana musyanchu. ³⁶ Chaymi ricay ñawiquichu purishäcaman chasquicamanquiman. Tayta Diosninchipis: ‹Wawämi canqui› nir alli ñawinwan ricas-hunquipaj.» Willapäcuya ushyariycur, Jesúsn aywacuran. Runacuna ricay mana puriranchu.

Jesúsmán runacuna mana yupachicushan

³⁷ Chaura ricay ñawinchi Tayta Diosninchipa camacächiynipa jishyaçhucunata allchacaycächiptinsi, wañushcunata cawariycachiptinsi, runacuna Jesúsmán mana yupachicu-ranchu. Shiminta mana chasquicuranchu. ³⁸ Mana chasquicuranchu unay willacuj Isaíspa shimin charcucänanpaj. Payga unay niran:

«Taytallau Tayta, shimiuita willaptisi, ¿pillapis chasquicushachuraj?

Munayniuj cashayquita musyachicuptiquisi, ¿yupachicushachuraj?»*

³⁹ Chay-jina Jesúsmánpis mana yupachicuranchu. Isaíspa shimin niycaran:

⁴⁰ «Runacunapa ñawinta Tayta Diosninchipa japrayächisha.

Shunguntapis chucruiächisha.

Japrayächisha mana imatapis ricananpaj.

Shunguntapis chucruiächisha mana imatapis tantiyacunananpaj.

Jucha aparicushanpitapis mana wanacunananpaj camacächisha.

Wanacuptinmi ichanga, Tayta Diosnin cashpan allchacächiyan caran.»*

⁴¹ Unaya Jesúsn munayniuj cashanta Isaíasta ricachiptin, rimash caran. ⁴² Achcaj runa Jesústa wasguipaptinsi, waquin Israel runacuna Jesúsmán yupachicuran. Waquin mayur runacunapis Jesúspa shiminta wiyaçuran. Ichanga shuntacäna wasipita jargu-nanta manchacur, runa wiyay mana rimacuranchu. ⁴³ Paycuna Tayta Diosninchipa alli ricananta munarsi, runa-masin alli ricanantaraç sumaj munaran.

⁴⁴ Chaura wiyächipaypa Jesúsn niran: «Pipis yupachicamar, Tayta Diosninchimanpis yupachicun. Paymi caçhamasha. ⁴⁵ Ricamarpis, caçhamaj Tayta Diosninchitapis ri-can. ⁴⁶ Achqui achicyashan-jina Tayta Diosninchipa shungun yarpashanta tantiy-achicunäpaj shamushcä. Yupachicamajcuna Tayta Diosninchipa maquinchi cawanga. Mana chacajchi-jina supaypa maquinchi cawanganachu. ⁴⁷ Runacuna shimita mana wiyaçuptinsi, mana ñacayman chayachinäpächu shamushcä; manchäga llap-llapanta washänäpämi. ⁴⁸ Wasguimajcunam ichanga, shimita mana chasquicujcunam ichanga, quiquillanpita imamanpis chayangapaj. Shimita wiyaçushanman-tupu ushyacay ju-najchi juchanta jurgapash canga. ⁴⁹ Mana umäpita jurgurcallarchu rimä; manchäga quiquin Tayta Diosninchipa shiminta. Paymi caçhamasha: ‹Shimita llap-llapanta willay› nir. ⁵⁰ Paypa shimita wiyaçuptinchi, mana ushyacaj cawayta tarichimanchi. Chaymi rimashäga Tayta Diosninchipa shimillan. Nimashannuylla willacuyca.»

13

Puriñhijnincunapa chaquinta Jesúsmayllapushan

¹ Pascua fiesta manaraj jallariptillan, wañuy jananchi caycashantapis, cay pachapita janaj pachaman Tayta Diosninchawan tincuj aywanantapis Jesúsmayna musyaycaran. Chaynuy captinpis puriñhijnincunata sumaj llaquipar, mana caéchariranchu. ² Chacanaycaptin, llapanwan micupacunananpaj jutucasha. Jesústa wañuyman jitarpunapämi ichanga Simónpa wamran Judas Iscariotita supay yarpächiran. ³ Chaypis Jesúsmayllapushan llap-llapanta maquinman churashanta musyaran. Chaynuypis janaj pachapita shamushanta, janaj pachaman Tayta Diosninchipi

* **12:38** Isaías 53.1. * **12:40** Isaías 6.10.

shuntacunantapis musyaran. ⁴ Chaymi micupacuycashančhu Jesús jataricurcuran. Punchunta jurgurir, chijllanman jacuta watacurcuran. ⁵ Angarawan yacuta čagarcur, purišhijnincunapa čhaquinta mayllapuram. Jinarcur watacushan jacuwan chaquichipuran.

⁶ Čhaquinta mayllapunanpaj čhayaptin, Simón Pedro niran: «Tayta, čhaquiña ama mayllapamanquimanchu. Jucpa čhaquinta manacaj uyway runalla mayllapun.»

⁷ Jesúsna niran: «Imapaj rurashätapis mana tantiyanquirächu. Ichanga imayllapis tantiyacunquipaj.» ⁸ Pedruna niran: «Čhaquiña imaypis ama yatanquimanchu.»

Jesúsna niran: «Sumaj tantiyacunquiman. Čhaquiquita mana mayllapupti, mana purišhimanquinapishchu.»

⁹ Chaura Simón Pedro niran: «Tayta, čhaquilläta ama mayllapamaychu. Manchäga maquítapis, umätapis mayllapamay.»

¹⁰ Jesúsna niran: «Chayraj armacushcuna mana janrachu. Chaymi čhaquillanta mayllacurin. Jamcunapis mana janrachu canqui. Chaypis jucniqui janraraj caycanqui.»

¹¹ Judas wañuyman jitarpunanta Jesús musyaran. Chaymi niran: «Jucniqui janraraj caycanqui.»

¹² Puríshijnincunapa čhaquinta mayllapurir punchunta jaticurcur, Jesús jamacuycuran. Jinarcur tapuran: «¿Imanir čhaquiquita mayllapushätapis tantiyanquichu? ¹³ Yačhaj tayta» nimar: «Taytallau Tayta» nimar, allita rimaycanqui. Rasunpa Taytayqui cä. Yačhajmi cä. ¹⁴ Taytayqui caycarsi, mayurniqui carsi, čhaquiquita mayllapuycapti, nuwa-jina jamcunapis mayllapanacunquiman.

¹⁵ «Ricacunayquipaj mayllapushcaj. Ricacamar, nuwa-jina cawanquiman. ¹⁶ Sumaj tantiyacunquiman. Uyway runa patrunninta manash apärinmanchu. Cačhapis cačhacujninta mana apärinmanchu. ¹⁷ Shimüta wiyashcanqui. Wiyashayquita čharcuptiqui, Tayta Diosninchipis sumaj yanapäshunquipaj. Sumaj cushicärinquipaj. ¹⁸ Chaypis llapaniquita ricsipaycaj. Shuyninpa acracushcaj. Jucniquipämi ichanga Tayta Diosninchipa shimin čharcucänanpaj nin: «Jarashäta micujmi ticrapacarcamasha.»* ¹⁹ Canan llapanta willapaycaj. Cananllapita imamanpis čhayapti, Cawachicuj cashäta ama junganquichu. ²⁰ Sumaj tantiyacunquiman. Cačhacunata čhasquicur, quiquítapis čhasquicaman. Čhasquicamarga, Tayta Diosninchitapis čhasquicuyan. Paymi cačhamasha.»

Wañuyman jitarpunanta Jesús musyachicushan

San Mateo 26.20-25; San Marcos 14.17-21; San Lucas 22.21-23

²¹ Chaynuy nir shungun ishquicäuptin, puríshijnincunata Jesús niran: «Sumaj tantiyacunquiman. Mayganquipis ticrapamar, wañuyman jitarpamanquipaj.» ²² Chaura mayganin cashantapis mana musyashpan jucnin-jucnin ricapänacuran. ²³ Juc puríshijnninga yačhänacushan cashpan Jesúswan jaganacushalla jamaraycaran. ²⁴ Chaymi payta Simón Pedro tapuran: «¿Piraj jitarpuj runa, au? Mä, Jesústa tapushun» nir.

²⁵ Yačhänacushan puríshijninna jagaycur, Jesústa tapuran: «Tayta, ¿mayganítaj wañuyman jitarpushayqui?» nir.

²⁶ Jesúsna niran: «Tantata paquircur ushmarcachir mallichishä runa canga.» Chaynuy nir tantata paquircur ushmarcachir, Simónpa wamran Judas Iscariotita mallichiran.

²⁷ Tantata čhasquicuttillan, Supay charicurcuran. Jesúsna niran: «Judas, yarpay-cashayquita juclla ruranquiman.» ²⁸ Jesús rimashanta maygan puríshijninpis mana tantiyaranchu. ²⁹ Waquin yarparan: «Judas tisuríru captinchi, Pascua fiestapaj rantipacuj cačhaycan. Manchäga pishipacujcunata jillayta aypunanpächi cačhaycan» nir. ³⁰ Judasna Jesús macyashan tantata micucurcur, juclla llucshicuran. Pachapis chacashana caycaran.

Llaquipänacuypita tantiyachishan

* **13:18** Salmo 41.9.

³¹⁻³² Judas aywacuptin, waquin purishijnincunata Jesús niran: «Cananga Tayta Diosninchí alliman churamanga. Runacunata washänä-raycur wañuptisi, Tayta Diosninchí cawarachimanga. Chaynuupa Tayta Diosninchí caáchamashantapis, munayniyuj cashantapis runacuna tantiyacunga. Allimanpis churanga. Manasi aycällatana Tayta Diosninchí llapantapis camacächinga. ³³ Wawacuna, mana ricamanquipänachu. Mayur Israel runacunata willashä-jina ashimarsi, mana tarimanquipänachu. Aywashäman mana chayamunquipächu. ³⁴ Chaymi shimita ama junganquichu. Llaquipäshaj-jina, jamicunapis llaquipänacärinqui, ari. ³⁵ Llaquipänacuptiqui, maquiúchu cawashayquita llapan runa tantiyacunga.»

Pedro wasguinanta Jesús musyachicushan

San Mateo 26.31-35; San Marcos 14.27-31; San Lucas 22.31-34

³⁶ Chaura Simón Pedro tapuran: «Tayta, ¿maymantaj aywacunqui?» nir. Jesúsna niran: «Aywashäman mana aywanquipärächu. Juc junajmi ichanga chayamunquipaj.» ³⁷ Pedruna niran: «Tayta, ¿imanirtaj mana aywähijmanchu? Purishinaj-raycur jina wañuymanpis chayäman.» ³⁸ Jesúsna niran: «¿Rasunpachuraj nuwa-janan wañuymanpis chayanquiman? Sumaj tantiyacunquiman. Mana ricsij tucumanquipächu. Gällu mana cantaptillan, quimsa cutiparaj wasguimanquipaj.»

14

Tayta Diosninchiman Jesús chayachicuj cashan

¹ Chaypita purishijnincunata Jesús niran: «Alläpa ama llaquicunquichu-llapa. Manchäga Tayta Diosninchimanpis, nuwamanpis yupachicunquiman. ² Papänipa wasin jatun-caray. Juyänanchipaj aypan. Chaymi camarij aywashaj. Wasin mana aypaptin: «Camarrij aywashaj» mana nijmanchu. ³ Camaricuriycur, pushanajpjaj cutimushaj. Papänipa wasinúchu llapanchi cawashunpaj. ⁴ Maypa aywanätapis mayna musyanqui.» ⁵ Chaynuy niptin, Tomás niran: «Maypa aywanayquitapis mana musyar, ¿imanuypataj shamüman?» ⁶ Jesúsna niran: «Nuwalla Tayta Diosninchipa shungun yarpashanta willapashcaj. Imaycamanpis cawachishayqui. Tayta Diosninchimanpis chayachishayqui. Mana yupachicamarmi ichanga, Tayta Diosninchipa ñaupanmanpis mana chayamunquipächu. ⁷ Shungüwan tincur, Tayta Diosninchipa shungunwanpis tincunqui. Cananpita-pacha quiquin Tayta Diosninchawan yachéhacuycanqui. Mayna ricashcanquipis.»

⁸ Felipina niran: «Tayta Diosninchita ricachimay, ari. Ricsiyta munarcaycä.»

⁹ Jesúsna niran: «Unaylla juyaycaptinchichu, ¿shungüta mana musyapanqui? Shungüta musyapar, Tayta Diosninchipa shunguntapis musyapanqui. Chaymi ama nimankimanchu: «Tayta Diosninchita ricsichimay.» ¹⁰ Tayta Diosninchawan juc shungulla cawashäta chasquicushcanqui, ¿au? Chaypis mana yarpashallätachu rimä; manchäga Tayta Diosninchipa shungun yarpashallanta. Chayraj Tayta Diosninchí camacächishancunatapis tantiyacunquipaj. ¹¹ Chaymi Tayta Diosninchawan juc shungulla cawashäta chasquicunquiman. Shimita mana chasquicursi imaimata rurashäcunata ricar, chasquicamanquiman. Tayta Diosninchí camacächiptin, jishyačhuncunata allchacächishcä. Supaycunata jargushcä. Chay-chicaj runata jarashcä. Wañushcunata cawarachishcä. Chaymi ima-imata rurashäcunata ricaycar, shimitapis chasquicunquiman. ¹² Sumaj tantiyacunquiman. Tayta Diosninchawan iwal juyäshaj. Yupachicamaptiqui, shungun munashanta ruranäpaj camacächishan-jina jamicunapis ruranayquipaj camacächinga. Nuwa-jina jishyačhuncunata allchacächinquipaj. Supaycunata jargunquipaj. Chay-chicaj runata jaranquipaj. Wañushcunata cawarachinquipaj. Runacuna Tayta Diosninchipa maquiúchu cawananpaj maychaychüpis nuwapita willapanquipaj. Tayta Diosninchí camacächiptin, tucuya

ruranquipaj. ¹³ Yupachicamashayqui-janan imatapis mañacamaptiqui, Wawan cashpā camacächishaj. Chayta rurar, Tayta Diosninchitapis alliúhu jurgü. ¹⁴ Shungü munashanta ruraptiqui ima-imata mañacamaptiquipis, wiwashayqui.»

Espíritu Santuta caáchamunapaj aunishan

¹⁵ «Lapan shunguyquian manchapacamar, shimitapis sumaj wiycunquiman. ¹⁶ Espíritu Santu yanagäshunayquipaj Tayta Diosninchita mañacushaj. Payga Espíritu Santuta caáchamunga imaypis yanagäshunayquipaj. ¹⁷ Espíritu Santuga Tayta Diosninchipa shungun yarpashanta tantiyachishunquipaj. Tayta Diosninchipa maquinchú mana cawajcunam ichanga Espíritu Santu pí cashantapis mana musyanchu. Mana ēhasquicumpishchu. Espíritu Santupis paycunata mana yanaganchu. Jamcunam ichanga Espíritu Santuta ēhasquicushcanqui. Maquinchüpis cawanqui. Payga imaycamanpis yanagäshunqui. ¹⁸ Mana wacchata-jina jaguishayquichu. Yanagänajpaj cutimushaj. ¹⁹ Tayta Diosninchipa maquinchú mana cawajcuna imaypis mana ricamangapächu. Jamcunawanmi ichanga ricanacuycašhunpaj. Wañurpis, cawarimushaj. Wañuptiquipis, cawarachishayqui. ²⁰ Papäni cawarachimaptin, paywan juc shungulla cawashäta, jamcunawanpis juc shungulla cawashäta tantiyacunquipaj. ²¹ Ēhasquicamajcuna manchapacamashpan shimita wiycunga. Shimita wiycujcunata Papänipis sumaj llaquipanga. Llaquipashpä nuwapis yanagäshaj.»

²² Chaura allicaj Judas tapuran: «Tayta, ¿imanirtaj nuwacunallata yanagämánquipaj; waquinta mana?» nir.

²³ Jesúnsa niran: «Ēhasquicamajcuna manchapacamar, shimitapis wiycun. Chaymi Papäni-ima maquiúhu purichishaj. Llaquipashpä iwal cawäshishaj. ²⁴ Wasguimajcunam ichanga mana manchapacamar shimitapis mana wiycunchu. Willapäcushäga mana umällapitachu. Manchäga: «Shimita llapanta willanqui» nir quiquin Tayta Diosninchi caáchamasha.

²⁵ «Ricay ñawiquíhu puriycaállar, llapantapis willapashcaj. ²⁶ Aywacupti, Tayta Diosninchí Espíritu Santuta caáchamunga. Paymi yanagäshunquipaj. Shimítapis llapanta yarpachishunquipaj. Pishiushushayquitapis tantiyachishunquipaj. ²⁷ Runacuna alli cawayta ashirpis, quiquinpita mana tarinchu. Nuwam ichanga alli cawayman chayachishayqui. Allilla juyaycallay, ari. Ima captinpis, ama llaquicunquichu. Ama manchacunquichu. ²⁸ Aywacunäta mayna willashcaj. Chaypis jamcuna-raycur cutimushaj. Rasunpa manchapacamarga, shacya-shacyalla shuyämanquiman. Tayta Diosninchiman cuticushaj. Paypa maquinchú cawä. ²⁹ Llapantapis willapaycaj aywacupti, sumaj yupachicamänayquipaj. ³⁰ Alläpa ama rimashunnachu. Supay jananchichüna. Cay pachačhu paymi munayniyuj. Ichanga mana ičhipamangachu. ³¹ Imaman chayarpis, Papänipa shimita charcüman. Chayrächi llapan runa Papänita llaquishäta, shimita wiycushäta musyanga. Cananga aywacushun. Jatariy-llapa.»

15

Übas yürawan Jesús tincuchicushan

¹ Chaypita tincuchiypa willapar Jesús niran: «Übas yüra cä. Papäni sumaj ricaman. ² Callapäcuna mana wayuptin, llaumarin. Wayuptinmi ichanga pichan sumaj wayunapaj. ³ Jamcuna shimita wiycur, pichash wayuj übas-jina cawarcaycanqui. ⁴ Maquiúhu cawaptiqui, mana cačharishayquichu. Juc callapa yüraman mana tanarar, mana wayunmanchu. Chay-jina jamcunapis nuwaman mana tanarämar, Tayta Diosninchipa shungun munashannuy cawayta mana camäpacunquipächu. ⁵ Übas yüra cä. Jamcunana callapä canqui. Nuwaman tanarämar, callapäcunapis sumaj alli. Yata cawarmi ichanga, ima ruraytapis mana camäpacunquipächu. ⁶ Shimita mana wiycuptiqui, mana wayuj callapata-jina Tayta Diosninchi llaumashunquipaj. Mana wayuj callapata llaumarin.

Chaquiptin shuntarcur, ninaáchu ruparachin. ⁷ Maquiúchu cawaptiqui, shimita wiycuptiqui, Tayta Diosninchipis llapan mañacushayquita tarichishunquipaj. ⁸ Shimita wiycur, manchapacur cawar, Papäniña alliáchu jurgunqui. Chaynuypa maquiúchu cawashayqui musyacanga. ⁹ Papäniña alli ricamashan-jina jamcunatapis alli ricashayqui. Maquiúchu cawaptiqui, alli ñawíwan ricashayqui. Yačhänacushunpäpis. ¹⁰ Shimita wiycuptiqui llaquipar, mana cačharishayquichu. Papänipis shiminta wiycupti, llaquimar mana cačharimanchu. ¹¹ Llapantapis willapaycaj nuwa-jina shacya-shacyalla cawanayquipaj. Shunguyquipis achicyacäcungapaj. ¹² Ichanga ama junganquimanchu. Llaquipäshaj-jina jucniqui-jucniquipis llaquipänacärinquiman. ¹³ Tantiyacunquiman. Pipis rasunpa llaquipäcuya yačhar, yačhänacushanta yanapänan-cashan wañuymanpis chayan. ¹⁴ Shimita wiycuptiqui, yačhänacunchi. ¹⁵ Mana uyway runachu carcaycanqui. Manchäga sumaj yačhänacunchi. Uyway runata imata yarpashanchitapis mana willanchichu. Jamcunatam ichanga Papäniña imallata nimashantapis willashcaj.

¹⁶ «Mana quiquillayquipitachu chasquicamashcanqui. Manchäga quiquiimi camacächishcä. Canan übas alli wayushan-jina allita rurar cawanqui, ari. Alli cawashayquita ricacur waquinuncunapis chasquicamar, mana yamacällar alli cawanga. Chaymi yupachicamashayqui-janan ima-imata mañacuptiquisi, Papäniña wiashunquipaj. ¹⁷ Shimita ama jungaychu. Jucniqui-jucniquipis sumaj llaquipänacäriy.»

Jesústapis, puríshijnincunatapis runacuna chiquishan

¹⁸ «Runacuna chiquimashan-jina jamcunatapis chiquishunquipaj. ¹⁹ Juchata aparicushan-jina cawaptiquim ichanga, paycuna alli ñawinpa ricashunquipaj. Jamcunatam ichanga wamrachacushcaj. Chaypita juchaáhu arujcuna chiquishunqui. ²⁰ Nishajta ama junganquichu. Uyway runa patrunninta manash apärinmanchu. Chaymi maquiúchu purishayquipita waquin runa chiquir jaticačhashunquipaj. Nuwatapis jaticačhaycäman. Waquin runam ichanga shimita wiycushan-jina shimiquitapis wiycunga.

²¹ «Puríshimashayquipita chiquijcuna chiquishunquipaj. Paycunaga cačhamajnipa shungunta mana musyanchu. ²² Cay pachaman shamur, Tayta Diosninchipa shungun munashanta willapashcä. Shimita wasguirmi ichanga, runacuna juchata apari-cun. Paycuna mana chapacunmanchu: «Tayta Diosninchipa shiminta mana imaysi wiashcächu» nir.

²³ «Pipis chiquimar, Papäniítapis chiquin. ²⁴ Cay pachaman shamupti, jishyačhucunata allchacächishäta, supaycunata jargushäta, chay-chicajta jarashäta, wañushcunata cawarachishäta ricasha. Ricaycarpis, mana chasquicamashachu. Chaymi juchayuj ricarisha. Jananmanpis chiquiman. Papäniítapis chiquin. ²⁵ Llapantapis camacaycan Moiséspa shimin charcucänanpaj. Paypa shimin nin: «Juchaynaj caycaptisi, chiquimasha.»* ²⁶ Ima captinpis, Tayta Diosninchipa Espíritu Santuta cačhamushaj yanagäshunayquipaj. Payga Tayta Diosninchipa caycar, shungun yarpashantapis musyachishunquipaj. Nuwapitapis tantiyachishunquipaj. ²⁷ Chay-jina jamcunapis waquin runacunata nuwapita willapäcunqui. Unaypita-pacha puríshimashcanqui.»

16

¹ «Wawacuna, runacuna chiquishuptiquisi, mana yamacällar yupachicamanquiman. Llapanta sumaj willapaycaj mana wasguimänayquipaj. ² Chiqui runacuna shuntacäna wasicunatapis jargushunquipaj. Wañuchishushpayquipis ninga: «Tayta Diosninchipa ricay ñawináhu allita ruraycä.» ³ Ichanga Tayta Diosninchipi pü cashantapis, pü cashätapis mana musyashpan llapanta ruranga. ⁴ Rimashäman chayar, yarpänayquipaj llapanta willapaycaj. Ñaupata iwal purishpanchi mana willaparajchu.»

* **15:25** Salmo 35.19.

Espíritu Santupita tantiyachicushan

⁵ «Cananga cačhamajnīman cuticushaj. Chaypis mayganiquipis mana tapumanquirächu: ¿Maymantaj aywanqui?» nir. ⁶ Shimīta wiyar, ¿imanirtaj llaquish mayarpaycanqui? ⁷ Sumaj tantiyacunquiman. Allipaj aywacushaj. Aywacur, Espíritu Santuta cačhamushaj yanagäshunayquipaj. Manchäga mana shamungapächu. ⁸ Paymi llapan ricay tantiyachinga ima jucha cashantapis, pī juchaynaj cashantapis, pī imaman čhayantanapis. ⁹ ¿Imataj jucha? Juchaga nuwaman mana yupachicuy. ¹⁰ ¿Pitaj juchaynaj? Juchaynajga nuwallam cä. Cananga Papänīman aywacushaj. Mana ricamanquipänachu. ¹¹ ¿Pitataj imamanpis čhayachisha? Cay pachačhu mayur supay ñacananpäga mayna Tayta Diosninchi camacächisha.»

¹² «Achcaraj caycan willapänajpaj. Ichanga tantiyacuya mana atipanquirächu. ¹³ Espíritu Santu shamurmi ichanga, Tayta Diosninchi ima-imata yarpashantapis, camacächinantapis tantiyachishunquipaj. Mana quiquinpa yarpayllanpitachu tantiyachishunquipaj; manchäga Tayta Diosninchipita wiyashallanta. ¹⁴ Espíritu Santu allíchu jurgamanga. Shimīta wiyar, musyachishunquipaj. ¹⁵ Tayta Diosninchawan juc shungulla cawä. Chaymi nishcä: «Shimīta wiyar, musyachishunquipaj.» ¹⁶ Manasi aycällata aywacushaj. Mana ricamanquipänachu. Ichanga manasi aycällata cutimupti, yapay ricamanquipaj.» ¹⁷ Chaura puríshijnincuna tapunacuran: «¿Imataj rimaycan: «Manasi aycällata mana ricamanquipächu. Ichanga manasi aycällata yapay ricamanquipaj» nir? ¿Imanirtaj: «Papänīman aywacushaj» niyan? ¹⁸ ¿Imanirtaj: «Manasi aycällata cutimushaj» nimanchi? Imata rimashantapis mana tantiyanchichu» nir.

¹⁹ Yarpačhacurir tapucuya munashanta musyar, Jesús niran: «¿Cananpita manasi aycällata mana ricamanquipächu. Chaypita manasi aycällata yapay tincushunpaj» nishäpitachu tapunacurcaycanqui? ²⁰ Sumaj tantiyacunquiman. Llaquimashpayqui wagaptiquisi, ataptiquisi, mana čhasquicamajcuna jatunpa cushicunga. Yapay tincuptinchim ichanga, atash caycarpis, jatunpa cushicunquipaj. ²¹ Warmipis nanay chariptin, llaquicuywan atan. Jishyacurirmi ichanga, jatunpa cushicun: «Ima allish wawäta tarishcä» nir. Nanashantapis mana yarparannachu. ²² Chay-jina aywacupti, jamcunapa shunguyquipis sumaj nananga. Yapay tincuptinchim ichanga, shunguyquipis jatunpa cushicunga. Pipis mana llaquicuyman čhurashunquipänachu. ²³ Tincuptinchi, imatapis mana tapumanquipänachu. Sumaj tantiyacunquiman. Yupachicamashayqui-janan mañacuptiqui, Tayta Diosninchi imatapis tarichishunquipaj. ²⁴ Yupachicamashayqui-janan mana imatapis mañacushcanquirächu. Mä, mañacuy. Mañacur, čhasquinqui. Chayraj jatunpa cushicunquipaj.

²⁵ «Tincuchiyllapa willapashcaj. Cananmi ichanga Tayta Diosninchipita llaplapanta tantiyachishayqui. ²⁶ Tincushanchi junaj mana jayarämanquipänachu. Yupachicamashayqui-janan quiquipicunana Tayta Diosninchita mañacunquipaj. ²⁷ Payga llaquipäshunqui čhasquicamashayquipita, paypita shamushäta yupachicushayquipita. ²⁸ Paypita shamushcä. Paymi cay pachaman shamenäpaj camacächisha. Cananga janaj pachaman cuticushaj. Tayta Diosninchawan cawashaj.»

²⁹ Chaura puríshijnincuna niran: «Cananmi ichanga mana chapacullar willacuycanqui. Tincuchipayllapa mana rimanguinachu. ³⁰ Runacuna yarpashantapis musyanqui. Llapanta tantiyanqui. Chaymi mana tapupajmanchu. Manchäga Tayta Diosninchipita shamushayquita čhasquicüna.»

³¹ Jesúsnra niran: «¿Rasunpachu čhasquicamanqui?» ³² Manasi aycällata llapaniqui wasiquiman-caman jishpicärinquipaj. Japalläta jaguiycamanquipaj. Tayta Diosninchim ichanga mana imaypis jaguimanchu. ³³ Llapallanta willapashcaj sumaj yupachicamänayquipaj. Maquíčhu juyar ñacayman čhayaptiquisi, yanapäshayqui allilla cawanayquipaj. Mana čhasquicamajcunatapis mandaj supaynintinta mayna ičhipushcä. Chaymi cushish cawanquiman.»

17

Llapan irmänupaj Jesús mañacapushan

¹ Llapanta willapariycur janaj pachaman ricärir, wiyächipaypa Jesús niran: «Papä, cananllapaj cashcä. Wawayquim caycä. Allíchu jurgaycamay, ari. Nuwapis allíchu jurgushayqui. ² Llapan runata maquüiman óchurashcanqui. Chasquicamajcunata imaycamanpis cawachinäpaj camacächishcanqui. ³ Chasquicamaptinchi, imaycamanpis cawanga. Jamlla Tayta Diosninchı canqui. Nuwana Washäcu Jesú caycä. Washäcu canäpaj cay pachaman caáchamashcanqui. Chaymi maquinchióhu purir, pipis imaycamanpis cawanga. ⁴ Papä, cay pachaóhu allíchu jurgur, shimiuita llap-llapanta ócharcushcä.

⁵ Ñaupayquimanna shuntacamay, ari. Allíchu jurgaycallämäy. Cay pacha manaraj captillan, allí ricanacushanchi-jina yapay allí ricanacushun.

⁶ «Cay pachaóhu waquin runacuna purishimänanta camacächishcanqui. Wawayqui captinpis, maquüiman óchurashcanqui purichinäpaj. Pi cashayquitapis paycunata sumaj tantiyachishcä. Shimiuita willapashäta llapanta wiyacusha.

⁷⁻⁸ «Jamllapita cawashäta musyanna. Shimiuita willacupti, óchusquicushana. Cay pachaman caáchacamashayquitapis aunisha. ⁹ Purishimajcunapaj mañacamuj. Paycuna wawayquim. Maquüiman óchurashcanqui. Chaypita mañacamuj. Shimita mana wiyacujcunam ichanga imanupis cawacullächun. ¹⁰ Papä, shiminchita wiyacujcuna nuwanchipa caycan. Purishimajcuna allíchu jurgamaptin, munayniuj cashä musyacanga.

¹¹ «Papällau papä, cay pachata jaguishäna. Cuticamushäna. Chaymi purishimajcunapaj mañacuj. Paycuna cay pachaóhüraj juyanga. Papä, sumaj allí canqui. Juc shungulla cawananchipaj camacächishayqui-jina paycunapis juc shungulla cawananpaj ricaycullay. ¹² Camacächishayqui-jina iwal purishäcaman sumaj ricashcä. Maquüíchu purichishäcaman mayganpis ushyacayman mana óhayashachu. Judas Iscariotilla ushyacayman óhayasha shimiuita ócharcucänanpaj.

¹³ «Papä, janaj pachaman cuticamushpä jatunpa cushicü. Chaypis cay pachaóhu cashpä mañacushayqui. Nuwa-jina cushish cawananpaj purishimajcunata ricaycullay.

¹⁴ Shimiuita mayna willapashcä. Nuwa-jina maquiquíhu cawan. Juchata mana apari-cushä-jina wawayquicunapis juchaóhu mana arunchu. Chaymi shungun munashanta mana ruräshiptin, shimiuita mana wiyacujcuna chiquin.

¹⁵ «Purishimajcunata cay pachapita ama jurgunquichu. Manchäga cay pachaóhu cawashancaman supaypita washaycunqui, ari. ¹⁶ Maquiquíhu cawä. Purishimajcunapis maquiquíhu cawan; mana supaypa maquinchüchu. ¹⁷ Shimiuita shunguyqui yarpashanwan tincun. Shimiuita imata rimashantapis llap-llapanta purishimajcunata willapashcä. Chaymi sumaj tantiyacächii shunguyqui munashannuy cawananpaj. ¹⁸ Cananga cay pachaman caáchamashayqui-jina nuwapis caáchacushaj shimiuita llapan runata willapäcunapaj. ¹⁹ Llapan shungüwan shimiuita wiyacushä-jina paycunapis shimiuita wiyacunman.

²⁰ «Papä, mana purishimajcunallapächu mañacuj. Manchäga paycunapa shiminta wiyar waquin óchusquicamajcunapäpis mañacuj. ²¹ Nuwanchi juc shungulla cawashanchi-jina óchusquicamajcunapis juc shungulla cawanman. Llapani juc shungulla cawananchita munä. Chayrächi waquin runapis caáchamashayquita óchusquicunga.

²² «Allí ricanashayqui-jina óchusquicamajcunatapis allí ñawiwan ricä. Allí ricanacushanchi-jina paycunapis allí ricanacunman juc shungulla cawananpaj.

²³ «Papä, juc shungulla cawashanchi-jina óchusquicamajcunawan juc shungulla cawä. Chaynuypa paycunapis juc shungulla cawanga. Juc shungulla cawaptin, llaquipäcu cashayquita waquin runacunapis tantiyacunga. Llaquipäcu cashpayqui cay pachaman caáchamashcanqui. Llaquipäcmashpayqui allí ricanashayqui-jina óchusquicamajcunatapis llaquipar allí ricanqui. Chayta llapan runa tantiyacunman.

²⁴ «Papä, acrapamashayqui runacunawan juturpayta munä. Achic-achicyaycajta rica-mangapaj. Cay pachapis manaraj caycaptin, llaquipämashpayqui alliman churamarayqui. ²⁵ Papä, jamlla allillata ruranqui. Runacunam ichanga alli shungu cashayquita mana musyaranchu. Nuwam ichanga alli shungu cashayquita musyä. Cačhamashayquita časquicamajcunapis musyan. ²⁶ Pi cashayquitapis tantiyachishcä. Sumajraj tantiyaycähi. Chayrämi alli ricamashayquita tantiyacunga. Nuwapis mana cačharishächu. Quiquin-pura alli ricanacunapäpis yanapäshaj.»

18

Jesústa rísu charishan

San Mateo 26.47-56; San Marcos 14.43-50; San Lucas 22.47-53

¹ Tayta Diosninchita mañacurir, puríshijnincunawan-ima Jesús aywacuran «Cedrón» nishan rajra chimpanman. Juc chacrana chayar, yaycuran. ² Shuntacänan pacha captin, chay chacrata Jesústa wañuyman jitarpuj Judas Iscariotipis ricsiraran. ³ Chaymi Jesústa charinanpaj murucucunata Judas chayachiran. Mayur cüracunawan fariseu-cuna cačhaptin, Roma marcapa mandaj murucuncunapis, Tayta Diosninchipa wasinta täpajcunapis achquincunawan-caman, cuchilluncunawan-caman chayaran. ⁴ Charij chayananta Jesús mayna musyaran. Chaymi tariparcur chayajcunata tapuriran: «¿Pitataj ashircaycanqui?» nir. ⁵ Murucucunana niran: «Nazaret runa Jesústa.» Jesúnsna niran: «Nuwa cä.» Jesústa wañuyman jitarpuj Judaspis caycaran. ⁶ «Nuwa cä» niptin, llapan runa jipapa tunicuran. ⁷ Jesús yapay tapuran: «¿Pitataj ashircaycanqui?» nir. Murucucunana niran: «Nazaret runa Jesústa.» ⁸ Jesúnsna niran: «Mayna willashcaj. Nuwata ashimar, quiquilläta apamanquiman. Puríshimajničunata ama yatapanquimanchu.»

⁹ Jesús rimashan charcucänanpaj nish caran: «Jammi llapan runata maquüiman churashcanqui. Jucpis mana ushyacayman chayashachu.» ¹⁰ Simón Pedruna cuchilluwan juc runapa diricha-caj rinrinta rugupariran. Ruguparishan runapa jutin caran Malco. Payga mayur cürapa uywaynin caran. ¹¹ Jesúnsna niran: «Cuchilluta ama jugariychu. Cashgallaman churaycuy. Papäni camacächiptin, ¿ñacaypita jishpishähuraj?»

Mandaj cürapa ñaupanman Jesústa apashan

San Mateo 26.57-58; San Marcos 14.53-54; San Lucas 22.54

¹² Chaura murucucuna mandajnintin Tayta Diosninchipa wasinta täpaj Israel runacuna-ima Jesústa charircur, watarcäriran. ¹³ Nircur Anáspa wasinman aparan. Anásga mayur cüra Caifáspa suydun caran. ¹⁴ Caifásmi waquin mayur runacunata willapash caran: «Alli canman juc runalla llapanchipa rucanchi wañuptin» nir.

Jesústa Pedro wasguishan

San Mateo 26.69-70; San Marcos 14.66-68; San Lucas 22.55-57

¹⁵ Chaura Jesústa apaycaptin, caru jipallanta aywaran juc puríshij-masinwan Simón Pedro. Chay puríshijga mayur cürawan ricsinacuran. Ricsinacur, Jesúspa jipanta sawan ruricaman yaycuran. ¹⁶ Pedrum ichanga puncu wajtapita mana yaycuranchu. Chaymi ruriman yaycuj puríshijga puncu quičhaj warmita ruwacuran Pedrutapis ruriman yaycuchinanpaj. ¹⁷ Puncu quičhaj warmi Pedruta tapuran: «¿Manachu chay Jesúspa puríshijnin canqui?» nir. Pedruna niran: «Mana.»

Mayur cüra Jesústa tapupashan

San Mateo 26.59-66; San Marcos 14.55-64; San Lucas 22.66-71

¹⁸ Juyupa jasaptin, ninata ratarcachir uywaycunapis, Tayta Diosninchipa wasinta täpajcunapis mashacurcaycaran. Pedrupis mashacuycaran. ¹⁹ Mayur cürana Jesústa tapuycaran imata yačhachishantapis, puríshijnincuna pi cashantapis.

²⁰ Jesúsna niran: «Llapan wiyyay Tayta Diosninchipa shiminta willapäcushcä. Shuntacäna wasicunačhüpis, Tayta Diosninchipa wasinčhüpis tantiyachicushcä. Israelmasinchicuna llapanmi chay wasicunačhu jutucan. Mana pacayllapachu willapäcushcä.

²¹ ¿Imanirtaj tapumanqui? Shimüta wiyyajcunata mä, tapuy. Paycuna imata rimashätapis musyan.»

²² Chaynuy niptin, Tayta Diosninchipa wasinta täpaj runa Jesústa cutariran: «¿Imanirtaj mayur cürapaj shimiquita jugarishcanqui?» nir.

²³ Jesúsna niran: «¿Imatataj llutanta rimashcä? Mä, nimay. Llutanta mana rimaycapti, ama magamanquimanchu.» ²⁴ Chaypita mayur cüra Caifásmanna watashta Jesústa Anás apachiran.

Pedro yapay Jesústa wasguishan

San Mateo 26.71-75; San Marcos 14.69-72; San Lucas 22.58-62

²⁵ Jinallaraj Simón Pedro mashacuycaran. Mashacuycaptin, waquin runa tapuran: «Jesúspa puríshijnin canqui, ¿au?» nir. Pedruna chapacuran: «Mana.» ²⁶ Mayllanta mayur cürapa uywayninpis niran: «Chacračhu Jesústawan ishcaniquita ricashcaj.» Tapuj runapa yawar-masinpa rinrinta Pedro rugush caran. ²⁷ Chaynuy niptin, yapay Pedro Jesústa wasguiran. Niycaptillan, gällu cantariycuran.

Mandaj Pilatupa dispächunman Jesústa apashan

San Mateo 27.1-2, 11-14; San Marcos 15.1-5; San Lucas 23.1-5

²⁸ Manaräpis pacha waraptillan, mandaj cüra Caifáspa wasinpita mandaj Pilatupa dispächunman Jesústa aparan. Mandaj Pilatuta Roma marca mandaj čhuraran Jerusalén marcačhu mayur auturdä cananpaj. Israel runacunam ichanga dispächunman mana yaycuranchu: «Roma runapa wasinman yaycur, juchata aparicushun. Tayta Diosninchipis juyu ñawinwan ricamäshun. Pascua fiesta micuya mana micushunpächu» nir. ²⁹ Chaymi dispächunpita llucshirir, mandaj Pilato tapuran: «¿Imačhütaj juchata aparicush dispächüman apamunayquipaj?» nir. ³⁰ Runacunana niran: «Jatunpa juchata aparicusha captin, apamushcä. Juchaynaj captinga, mana apamümanchu caran.» ³¹ Mandaj Pilatuna niran: «Jucha aparicush caycaptin, quiquiricuna yarpashayquita ruray.»

Chaura Israel runacuna niran: «Israel runacuna pitapis mana wañuchinmanchu.»

³² Llapanpis camacaran Jesúspa shimin čharcuptin, imanaypapis wañuyman čhayananpaj.

³³ Dispächunman cutircur, mandaj Pilato Jesústa tapuran: «¿Rasunpachu Israel runacunapa mandajnin canqui?» nir.

³⁴ Jesúsna niran: «¿Yarpayllayquipitachu rimaycanqui? ¿Jucchu willashcashunqui?»

³⁵ Mandaj Pilatuna niran: «Mana Israel runachu cä. Marca-masiqicunawan cüracunapa mandajnincuna apamushcashunqui. ¿Imataj juchayqui?»

³⁶ Jesúsna niran: «Mana cay pachačhüchu mandaj cayta ashiycä. Mandaj cayta ashipti, mayur Israel runacunapita alli ricamajcuna tucuy-jinanpa washämanman caran. Washämänan-janan maganacuya jallaycärinman caran. Ichanga mana cay pachačhüchu runacunata maquičhu purichi.»

³⁷ Mandaj Pilatuna tapuran: «¿Chaura rasunpachu mandaj canqui?» nir. Jesúsna niran: «Rasunpa cä. Quiquiri rimashcanqui. Tayta Diosninchipa shiminta willacunäpaj cay pachačhu yurishcä. Paypa shungun munashanta rurajcuna shimüta čhasquicun.»

³⁸ Mandaj Pilatuna niran: «¿Piraj Tayta Diosninchipa shungunta musyan?»

Jesústa rusčhu wañuchinanpaj aunishan

San Mateo 27.15-31; San Marcos 15.6-20; San Lucas 23.13-25

Jesústa tapupärir, mayur Israel runacunatana mandaj Pilato niran: «Cay runapa juchanta mana tarichu. ³⁹ Ichanga imaypis Pascua fiestáchu juc runata cačharishäta

musyanqui. ¿Jesústa cačharinäta munanquichu? Paypa maquinčhüshi cawanqui.»
 40 Chaura llapan runa japararan: «Mana. Jesústa ama cačhariychu. Barrabásta cačhary» nir. Barrabásga asaltanti caran.

19

1 Chaura mandaj Pilato Jesústa sumaj wascachiran. 2 Wascariycur murucucuna cashapita curünata pilltarcur, Jesúspa umanman jatiparan. Mandajpa punchunta-jina puca punchutapis ushtuparan. 3 Asipänan cashpan: «Israel runacunapa mandajnin alli ricash caycallächun» nir, lajyar ushyaran.

4 Runacunaman llucshircur, yapay mandaj Pilato niran: «Ima juchatapis Jesús mana aparicushachu. Cačharycushun.» 5 Jinarcur casha curünan jatishta, puca punchushta Jesústa jurgamuran: «Cay runata mä, ricay» nir. 6 Jesústa ricar, mayur cüracunawan Tayta Diosninchipa wasinta täpacuna ullgucurcuran: «Ruschu wañuchicächun. Ruschu wañuchicächun» nir. Japarpaptin, mandaj Pilato niran: «Ricapti, cay runa juchata mana aparicushachu. Wañuchiyya munar, quiquipicuna imatapis ruracullay.» 7 Israel runacunana niran: «⟨Tayta Diosninchipa Wawan cä⟩ nishanpita wañunman. Moiséspa shiminta čharcunan.» 8 «⟨Tayta Diosninchipa Wawan cä⟩ nishanpita llapan runa ullguptin, mandaj Pilatupis mancharicäcuran. 9 Chaymi dispächunman yaycurir, Jesústa tapuran: «¿Maypitataj caycanqui?» nir. Paymi ichanga upällalla cacuran. 10 Chaura mandaj Pilato niran: «Tapuycapti, ¿manachu imatapis rimacunqui? Cačharinäpäpis, ruschu wañuchishunayquipaj auninäpäpis maquičhumi caycanqui.» 11 Jesúna niran: «Llapantapis Tayta Diosninchipi camacächin. Manchäga imata ruramänayquipäpis munayniqui mana canmanchu. Chaypis wañuyman jitarpamaj runa jatunpa juchata aparicusha.» 12 Mandaj Pilato imanayllapapis Jesústa cačharyta munaran. Israel runacunam ichanga chigaypa japarparan: «Mandaj-tucur mandamajninchí Césarta pampaman čhurasha. Chaymi Jesústa cačharir, jampis mandamajninchí Césarta pampaman čhuranquipaj» nir. 13 Chaura dispächunpita mandaj Pilato Jesústa jurgamuran. Pusharan Gábbata läsaman. Mandajpa jamananman jamachiran. Hebreo rimayčhu: «Gábbata läsa» ninanga: «Läja rumicunawan pиргаша» ninanmi.

14 Chay junaj Pascua fiestapa wispiran caran. Lasdusi caran. Mandaj Pilatuna Israel runacunata niran: «Catay mandajniqui.» 15 Runacunana ullgucäcuran: «Wañuchun. Wañuchun. Ruschu wañuchicächun» nir. Mandaj Pilatuna niran: «¿Rasunpachu mandajniquita wañuchinäta munarcaycanqui?» Chaura mayur cüracuna niran: «Mandamajninchiga Césarllam. Juc mana canchu.» 16 Chaura chaynuy niptin, Jesústa inčhigaran ruschu wañuchinanpaj.

Jesústa ruschu wañuchishan

San Mateo 27.32-44; San Marcos 15.21-32; San Lucas 23.26-43

17 Chaura rusnin matancashta «Calabíra» nishan pataman Jesústa aparan. «Calabíra» nianta hebreo rimayčhu: «Gólgota» nin. 18 Pataman čhayaycachir, ruschu wañuchiran. Ish-caj runatapis ruschu wañuchiran: jucninta juc-caj lädunman, jucnintana juc-caj lädunman, Jesústana čhaupičhu. 19 Mandaj Pilato ruspa puntanman litrüruta čhurachiran: «Cay runa Nazaret marca Jesús, Israel runacunapa mandajnin» nir. 20 Marca washlällančhu captin, čhurachishan litrüruta achcaj runa ricäcuran. Hebreo rimayčüpis, latín rimayčüpis, griego rimayčüpis isquirbiraycaran. 21 Israel mayur cüracunam ichanga mandaj Pilatuta niran: «⟨Israel runacunapa mandajnin⟩ nir ama isquirbirächunchu. Manchäga: ⟨Israel runacunapa mandajnin-tucun⟩ nir isquirbirächun.» 22 Mandaj Pilatuna niran: «Isquirbishäta mana rucashächu.»

23 Rusman läbaycur, murucucuna Jesúspa jacunta čhuscuman račhiran. Jucta-caman apacäriran. Müdanantam ichanga pampan mana captin, račhiyya mana camäpacuranchu. 24 Chaymi ninacuran: «Ama račhishunchu. Manchäga surtita jitashun mayganinchisi

apacunanchipaj.» Chaynuypa Tayta Diosninchipa shimin ćharcucächiran. Shiminčhu nin:
«Müdanäta jičhunacusha.

Mayganpis müdanäta apacunanpäis surtita jitasha.»*

Nishannuylla murucucuna rasunpa ruraran.

²⁵ Ruschu läbarashan lädullančhu Jesúspa mamanpis ñaňantin ricaparcaycaran. Cleofásipa warmin Maríapis, Magdalena marcapita Maríapis ricaparcaycaran. ²⁶ Chaymi yačhänacushan purišijtawan mamanta ricärir, Jesús niran: «Mamallau mama, paymi wawayqui.» ²⁷ Purishijsintana niran: «Paymi mamayqui.» Chaypita-pacha chay purišijninga Jesúspa mamanta wasinman pushacuran ricananpaj.

Jesús waňushan

San Mateo 27.45-56; San Marcos 15.33-41; San Lucas 23.44-49

²⁸ Chaypita Jesús yarparan: «Llapantana ćharcushcä» nir. Chaymi Tayta Diosninchipa shiminta ćharcucächinanpaj niran: «Yacunaycä.» ²⁹ Juc puyňučhu shigui bïnu wiňaraycaran. Chaymi jirupa puntanman shaputa watarcur bïnuman ushmarcachir, Jesús shuguchiran. ³⁰ Shugurcur, Jesús niran: «Llapanta ćharcushcä.» Chaynuy nir uysucäcur waňucäcuran.

Jesústa tucsishan

³¹ Waranin junaj diyawarda captin, Israel runacuna ruschu waňushcuna läbaränanta mana munaranchu. Chay junajga Pascua fiestapis jallariycaran. Chaymi mandaj Pilatuta niran: «Juclla waňucunananpaj ruschu läbarajcunapa ćhancanta paquirachinquiman. Ruspita jurgachinquiman.» ³² Auniptin, murucucuna Jesúspa lädunčhu ishcaj läbaraj runapa ćhancancunata paquipariran. ³³ Jesústam ichanga waňushta ricar, mana yata-paranchu. Ćhancantapis mana paquiparanchu. ³⁴ Juc murucum ichanga llicllacchun chaquinpa tucsiriran. Tucsiriptin, yawarwan yaculla llucshimuran. ³⁵ Chaymi ñawiwan ricashäta willacü. Ricashäta rasunpa rimä Tayta Diosninchiman llapanchi sumaj yupachicunanchipaj. ³⁶ Llapanpis camacaran Tayta Diosninchipa shimin ćharcucänanpaj. Shiminčhu nin: «Juc tullullantapis mana paquingachu.»* ³⁷ Jananmanpis nin: «Tucus-hantapis runacuna ricanga.»*

Jesústa pampashan

San Mateo 27.57-61; San Marcos 15.42-47; San Lucas 23.50-56

³⁸ Chaypita Arimatea marca José mandaj Pilatuta maňacuran: «Jesústa pampachicushaj» nir. Josépis Jesúspa purišijin caran. Ichanga mayur Israel-masincunata man-chacushpan mana musyachicuranchu. Maňacuptin, mandaj Pilato auniran. Chaura Jesúspa ayanta pampananpaj José apacuran. ³⁹ Nicodemupis quimsa arüba aya chaquichicuna pirjümita apacurcur, aywáshiran. Nicodemuga ñaupata Jesúswan parlaj chacaypa aywarunaj. Apashan pirjümi caran mürapita, áloipita. ⁴⁰ Israel runacuna pamparashan-jina Joséwan Nicodemo pirjümita murtäjiman pičhuriycur, ayata pituran. ⁴¹ Jesústa ruschu waňuchishan ñaupallančhu murupacuna ćhacra caran. Chayllačhu runa pampacunananpaj mushuj učhcu caran. Pitapis manaraj pamparanrächu. ⁴² Diyawarda junaj jallarinanpaj captin, chay učhullaman Jesústa pamparan.

20

Jesús cawarimushanpita willacushan

San Mateo 28.1-10; San Marcos 16.1-8; San Lucas 24.1-12

¹ Dumingu tuta chaca-chacalla Jesús pamparashanman Magdalena marcapita María aywaran. Pamparashanman ćhayar, chaparaj rumi witiraycajta tariran. ² Chaymi

* **19:24** Salmo 22.18. * **19:36** Éxodo 12.46; Números 9.12. * **19:37** Zacarías 12.10.

juclla cutircur Simón Pedrutawan Jesúspa yaáchänacushan puríshijninta willaran: «Ayata apacusha. Mayman apacushantapis mana musyanchichu.»³ Chaynuy niptin, puríshijmasinwan Pedrupis Jesús pamparashanman aywaran.⁴ Ishcan juclla aywarpis, juc-cajga Pedruta llallishpan ñaupata chayaran.⁵ Uchcuman watgaycuptin, pitushan bayita juturaycajllata ricaran.⁶ Jipanta Simón Pedro chayaran. Ruricaman yaycur, paypis pitushan bayita juturaycajllata ricaran.⁷ Jesúspa uman watashanpis juclächu lluyluraycaran.⁸ Pedro uchcu rurinman yaycushanpitarañ ñaupa chayajpis rurincaman yaycuran. Llapanta ricar, Jesúsman yupachicuran.⁹ Chay wican Jesúspa puríshijnincuna Tayta Diosninchipa shiminta mana tantiyacuranrächu. Shiminchú nin: «Wañushcunapita cawarimunan camacan.» Chaymi pitushan bayita juturaycajllata tarir, Jesús cawaris-hanta tantiyacuran.¹⁰ Chaymi wasiman cuticärián.

*Magdalena marcapita Mariata Jesús ricaripushan
San Marcos 16.9-11*

¹¹ Maríam ichanga pamparashan puncullanché wagaycaran. Wagaräcur, uchcuman watgaycuran.¹² Ricäriptin, ishcay anjil yuraj müdanash caycaran. Juc-caj anjil aya churarashanpa jawananché jamaraycaran; juc-cajna jaytacunché. Ayam ichanga mana carannachu.¹³ Anjilcunaga Mariata tapuran: «Mamallau mama, ¿imanirtaj wagaycanqui?» nir. Tapuptin, niran: «Tayta Jesús mana canchu. Ayanta mayman apacushantapis mana musyächu.»¹⁴ Rimayta ushyarcur tictäriptin, Jesús ičhiraycaran. Maríam ichanga Jesústa ricaycashanta mana tantiyacuranchu.¹⁵ Jesúsna tapuran: «Mamallau mama, ¿imanirtaj wagaycanqui? ¿Pitataj ashiycanqui?» nir. Čacra aruj runa cashanta yarpar, María niran: «Tayta, ayata maymanpis apash carga, willaycamay, ari. Shuntacushaj.»¹⁶ Jesúsna niran: «Maríallau María.» Chaura Jesús caycashanta ricsircurna, niran: «Taytallau tayta.» «Taytallau tayta» ninanta hebreo rimayché: «Rabboní» nin.¹⁷ Jesúsna niran: «Papäniwan tincuj aywanäta ama mičämäychu. Paywan manaraj tincurächu. Cananga puríshimajncunata Papäninchawan tincuj aywaycashäta willamuy.* Papäninchiga Tayta Diosninchí. Paypa maquinché cawanchi.»¹⁸ Chaynuy niptin, Jesúspa puríshijnincunata Magdalena María willaj aywariycuran. Tayta Jesústa ricashantapis, imata nishantapis llapanta willaran.

*Puríshijnincunata Jesús ricaripushan
San Mateo 28.16-20; San Marcos 16.14-18; San Lucas 24.36-49*

¹⁹ Chay junajlla captin, dumingu chacay Jesúspa puríshijnincuna juc wasiman jutucaran. Mayur Israel runacunata manchacur, puncutapis sumaj wičgaran. Jesúsna ñaupallanché ricaripuran: «Allilla juyaycullay, ari» nir.²⁰ Nircur maquintawan llicllacchun čaquinta ricachiran. Puríshijnincunana Tayta Jesústa ricaycur, jatunpa cushicuran.²¹ Jesúsna yapay niran: «Allilla juyaycäriy. Tayta Diosninchí cačhamashanjina jamcunatapis cačhacushayqui shimiña willapäcunayquipaj.»²² Jinarcur llapanman pücarir, niran: «Espíritu Santupa maquinchüna cawarcaycanqui.»²³ Jamcunapitana shimiña wiyangá. Pipis jucha aparicushanpita wanacuptin, shacyächinqui: «Juchayquita Tayta Diosninchipis mayna jungasha» nir. Mana wanacuptinmi ichanga piňapanqui: «Juchayquita Tayta Diosninchipis yarparaycanraj» nir.»

Jesúswan Tomás tincushan

²⁴ Jesús ricaripuptin puríshijnin carsi, millish Tomás mana caranchu.²⁵ Chaymi puríshij-masincuna willaran: «Tayta Jesús ricaripamasha» nir. Tomásna niran: «Rasunpa cawarishanta yupachicunápaj maquinman läbus yaycushanta ricanä. Yatashäraj. Maquiwanraj llicllacchun čaquintapis yatanä.»

* **20:17** Griego rimayché: «wauguicuna» nir tincuchiypa riman puríshijnincunapaj alli ricanacushanpita.

²⁶ Chaypita pusaj junajta wasíchu Jesúspa puríshijnincuna yapay jutucaran. Tomáspis chaychú caycaran. Puncu sumaj wiéhgarash caycaptinsi, Jesús yaycuriran. Llapampa čhaupinchú ricaripuran: «Allilla juyäcäriy» nir. ²⁷ Tomástana niran: «Tomás, maquiña mä, yatay. Mä, ricay. Llicllacchü čaquinpá tucsimashantapis yatay. Ama llutäpacunquinachu. Manchäga cawarimushäta yupachicunquiman.» ²⁸ Chayraj jatunpa cushicur, Tomás niran: «Taytallau, Tayta. Cananga Tayta Diosninchi cashayquita yupachicü. Maquiquichüna caycä.» ²⁹ Jesúsna niran: «¿Cawarimushäta ricarrächu yupachicunqui? Mana ricaycämar yupachicujcunam ichanga cushicärinman.»

Librunta imapaj isquirbishantapis tantiyachishan

³⁰ Chaura puríshijnincunapa ricay ñawinchú Tayta Diosninchi camacächiyninpa Jesús achcaj jishyachucunata allchacächiran. Supaycunatapis jarguran. Cay libruchú mana llapanchu isquirbiraycan. ³¹ Manchäga Tayta Diosninchipa Wawan Jesús cashanta sumaj tantiyacunanchipaj isquirbischä. Washäcuj Jesúsman yupachicuptinchi, maquinchú imaycamanpis cawachimanchi.

21

Jančhis puríshijnincunata Jesús ricaripushan

¹ Chaypita Tiberíades püsu cantunchú Jesús puríshijnincunata ricaripuran. Ricaripushanpita tantiyachishayqui. ² Simón Pedrupis, millish Tomáspis, Natanaelpis juturaycaran. Natanaelga Galilea quinran Caná marcapita caran. Zebedeupa ishcan wamrancunapis, ishcaj puríshijnincunapis caycaran. ³ Puríshij-masincunata Simón Pedro niran: «Canan chacay piscädu charij aywä.» Waquinpis niran: «Nuwacunatapis pushamay.» Chaynuy nir bütiman jigarcur llapan aywacärian. Chay chacayga warayllata piscäduta ashirsi, jucnayllatapis mana chariranchu.

⁴ Pacha wararcuptinna, püsu cantunchú Jesús ičhiraycaran. Puríshijnincunam ichanga mana ricsiranchu. ⁵ Jesúsna jayacuran: «Wawacuna, ¿piscäduta charishcanquichu?» nir. Paycuna niran: «Mana.» ⁶ Jesúsna niran: «Bütiquipa diricha-caj lädunman ridiquita jitay. Charinquipaj.» Niptin, shiminta wiyacuran. Chay-chica piscäduta chariran. Chutaytapis mana jushnachu. ⁷ Jesúswan yačhänacuj puríshijna Simón Pedruta niran: «Payga Tayta Jesús.» ⁸ Wiyar, jala pačha-niraj mana cananpaj camsanta ushtucurcur, Pedro yacullanpa Jesústa tariparan. Waquillan piscädun jančhash püsu cantunman čhayaran. Büti wampuycashanpita püsupa cantuncaman sujta čunca sujtawan (66) ricralla caran. ⁹ Bütipita llucshirir, püsu cantunchú tullpata tariran. Piscädutawan tantata cancaycaran. ¹⁰ Jesúsna niran: «Charimushayqui piscäduta juc-ishcayllata apamuy.» ¹¹ Chaura Simón Pedro bütiman jigarcur, llapan piscäduta püsu cantunman jančhamuran. Jatusajlla pačhac pichga čunca quimsawan (153) caran. Chay-chica carsi, ridita mana račhiranchu. ¹² Jesúsna niran: «Miculläshun.» Puríshijnincuna Jesústa ricarsi, tantiyacuyta mana atiparanchu. Chaypis manchacur mana tapuparanchu. ¹³ Jesúsna tantata aptacurcur, llapanta aypuran. Piscädutapis aypuran. ¹⁴ Wañushanpita cawarircamur, quimsa cutipana Jesús puríshijnincunata ricaripuran.

Simón Pedruta Jesús piňapashan

¹⁵ Micuya ushyarcur, Juanpa wamran Simón Pedruta Jesús tapuran: «Tayta Simón, ¿waquin puríshimajnūcunapita maschu llaquipämanqui?» nir.* Pedruna niran: «Au, Tayta. Llaquipäshajta musyanqui.» Jesúsna niran: «Uysha mallwata michishan-jina wawäcunata sumaj ricay.»

* ^{21:15} Griego rimaychú piňapar, papäninpa jutinta jugarij. Chaymi castillänuchú nin: «Juanpa wamran Simón.»

¹⁶ Yapay Jesús tapuran: «Juanpa wamran Simón, ¿llaquipämanquichu?» nir. Pedruna niran: «Au, Tayta. Llaquipäshajta musyanqui.» Jesúsna niran: «Uyshata ricashan-jina wamräcumata sumaj ricay.»

¹⁷ Quimsa cutipana Jesús tapuran: «Juanpa wamran Simón, ¿rasunpachu llaquipämanqui?» nir. Chaynuy quimsa cuti tapuptin, Pedro llaquicäcuran. Chaymi niran: «Llapanta musyanqui, Tayta. Llaquipäshajtapis musyanqui.» Jesúsna niran: «Uyshata michishan-jina wamräcumata sumaj ricay. ¹⁸ Sumaj tantiyacunquiman. Müsu caycar quiquillayqui müdanayquita ushtucur, quiquillayqui watacurayqui. Munashayquimanpis aywacurayqui. Auquisyar, ricrayquita quiquipi mashtaptiquipis, jucmi watashunquipaj. Mana munaycaptiquipis, jucláman apashunquipaj.»

Yačhänacushan puríshijninpita rimashan

¹⁹ Pedro imanuypa wañuyman čhayantanapis, Tayta Diosninchita alliman čhuranantapis tincuchiyllapa Jesús willaparan. Tayta Diosninchita mana wasguir wañuyman čhayarsi, Tayta Diosninchita alliman čhuraran. Jinarcur Pedruta niran: «Llupilläpa jatinquiman.»

²⁰ Pedruna Jesúspa yačhänacushan puríshijta ricapaycaran. Paymi Pascua micuyčhu Jesústa jagacushalla tapurunaj: «Tayta, ¿pitaj wañuyman jitarpushunquipaj?» nir. ²¹ Pedruna Jesústa tapuran: «Tayta, yačhänacushayqui puríshijniqui, ¿imamantaj čhayanga?» nir. ²² Jesúna niran: «Munaptiga, cutimunäcamanpis cawaycangačhari. Chaypis, ¿imata jucushunqui? Llupilläpa aywanquiman.» ²³ Jesúspa shiminta wiyar, irmänucuna yarparan Jesúspa yačhänacushan runa imaypis mana wañunanta. Jesúsmi ichanga nish caran: «Munaptiga, cutimunäcamanpis cawaycangačhari. Chaypis, ¿imata jucushunqui?»

²⁴ Jesúspa yačhänacushan runa cashpä cay libruta isquirbischä. Ricashätapis, wiyashätapis willacur puriyä. Llapantapis rasun-cajta rimä. ²⁵ Jesúspa willapan achca caycan. Llap-llapanta isquirbiptin, cay pachačhu papilpis pishinmanmi.

Jesúspa cačhancuna imatapis rurashan

Tantiyacunanchipaj:

Bibliačhu ishcay libruta tayta Teófilupaj Lucas isquirbiran: cay Hechos librutawan San Lucas libruta. San Lucas libručhu Washäcuj Jesúspita isquirbiran. Hechos libručhüna Jesúspa cačhancuna imatapis rurashancunapita, paypa shiminta willapäcushanpita isquirbiran. Achcaj runa Jesúspa shiminta čhasquicuran. Paycunapa willapanta cay Hechos libručhu isquirbiraycan.

Lucas isquirbiran:

Jesúsman yupachicucuna juturashanpita, Espíritu Santu charicurcushanpita, paycuna willapäcushanpita, irmänu Estebanta wañuchishanpita: *Hechos 1.1-7.60.*

Cačhancuna Jerusalén marcačhu, Israel marcacunačhu, jäpa runacunapa marcancunačhu willapäcushanpita, Israel runacunapis, jäpa runacunapis Jesúspa shiminta čhasquicärishanpita: *Hechos 8.1-12.25.*

Jäpa runacunapa marcacunačhu waquin irmänucunawan Pablo willapäcushanpita: *Hechos 13.1-28.31.*

Espíritu Santuta cačhamunapaj Tayta Jesús aunishan

¹ Tayta Teófilo, yapay cartacallämuj. Ņaupata cartacamurä Jesús willacushancunata, rurashancunata musyanayquipaj. Llapanta willacamurä. ²⁻³ Jesús wañushanpita cawarcamur janaj pachaman Tayta Diosninch shuntacushancaman čhuscu čhunca (40) junajcamanraj achca cuti cačhancunata ricaripuran. Paycunata quiquin acracusha. Espíritu Santu yanapaptin, imata rurananpäpis willaparan. Rasunpa cawarishantapis tucuy-jinanpa musyachicuran. Tayta Diosninchipa maquinčhu cawananpäpis sumaj willaparan.

⁴ Juc junaj cačhancunallawan juturpaycashančhu Tayta Diosninch aunishanta yarpächir, Jesús niran: «Espíritu Santu mana charishushayquicaman cay Jerusalén marcapita ama aywacärinquirächu. ⁵ Ņaupata Tayta Diosninchipa maquinčhu cawayta munajcunata yacullawan Juan ushyachiran. Ichanga waracunallana Espíritu Santuwan Tayta Diosninch ushyachishunquipaj shungun munashannuy cawanayquipaj. Mayna llapanta tantiyachishcaj.»

⁶ Chaura llapan juturpajcuna tapucuran: «Tayta Jesús, jäpa runacunapa maquinpita, ¿cananchuraj Israel marcantitä jishpichimanqui? ¿Imayraj maquiquičhu purichimanqui marcanchi yapay munayniuj cananpaj?» nir. ⁷ Jesúsna niran: «Musyanayqui mana camacanchu. Tayta Diosnillanchi musyan imay junaj camacächinantapis. Munaynínčhu caycan. ⁸ Sumaj wiyacuy. Espíritu Santu maquinčhu charäshuptiquim ichanga, munayniuj ricacunquipaj. Shungun munashanta ruranayquipaj yanapäshunquipaj. Nuwapita willapäcunquipaj Jerusalén marcačhu, Judea quinrančhu, Samaria quinrančhu, chay-tucuy marcacunačhu.»

Janaj pachaman Jesús cuticushan

⁹ Parlayta ushyarcuptin cačhancuna ricapaycaptillan, Tayta Diosninch Jesústa shuntacuran. Janaj pachačhu pucutay chapacurcuran. Mana ricarannachu. ¹⁰ Jesús janaj pachaman aywacushanta ricaraycaptin, achic-achicyaycaj müdanash ishcaj runa ūaupančhu ricariparcur ¹¹ niran: «Galilea runacuna, janaj pachaman ama ricaraynachu. Aywacujta ricashayquinylla janaj pachapita Jesús cutimungapaj.»

Matíasta acracushan

¹² Chaypita Jesúspa caáchancuna Ulíbus puntapita Jerusalén marcaman cuticuran.* Chay puntapita Jerusalén marcaman pullan lìwalla caran. Chayllata diyawardačhu Israel runacuna purij. ¹³ Jerusalén marcaman ćhayaycärir, pacharashan altusman jigaran. Jigaran: Pedro, Juan, Santiago, Andrés, Felipe, Tomás, Bartolomé, Mateo, Alfeupa wamran Santiago, «Marcampaj nanachicuj» nishan Simón, Santiagupa wamran Judas. ¹⁴ Chay wasíchu jutucaj Tayta Diosninchita mañacunapaj. Jutucaj Jesúspa wauguincunapis, maman Maríapis, waquin warmicunapis.

¹⁵ Chay junajcuna irmänucuna pačhac ishcay ćhuncawan-ima (120) shuntacaran.

Llapan juturpaycaptin, Pedro niran: ¹⁶ «Irmänucuna, Espíritu Santu musyachiptin, mandaj David rimashan ćharcucaycan. Rimashan ćharcucänanpaj Judas Iscariote runacunata pusharan Jesústa charinanpaj. ¹⁷ Judasga caran puríshimaj-masinchi, willacäshimaj-masinchi. ¹⁸ Chaypis Jesústa wañuyman jitarpusha. Jillayta ćhasquishanwanna juc ćhacrata rantisha. Chaychú uray-singaypa tunir, wañucurisha. Pačhan pashtaptin, chinchilluncunapis mashtaypa-mashtacaran. ¹⁹ Chayta musyar, Jerusalén marca runacuna chay ćhacrata jutichaparan: ‹Yawar pata› nir. Rimayninčhu: ‹Yawar pata› ninanta: ‹Hakel-damá› nin.

²⁰ «Judaspaj rimar, Salmos libručhu isquirbiraycaran:

«Wasinpis ragäyächun. Pipis ama tiyachunchu» nir.*

Juc Salmučhüna nin:

«Aruyninmanpis jucta ćhurachun.**

²¹⁻²² Chaymi paypa aruyninman juctana ćhurashuwan. Jesúswan puriyta jallaycushanchipita-pacha puríshimajninchicuna caycan. Juan ushyachicushanpita-pacha janaj pachaman Jesús aywacushancaman puríshimajninchicuna cayčhu juturpaycan. Paycunapita jucta acrashun Tayta Jesús cawarishanta willacäshimänanchipaj.»

²³ Chaynuy niptin, ishcajta acraran. Acraran: «Justo» nishan José Barsabástawan Matíasta. ²⁴ Ishcanta acrarcur, Tayta Diosninchita mañacuran: «Taytallau Tayta, llapanipa shungüta musyanqui. Maygan acracushayquitapis canan musyaycachillämay, ari. ²⁵ Acracushayqui runana willacäshimanga. Puríshimanga. Judasga juchata aparicur, Jesúspa maquinčhu puriyarpis, witicurisha. Chaynuropa shungun apashanman aywacusha» nir.

²⁶ Mañacuriycur, surtita jitasha. Jitaptin, surti llucshimuran Matíaspaj. Chaymi Matíaswan ćhunca ishcaywanna (12) Jesúspa caáchancuna caran.

2

Janaj pachapita Espíritu Santu shamushan

¹ Chaura Pentecostés junaj Jesústa wiယacuj irmänucuna juc pachallačhu juturpaycaran.* ² Illajpita shucucuy wayra japaraycraj-jina janaj pachapita ćhayamuran. Llapan wiýaran. ³ Ratataycaj nina-jina račhicar-račhicar llapan juturajcunaman aypucaran. ⁴ Espíritu Santu charicurcuptin, juclä marcacunapa rimaynintana llapanpis rimaran. Espíritu Santu rimachishanman-tupulla rimaran.

⁵ Chay wíchan Tayta Diosninchita manchapacuj Israel runacuna chay-tucuy marcapita sharcamur, Jerusalén marcačhu juturpaycaran. ⁶ Shucucuy wayra japaraycraj-jina wiýarga, llapan runa shuntacaran. Chayaptin, irmänucuna juclä marcacunapa rimaynincunata rimarcaycaran. Chaura runacuna yarpačhacuran: «Imaniraj rimayninchita riman, ¿au?» nir. ⁷ Mancharishpan quiquin-pura parlanacäriran: «Cay runacuna, ¿manachu Galilea marcallapita? ⁸ Juc marcallapita caycar, ¿imanirtaj marcanchi rimashanta riman? ⁹ Cayčhu juturpaycanchi Partia marcapita, Media marcapita,

* **1:12** Runa shimičhu: «cačha» nin; castillanúchüna: «apóstol» nin. * **1:20** Salmo 69.25. ** **1:20** Salmo 109.8.

* **2:1** Pascua fiestapita pichga ćhunca (50) junajta Pentecostés fiesta caran.

Elam marcapita, Mesopotamia marcapita, Judea marcapita, Capadocia marcapita, Ponto marcapita, Asia marcapita,¹⁰ Frigia marcapita, Panfilia marcapita, Egipto marcapita, Cirene marca washlänin Libia quinranpita, Roma marcapita. Waquin-ninchina yurishanchipita-pacha Israel runa canchi. Waquinninchim ichanga jäpa runa caycar, Israel runaman tictashcanchi.* ¹¹ Waquinninchim Arabia marca quinranpita, Creta marca quinranpita shamushcanchi. Chay-tucuy marcačhu yurish caycarpis, quiquinchipa shiminchičhu wiyacanchi munayniuj Tayta Diosninchi imatapis rurashancunata.»

¹² Chaymi tantiyacuya mana camäpacur, quiquin-pura tapunacärisha: «¿Imaraj, au?» nir. ¹³ Waquin runacunam ichanga ashllir niran: «Chaycuna mačhacäcusha. Ima rimashantapis mana musyanchu» nir.

Jesúspita Pedro willacushan

¹⁴ Chaura Pedro čunca jucwan cačha-masincunawan juturpaycashančhu jatarcur, niran: «Jerusalén runacuna, Israel-masicuna, jäpa runacunapis, sumaj wiyacäriy.

¹⁵ Llutanta yarpaycanqui. Mana mačhashchu carcaycä. Chayraj runacunapis aruj yacyusha. Čajčha intipis mana čhayamunrächu. ¿Imanuypataj mačhash carcaycäman?

¹⁶ Manchäga unay willacuj Joel rimashan čhacuyca. ¹⁷ Tayta Diosninchi rimachiptin, Joel niran:

«Tayta Diosninchi nin: «Cay pacha mana ushyacaptillan, Espíritu Santuwan llapan runata charicurcushaj. Wamrayquicuna warmi ullgupis shimiča willapäcunga. Jipashcunatapis, müsucunatapis ricapacachishaj shungü munashäta rurananpaj. Auquincunatapis suyñuyninčhu musyachishaj shungü munashanta.

¹⁸ Chay wican Espíritu Santuta cačhamushaj wiyacamajcunaman. Chaymi paycuna warmi ullgupis shimiča willapäcungapaj.

¹⁹ Cay pacha mana ushyacaptillanraj, janaj pachačhpis mana imaypis ricashancunata ricachishaj. Cay pachačhpis mana ricashancunata ricanga. Ricangapaj yawarta, ninata, jushtayta.

²⁰ Inti wañucäcunga. Quilla wañucäcur yawarman ticracuringa. Chaypitaraj Tayta Diosninchi munashanta camacächinga. Chay junaj sumaj manchariyapaj canga.

²¹ Pipis: «Taytallau Tayta, washaycallämay» nir mañacuptin, llapanta Tayta Diosninchi jishpichinga.» »,*

²² «Israel marca-masicuna, wiymay. Nazaret marca Jesústa quiquin Tayta Diosninchi acracusha. Pi cashantapis tantiyachimashcanchi. Tayta Diosninchi cačhamushanta tantiyacunanchipaj ricay ñawinchičhu tucuya Jesús rurasha. Tayta Diosninchi camacächiyinpa runacunata micuchisha. Jishyačhucunatapis allchacächisha. Wañushcunatapis cawarachisha. Supaycunatapis jargusha. Wayratapis čhawachisha.

²³ Ichanga Tayta Diosninchi camacächiptin, rusčhu wañuchinanpaj juyu runacunapa maquinman Jesústa čhurashcanqui. ²⁴ Wañuchish caycaptinsi, Tayta Diosninchi cawarachisha. Chacaj pachačhu ushyacänan mana camacaranchu. ²⁵ Chaymi unay mandaj Davidpis Jesúspaj yarpar isquirbiran:

«Imay-imaypis ricay ñawičhu Washämajni diricha-caj lädunčhu caycan. Yanagämaptin, imatapis mana manchacüchu.

²⁶ Manchäga jatunpa cushicü.

Cushicuylawan Tayta Diosninchita alliman čhurä.

Wañucush carpis, jamllaman imaypis yupachicushaj.

²⁷ Wañushllata chacaj pachačhu mana jaguiycamanquipächu.

Acramashayqui mincayniqui caycapti, ayä ismunantapis mana camacächinquipächu.

* ^{2:10} «Jäpa runa Israel runayasha» niptin, tantiyanchi Israel runacuna yarpashanta yačhacushanta, Tayta Diosnin-chitapis manchapacushanta.» * ^{2:21} Joel 2.28-32.

28 Alli cawayta tarichimashcanqui.

Ricay ñawiquiúchu juyar, cushi-cushilla cawashaj.*

29 «Marca-masicuna, sumaj tantiyacunquiman. Mandaj David unayna wañucusha. Pamparaycan. Pamparashantapis canancaman ricsinchi. **30** Payga Tayta Diosninchipa willacujnин caran. Willacujnин captin, quiquin Tayta Diosninchи musyachicuran: «Juc willcayqui Israel marcapa mandajnин cangapaj» nir.* **31** Mandaj David musyachicuran Washäcuja wañushllata chacaj pachaáhu mana jaguinanta, pamparashallanáhu mana ushyacänanta, ayanpis mana ismunanta.

32 «Musyachicushannuya Washäcuji Jesústa Tayta Diosninchи cawarachimusha. Cawarishtana llapani ricashcä. **33** Janaj pachaman shuntacusha. Alliman ćhurar, mandäshinanpaj jamarashanman jamachisha. Quiquin Jesúspis Tayta Diosninchи camacächiptin Espíritu Santupa maquinchü car, camacächisha nuwacunatapis Espíritu Santu charimänanpaj. Aunishan-jina llapanita charicarcamashanta musyanquina. Ñawiquiwan ricarcaycanqui. Rinriquiwan wiycaycanqui.

34 «Sumaj tantiyacuy. Mandaj David mana janaj pachaman aywashachu. Chaypis quiquin isquirbiran:

«Tayta Diosninchи Washäcujnita nisha: «Mandäshimänayquipaj lädüchü jamacuy **35** cunčharyuyquicunata pampaman ćhuranäcaman. Nishayqui-nishayqui munashayquita rurachinquipaj.»*»

36 «Israel-masicuna, sumaj tantiyacuy. Ruschu wañuchishayqui Jesústa cawarcachir, Tayta Diosninchи ćhurasha Washäcujninchи cananpaj. Payga Taytanchi caycar, maquinchü purichimanchi.»

37 Chaura llapan runa juyupa llaquicur, Pedrutawan waquin caćhacunata tapuran: «Marca-masicuna, cananga, ¿imatataj ruráman?» nir. **38** Pedruna llapanta piñapar, niran: «Llapan jucha aparicuypita wanacäri. Washäcuji Jesúspa shiminta ćhasquicur, ushy-acäri. Chaura Tayta Diosninchи juchayquita jungaycur mana yarparanganachu. Pay camacächiptin, Espíritu Santupis maquinchü purichishunquipaj. **39** Espíritu Santu mana nuwacunallatachu maquinchü purichiman. Manchäga Tayta Diosninchи aunisha llapaniquipis Espíritu Santupa maquinchü purinayquipaj. Payga maquinchü purichishunquipaj jamicunatapis, wamrayquicunatapis, Israel runa captiquisi, jäpa runa captiquisi. Pi-maytapis acracushancunata maquinchü purichinga.»

40 Tucuy-jinanpa llapan runata Pedro piñaparan: «Waquin runa juchata aparicullar cawaptinpis, ama juchata aparicuychu. Manchäga ñacaypita jishpicäri.» nir.

Irmänucuna juc shungulla cawashan

41 Pedro willapashanta ćhasquicucuna quimsa waranga-ima (3,000) caycaran. Chay junajlla ushyacuran. Ushyacur niran: «Ima allish Tayta Diosninchи Washäcuji Jesúswan jishpichimanchi» nir.

42 Paycuna Jesúspa caćhancuna willapashanta wiycay. Juc shungulla cawaj. Tantata paquipanacur mallichinacäri. * Tayta Diosninchita mañacäri.

43 Jesúspa caćhancuna Tayta Diosninchи camacächishanta ruraptin, pipis tantiyayta mana atiparanchu. Chaymi llapan runa Tayta Diosninchita manchapacuran.

44 Jesústa wiycay juc shungulla cawaj. Imancunatapis raquipänacuj.

45 Čacracuncunatapis, imancunatapis ranticuycur, pishipacushanman-tupulla tarichij.

46 Waran-waran Tayta Diosninchipa wasinchü jutucay. Wasincunaćhüpis shuntacaycur-shuntacaycur cushi-cushilla micupacäri. Juc shungulla cawaj. **47** Tayta

* **2:28** Salmo 16.8-11. * **2:30** Salmo 132.11. * **2:35** Salmo 110.1. * **2:42** Chay wican tantallawan runacuna cawaj. Chaymi tantapaj rimaptin, Eucristíapaj, Santa Cenapaj waquin yarpan.

Diosninchita alliman ́churaj. Chaymi llapan runa alli ñawinpa ricaran. Chaynuypa waranmaylla Jesúspa shiminta ́chasquicuran. Sumaj achcajyaran.

3

Cumllu runata Silaswan Pablo allchacächishan

¹ Juc junaj mallway intina Pedruwan Juan Tayta Diosninchipa wasinman aywaycaran Tayta Diosninchita mañacuj. Chay üra Israel runacuna Tayta Diosninchita mañacärij. ² Cumllu runapis Tayta Diosninchipa wasinčhu «Cuyayllapaj» nishan puncunčhu mañapacuycaran. Payga yuriyninpita-pacha cumllu caran. Chaymi waran-waran yawar-masincuna apaj mañapacunampaj.

³ Tayta Diosninchipa wasinman Pedruwan Juan ́chayaptin, jillayta mañacuriran. ⁴ Mañacuriptin cumllu runata ricapärir, Pedro niran: «¿Ricäramanquimanchu?» ⁵ Chay runa: «¿Aycataraj jillayta jumanga?» nishpan ricaraycaran. ⁶ Pedruna niran: «Jillayta mana charächu. Ichanga Nazaret marca Washäcuj Jesúzman yupachicü. Paypa maquinčhu cawä. Paymi yanapäshunqui. Jatariy. Puripacuyna.» ⁷ Chaynuypir dirichacaj maquinpita jatarcachiran. Jatarcachiptin, llapan muguncunapis allchacäcuran.

⁸ Íchishpan puriranna. Wancacačhar Tayta Diosninchita alliman ́churar, wasinmanpis yaycuran Pedruwan, Juanwan.

⁹ Tayta Diosninchita alliman ́churar purishanta llapan runacuna ricaran. ¹⁰ Chaypis tantiyacuya mana atipar, quiquin-pura tapunacuycaran: «¿Tagay runa manachu ́Cuyayllapaj, nishan puncučhu mañapacuj? ¿Imanuyparaj puriyecanna?» nir.

Tayta Diosninchipa wasinčhu Pedro willacushan

¹¹ Allchacaj cumllu runa Pedrutawan Juanta mana cačhariranchu. Chaymi runacuna mancharir ricäcunampaj juclla shuntacaran «Salomón» nishan puncuman.

¹² Runacunata ricar, Pedro niran: «Israel-masicuna, ¿imanirtaj mancharish ricaparcaycämanqui? «Alli cayninwančhi, munayniyuj cayninwančhi allchacächisha» nir yarpaptiquisi, mana nuwacunachu allchacächishcä. ¹³⁻¹⁴ Manchäga Jesúzman yupachicuptin, Tayta Diosninchchi allchacächisha. Unaypita-pacha auquillunchicuna Tayta Diosninchita manchapacuj. Auquilluchi Abrahampis, Isaacpis, Jacobpis manchapacuran. Tayta Diosninchchi mandu-rurajnjn Jesústa alliman ́churasha. Chaypis jamcuna mandaj Pilato: «Jesústa cačhariycushaj» niptin, mana munashcanquichu. Manchäga Tayta Diosninchipa shungun munashanta ruraptinsi, allillata ruraptinsi wasguipashcanqui. Wañuchicuj runata cačhariycachir Tayta Diosninchchi cačhamushan Washäcujta wañuchishcanqui. ¹⁵ Quiquin cawachimajninchita wañuchishcanqui. Wañuchish captiquipis, Tayta Diosninchchi cawarachisha. Cawarachishanta ñawiwan ricashcä. ¹⁶ Jesúzman yupachicur, cay cumllu runapis allchacasha. Ricay ñawiquíchu ičhiraycan. Cumllu runawan ricsinacunqui. Jesúzman yupachicur llapan ricapaycaptin, allchacasha.

¹⁷ «Israel-masicuna, upa cayniquiwan Jesústa wañuchishcanqui. Mayur runacunapis upa cayninwan llapanta camacächisha. ¹⁸ Chaynuypa unay willacujnincunawan Tayta Diosninchchi musyachicushan ́charcucasha. Paycuna niran: «Washäcuj wañungaraj.»

¹⁹ «Cananga Tayta Diosninchita wiycäriy. Jucha aparicushayquipita wanacäriy. Wanacuptiqui, Tayta Diosninchchi juchayquita jungaycur, mana yarparanganachu.

²⁰ Maquinčhu cawaptiqui, shunguyquitapis shacyächinga. Unaypita-pacha aunishanjina Washäcuj Jesústapis yapay cačhamunga. ²¹ Cananga janaj pachallačhüraj Washäcuj Jesúzman caycan Tayta Diosninchchi llapanta camacächishancaman. Chaynuypa cananpaj unay acracushan willacujnincunawan musyachicush caran.

²² «Moiséspis auquillunchicunata willapash caran:

›Jamcunapita nuwata-jina juc willacujninta Tayta Diosninchi acracusha. Paypa shimenta wiyacunqui. ²³ Mana wiyacujcunatam ichanga marcanpita illarachinganir.*

²⁴ «Canan wicanpaj Tayta Diosninchipa unay willacujn Samuel cashanpita-pacha llapan willacujcuna musyachicuran. ²⁵ Nuwanchi-raycur unay willacujnincunawan Tayta Diosninchi shiminta musyachicuran. Nuwanchi-raycur auquillunchicunawan parlanacuran. Auquilluchi Abrahamta niran:

›Willcayquicunapita jucta acracushaj. Payga llapan runata sumaj yanapanga alli cawananpaj.»*

²⁶ «Chaymi acracushan Jesústa cawarircachimur, nuwacunamanraj caáchamusha. Juchačhu cawashanchipita wanacunanchipaj sumaj yanapämäshun.»

4

Pedrutawan Juanta charishan

¹ Pedruwan Juan runacunata willapaycaptillan, cüracunawan Tayta Diosninchipa wasinta täpacunapa capitanninpis, saduceucunapis chayapuram. ² Pedruwan Juan yačhaycächiran: «Cananga quiquin Jesús cawarishan-jina nuwanchisi cawarishun» nir. Chaypita mayur runacuna ullgush chayapuram. ³ Ullgur, charicarcäriran. Pacha chanaycaptin, warannin tuta tapunanpaj carsilman wičhgaycuram. ⁴ Waquinmi ichanga Tayta Diosninchipa shiminta wiyar, llapan shungunwan chasquicuran. Ullgullata yupaptin, pichga waranga-yupay (5,000) yapacaran.

⁵⁻⁶ Chaura pacha wararcuptin, Jerusalén marcačhu shuntacaran mayur cüra Anás, mandähij-masin Caifáswan, Jonatánwan, Alejandro. Shuntacaran waquin mayur runacunapis, Moiséspá shiminta yačhajcunapis.* ⁷ Jinarcur Pedrutawan Juanta carsilpita jurgarcachimur, dispächunčhu tapupäcuran: «¿Pipa munaynинwantaj allchacächishcanqui? ¿Pitaj caáchamushcashunqui?» nir.

⁸ Chaura Espíritu Santu rimachiptin, Pedro niran: «Tayta cüracuna, Tayta mayur runacuna, sumaj wiyaycallämäy, ari. ⁹ Canan allita rurar, cay cumllu runata allchacächishápita tapuparcaycämanqui. Imanuy allchacächishätapis musyayta munarcaycanqui, ¿au? ¹⁰ Israel-masicuna, llapaniqui musyanayquipaj willashayqui. Cay cumllu runata Nazaret marca Jesucristu camacächiyinpa allchacächish caran. Jesústa ruschu wañuchishcanqui. Tayta Diosninchim ichanga cawarachisha. ¹¹ Jesúspaj tincuchiypa isquirbiraycan:

›Wasi rurajcuna:

«Cay rumi mana allichu» nir

wicapashantapis Tayta Diosninchi simintuta jallarachinanpaj churasha» nir.*

¹² «Tayta Diosninchi Jesússllata washämänanchipaj churasha. Cay pachačhu juc mana canchu jishpichimänanchipaj.»

¹³ Chaura Pedruwan Juan liguiyta sumaj mana yačharpis mana manchacullar willapäcuption, mayur Israel runacuna äyacash ricacuran. Jesúswan purishantapis tantiyacuriran. ¹⁴ Cumllu runapis allchacashana Pedruwan Juanwan ičhiraptin, mayur runacuna ima ruraytapis mana camäpacuranchu.

¹⁵ Chaura Pedrutawan Juanta dispächunpita wajtaman jargurir, quiquin-puralla parlanacuran: ¹⁶ «¿Cay runacunata imanähuntaj? Jerusalén marca runacuna musyanna Tayta Diosninchi camacächiyinpa cumllu runata allchacächishanta. Chapaytapis mana camäpacunchichu. ¹⁷ Ichanga chay Jesúspita wacčhu-cayčhu mana willacunanpaj sumaj ullgupäshun. Mancharachishun pitapis mana willapänanpaj» nir. ¹⁸ Jinarcur wajtapita

* 3:23 Deuteronomio 18.15-19. * 3:25 Génesis 22.18. * 4:5-6 Waquin Bibliačhu mana «Jonatán» ninchu; manchäga, «Juan» nin. * 4:11 Salmo 118.22.

jayarcachir; Jesúspa caáchancunata änir sumaj ullgüparan. Ullgüparan Jesúspita mana willacunapaj, mana tantiyachicunapaj.

¹⁹ Ullgüpaptin, Pedruwan Juan niran: «Taytacuna, sumaj wiycäriy. Tayta Diosninchipa shiminta jungaycur jamicunapa shimillayquita rurapti, mana allichu canman, ¿au?

²⁰ Jesúswan purishcä. Chaymi ricashäta, wiyahäta pii-maytapis willapänä. Mana upällacushäpächu.»

²¹⁻²² Chaynuy niptin juchanta mana tarir, Pedrutawan Juanta mayur runacuna ullgüparillar caáchariycuran. Ullgüpash carsi llapan runa Tayta Diosninchita alliman churaptin, mana wascaranchu. Cumllu runa allchacäcushanpita runacuna Tayta Diosninchita alliman churaycaran. Allchacaj runa chuscu chunca (40) wata-imatana aywaycaran.

Irmänucuna Tayta Diosninchita mañacushan

²³ Chaura mayur runacuna caáchariycuptin, Pedruwan Juan irmänucuna juturashaman cuticuran. Chayarcur, mayur cüracuna, mayur runacuna ullgüpashanta willaparan.

²⁴ Willapashanta wiyaycur, juc shungulla Tayta Diosninchita mañacuran: «Taytallau Tayta, munayniyuj canqui.

Llapanta camaj canqui.

Cay pachatapis, janaj pachatapis, lamar yacutapis, llapan ima-aycacunatapis camash-canqui.

²⁵ Tayta, Espíritu Santu musyachiptin, mandu-rurajniqui Davidpis niran:

«¿Imanirraj may-chaychüpis runacuna ullgucäcun?»

«¿Imanirraj ticrapunapaj parlanacun?»

²⁶ Llapan jatun mandajcuna parlanacushana.

Auturdäcunapis jutucushana.

Llap-llapanmi Tayta Diosninchitapis, acracushan Washäcujtapis ticrapuyta yarpay-can.*

²⁷ «Cananga mandaj David musyachicushan änir charcucaycan. Acracushayqui Jesústa Washäcuj cananpaj churaptiquisi, mandaj Herodes, mandaj Poncio Pilato, llapan jäpa runacuna, Israel runacuna chiquipacurcusha. ²⁸ Chaynuypa paycuna unaypitapacha camacächishayquita charcucächisha. ²⁹ Tayta, cananga ricay ñawiquiçhu llapan mayur runacuna manchaycächiman. Chiquimaptinsi, mana manchacullar shimiuita willapäcunäpaj yanapaycallämay, ari. ³⁰ Munayniyuj cashayqui musyacänanpaj yanapaycallämay. Yanapaycallämay acracushayqui Jesúspa camacächiyinpa imatapis ruranäpaj, jishyačhuncunatapis allchacächinäpaj, supaycunatapis jargunäpaj.»

³¹ Tayta Diosninchita mañacuya ushyarcuptin, juturashan wasi sicsicyasharaj. Chaura llapaninta Espíritu Santu maquinçhu charaptin, mana manchacullar Tayta Diosninchipa shiminta willacuran.

Irmänucuna yanapäñacushan

³² Chaymi chay-chicaj irmänucuna carpis, juc yarpaylla cawaj. Imallata charashanatapis llapanin raquipänacärij. Juc shungulla cawaj. ³³ Espíritu Santu yanapaptin, Jesúspa caáchancuna sumaj musyachicuycaran Taytanchi Jesús cawarimushanta. Llapan irmänucunatapis llaquipashpan Tayta Diosninchí sumaj yanaparan.

³⁴ Mayganinpis pishipacuyçhu mana cawanapaj chacrancunata, wasincunata ranticuycur, ³⁵ Jesúspa caáchancunapa maquinman churaran. Paycunana pishipacushanmantupulla aypuran. ³⁶⁻³⁷ Chipre marca Josépis chacranta ranticuran. Payga Levípa yawar-masin caran. Chacrana chancunata llapanta Jesúspa caáchancunapa maquinman churaran.

Paycuna Joséta jutichaparan: «Shacyächicuj» nir. «Shacyächicuj» ninanta: «Bernabé» nin.

* ^{4:26} Salmo 2.1-2.

5

Safirawan Ananías llullacushan

¹ Warmin Safirawan Ananíaspis ćhacranta ranticuycur, llutanta ruraran. ² Sumaj parlanacurir, ćhacranpa ćhaninta puchuchicuran. Waquillanta Jesúspa caćhancunapa maquinman ćhuraran. ³ Chaura waquillanta ćhayachishanta musyar, Pedro tapuran: «Ananías, ¿imanirtaj Supay maquichacushunayquita aunishcanqui? ¿Imanirtaj Espíritu Santuta llullapaycanqui? ¿Imanirtaj: 〈Chacräpa ćhaninta llapanta apamushcä〉 nir waquinta puchuchicushcanqui? ⁴ Chacrayqui quiquipa casha. Chacrayquipa ćhaninpis quiquipa casha. Quiquipa caycaptin, ama llullacunquimanchu caran. Mana nuwatachu llullapämashcanqui. Manchäga quiquin Tayta Diosninchita llullapashcanqui» nir.

⁵⁻⁶ Nishanta wiyan, Ananías wañucäcusha. Müsucuna yaycurcur, ayanta pituran. Jinarcur pampaycäriran. Ananías wañucäcushanta mayar, llapan runa juyupa manchapacuran.

⁷ Chaypita ishcay-quimsa ürata Ananíaspa warmin Safirapis ćhayaran. Payga runan wañushanta mana musyaranchu. ⁸ Chayaptin, Pedro tapuriran: «¿Rasunpachu majayqui willamashanylla ćhacrayquita ranticushcanqui?» nir. Chaura Safira niran: «Au, chayllačümi ranticushcä.» ⁹ Pedruna niran: «¿Imanirtaj majayquiwan parlanacushcanqui Espíritu Santuta llullapänayquipaj? Majayquita pampaj müsucuna yaycaycämunna. Jamtana pampaj apacushunquipaj.»

¹⁰ Niycaptillan, Pedrupa ricay ñawinčhu Safira wañucäcuran. Müsucuna ćhayar, wañushta tariran. Wañushta tarir, apacuran majanwan jaganacushllata pampaycärinanpaj. ¹¹ Ananíaswan Safira wañushanta mayar, jutuaj irmänucunapis, mana irmänucunapis sumaj mancharicäcuran.*

Jishyaćhucunata Pedro allchacächishan

¹² Jesúspa caćhancuna Tayta Diosninch camacächiptin, runacunata sumaj yanaparan. Ricashanta tantiyayta mana atiparsi, runacuna sumaj cushicäriran: «Tayta Diosnillanchi chay-niraj jishyaćhucunata allchacächin» nir. Irmänucunapis Tayta Diosninchipa wasinman yaycur, Salomónpa puncunčhu jutuaj. ¹³ Waquin runacuna irmänucunata alli ñawinpa ricarsi, tallupayta manchacuran. ¹⁴ Chaynuy captinsi, warmi ullgupis waran-warai Tayta Diosninchipa shiminta ćhasquicuran. Payman yupachicuran. Ćhasquicucuna achcajmi yapacaran. ¹⁵⁻¹⁶ Jerusalén marcačhu Pedro puriptin, mashtacuntinta, jir-gantinta jishyaćhucunata wajtaman jurguran: «Pedrupa llantuylanwansi allchacangam» nir. Chimpan marcacunapitasi chay-chicaj shuntacaran. Apamuran jishyaćhucunata, supay puillacushan runacunata. Jesúspa caćhancuna llapallanta allchacächiran.

Jesúspa caćhancunata charishan

¹⁷ Chaura mayur cürawan achcaj saduceucunapis juyupa ullgucaycäriran. ¹⁸ Chaymi Jesúspa caćhancunata charicurcur, carsilman wičhgachiran. ¹⁹ Wičgarayacächiptin, Tayta Diosninch caćhamushan anjil chacaypa ćhayar, carsil puncuta quičhariran. Jesúspa caćhancunata jurgurir, niran: ²⁰ «Tayta Diosninchipa wasinman ayway. Llapan runata sumaj willapay Tayta Diosninchipa maquinčhu cawanapaj.»

²¹ Warannin tuta anjil nishannylla Jesúspa caćhancuna Tayta Diosninchipa wasinman yaycurir, llapan runata willapaycaran.

Chaycaman yanapajnincunawan mayur cüra jayachiran llapan mayur Israel runacunata sisyunta rurapäcunapaj. Jinarcur: «Jesúspa caćhancunata apamuy» nir carsilman caćharan. ²² Carsilman ćhayarmi ichanga, Jesúspa caćhancunata mana tariranchu. Chaymi

* ^{5:11} «Irmänucuna» niptin, griego rimayčhu: «ekklesia» nin; castillänučħuna: «iglesia» nin. Ichanga mana wasipächu riman; manchäga Tayta Diosninchipa shiminta wiyan juturajcunapaj.»

cutircur, willaran: ²³ «Taytacuna, carsil puncuta sumaj wičgaraycajta tarishcä. Puncučüpis täparcaycasha. Puncuta quičharirmi ichanga, ruričhu pitapis mana tarishcächu» nir.

²⁴ Chaura Tayta Diosninchipa wasinta täpaj murucucunapa capitanninwan mayur cüracuna: «¿Imaraj canga, au?» nir mancharicäcuran. ²⁵ Upatash caycaptin, juc runa čhayaran: «Carsilman wičhgachishayqui runacuna Tayta Diosninchipa wasinčhu carcayan. Runacunata willapaycan» nir. ²⁶ Chaynuy niptin, Tayta Diosninchipa wasinta täpajcunapa mandajnin murucuncunata pushacurcur, Tayta Diosninchipa wasinman aywaran Jesúspa cačhancuna ashij. Tarirga, mana yatapällar aparan: «Runacuna saj-maramäshun-ima» nir.

²⁷ Llapan mayur Israel runacuna juturpashanman čhayachiptin, mayur cüra niran: ²⁸ «Rinriquičhu willaraj chay Jesúspa shiminta mana willapäcunayquipaj. Rinriquičhu willaycapti, ¿imanirtaj mana wiyacamashcanquichu? Cananga Jerusalén marcačhu llapan runata tantiyachishcanqui. Jinarcupis jitapaycämanqui: «Paycuna Jesústa wañuchisha» nir.»

²⁹ Chaura cačha-masincunawan Pedro niran: «Jamcuna mana munaptiquisi, Tayta Diosninchita wiyacunä. Runapa shiminta mana wiyacümanchu. ³⁰ Jamcuna rusčhu wañuycachiptiquisi, unay auquillunchicuna manchapacushan Tayta Diosninchchi Jesústa cawarachimusha. ³¹ Jinarcur diričha-caj lädunman čhurasha mandäshinanpaj. Jesústa čhurasha maquinčhu cawachimänanchipaj, washämänanchipaj. Chaymi Israel runacuna wanacuptin, jucha aparicushantapis jungaycur mana yarparanganachu. ³² Rimashäta musyä. Espíritu Santupis musyan. Paypa maquinčhumi llapan wiyacujcunata Tayta Diosninchchi purichin.»

³³ Chaynuy niptin, sisyun ruraj mayur Israel runacuna juyupa ullgucaycäriran. Jesúspa cačhancunata wañurachiya munaran. ³⁴ Mandaj-masin Gamalielmi ichanga wañuchinanta mičharan. Payta fariseu runa captin, yačhaj captin, llapan Israel runacuna alli ricaran. Paymi Jesúspa cačhancunata wajtaman jurgurachiran.

³⁵ Jurguriptin, llapan mayur Israel runa-masincunatana niran: «Taytacuna, cay runacunata imatapis ruranayquipaj sumajraj yarpačhacunquiman. ³⁶ Teudaspa willapanta musyanqui, ¿au? Payga: «Mandaj cä» nirshi auturdäcunata ticrapuran. Maquinčüpis čhuscu pačhac (400) runatash purichiran. Chay Teudasta wañuycachiptinshi ichanga, mashtaypa-mashtar jatirajnincuna aywacäriran. Llapallan illaricäcuran. ³⁷ Jipatapis llapan runata yupachishan wichihsni Galilea marcapita Judas auturdäcunata ticrapuran. Payta achcaj runash jatirpararan. Judasta wañuycachiptinshi ichanga, llapan mashtaypa-mashtar aywacäriran. Llapallan illaricäcuran. ³⁸ Taytacuna, sumaj wiyaycallämay. Cay runacunata imatapis ama rurashunchu. Imata ruracuptinpis, ama mičhäshunchu. Umallanpita jurgurcur willapäcuptin, jungacaypa aywangapaj. ³⁹ Tayta Diosninchipa shiminta willacuptinmi ichanga, imanuypa jungacächiyta munarpis, mana camäpacushunpächu. Chaymi sumaj yarpačhacushun. Tayta Diosninchita ima chapatapis rurarushuwan.»

Gamaliel piňacuptin, llapan mayur Israel runa-masincuna wiyacuran. ⁴⁰ Chaypita Jesúspa cačhancunata yapay ruriman jayachiran. Jinarcur sumaj wascarillar, cačhariycuran: «Cananpita shimiuita amucuy. Jesúspita ama willacunquinachu» nir.

⁴¹ Jesúspitan wascaptinsi, pampaman čhuraptinsi, cushicuran. Sisyunpita mayur Israel runacuna ricapaycaptin, cushishallana llucshicuran. ⁴² Mičhaycaptinsi, Jesúspa cačhancuna Tayta Diosninchipa wasinčüpis, wasicunačüpis waran-warau willapäcuran: «Jesúsga Washäcujninchhi. Payta Tayta Diosninchchi cačhamusha jishpichimänanchipaj» nir.

6*Jančhis yanapäcujta acracushan*

¹ Chay wichan Tayta Diosninchipa shiminta čhasquicucuna sumaj achcayaran. Ichanga hebreo rimaj irmänucunawan griego rimaj irmänucuna micuy-janallan ticsha-paränacuran. Hebreo rimaj irmänucunata jamurparan: «Waran-waran griego biyüdacuna ichic-ichicllata micuyta čhasquiycan» nir.

² Chaymi Jesúspa čhunca ishcaywan cačhancuna llapan irmänucunata jayarcachir, niran: «Jamcunapa pačhayquita, janayquita ricallar cawanä mana camacanchu. Tayta Diosninchipa shiminta willacunäpaj mana atipashänachu. ³ Irmänucuna, chaymi jančhis runata acray. Alli ricashcunata, Espíritu Santupa maquinčhu cawajcunata, yarpay-sapacunata acray. ⁴ Nuwacuna Jesúspa shiminta willapäcullar, Tayta Diosninchita mañacullar cawashaj.»

⁵ Chaynuy niptin, llapan auniran. Chaymi jančhista acraran. Acraran Estebanta. Payga llapan shungunwan Tayta Diosninchita wiyyacuj. Espíritu Santupa maquinčhu cawaj. Chaynuypis acraran Felipita, Prócoruta, Nicanorta, Timónta, Pármenasta, Nicolásta. Payga Antioquía runa caycarpis, Israel runaman tictaran. ⁶ Jančhis runacunata acrarcur, Jesúspa cačhancunaman pusharan. Jesúspa cačhancunana maquinta umanman čhuraycur paycunapaj mañacuran: «Taytallau Tayta, cay runacuna aruyninta čharcunapaj yanapaycullay, ari» nir.*

⁷ Chaura Tayta Diosninchipa shiminta willacuptin, Jerusalén marcačhu Tayta Diosninchipa shiminta čhasquicucuna achcayaycaran. Tayta Jesúsmanna yupachicuran. Israel cüracunapis achcajmi payman yupachicuran.

Estebanpa willapan

⁸ Estebanta Tayta Diosninchi llaquipar, alli ricaran. Sumaj yanaparan. Maquinčhu purichir, Tayta Diosninchi ruranantapis musyachicuran. Llapapanpa ricay ūnawinčhu munashantapis camacächiran. ⁹ Chaypis waquin runacuna Estebanta ticrapuran. Ticrapuran Cirene runacuna, Alejandría runacuna, Cilicia runacuna, Asia runacuna. Paycuna Israel runa caran. Jutucaj «Cačharishcuna shuntacäna wasi» nishančhu. ¹⁰ Espíritu Santu yanapaptin, Esteban yarpay-sapa caran. Chaymi tincupajcuna imata rimarpis, Estebanta mana ičhipuranchu. ¹¹ Chaymi jillayta juycur, llullacujcunawan tumpachiran: «Esteban Tayta Diosninchitapis, Moiséstapis pampaman čhuraycan» nir.

¹² Chaynuy niptin, llapan runa ullgucaycäriran. Ullgucaycäriran mayur runacunapis, Moiséspas shiminta yačhajcunapis. Ullgur, mayur Israel runacunapa sisyunnninman Estebanta aparan. ¹³ Tumpajcunatapis pusharan. Tumpacujcuna niran: «Cay runa Tayta Diosninchipa wasintapis, Moiséspas shimintapis pampaman čhuraycan. ¹⁴ Tayta Diosninchipa wasintapis Nazaret marca Jesússhi jučhurachinga. Moiséspas shimintapis jungaycachingash. Llapantapis quiquinpa shiminpita musyanchi.»

¹⁵ Chaura llapan mayur Israel runacuna ricapäriptin, anjilpa jajllan achic-achicyashan-jinaraj Estebanpa jajllan achic-achicyaycaran.

7*Esteban chapacushan*

* ^{6:6} Chay wichan cargunman čhurar runapa umanman maquinta čhuraycur, Tayta Diosninchita mañacuran. Runacuna yarpaj: «Tayta Diosninchipa maquinčhu cawaj runacuna yatamartin, quiquin Tayta Diosninchi yanapämanga» nir.

¹ Chaura mayur cüra Estebanta tapuran: «¿Rasumpachu juchayqui?» nir. ² Estebanna niran: «Israel-masicuna, taytacuna, tantiyacunquiman. Musyashanchinuypis auquil-lunchi Abraham Mesopotamia quinranchu tiyaycaptillan Jarán marcaman manaraj ay-waptillanshi, munayniyuj Tayta Diosninchi ricaripurán. ³ Ricaripaycurshi, niran: «Marcayquita, yawar-masiquicunata jaguiycur, ricachinaj chacraman aywacuy.»* ⁴ Chayshi Caldea quinranpita Jarán marcaman Abraham aywacuran. Chay marcachú tiyaycaptin-shi, papánin wañucuran. Chaypita cay marcemannash Tayta Diosninchi Abrahamta pushamuran. Chay marcachúna cawanchi. ⁵⁻⁶ Cayman chayachimurpis, quiquinpaj chacrata manash ricachiranchu. Mana ricachirpis Abrahampa wamran mana captillan, willcancunata chacrata junanpaj Tayta Diosninchi auniran. Willcancunapis jápa marcachú chuscu pačhac wata (400) jurpay-tucullar juyänanpaj musyachiran: «Willcayquicunata jápa runacuna sumaj ñacachinga. Maquillanchu purichinga» nir. ⁷ Jananmanpis Tayta Diosninchi niran: «Ñacachicuj runacunata marcantinta sumaj ñacachishaj. Chay marcapita shacamurmi ichanga, willcayquicuna taytachacamar alliman churamanga.»* ⁸ Nircur parlanacushan mana jungacänanpaj Abrahamta jirucachiran.* Chayshi Abrahampis ullgu wamran Isaacta churiyäcur, pusaj junajyujllata jiruran. Isaacpis ullgu wamran Jacobta jiruran. Jacobpis ullgu wamrancunata jiruran. Jacobpa chunca ishcaywan (12) ullgu wamrancuna cashanman-tupu Israel runacunapis chunca ishcaywan marca. Auquillunchicuna Jacobpa chunca ishcaywan wamrancunapita miraran.

⁹ «Auquillunchi Jacobpa wamrancunana chiquicuywan Egipto marcaman shullcan Joséta ranticaycäriran. Juclá marcaman ranticuptinsi, Tayta Diosninchi Joséta mana cačhariranchu. ¹⁰ Egipto marcachú sumaj ñacachiptinsi, washaran. Yačhaj-sapa cananpaj yanaparan. Yarpay-sapa captinshi, Egipto marca mandaj Faraón Joséta alli ricaran. Chayshi Egipto marcacunatapis, wasi ruraynincunatapis Josépa maquinman churaran.

¹¹ «Chay wichanshi Egipto marcachúpis, Canaán marcachúpis mučhuy captin, juyupa ñacaran. Auquillunchicunapis pačhanpaj pishiptin, juyupa yargaran. ¹² Chaura Egipto marcachú micuy juturashanta mayar, micuy rantij wamrancunata Jacob cačharan. Chayräshi auquillunchicuna Egipto marcaman aywaran. ¹³ Auquillunchicuna yipay micuy rantij cutiptinshi ichanga, José ricsichicuranna: «Wauguiquim caycä» nir. Chaynuypash mandaj Faraónpis Josépa yawar-masincunata ricsicuran. ¹⁴ Chaypita Egipto marcaman papánin Jacobta, llapan yawar-masincunata José jayachiran. Chayshi jančhis chunca pichgajwan (75) Israel-masinthicuna Egipto marcaman aywaran. ¹⁵ Chaynuypash Jacob Egipto marcachú tiyacuran. Jinallanchu Jacobpis, auquillunchicunapis wañucuran. ¹⁶ Tulluncunatash ichanga Siquem marcaman apaycur-apaycur pamparan. Siquem chacrata Hamorpa wamrancunapitash auquillunchi Abraham jillaywan rantish caran llapan yawar-masincuna pampacunanpaj.

¹⁷ «Abrahampa willcancunata jishpichimunapaj Tayta Diosninchi aunishan wallcana pishiptin, Egipto marcachú yawar-masinthicuna sumaj achcayaran. ¹⁸ Chay wichanshi Egipto marca juc runapa maquinchu caycaran. Payga José pí cashantapis mana musyaranchu. ¹⁹ Chayshi auquillunchicunata llullaparcur-llullaparcur aruchiran. Ñacachiran. Ullgu wamrancunatapis yurircuptillan, wicapachiran. ²⁰ Moiséspis chay wichanshi yuriran. Payta sumaj camarajlla captin, maman-taytan pacayllapa uywacuran quimsa quillacaman. ²¹ Chaypita jaguiycushallanta mandaj Faraónpa jipashnin tarir, wamrachacurcuran. ²² Chaynuypash Moisés Egipto runacunapa yarpashanta yačhacuran. Yarpay-sapayar, imatapis alli ruraran. Alli rimaran.

²³ «Moisés chuscu chunca (40) watata aywaycarnash, Israel-masincunawan tincuyta munaran. ²⁴ Watucuj chayaptin, juc Egipto runa Moiséspa marca-masin Israel

* **7:3** Génesis 12.1. * **7:7** Génesis 17.8; 15.13-14; Éxodo 3.12. * **7:8** Israel runacuna ullgu yurija jiruj: «Tayta Diosninchi llaquipar, wamrachacushunqui» nir. Wamran sinčhiyaptinga, Tayta Diosninchipa shiminta yačhachij sumaj wiyacunapaj.

runata magaycaran. Payta washashanchüshi Egipto runata Moisés wañuy cachiran. ²⁵ Marca-masinta washar, Moisés yarparan: «Israel-masicuna ñacaypita jishpichinäpaj Tayta Diosninchí caáchamashanta tantiyacunga chí» nirshi. Chaynuy yarpaptinsi, Israel-masincuna mana tantiyacuranchu. ²⁶ Chaypita Egipto runata wañuchishan warannin Israel-masincuna quiquin-purana maganacurcaycaran. Paycunata raquirshi, Moisés piñacuran: «¿Imanirtaj maganacurcaycanqui Israel-masilla caycar?» nir. ²⁷ Chaura magacuj runa Moisésta tangariycuran: «Raquimänayquipaj, ¿pitaj canqui? Mana maquiquichüchu juyaycä. ²⁸ ¿Nuwatapis wañuchimaytachu munaycanqui? Egipto runatachi janyan wañuchirayqui» nir. ²⁹ Chaynuy niptinshi, Madián marcaman Moisés jishpicuran. Chay marcačhu jurpay-tucullar juyaycashanchüshi ishcay ullgu wamranta churiyäcuran.

³⁰ «Chuscu čhunca (40) watapitanash chunyaj Sinaí punta quinranchü Moisésta Tayta Diosninchí ricaripuran ratataycar shira-shiračhu.* ³¹ Ricaripuptin, manchapayllapa Moisés aywapuran. Yaycapuycaptinshi, Tayta Diosninchí nimuran: ³² «Unay auquil-luyqui Abrahampa, Isaacpa, Jacobpa Tayta Diosnin caycä. Paycuna manchapacamaranmi.» Chayta wiyarshi, Moisés manchariywan sicsicyaran. Ricäriytapis manchacuran. ³³ Tayta Diosninchina niran: «Ičhirashayqui pacha nuwapam. Llanguiquita llushtiy. ³⁴ Egipto runacuna Israel wawäcunata ñacachishanta ricashcä. Llaquicuywan mañacamashantapis wiashcä. Chaymi jishpichinäpaj yarpamushcä. Canan sumaj wiyacamay. Egipto marcaman cačhashayqui.»*

³⁵ «Yawar-masincuna Moisésta: «Mana maquiquichüchu juyä» nir wasguipash caycaptinsi, shira-shiračhu ricaripaycur Tayta Diosninchí cačharan Israel-masincunata maquinchü purichinanpaj, jishpichinanpaj. ³⁶ Unayllatana Moisés Israel runacunata Egipto marcapita rasunpa jishpichisha. Chuscu čhunca (40) watantin Tayta Diosninchí camacächiyinpa sumaj yanapasha Egipto marcačüpis, Puca yacu püsučüpis, chunyaj pachačüpis. ³⁷ Israel-masincunata Moisés niran: «Jamcunapita nuwata-jina juc willacujninta Tayta Diosninchí jatarachinga.»* ³⁸ Chunyaj pachačüshi Israel-masinchicunawan Moisés juturpaycaran. Sinaí puntačhu Tayta Diosninchí llapan yarpashanta Moisésta willaparan.* Moisésna auquillunchicunata willaparan. Paypa shiminta pipis wiyacur, alli cawayta tarinan caran.

³⁹ «Auquillunchicunash ichanga wiaytapis mana munaranchu. Wasguiparirshi, Egipto marcaman cuticuya munaran. ⁴⁰ Chayshi Aaróntha niran: «Egipto marcapita jurgamajninchí Moisés, ¿mayparaj aywacusha? Illaricusha. Juctana manchapacushun pusharämänanchipaj. Yaya jircaman ricchacujta rurapämay.»* ⁴¹ Chaynuy niptin, manta türituman ricchacujta rurapuran. Rurashan manta türitutapis manchapacur, uywacunata jararan. Rurashan ushyapayninta tünapäcuran. ⁴² Chayshi Israel runacunapita Tayta Diosninchí witicuriran. Camacächiran intillaman, quillallaman, istríllacunallaman manchapacunanpaj. Jipata willacujnincunawan piñacachir, musyachicuran: «Israel runacuna, chuscu čhunca (40) wata chunyaj pachačhu puriycarpis, uywacunatapis, cuyachicuñiquitapis mana jaramashcanquichu. ⁴³ Manchäga yaya jirca Molocata manchapacur, capíllantinta yaya Molocman ricchacujta matancashcanqui. Yaya jirca Refántapis manchapacur, istríllaman ricchacujta jipirpashcanqui. Manchapacunayquicashan yaya jircaman ricchacujcunata rurashcanqui. Chaypitam Babilonia marca wajta quinranman jargushayqui» nir.*

* ^{7:30} Israel runacuna Tayta Diosninchita sumaj manchapacuj. Jutintapis mana rimajchu. Chaymi Tayta Diosninchí ricaripuptin: «Anjil ricaripamasha» nij. Ricay Éxodo 3.1-21. Chayché nin: «Tayta Diosninchipa anjilnin» quiquin Tayta Diosninchipaj rimar. * ^{7:34} Éxodo 3.1-6. * ^{7:37} Deuteronomio 18.15. * ^{7:38} Castillanučhu: «angel» niptinpis, quiquin Tayta Diosninchí ricaripushanta tantiyanchi. Chaynuy cashanta tantiyanchi Hechos 7.30-čhüpis. * ^{7:40} Éxodo 32.1, 23. * ^{7:43} Amós 5.25-27.

⁴⁴ «Chunyaj pachačhüpis unay auquillunchicuna purichina jiru ćhaqui capillata purichiran Tayta Diosninchiwan ricanacunapaj. Capillata Moisés ruraran Tayta Diosninchi tantiyachishannuylla.* ⁴⁵ Josuépis auquillunchicunapa capillanta matancash ćhayachiran Tayta Diosninchi acrashan ćhacraman. Acrashan ćhacraman yaycuptinshi, llapan jäpa runacunatapis Tayta Diosninchi jarguran. Marca-masinchicunapis mandaj Davidpa maquinčhu cawashan wichancamanshi purichina jiru ćhaqui capillata chararäcuran. ⁴⁶ Mandaj Davidwan Tayta Diosninchi sumaj yačhänacuran. Chayshi David tapuran: <Taytallau Tayta, ɿJacobpa willcancuna jarashunayquipaj wasiquita rurämanchu?> nir. ⁴⁷ Munaptinsi, mandaj Davidpa wamran Salomónräshi Tayta Diosninchipa wasinta rurachiran. ⁴⁸ Llapanta Camaj Tayta Diosninchim ichanga mana runa rurashan wasicunačhüchu tiyan. Chayshi juc willacujta musyachir, Tayta Diosninchi unayna niran:

⁴⁹ Janaj pacha jamanä.

Cay pacha ćhaquita ćhurarächinalläpaj.

Chaynuy caycaptin, ¿wasita rurapämánquimanchuraj?

¿Tiyanäpaj camacächinquimanchuraj?

⁵⁰ Mana. Quiqui llapantapis camashcä.*

⁵¹ «Tayta cüracuna, jamcuna auquilluyqui-jina rumi shungu canqui. Upa canqui. Tayta Diosninchipa wawan caycarpis, mana wiycunquichu. Juchallačhu arunqui. Wiycunayquipaj Espíritu Santu shacyächishuptiquipis, wasguipanqui. ⁵² Auquilluyquicunapis: <Tayta Diosninchipa shungun munashallanta ruraj runa shamunga> nir willacuptin, llapan willacujcunata wañuchiran. Tayta Diosninchi acracushan runa, änir ricarimuptin, ticrapur wañuycachishcanqui. ⁵³ Unaypis cačha-anjilnincuna Tayta Diosninchipa shiminta willapäcuran. Chay willapata musyarpis, wasguipashcanqui.»

Estebanta wañuchishan

⁵⁴ Chaura Estebanpa shiminta wiyar, mayur Israel runacuna chigaypa ullgur, sijćhicurcuranraj. ⁵⁵ Estebannam ichanga Espíritu Santu maquinčhu charaptin, janaj pachaman ricärishančhu Tayta Diosninchi achic-achicyaycämujta, Jesúspis diričhan lädunčhu ičhiraycämujta ricaran. ⁵⁶ Ricar, wiycächipapya niran: «Mä ricay. Janaj pachapa puncun quićharaycämun. Caćhamushan Jesústapis, Tayta Diosninchita-imá ricaycä.»

⁵⁷ Niptin, wiyatma mana munar, rinrintapis chapacarcäriran. Japarir, Estebanta llapan aćhcucarcäriran. ⁵⁸ Marca wajtanman jurgurir, sajmar ushyaran. Tumpar ñauquijcunapis Estebanta sajmanapaj punchunta paytacuran müsu Sauluman.

⁵⁹ Sajmaycaptin, Esteban mañacuran: «Tayta Jesús, shuntacallämay, ari» nir.

⁶⁰ Jungurpacuycur japariypa niran: «Tayta, cay runacunapa juchanta ama yarparaychu.» Nircur, wañucäcuran.

8

¹ Estebanta wañuycachiptin, Saulupis aunir cushicuran. Chay junaj Jerusalén marcačhu jutucaj irmänucunata runacuna chiquicarcäriran. Tucuy-jinanpa jaticačhar ushyaran. Irmänucunana mashtaypa-mashtar jishpicäriran Judea quinranpa, Samaria quinranpa. Jesúspa caćhancunam ichanga Jerusalén marcallačhu juyaran. ² Waquin Tayta Diosninchita manchapacuj runacunana Estebanpa ayanta pampaycäriran. Llaquicuywan sumaj wagaran. ³ Saulumi ichanga jutucaj irmänucunata wasin-wasin jaticačharan. Charir, warmitapis, ullgutapis janćhacurcur carsilman aparan.

Samaria quinrančhu Felipe willacushan

* ^{7:44} Israel runacunata yanagar, purichina jiru ćhaqui capillačhu Tayta Diosninchi purij. * ^{7:50} Isaías 66.1-2.

⁴ Jerusalén marcapita jishpij irmänucuna may-chaymanpis aywacuran Jesúspa shimita willacuraycar. ⁵ Felipipis Samaria marcaman ́hayar, Washäcupita willapäcuran. ⁶ Achcaj runa wiycäriran. Tayta Diosninchchi camacächishanta Felipe ruraptinpis, cushish juturpaycaran. ⁷ Tucuy-niraj jishyáchucunata, cumllucashcunata, wijrucunata, supay pucllacushancunata Felipe allchacächiran. Jarguptin, supaycuna japarpaycar jishpicuran. ⁸ Chaynuypa Samaria marcáchu llapan runa sumaj cushicäriran.

Rüju Simón chapata rurashan

⁹ Chay marcáchu Simónpis caycaran. Payga chapata rurar unaypita-pachana llapan Samaria runata riguichiran: «Musyapacuj cā» nir. ¹⁰ «Musyapacuj cā» niptin, runacuna llapan-yupay shiminta wiycuran. Warmi ullgupis niran: «Cay runa rasunpa Tayta Diosninchipa maquinéhu cawan. Munayninwan imatapis ruraycan.» ¹¹ Unaypita-pacha Simónpa shiminta runacuna wiycuran musyapacuj cayninwan riguichiaptin.

¹² Felipim ichanga tantiyachicuran: «Tayta Diosninchchi shuyaraycämanchi. Maquinéhu cawashun. Washäcupi Jesúspis jishpichimänanchi-raycur wañuyman ́hayasha» nir. Chaura shiminta ́chasquicur, warmi ullgupis ushyacuran. ¹³ Quiquin musyapacuj Simónpis Jesúspa shiminta ́chasquicur, ushyacuran. Felipe jishyáchucunata allchacächir, supaycunata jargur, tucuy-jinanpa Tayta Diosninchchi munayniyuj cashanta musyachicuycaran. Chaymi Simónpis cushish ricaparan. Mana cachariranchu.

¹⁴ Samaria runacunapis Tayta Diosninchipa shiminta ́chasquicushanta mayar, Jesúspa cachancuna Jerusalén marcapita Pedrutawan Juanta cacharan. ¹⁵ Paycuna Samaria marcaman ́hayar, llapan irmänucunapaj mañacapuram Espíritu Santupa maquinéhu cawanapaj. ¹⁶ Samaria marcáchu irmänucunata Tayta Diosninchipa maquinéhu purinanpaj Espíritu Santu manaraj chariranrächu. Manchága Jesúspa maquinéhu cawayta munar, ushyacushalla caran. ¹⁷ Chaymi irmänucunapa umanman maquinta ́churaycur: «Tayta, cay runacunata yanapaycullay» nir Pedruwan Juan mañacuptin, Espíritu Santu charicururan.

¹⁸ Jesúspa cachancuna runacunapa umanta yataycur mañacuptin, Espíritu Santu charicurcushanta musyapacuj Simónpis ricaran. Chaymi jillayta munachiran: ¹⁹ «Munayniquita nuwatapis ranticaycallämay. Nuwapis runapa umanta yataycupti, Espíritu Santu charicurcunanta munä» nir.

²⁰ Pedruna niran: «Jillaynintiqui ñacayman ayway. Tayta Diosninchchi jaramashanchita mana ranticunchichu. ²¹ Tayta Diosninchchi shunguyquita musyaraycan. Juchallapaj yarparaycanqui. Chaymi Espíritu Santupa maquinéhu cawanayqui mana camacanchu. Ama puríshimaynapishchu. ²² Cananga jucha aparicushayquipita wanacuy. Wanacur mañacuptiqui, Tayta Diosninchchi juchayquita jungaycur manačhi yarparanganachu. ²³ Chiqui runa cashayquita musyä. Jucha cačharyta mana junquichu.» ²⁴ Chaura musyapacuj Simón niran: «Nuwapaj Tayta Diosninchita mañacuy, ari. Nimashayquicuna ama ́hayacamächunchu.»

²⁵ Chaypita Pedruwan Juan willapäcuran Jesústa ricashantapis, shimintapis. Jinarcur Samaria uranpa Jesúspa shiminta willapäcuräcur Jerusalén marcaman cuticäriran.

Etiopía marcapita runa Jesúspa shiminta ́chasquicushan

²⁶ Chaypita Tayta Diosninchipa anjilnin ricariparcur, niran: «Felipe, cananga Jerusalén marcapita Gaza chunyaj pacha quinranpa yarpuj caminupa ayway.»

²⁷ Chaymi Felipe aywaran. Caminučhu Etiopía marca runata tariparan. Payga mandaj warmi Candacespa jillay charajnin caran. Jerusalén marcaman Tayta Diosninchita manchapacuj aywarunaj. ²⁸ Cärunwan cutir, Tayta Diosninchipa willacujnin Isaías isquirbishanta liguiycaran.

²⁹ Chaymi Espíritu Santu Felipita shacyächiran: «Tagay cäruyuja taripay. Tariparcur, cäruyuja yanagay» nir. ³⁰ Chaura juclla aywaran. Cäruyuja taripar, unay willacuj

Isaías isquirbishanta liguijta wiyar, tapuran: «¿Liguishayquita tantiyanquichu?» nir. ³¹ Payna niran: «Pipis mana tantiyachimaptin, ¿imanuyparaj tantiyashaj? Jigamuy. Tantiyayacchillämay, ari.» ³² Liguiycashan libručhu isquirbiraycaran: «Pishtapaj uyshata apashan-yupay payta apasha. Millwanta rutuptin mana japarashan-yupay, mana rimacushachu. ³³ Pampaman čhuraptinsi, pipis mana nanachicushachu. Wamran mana captin, ¿piraj imallatapis rimarcunman? Cay pachapita illaricunapaj wañuy cachisha.»*

³⁴ Liguiyta ushyarcur, Etiopía runa Felipita tapuran: «Tayta, tapucushayqui. Willacuj Isaías, ¿pipätaj isquirbiran? ¿Quiquinpächu, jucpächu?» nir. ³⁵ Chaymi quiquin liguishal-lanwan: «Alli willapata willapäshayqui» nir Jesús pí cashantapis tantiyachiran.

³⁶ Aywarcaycashančhu yacuta tarir, Felipita niran: «Cayčhu yacu caycan. ¿Manachu ushyayacchillämanquiman?» ³⁷ (Felipina niran: «Lapan shunguyquiwan čhasquicuptiqui, ushyachishayqui.») Etiopía runana niran: «Au. Jesúsga Tayta Diosninchipa Wawan. Lapan shungüwan čhasquicü.»)*

³⁸ Chaura cärunta ičhiycachir, ishcanin yacuman yarpuran. Felipe ushyachiran.

³⁹ Yacupita llucshircuptin, Espíritu Santu Felipita apacuran. Etiopía runa Felipita mana ricarannachu. Ichanga cushish aywacuran.

⁴⁰ Chaypita Felipe Azoto marcačhüna ricacuran. Marcan-marcan Jesúspa shiminta willapäcuräcur, Cesarea marcacaman čhayaran.

9

Saulo Jesústa Čhasquicushan

¹ Chay wíchan Tayta Jesústa wiယacuj irmänucunata wañuchiya munar, Jerusalén mayur cürawan Saulo parlanacuran. ² Payga warmi ullgutapis charircur-charircur Jerusalén marcaman apamuya munaran. Chaymi mayur cüra urdinta juran Damasco marcačhu shuntacäna wasipita irmänucunata charinanpaj.

³ Damasco marcaman yaycuycaptillan, janaj pachapita mana yarpashpita Sauluman achqui chillap-chillapyaramuran. ⁴ Chaura Saulo: tunicuran. Janaj pachapitana nimuran: «Saulullau Saulo, ¿imanirtaj chiquir jaticačhaycämanqui?» ⁵ Chayta wiyar, Saulo tapuran: «Tayta, ¿pitaj canqui?» nir. Chaura nimuran: «Tayta Jesúsmi caycä. Chiquir jaticačhaycämanqui. ⁶ Cananga Damasco marcaman ayway. Chayčhüna imata ruranayquipäpis willashunquipaj.»

⁷ Sauluta aywähijcuna rimamuja wiyan. Ichanga pitapis mana ricar, juyupa manchariran. ⁸ Sauluna japrayash jatarcuran. Ñawin imatapis mana ricarannachu. Chaymi aywähijcuna charishalla Damasco marcaman čhayachiran. ⁹ Chayčhu quimsa junaj japrayashalla cacuran. Micuytapis, yacutapis mana malliranchu.

¹⁰ Damasco marcačhu Tayta Jesústa manchapacuj Ananías tiyan. Payta ricariparcur, Tayta Jesús niran: «Ananías.» Ananíasna niran: «¿Imallaraj, Tayta?» ¹¹ Tayta Jesúsnra niran: «Ananías, «Diričhu» nishan cälliman ayway. Judaspa wasinman čhayar, Tarso marca Saulupaj tapucunqui. Payga Tayta Diosninchita mañacuycan. ¹² Ricapacuyninčhu ricashurayqui. Ñawin allchacänanpaj yatashayquitapis ricashurayqui.»

¹³ Ananíasna niran: «Taytallau Tayta, payga juyush. Juyu cashanta llapan runa musyan. Jerusalén marcačhu irmänucunata llapanta-yupayshi juyupa ñacachisha. ¹⁴ Cananga mayur cürapita urdinta jurgurcur shamusha pipis taytachacushuptiqui, carsilman apananpaj.» ¹⁵ Chaura Tayta Jesús niran: «Ama manchacuychu. Chay runata willacujni cananpaj acracushcä. Auturdänintinta jäpa runacunatapis, Israel runacunatapis shimita willapanga. ¹⁶ Nuwa-janan juyupa ñacanga. Quiqui llapanta tantiyachishaj.»

* ^{8:33} Isaías 53.7-8. * ^{8:37} Birsiculu 37 waquin Bibliačhu caycan; waquinčhu mana.

¹⁷ Chaura Saulo pachacushan wasiman Ananías aywaran. Yaycurir, Sauluta yataycur niran: «Irmänu Saulo, shaycämuptiqui, ricaripushushayqui Tayta Jesús cačhamasha ñawiquita quičhanäpaj. Espíritu Santupis charicurcushunquipaj.» ¹⁸ Chaynuy niptin, Saulupa ñawinpita carca shicwacuriran. Ricaranna. Jatarcur, ushyacuran. ¹⁹ Chaypita micupacuranna. Janancunapis ancashyacäcuran. Tayta Jesústa wiycuj irmänucunawanpis Damasco marcačhu ishcay-quimsa junaj juyapäriran.

Damasco marcačhu Saulo willacushan

²⁰ Damasco marcačhu juyar, shuntacána wasicunačhu Saulo willapäcuran: «Jesús Tayta Diosninchipa Wawanmi» nir. ²¹ Saulupa shiminta wiyar, runacuna tantiyayta mana atiparanchu: «Cay runa, ¿imanacäcushtaj? Jesústa časquicucunata Jerusalén marcačhu chiquicur jaticačharan. Caymanpis shamusha irmänucunata charircur-charircur mayur cüraman apananpaj» nir.

²² Saulum ichanga mana manchacullarna tantiyachicuran: «Tayta Jesús rasunpa Washämajninchí» nir. Damasco marcačhu tiyaj Israel runacunam ichanga tantiyacuya mana camäpacuranchu.

²³ Chaypita unayllata Sauluta wañuy cachinanpaj waquin Israel runacuna parlanacuran. ²⁴ Parlanacuriycur, pagas-junaj Sauluta marca wajtancunačhu shuyarpararan. Parlanacushanmi ichanga quiquin Saulupa rinrinmanpis Čhayaran. ²⁵ Chaymi purishijnincuna canistaman wiñarcur, warcuyllapa sawan wajtanpa chacaypa jishpichiran.

Jerusalén marcačhu Saulo willacushan

²⁶ Jerusalén marcaman čayar, irmänucunawan tincuya Saulo munaran. Munaptinsi, Jesúspa shiminta rasunpa časquicushanta mana tantiyar, tincuya manchacuran.

²⁷ Bernabími ichanga Jesúspa cačhancunaman Sauluta pusharan. Čhayarcachir, niran: «Damasco marcaman aywaycaptin, Tayta Jesús Sauluta ricaripusha. Parlapasha. Damasco marcačhusi mana manchacullar Tayta Jesúspita willapäcusha.» ²⁸ Chaynuya Saulo Jerusalén marcačhu irmänucunawan juyapäriran. Mana manchacullar llapanpa ricay ñawinčhu puriran. Tayta Jesúspitapis willapäcuran.

²⁹ Griego rimaj Israel runacunam ichanga tincuparan. Sauluta wañurachiya munaran. ³⁰ Chayta mayar, Cesarea marcemannia irmänucuna Sauluta jishpichicäriran. Jinarcur Tarso marcaman cačhacuran.

³¹ Chay wican jutucaj irmänucuna allilla juyaran. Judea quinrančhu, Samaria quinrančhu, Galilea quinrančhu Tayta Diosninchita manchapacur cawapäcuran. Espíritu Santo shacyächiptin, Tayta Jesúspa shimin shungunmanpis Čhayaran. Waran-waran yapacaycaran.

Irmänucunata Pedro watucushan

³² Chay wican Pedro irmänucunata watucur chay-tucuypa puriyacaran. Chaymi Lida marcamanpis Čhayaran. ³³ Chayčhu Eneasta tariran. Payga pusaj watana cumllucash wigurayacaran. ³⁴ Chaymi Pedro niran: «Eneas, Jesucristu allchacächishunqui. Jatariy. Mashtacuyquita shuntay.» Chaura juclla jataricurcusha. ³⁵ Puriyajta ricar, Lida marcačhüpis, Sarón marcačhüpis Tayta Jesúspa shiminta runacuna časquicuran.

Dorcasta cawarachishan

³⁶ Chay wican Jope marcačhu Tayta Jesústa wiycuj warmi tiyaran. Jutin caran Tabita. Griego rimayčhu: «Dorcus» nir ricsiran. Payga Tayta Diosninchita manchapacuj car, cuyay-munaypaj cawaj. Pishipacujcunatapis yanapaj. ³⁷ Juc junajmi ichanga jishya chariptin, wañucuran. Wañucuptin armaraycachir, chutaycuran. ³⁸ Chaura washlänin Lida marcallačhu Pedro caycaptin, waquin irmänucuna ishcay runata cačhacuran: «Tayta Pedro, Jope marcaman shamuy, ari. Ama juyapacämunkichu» nir.

³⁹ Cačha willaptin, juclla Pedro aywäširan. Chayaptin, aya chutarashan altusman pusharan. Biyüda warmicunapis junta paycur Dorcas jirapushan müdanancunata wiguinpawan ricachiran. ⁴⁰ Chaura Pedro llapan täpacunata wajtaman jargurir jungurpacuycur, Tayta Diosninchita mañacuran. Mañacurir, ayata niran: «Tabita, jatariy.» Niptin, cawaricurcuran. Pedruta ricärir, jamacurcuran. ⁴¹ Pedruna maquinpita jatarcachiran. Biyüdacunatapis, irmänucunatapis jayachiran. Llapanta jayarcachir, Tabitawan tincuchiran.

⁴² Tabita cawarishanta Jope marcačhu llapan musyaran. Chaynuypa achcaj runa Tayta Jesúspa shiminta čhasquicäriran. ⁴³ Chaypita unaylla suyla-ruraj Simónpa wasinčhu Pedro pachararan.*

10

Pedruta Cornelio jayachishan

¹ Chay wican Cesarea marcačhu Cornelio tiyanan. Payga «Italia batallun» nishan murucucunata mandaran. ² Wasinpa Cornelio Tayta Diosninchita manchapacuran. Manchapacushpan Israel runacunatapis yanapaj. Tayta Diosninchitapis mañacuj.

³ Juc junaj jatun mallway inti mañacuycaptin anjil ricariparcur, jayacuran: «Cornelio» nir. ⁴ Chaura mancharish ricapaycashančhu niran: «¿Imallaraj, Tayta?» Anjilna niran: «Cornelio, mañacushayquita Tayta Diosninchchi wiyashcashunqui. Wacchacunata yanapashayquitapis alli ñawinwan ricasha. ⁵ Cananga Jope marcaman cačhacuy «Pedro» nishan Simónpa pushamunanpaj. ⁶ Payga suyla-ruraj Simónpa wasinčhu pacharaycan. Wasin yacu cantullančhu caycan.»

⁷ Anjil illaricäuptin, Cornelio ishcaj mincaynintawan juc murucuta jayachiran. Chay murucu Corneliuta ricaj. Tayta Diosninchitapis manchapacuj. ⁸ Jayarcachir llapanta willapariycur, Jope marcaman cačharan.

⁹ Warannin junaj Corneliusca cačhancuna Jope marcaman čhayarcaycaptin, Pedro Tayta Diosninchita mañacuycaran. Mañacunapaj mirinday üra wasi altusman jigaran.

¹⁰ Micuy mana čhayaptillan, yarganaycashančhu Pedro ricapacuran. ¹¹ Ricaran janaj pachapa puncun quičhacäcamujta, jatun jacu čhuscun puntan icsish yarpaycämujta.

¹² Ñaupanman čhayamuptin, tucuy-niraj uywacunata, pačhanpa purijcunata, altullapa päríjcunata ricaran. ¹³ Ricapaycaptin, janaj pachapitana nimuran: «Pedro, micunayquipaj llapanta pishtay.»

¹⁴ Pedruna niran: «Mana micümangu, Tayta. Millanäcushayqui, asyächicushayqui uywacunata imaypis mana micushächu.» ¹⁵ Chaura yapay nimuran: «Tayta Diosninchchi alli ricashanta ama millanäcunquichu.» ¹⁶ Chaynuylla quimsa cutiparaj nimuran. Jinarcur jacuta janaj pachaman chutacurcuran.

¹⁷ Ricapacushanta Pedro yarpačhacuycaptillan, Corneliusca cačhancuna tapucurir-tapucurir čhayaran suyla-ruraj Simónpa wasi puncuncaman. ¹⁸ Puncupita jayacuriran: ««Pedro» nishan Simón, ¿caychüchu pacharaycan?» nir. ¹⁹ Ricapacushanpita yarpačhacuycaptillan, Espíritu Santu niran: «Pedro, quimsaj runa ashiycäshunqui. ²⁰ Juclla yarpuy. Mana manchacullar aywäšiy. Quiquï cačhamupti, shamusha.»

²¹ Chaura altuspita yarpuriycur, cačhacunata Pedro niran: «¿Nuwatachu ashiycämanqui? ¿Imallapäräj ashiycämanqui?» ²² Paycuna niran: «Capitan Cornelio cačhacamasha. Payga Tayta Diosninchita manchapacun. Israel runacunapis alli ñawinpa rican. Jayachishunayquipaj Tayta Diosninchipa anjilnинши willapasha. Wasinmanshi aywanqui shimiquita wiyananpaj.» ²³ Chay chacay Corneliusca cačhancunata Pedro pachächiran. Warannin tuta aywacüriran. Aywacuptin, Jope marcačhu irmänucunapis yanagaran.

* ^{9:43} Israel runacuna suyla-rurajta sumaj millanäcuj: «Waňushcunata yataptin, Tayta Diosninchipis millanäcun» nir.

²⁴ Waranninna Cesarea marcaman ćhayaran. Cornelio shuyaraycaran waquin ric-sinacushancunata, yawar-masincunata shuntaycur. ²⁵ Wasinman ćhayaptin, manchapacushpan Pedrupa ñaupanman jungurpacuycuran. ²⁶ Pedrum ichanga jatarcachiran: «Alliman ama ćhuramaychu. Nuwapis runa-masillayquim cä» nir.

²⁷ Chaypita Cornelieuwan wamayänacur wasi ruriman yaycur, chay-chicaj runata tarijan. ²⁸ Paycunata Pedro niran: «Musyashayquinuypis Israel runacuna Moiséspa shiminta wiyyacun. Tayta Diosninchawan alli ricanacuya munar, jäpa runacunawan mana jutucanchu. Wasinmanpis mana yaycunchu. Tayta Diosninchim ichanga tantiyachimasha pitasi mana millanäcunäpaj, mana asyächicunäpaj. ²⁹ Chaymi jayachimaptiqui, juclla shamushcä. Cananga mä, willamay. ¿Imapätaj jayachimashcanqui?»

³⁰ Corneliuwa niran: « Tayta Diosninchita mañacuycapti, caynuy üra achic-achicyaycaj müdanash runa ricaripamasha. Jatun mallway inti caycasha. Ricaripamashan ćhuscu junajna. ³¹ Ricaripamaj runa nimaran: «Cornelio, mañacushayquita Tayta Diosninchchi wiyyasha. Wacchacunata yanapashayquitapis ricasha. ³² Cananga Jope marcaman caćhacuy. «Pedro» nishan Simónta jayachimuy. Pacharaycan suyla-ruraj Simónpa wasinčhu. Wasin yacu cantullančhu caycan. ³³ Chaynuy nimaptin, juclla caćhacamushcä. Allipaj shamushcanqui. Tayta Diosninchipa ñaupančhu juturpaycanchi. ¿Imata willapämänayquipätaj Tayta Diosninchchi caćhamushcashunqui? Mä, willamay.»

Corneliupa wasinčhu Pedro willacushan

³⁴ Chaymi Pedro niran: «Tayta Diosninchchi pii-maytapis llaquipashanta tantiyacüna. ³⁵ May-chayčhu juyaptinpis llaquipashpan manchapacujcunata, shungun munashanta rurajcunata wamrachacun. ³⁶ Israel runacuna Jesúspa shiminta wiyyacuptin, allilla cawachinga. Shiminta willapäcunantipis Washäcu Jesústa caćhamuran. Taytanchi cashpan llapan runata maquinčhu purichin. ³⁷ Juan ushyachicur willapäcushanpita-pacha Galilea quinranpita Judea quinrancaman Jesúspa willapan purishanta musyanqui. ³⁸ Tayta Diosninchchi camacächiptin, Nazaret marca Jesústa Espíritu Santu charicurcuran. Chaymi munayniyuj ricacuran. Marcan-marcan purir, allita ruraran. Supay puclacushan runacunatapis allchacächiran. Tayta Diosninchipa maquinčhpis cawaran. ³⁹ Judea quinran marcacunačhpis, Jerusalén marcačhpis nuwacuna Jesúswan purishcä. Chaynuypa Jesús ima-imata rurashantapis willacü. Rusčhu wañuycachishantapis ricashcä. ⁴⁰ Ichanga quimsa junajta Tayta Diosninchchi cawarachimusha runacunawan tincunanpaj. ⁴¹ Mana llapan runatachu ricaripusha; manchäga unaypita-pacha Tayta Diosninchchi acracushan runacunallata. Nuwacunata ricaripamasha paypita willapäcunäpaj. Chaymi cawarcamuptinpis, Jesúswan micupacushcäraj. ⁴² Chaypita pii-maytapis willapäcunäpaj Tayta Jesús caćhacamasha: «Wañushcunapa, cawajcunapa juchantapis jurgapänäpaj Tayta Diosninchchi ćhuramasha» nir. ⁴³ Tayta Diosninchipa unay willacujnincunapis Jesúspita willacuran: «Pipis shiminta ćhasquicuptin, Tayta Diosninchji juchancunata mana yarparanganachu. Runacunata washänan-raycur shamur, llapanta camacächin» nir.»

Jäpa runacunata Espíritu Santu charicurcushan

⁴⁴ Pedro rimaycaptillan, Corneliuwa wasinčhu juturpaycajcunata Espíritu Santu charicurcuran. ⁴⁵ Jäpa runacunatapis Espíritu Santu charicurcuptin, Jope marcapita yanagaj Israel irmänucuna tantiyacuya mana atiparanchu. ⁴⁶ Espíritu Santu charicurcushanpita jäpa runacuna juc-niraj rimaytapis rimaran. Tayta Diosninchitapis alliman ćhuraran.

⁴⁷ Tantiyayta mana atipaptin, yanagajcunata Pedro niran: «Jäpa runacunatapis nuwanchita-jina Espíritu Santu charicurcush caycaptin, juclla ushyachishun.»

⁴⁸ Chaynuy nir Jesucristupa jutinčhu ushyachiran. Ushyacujcunana Pedruta mañacuran: «Tayta, ishcay-quimsa junajllapis juyapärishun, ari» nir.

11

Jerusalén marcaman Pedro cutishan

¹ Chaura Judea quinranchú Jesúspa cañhuncunapis, irmänucunapis mayaran waquin jäpa runacunapis Tayta Diosninchipa shiminta chasquicushanta. ² Chaymi Jerusalén marcaman Pedro chayaptin, Israel-masin irmänucuna jamurpar nirán: ³ «¿Imanirtaj jäpa runacunapa wasinchú pachacushcanqui? ¿Imanirtaj micupacärishcanqui?»

⁴ Jamurpaptin, llapallanta willar, Pedro nirán: ⁵ «Jope marcachú Tayta Diosninchita mañacuycashähchú ricapacurá. Janaj pachapita jatun jacu chusun puntan icsish yarpaycämuran. Ñaupáman chayamuran. ⁶ Sumaj ricapärir, ricarä tucuy-niraj uywacunata, micucuj uywacunata, paçhanpa purijcunata, altullapa pärijcunata. ⁷ Ricapaycapti, janaj pachapita nimaran: «Pedro, jatariy. Ricashayquita llapanta pishtay micunayquipaj.» ⁸ Chaura nishcä: «Mana micümanchu. Tayta Diosninchí millanäcushan, asyächicushan uywacunata imaypis mana micurüchu.» ⁹ Yapay janaj pachapita nimaran: «Tayta Diosninchí alli ricashanta ama millanäcunquichu.» ¹⁰ Chaynuy quimsa cutipa nimaran. Jinarcur janaj pachaman jipita chutacurcuran.

¹¹ «Niycaptillan, Cesarea marcapita quimsaj jäpa runacuna ashimar, pacharashäman chayamuran. ¹² Chaura mana manchacullar aywanäpaj Espíritu Santu shacyächimaran. Chaymi sujtaj irmänunchicunawanpis aywarä. Cesarea marcapita jayachimaj runapa wasinman chayarä. ¹³ Wasiyujna willamaran: «Wasíchú anjil ricariparcamar, nimasha: «Jope marcaman cañhacuy. «Pedro» nishan Simónta jayachimuy. ¹⁴ Pay willapäshunquipaj llapaniqui Tayta Diosninchipa maquinchú cawanayquipaj.»»

¹⁵ «Willapaycaptillána, nuwanchita ñaupata charicarcamashanchi-jina paycunatapis Espíritu Santu charicurcusha. ¹⁶ Chayraj Tayta Jesúspa shiminta yarpärirá. Pay nirán: «Ushyachicuj Juan yacullawan ushyachicusha. Jamcunatam ichanga Espíritu Santuwan Tayta Diosninchí ushyachishunquipaj shungun munashannuy cawanayquipaj.» ¹⁷ Chaura Tayta Jesúspa shiminta chasquicuptinchi, Espíritu Santu yanapämashanchi-jina paycunatapis yanapaycan. Tayta Diosninchí camacaycachiptin, mana miçämanchu.»

¹⁸ Chaynuy Pedro willaptin, pipis mana jamurparannachu; manchäga Tayta Diosninchita alliman churaran: «Jäpa runacuna wanacunatapis Tayta Diosninchí camacächin. Paycunasi wanacuptin, maquinchú imaycamanpis cawachinga» nir.

Antioquía marcachú Jesúspa shiminta chasquicushan

¹⁹ Canan tantiyacushun. Estebanta wañuycañhishan wican Jesúspa shiminta wiycacuj irmänucunata jaticaçhar ushyaptin, aywacäriran Fenicia marcacunaman, waquin Chipre marcacunaman, waquinna Antioquía marcaman. Chay marcacunaçhu Israel-masincunallata Jesúspita willaparan. ²⁰ Waquin irmänucunam ichanga jäpa runacunatapis willaparan. Willacujcuna caran Chipre marcacunapita, Cirene marcapita. Paycunana Antioquía marcachú jäpa runacunatapis Tayta Jesúspita willaparan. ²¹ Willapäcunandaj Tayta Diosninchí sumaj yanaparan. Chaymi achcaj jäpa runa jucha aparicuypita wanacuran. Jesúspa shiminta chasquicushan.

²² Chayta mayar, Jerusalén marcachú jutucaj irmänucuna Antioquía marcaman Bernabítica cañhacuran. ²³ Chayar, jäpa runacuna Jesúspa shiminta wiycushanpita sumaj cushicuran. Paycunata Tayta Diosninchí llaquipashanta tantiyacuran. Chaymi shacyächiran mana yamacällar Jesúspa shiminta wiycunandaj. ²⁴ Achcaj runa Jesúspa shiminta wiycäriran Bernabé alli runa captin, Tayta Diosninchita manchapacuptin, Espíritu Santupa maquinchú puriptin.

²⁵ Antioquía marcapita Tarso marcampa Bernabé aywaran Saulo ashij. ²⁶ Tarir, Antioquía marcaman pushacuran. Jutucaj irmänucunawan ishcan juc wata juyapäriran.

Tayta Diosninchipa shiminta achcaj runata tantiyachiran. Chay marcachürat Jesúspa maquinchu cawajcunata «Cristianucuna» nirshi jutichaparan.*

²⁷ Chay wican Tayta Diosninchipa willacujnincuna aywaran Jerusalén marcapita Antioquía marcaman. ²⁸ Chay marcachu Espíritu Santu rimachiptin, willacuj Agabo jatarcur musyachiran: «Chay-tucuychu juyupa mučhuy cangapaj» nir. Chaura musyachishannuya änír charcucaran. Roma marcacunata mandaj Claudio maquinchu purichishan wican änír mučhuy caran. ²⁹ Mučhuy captin, Antioquía marcachu irmänucuna parlanacuran Judea marcachu irmänucunata taripacushan-tupulla tarichinanpaj. ³⁰ Chaymi cuyachicuynincunata shuntariycur, Sauluwan, Bernabíwan Jerusalén marcaman apachiran. Chayachirga, mayur irmänucunapa maquinman inčhigaycuran.*

12

Santiaguta wañuchishan, Pedruta carsilman wičgachishan

¹ Chay wican mandaj Herodes ishcay-quimsa irmänucunata charichisha ñacachinapaj. ² Juanpa wauguin Santiagupa cuncanta ruguriptin, ³ waquin Israel runacuna jatunpa cushicuran. Chaymi Libadüraynaj tantata micuna fiestata rurashan wican Pedrutapis chariran. ⁴ Charircur, carsilman wičgaran: «Pascua fiesta ushyayraj llapan runa ricay tapushun» nir.* Chuscu jutuy murucucunapa maquinman churaran. Täparanpis chuscuj murucu-caman. ⁵ Pedruta sumaj täparcaycaran. Chaypis jutucaj irmänucuna Pedrupaj mana yamacällar Tayta Diosninchita mañacurcaycaran.

Carsilpita Pedruta jishpichishan

⁶ Chaura mandaj Herodes ñauquinan warämuj Pedro ishcaj murucupa chaupinchu puñuycaran. Ishcay cadinawan wataraycächiran. Waquin murucucunapis puncučhu täparcaycaran. ⁷ Täparcaycaptin, Tayta Diosninchipa anjilnin achic-achicyaycar ricaripuran. Pedruta tapsirir: «Juclla jatariy» niptin, wataraycächishan cadinapis pascacäcuran. ⁸ Jinarcur niran: «Pedro, juclla cinturunniqita watacuy. Llanguiquitapis jaticuy.» Anjil nishanta änír Pedro ruraran. Jatarcuptin, niran: «Punchuyquita ushtucurcur, jipalläta llucshimuy.»

⁹ Chaura anjilpa jipallanta Pedro llucshiran. Ichanga mana tantiyacur, yarpačhacuran: «¿Rasunpachu llucshiyca? ¿Nuspaycächu?» nir. ¹⁰ Ruri puncucunata täpaycaj murucucunatapis chancarir-chancarir jawa puncuman chayaran. Jawa puncuman chayaptin, jíru puncu quiqullan quičhacäcuran. Chaura wajtačhuna ricacuran. Carunijcaman pusharcur, anjil illaricäcuran. Quiquillanna Pedro ricacuran.

¹¹ Tantiyacurir, Pedro niran: «Cananmi ichanga Tayta Diosninchí anjilninta cačhamushanta rasunpa musyä. Mayur Israel runacunapita, mandaj Herodespita jishpirachimasha. Wañuchimänanpita washämasha.»

¹² Chaura carsilpita llucshishanta sumaj tantiyacurir, Maríapa wasinman aywacuran. Paymi «Marcos» nishan Juanpa maman caran. Maríapa wasinchu irmänucuna Pedrupaj Tayta Diosninchita mañacurcaycaran. ¹³ Chaura sawan puncupita Pedro jayacuriptin, pi cashantapis musyanapaj yanapäcuj jipash Rodesa llucshiriran. ¹⁴ Pedrupa shiminta wiyar, jatunpa cushicuran. Puncu quičhapuytapis jungaycur, cuticuran: «Pedro chayamusha» nir. ¹⁵ Willaptin, llapan niran: «Supaychi puillacushcashunqui.» Niptinpis, yapayraj niran: «Mana llullacüchu. Rasunpa Pedro.» Chaura niran: «Alman-imatačhi wiypacushcanqui.»

* **11:26** «Cristianucuna» nin Washäcuj Jesúspa llupinpa aywashanpita. * **11:30** Griego rimaychu yupachicushan mayur runacunata ricsij: «presbíteros» nir. * **12:4** Griego rimaychu: «Pascua» ninanta: «Jananpa chancasha» ninan.

¹⁶ Puncuta mana quichapuptin, yaparir-yaparir Pedro jayacuycaran. Puncuta quicharir, Pedruta ricashpan tantiyacuya mana atiparanchu. ¹⁷ Chaura Pedro upällachiran. Jinarcur carsilpita Tayta Diosninchı jurgushanta willacuran. Chaypita jucläpa aywacuran: «Llucshimushäta waquin irmänunchicunatapis, Jesúspa wauguin Santigutapis willanqui» nir.

¹⁸ Chaura carsilchu Pedro mana warämuptin, quiquin-puralla täpaj murucucuna ullgüpänacuran «¿Mayraj Pedro?» nir. ¹⁹ Pedro mana captin, wacpa-caypa mandaj Herodes ashichiran. Täpacuj murucucunatapis sumaj tapuran. Pedruta mana tariptin, quiquin täpaj murucucunata wañucachiran. Jinarcur Judea quinranpita Cesarea marcamanna Herodes tiyaj aywacuran.

Mandaj Herodes wañucushan

²⁰ Mandaj Herodes Tiro marca runacunatapis, Sidón marca runacunatapis juyupa chiquipacurcuran. Chiquipaptin, parlaj aywariycur Blastuta mañacuran: «Tayta Blasto, capuralnin cashpayqui mandaj Herodeswan yačhänaçunqui. Ullguynin jasacänanpaj parlapaycallämay, ari. Marca-masipaj micuya apapti, ama mičhämanmanchu» nir. Chaymi Blasto parlapaptin, änír mandaj Herodespa ullguynin jasacaran. Juc junajpaj jitaparan: «Tiro runacunawan, Sidón runacunawan parlanacunäpaj shamuchun» nir.

²¹ Sisyunpaj jitapashan junaj čhayamuptin, achic-achicyaycaj müdananta ushtucurcur, runacunapa ñaupančhu mandaj Herodes jamacuycuran. Cushichipayllapa rimaran.

²² Rimashanta wiyar, japarir-japarir runacuna niran: «Taytallau Tayta, Munayniuj Tayta Diosninchı canqui. Imaypis mana ushyacanquipächu.» ²³ Runacuna alliman čhuraptin, Herodes sumaj cushicuran. Quiquin Tayta Diosninchıwan tincuchiptinsi, mana mičharanchu. Chaypitam Tayta Diosninchipa anjlnin wañurachiran. Mandaj Herodes aycha curu ushyaypa wañucuran.

²⁴ Tayta Diosninchita wiyacujcunam ichanga Jesúspa shiminta chay-tucuyčhu willapäcuycaran. Runa achcajmi Tayta Jesúspa shiminta čhasquicuran. ²⁵ Chay wichan Bernabíwan Saulo cuyachicuycunata Jerusalén marcaman čhayachiran. Jinarcur «Marcos» nishan Juanta pushacurcur, Antioquia marcaman cuticuran.

13

Jesúspita willacunanpaj Sauluta cačhacushan

¹ Chaura chay wichan Antioquia marcačhpis irmänucuna jutucaycaran. Waquin caran willacujcuna, waquinna yačhajcuna. Chayčhu Bernabípis, «Yana Runa» nishan Simeónpis, Cirene marca Luciupis, Saulupis, Manahempis caycaran. Irmänu Manahemga Galilea marcacunata mandaj Herodespa wiñay-masin caran.

² Juc junaj irmänucuna Tayta Diosninchita manchapacurcaycaptin, ayünarcaycaptin, Espíritu Santu musyachiran: «Bernabítawan Sauluta shimiña willacur purinanpaj raquicushcä. Jamcuna cačhacuy» nir. ³ Chaura ayünayta, mañacuya ushyarcur, ishcanta Tayta Diosninchipa maquinman čhuraran. Umanta yataycur, niran: «Taytallau Tayta, cay runacuna aruyninta čharcunanpaj yanapaycullay, ari.» Jinarcur, Bernabítawan Sauluta cačhacurán willapäcur purinanpaj.

Chipre marcačhu Pablo willapäcushan

⁴ Chaura Espíritu Santu pushaptin, Bernabíwan Saulo Seleucia marcaman čhayaran. Chaypita bütíwan Chipre quinranman čhayaran. ⁵ Chipre quinrančhu Salamina marcaman čhayar, Israelcunapa shuntacäna wasincunačhu Jesúspa shiminta willapäcuran. Juan Marcospis yanapar purishiycaran.

⁶ Jesúspa shiminta willacur Chipre quinrančhu puriyashančhu Pafos marcamanpis čhayaran. Chayčhu musyapacuj Bar-Jesúswan tincusha. Paypis Israel runa caran. Achcay

runata riguichiran: «Tayta Diosninchipa willacujnin cä» nir. ⁷ Chipre marcapa mandajnin Sergio Pauluwanpis yačhānacuran. Mandaj Sergio Pauluga yarpay-sapa runa caran. Tayta Diosninchipa shiminta wiwayta munar, Bernabítawan Sauluta jayachiran. ⁸ Musyapacuj runam ichanga mandaj Sergio wiwaycunanta mana munar, tucuy-jinanpa chapata ruraran. Griego rimajcuna musyapacujta: «Elimas» nir ricsiran.

⁹⁻¹⁰ Chapata ruraptin Espíritu Santupa maquinčhu purir, Saulo musyapacuj runata ullgúparan. Saulullata griego rimajcuna: «Pablo» nir ricsiran. «Pablo» nishan Saulo musyapacujta ullgúpar, niran: «Llulla runa canqui. Pingacuytapis mana yačhanquichu. Supaypa wawan canqui. Tayta Diosninchitapis tucuy-jinanpa chapata ruraycanqui. ¿Imaycamanraj llullacunqui: ‹Taytanchipa shiminta rimä› nir? ¹¹ Chay-niraj cashayquipita Tayta Diosninchchi ñacachishunquipaj. Achicyaj pachatapis unaylla mana ricanquipächu.» Chaynuy niptin, Elimas japrayacácuran. Puriyta mana camäpacur, tumaycačhaycaran pipis maquinpita purichinanta munar. ¹² Japrayashta ricar mancharir, mandaj Sergio tantiyacuran Tayta Jesús munayniyuj cashanta. Juclla shiminta čhasquicuran.

Pisidia quinrančhu Pablo willacushan

¹³ Chaypita Pablo llapan yanaguincunawan bütowan aywacuran Pafos marcapita Panfilia quinran Perge marcaman. Juanmi ichanga paycunata jaguiriycur, Jerusalén marcaman cuticuran. ¹⁴ Pabluna yanaguincunawan Perge marcapita Pisidia quinran Antioquía marcaman čhayaran. Diyawarda captin, Israelcunapa shuntacäna wasinman aywaran. Čhayar ruriman yaycurir, jamacuycuran.

¹⁵ Shuntacäna wasičhu yačhajcuna Moiséspa shiminta, willacujcunapa shiminta liguycaran. Liguiyta ushyarcuptin, mayur runacuna Pablutawan Bernabíta niran: «Irmänucuna, shacyächimaya munar, juclla willapäramay, ari.» ¹⁶ Chaura jatarcur llapan runata upällaraycachir, Pablo niran: «Israel-masicunapis, Tayta Diosninchita manchapacujcuna jäpa runacunapis, mä, shimiña wiyyacallämay. ¹⁷ Unay Israel-masinchicunallatas Tayta Diosninchchi wamrachacuran. Chayshi Egipto marcačhu jurpay-tucullar puriptinpis, sumaj achcayänanpaj camacächiran. Chaypita munayniyuj cayninwan unay auquillunchicunata Egipto marcapita jishpichimuran. ¹⁸ Chunyaj pachačhu čhuscu čhunca (40) wata purir llutanta ruraptinpis, Tayta Diosninchchi manash yamacaranchu. ¹⁹ Manchäga Canaán marcaman čhayachimuran. Chayčħushi jančhis marca runacunata ushyaran. Llapanta ushyariycurshi, čhacrantapis auquillunchicunata raquipuran. ²⁰ Wamrachacushanpita-pacha čhuscu pačhac pichga čhuncawan (450) watataräshi Canaán marcačhu mirar shillaran. Chaypita Israel runacunata ricananpäshi mayur runacunata čhurapurán. Paycunapa maquillančhu juyaran willacuj Samuel cawashan wichancaman. ²¹ Chay wichan unay auquillunchicuna Tayta Diosninchita mañacuran: ‹Lapanita ricamänanpaj juc mandaj runallata čhuray. Llapani cawashaj paypa maquilančhu› nir. Chayshi mandananpaj Tayta Diosninchchi Saúltä čhuraran. Papänin caran Cis, auquillunnash Benjamín. Saúlga čhuscu čhunca (40) watash Israelcunata maquinčhu purichiran. ²² Chaypita Saúltä jargurir, Davidtanash mandaj cananpaj čhuraran. Manaräsi mandaj cayman čhayaptillan, Tayta Diosninchchi musyachicuran:

«Jesépa wamran David shungüman tincun. Payraj shungü munashanta ruranga» nir.*

²³ «Chaura Tayta Diosninchchi aunishanta čharcurshi, Davidpa willcanpita jucta čhuraran Israelcunata washänanpaj. Čhurashan runa Jesúsmi caran. ²⁴ Tayta Jesús manaraj ricarimuptillansi, Ushyachicuj Juan llapan Israel runacunata anyaparan wanacunananpaj, ushyacunananpaj. ²⁵ Chaypita wañucunanpaj wallcana pishiycaptin, Ushyachicuj Juan niran: ‹Yarpaptiquipis, mana Washäcujchu cä. Jipätam ichanga munayniyuj shamunga. Munayniyuj captin, llanguinta llushtipuyllatapis manchapacü.»

* **13:22** Salmo 89.20; 1 Samuel 13.14.

²⁶ «Israel-masicuna, Abrahampa willcan carpis, Tayta Diosninchita manchapacuj jäpa runa carpis, shimita wiyaycallämay. Tayta Jesúspa shiminta čhasquicuptinchi, llapanchita washämäshun. ²⁷ Tayta Jesús Washäcuj cashanta Jerusalén marca runacunapis, mayur runacunapis manash tantiyacuranchu. Diyawardacunačhu unay willacujcunapa shiminta liguiycarsi, manash tantiyacuranchu. Chayshi willacujcunapa shimin rimashanman-tupu Jesústa wañuyucachisha. ²⁸ Wañuchiyya munar juchan mana caycaptinsi, ullgur mandaj Pilatuta mañacuran: «Jesústa wañuyucachiy» nirshi.

²⁹ Willacujcunapa shimin rimashan-tupu rusčhu wañuchiran. Jinarcur pampaycäriran.

³⁰ «Wañush pamparaycaptinsi, Tayta Diosninchchi cawarachimusha. ³¹ Cawarcamur, Galilea marcapita Jerusalén marcaman aywähijcunata achca cutish ricaripuran. Aywähijcunash Israel-masinchicunata Jesúspita willapäcurcaycan. ³² Unay auquil-lunchicunata Tayta Diosninchchi auniran: «Washäcuja cačhamushaj» nirshi. Cananga Tayta Diosninchchi aunishanta čharcucächishana. Chay alli willapata willacurcaycä.

³³ Shiminta čharcushpan Tayta Diosninchchi Jesústa cawarachishcha. Jesús cawarinanpaj ishcay-caj Salmučhu nin:

«Wawämi canqui. Nuwapita cawanqui.»*

³⁴ «Tayta Diosninchchi nishannuylla änir Jesústa cawarachimusha. Yapay wañuyuman čhayar ayan ismunanta mana camacächingachu. Shiminčhu nin:

«Jamcunata sumaj yanapäshaj.

Mandaj Davidta aunishäta llapanta čharcushaj, nir.*

³⁵ Juc Salmučhüpis isquirbiraycan:

«Acrashayqui runapa ayan ismunanta mana camacächinquipächu» nir.*

³⁶ Chaura mandaj David änirshi, Tayta Diosninchipa shungun munashannuylla Israel-masincunata mandaran. Wañucuptinshi, unay yawar-masincuna pamparashallanman pampaycusha. Ayanpis ismur, ushyacaran. ³⁷ Jesústam ichanga Tayta Diosninchchi cawarachiran. Ayanpis mana ismurancho.

³⁸⁻³⁹ «Israel-masicuna, sumaj tantiyacushun. Tayta Diosninchchi alli ricamänanchipaj Moiséspa shimintaraj čharcushun» nir llapanta čharcuya mana atipaptinchi, juchanchitapis Tayta Diosninchchi yarparaycaranraj. Juchanchi jungacash cananpämi ichanga quiquin Jesús camacächisha. Paypa shiminta čhasquicuptinchi, juchanchita Tayta Diosninchchi mana yarparanganachu. Alli ñawinpana ricamäshun. ⁴⁰ Chaymi unay auquil-lunchicuna čhayashanman čhayarunquiman. Unay willacujnincunawan Tayta Diosninchchi musyachicuran:

⁴¹ «Wasguipämajcuna, wiyananquiman.

Mancharinquiipämi.

Illarinquipämi.

Munayniwan imatapis camacächishaj.

Camacächishäta willashuptiquipis, mana tantiyacunquipächu» nir.»*

⁴² Willacuya ushyarcur, shuntacäna wasipita Pabluwan Bernabé llucshicuran. Llucshicuptin, llapan shungunwan runacuna mañacurcaycaran: «Shamuj diyawardapis willapämänyquipaj yapay cutimunqui, ari» nir. ⁴³ Shuntacäna wasipita llapan llucshicur, Israelcunapis, Tayta Diosninchita manchapacuj jäpa runacunapis Pablutawan Bernabíta aywähiran. Aywähijcunata shacyächiran llaquipäcu Tayta Diosninchipa shiminta mana yamacällar čharcunapaj.

⁴⁴ Chaymi shamuj diyawarda junaj čhayamuptin, Tayta Diosninchipa shiminta wiyananpaj llapan-yupay runacuna shuntacaran. ⁴⁵ Chay-chicajta ricar, Israel runacuna ullgucarcäriran. Pabluta tincuparan. Ashllir ushyaran. ⁴⁶ Chaura Pabluwan Bernabé mana manchacullar niran: «Taytacuna, Israel runa car, Israel-masinchicunataraj

* ^{13:33} Salmo 2.7. * ^{13:34} Isaías 55.3. * ^{13:35} Salmo 16.10. * ^{13:41} Habacuq 1.5

Tayta Diosninchipa shiminta willaparä. Cananga shiminta wasguipashayqui-jina mana ushyacaj cawaytapis wasguipaycanqui. Chaymi cananpita-pacha jäpa runacunata willapäcushaj. ⁴⁷ Tayta Diosninchchi llapan runata willapänäpaj musyachicuran: Jäpa runacunata shimiña willapäcunayquipaj čurashcaj.

May-chaychüpis willapäcushayquita čhasquicuptin, washäshaj nir.»*

⁴⁸ Chayta wiyar, jäpa runacuna jatunpa cushicuran: «Tayta Diosninchchi llaquipäcuj. Allipaj Jesúspa shiminta wiyashcanchi» nir. Mana ushyacaj cawayta tarinanpaj Tayta Diosninchchi acracushancuna Jesúspa alli willapanta čhasquicäriran. ⁴⁹ Chaynuypa chay marcacunačhu Jesúspa shiminta willacurcaycaran.

⁵⁰ Waquin Israelcunam ichanga ullgucarcäriran. Chaymi waquin Tayta Diosninchita manchapacuj mama-warmicunatawan mayur runacunata shimiyanaran Pablutawan Bernabíta chiquipacurcunanpaj. Chiquipayllawan marcanpitasi jarguran.

⁵¹ Jarguriptin: «Wasguimashayquipita ñacayman čhayánquipaj» nir čhaquinta pichacurir, Iconio marcaman aywacäriran. ⁵² Aywacuptinsi, Tayta Jesúspa shiminta čhasquicujcuna cushi-cushilla cawarcaycaran. Maquinchüpis Espíritu Santu puriycächiran.

14

Iconio marcačhu Bernabíwan Pablo willapäcushan

¹ Iconio marcaman čhayarna, Pabluwan Bernabé Israelcunapa shuntacäna wasin-man aywaran. Paycuna willapäcuptin, Israel runacunapis, jäpa runacunapis Jesúspa shiminta čhasquicuran. ² Waquin Israel runacunam ichanga Jesúspa shiminta wasguir, waquin jäpa runacunata shimiyanaran irmänucunata chiquipänanpaj. ³ Imanuy captinpis, unaylla Iconio marcačhu Jesúspa caħancuna juyapärian. Tayta Jesúsman yupachicur pitasi mana manchacullar willapäcuran: «Tayta Diosninchchi llaquipäcuj car, acracushan Jesústa cačhamusha washämänanchipaj» nir. Tantiyachishannylla willapäcur, jishyačhucunata allchacächir, supaycunata jargur, tucuy-jinanpa Tayta Diosninchchi munayniyuj cashantapis, llaquipäcuj cashantapis musyachicuycaran.

⁴ Iconio marca runacuna quiquin-puralla ticrapanacuran. Waquin runa Jesúspa caħancunata čhasquicuran; waquinmi ichanga mana. Mana wiယacuj Israelcunapa shiminta wiယacur, mana čhasquicuranchu. ⁵ Mana čhasquicujcuna mayur Israel runacunapis marca-masintin, jäpa mayur runacunapis marca-masintin parlanacuran Pablutawan Bernabíta sajmar ushyananpaj. ⁶ Parlanacushanta mayar, jishpicäriran. Aywaran Licaonia quinran Derbe marcaman, Listra marcaman, waquin marcacunamanpis. ⁷ Chay marcacunaman čayar, Tayta Diosninchipa shiminta willacur Jesúspita willapäcuran.

Listra marcačhu Pabluta sajmashan

⁸ Listra marcačhu cumllu runawan tincuran. Yuriyninpita-pacha cumllu car, puriyta mana camäpacuranchu. ⁹ Payga Pablo willacushanta wiယarayacaran. Chaura cumlluta ricärir tantiyacuran: «Cay runa allchacayta munar, llapan shungunwan Tayta Diosninchiman yupachicun» nir. Chaymi Pablo nirán: ¹⁰ «Muguyquicunata chutapacuy. Jatariy.» Niptin, cumllu runa juclla jataricurcuran. Allina puriran.

¹¹ Chaura Pablo allchacächishanta ricar, quiquinunapa rimayninčhu Licaonia runacuna ninacuran: «Yaya taytanchi runa-tucullar watucamashcanchi.» ¹² Manchapacur, Bernabípaj nirán: «Caymi yaya taytanchi Zeus.» Pablupäna willacuj captin, nirán: «Caymi yaya taytanchi Hermes.» ¹³ Listra marca yaycunačhu caycaran yaya tayta Zeuspa capillan. Chay capillačhu aruj cüra marca-masintin Jesúspa caħancunata cuyachicuyncunata jarayta munar, waytan wallgash türucunata apamuran.

* ^{13:47} Isaías 49.6. Griego rimayčhu Tayta Diosninchipa shiminta wiယacur alli cawajcunata: «achqui» nin. Achquiwan llapanricaħħi-yupay Tayta Diosninchipa maquinčhu cawaj runacunata ricar, tantiyacunchi Tayta Diosninchchi llaquipäcuj cashanta.»

¹⁴ Chaura: «Yaya tayta» nir jarayta munaptin, Pabluwan Bernabé juyupa mancharicäcuran. Müdanantapis račhir ushyarir, runacunapa čhaupinpa ushtucuycur wiyanacächiyapa llapan runata niran: ¹⁵ «Taytacuna, yaya taytayquiman ama tincuchimaychu. Nuwacunapis runa-masillayquim caycä. Rasunpa-caj Tayta Diosninchita cačhamasha shiminta willapänäpaj. Payga cawan. Camasha janaj pachatapis, cay pachatapis, yacucunatapis, llapan imacunatapis. Chaymi manacaj jircacunaman ama manchapacunquimanchu. Manchäga quiquin Tayta Diosninchita manchapacunquiman. Paylla munayniyuj. ¹⁶ Unaya quiquin yarpashannuylla runacuna cawaran. Imanuy cawaptinpis, Tayta Diosninchita mana mičharanchu. ¹⁷ Jamcunapis chaynuy cawaptiquisi, Tayta Diosninchita llaquipäshurayqui. Llaquipäcuj car, tamayachimun micuyniquicuna sumaj wačhananpäpis, sumaj wayunanpäpis. Yanapaycäshunqui cushi-cushilla cawanayquipaj.»

¹⁸ Runacuna jarayta munaycaptin, Pabluwan Bernabé tucuy-jinanpa tantiyachirraj mičharan.

¹⁹ Listra marcačhu caycaptin, chiquicuj Israel mayur runacuna čhayaran Pisidia quinran Antioquía marcapita, Iconio marcapita. Paycuna Jesúspa cačhancunata chiquichinan-cashallan runacunata shimiyan. Shimiaptin, Pabluta sajmar ushyaran. Wañush-jina jitacäcuption: «Wañuycachirunchi» nir marca wajtanman jančharcur wicapariran. ²⁰ Chaypis irmänucuna jutuparaycaptin, cawarcamuran. Jinarcur marcaman Pablo cutiran. Warannin Bernabíwan ishcanin Derbe marcaman aywacuran.

Antioquía marcaman Bernabíwan Pablo cuticushan

²¹ Derbe marcačhu willapäcuption, achcaj runa Tayta Jesúspa shiminta čhasquicuran. Paycunata sumaj willapariycur, aywashan caminullapa cuticuran Listra marcapa, Iconio marcapa, Antioquía marcacaman. ²² Chay marcacunaman čayar, Tayta Diosninchita mana yamacänanpaj irmänucunata shacyächir niran: «Tantiyacunquiman. Tayta Diosninchipa ñaupanman mana čhayashanchicaman runacuna chiquir ushyamäshunpaj.» ²³ Cutishan marcacunaman čayar, jutucaj irmänucunata ricananpaj mayur irmänucunata čhuraran. Ayünar Tayta Diosninchita mañacuran: «Taytallau Tayta, mayur irmänucuna aruyninta čharcunapaj yanapaycullay, ari. Paycuna maquiquichümi cawan» nir.

²⁴ Chaypita Pisidia quinranpa aywaycur, ishcanin Panfilia quinranman čhayaran.

²⁵ Jinarcur Perge marcačhu Jesúspa shiminta willapäcuriycur, Atalía marcamanna yarpamuran. ²⁶ Willapäcuya ushyarcur, bütowan Antioquía marcaman cuticuran. Chay marcapita llaquipäcuj Tayta Diosninchipa maquinman čhuraycuption, Pabluwan Bernabé willacuj llucshipäcuran.

²⁷ Chaura llucshishan marcaman čayar, jutucaj irmänucunata jayarcur, willaparan: «Jesúspa shiminta willacupti, sumaj Tayta Diosninchita yanapämasha. Chaymi jäpa runacunapis shungun shacyäcuption, Tayta Jesúspa shiminta čhasquicärian. Paycuna Tayta Diosninchipa maquinčhu cawarcaycan» nir. ²⁸ Llapallanta willapariycur, wiycujmasincunawan unaylla juyapäriran.

15

Jerusalén marcačhu parlanacushan

¹ Chay wichan Judea quinranpita Antioquía marcaman aywarcur, waquin Israel irmänucuna willapäcuycaran: «Jäpa runacuna, Tayta Jesúspa shiminta čhasquicush carsi, Moiséspa shimintaraj čharcunquiman. Jirucunquiman. Chayraj maquinčhu Tayta Diosninchita purichishunquipaj» nir. ² Pabluwan Bernabími ichanga paycunawan sumaj tincupänacuran. Chaymi Antioquía mayur irmänucuna Pablutapis, Bernabítapis, waquin irmänucunatapis Jerusalén marcaman cačharan. Cačhaptin, Jesúspa cačhancunawan, mayur irmänucunawan parlanacuj aywaran.

³ Chaura Antioquía marcáchu jutucaj irmänucuna cáchaptin, Fenicia uranpa, Samaria uranpa aywacäriran. Waquin irmänucunawan tincur, willaparan: «Jäpa runacunapis Tayta Diosninchipa shiminta čhasquicun» nir. Willapaptin, jatunpa cushicäriran.

⁴ Pabluwan Bernabé Jerusalén marcaman čhayaptin, Jesúspa cačhancunapis, mayur irmänucunapis, jutucaj irmänucunapis cushi-cushilla čhasquicäriran. Chaura Pablo tucuyjinanpa Tayta Diosninchichi yanapashanta willaparan. ⁵ Waquin Tayta Jesúspa shiminta čhasquicuj fariseucunam ichanga niran: «jäpa runacuna Tayta Jesústa čhasquicurpis, Israel ullgucuna-jina jírucuchun. Moiséspa shimintaraj llapanta čharcuchun.»

⁶ Chaynuy niptin, Jesúspa cačhancunawan llapan mayur irmänucuna-ima parlanacäriran.

⁷ Sumaj apaycačhänacuptin, Pedro jatarcur niran: «Irmänucuna, jäpa runacunata willapänäpaj Tayta Diosninchichi acracamashanta musyanqui. Acracamasha Jesúspa alli willapanta willapapti, jäpa runacunapis čhasquicunapaj. ⁸ Tayta Diosninchichi llapan runapa shungunta musyapan. Chaymi yanagämashanchi-jina jäpa runacunatapis acra-cushpan Espíritu Santu maquinčhu puriyčächin. ⁹ Jesúspa shiminta čhasquicuptinchi, Israel runacunatapis, jäpa runacunatapis maquinčhu Tayta Diosninchichi purichimanchi. Paypäga llapanchipis jucnaylla caycanchi. Jäpa runacunapa juchantapis jungashana. Alli ūawinpana rican. ¹⁰ Chaymi Tayta Diosninchita chapata ama rurashunchu. Jesúspa shiminta wiယacuptin, jäpa runacunata ama nishuwanchu: «Moiséspa shimintaraj čharcuy.» Moiséspa shiminta unay auquillunchicuna mana čharcuranchu. Nuwanchipis čharcuya mana camäpacunchichu. ¹¹ Tayta Diosninchim ichanga llaquipäcu cashpan washämanchi. Washämänanchi-raycur Tayta Jesús wañuyman čhayashanpita nuwanchitapis, jäpa runacunatapis alli ricamanchi.»

¹² Chaypita Pabluwan Bernabé Tayta Diosninchichi imanuy-imanuy yanapashan-tapis willaran: «Jäpa runacunata willapäcpti, Tayta Diosninchichi camacächiynipa jishyačhucunata allchacächishcä. Supaycunatapis jargushcä» nir. Chaynuy niptin, llapan runa wiယapararan.

¹³ Llapanta willaptin, Santiagupis niran: «Irmänucuna, mä, wiယaycallämay. ¹⁴ Simeón Pedro cananraj willapämashcanchi jäpa runacunatapis unaypita-pacha Tayta Diosninchichi llaquipaycashanta. Paycunatapis acracusha maquinčhu cawanapaj. ¹⁵ Chaynuy cananpaj Tayta Diosninchipa unay willacujnincunapis musyachicur niran:

¹⁶ «Tayta Diosninchichi nimanchi:

«Juc junaj cutimushaj.

Mandaj Davidpa marcan ushyacash captinsi, mandajnin mana captinsi, yawar-masillanpita juc mandajta čhurashaj.

Maquillančhu marca-masincunata purichishaj.

Ushyacash marcantapis quiquin-purallapita yapay marcayächishaj.

¹⁷ Chaynuy camacächipti, llapan runa ashimanga.

Acracushä jäpa runacunatapis maquičhu purichishaj.

¹⁸ Chaynuy cananpaj quiquin Tayta Diosninchichi unaypita-pacha auniran.»,*

¹⁹ «Irmänucuna, chaymi jäpa runacunapa umanta alläpa ama nanächishunchu. Ama pantacächishunchu. Quiquin cuna yarpashannylla Tayta Diosninchita wiယacunman. Israel runacuna yarpashantapis llapallanta ama čharcunmanchu. ²⁰ Manchäga Tayta Diosninchawan alli ricanacunapaj cartacushun: «Jircacunata jarashanta ama micunquimanchu. Ricashayqui warmitapis ama yatapanquimanchu. Ricashayqui runatapis ama čhasquipanquimanchu. Maticuypa wañush uywatapis, yawartapis ama micunquimanchu» nir. ²¹ Chaycunata unaypita-pacha Moiséspa shiminta liguiycur, willapäcuran. Canan wíchanpis diyawarda junajcunačhu marcan-marcan shuntacäna wasicunačhu Moiséspa shiminta willapäcun.»

* ^{15:18} Amós 9.11-12.

Jerusalén marcapita cartacushan

²² Chaura chaynuy niptin, Jesúspa caćhancunapis, mayur irmänucunapis, llapan jutucaj irmänucunapis cushish čhasquicärisha. Pabluwan Bernabé Antioquía marcaman cutiptin, aywäshinanpäpis juc-ishcay mayur irmänucunata acraran. Acraran «Barsabás» nishan Judastawan Silasta.

²³ Paycunawan cartata apachiran Antioquía marcaman, Siria quinranwan Cilicia quinran marcacunaman. Tayta Jesúspa shiminta čhasquicuj jäpa runacunata cartacuran. Cartačhu niran: «Irmänucuna, ¿allillachu juyaparcaycanqui? Jesúspa caćhancunawan mayur irmänucunawan-ima cartacaycämü. ²⁴ Waquin irmänunchicuna umayquita nanächinallanpaj cashanta mayashcä. Mana caćhaycämuptisi, sharcamur willapash-cashunqui: «Moiséspa shimintaraj čharcuy. Janayquitapis jírucuy» nir. ²⁵ Chaymi sumaj parlanacuriycur, juc-ishcay irmänunchicunata caćhaycämü. Shaycämun yačhänacushanchi Bernabíwan Pablo. ²⁶ Paycuna wañuytapis mana manchacullar, Taytanchi Jesucristupa shiminta willapäcurcaycan. ²⁷ Chaynuypis irmänunchi Judastawan Silasta caćhamushcä. Cartacamushäta shiminwanpis tantiyachishunquipaj.

²⁸ «Espíritu Santupis, nuwacunapis chapata mana rurämanchu. Ichanga Espíritu Santu shacyächimaptin, ichicllatapis anyapärishayqui. ²⁹ Jircacunaman jarashanta ama micunquimanchu. Uyshata pishtar, yawarninta shutuchiniquiman. Ima yawartapis ama micunquimanchu. Ricashayqui warmiwanpis, ricashayqui runawanpis ama cacunquimanchu. Willapashäcunata čharcur, allina cawanquipaj. Chayllata cartacamü.»

³⁰ Chaynuya carta apajcuna Antioquía marcaman aywacuran. Čhayar, llapan irmänucunata shuntaycur, cartata juycuran. ³¹ Cartata liguipaptin shacyächishanta wiyar, jatunpa cushicäriran. ³² Silaswan Judaspis Tayta Diosninchipa willacujnir car, shiminpawanraj llapan irmänucunata sumaj shacyächiran. ³³ Chaypita unayllata carta apajcuna Jerusalén marcaman cuticäriran. Cuticuptin, niran: «Allila cutiyullay, ari. Jerusalén marcačhu irmänunchicunatapis wamayapämánqui, ari.» ³⁴ Jucnin cuticuptinsi, Silas mana cuticuranchu.

³⁵ Pabluwan Bernabípis mana cuticuranchu. Manchäga waquin irmänucunawan Antioquía marcačhu juyar, Tayta Diosninchipa shiminta willapäcuran. Jesúspita tantiyachicurán.

Jesúspita willacunanpaj Pabluta yapay caćhacushan

³⁶ Chaypita unayllata Pablo niran: «Bernabé, irmänunchicuna watucuj cutishun. Tayta Diosninchipa willacuyninta willapäcur purishanchi marcacunata watucushun. Mä, ¿imanuyshi caycan?»

³⁷ «Cutishun» niptin, Bernabé niran: ««Marcos» nishan Juantapis pushashun.»

³⁸ Pablum ichanga mana munaranchu ñaupata Panfilia quinranpita cuticushanpita, mana purishishanpita. ³⁹ Chay janan Pabluwan Bernabé apaycačhänacur raquicaran. Bernabíwan Marcos ishcanin bütíwan Chipre marcaman aywacuran. ⁴⁰ Pablum ichanga purishinanpaj Silasta pushacuran. Chaymi Antioquía irmänucuna imačüpis yanapaycunapaj Tayta Diosninchipa maquinman čhuraran. ⁴¹ Chaura Siria quinrančüpis, Cilicia quinrančüpis jutucaj irmänucunata shacyaycähir Pabluwan Silas puriran.

16

Timoteuta Pablo pushashan

¹ Chaypita Derbe marcaman, Listra marcaman čhayaran. Listra marcačhu Tayta Jesústa wiယacuj Timoteuwan tincuran. Timoteupa maman Israel warmi caran. Tayta Jesústapis manchapacuj. Papäninmi ichanga griego runa caran. ² Listra marcačhu irmänucunapis, Iconio marcačhu irmänucunapis Timoteuta allipa ricaran. ³ Griego runapa wamran carmi ichanga, jírucüni caran. Chaymi purishinanta munar Israel-masincuna mana jamurpänanpaj Timoteuta Pablo jírucachiran.

⁴ Chaypita Pabluwan-imá marcan-marcan purir, willaparan: «Jerusalén marcáchu Jesúspa cačhancunawan mayur irmänucuna parlanacushanta wiyacunquiman» nir.

⁵ Chayta wiyar jutucaj irmänucuna sumaj shacyäcuran. Waquin runacunapis waran-maylla Tayta Jesúspa shiminta čhasquicäriran.

Macedonia runata Pablo ricapacushan

⁶ Chaypita Asia quinranchú Pablo willapäcunanta Espíritu Santu mičhaptin, Frigia quinranpa, Galacia quinranpa aywar, ⁷ Misia marcapa mujunninman čhayaran. Bitinia marcaman aywayta munaran. Munaptinsi, Tayta Jesús cačhamushan Espíritu Santu mičharan. ⁸ Chaymi Misia uranpa yarpuran Tróade marcacaman.

⁹ Chay marcačhu puñuycaptin, Pabluta Tayta Diosninchí ricapacachiran. Macedonia marca runa mañacuycaran: «Yanapaycallämay. Macedonia marcaman shaycallämuy, ari» nir ¹⁰ Ricapacuyninčhu shiminta willacunäpaj Tayta Diosninchí pushaycämashanta tantiyacärishcä. Chaymi Macedonia marcaman aywanäpaj juclla camaricärirä.

Filipos marcačhu Pablo willacushan

¹¹ Chaura Tróade marcapita aywacur, Samotracia marcaman bütiwan čhayashcä. Warannin Neápolis marcaman čhayashcä. ¹² Chaypita Filipos marcemannā čhayashcä. Filipos marca Macedonia quinranpa jatun marcan car, Roma runacunapa marcan caran. Chay marcačhu juyapärishcäraj.

¹³ Diyawarda junaj captin, Tayta Diosninchita mañacunanjaj Israelcuna jutucänanta yarpar, mayu cantunman aywarä. Warmicunallata jutucashta tarir, Tayta Diosninchipa shiminta willaparä. ¹⁴ Chayčhu juturaycaran mama Lidiapis. Payga Tiatira marcapita caran. Achic-achicyaycaj rusillaman tiñish bayitacunata ranticuj. Manchapacuj warmi captin, Tayta Diosninchí shacyächiran Jesúspa shimin shungunman čhayananpj. Chaymi Pablo willapäcushanta cushish čhasquicuran. ¹⁵ Chaymi llapan yawar-masintin ushyacuran. Jinarcur nimaran: «Tayta Jesústa llapan shungüwan wiycushäta musyanqui. Wasíman aywashun. Pachächishayqui» nir imanaypapis wasinman pushamaran.

Pablutawan Silasta carsilashan

¹⁶ Juc junaj Tayta Diosninchita mañacuj aywarcaycashäčhu supay maquichacushan jipashwan tincurä. Supaypa maquinčhu purir, llapanta musyaj. Tucuya musyapacur, mandajnincunata chay-chica jillayta gänachij.

¹⁷ Chay jipash jipäta japaraycar puriran: «Paycuna Llapanta Camaj Tayta Diosninchipa maquinčhu cawan. Tayta Diosninchí jishpichishunayquipaj willacuycan» nir.

¹⁸ Chaynuylla waran-warán umäta nanächiran. Alläpa umäta nanächiptin, ičhiycur, Pablo piñacuran: «Supay, cay jipashta cačhariy. Jesucristu nishannuylla jarguj» nir. Jarguptin, jipashta supay cačharycuran.

¹⁹ Chaura jipashpa mandajnincuna mana gänarannachu. Jillay maquinman mana čhayaptin Pablutawan Silasta charircur, auturdäpa dispächuman aparan.

²⁰ Auturdäman čhayarcachir, niran: «Caycuna Israel runa. Marca-masinchicuna ticrapanacunanjaj shimiaycan. ²¹ Yarpashanchita pampaman čhurar, quiquin yarpashanta yačhacunanchita munan. Munaptinpis, mana čhasquishunpächu. Roma runa caycar, ¿imapätaj wiyaycäshunpis?»

²² Niptin, llapan runa Pablutawan Silasta chiquipacarcäriran. Ullgucaycäriran. Chaymi auturdäcunapa shiminta wiyaycur, jalapačhacur Pablutawan Silasta sumaj wascaran. ²³ Wascayta ushyariycur, carsilman wičhgaycuran. Carsil täpaj runapa maquinman čhurarán: «Sumaj ricanqui. Jishpirunman» nir. ²⁴ Chaymi carsil täpaj Pablutawan Silasta sumaj rurimanraj wičhgaran. Čhaquincunatapis jirucunawan amurcachiran.

Carsilpita Silastawan Pabluta jishpichishan

²⁵ Pullan-pagasna carsil junta Pabluwan Silas alabansacunata cantaycaran. Tayta Diosninchitapis mañacurcaycaran. Llapan wičhgarajcunapis wiyaycaran. ²⁶ Niycaptillan, illajpita pacha sicsicyaran. Pacha sicsicyaptin, carsiltapis cuyurachiran. Llapan puncucunapis quičacäcuran. Carsilčhu wičhgarajcunata watarächishan cadinacunapis pascacäcuran.

²⁷ Carsil täpaj runa ricchapacurir, llapan puncu quičharaycajta ricaran. Chaymi wičhgarajcuna jishpicushanta yarpar, cuchilluwan tucsicuriyta munaran.

²⁸ Wañuchicuya munaycaptin, Pablo jayacuriran: «Ama tucsicuychu. Pipis mana jishpishachu» nir.

²⁹ Niptin, täpaj-masincunata niran: «Achquita ratachimuy.» Achquita ratachipuntinga, sicsicyaycar juclla aywarcur, Pablupa Silaspa ñaupanman jungurpacuycuran.

³⁰ Jinarcur, jucläman pusharcur tapuran: «Taytacuna, ¿imataraj ruräman Tayta Diosninchipa maquinčhu cawanäpaj?» nir. ³¹ Paycuna niran: «Tayta Jesúspa shiminta čhasquicuptiqui, Tayta Diosninchipi jishpichishunquipaj. Llapan yawar-masintiqui Tayta Diosninchipa maquinčhu cawanquipaj.»

³² Chaynuy nir wasinpa carsil täpaj runata Tayta Diosninchipa shiminta willaparan.

³³ Willapaptin, Pablupawan Silaspa janan račhir ushyash captin, juclla jampipuran. Chay chacaylla wasinpa ushyacuranpis. ³⁴ Wasinman pusharcur jararan. Tayta Diosninchipa shiminta čhasquicushanpita cushicuywan juc shungulla micupacäriran.

³⁵ Pacha wararcuptin, auturdäcuna carsilman murucucunata cačharan Pablutawan Silasta cačhariycunapaj. ³⁶ Chaura carsil täpaj runa Silastawan Pabluta willaran: «Cačhariycunajpaj auturdäcuna willachimasha. Chaymi mana manchacullar llucshicuy» nir.

³⁷ Pablum ichanga čhayaj murucucunata niran: «Nuwacuna Roma runa caycä. Mana tapumällar, llapan runapa ricay ñawinčhu wascar ushyamasha. Wičhgachimasha. Jinarcur pacayllapa cačhariycamaya munaycäman, ¿au? Munaptinpis, mana llucshishächu. Wičhgachimashannylla quiquincunaraj jurgamächun.»

³⁸ Chaynuy niptin, cutircur auturdäcunata willaycuran. Roma runa cashanta mayar, auturdäcuna mancharicäcuran. ³⁹ Chaymi Pablutawan Silasta carsilpita jurgurcur, niran: «Taytacuna, mana musyayniwan llutanta rurashcä. Cananga cay marcapita aywacuy, ari.»

⁴⁰ Carsilpita llucshirir, mama Lidiapa wasinman čhayaran. Llapan irmänucunata shacyächipärir, aywacuran.

17

Tesalónica marcačhu Pabluta ticrapushan

¹ Aywacur, Pabluwan Silas Anfípolis marcaman, Apolonia marcaman čhayaran. Chaypita Tesalónica marcaman čhayaran. Chayčhu Israel runacunapa shuntacäna wasin caycaran. ² Yačhacash car, shuntacäna wasiman Pablo aywaran. Quimsanin diyawarda junajcunačhu Tayta Diosninchipa shiminta tantiyachicuran: ³ «Washäcuj wañunanraj, cawarimunanraj caran» nir. Chaycunata sumaj tantiyachicur niran: «Jesúsmi Tayta Diosninchipi cačhamushan Washäcuj caycan. Paypita willapashcay.»

⁴ Sumaj willapaptin, waquin Israel runacuna Jesúspa shiminta čhasquicuran. Pabluwanpis, Silaswanpis jutucaran. Paycunawan waquin mama-warmicunapis, achcay jäpa runacunapis jutucaran. Jäpa runacuna Tayta Diosninchita manchapacuj.

⁵ Jesúspa shiminta mana čhasquicay mayur Israel runacunam ichanga chiquicuywan juyupa ullgucaycäriran. Chaymi jilla runacunatawan chiqui runacunata mincacuran: «Llapan runata shimiyyay Pablupawan Silaspa cunčhan jatarinanpaj» nir. Mincacushan runacuna Jasónpa wasinman čhayapuran. Pablutawan Silasta chariyta munaran

ullgush caycaj runacunapa maquinman churananpaj. ⁶ Chaura pacharashanchu mana tarir, wasiyuj Jasontawan waquin irmänucunallata jancharcur-jancharcur auturdäcunaman aparan. Chayaycähir, japariypa niran: «Cay runacuna marcanmarcan runacuna ticrapanacachiyllachu aruycan. Marcanchimanpis chayamushana. ⁷ Jucshi mandamajninchu. Jesus nishansi mandamajninchu» nircaycan. Roma mandamajninchipa shimentapis pampaman churarcaycan. Chay ticrapanacachicujta cay Jasónraj pachächishapis.»

⁸ Chaynuy niptin, mandajnintin llapan runa ticrapanacuran. Ullgucarcäriran. ⁹ Chaymi jillayta jutupaycuptinraj, irmänucunatapis, Jasontapis, auturdäcuna caçhariran.

Berea marcačhu Silaswan Pablo willapäcushan

¹⁰ Chaura chacarcuptillan, Berea marcaman irmänucuna Pablutawan Silasta caçharcuran. Berea marcaman chayar, Israeltunapa shuntacäna wasinman aywaran. ¹¹ Tesalónica runacuna juyu captinsi, Berea runacuna alli shungu caran. Pablo willapäcushantapis cushish wiyan. Ichanga waran-waran Tayta Diosninchipa shimenta liguiran tincuchinanpaj. Willapashan rasunpa cashantapis, mana rasunpa cashantapis sumaj tincuchiran. ¹² Chay marcačhu Israel runacunapis achcajmi Tayta Diosninchipa shimenta chasquicäriran. Jäpa mama-warmicunapis, jäpa mayur runacunapis chasquicuran.

¹³ Chaura Berea marcačhu Pablo willacushanta mayar, Tesalónica marcapita mayur Israel runacuna aywapuran. Chayar, runacunata shimiyan Pabluta ticrapunanpaj. ¹⁴⁻¹⁵ Chaymi irmänucuna Pabluta jishpirachiran lamarpa cantullanpa aywacunapuraj. Yanagajnincunapis Atenas marcacaman aywähiran. Berea marcačümi ichanga Silaswan Timoteo juyapäriran. Chaymi Atenas marcapita cutircamur, Pablupa yanagajnincuna niran: «Silas, Timoteo, jucilash Atenas marcaman aywanqui.»

Atenas marcačhu Pablo willapäcushan

¹⁶ Atenas marcačhu Silastawan Timoteuta shuyar, Pablo ricapacur puriycaran. Jircapa jaracunanta achcata ricar, juyupa llaquicuran. ¹⁷ Chaymi shuntacäna wasičhu Israeltunawapuraj, Tayta Diosninchita manchapacuj jäpa runacunawapuraj tapunacuj. Läsačüpis waran-waran tincushan runata tantiyachij.

¹⁸ «Epicúreos» nishan yačhajcunawapuraj, «Estoicos» nishan yačhajcunawapuraj tapunacuj. Chaura Tayta Jesúspita Pablo willapäcuptin, wañushcuna cawarinanta willapäcuptin, apaycačhänacuran: «¿Imataraj cay runa rimacunsi?» nir. Waquinnam ichanga niran: «Mana ricsish jircacunapitačhi willacucuycan.»

¹⁹ Chaura «Areópago» nishan pachačhu sisyunman pusharcur, tapuran: «¿Ima willapatataj puriycächinqui, unaypita-pachachu, jipatarächu? ²⁰ Rimashayquita imaypis mana wiyarüchu. ¿Tantiyachimanquimanchu?» nir. ²¹ Chay Atenas marcačhu jinan runapis, jäpa runacunapis jipa willapäcunata ashillar cawaj.

²² Chaymi Areópago sisyunčhu llapanta tantiyachir Pablo niran: «Atenas taytacuna, mä, sumaj wiyaycallämäy. Jamcuna jircacunata sumaj manchapacunqui. ²³ Marcayquipa purir, jircapa jaracunatapis, capillancunatapis ricapashcä. Juctapis tarishcä. «Mana ricsishanchi Taytanchipa capillan» nir isquirbiraycan. Chaura pii cashantapis mana musyaycarsi, manchapacuycanqui. Cananga paypita willapäcuycä. ²⁴ Cay pachatapis, llapan imacunatapis Tayta Diosninchu camaran. Paypa maquinčümi janaj pachapis, cay pachapis caycan. Chaymi runa rurashan wasita mana wasichacunchu. ²⁵ Runacuna yanapänanpaj imancunapis mana pishinchu. Quiquinmi cawachi-majninchu. Paypita cawanchi. Alli cawananchipaj llapanta tarichimanchi.

²⁶ «Tayta Diosninchu juc runallapita chay-tucuyčhu marcayächisha. Mayčhu yurianchipäpis, imaycaman cawananchipäpis camacächin. ²⁷ Llapantapis camacächiran

yarpačhacurir-yarpačhacurir pii cashantapis musyananchipaj. Yatayllapa ashishanjina tantiyacuya munar, rasunpa Tayta Diosninchia cashanta tantiyacushun. Payga ricaycämanchi. ²⁸ Yurinanchipäpis, arunanchipäpis, cawananchipäpis, paymi camacächin. Chaychi unay willapa rimajniquiricunapis nirian: «Chay taytallapita caycanchi.» ²⁹ Rasunpa Tayta Diosninchipa wamran caycar, runa rurashancunata ama taytachacushunchu. Runacuna yarpačhacurir-yarpačhacurir jircapa wasintapis tucuy-nirajta ruran jurillapita, jillaylapita, rumillapita.

³⁰ «Ñaupata runacuna mana musyayninwan juchata ruraptinpis, Tayta Diosninchia mana rimacuranchu. Cananmi ichanga may-chaychüpis runacuna jucha aparicushan-pita wanacunanta, shiminta wiycunanta munaycan. ³¹ Juc junaj llapan runapa juchanta Tayta Diosninchia jurgapanga. Juchanchita jurgapämänanchipaj shuyninpa Jesústa acracusha. Acracushanta musyananchipaj wañushanpita cawarachimusha.»

³² «Wañushanpita cawarachimusha» niptin, waquin runa asipar ushyaran. Waquinna juc junaj wiyananpaj jitapuram. ³³⁻³⁴ Waquin runacunam ichanga Pablo willapäcuption, Tayta Jesúspa shiminta chasquicuran. Chaura Pablo sisyunpita llucshicuptin, aywähiran yačhaj Dionisiupis, mama Damarispis, waquin irmänucunapis. Dionisiuga «Areópago» nishan pachačhu llapan runata tantiyachij.

18

Corinto marcačhu Pablo willapäcushan

¹ Chaura Atenas marcapita aywacur, Corinto marcaman Pablo chayaran. ² Israel-masin Aquilawan tincuran. Aquilapa warmin caran Priscila. Aquilaga Ponto marcapita caran. Chaypis mandaj Claudio llapan Israel runacunata Italia quinran Roma marcapita jarguchiuptin, aywacuran. Chayraj Corinto marcaman chayash caran. ³ Aquila purichina jiru čhaqui wasi tuldua jiraj. Pablupis wasi tuldua jiraptin, iwal juyar Aquilawan yanapänacuran. ⁴ Diyawardacunačhüna Israelpuna shuntacäna wasinman aywaycur, Tayta Jesúspa shiminta Pablo sumaj tantiyachiran. Israel runacunatapis, jäpa runacunatapis aunichiyta munaran.

⁵ Macedonia marcapita Silaswan Timoteo chayamuptin ima ruraynintapis cačhariycura, Israel runacunata Pablo willaparan: «Jesúsga Tayta Diosninchia acracushan Washäcujninchii» nir. ⁶ Willapaptinpis Israel runacuna wiycuya mana munar, Pabluta ashllir ushyaran. Ashllir ushyaptin, müdananta tapsir ushyashpan piñacuran. «Cananga quiquipuquicunapita ñacaymanpis chayanquipaj. Imaman chayaptiquipis, ama jitapamanquichu. Cananpita jäpa runacunata Tayta Diosninchipa shiminta willapäshaj» nir aywacuran.

⁷ Shuntacäna wasipita aywacur, Pablo chayaran Tito Justupa wasinman. Payga Tayta Diosninchita manchapacuj runa caran. Wasinpis shuntacäna wasi wajtallančhu caran.

⁸ Chay shuntacäna wasipa mayur runa Crispupis wasinpa Tayta Jesúspa shiminta chasquicäriran. Waquin Corinto runacunapis Pabluta wiyan, Tayta Jesúspa shiminta chasquicäriran. Payman yupachicur, ushyacäriran.

⁹ Juc chacay ricapacuynillančhu Pabluta Tayta Jesúsniran: «Pablo, imatapis ama manchacuychu. Shimiquita ama amucurcuychu. Shimüta willapäcamuy. ¹⁰ Maquicchu puriptiqui, pipis mana imanäshunquipächu. Cay marcačhu acracushä runacuna achcajmi.»

¹¹ Chaymi wata pullanninraj Corinto marcačhu Pablo juyapäriran Tayta Diosninchipa shiminta tantiyachicur.

¹² Mandaj Galiónpa maquinčhu Acaya marcacuna caycashan wican Israel runacuna Pabluta ticrapacurcuran. Charircur, Galiónpa dispächunman aparan: ¹³ «Cay runa: «Tayta Diosninchita alliman churashun» nirpis, mandajninchipa shiminta pampaman churaycan» nir.

¹⁴ Chaura Pablo chapacunanpaj caycaptin, Mandaj Galión niran: «Israel runacuna, cay runa llutanta rurash captin, wañuchicush-imá captin, shimiuita wiyáman. ¹⁵ Ninshinshi-jananmi ichanga, Moiséspa shimin-janan piñanacushayqui-jananmi ichanga, wiyyatapis mana munáchu. Quiquiquicunalla ushyacächinquiman.» ¹⁶ Chaynuy nir dispächunpita llapanta jarguriran. ¹⁷ Jarguriptin, dispächu puncullaáchu Sóstenesta magapäcuran. Payga shuntacána wasíchu mayur runa caran. Chaypis mandaj Galión mana imasi jucuranchu.

Antioquía marcaman Pablo cutishan

¹⁸ Corinto marcaáchu unaylla Pablo juyapäriran. Chaypita llapan irmänucunata wamayaycur, Cencreas marcaman aywacuran. Cencreas marca lamar cantullanáchu caran. Aquilapis warmin Priscilawan aywáshiran. Siria quinranman mana llucshillar, Cencreas marcallaáchu Pablo ajchanta rutucuran: «Tayta Diosninchawan parlanacushäta charcushcána. Payga sumaj washämasha» nir. Chaynuy nir bütiman jigarcur, aywacáriran. ¹⁹ Éfeso marcaman chayar, warmintinta Aquilata jaguiycuran.

Chay marcaáchu shuntacána wasíchu Israel runacunawan Pablo tapunacuran. ²⁰ Israel runacuna Pablo unaylla juyapärinanta munaran. ²¹ Munaptinsi, Pablo niran: «Juyaya mana camäpacüchu. Tayta Diosninchí camacächiptinmi ichanga, imayllapis cutimushaj.» Chaynuy nir Éfeso marcapita bütowan aywacuran. ²² Cesarea marcaman chayar, Jerusalén marcaman aywaran jutuaj irmänucunata wamaya. Jinarcur Antioquía marcaman cuticuran.

Jesúspita willacunanpaj Pabluta yapay caächacushan

²³ Antioquía marcaáchu unaylla juyapäriran. Chaypita unay chayashan marcacunaman yapay watucuj Pablo cutiran. Galacia quinranmanpis, Frigia quinranmanpis cutiran. Marcan-marcan purir, llapan irmänucunata sumaj shacyächiran.

²⁴ Chay wíchan Alejandría marcapita Éfeso marcaman Apolo jutiyuj runa chayaran. Payga Israel runa caran. Rimaytapis sumaj yačhaj. Tayta Diosninchipa shímintapis sumaj tantiyaj. ²⁵ Tayta Jesúspita sumaj yačhacuran. Chaymi llapan shungunwan Jesús pí cashantapis tantiyachicuran. Ichanga Ushyachicuj Juanpa shímillantaraj Apolo musýaran.

²⁶ Juc cuti shuntacána wasíchu Apolo llapan shungunwan willapäcuycaran. Chayta wiyar, Aquila warmintin shuyninpa wasinman pusharan. Aquilapa warmin caran Priscila. Jinarcur mana musyashancunata sumaj tantiyachiran. Tayta Diosninchipa maquináchu imanuy-imanuy cawanapäpis willaparan. ²⁷ Chaypita Acaya quinranman Apolo aywacuya munaptin, irmänucuna shacyächiran. Acaya quinranáchu irmänucunamanpis cartacuran: «Apolo Tayta Diosninchipa shíminta sumaj tantiyachicun. Llapana shunguyquiwan chasquicáriy, ari» nir. Allipaj chay marcaman Apolo chayaran. Tayta Diosninchí yanapaptin, irmänucunata sumaj shacyächiran. ²⁸ Israelmasincunam ichanga tincuparan: «Jesús mana Washäcuñinchichu» nir. Chaypis llapanpa ricay ñawináchu Tayta Diosninchipa shíminta liguipar, Apolo tantiyachiran: «Jesúsga rasunpa Washäcuñinchí» nir.

19

Éfeso marcaáchu Pablo willacushan

¹ Chaura Corinto marcaáchu irmänu Apolo juyashan wíchan Pablo puntan-puntan quinranpa aywar, Éfeso marcaman chayaran. Irmänucunawan tincur, tapuran: ² «Tayta Jesúspa shíminta chasquicuptiqui, ¿Espíritu Santu charicurcushcashunquichu?» nir.

Chaura paycuna niran: «Espíritu Santu runacunata charishanta mana imaypis wi-yarüchu.» ³ Pabluna tapuran: «Chaura, ¿pipa shiminta wiyacushpayquitaj ushyacush-canqui?» nir. Paycuna niran: «Ushyachicuj Juanpa shiminta willapämaptillan, ushy-acärishcä.»

⁴ Chaura Pablo niran: «Ushyachicuj Juan runacuna juchapita wanacuptinraj, ushyachiran. Ichanga quiquin Juan niran: «Mana Washäcujuh cä; payga jipätaraj shamunga. Paypa shiminta čhasquicunquiman.» Chaynuy nir Tayta Jesús shamunanpaj rimaycaran.»

⁵ Chaura Pablupa shiminta wiyacur, Tayta Jesús nishannuya ushyacuran. ⁶ Jinarcur irmänucunapa umanman maquinta čhuraycur, Tayta Diosninchita Pablo mañacuran. Mañacuptin, Espíritu Santu charicurcuran. Charicurcuptin, juc casta rimaycunata rimaran. Tayta Diosninchchi yarpächishantapis musyachicuran. ⁷ Runacunaga čhunca ishcaywan-yupay (12) juturpaycaran.

⁸ Chaura Éfeso marcačhu juyar shuntacäna wasiman aywarcur-aywarcur, quimsa quillantin Pablo tantiyachicuran Tayta Diosninchipa maquinčhu cawanapaj. Mana manchacullar imanuypapis aunichiyta munaran. ⁹ Tincupäcujcunam ichanga chapatá rurar, llapan runata shimiyan: «Chay mushuj willapawan pantachishunquipaj.» Chaynuy niptin llapan irmänucunata pushacurcur, «Tiranupa» nishan runapa shuntacäna wasinman Pablo witicuran. ¹⁰ Ishcay watantin willapäcuptin, Asia quinran llapan Israel runacunapis, jäpa runacunapis Tayta Jesúspa shiminta wiyash caran.

¹¹ Tayta Diosninchchi camacächiynipa Pablo jishyačhucunata allchacächiran. Supaycunatapis jarguran. ¹² Chaymi Pablupa müdananta imallantapis apacuran jishyačhucunata allchacächinapaj. Čhayachiptin, jishyačhucuna allchacäcuran. Supaycunapis cačharycuran.

¹³ Chay wíchan ishcaj-quimsaj Israelecuna supayta jargur puriran. Paycunapis Tayta Jesús nishannuya supaycunata jarguya munar, niran: «Pablo willacushan Tayta Jesúspa jutinwan jargushayqui. Cay runata cačharyi» nir.

¹⁴ Chayta ruraycaran cüra Escevaspa jančhis ullgu wamrancuna. Escevasga Israel runacunapa mayur cüran caran. ¹⁵ Juc junajmi ichanga Jesúspa shiminčhu jarguya munaycaptin, supay niran: «Jesústa ricsi. Pablo pí cashantapis musyä. Jamcuna, ¿pitaj canqui jargumänayquipaj?» ¹⁶ Chaynuy nir supay puillacushan runa ullgucäcuran. Llapanta charircur, magar ushyaran. Chaura Escevaspa wamrancuna jalapačhalla, yawarlla wasipita jishpicärran. ¹⁷ Éfeso marcačhu chaynuy cashanta mayar, Israel runacunapis, jäpa runacunapis llapallan manchariran. Tayta Jesús sumaj munayniyuj cashanta tantiyaycur, alliman čhuraycärran.

¹⁸ Chaymi waquin irmänucuna jucha aparicushanta mana chapacuranchu. Llapan wiyyay willacuran. ¹⁹ Musyapacujcunapis llapan runapa ricay ñawinčhu chapata ruracunap libruncunata rupachiypa ushyaran. Chay librucunapa čhaninta yupaptin, pichga čhunca waranga (50,000) junaj runa arushanpa čhaninman čhayaran.

²⁰ Chaynuya Tayta Jesúspa shimin chay-tucuyčhu mayacaran. Munayniyuj cashantapis runacuna sumaj tantiyacuran.

²¹ Chaypita Pablo yarpačhacuran: «Macedonia quinrančüpis, Acaya quinrančüpis irmänucunata watucurishaj. Jinarcur Jerusalén marcaman cutishaj. Chaypita Roma marcaman aywayta camashaj» nir. ²² Chaynuy yarpar, willacäshij-masin Timoteutawan Erastuta ñaupachiran Macedonia marcacunaman. Quiquin Pablum ichanga Asia marca-cunallačhüräj juyapäriran.

Éfeso marcačhu Pabluta ticrapushan

²³ Chay wíchan Jesúspa shimin-janan Éfeso runacuna apaycačhäncar, ullgucaycärran.

²⁴ Ullgucarcärinanpaj jillay tacaj Demetrio juchayuj caran. Payga jillaypita tacaj acapalla Artemisapa capillanta-niraj. Tacapacujcuna jillayta sumaj tariran.

²⁵ Juc junaj arüshijnincunatawan llapan tacaj-masincunata shuntaycur; Demetrio niran: «Tacapacushanchi jillayllawan cawashanchita musyanqui. ²⁶ Canan ricay ñawiquíchu Pablo willapäcuycan: «Runa rurashan capillaga mana munayniujchu» nir. Willapäcushanta cay Éfeso marcanchiçüpis, Asia marcacunaçüpis mayna runacuna aunisha. Rurashanchi capillata mana manchapacunnachu. ²⁷ Yargayman ñhayachimäshun. Acapalla capilla rurashanchicunata pipis mana rantinganachu. Mamanchi Artemisatapis, capillantapis runacuna mana manchapacunganachu. Payta llapan runa manchapacuj Asia marcanchicunaçüpis, may-chayçüpis.»

²⁸ Demetrio chaynuy niptin, tacaj-masincuna juyupa ullgur japarpararan: «Mamanchi Artemisallata alliman ñurashun. Payga munayniujmi. Éfeso runacunapa mamanmi» nir. ²⁹ Japarpaptin, llapan runa ullgucaycäriran. Tincuypa-tincuycashanchu Aristarcutawan Gayuta charircur, läsaman jançharan. Macedonia marcapita Aristarcuwan Gayo Pabluta yanagämuran.

³⁰ Yanaguincunata charishanta mayar, nanachicunapaj Pablupis aywayta munaran. Munaptinpis, puríshijnincuna miçharan. ³¹ Asia marcapa waquin mandajnincunapis Pabluwan yaçhänacur, imamanpis mana jaticänanpaj willachiran. ³² Chaura läsaçhu waquin runa wichaypa-uraypa japarpaptin, marca runacuna imapita tincuypatincushantapis mana tantiyaranchu. ³³ Chaymi waquin mayur Israel runacuna Alejandro jutiyuj runata ñaupaman jayaycur, rimachiran. Chaura Alejandro llapan runata tantiyachinanpaj maquinwan upällachiran. ³⁴ Alejandro Israel runa cashanta musyar, ishcay üra-ima juc shimilla llapan Éfeso runacuna japarpararan: «Mamanchi Artemisallata alliman ñuralläshun. Payga munayniuj. Éfeso runacunapa maman» nir.

³⁵ Chaura Éfeso auturdäcunapa isquibänun llapanta upällaraycachir, niran: «Marca-masicuna, wiaycallämay. Marcanchiçhu Mamanchi Artemisa juyashanta llapan runa musyan. Capillantapis sumaj rican. Mamanchi-niraj janaj pachapita shicwamushantapis musyan. ³⁶ Pipis mana wasguipanmanchu. Chaymi manacajllapäga ama tin-cupänacushunchu. Imata rurananchipäpis sumajraj yarpaçhacushun. ³⁷ Jançhamushayqui runacuna Mamanchi Artemisapa capillanta mana suwashachu. Pampamanpis mana ñurashachu. ³⁸ Demetriuwian tacaj-masincuna piwanpis dimandanacuya munar, auturdäcunaman aywachun. Quiquincuna nanachicuchun. ³⁹ Manchäga shuyninpa auturdäcunata jayarcachir, imatapis parlanacärichun. ⁴⁰ Canan tincuypa-tincushanchi mana allichu. Mayur mandajninchicuna mayar, ticrapanacushanchita yarpanga. Tapumaptinchi, imanuypa chapacuytapis mana camäpacushunpächu.» ⁴¹ Chaynuy piñacuriycur, llapan runata wasinman-caman cutircachiran.

20

Macedonia quinranpa, Grecia quinranpa Pablo purishan

¹ Chaura runacuna tincuypa-tincushan ñawacäcuptin, llapan irmänucunata jayaycachir, Pablo anyaparan. Jinarcir: «Aywallä» nir Macedonia quinranman aywacuran. ² Aywacur, ñhayashan marcacunaçhu Tayta Jesústa wiyacuj irmänucunata sumaj shacyächiran. Chaypita Grecia quinranman ñhayaran. ³ Chay marcaçhu quimsa quilla juyapäriran. Chaypita Siria quinranman bütowan aywacunapaj caycashançhu, mayur Israel runacuna wañuchinanpaj yarpapashanta mayaran. Chaymi ñchaquillapana Macedonia quinranpa Pablo cuticuran.

⁴ Cuticupti, yanagämaran Sópatros, Aristarco, Segundo, Gayo, Timoteo, Trófimo, Tíquico. Sópatrosga Berea marcapita caran. Papäninpa jutin caran Pirro. Aristarcuwan Segundo, Tesalónica marcapita caran. Gayo, Derbe marcapita. Trófimuwan Tíquico, Asia quinranpita caran. ⁵ Yanaguicuna Tróade marcaman ñaupacuran. Chayllaçhu Pablutawan ishcanita shuyarämaran.

⁶ Libadüraynaj tanta micuna fiesta ushyacäcuptinraj, Filipos marcapita bütowan aywacärirä.* Pichga junajllata yanaguicunata tariparä. Tariparcur, Tróade marcachu juc simäna juyapärirä.

Troas marcachu Pablo willacushan

⁷ Chaura dumingu chacay irmänucunawan jutucarä micupacunäpaj, tantata paquipacur mallichinacärinäpaj.* Warannin aywacunan captin, pullan-pagascaman Pablo willapäcuran. ⁸ Juturashä wasiga ishcay altusyuj caran. Achquicunapis rataycaran. ⁹ «Eutico» nishan müsupis wasipa bintänanéchu jamaraycaran. Pablo pullan-pagascaman willapäcuptin, puñunawayan ñipchit-ñipchityaycaran. Puñucäcur, ishcay janay altuspita shicwacamuran. Jatarachij chayaptin, wañushana caycaran.

¹⁰ Chaura Pablo yarpuriycur, müsuta margacurcuran. Irmänucunatapis niran: «Ama llaquicuychu. Cawaycanmi.» ¹¹ Jinarcur altusman jigarcur, Pablo tantata paquircur-paquircur mallichimaptin, llapaní micurä. Payga pacha warashancaman willapäcuran. Chaypita aywacuran. ¹² Waquin irmänucunana cawaycajta müsuta wasinman pushacuran. Chaypita llapan irmänucunapis jatunpa cushicäriran.

Mileto marcaman Pablo aywashan

¹³ Jinarcur bütowan ñauparcur, Aso marcachu Pabluta shuyarparä. Payga yarpashanta charcur, chayquillapa shamuran. ¹⁴ Aso marcachu Pabluwan tincur, bütowan llapaní Miti-lene marcaman aywacärirä. ¹⁵ Warannin Quíos marca chimpanpan chayará. Chaypita bütü iúchinan Samos marcaman chayará. Waranin Trogilón marcachu iúchipärir, Mileto marcaman chayará.

¹⁶ Asia quinranéchu Pablo juyapacayta mana munaptin, Éfeso marcaman mana chayallar, aywacärirä. Camäpacur, «Pentecostés» nishan fiestallapaj Jerusalén marcaman chayaya munaran.

Éfeso marcachu mayur irmänucunata Pablo willapashan

¹⁷ Chaura Mileto marcallapita Éfeso marcachu mayur irmänucunata Pablo jayachiran. ¹⁸ Chayamuptin, niran: «Irmänucuna, chayamushäpita-pacha imanuy Asia quinranéchu cawashäta musyanqui. Ricay ñawiquíchu purishcä. ¹⁹ Mana yaúhaj-tucullar Tayta Jesúspa mandunta rurashätapis musyanqui. Israel-masicuna chiquipämaptinpis, ñacachimaptinpis, wagashallawan ushyaräcun. ²⁰ Jamcunata willapänajpaj yarpashäcunata mana imatapis pacashcächu. Manchäga wasin-wasin, llapan wiyay willapashcä. ²¹ Israel runacunatapis, jäpa runacunatapis jucha aparicushanpita wanacur Tayta Diosninchipa maquinéchu cawananpaj, Tayta Jesúspa shiminta chasquicunapaj tantiyachishcä.

²² «Cananga Espíritu Santu apamaptin, Jerusalén marcaman aywaycä. Imaman chayanätapis mana musyärächu. ²³ Maypa puriptipis, Espíritu Santu musyachiman ñacanalläta, carsilman chayanalläta. ²⁴ Ñacanäta musyarpis, mana llaquicüchu. Wañuyman chayarpis, Tayta Jesús nimashanta charcunä. Chaymi cawashäcaman Tayta Diosninchipi llaquipäcu cashanta pii-maytapis willapänä.

²⁵ «Marcayquicunapa purir, Tayta Diosninchipa maquinéchu cawanayquipaj willaparä. Cananpitam ichanga mana ricamanquipänachu. ²⁶ Llapaniquita willapashcaj. Cananga quiquipitana imamanpis chayanquipaj. ²⁷ Tayta Diosninchipi yarpashancunata llapanta willapashcaj. Imatapis mana pacashcächu. ²⁸ Irmänucuna, quiquipitunapis wiyacunquiman. Mayur irmänu captiqui, uyshata alli ricashan-jina jutucaj irmänucunatapis ricanquiman. Maquiquíchu cawan. Sumaj ricanayquipaj carguyquiman Espíritu Santu

* **20:6** Israel runacuna Egípto marcapita Tayta Diosninchipi jishpichishanta yarpärir: «Ima allish Tayta Diosninchipi washämanchi» nir libadüraynaj tantata micuj. * **20:7** Griego rimaychü: «Simäna jallarij junaj» niptin, waquin runa tantiyan sábadu junaj cashanta, waquinna dumingu junaj cashanta. Israel runacunam ichanga sábadu junaj chakanaycaptin, inti jigarpuycaptin: «Juc junaj jallariycan» nir ricsij.

́churashcashunqui. Paycunata Tayta Diosninchipa wamrachacusha Wawan Jesúus wañuyman ́chayaynina.

²⁹ «Aywacupti, micucuj liyun-jina pantachicujcuna shamunga irmänucunata ñacachir ushyacächinanpaj. ³⁰ Waquin pantachicujcuna irmänu-masillayquipita jataringa. Maquilanchu purichinanpaj: «Allita rimä» nir irmänucunata riguichinga. ³¹ Chaymi quiquipu-pura sumaj michinacunqui. Quimsa watantin pagas-junajta wiguiipawan willapashäcunata jungarunquiman. Llapaniquita willapashcaj.

³² «Irmänucuna, Tayta Diosninchipa maquinman ́churaycaj. Paypa shiminta sumaj willapashcaj. Sumaj llaquipäcuj cashpan yanapamäshun shungun munashannuy cawananchipaj. Aunishan irinsata tarichimashpanchi ñaupallanchu llapan wawancunata cawachimäshun.

³³ «Nuwa mana pipa jillaynintapis, jurintapis, müdanantapis munapashcächu. ³⁴ Manchäga quiqui arushcä. Chaymi yanaguicunatapis, quiquiitapis mana imapis pishimashachu. Llapantapis musyanqui. ³⁵ Nuwa-jina arur, pishipacujcunatapis yanapänayquipaj willapashcaj. Quiquin Tayta Jesúspis tantiyachimashcanchi: «Mañapacur, llaquicunchi. Tarichicurmi ichanga, cushicunchi» nir.»

³⁶ Pablo rimayta ushyariycur, irmänucunawan jungurpacaycärir, Tayta Diosninchita mañacuran. ³⁷ «Aywallä» niptin, llapan macallanacurcur-macallanacurcur wagapäcuran. ³⁸ «Cananpita mana ricamanquipänachu» nishanpita llapan llaquicuran. Llaquicursi, büti caycashan-cajcaman yanagaran.

21

Jerusalén marcaman Pablo cutishan

¹ Chaura irmänunchicunata: «Aywallä» nir bütiman jigarcur, aywacurä. Cos marcaman ́chayarä. Warannin junaj Rodas marcaman ́chayarä. Chaypita Pátara marcaman ́chayarä. ² Pátara marcapita Fenicia marcaman büti llucshiycajta tarir, jigacarcärirä. ³ Siria quinranman aywar, wac chimpanchu Chipre marcata ricarä. Chaypitaraj Tiro marcaman ́chayarä. Chaychu apashan jipicunata büti jaguiycuran. ⁴ Irmänunchicunawan tincurmi ichanga, janchis junaj juyapärishcä. Paycuna Espíritu Santu musyachiptin, Pabluta miçharan: «Jerusalén marcaman ama aywaychu, ari» nir.

⁵ Chaura juyanä junaj ́charcupin, irmänunchicuna warmintin, wamrancunawan marcampita lamar cantuncaman yanagämaran. Paycunawan jungurpacaycärir, Tayta Diosninchita mañacurä. ⁶ Jinarcur: «Aywallä» nir bütiman jigarä. Paycunam ichanga wasinman-caman cuticäriran.

⁷ Chaypita Tiro marcapita aywacur, Tolemaida marcaman ́chayarä. Chaycamailla yacupa aywarä. Chay marcachu irmänunchicunawan wamayänacur, juc junaj juyapärishcä. ⁸ Warannin junaj aywacur, yanaguicunawan Cesarea marcaman ́chayarä. Chay marcaman ́chayar, Jesúspita willacuj Felipipa wasinchu pachacushcä. Paytapis Jerusalén marcachu janchis irmänucunata acrar, acracurunaj micuya aypucunanpaj. ⁹ Felipipa ́chuscuj jipashnincuna Tayta Diosninchipa willacujnin caran. Paycuna Tayta Diosninchipa shungun yarpashanta musyachicuj.

¹⁰ Ishcay-quimsa junaj juyaycapti, Judea quinranpita ́chayamuran Tayta Diosninchipa willacujnin Agabo. ¹¹ Payga Pablupa sinturunninta pascapariran. Sinturunninwan maquin-chaquinta watacurcur, niran: «Espíritu Santu nin: «Sinturunyuj runata caynuy Jerusalén marcachu mayur Israel runacuna wancunga. Jinarcur, jäpa runacunapa maquinman ́churanga».»

¹² Chayta wiyar, llapan irmänunchicunawan mañacurä: «Pablo, Jerusalén marcaman ama aywaychu, ari» nir. ¹³ Pabluna nimaran: «¿Imanirtaj waganqui? Wagaptiqui, shungüpis ishquicäcun. Jerusalén marcachu wascamaptinsi, ́chasquicushaj. Tayta Jesúsjanan wañuchimaptinsi, mana chapacushächu.» ¹⁴ Chaura imanaypapis chapayta mana

camäpacur: «Tayta Diosninchi camacächishannuy caycullächun» nir imatapis mana rima-paränachu.

¹⁵ Chaypita llapanta sumaj camaricuriycur, Jerusalén marcaman aywacärirä.

¹⁶ Aywacuptü, Cesarea marcapita waquin irmänunchicuna Jerusalén marcacaman yanagämaran. Ñhayapti, Chipre runa Nasónpa wasinman pachächimaran. Nasónga unaypita-pacha Tayta Jesústa wiyacuran.

Santiaguta Pablo watucushan

¹⁷ Chaura Jerusalén marcaman ñhayapti, cushi-cushilla irmänunchicuna ñchasquicamaran.

¹⁸ Warannin junaj Santiaguta watucuj Pablo aywaptin, nuwacunapis aywähirä. Mayur irmänucunatawan tarirä. ¹⁹ Paycunata wamayaycur, jäpa runacunapa marcanchu purishanta, ima-imatapis rurashanta, Tayta Diosninchi imaçhpis yanapashanta Pablo willaparan. ²⁰ Llapallanta willaptin, Tayta Diosninchita alliman ñchuraran. Jinarcur niran: «Irmänu Pablo, Israelecuna achcajmi Jesúspa shiminta ñchasquicuyan. Chayta quiquipis musyanquina. Chaypis Moiséspa shiminta ñcharcunanchitaraj munaycan.

²¹ Jäpa runapa marcancunachu tiyaj Israel runacuna sharcamurmi ichanga willacusha: «Moiséspa shiminta ñcharcunanchitapis, iti ullgu wamranchicunata jírunanchitapis, auquillunchicunapa shiminta ñcharcunanchitapis Pablo mana munanchu» nir. ²² Waquin Israel-masinthicuna llutanta yarpaptin, ¿imanaypataj chapacushun? Ñhayamushayquita mayanga.

²³ «Chaymi llapan runapa ricay ñawinchu alli llucshinayquipaj sumaj yarpačhacushun. Caychu ñhuscuj runacuna Tayta Diosninchi aunishanta ñcharcuyan. Ichicllana pishin.

²⁴ Aunishanta ñcharcushan musyacänanpaj ñhuscunwan ushyacamuy. Ajchantapis rutuchiy. Rutushayquia ñchanintapis ñchuranqui. Chaynuy ruraptiqui, Israel-masinthicuna ninga: «Manacajllapita Pabluta tumpasha. Paypis Moiséspa shiminta llapanta ñcharcuyan. Tayta Diosninchipis alli ñawinwan rican.»

²⁵ «Sumaj yarpačhacurir jäpa irmänucunata mayna cartacushcä: «Jircacunaman jarashanta ama micunquichu. Uyshata pishtarpis yawarninta shutuchinqui. Yawartapis ama micunquichu. Ricashayqui warmiwan, ricashayqui runawan ama cacunquichu» nir.»

²⁶ Chaura warannin junaj Moiséspa shiminta ñcharcur, änir ñhuscun runawan Pablo ushyacuran: «Tayta Diosninchi allina ricamäshun» nir. Jinarcur imay junaj ajchanpa ñchaninta ñchurananpäpis Tayta Diosninchipa wasinman willaj aywaran.

Tayta Diosninchipa wasinchu Pabluta charishan

²⁷ Janchis junajta aywaycaptin Tayta Diosninchipa wasinchu Pabluta ricar, Asia quinranpita shamuj waquin Israel runacuna ullgucaycäriran. Tincuypa-tincuran, Pabluta charicarcäriran: ²⁸ «Israel-masicuna, yanapaycallämäy. Cay runacuna chaytucuya willapäcuyan marcanchita pampaman ñchurananpaj, Moiséspa shimintapis mana ñcharcunanpaj. Tayta Diosninchipa wasintapis pampaman ñchurar, jäpa runacunata yaycuchisha» nir.

²⁹ Paycuna Pabluta ricarunaj Éfeso runa Trófimuwan marcachu puriyajta. Chaychi yarparan: «Tayta Diosninchipa wasinmanpis jäpa runata yaycuchisha» nir.

³⁰ Chaymi llapan runa tincuypa-tincuran. Shuntacaycur Pabluta charicarcärir, wajtaman jancharan. Nircur Tayta Diosninchipa wasin puncuntapis wičhgaycäriran. ³¹ Pabluta wañuchinanpaj caycaptin, Roma murucucunapa cumandantita willaran: «Israel runacuna tincuypa-tincurcaycan» nir. ³² Chaura cumandanti capitancunatawan murucuncunata shuntariycur, runacunaman juclla aywaran. Paycunata ricar, magarcaycashanchu Pabluta cačharycuran.

³³ Cačharycuptin, murucucunapa cumandantin Pabluta charicurcuran. Ishcay cadinawanraj watachiran. Jinarcur runacunata tapuran: «¿Pitaj cay runa? ¿Imatataj

rurasha?» nir. ³⁴ Tapuptin, ima niytapis mana camäpacuranchu. Wichaypa-uraypa rímacäriran. Chaymi murucucunapa capitannin ima juchanta taripuya mana camäpacur, cuartilman Pabluta apacuran. ³⁵ Apaycaptin runacuna magayta munaptin, wintucur-cullar cuartilpa patac-patacninta jigachiran. ³⁶ Runacuna ullguyllawan japarpaycaran: «Pabluta wañurachiy» nir.

Pablo willapashan

³⁷ Chaura cuartilman yaycuchinanpaj caycaptin, murucucunapa cumandantinta Pablo niran: «¿Ichicllatapis parlapärishuwanchu?» Chaynuy niptin, cumandanti niran: «¿Griego rimayta yaúchanquichuraj? ³⁸ Egipto marcapita canqui, ¿au? Juc cuti auturdäninchita ticrapur, chuscu waranga (4,000) runacunata shuntaycur purishcanqui, ¿au? Wañuchicunayquipaj chunyaj pachačhu purishcanqui, ¿au?» ³⁹ Pabluna niran: «Mana. Israel runa cä. Cilicia quinran jatun Tarso marcačhu yurishcä. Cay ullguj marca-masicunata tantiyaycachishaj, ari.»

⁴⁰ Chaura cumandanti auniptin cuartilpa patacninčhu íchicuycur, llapan runata upällachiran. Jinarcur llapan runa tantiyananpaj hebreo rimayninčhu niran:

22

¹ «Taytacuna, Israel marca mayur runacuna, chapacur rimashäta mä, wiaycallämay.» ² Chaura hebreo shimipa rimajta wiyar, llapan upällacaycäriran. ³ Upällacaycäriptin, Pablo niran: «Nuwapis Israel runa cä. Cilicia quinran jatun Tarso marcačhu yurishcä. Cay Jerusalén marcačhu wiñashcäpis. Unay auquillunchicuna-jina cawanäpaj yaúhajsapa Gamalielpa shiminpitá imatapis yaúchacushcä. Jamcuna-jina Tayta Diosninchipa shiminta čharcuyca. ⁴ Paypa shiminta čharcur, Jesúspa shiminta čhasquicuj irmänuncunata wañuy-caway jaticačhar ushyarä. Warmi ullgutapis watacurcur, carsilman apachirä. ⁵ Imata ruranäpäpis mayur cüra, mayur Israel runacuna sisyunčhu aumimasha. Paycuna llapanta musyan. Quiquincuna Damasco marcačhu Israel mayur-masinchicunapaj urdinta jumaran. Chaywanraj Tayta Jesúspa shiminta wiyacuptin, pitapis charinä caran. Wascananpäpis Jerusalén marcaman apamunä caran.

⁶ «Chaymi Damasco marcaman lasdüsi yaycupaycapti, janaj pachapita achqui illajpita chillapyamuran. ⁷ Chaura pampaman tunicurä. Jitaraycashäčhu wiyarä: «Saulo, Saulo, ¿imanirtaj chiquimar jaticačhaycämánqui?» nimulta. ⁸ Nimuptin, tapurä: «¿Pitaj canqui, Tayta?» nir. Chaura nimuran: «Nazaret marca Jesúsmi cä. Chiquimar jati-cačhaycämánqui.»

⁹ «Yanaguicunapis achqui chillapyamuja ricaran. Parlapämashantam ichanga mana wiyaranchu. ¹⁰ Nuwana nirä: «¿Imataraj ruráman, Tayta?» Chaura nimaran: «Jatariy. Damasco marcaman ayway. Chayčhu imata ruranayquipäpis willashunquipaj.»

¹¹ «Achqui chillapyamashanpita japrayacäcurä. Puriytapis mana camäpacurächu. Chaymi maquillápita yanaguicuna Damasco marcacaman apamaran. ¹² Chay marcačhu Israel runa Ananías juyaran. Moiséspa shiminta wiyacur Tayta Diosninchita manchapacuj captin, jinančhu tiyaj Israel-masincuna allipa ricaran. ¹³ Lädüman sharcamur, pay nimaran: «Irmänu Saulo, japrayash ñawiqui quiúhacangana.» Chaymi ñawi quiúhacäcupin, Ananíasta ricarä. ¹⁴ Pay nimaran: «Manaräsi yuriptillayqui, unay auquillunchicuna manchapacushan Tayta Diosninchita acracushurayqui shungun munashanta ruranayquipäpis, Tayta Jesústa ricanayquipäpis, shiminta wiyanayquipäpis. ¹⁵ Chaymi ricashayquitapis, wiyashayquitapis chay-tucuyčhu willapäcunquipaj. ¹⁶ Cananga Tayta Jesúspa shiminta čhasquicuy. Ushyacuy. Tayta Diosninchitapis mañacuy jucha apari-cushayquita jungacaycur mana yarparänanpaj.»

¹⁷ «Chaypita Jerusalén marcaman cutimur, Tayta Diosninchipa wasinman aywarä. Tayta Diosninchita mañacuycashäčhu ricapacurä. ¹⁸ Ricapacuyničhu Tayta Jesús nimaran: «Jerusalén marcapita juclla jishpicuy. Shimita willacuptiquisi, runacuna mana

Chasquishunquipächu. ¹⁹ Nuwana nirä: «Tayta, shimiuita chasquicucunata fiacachishäta, shuntacäna wasicunapita jurgurcur-jurgurcur carsilman apashäta, magar ushyashäta musyan. ²⁰ Willacujniqui Estebanta wañuy cachiptinpis, aunirä. Wañuchicucunapa müdanantapis ricapurä. ²¹ Paymi ichanga nimaran: «Caypita aywacuy. Jäpa runacunata willapäcunayquipaj carupa cañhacushayqui.»»

²² Chaynuy niptin, runacuna ullgucarcäriran. Mana wiyarannachu. Manchäga japarparan: «Pabluta juclla wañurachishun. Ama cawachishunchu» nir. ²³ Chigaypa ullgur müdanancunatapis llushticuycaptillan, allpacunatapis aspircur-aspircur wicapay-captillan, ²⁴ murucucunapa cumandantin niran: «Carsilman wiçhgarcur, Pabluta sumaj wascay. Runacuna ullgünanpaj imallapis achäqui cangam. Juchanta pashtapacunapaj wascay.»

²⁵ Chaura wascananpaj wataraycächiptin, capitanta Pablo tapuran: «Juchayuj cashätapis, mana juchayuj cashätapis mana musyallar Roma runa caycapti, ¿wascamänayqui camacanchu?» nir. ²⁶ Niptin, cumandantinta willaran: «Cumandanti, cay runa Roma runash. ¿Canan imataraj ruranqui?» nir. ²⁷ Chaura cumandanti aywarcur, Pabluta tapuran: «¿Rasunpachu Roma runa canqui? Mä, willamay» nir. Tapuptin niran: «Au. Rasunpa Roma runa că.» ²⁸ Cumandantina niran: «Chay-chica jillaywanraj Roma runa cayman chayashcä.» Pabluna niran: «Nuwam ichanga yuriynipita-pacha Roma runa că.»

²⁹ Chaynuy niptin, Pabluta wascananpaj caycashančhu witicäriran. Cumandantipis mancharicäcuran: «¿Roma runatarächu cadinawan wancushcanchi?» nir.

Israel runacunapa sisyuninčhu Pablo chapacushan

³⁰ Warannin junaj cadinawan wataraycächishančhu Pabluta pascaran. Mayur Israel runacuna imapita dimandashantapis sumaj musyayta munar, llapan mayur Israel runacunata, mayur cüracunata cumandanti jayachiran. Chayaptin, Pabluta carsilpita jurgurcur, tincuchiran.

23

¹ Chaura Pablo mana chapacullar llapan mayur Israel runata ricärir niran: «Marca-masicuna, canancaman Tayta Diosninchipa ricay fiawinčhu alli cawashcä. Chaymi allilla cawaycä.» ² Chaynuy niptin, mayur cüra Ananías Pabluta shimičhu cutachiran. ³ Chaura Pablo shiminta jugarir niran: «Ishcay căra runa, jamtapis Tayta Diosninchí cutashunquipaj. Moiséspa shiminman tupurraj juchayuj cashäta, mana cashätapis ashipämanquiman. Juchäta tarirraj wascamanquiman. Mayur Israel runa caycar juchäta mana tarillar cutachimarga, quiquiri juchata aparicuycanqui.» ⁴ Chaynuy niptin, runacuna Pabluta ullgüparan: «Tayta Diosninchí acracushan mayur cürata ashllish-canqui» nir. ⁵ Pabluna niran: «Taytacuna, mayur cüra cashanta mana musyayniwan rimarcushcä. Tayta Diosninchipa shiminpis nin: «Mayur runata ama ashlliychu.»»*

⁶ Chaura Israel mayur runacuna ishcay yarpayyuj runacuna caran: fariseucunawan saduceucuna. Chayta musyar, Pablo wiyacächiypa niran: «Israel-masicuna, taytäpitapacha fariseu runa că. Chaymi wañushcuna cawarinanta yupachicushäpita mayur Israel runacunapa sisyuninman apaycamar dimandarcaycamanqui.»

⁷ Wañushcuna cawarinanta rimaptin, fariseucunapa shungun Pabluman ticracurcran. Chaymi fariseucunawan saduceucuna piñacuya jallaycärisha. Quiquin-puralla mayur Israel runacuna ticrapanacuran. ⁸ Saduceucunapa yarpashan fariseucunapa yarpashanwan mana tincuranchu. Saduceucuna yarpan: «Wañushallanchiwan ushyaräcunchi. Anjilpis, almapis mana canchu» nir. Fariseucunana yarpan: «Wañushanchipita cawarimushun. Anjilpis, almapis caycan» nir. ⁹ Chaura wichaypauraypa jayapänacuycaptin, waquin Moiséspa shiminta yačhaj fariseucuna niran: «Cay

* ^{23:5} Éxodo 22.28.

runa juchallicushanta mana tarinchichu. Almacunapis, anjilcunapis cay runata ricari-pushachi.»

¹⁰ Chaynuy niptinsi, runacunapa ullguynin mana jasacaranchu. Alläpa ullguptin, cumandanti manchariran: «Pabluta wañuchirunman» nir. Chaymi murucucunata niran: «Cuartilman jishpichiy.»

¹¹ Chay pagas ricapacuyninčhu Pabluta Tayta Jesús niran: «Ama imatapis manchacunquichu. Cay marcačhu shimiča willacushayquinylla Roma marcačhüpis willapäcunquipaj.»

Pabluta wañuchinanpaj parlanacushan

¹² Chaura warannin junaj waquin Israel runacuna parlanacuran: «Pabluta mana wañuchishanchicaman micuytasi, yacutasi ama mallishunchu. Shiminchita mana ĉarcuptinchi, Tayta Diosninchi ñacachimäshun» nir. ¹³ Chaynuy parlanacuran čhuscu čunca-yupay (40) runacuna. ¹⁴ Parlanacuriycur, mayur cüracunata, mayur runacunata willaj aywaran. Čhayaycur, niran: «Nuwacuna parlanacushcä: *<Pabluta mana wañuchishanchicaman micuytasi, yacutasi ama mallishunchu. Shiminchita mana ĉarcuptinchi, Tayta Diosninchi ñacachimäshun>*» nir. ¹⁵ Taytacuna, canan cumandantita mañacunqui: «Sumaj tapunäpaj Pabluta cačhamuy. Ima juchan cashantapis sumaj musyayta munä» nillar. Manaräsi čhayamuptillan, nuwacuna wañuchinäpaj shuyaraycäshaj.»

¹⁶ Chaynuy parlanacärishanta Pablupa paninpa wamranpis wiyan. Wiyar cuartilman aywarcur, willaycuran. ¹⁷ Chaura juc capitanta jayarcur, Pablo niran: «Cay müsuta cumandantiman pushay. Shungun musyashanta willamuchun.» ¹⁸ Niptin, cumandantiman čhayaycachir, niran: «Wičhgaraj Pablo jayarcachimar, cay müsuta pushamunäpaj mañacamasha. Shungun musyashantash willashunqui.»

¹⁹ Niptin, yatalla pusharcur, cumandanti tapuran: «¿Imatataj musyayaycanqui?» nir. ²⁰ Chaura müsu willaran: «Waquin Israel runacunawan mayur runacuna parlanacärisha. Paycuna mañacushunquipaj: «Sumaj tapunäpaj sisuynničman Pabluta cačchapaycallämäy, ari» nillar. ²¹ Chaynuy nishuptiqui, ama auninquichu. Čhuscu čunca-yupay (40) runacuna parlanacusha: «Pabluta mana wañuchishanchicaman micuytasi, yacutasi ama mallishunchu. Shiminchita mana ĉarcuptinchi, Tayta Diosninchi ñacachimäshun» nir. Paycuna cačharcunallayquita shuyarpaycan.» ²² Chaura cumandanti niran: «Shimiquita pashtapacurunquiman. Upällalla cuticunqui, ari.»

Mandaj Félixman Pabluta apachishan

²³ Jinarcur cumandanti ishcaj capitanta jayarcachir niran: «Sumaj chacarcuptin, Cesarea marcaman Pabluta apanayquipaj camaricuy. Camaricuchun ishcay pačhac (200) murucucuna čhaquipa aywananpaj, jančhis čunca (70) cawallun muntash aywananpaj, ishcay pačhac (200) tucsicunanwan-caman aywananpaj. ²⁴ Pablo muntacunananpäpis cawalluta camariy. Cawaycajta mandaj Félixman čhayachinayqui.»

²⁵ Pabluta apaj murucucunawan cartatapis apachiran. Cartačhu niran: ²⁶ «Tayta Félix, nuwa mayur mincayniqui Claudio Lisias cartacallämü. ¿Allillachu juyapaycanqui? ²⁷ Israel runacuna charircur, cay runata wañuchinanpaj caycaran. Chaymi Roma runa cashanta musyar, murucucunawan washashcä. ²⁸ Jinarcur imapitasi tincupänacushanta musyayta munar, mayur Israel runacuna sisuyntra rurashanman aparä. ²⁹ Chayčhu quiquincunapa yarpashan-janallan tincupänacushanta tantiyacurä. Wañuchicänanpäpis, carsilčhu wičhgaränanpäpis achäqui mana caranchu. ³⁰ Canan mayur Israel runacuna wañurachinanpaj parlanacushan rinrīman čhayamuptin, apaycächimü. Chiquij runacunatapis ñaupayquičhu juchanta jurgapänanpaj nishcä.»

³¹ Chaura murucucuna capitanninta wiyan, chay chacaylla Antípatris marcaman Pabluta čhayachiran. ³² Warannin junaj čhaquipa aywaj murucucuna cuartilninman

cuticärian. Cawalluwan aywajcunalla Cesarea marcaman ́hayachiran. ³³ Cesarea marcaman ́hayar, cartatapis, Pablutapis mandaj Félixpa maquinman ́churaran. ³⁴ Chaura cartata liguircur, maypita cashantapis Pabluta tapuran. Cilicia marca runa cashanta willaptin, niran: ³⁵ «Chiquishujniqui runacuna ́hayamuptinraj, shimiuita wiashaj.» Chaynuy nir wañucuj mandaj Herodespa wasillančhu Pabluta täpachiran.

24

Mandaj Félixpa ñaupančhu Pablo chapacushan

¹ Chaypita pichga junajta mayur cüra Ananíaswan waquin mayur Israel runacunapis, yáchaj Tértuluta pushacurcur, Cesarea marcaman aywaran. Mandaj Félixman ́hayaran Pabluta ñauquinanpaj. ² Mandaj Félixna Pabluta jayachiran. Dispächunman ́hayachiptin, yáchaj Tértulo niran: «Mandaj Félix, ima allish allilla juyächimanqui. Tantiyay-sapa cayniquipa marcäcuna alli cawananpaj imatapis rurashcanqui.

³ «Tayta Félix, allilla cawachimashayquipita chay-tucuyčhu alli cawapäcurcaycä. Jatunpa cushicullä. ⁴ Alli shungu captiquipis, alläpa mana jamarächicümanchu. Chaymi juc-ishcayllatasí wiaycallämäy, ari. ⁵ Cay runash aypäcu jishya-yupay chay-tucuyčhu Israel runacunata ticrapanacaycächin. Payga Nazaret marca Jesústa ́chasquicujcunapa mayur runash. ⁶ Jerusalén marcačüpis Tayta Diosninchipa wasintash pampaman ́churasha. Chaymi nuwacuna rísu charirä. Quiquicuna yarpashänuylla llapantapis ushyacächiyta munarä.* ⁷ Ichanga ushyacächinäpaj charirpaycapti, cumandanti Claudio Lisias jaticämusha. Jíchuramasha. ⁸ Jinarcur ñaupayquičhu ñauquinäpaj cačhamasha. Tayta Félix, quiquiruisi sumaj tapurga, rimashänuyllam juchanta taripanquipaj.»

⁹ Tértulo rimashallanta waquin Israel runacunapis rimarcärian: «Rasunpam» nir.

¹⁰ Chaura: «Shimiuita wiashun, Pablo» nir mandaj Félix rimachiran. Rimachiptin, Pablo niran: «Tayta, ima allish rimachicamanqui. Unaypita-pacha marcäcunata alli ricanqui. Chaynuya manacajta jitapämashanpita chapacushaj. ¹¹ Chayraj ́chunca ish-caywan (12) junaj Jerusalén marcaman Tayta Diosninchita alliman ́churaj aywashäpis. Shimi rasunpa cashanta musyanayquipaj, pitapis tapunquiman. ¹² Mana piwanpis piñanacuycajtachu, pitapis piñanacaycächijtachu tarimasha. Tayta Diosninchipa wasinčhusi, shuntacäna wasičhusi, jinan marcačhusi mana pitapis ticrapanacachishcächu. ¹³ Manchäga cay runacuna tumpaycäman. Rasunpa juchallicush capti, jajlläčhu mä, nimächun.

¹⁴ «Jesúspa shiminta ́chasquicushäpita: ‹Pantacash› nimaptinsi, Tayta Diosninchipa maquinčhu cawaycä. Payllata manchapacü. Moiséspa shimin nishannuylla, unay willacujcunapa shimin nishannuylla, auquillunchicuna cawashannuylla cawaycä.*

¹⁵ Israel-masicuna wañushcunata Tayta Diosninchi cawarachinanta yupachicushanjina nuwapis yupachicü. Payga shiminta wiyacujcunatapis, mana wiyacujcunatapis cawarachinga. ¹⁶ Chaymi jucha aparicuyta mana munächu Tayta Diosninchipa ricay ñawinčüpis, runa-masicunapa ricay ñawinčüpis.

¹⁷ «Unayga achca wata juclälläčhu juyar, pishipacujcunata yanapänäpaj cuyachicuñicunatapis Tayta Diosninchipaj apar, Jerusalén marcäman cutirä.

¹⁸⁻¹⁹ Chaypita Tayta Diosninchipa wasinman ushyacuj aywarä. Ushyacurä Tayta Diosninchi alli ricamänanpaj. Jinarcur ruriman yaycurä. Juc-ishcaj runallawan Asia quinranpita shamuj Israel-masicuna tarimasha. Piwanpis mana piñanacuycarächu. Paycunaraç shamunman ñauquimänanpaj. Llutanta ruraycajta tarimash carga, juchäta jurgapämänanpaj shamuchun. ²⁰ Manchäga cay runacuna jajlläčhu nimächun. Jerusalén marcačhu mayur Israel runacunapa sisyunnińchu ñauquimarpis, mana ima juchätapis

* **24:6** Waquin unay Bibliačhu 24.6c-8a nishan mana taricanchu. * **24:14** Hechos 9.2-ta ricanquiman.

tarishachu. ²¹ Nuwapa juchä shimiña jugarishallä. Shimiña jugarir, nirä: «Wañushcuna cawarinanta yupachicü.» Chaypita ñauquircaycämánqui.»

²² Chaynuy niptin, Tayta Jesúspita rimashanta sumaj musyar, juc junajpaj mandaj Félix jitaparan: «Cumandanti Lisias shamuptinraj, imapita ñauquinacushayquitapis sumaj tapucushayqui» nir. ²³ Jinarcur mandaj Félix täpaj murucunta niran: «Pabluta ama wičhgaychu. Manchäga täpaylla sumaj täpay. Ricsinacushancuna watucunantapis, imata apapämumantapis ama mičhanquichu.»

²⁴ Warannincuna warmin Drusilawan ishcanin mandaj Félix chayamuran. Warmin Drusila Israel warmi caran. Ishcanin Pabluta jayarcachir, rimashanta wiyapararan: «Washäcuji Jesústa wiyacushun» nir willapaptin. ²⁵ Pablo willaparan: «Llapan runa allillata ruranman. Shungun munapashallanta ama ruranmanchu. Cay pacha ushyacaptin, Tayta Diosninchi llapan runapa juchanta jurgapanga» nir. Chayta willapaptin, mancharicäcur Félix niran: «Chayllapäna. Jäcur, yapay jayachishayqui.» ²⁶ Chaynuypa parlaj tumpaylla achca cutipa Pabluta jayachiran: «Cačharycunäpaj jillayta jutupämanga» nir.

²⁷ Jillayta mana jutupaptin, Pabluta mana cačhariranchu. Chaypita ishcay watata cargunpita mandaj Félix llucshicuran. Porcio Festuna cargunta chasquiran. Mandaj Félix mayur Israel runacunawan alli ricanacuya munar, Pabluta wičhgaraycajllata jaguiycuran.

25

Mandaj Festupa ñaupančhu Pablo chapacushan

¹ Chaura cargunta chasquircur, Cesarea marcaman mandaj Porcio Festo chayaran. Quimsa junajta Jerusalén marcaman aywaran. ² Chayaptin, mayur cüracunapis, mayur Israel runacunapis Pablupita willaparan. ³ Yaparir-yaparir mañacuran: «Tayta Festo, Israel runacunata llaquipar, Pabluta apachimuy, ari» nir. Rasunpa apachiptin caminučhüshi shuyaycur, wañurachinan caran. ⁴ Chaura mandaj Festo niran: «Cesarea marcačhu murucucunawan Pabluta sumaj täpaycähi. Waracunallana aywashaj. ⁵ Mayganiquipis jäcuptiqui, Cesarea marcaman aywashun. Chay runa llutanta rurash captингa, ñaupäčhu ñauquinquiman.»

⁶ Pusaj junajlla-yupay Jerusalén marcačhu juyapärir, Cesarea marcaman Mandaj Festo cuticuran. Warannin dispächunman Pabluta jayachiran. ⁷ Pabluta chayachipuptin, Jerusalén marcapita aywaj mayur Israel runacuna tucuya jitaparan. Ichanga juchanta mana taripuranchu. ⁸ Chaymi chapacur Pablo niran: «Imačhüpis mana juchalllicushcächu. Moisés pa shimitapis llapanta wiyacushcä. Tayta Diosninchipa wasintapis mana pampamanchu churashcä. Roma marcačhu mandaj Césarpa shimitapis charchushcä.»

⁹ Chaynuy niptin, mayur Israel runacunawan alli ricanacuya munar, mandaj Festo Pabluta tapuran: «¿Jerusalén marcapa aywashuwanchu? Llapan jitapäshushayquipita quiqüi ashipushayqui» nir. ¹⁰ Pabluna niran: «Pí-maypa dimanduntapis ushyacächinayquipaj Roma marcačhu mandajninchi César churashcashunqui. Chaymi cay dispächullačhu imapitasi ushyacächinquiman. Musyashayquinuypis Israelcuna chiquipämänanpaj mana ima achäquillatapis rurashcächu. ¹¹ Juchallicush caycar wañuchimaptin, mana chapacümanchu. Mana imatapis rurash caycaptimi ichanga, Israel runacunapa maquinman pipis mana churamanmanchu. Mandaj Césarman apachimay.»

¹² Chaura tantiyachijnincunawan parlanacuriycur, mandaj Festo niran: «Pablo, mandaj Césarpa maquinman chayayta munaptiqui, Roma marcaman apachishayqui. Payraj shimiuita wiyanman.»

¹³ Chaypita mana aycällatana mandaj Festo cargunta chasquishanpita Cesarea marcaman warmin Bereniciwan mandaj Agripa ishcanin wamaya jayay. ¹⁴ Achca

junaj juyapacaptin Pabluta täpaycächishanta willar, mandaj Festo niran: «Tayta Agripa, mandaj Félix cargunpita llucshicur, juc rísu runata mana cačhariranchu. ¹⁵ Chaymi Jerusalén marcaman aywaptü, mayur cüracunawan mayur Israel runacuna maquichaca-mayta camar mañacamasha. Juclla munasha: «Chayruna rasunpa wañunman juchanpita» ninäta. ¹⁶ Munaptinsi, nirä: «Roma runacuna mana sumaj tapucačhällar, pitasi mana wañuchinchu. Chiquinacushanwan ñauquinacunantaraj shuyan.» ¹⁷ Chaymi Israel runacunawan shamur, warannin junajlla chay runata dispächüman jayachirä. ¹⁸ Rasunpa juchan cashanta yarpashcä. Ñauquijcunam ichanga yarpashänuychu mana ñauquisha. ¹⁹ Manchäga cawashan-janan, wañush Jesú-s-janan tincupänacuran. «Wañush» niptinsi, Pablo: «Jesú-s cawaycan» nin. ²⁰ Ima ruraytapis mana camäpacur, tapushcä: «¿Juchayquita sumaj ashinäpaj Jerusalén marcaman aywashunchu?» nir. ²¹ Chay Pablum ichanga mana munashachu. Manchäga mañacamasha: «Roma marcačhu mayur mandajninchí Augusto Césarraj juchäta ashipamächun» nir. Chaymi Roma marcaman apachinäcaman täpaycächii.» ²² Chaynuy niptin, mandaj Agripa nirán: «Tayta Festo, chay runapa shiminta nuwapis wiyacyüman.» Festuna nirán: «Yä. Wara jayachimushun shiminta wiyananchipaj.»

²³ Warannin junaj dispächuman mandaj Agripa warmin Bereniciwan ćhayaran. Llapan cumandanticunapis, jinan marca auturdäcunapis aywähiran. Achic-achicyaycaj müdanash aywaran. Llapan shuntacarcuptin, mandaj Festo Pabluta jayachiran.

²⁴ Chayachiptin, mandaj Festo niran: «Tayta Agripa, llapallayquita willashayqui. Israel runacuna Jerusalén marcačüpís, cayčüpís cay runata wañuchinäta munan. Pabluta wañurachinäta munar ullgurcaycan. ²⁵ Sumaj tapucačharmi ichanga, juchallicushanta mana taripushcächu. Roma marcačhu mandajninchí Augusto Césarman apachinäpaj quiquin mañacamaptin, aunishcä. ²⁶ Taytacuna, llapaniqui yanapaycallämay. Cay runapa juchanta mana tarir, mandaj Césarman imata nir cartacuytapis mana camäpacüchu. Tayta Agripa, ¿imata nirtaj cartacüman? Tapúshimay ari, imata nir cartacunäpäpis. ²⁷ Jucha aparicushanta mana tariycar apachiptü, pingaypaj canga, ¿au?»

26

Mandaj Agripapa ñaupančhu Pablo chapacushan

¹ Chaura mandaj Agripa Pabluta niran: «Mä, quiquipi rimarcuy. Mä, willamay.» Chaynuy niptin, Pablo niran: ² «Tayta Agripa, ima allish wiyamanqui. Israel runacuna tucuya jitápämashampita shimíwan chapacushaj. ³ Tayta, Israel runacuna yarpashantapis, imapita apaycačhänacushantapis sumaj musyanqui. Chaymi mana yamacällar wiyaycallämay, ari.

⁴ «Tacsha cashäpita-pacha marcäčhu juyashätapis, Jerusalén marcačhu juyashätapis Israel-masicuna musyan. ⁵ Tacshäpita-pacha fariseucuna yarpashanta ćharcushätapis musyan. Fariseucunalla Moiséspa shiminta llapanta sumaj ćharcun. Sumaj musyayta munar, maygantapis tapucunquiman. Munar, rasullanta willashunquipaj. ⁶ Cananga auquillücunata Tayta Diosninchí aunishanman yupachicushäpita auturdäcunaman ćhayachimasha. ⁷ Tayta Diosninchí aunishan ćharcucänanta ćhunca ishcaywan castanti llapani shuyarpaycä. Chaymi pagas-junajpis mana yamacällar Tayta Diosninchita alliman ćhurarcaycä. Shungun munashantapis llapanta rurarcaycä. Chaypis, Tayta Agripa, wañushcunata Tayta Diosninchí cawarachinanta mana ćhasquir, waquin mayur Israel-masicuna tumparpaycäman. Tayta Diosninchí aunishanman nuwapis yupachicü. ⁸ ¿Imanirtaj jamcunapis Tayta Diosninchí wañushcunata cawarachinanta mana ćhasquipäcunquichu?

⁹ «Ñaupata quiquipis, Nazaret marca Jesústa ćhasquicuj irmänucunata juyupa chiquiparä. «Allita ruraycä» nir wañuy-caway chiquipar jaticáchar ushyarä. ¹⁰ Chaymi mayur

cüra aunimaptin, irmänucunata Jerusalén marcáchu charircur-charircur carsilachishcä. Wañuchiaptinpis, aunirä. ¹¹ Jesústa wasguipanan cashpan achca cuti shuntacäna wasiman yaycurir, irmänucunata ñacachir ushyashcä. Chigaypa ullgur juclä marcacunamanpis aywarcur, Jesústa wiycuj irmänucunata jaticáchar ushyarä.

¹² «Chaynuypa mayur cüracuna aunir urdinta jumaptin, Damasco marcamanpis aywaycarä. ¹³ Tayta Agripa, aywaycapti, lasdusi-imá janaj pachapita chillapyamuran. Chillapyamushanman intipis mana tincuranchu. Aywähimajcunata llapanita achiçyäramaran. ¹⁴ Chaura llapani pampáchu jitaraycashä́chu hebreo rimaychú jayacamija wiyarä: «Saulo, Saulo, ¿imanirtaj chiquipämashpayqui jaticáchaycämanqui? Picayuja jaytar, quiquillayqui nanächicunqui» nir.

¹⁵ «Chaura nuwapis tapurishcä: «¿Pitaj canqui, Tayta?» nir. Tapupti, quiquin nimaran: «Tayta Jesúsmi cä. Nuwallata chiquir jaticáchaycämanqui. ¹⁶ Chaypis jucilla jatariy. Caçhä canayquipaj ricaripushcraj. Chaymi shimiña willacur, canan ricashayquitapis, wara-warantin ricachinajtapis, llapanta willapäcunqui. ¹⁷ Israel runacunapa maquinpitapis, jäpa runacunapa maquinpitapis washäshayqui. Paycunaman aywanayquipaj caçhaycraj. ¹⁸ Willapäcur tantiyachinqui jucha aparicuypita wanacunapaj, mayur supaypa maquinpita Tayta Diosninchipa maquinman ashucunapaj. Shimiña chasquicuptin, jucha aparicushantapis Tayta Diosninchipi jungaycunga. Chaynuypis acracushan wawancuna maquinchú cawashan-jina paycunapis maquinchú cawanga.»

¹⁹ «Tayta Agripa, ricariparcamar Tayta Jesús caçhamashanta mana wasguipashcächu. ²⁰ Manchäga Damasco marcaçüpis, Jerusalén marcaçüpis willaparä. Jinarcur Judea quinran runacunata willaparä. Chaypitaraj jäpa runacunata willaparä. Llapanta willaparä: «Tayta Diosninchipa maquinchú cawanquiman. Jucha aparicushayquipita wanacunquiman. Wanacushayqui musyacänanpaj runa-masiquta llaquipar yanapanquiman» nir. ²¹ Chayllapita Israel runacuna Tayta Diosninchipa wasinchú charircamar, wañurachimayta munasha. ²² Chaypis Tayta Diosninchipi yanapämaptin, mayur runacunatapis, pampa runacunatapis Tayta Jesúspita willapaycä. Willapäcushä tincun Moiséspa shiminwanpis, unay willacujcunapa shiminwanpis. Tayta Diosninchipa shiminchüpis nin: ²³ «Caçhamushan Washäcuj wañungarämi. Ichanga wañushcunapita payllaraj puntata cawarimunga. Cawarcamur, Israel runacunatapis, jäpa runacunatapis willapäcunga. Achqui achicyäpamashanchi-jina Tayta Diosninchipa shungun yarpashantapis tantiyachimäshun.» »

²⁴ Pablo rimayta mana ushyaptillan, wiÿächipaya mandaj Festo upällachiran: «Supaychí pucllacushcashunqui. Alläpa yaçhaptiqui, umayqui tumariycan» nir. ²⁵ Pabluna niran: «Mana pucllacamashachu. Tayta Festo, umäpis allita yarpaycan. Rasun-cajllata rimaycä. ²⁶ Willapäcushäta llapan runa musyan. Mandaj Agripapis musyan. Mana upa-tucunmanchu. Chaymi shimiña mana amucurcümanchu. ²⁷ Tayta Agripa, unay willacujcuna rimashanta chasquicunqui, ¿au? Chasquicushayquita musyä.»

²⁸ Chaura mandaj Agripa niran: «¿Juc-ishcay shimmillayquiwanchu Tayta Jesúspa shimita juclla chasquicunäta yarpashcanqui?» ²⁹ Pabluna niran: «Juclla chasquicuptiquisi, wara-warantinraj chasquicuptiquisi, quiquipita. Llapaniqui Tayta Jesústa wiycunayquita shungü munan. Nuwa-jina cadinawan watash purinayquitam ichanga, mana munächu.»

³⁰ Chaura llapan jurpacunapis, mandaj Festupis, mandaj Agripapis, warmin Bereniciwan llucshicuran. ³¹ Llucshicuycashanchú quiquin-puralla parlanacuran: «Cay runa mana juchallicushachu. Wañuchinanchi mana camacanchu. Wiçgarächinallanchisi mana camacanchu» nir. ³² Chaymi mandaj Agripa mandaj-masin Festuta niran: «Cay runata mayna caçhariycushuwan caran. Ichanga: «Mandajninchí Césarman apachimay nishallanpita mana caçhariycangarächu.»

27

Roma marcaman Pabluta apachishan

¹ Chaura auturdäcuna Roma marcaman apachimänanpaj yarpačhacuriycur, Pablutawan waquin wičgarajcunata capitán Juliupa maquinman čhuraran. Capitán Juliuga mandaj Augustupa murucuncunata maquinčhu purichij.* ² 2 Chaura Adrumeto marcapita bütiman jigashcä. Chay büti Asia quinran lamar cantuncunačhu ičhiycuričhiycur aywanan caran. Bütiwan aywacupti, Aristarcupis yanagämaran. Payga Macedonia quinran Tesalónica marcapita caran. ³ Warannin junaj Sidón marcaman čhayarä. Chayčhu capitán Julio alli shungu cashpan irmänucuna Pabluta watucunanta mana mičharanchu. Jaraptinpis, mana mičharanchu. ⁴ Sidón marcapita aywacupti, alläpa wayraycaran. Chaymi mana wayrashallanpa aywar, lamar čhaupinčhu Chipre marca cantullanpa aywarä. ⁵ Chaypita Cilicia quinran, Panfilia quinran chimpallanpa aywarä. Licia quinrančhu Mira marcaman čhayarä. ⁶ Mira marcačhu Alejandría marcapita Italia quinran Roma marcaman llucshiycaj bütita capitán Julio tariran. Chay bütimanna jigachimaran.

⁷ Chay bütiwan pasinsalla aywar, achca junaj ñacarä. Cnido marca ñaupanman čhayanäpaj sumaj sasa caran. Juyupa wayräumptin, lamar čhaupinčhu Creta marca cantullanpa aywar, Salmón punta ñaupanman čhayarä. ⁸ Chaypita ñacarpis, «Buenos Puertos» nishan marcaman čhayarä. Chay marca Lasea marcapa waclällančhu caran.

⁹ Chay marcaman čhayanäpaj achca junajraj ñacashcä. Juchapita shujpicuy fiestapis ushyacashana caran.* Tamya quilla jallariptin, bütiwan purijcuna ticraj. Chaymi büti purichijcunata Pablo niran: ¹⁰ «Taytacuna, ama aywashunchu. Chiquipaj aywar, imamanpis čhayashuwan. Bütipis llapan cargantin-ima challpucanga. Quiquinchicunapis wañuya-ima tarishuwan.» ¹¹ Chaynuy niptinpis, capitán Julio mana wiyaj-tucuranchu. Manchäga bütiyupha shiminta, büti purichijpa shiminta wiyacuran. ¹² Chaymi Buenos Puertos marcačhu tamya quilla captin, juyänäpaj mana alli-niraj captin, llapani Creta marcačhu büti ičhiräcunan Fénix marcaman čhayayta munarä. Chay marcaga janamannis, uramanpis ricacaycan.

Lamarčhu Pabluta chicchinpa manchachishan

¹³ Chaura urapita wall-wallyayllapa wayräumptin: «Fénix marcaman čhayashun» nir büti purichijcuna cushicäriran. Chaymi Creta marca cantullanpa bütiwan aywacärirä.

¹⁴ Aywarcaycapti, janapita «Euroaquelón» nishan shucucuy wayra čhayamuran. Juyupa wayracurcuran. ¹⁵ Bütitapis uraypa apacuran. Chaymi wayra shamushanpa aywayta mana camäpacur, wayra apashallanpa aywacärirä.

¹⁶ Lamar čhaupinčhu Cauda marcapa cantullanpa apamaran. Mana alläpa wayraptin, büti mallwata jatun bütiman jitapäcurä. Ichanga sumajraj ñacapäcurä. ¹⁷ Aywashä bütitapis, watucunawan čhanaj watapäcurä. «Sirte» nishan chucru aguman tacacunanta manchacur, wayrallana bütita apananpaj bayitätapis shucutaparä. Wayra apashallanpana aywacärirä.

¹⁸ Warannin junaj wayra mana čhawaptin, bütipa cargancunata lamarman wicaparirä. ¹⁹ Quimsa-caj junajčhu bütipa llapan jiruncunatawan imancunatapis wicaparirä. ²⁰ Juyupa chicchinpa chacaraptin, intitapis istrillacunatapis achca junaj mana ricaränachu. Chicchinpa wacpa-caypa purichimaptin, cawaytapis mana yarparänachu.

²¹ Achca junaj mana micurächu. Chaymi llapan runata Pablo niran: «Taytacuna, wiacamanguiman caran. Creta marcapita mana llucshimullar, mana ujrapacushuwanchu caran. Mana ñacashuwanpishchu caran. ²² Imanuy carpis, ama manchacushunchu. Büti ushyacaptinsi, mayganchipis mana wañushunpächu. ²³ Manchapacushä Tayta

* **27:1** Roma marca Italia marcacunapa jatun marcan. * **27:9** Shujpicuy fiestačhu runacuna mana micujchu.

Diosninchipa anjilnin chacay ricaripamasha. Ca han capt , Tayta Diosninchchi willachi-masha: ²⁴ «Pablullau Pablo, ama manchariychu, ari. Mandaj C sarpa disp chun hu  nauquic nayqui camacan. Aywarcaycashayqui runacunatapis jam-raycur Tayta Diosninchchi washanga» nir. ²⁵ Chaynuy willachimash caycaptin, cusic rinquiman. Tayta Diosninchchi willachimashan camac nanta yupachic . ²⁶ B ti ushyacaptinsi, lamar cantunman yacu jitaram shun.»

²⁷ Chaura ishcay sim na Adri tico lamar quinranpa aywapt , b ti wacman-cayman wayra purichiran. Chaypita pullan-pagas pallgaman b ti yaycapaycashanta purichi-jcuna mayaran. ²⁸ Chaymi may ruri hpis allpa cashanta tupuptin, ishcay  chunca (20) ricralla caycaran. Yapay tupuptin,  chunca pichgawan (15) ricrallana caycaran. ²⁹ Chaura ruminaman tacacunanta manchacur, b titia i chichinanpaj watarcur  huscu ayshucunata lamarman jitarpuran. Jinarcur pacha wararcunapaj Tayta Diosninchita ma nacuycar . ³⁰ B ti purichijcunam ichanga jishpicuya munaycaran. Chaymi b ti  naupanman ayshucunata wataj tumpaylla jishpicunapaj b ti mallwata yacuman jur-guycaran. ³¹ Chayta ruraptin, capitantapis, llapan murucucunatapis Pablo willaran: «B ti purichijcuna jishpicuptin, llapaniqui wa nquipaj» nir. ³² Niptin, b ti mallwapa watunta murucucuna cuchurachiran. Lamarman jaycurachiran.

³³ Pacha waranaycaptin, micuya mallinapaj Pablo shacy chiran: «Taytacuna, canan-wan ishcay sim nana llaquish puriycanchi: « Cawashunchuraj, wa nushunchuraj?»» nir. Micuytapis mana mallinchipir chu. ³⁴ Cawananchipaj ichicllatapis micup rishun, ari. Mayganchisi mana wa nushunp chu. Mana imamanpis  hayashunp chu» nir. ³⁵ Jinarcur llapanpa ricay  nawin hu tantata aptacurcur, Tayta Diosninchita niran: «Taytallau Tayta, ima allish tarichill mashcanqui» nir. Tantata paquircur micuran. ³⁶ Shacy cur, nuwacunapis micup cur . ³⁷ Llapani ishcay pa chac jan his  chunca sujtawan (276) runacuna b ti hu aywarcaycar . ³⁸ Llapan sacsashancaman micuran. Jinarcur b ti ancashyarcunapaj apashan r guta lamarman jaycuriran.

Lamar hu b ti ushyacashan

³⁹ Chaura pacha sumaj wararcuptin, b ti mayman  hayaycashantapis mana musyaranchu. Mana musyarpis, rumiynaj pallgata ricar, b titia  hayachiyta munaran. ⁴⁰ Chaymi watuncunata cuchurir, ayshucunata lamar hu jaguiycuran. B ti tangacunan jirucunatapis jullgarachiran. Jinarcur ricashallanpa aywananpaj b tipa shucutapashan bayitacunatapis mashtaran. Chaymi wayra apaptin, pallgaman b ti llucshiran. ⁴¹ Aywaycashan hu b tipa uman chucru aguman jatic curan. Mana aywarannachu. Yacu jipapita juyupa jaytaycaptillan, b tipa jipan paquic curan.

⁴² Chaura apashan runacunata wampuyllapa jishpic rinanpita murucucuna wa nurachiyta munaran. ⁴³ Wa nurachiyta munaptin, capitan Julio Pabluta washayta munaywan mi haran: «Wampuy ya hajcuna lamar cantunman jishpicuchun. ⁴⁴ Mana wampuy ya hajcunam ichanga b tipa paquipan jirucunallawan, imanuyllapapis llucshichun» nir. Chaynuya maygan pis mana wa nur chu. Llapani allpaman  hayar .

28

Malta marcaman Pablo llucshishan

¹ Chaura llapani lamarrita jishpircur, Malta marcaman llucshicaycash ta tantiy-acurir . Chay marca lamar  chaupin hu caycaran. ² Jinan runacuna llapani ta allipa ricamaran. Tamyawan jas chicuycapt  jatun jullputa rataraycachir, mashacun paj llapani ta jayamaran.

³ Pablupis chaqui capshucunata ashircur-ashircur, ninaman jaycuycaran. Jaycuy-captin curu ninapita jishpir, maquinpita Pabluta amucurcuran. ⁴ Pablupa maquin hu curu warcuraycaja ricar, Malta runacuna quiquin-puralla parlanac riran: «Cay runa

wañuchicujmi canga. Lamarpita jishpish captinsi, yaya jirca wañurachiyta munaycan» nir. ⁵ Pablum ichanga canishan curuta ninaman jaycuriran. Canishanga mana imanaranpishchu. ⁶ Runacunam ichanga curu canishanpita Pablo jacacurcunanta, wañucacunanta shuyarpaycaran. Pablo mana mayaptinmi ichanga, runacuna niran: «Cay runa quiquinchari yaya jirca. Mana runa canmanchu.»

⁷ Juturpaycashä washlällanchu mayur runa Publiupa chacran caycaran. Paypa maquinchu Malta runacuna cawaran. Alli runa cashpan quimsa junaj pachächimaran.

⁸ Publiupa papänin wayllaywan, curiduswan jishyaycaran. Watucur maquinwan Pablo yataycur Tayta Diosninchita mañacuptin, allchacäcuran. ⁹ Allchacajta ricar, chay marcachu jishyačhu runacunapis Pabluman shamuran. Shamuptin, allchacächiran.

¹⁰ Chaura allipa ricamar, cuyachicuynincunata jarallämaran. Jucläpa aywacuptipis, llapan pishimajcunata camapämara.

Roma marcaman Pablo chayashan

¹¹ Tamya quilla chawashancaman Alejandría marcapita shamuj runacunapis, pacharashä marcallačhu pachacuran. Quimsa quilla juyarcu, paycunapa bütillanwan aywacurä. Bütipa singanchu yaya Cástorman ricchacuj, yaya Póluxman ricchacuj caycaran. ¹² Chaypita aywacur Siracusa marcaman chayar, quimsa junaj juyarä. ¹³ Jinarcur lamar cantullanpa Regio marcacaman chayarä. Warannin urapita sumajlla wayräramuran. Chaypita warannin Pozzuoli marcaman chayarä. ¹⁴ Chay marcachu waquin irmänucunawan tincurä. «Juyapärishun» nir mañacamaptin, janchis junaj juyapärirä. Chaypitraj Roma marcaman chaquillapa aywacurä.

¹⁵ Roma marcachu irmänucuna chayaycashäta mayaran. Chaymi «Foro de Apio» nishan marcaman taripämara. Waquinna «Tres Tabernas» nishan marcachu shuyarämaran. Irmänucunata ricar, Pablo shacyäcuran. Tayta Diosninchitapis alliman churaran. ¹⁶ Roma marcaman chayapti, Pabluta yatalla tiyachiran. Juc murucullawan täpachiranpis.

Roma marcachu Pablo willacushan

¹⁷ Chaura chayashanpita quimsa junajta Roma marcachu tiyaj mayur Israel runacunata Pablo jayachiran. Shuntacarceptin, nir: «Taytacuna, mana juchallicushcächu. Unay auquillunchicuna yačhachicushantapis, marca-masinchicunatapis mana pampamanchu churashcä. Imatapis mana ruraycapti Jerusalén marcachu charircamar, Roma runacunapa maquinman churamasha. ¹⁸ Roma auturdäcuna sumaj tapumar, wañuchimänanpaj ima juchätapis mana tarir, cačharaycamaya munaran. ¹⁹ Mayur Israel runacunam ichanga mana munaranchu. Chaymi mandaj Césarman apachimänanpaj imanuypapis mañacurä. Imanuy captinpis, Israel-masinchicunata imapitasi mana dimandashächu.

²⁰ «Jamcunawan parlayta munar, jayachishcaj. Israel masinchicuna-jina Washäcuja shuyarashäpita cadinawan watashta purichiman.»

²¹ Chayta wiyar, mayur runacuna nir: «Judea marcapita mana pipis cartacamashachu. Jyu runa cashayquita pi irmänupis mana willamashachu. Pipis mana shamushachu. ²² Mushuj willapata willapäcushayquipitam ichanga, chay-tucuychüpis: «Pantacash willapata puriycächin» nir rimapäcun. Chaymi mushuj rimay imanuy cashantapis wiyatya munarcaycä.»

²³ Chaura juc junajpaj jitapänacur jitapänacushan junaj chayamuptin, chay-chicaj runa Pablo pacharashan wasiman aywaran. Paycunata Tayta Diosninchipa maquinchu cawananpaj juyayllata willaparan. Jesúspita willapashan rasunpa cashanta auninanpaj Moiséspa shiminwanpis, unay willacujcunapa shiminwanpis tincuchiran.

²⁴ Tantiyachiptin, waquin mayur runacuna Jesúspa shiminta chasquicuran. Waquin-nam ichanga wasguiparan. ²⁵ Chaura quiquin-pura apaycahänacur aywacunananpaj caycaptin, Pablo nir: «Rasullantachi Espíritu Santu willacuj Isaíasta rimachir, unay auquillunchicunata nir:»

26 ‹Rinriquiwan wiaycarpis, mana tantiyacunquipächu.

Ñawiquiwan ricaycarpis, mana tantiyacunquipächu.

27 Israel runacuna chucru shungu.

Shimïta mana wiayta munaywan rinrinta chaperächicun.

Rurashäcunatapis ricayta mana munar, ñipchiräcun.

Mana chucru shungu carmi ichanga, imata rurashätapis ñawinwan ricanman.

Shimïtapis rinrinwan wiyacunman.

Llapan shungunwan tantiyacunman.

Chaura allipa ricäman.»*

28-29 «Taytacuna, Tayta Diosninchipa shiminta marca-masinthicuna wiyacuyta mana munashanpita jäpa runacunatana willapaycä. Paycuna wiyacuptin, juchantapis mana yarparanganachu.»*

30 Ishcay wata-ima mañacuy wasillačhu Pablo juyaran. Pipis watucuptin, chay wasillačhu čhasquiran. **31** Tayta Diosninchipa maquinčhu cawananpaj tantiyachicur, Taytanchi Jesucristupita willapäcur juyaran. Willapäcuptin, pipis chapata mana rraranchu.

* **28:27** Isaías 6.9-10. * **28:28-29** Waquin Bibliačhu yapash: «Chaura Pablo rimayta ushyarcuptin quiquin-pura apaycačhänacur, Israel runacuna aywacäriran» nir.

Roma marcačhu irmänucunaman San Pablo cartacushan

Tantiyacunanchipaj:

Pablo cay cartata isquirbiran. Payga Asia quinran Tarso marcačhu yuriran. Roma runa caran. Maman-taytanpitam ichanga Israel casta caran. Israel runa cashpan auquilluncunapita sumaj yačhacuran. Yačhachicujninpis caran Gamaliel. Fariseu runa cayman čhayarpis, Tayta Diosninchipa shiminta sumaj-sumaj čharcuya munaran. Chaypitam Jesúsman yupachicujcunata chiquiparan. Llaquipashpan Jesús ricaripar-cuptinmi ichanga, tantiyacurán Jesús Tayta Diosninchipa Wawan cashanta. Chaypita-pacha cačhan cashpan Jesúspa alli willapanta chay-tucuyčhu willapäcuran. Chaypämi Tayta Diosninchí acracuran.

Pablupita musyayta munar, liguinqui: Hechos 8.1-3; 9.1-39; 11.25-26; 13.1-28.31.

Cay cartata isquirbiran Roma marcačhu jutuaj irmänucunaman.

Pablo isquirbiran:

Llapan runa juchačhu cawashanpita: *Romanos 1.1-3.20.*

Jesucristuman yupachicuptinchi, Tayta Diosninchí juchanchita jungashanpita, alli ñawinwan ricamashanchipita, imaycamanpis maquinčhu cawachi-mashanchipita: *Romanos 3.21-8.39.*

Unaypita-pacha Israel runacunata acracushanpita, jipata llapan runa maquinčhu cawananpita: *Romanos 9.1-11.36.*

Jesúspa shimin shungunchiman čhayshanpita, shungun munashannuy cawananchipita, wiycunanchipita: *Romanos 12.1-15.13.*

Roma marcaman Pablo aywananpita, irmänucunata wamayänanpita: *Romanos 15.14-16.27.*

Pablo wamayashan

¹ Roma marca irmänucuna, nuwa Pablo cartacallämü. Washäcuj Jesúspa mandurrurajnin caycä. Paypita willapäcunäpaj Tayta Diosninchí acracamasha. Cačhacamasha: «Alli willapäta willacur purimuy» nir. ² Unaypita-pacha Washäcujninchí Jesús shamunanta Tayta Diosninchí musyachicuran. Alli willapanta musyachicur, shiminčüpis unay willacujcuna llapanta isquirbiran: ³ «Tayta Diosninchí cačhamushan Wawan cay pachačhu yuringapaj. Unay mandajninchí Davidpa willcan canga» nir.* ⁴ Chaymi Wawan cashanta musyachicur, Espíritu Santuwan Tayta Diosninchí wañuypita Jesústa cawarachimuran. Jinarcur munayniyuj cayman čhuraran. Cananga maquinčhu Taytanchi Jesucristu puriyäčhimanchi. Payga Washämajninchim. ⁵ Llaquipämar, nuwatapis čhuramasha shiminta willapäcunäpaj. Llapan runa shiminta čhasquicunanta munar, maquinčhu cawananta munar, cačhacamasha: «Jäpa runacunatapis nuwaman yupachicamänanpaj shimiña willapäcunqui. Paycunapis čhasquicunman» nir.* ⁶ Roma irmänucuna, jamcunatapis Tayta Diosninchí acracushcashunqui Washäcuj Jesúspa maquinčhu cawanayquipaj. ⁷ Chaymi cartacamü. Tayta Diosninchí llaquipäshunqui. Paymi acracushcashunqui. Wamrachacushcashunqui maquinčhu cawanayquipaj.

Tayta Diosninchipis, Tayta Jesucristupis alli ñawinwan ricayculläshunqui. Allilla caway-cachilläshunqui.

Roma marcaman watucuj aywayta Pablo yarpashan

* **1:3** «Tayta Diosninchipa shimin» ninanta castillänučhu ricsin: «Santa Escrituras» nir. * **1:5** Israel runacuna pitapis: «jäpa runa» niij mana Israel casta captin. Castillänučhu nin: «Gentiles.»

⁸ Irmänucuna, Washäcuj Jesúzman yupachicur maquinčhu alli cawashayquita maychayčhüpis rimaptin, jatunpa cushicü. Chaymi llapaniquipita Tayta Diosninchita aliman čhurä. ⁹ Waran-waran jamcunapaj mañacapushätapis quiquin Tayta Diosninchu musyaraycan. Cačhacamashannylla Wawan Jesúspa alli willapanta llapan shungüwan willapäcuycä. ¹⁰ Pay camacächiptin, watucuj shamushaj. Unaypita-pacha sumaj mañacuycä. ¹¹ Jamcunawan tincuya sumaj munaycä. Tincur, Espíritu Santu tantiyachimashannylla anyapäshayqui Tayta Diosninchiman sumaj yupachicunayquipaj. ¹² Chaymi shimin shungunchiman sumaj čhayananpaj jucninchu-jucninchipis shačyächinacushun.

¹³ Irmänucuna, achca cuti watucuj shamuya munaptisi, chapa mana pishimashachu. Marcan-marcan purishä-jina marcayquičhüpis sumaj willapäcunä. Marca-masiquicunapis Tayta Jesúspa shiminta čhasquicunanta munaycä. ¹⁴ Tayta Diosninchu camacächiptin, llapan runata Jesúspa shiminta willapäman. Willapäshaj Roma marcasiqui captinsi, jäpa runa captinsi, yačhaj runa captinsi, pampa runa captinsi. ¹⁵ Chaymi alli willapata willapänäpaj marcayquicamanpis juclla čhayamüman.

Tayta Diosninchu jishpichinanpita willapashan

¹⁶⁻¹⁷ Washäcuj Jesúspa shiminta čhasquicuptinchi, Tayta Diosninchu jishpichimanchi. Imaycamanpis maquinčhu cawachimanchi Israel runa captinchisi, jäpa runa captinchisi. Chaymi mana pingacullar llapanpa ūapančhu pii-maytapis willapäman: «Jesúspa shimin alli willapa» nir. Llapanchi juchata aparicush captinchisi Jesúspa shiminta čhasquicuptinchi, alli ūawinwan Tayta Diosninchu ricamanchi. Shiminčhüpis isquirbiraycan: «Pipis nuwallaman yupachicamaptin, alli ūawiwan ricashaj. Imaycamanpis cawachishaj» nir.*

Tayta Diosninchu ricay ūawinčhu llapan runa juchayuj

¹⁸ Waquin runacuna Tayta Diosninchu shiminta wiycuya munan. Chaypis juchallačhu arujcunawa mana manchapacucuna wiycunanta mičhan. Mičhar, janaj pachačhu tiyaj Tayta Diosninchita ullgüchin. Ullgüchiptin, llapan runapa juchanta jurgapanga. ¹⁹⁻²⁰ Llapan runa musyan Tayta Diosninchu pii cashantapis. Quiquinmi musyachimashcanchi. Payga cay pachatapis, janaj pachatapis camaran. Chaypis quiquinta mana ricanchichu. Camashancunata ricarmi ichanga, imaycamanpis munayniyuj cashantapis, shungun alli cashantapis tantiyacunchi. Chaymi pipis chapacuya mana camäpacungachu: «Tayta Diosninchu, ¿piraj cacullanpis?» nir.

²¹ Juchallačhu arujcuna Tayta Diosninchu pii cashantapis musyan. Ichanga mana manchapacunchu. Camashancunata ricaycarsi, aliman mana čhuranchu. Shungunpis chucru. Umanpis mana yarpačhacunchu. Tayta Diosninchu shungun munashantapis tantiyayta mana munanchu. ²² «Yarpay-sapa cä» nirsi, upa runa. Pishi-yarpayyuj. ²³ Tayta Diosninchu munayniyuj caycaptinsi, imay-imaycaman cawacuj caycaptinsi, juchačhu arujcuna mana manchapacunchu. Manchäga jircacunata manchapacun. Ushyacajlla captinsi, runacuna ricchacujmanpis, uywacuna ricchacujmanpis, pichuysacuna ricchacujmanpis, curucuna ricchacujmanpis manchapacun.

²⁴ Upa cayninwan juchallačhu aruya munaptin, Tayta Diosninchipis mana mičharanchu. Paycuna shungun munapashannylla juchallicur, marca-pingay cawan. ²⁵ Marca-pingay cawar Tayta Diosninchita jungaycur, ushyacajcunallaman yupachicun. Ūawin ricashancunallata manchapacun. Camacuj Tayta Diosninchitam ichanga mana manchapacunchu. Rasunpa payllam imay-imaypis aliman čhurash canman. Chaynuy caycullächun. ²⁶ Chaymi juchallačhu arushanpita Tayta Diosninchu cačharycuptin, acaripacur shungun munapashallančhu arun. Warmicunapis runanta mana munar, pingaypaj warmi-masillanwan cacun. ²⁷ Chay-jina runacunapis warmita

* ^{1:16-17} Habacuq 2.4.

mana munar, ullgu-masillanwan cacun. Pingaypaj ullgu-puralla sumaj munapänacun. Chaymi jucha aparicushanman-tupu Tayta Diosninchichi ñacaycächin.

²⁸ Chaura mana manchapacuj caycar pampaman ñuraptin, Tayta Diosninchipiis cañchariycuran shungun munapashanta ruracunapaj. Chaynuupa paycuna chucru shungun car, marca-pingay cawan. ²⁹ Juyu car, llutancunallapaj yarpan. Runa-masincunata chapata ruran. Imancunatapis munapan. Imamanpis ñayachiyta munan. Yargaj. Wañuchicuj. Chiquipäcu. Achäquita ashij. Washa rimaj. ³⁰ Tumpacuj. Tayta Diosninchitapis chiquipan. Runa-masinta ashllin. Pampaman ñuranaçun. Jatuntucun. Mana ricsish juchacunata rurananpäpis yarpaçhacun. Maman-taytantapis mana wiyaçunchu. ³¹ Upa cayninwan imatapis tantiyacuya mana munanchu. Aunishantapis mana ñarcunchu. Runa-masincunata chiquipan. Mana llaquipäcunchu. ³² Chaynuj juchaçhu arushanpita Tayta Diosninchichi wañuyman ñayachinanta musyaycarsi, mana wanacunchu. Manchäga runa-masincunapis juchaçhu aruptin, sumaj cushicun. Shaçyächin.

2

Israel runacunapa juchantapis Tayta Diosninchichi jurgapänanpita willapashan

¹ Chaynuj cawaptinpis, runa-masiquipa juchanta ama jurgapanquichu. Jucta jurgapar, quiquipis juchallaçhu aruycanqui. Chaymi chapacuya mana junquipächu. ²⁻³ Tayta Diosninchim ichanga juctapis mana pacallar, llapan runapa juchanta jurgapanga. Jucha aparicushanman-tupu ñacaymanpis jaycunga. Chaymi: «Alli ñawinwan Tayta Diosninchichi ricamashpan jishpichimanga» nirpis runa-masiquita pampaman ñurarga, chapacuya mana junquipächu. Paycuna-jina juchaçhu cawashayquipita Tayta Diosninchichi sumaj ñacachishunquipaj.

⁴ ¿Alli cayninçhu caycaptinchu, llaquipäcuj caycaptinchu, tantiyacuj caycaptinchu, Tayta Diosninchita wasguiycanqui? Payga wanacárinayquita munar, llaquipäshunqui maquinçhu cawanayquipaj. ⁵ Jamcunam ichanga chucru shungu canqui. Juchaçhu aruypita wanacuytapis mana munanquichu. Mana wanacuptiqui, ñacayman ñayanquipaj. Tayta Diosninchitapis ullguycächinqui. Chaymi llapan runapa juchanta jurgapänan junaj ñayamuptin, mana chapäshunquipächu. Manchäga juchayquita jurgapar, sumaj ñacachishunquipaj.

⁶ Llapanchitapis imanuy cawar rurashanchiman-tupu maymanpis ñayachimäshunpaj. ⁷ Allillaçhu arujcunata imaycamanpis cawachinga. Paycuna Tayta Diosninchichi alli ricananta munar, maquillançhu cawayta munar, shungun munashallanta imatapis ruraran. ⁸ Juyu juchaçhu arujcunatam ichanga jatun-tucushanpita, shiminta wasguishanpita Tayta Diosninchichi imamanpis ñayachinga. Sumaj ullgütishanpita llaquipaypaj ñacachinga.

Juchayuj cashanchita shungunchi musyacächishan

⁹ Paycunata llap-llapanta juyu ñawinwan ricar, imamanpis ñayachinga. Sumaj ñacachinga Israel runa captinsi, jäpa runa captinsi. ¹⁰ Tayta Diosninchipa shungun munashannuy cawajcunatam ichanga alli ñawinwan ricanga. Alliman ñuranga. Allillaçhu cawachinga Israel runa captinsi, jäpa runa captinsi. ¹¹ Llapan runatam juc ñawillawan Tayta Diosninchichi rican. Pitapis mana chapangapächu.

¹² Jäpa runacuna: «Moisés isquirbishanta imaypis mana wiyarüchu» nir chapacurpis, ñacaypita mana jishpingachu. Jucha aparicushanpita Tayta Diosninchichi jurgapanga. Israel runapis: «Moisés isquirbishanta musyä. Llap-llapanta wiyashä» nir chapacurpis, ñacaypita mana jishpingachu. Jucha aparicushanpita Tayta Diosninchichi jurgapanga.

¹³ Payga rinrillanwan shiminta wiyajcunata ricaytapis mana munanchu. Llapan shungunwan wiyacujtam ichanga alli ñawinwan rican. ¹⁴ Waquin jäpa runacunapis

Moisés isquirbishanta mana musyaycarsi, Tayta Diosninchipa shiminta wiyanun. ¹⁵ Manchapacur cawaptin, Tayta Diosninchipa shimin shungunman chayashanta musyachimanchi. Allita rurash caycaptin, shungunpis: «Allim» ninga. Juchata rurash captinmi ichanga, shungullan jitarpunga. ¹⁶ Chaymi runacunapa shungun yarpashantapis Tayta Diosnillanchi musyacächinga. Camacächishan junaj chayamuptin, juchayuj, mana juchayuj cashanchitapis jurgapämänanchipaj Jesucristuta churanga. Paymi llapan runapa shungun yarpashanta musyapan. Chaynuy cananta willapaycaj.

Israel runacunata Tayta Diosninchijuchanta jurgapashan

¹⁷ Waquinniqui chapacur ninqui: «Israel runa caycä. Moisés isquirbishantapis llapanta musyä. Alli ricamar, marca-masintüa Tayta Diosninchia acracamasha jishpichimänanpaj. ¹⁸ Shungun munashantapis musyä. Shiminta charcur, allillata ru-rar cawaycä.» ¹⁹ Jatun-tucur, jäpa runacunatapis ninqui: «Japracunata-jina allipa pushaj Tayta Diosninchia pü cashantapis musyanayquipaj. Chacajchu-jina puriptiquisi, achquipäcuj-jina Tayta Diosninchipa shungun munashanta tantiyachij» nir. ²⁰ Yačhajtucur ninqui: «Jäpa runacuna pishi-yarpayyuj. Mallwa-jina mana imatapis tantiyanchu. Chaymi Tayta Diosninchipa shiminta llapallanta tantiyachij.» ²¹ Sumaj tantiyacunquiman. Jäpa runacunata: «Ama suwacuychu» nir tantiyachirpis, ¿imanirtaj suwacunqui? ¿Imanirtaj shimiuita mana charcunquichu? ²² «Majayquita ama jananpachinquichu» nir tantiyachirpis, ¿imanirtaj quiquipicuna majayquita jananpachinqui? «Jircacunata ama manchapacushunpishchu» nirpis, ¿imanirtaj jarashancunata yatapanqui? ²³ «Tayta Diosninchipa shimin sumaj alli» nirpis shiminta mana charcur, quiquinta pingayman churarcayanqui. ²⁴ Chaypita jamcunapaj shiminchu isquirbiraycan: «Israel runacunajanjan jäpa runacuna Tayta Diosninchita pingayman churaycan» nir.*

²⁵ Israel runacunata Moiséspia shiminta charcuptinchiraj, jirucush captinchiraj, Tayta Diosninchia alli ñawinwan ricamanchi: «Wamrämi canqui» nir. Shiminta mana charcuptinchim ichanga wasguimanchi: «Pü cashayquitapis mana musyächu» nir. ²⁶ Jäpa runacuna mana jirucush captinsi Moiséspia shiminta charcuptin, alli ñawinwan ricar Tayta Diosninchia wamrachacun. ²⁷ Chaynuya jäpa runacuna mana jirucush caycarsi, Tayta Diosninchipa shiminta charcushanpita ñauquishunquipaj: «Israelecuna captiquisi, jurgapäshunayquipaj achäqui caycan. Tayta Diosninchia jamcunallata shiminta musyachishcashunqui. Ichanga mana charcunquichu. Wamräpaj acracushcaj» nir jirucachishcashuptiquisi, wasguipashcanqui.» ²⁸ Chaymi shiminta jananjanallan charcuptiqui, Israel runa captiquisi, jirucush captiquisi, Tayta Diosninchia mana wamrachacushunquipächu. ²⁹ Payga shungun munashallanta charcuptinchiraj, wamrachacamanchi. Shungunchi shungunwan tincuptin, alli ñawinpa ricamanchi runacuna pampaman churamaptinchisi.

3

Israel runacuna Tayta Diosninchipa ricay ñawinchu alli cashan

¹ Chaymi ama ninquichu: «Yuriynipita-pacha Israel runa captispis, ¿manaachi imananchu? ¿Imapäraj papäni jirucachimaran?» ² Allipämi Israel runa yurishcanchi. Unay auquil-lunchicunallawan Tayta Diosninchia parlanacuran: «Shimiita wiyacuptiqui, sumaj yanapäshayqui» nir.

³ Chaura waquin Israel-masinchi Tayta Diosninchipa shiminta chasquicuya mana munaptinsi, ¿Tayta Diosninchipis aunishanta jungaycungachuraj? ⁴ Mana imaysi jungangachu. Payga shiminta charcun. Llapan runa tumaptinsi, shiminta charcur juchanchita jurgapämäshunpaj. Tayta Diosninchipaj rimar, shiminchüpis nin: «Mana llullacunquichu.

* ^{2:24} Isaías 52.5.

Runacunapa juchantapis jurgapanquipaj.

Paycuna chapacuya munar tumpashuptiquisi, llullacushanta taripunquipaj» nir.*

⁵ Waquin Israel runa jucha aparicushanta tucuy-jinanpa chapacur nin: «Tayta Diosninchi allita rurananpaj imatapis ruráman. Juchata aparicuptisi, aunishan-jina shiminta ́charcun. Shiminta ́charcunan alli. Chaymi shiminta ́charcüshiyapti, wascamánan mana camacanmanchu, ¿au?» ⁶ Ichanga runa chapacuya mana camäpacungachu. Tayta Diosninchi llapan runata iwal rican. Israel runacunapa juchantapis, jäpa runacunapa juchantapis llapanta jurgapanga. ⁷ Chaypis waquin runa chapacur ninmanchi: «Shiminta mana ́charcuptisi, Tayta Diosninchi juchäta mana jurgapámanmanchu. Jurgapämaptinmi ichanga, waquin runacunapis Tayta Diosninchita manchapacunga: «Ima allish Tayta Diosninchi shiminta sumaj ́charcun» nir. Chaynuy Tayta Diosninchita manchapacuptin, allipáchi jucha aparicushäpis, ¿au?» ⁸ Chaynuypis chapacun: «Rasunpa llutanta rurapti, Tayta Diosninchi llaquipämashpan alliman ́hayachimanga. Pablush chaynuy willapácuycan» nir. Chaynuy tumpacujcunata quiquin Tayta Diosninchi llapan juchanta jurgapanga.

Llapan runa juchallicushan

⁹ Chaymi ama nishuwanchu: «Israel runacunalla Tayta Diosninchipa shungunmantincun.» Llapallanchi juchallicushcanchi. Israel runacunapis, jäpa runacunapis shungunchi munapashanta rurar, juchačhu cawaycanchi. ¹⁰ Tayta Diosninchipa shimin isquirbirashančhu nin:

«Tayta Diosninchipa ricay ñawinčhu llapan runa juchayuj.

¹¹ Llapan pishi-yarpayyuj.

Tayta Diosninchipäga mana imasi jucunchu.

¹² Llapan runa Tayta Diosninchita wasguipasha.

Pantacash purin.

Mayganpis allita mana ruranchu.*

¹³ Runa-masinta asyächicun.

Llullacullar cawan.

Wañuchicuj curu-yupay cawar, pitapis ashllir ushyan.*

¹⁴ Chiquicur, runa-masinta pampaman ́churan.

Jagayächicuyllačhu arun.*

¹⁵ Pipis mana imanaycaptin, ñacayman ́hayachin.

Wañuchicuymannis ́hayachin.

¹⁶ Maypa purirpis, runa-masinta wañuchir ushyan.

Ushyapacaymanpis ́hayachin.

¹⁷ Allilla cawananpaj mana imasi jucunchu.*

¹⁸ Tayta Diosninchi pii cashantapis mana imasi jucunchu.

Imanillarpis, mana manchapacunchu.»*

¹⁹ Chaynuy Tayta Diosninchipa shimin Israel runacuna-janan isquirbiraycan. Paycunalla Tayta Diosninchipa shiminta ́chasquiran. Chaymi sumaj-sumaj wiycunman caran. ́Charcuya mana camäpacurmi ichanga, Israelpunapis, jäpa runacunapis mana chapacushunpächu Tayta Diosninchi jurgapämashanchi junaj: «Mana imachüpis juchallicushcächu» nir. ²⁰ Tayta Diosninchipa shiminta pipis sumaj-sumaj mana ́charcunchu. Llapallanta ́charcuptinchiraj, Tayta Diosninchi alli ñawinwan ricamanchi. Chaypis ́charcuya mana camäpacunchichu. Chaymi juchayuj cashallanchita musyanchi.

Jesúsman yupachicushanpita willacushan

* **3:4** Salmo 51.4. * **3:12** Salmo 14.1-3; 53.1-3. * **3:13** Salmo 5.9; 140.3. * **3:14** Salmo 10.7. * **3:17** Isaías 59.7-8. * **3:18** Salmo 36.1.

²¹⁻²² Canan alli ñawinwan Tayta Diosninchi ricamänanchipaj mana Moiséspa shimpintarächu sumaj-sumaj ñcharcunanchi. Unaypita-pacha Tayta Diosninchipa shiminwan Moiséspis, willacujcunapis piñapämashcanchi. Chaypis mana sumaj ñcharcuya camäpacunchichu. Cananmi ichanga Jesucristuman yupachicushallanchipita Tayta Diosninchi alli ñawinwan ricamanchi: «Juchaynaj canqui» nir. Chaymi ama chapanchu: «Israel runa caycä» nirpis: «Mana Israel runachu caycä» nirpis. ²³ Llapanchi juchata aparicushcanchi. Mana mayganchisi Tayta Diosninchipa shungun munashannuychu cawanchi. ²⁴ Tayta Diosninchim ichanga llaquipäcu. Jishpichicu. Nuwanchi-raycur wañuyman Washäcu. Jesús ñchayashanpita alli ñawinwanna ricamanchi payman yupachicuptinchi. Jucha aparicushanchitapis mana yarparannachu. ²⁵ Alli ricamänanchipaj Washäcu. Jesús cañamuran. Juchanchi jungacänan-raycur wañuyman ñchayachiran. Jesús juchaynaj car, quiquinpa caway-bidanta jararan Tayta Diosninchipa ullguyninta jasacächinanpaj. Chaymi payman yupachicuptinchi, alli ñawinwan Tayta Diosninchi ricaycämanchi. Unay runacunatapis jucha aparicushanta mana jurgaparanchu. Manchäga paycunapäpis cawayninta Jesús jararan captin, juchanta mana jurgaparanchu. ²⁶ Paycunatapis llaquiparan. Chaynuupa unay runacunatapis, nuwanchitapis Jesúsman yupachicuptinchi, alli ñawinwan Tayta Diosninchi ricamanchi.

²⁷ Chaymi alli ñawinpa ricamänanchipaj ama alli-tucushuwanchu: «Tayta Diosninchipa shimita llapallanta ñcharcü. Shungun munashallanta rurä» nir. Alli ricamänanchipaj Washäcu. Jesúsmanraj yupachicunanchi. ²⁸ Imatapis ñcharcushanchipita ama alli-tucushuwanchu. Tayta Diosnillanchi nimäshuwan: «Juchaynaj canqui» nir. Jesúsman yupachicuptinchiraj, alli ñawinwan ricamanchi. ²⁹ Israel-masicuna, chaymi ama yarpäshunchu: «Israel runacunalla Tayta Diosninchipa shungunman tincun» nir. Tayta Diosninchi llapan runata llaquipan. Jäpa runacunapis shungunman tincun. ³⁰ Tayta Diosninchi jucnaylla. Washäcu. Jesúsman yupachicuptin, llapan runata alli ñawinwan rican Israel runa captinsi, jäpa runa captinsi. ³¹ Chaura yupachicullar Tayta Diosninchipa ricay ñawinchu alli cawar, ¿Moiséspa shimita pampaman ñchurashuwanchu? Mana. Manchäga allipaj Moiséspa shimin caran. Chaymi pampamanpis ama ñchurashuwanchu.

4

Abraham Tayta Diosninchiman yupachicushan

¹⁻² Cananga Abrahampita tantiyacushun. Israel runacuna alli-tucur riman: «Abrahamga marcanchipa unay taytan. Paytaga Tayta Diosninchim alli ñawinwan ricaran» nir. Abraham alli cawaptin, marca-masincunapis alli ñawinwan ricaran. Tayta Diosninchim ichanga mana alli cawashanpitachu alli ñawinwan ricaran; manchäga yupachicushallanpita. ³ Shiminchüpis isquirbiraycan: «Yupachicushallanpita Abrahamta alli ñawinwan Tayta Diosninchim ricaran» nir.*

⁴ Canan mä, tantiyacushun. Arupacur ñchasquishanchi mana jarayninchichu; manchäga callpanchipa ñchaninmi. ⁵ Tayta Diosninchim ichanga alli ñawinwan ricamanchi mana imatapis arushanchipitachu, mana imatapis rurar cawashanchipitachu. Manchäga juchaçhu cawaycaptinchisi payllaman yupachicuptinchi, alli ñawinwan ricamanchi. ⁶ Unaypis chaynuy caran. Yupachicushallanpita Tayta Diosninchim runacunata alli ñawinwan ricaran; mana ima allitapis rurar cawashanpitachu. Shungunman tincuptin, cushish cawaran. Chaymi unay mandaj David cantaran:

⁷ «Cushicärishun.
Tayta Diosninchipa shungunman tincunchi.
Jucha aparicushanchita jungasha.
Llutan rurashanchita mana yarparannachu.

* ^{4:3} Génesis 15.6.

⁸ Cushicärishun.

Alli ñawinwan Tayta Diosninchí ricamanchi.

Juchanchita mana imaysi jurgapämäshunnachu» nir.*

⁹ Chaynuy captin, yarpačhacushun. Tayta Diosninchí, ¿pitataj alli ñawinwan rican? ¿Jirucush Israel runacunallatachuraj? Mana. Musyanchi Abrahamta yupachicushallan-pita Tayta Diosninchí alli ñawinwan ricashanta. ¹⁰ Alli ñawinwan ricananpaj, ¿Abraham jirucushachu? Mana. Jirucuya mana yačhaycarsi, Tayta Diosninchiman yupachicuran. Jipataraj jirucusha. ¹¹⁻¹² Jirucunanpaj Tayta Diosninchí niran: «Abraham, yupachicamar; jirucuy. Yupachicamashayquipita shunguman tincunqui.» Chaymi waquin auquillunchicuna mana yuriptillanräsi, auquillunchi Abrahamta alli ñawinwan ricaran. Payga Tayta Diosninchipa maquinčhu cawananpaj, änir jirucusha. Chaynuypa Abraham Tayta Diosninchiman yupachicujcunapa taytan-yupay caycan. Chaymi mana jirucush jäpa runa captinchisi, jirucush Israel runa captinchisi, Abraham-jina yupachicuptinchi, alli ñawinpa Tayta Diosninchí ricamanchi.

Tayta Diosninchí aunishanpita willacushan

¹³ Unayga Abrahamta aunir, Tayta Diosninchí niran: «Abraham, yupachica-mashayquipita pii-maytapis alli ricashaj. Jam-raycur, willcayquicuna-raycur, pii-maytapis sumaj yanapäshaj.» Chaura mana Moiséspa shiminta čharcushanpitachu auniran; manchäga yupachicushallanpita. ¹⁴ Chaymi: «Moiséspa shiminta čharcujcunalla Tayta Diosninchí aunishanta čhasquinga» nimaptiqui, ¿imapäraj Tayta Diosninchiman yupachicunchi? ¿Imapäraj Tayta Diosninchipis auniran? ¹⁵ Jäpa runacuna Tayta Diosninchipa shiminta mana čhasquiranchu. Chaymi wiycushanpitapis, mana wiycushanpitapis Tayta Diosninchí juchanta mana jurgapanmanchu. Waquin runacunam ichanga Tayta Diosninchipa shiminta čhasquirsi, mana čharcunchu. Chaymi mana wiycushanpita, Tayta Diosninchita ullgütchishanpita, unyanta cutichinan camacan. ¹⁶ Payman yupachicuptinchim ichanga, aunishanta Tayta Diosninchí čharcun. Llaquipämashpanchi alli ñawinpa ricamanchi. Chaymi Moiséspa shiminta wiycuj Israel runa carsi, jäpa runa carsi, Abraham-jina yupachicushun. Yupachicujcunaga Abrahampa wawanwan tincun. ¹⁷ Aunishanta unayna Tayta Diosninchí musyachicuran. Shiminchüpis isquirbiraycan:

«Abraham, chay-chica marcpa taytan canayquipaj jamta acracushcaj» nir.*

Tantiyayta mana atiparsi, Abraham sumaj yupachicuran. Tayta Diosninchí wañushcunata cawarachinantapis, mana ricashancunata camacächinantapis musyaran.

¹⁸ Tantiyayta mana atiparsi, Tayta Diosninchí aunishanman Abraham sumaj yupachicuran. Payta aunish caran: «Abraham, willcayquicuna chay-chicaj can-gapaj. Yupaytasi mana atipaypaj miranga. Chay-tucuyčüpis marcayangapaj» nir.* ¹⁹ Auninacushan wíchan Abraham pačhac (100) wata-yupayta aywaycaran. Churiyäcunapaj alläpa chachana caran. Warmin Sarapa quilla jishyanpis čharcushana caran. Chaypis Tayta Diosninchí aunishanman Abraham yupachicuran. ²⁰ Ishcay yarpayta mana yarparanchu. Manchäga sumaj yupachicuran. Tayta Diosninchitapis alliman čhuraran: «Taytallau Tayta, ima allish wamrata tarichimanquipaj» nir. ²¹ Aunishanta Tayta Diosninchí camacächinantapis musyaran. ²² Chaynuy yupachicuptin, alli ñawinwan Tayta Diosninchí juchaynajta ricaran. ²³ Mana Abrahamllatachu yupachicushanpita alli ñawinwan rican. Manchäga isquirbirashančhu nuwanchipäpis rimaycan. ²⁴ Yupachicuptinchi, alli ñawinpa Tayta Diosninchí ricamanchi. Paymi Taytanchi Jesústa wañuypta cawarachimuran. ²⁵ Juchanchi-janan jishpichimänanchi-raycur Jesúsa wañuyman čhayanapäpis Tayta Diosninchí camacächiran.

* **4:8** Salmo 32.1-2. * **4:17** Génesis 17.5. * **4:18** Génesis 15.5.

Jinarcur cawarachimuran: «Jucha aparicushayqui-janan Jesús caway-bidanta churaptin, shimita chasquicucunata alli ñawipa ricä» nir.

5

Alli ñawinpa Tayta Diosninchchi ricamashanchi

¹ Chaymi Taytanchi Jesucristuman yupachicuptinchi, alli ñawinwan Tayta Diosninchchi ricamanchi. Jesucristu wañuyinpa juchaynajta ricamashpanchi maquinchüpis allilla cawachimanchi. ² Jesucristu camacächisha Tayta Diosninchipa shungunwan tincunanchipaj. Payga llaquipämashpanchi maquinchu purichimanchi. Janaj pachaman apacamänanchita musyarpis, cushish cawaycanchi. Ñaupallanchu cawashunpaj. ³ Runacuna ñacachimaptinchisi, cushish cawanchi. Ñacaywan Tayta Diosninchipa shungun munashannuy cawayta sumaj yačhacunchi. ⁴ Shungun munashannuy cawayta yačhacuptinchi, shungunwan tincunchi. Shungunwan tincuptinchi, ñaupanman apacamänanchita mana yamacaypa shuyaraycanchi. ⁵ Chaymi ñacayman chayaptinchisi, shungunchi mana llaquicunchu. Manchäga maquinchu Espíritu Santu purichimaptinchi, Tayta Diosninchí llaquipämashanchitapis sumaj tantiyacunchi.

⁶ Llapanchi juchaéhu cawaptinchisi, wañuypita jishpiyta mana camäpacuptinchisi, nuwanchi-raycur Washäcuj Jesús wañuyman chayananta Tayta Diosninchchi camacächiran. ⁷ Alli runata, Tayta Diosninchipa shiminta charcuj runata pipis wañuy-caway washaman. ⁸ Tayta Diosninchim ichanga sumaj llaquipämanchi. Wasguiptinchisi, juchaéhu aruycaptinchisi, jishpichimänanchi-raycur Washäcuj Jesús wañuyman chayananta camacächiran. ⁹ Wañur, caway-bidanta churasha alli ñawinwan Tayta Diosninchchi ricamänanchipaj. Washämaptinchisi, Tayta Diosninchipa ullguynin jasacäcusha. Ñacaymanpis mana chayachimäshunpänachu. ¹⁰ Chiquiptinchisi, shungunwan shungunchi tincunanta munaran. Chaymi nuwanchi-raycur Wawan Jesús wañuyman chayanapaj camacächiran. Cananmi ichanga cawarimusha. Cawarish caycar, sumaj yanapaycämanchi Tayta Diosninchipa maquillanchu cawananchipaj. Chaymi alli ricanacunchi. ¹¹ Chaypitam shiminchita mana amucurcunchichu. Manchäga alli ñawinwan Tayta Diosninchchi ricamashanchipita, washämänanchi-raycur Tayta Jesucristuta cačhamushanpita sumaj cushicunchi.

Adánwan Jesucristuta tincuchishan

¹² Sumaj tantiyacushun. Unayga Tayta Diosninchita mana wiycuran, Adán juchata aparicuran. Chaypita wañuran. Wañuran juchata aparicushanpita. Cananpis Adán-jina llapanchi juchata aparicushanchipita wañuyman chayashunpaj. ¹³ Moisés mana willapäcuptillan, unay runacunapis juchallaéhu cawaran. Chaymi paycuna chapacuyta mana camäpacuranchu: «Shimiquita mana musyashcächu» nir. Chaynuy chapacuptinsi, llapanpa juchanta Tayta Diosninchchi jurgaparan. ¹⁴ Chaymi Adán cawashan wichenpita Moisés cawashan wichenaman llapan runa juchata aparicushanpita wañuran. Quiquin Adán juchata aparicushan-jina llapan runa wañuyman chayan Tayta Diosninchipa shiminta mana musyarpis. Chaymi tincuchiypa tantiyachimanchi: Adán llapan runata wañuyman jancharan. Washäcuj Jesúsmi ichanga llapan runata alli cawayta tarichinanpaj camacächiran.

¹⁵ Jesucristu Tayta Diosninchita wiycuran. Adánmi ichanga mana wiycuranchu. Adánpita llapanchi wañuyman chayashunpaj juchata aparicushanchipita. Jesucristupitam ichanga sumaj llaquipämashpanchi alli ñawinwan Tayta Diosninchchi ricamanchi. Tayta Diosninchipa maquinman chayachimänanchi-raycur caway-bidanta Jesús churaran. ¹⁶ Tayta Diosninchchi llapanchita jurgapämäshunpaj ima juchata aparicushanchitapis. Jurgapämäshun Adán juchata aparicushanpita. Paypa juchan llapanchita aypämashcanchi. Juchayuj caycar, ñacayman chayananchi camacan. Chaypis llaquipämashpanchi alli

ñawinwan Tayta Diosninchi ricamanchi: «Juchaynaj canqui» nir. ¹⁷ Adán mana wiyanushanpita llapanchi wañuyman chayananchi. Jesucristu washämaptinchim ichanga, Tayta Diosninchiwan allina ricanacunchi. Sumaj llaquipämashpanchi alli ñawinwan ricamanchi. Chaymi janaj pachačhu imaycamanpis Jesucristuwan cawashunpaj.

¹⁸ Chaymi Adánlla juchata aparicush captinsi, llapanchitana Tayta Diosninchi jurgapämashunpaj: «Jucha-sapa canqui» nir. Jesústa wiyacuptinchim ichanga, alli ñawinpa ricamashpanchi imaycamanpis cawachimäshunpaj. ¹⁹ Adán mana wiyanushanpita llapanchi juchata aparicushcanchi. Jesústa wiyacushanchipitam ichanga alli ñawinwanna Tayta Diosninchi ricamanchi. ²⁰ Unayga Moiséwan Tayta Diosninchi shiminta musyachicuran runacuna allíchu cawananpaj. Runacunam ichanga charcuya mana camäpacur, juchačhu arushanta tantiyacuran. Juchata aparicuptinsi, Tayta Diosninchi mana yamacaranchu. Manchäga unay runacunatapis, nuwanchitapis sumaj llaquipaycämanchi. ²¹ Mayganinchipis juchata aparicushanchipita wañuyman chayananchi caran. Llaquipämashpanchi Taytanchi Jesucristu washämaptinchim ichanga, alli ñawinwan Tayta Diosninchi ricamanchi. Janaj pachačhu imaycamanpis cawananchipaj shuntacamäshunpaj.

6

Ushyacushpanchi Jesucristuwan cawanchi

¹ Chaura Tayta Diosninchi llaquipämashanchita willapaptij, llutanta yarparunquiman. Ama nimanquimanchu: «Juchata aparicushäman-tupu Tayta Diosninchi llaquipämaptin, juchačhüchi sumaj arushaj.» ²⁻⁴ Juchata ama aparicushuwanchu. Jesús wañuyman chayashanta musyanchi. Ayantapis pampaycuran. Tayta Diosninchim ichanga munayninwan cawarachimuran mushuj cawayčhu cawananpaj. Nuwanchipis Washäcu Jesúsman yupachicunchi. Maquinčhu cawar, ushyacunchi. Ushyacur, pampacuycaj-yupay ricacunchi. Aya imatapis mana munashan-jina nuwanchipis juchata ama munapäshuwannachu. Manchäga Jesúspa maquinčhu cawaycar, mushuj cawayčhüna cawashun. ⁵ Payga wañuyman chayar, cay pachačhu cawaytapis jaguiycuran. Tayta Diosninchim ichanga mushuj cawayman cawarachimuran. Nuwanchipis Jesúsman yupachicur ushyacurmi, jucha rurayta jaguishcanchina. Chaymi Jesús cawarachimushan-jina nuwanchitapis mushuj cawayman churamanchi. Jesúswanna cawanchi.

⁶ Mä, tantiyacushun. Ñaupata juchačhu aruyta mana munaptinchisi, jucmi maquichacamashcanchi llutanta rurananchipaj. Cananmi ichanga Jesúsman yupachicushanchipita mana maquichacamanchichu. Jesús rusčhu wañuyman chayashan-jina nuwanchipis wañush-yupay ricacushcanchi. Mana juchallačhünachu cawaycanchi. ⁷ Pipis wañur, juchata mana aparicunnachu. Chay-jina nuwanchipis jucha rurayta jaguishcanchi. ⁸ Wañuyman chayashanchi-yupay caycaptinchisi Washäcu Jesúsman yupachicuptinchi, imaycamanpis Tayta Diosninchi cawachimäshun. Payga Jesústa cawarachimushan-jina nuwanchitapis mushuj cawayman chayachimashcanchi.

⁹ Cawarish caycar, Washäcu Jesús yapay mana wañungachu. Wañuyman mana chayangachu. Tayta Diosninchi cawarachisha. ¹⁰ Juchapita washämänanchipaj juc cutilla wañuyman chayaran. Juchayuj caycaptinchisi, nuwanchi-raycur wañuyman chayaran. Cawarcamurpis, Tayta Diosninchipa shungun munashallanta rurar cawaycan. ¹¹ Aya juchata mana aparicushan-jina nuwanchipis jucha aparicuyta jaguiycushcanchi. Mushuj cawayčhüna Washäcu Jesús cawaycächimanchi. Chaymi Tayta Diosninchipa shungun munashallanta rurar cawaycanchi.

¹² Chaymi wañucujlla caycar, juchačhu ama arushunnachu. Llutan rurayta munaparsi, juchata ama aparicushunnachu. ¹³ Imačhüpis ama juchallicushunnachu.

Jesús-jina nuwanchipis Tayta Diosninchipa maquinchú cawashun. Shungun munashannuy cawar, allillata rurashun. Payga wañuypta cawarimushta-yupayna ricamanchi. Chaymi shungunwan tincushallanta rurar cawashun. ¹⁴ Tayta Diosnichi alli ñawinwan ricamanchi mana Moiséspa shiminta ćharcuptinchichu. Manchäga llaquipämashpanchi paypa maquinchüna cawaycanchi. Yanapämaptinchi, shungun munashannuy cawashun. Jucha ruraytapis ama munapäshunnachu.

Tayta Diosninchipa shungunman tincushanta rurananchipaj

¹⁵ Sumaj tantiyacushun. «Llaquipämashpanchi alli ñawinwan Tayta Diosninchichi ricamanchi shiminta mana ćharcuptinchisi» nir willapaptij, llutanta yarparunquiman. Ama jitapämanquichu: «Alli ñawinwan ricamashpanchi jishpichimaptinchiga, juchačhu arucushaj» nir. ¹⁶ Musyanchi uyway runa taytanpa shiminta wiycushanta. Nuwanchipis uyway-yupay caycanchi. Chaymi: «Tayta Diosninchipa maquinchú cawä» nirga, shimintapis sumaj wiycushuwan. Shungun munashallanta rurashuwan. Chaynuy cawaptinchi, alli ñawinwan ricamanchi. Mana wiycuptinchim ichanga, supaypa maquinchú cawar juchata aparicushanchipita wañuyman ćhayashunpaj.

¹⁷ Cananga supaypa maquinchú mana cawanchichu. Manchäga Tayta Diosninchipa maquinchüna cawaycanchi. Ima allish willapäcushäcuna shunguyquiman ćhayasha. Llapan shunguyquiwanna wiycuycanqui. ¹⁸ Jucha aparicuya jaguinayquipaj Tayta Diosninchichi jishpichishcashunqui. Cananga maquinchú cawar, uywaynin-yupay shungun munashallanta ruranquiman. ¹⁹ Ushyacajlla caycanchi. Chaymi sumaj tantiyacu-nayquipaj uyway runawan tincuchiypa willapaycaj. Tayta Diosninchipa maquinchú mana cawar, llutan rurayllata, jucha aparicuylata yarpashcanchi. Cananmi ichanga paypa maquinchú cawar, allillata rurashun. Shungunman tincushallanta rurashun.

²⁰ Tayta Diosninchipa maquinchú mana cawarraj shungunchi munapashallanta rurar, juchata aparicushcanchi. Mana pipis piñapämaramanchichu: «Tayta Diosninchipa shungun munashallanta ruray» nir. ²¹ Munapashallanchita rurar, pingayllaman ćhayashcanchi. Pingayman ćhayar, Tayta Diosninchichiwan imaysi mana tincushuwanchu caran. Manchäga wañuyman ćhayashuwan caran. ²² Tayta Diosninchim ichanga maquinchú purichimanchi: «Jamta acracushcaj» nir. Shungunchitapis ticrachiran: «Jucha aparicuya ama munapanquichu. Manchäga shungü munashallanta ruranqui» nir. Shiminta wiycuptinchii, alli ñawinwan ricamashpanchi janaj pachaman shuntacamäshun imaycamanpis cawananchipaj. ²³ Chaymi Taytanchi Jesucristuman yupachicur maquinchú cawaptinchi, Tayta Diosninchichi imaycamanpis cawahimäshun. Juchallačhu arujcunam ichanga wañuyman ćhayanga.

7

Moiséspa shiminpita willapäcushan

¹ Irmänucuna, Moiséspa shiminta sumaj musyanchi, ¿au? Llapallantapis ćharcunanchi; wañurmí ichanga manana. Chaymi tincuchiypa tantiyacushun. ²⁻³ Majayuj warmi majanpa maquinchú cawan. Shimintapis wiycun. Majayuj caycar jucwan cacurga, majanta jananpachin. Majan wañucuptinmi ichanga, japallanna ricacun. Jucwan majachacar, wañuj majanta mana jananpachinnachu.

⁴ Irmänucuna, llapanchi juchata rurar purishcanchi. Nuwanchi-raycur Washäcuj Jesús wañushanman yupachicurmi ichanga, wañush-yupay ricacushcanchi. Jucha ruraypitapis jishpichimashcanchi. Chaymi alli ñawinwan Tayta Diosninchichi ricamänanchita munar, mana Moiséspa shimintarächu ćharcunanchi. Manchäga Jesúspa maquinchüna cawananchi. Paytana wiycunanchi. Wañushanpita Tayta Diosninchichi cawarachimusha. Paypa shungun munashannuyna cawashuwan. ⁵ Ñaupata supaypa maquinchú cawar

Moiséspa shiminta Čharcuya munaptinchisi, supay imačhüpís jucha aparicuya mu-napächimaranchi. Juchačhu cawaycaptinchi, wañuyman čhayananchi caran. ⁶ Cananmi ichanga Tayta Diosninchipa maquinčhu cawananchipaj mana Moiséspa shimintarächu wiycunanchi. Wañush-yupay caycar, Moiséspa shiminta wiycunanchi mana camacan-nachu. Juchata rurar mana cawanchinachu. Manchäga Espíritu Santu yanapämaptinchi, Tayta Diosninchipa shungun munashallanta rurar cawaycanchi.

Moiséspa shiminpitá juchayuj cashanta tantiyacushan

⁷ Chaynuy captinsi, ama yarpäshunchu: «Moiséwan Tayta Diosninchichi isquirbirächishan shimin sasa. Čharcuya mana camäpacupti, wañuyman čhayachiman» nir. Paypa shimin alli. Jucha ima cashantapis tantiyachimanchi. Nuwanchi-raycur Tayta Diosninchichi musyachicun: «Runa-masiquipa imancunatapis ama munapanquichu» nir.* Chayraj imatapis munapar: «Juchata aparicushcanqui» nir jurgapämänanchita tantiyacunchi. ⁸ «Ama munapanquichu» nimaptinchisi, yargaj canchi. Runa-masinchipa imancunat-apis sumaj munapanchi. Ichanga Tayta Diosninchipa shimin mičhäaptinchiraj, jucha cashanta tantiyacunchi. Shimin mana mičhäaptinchim ichanga, ima juchatasi mana aparicushuwanpishchu.

⁹ Ñaupata Moiséspa shiminta mana musyar, imasi mana jucushcächu. Shiminta musyarmi ichanga juchačhu cawashätapis, ¹⁰ Tayta Diosninchipa maquinčhu mana cawashätapis tantiyacushcä. Moiséspa shiminta Čharcur imaycamanpis cawayta yarpashcä. Shimin juchačhu cawashäta musyachimaptinmi ichanga, imaypis wañuyman čhayanäta tantiyacushcä. ¹¹ Chaypis llutanta yarpar nishcä: «Juchačhu cawarsi Moiséspa shiminta llapanta Čharcurga, imaycamanpis Tayta Diosninchipa maquinčhu cawashaj.» Chaynuy nirpis, Tayta Diosninchipa maquinpitá witicushäpita wañuyman čhayachimänan caran. ¹² Chaypis Moiséspa shimin alli. Payga Tayta Diosninchipa shiminta willacuran. Ima-imata rimashanpis sumaj alli. Wiyacushanpis alli.

¹³ Chaynuy captin, ama yarpämanchu: «Moiséspa shimin alli captinsi wañuyman čhayar, Tayta Diosninchawan mana imaysi tincushächu» nir. Mana Tayta Diosninchipa shimin-jananchu wañuyman čhayashaj. Manchäga paypa shiminta Čharcuya mana munarmi, wañuyman čhayashaj. Juchallačhu aruya munaparmi, juchata aparicü. Juchalllicur, juchallačhu cushish arushäta tantiyacü. Jucha-sapa cashäta Moiséspa shimin musy-acächin.

¹⁴ Musyanchi Moiséspa shimin Tayta Diosninchipa shimin cashanta. Nuwam ichanga wañuj runa car, juchata aparicúllar cawä. Mana wiycur, shungü munapashal-lanta rurä. ¹⁵ Tantiyayta mana atipächu. Llutanta rurarpis, mana pingacüchu. Alli rurayta munarsi, chucru shungu cä. Llutancunata juclla rurä. Allita ruraytam ichanga sasächicü. ¹⁶ Chaynuy jucha ruray jančhamaptinsi, ičhipuya mana camäpacuptisi, Moiséspa shimin alli. ¹⁷ Čharcuytapis munä. Chaypis mana camäpacüchu. Shungüga munapashallanta ashir, juchaman jančhaman. ¹⁸ Wañuj runa capti, juchallačhu purichi-man. Allillata rurayta munarsi, mana camäpacüchu. ¹⁹ Alli rurayta munarsi, llutanta rurä. Jucha rurayta wasguiyta munarsi, juchata aparicü. ²⁰ Jucha aparicuya mana munarsi, juchata aparicü. Ichanga mana quiquipitachu aparicü; manchäga shungü jančhamaptin.

²¹ Cananraj sumaj tantiyacü. Tayta Diosninchipa shimin nishallanta rurayta munaptisi, shungü jucha aparicuytaraj munapan. Alli rurashäpita chapäman. ²² Tayta Diosninchipa shungunman shungü tincunanta munä. Shimintapis wiycuyta munä.

²³ Wiyacuya sumaj munaptisi, shungü juchata munapan. Munapashanta ca-macächiptin, jucha rurayman čhayä. ²⁴ Wañuj runa carmi, sumaj llaquicü. Imamanpis

* ^{7:7} Éxodo 20.17; Deuteronomio 5.21.

chayashaj. Juchallicush captii, ¿piraj wañuypita jishpichimanga? ¿Piraj Tayta Diosninchawan tincuchimanga? ²⁵ Chaypis sumaj cushicü. Tayta Diosninchitapis alliman churä. Ima allish Taytanchi Jesucristuta cačhamusha llapaninchita jishpichimänanchipaj.

Chaymi ama jungashunchu. Tayta Diosninchipa shiminta charcushuwan. Shiminta charcuya munarsi wañuj runa caycar, juchatapis aparicunchi.

8

Espíritu Santu charimashanchipita willacushan

¹ Washäcu Jesúspa maquinchu cawaptinchi, mana juyu ñawinwanchu Tayta Diosninchiri camanchi. Ñacaymanpis mana jaycamanchichu: «Juchayyujmi canqui» nir. ² Manchäga Washäcu Jesúspa maquinchu cawaptinchi, Espíritu Santu cawachimanchi. Payga jucha munapaypita jishpichimanchi. Wañurpis, chacaj pachaman mana chayashunchu. Manchäga Tayta Diosninchipa ñaupanman chayashunpaj. ³ Paymi nuwanchi-raycur llapanta camacächiran. Ñaupataga shungunchi munapashallanta rurar wañuj runa caycar, Moiséspa shiminta charcuya mana camäpacushcanchichu. Chaymi wañuyman chayananchi caran. Chaynuy captinchisi, Wawan Jesústa Tayta Diosninchichi cačhamuran. Jesúsga wañuj runa yuriran. Ichanga nuwanchi-jina runa caycarsi, juchata mana aparicuranchu. Chaypis nuwanchi-janan runacuna ñacachiran. Nuwanchi-raycur wañuymanpis chayachiran. Chaypitam juchaynajtana Tayta Diosninchichi ricaycämancchi. ⁴ Cananraj paypa shiminta charcuycanchi. Ñaupata shungunchi munapashallanta rurar, juchallačhu arushcanchi. Cananmi ichanga Espíritu Santu shacyächimaptinchi, Tayta Diosninchipa shungun munashannylla cawaycanchi.

Espíritu Santu pusharämashanchipita willapashan

⁵ Juchallačhu arujcuna shungun munapashallanta ashin. Tayta Diosninchipa shungun munashanta ashijcunam ichanga Espíritu Santuta wiycur cawan. ⁶ Juchačhu arujcuna shungun munapashallanta ashir, wañuyman chayan. Tayta Diosninchipa ñaupanman imaypis mana chayangapächu. Espíritu Santuta wiycurmii ichanga, allilla cawanchi. Tayta Diosninchipa ñaupančüpis cawashunpaj. ⁷ Juchačhu arujcuna shungun munashallanta ashir, Tayta Diosninchita ticrapun. Shiminta wiycuya munarsi, charcuya mana camäpacunchu. ⁸ Chaymi shungunchi munapashanta rurar, Tayta Diosninchipa shungun munashanta ruraya mana camäpacunchichu.

⁹ Jamcunam ichanga shunguyqui munapashanta mana ruranquinachu. Manchäga Espíritu Santuta wiycuycanqui. Washäcu Jesú camacächiyninpa shiminta chasquicushayquipa Espíritu Santupa maquinchu cawarcaycanqui. Mana chasquicujcunatam ichanga maquinchu mana charanchu. ¹⁰ Maquinchu Washäcu Jesú purichimaptinchi, Tayta Diosninchipis: «Juchaynaj caycanqui» nir alli ñawinwan ricamanchi. Chaymi juchata aparicushanchipita wañuyman chayarsi, mana ushyacaj cawaychüna Tayta Diosninchichi puriyächimanchi. ¹¹ Sumaj tantiyacushun. Runacuna Washäcu Jesústa wañuchiptinsi, Espíritu Santuwan Tayta Diosninchita cawarachimusha. Wañushanpita Jesústa cawarachimushan-jina nuwanchitapis Espíritu Santuwan cawarachimäshunpaj. Paymi maquinchu charämancchi.

¹² Irmänucuna, sumaj tantiyacushun. Espíritu Santu charämaptinchi, Tayta Diosninchipa shungun munashanta rurashun. Quiquinchi munashanchinylla ama cawashunchu. ¹³ Shungunchi munashallanta ashiptinchi, wañuyllaman chayashunpaj. Espíritu Santu yanapämaptinchim ichanga jucha aruypita witicur, imaycamanpis Tayta Diosninchipa ñaupanchu cawashunpaj.

¹⁴ Espíritu Santu shacyächimashanchinylla cawashpanchi Tayta Diosninchipa wawan caycanchi. ¹⁵ Chaymi mana manchacunchinachu. Mandu-rurajcuna jucpa maquinchu cawar imata mañacuriytapis manchacun. Nuwanchim ichanga Tayta Diosninchipa

wawan cashpanchi imatapis mañacunchi: «Papäninchi» nir. ¹⁶ Shungunchipis shungunwan tincuptin, Tayta Diosninchipa wawan cashanchita Espíritu Santu sumaj musyachimanchi. ¹⁷ Chaymi wawan captinchi, imaypis mana pishichimäshunpaj. Washäcu Jesústa ricashan-jina nuwanchitapis ricamäshunpaj. Runacuna Jesústa ñacachishan-jina nuwanchita ñacachimaptinchisi, achicyaj pachaman Tayta Diosninchichi chayachimäshunpaj. Jesústa-jina nuwanchitapis alli cayman churamäshunpaj.

Tayta Diosninchipa ñaupančhu sumaj cushicuypita willapashan

¹⁸ Chaymi ñacayman chayarpis, ama imasi jucushunchu. Tayta Diosninchipa ñaupanman chayaptinchi, achic-achicyaycaj pachačhu cawachimäshunpaj. Chaywichanga ima cushicuymaraj chayachimäshunpaj. ¹⁹⁻²¹ Chaypis ñaupanman shuntamänanchi junaj mana chayamunrächu. Tayta Diosninchichi camashancuna llapanpis uticash cashpan shuntamänanchitaraj shuyäcuycan. Camashancuna quiquillanpita alliman tircrayta mana junchu. Manchä ismucäcun. Wañucurin. Tayta Diosninchichi camacächiptin, manacajmanpis chayan. Shuntacamänanchi junajmi ichanga llap-llapanta jishpichinga. Camashancunata shungun munashanman cutichinga. Wamrancunatapis ricsichicur, alli cawayčhu cawachinga.

²² Jishyaj warmi nanaywan japaraptin, jishyacuycashanta musyanchi. Chaynuymi Tayta Diosninchichi camashancunapis cananllaga alliman jishpichinanta munar, japaraycan. ²³ Nuwanchipis ñacayčhu cawar, sumaj llaquicunchi. Janaj pachaman mana chayallarpis, Espíritu Santupa maquinčhu cawaycanchi. Shuntamashpanchim ichanga Tayta Diosninchichi ricsichicamäshun: «Wawämi canqui» nir. Juc-niraj cawayčhüna cawachimäshunpaj. Mana wañucujnachu imaycamanpis cawachimäshunpaj. Chaynu cawananchita shuyarpaycanchi.

²⁴ Jucha aparicuypita Tayta Diosninchichi jishpichimashanchipita-pacha shuyarpaycanchi janaj pachaman shuntacamänanchita. Chaypis mana shuntacamashanchicaman Tayta Diosninchiman yupachicuycänanchi. ²⁵ Janaj pachaman chayash caycar, ¿shuntacamänanchita yupachicushungarächu? Mana. Chaymi ima ñacayman chayarsi, Tayta Diosninchiman yupachicur shuyarpaycanchi.

²⁶⁻²⁷ Llutäpacuptinchisi, Espíritu Santu yanapämanchi. Llutäpacur mañacuya mana camäpacuptinchisi, tantiyamanchi. Quiquinmi Tayta Diosninchita mañacapamanchi. Llapán wawancunapa shungun munashanta tantiyachin. Tayta Diosninchipa shungun munashannuya parlapämanchi.

Llaquipämashpanchi Tayta Diosninchichi mana cačharimänanchipita willapashan

²⁸ Ima ñacayčhu captinchisi, Tayta Diosninchichi yanapaycämanchi. Payta manchapacuptinchi, imatapis allipaj camacächin. Chaycuna tantiyachimanchi shungun munashannuy cawananchipaj. Chaypämi acracamashcanchi. ²⁹ Cay pachata mana camallarraj, llapan shiminta wiyacujcunatapis, nuwanchitapis Tayta Diosninchichi acracamashcanchi Wawan Jesúzman llucshinanchipaj. Jesúsga Tayta Diosninchipa jichpa wamran-yupay caycan, nuwanchina shullca wamran-yupay. ³⁰ Chaymi shungun yarpashannuy camacächir, acracamashcanchi. Wamrachacamashcanchi. Alli ñawinwan ricamanchi. «Juchaynajmi canqui» nir achic-achicyaycaj pachamanpis shuntacamäshunpaj.

³¹ Sumaj tantiyacushun. Tayta Diosninchichi tucuy-jinanpa yanapaycämanchi. Chaymi runacuna ñacachimaptinchisi, chapata ruramaptinchisi, ama llaquicushunchu. ³² Sumaj llaquipämashpanchi nuwanchi-raycur quiquinpa Wawan Jesústapis wañuypita mana jishpichishachu. Manchäga jucha aparicushanchipita jishpichimänanchi-raycur wañuyman chayachisha. Cawarcachimur, janaj pachamanpis shuntacusha. Cananga alli ñawinwan ricamashpanchi tucuy-jinanpa yanapaycämanchi. ³³ Runacuna: «Jucha-sapa» nimaptinchisi, Tayta Diosninchichi chapaycämanchi. Acracamashpanchi alli ñawinwan

ricaycämanchi: «Juchaynaj carcaycanqui» nir. ³⁴ Chaymi pipis mana jurgapämäshunnachu: «Juchačhu arushcanqui» nir. Jishpichimänanchi-raycur mayna Jesús wañuyman čhayasha. Cawarcachimur, mandäshinanpaj Tayta Diosninchi janaj pachaman shuntacusha. Diricha-caj lädunčhu jamachiran. Chayčüna Washäcu Jesús parlapaycämanchi.

³⁵ Washäcu Jesús sumaj llaquipämanchi. Maquillančhu chararämanchi. Chaymi tucuy-jinanpa ñacaptinchisi, yargaptinchisi, pishipacuptinchisi, llaquicuptinchisi, wañuchimaptinchisi, mana jungamanchichu. ³⁶ Tayta Diosninchipa shiminčüpis nin: «Maquiquíchu cawashápita jaticačhar ushyarcaycäman.

Uyshata pishtashan-jina wañuchimayta ashircaycan.»*

³⁷ Chaypis Washäcu Jesús llaquipämaptinchí imaman čhayarsi, allíchu llucshinchi.

³⁸⁻³⁹ Maquinpitapis Tayta Diosninchi mana cačcharimäshunchu. Cay pachačhu cawaypis, wañuypis, janaj pachačhu munayniyujcunapis, pacha rurinčhu munayniyujcunapis, canan wican tincupacaycunapis, wara-warantinpaj yarpačhacuycunapis mana wasguichimäshunchu. Mana imapis maquinpita jurgamäshunchu. Tayta Diosninchi mana cačcharimäshunchu. Taytanchi Jesucristuta cačhamuyninpa sumaj llaquipämashanchita musyachimaranchi. Cananga paypa maquinčüna cawanchi.

9

Israel runacuna Tayta Diosninchiman mana yupachicushan

¹ Irmänucuna, Israel-masicuna Washäcu Jesúsman mana yupachicuptin, llaquish cawä. Mana llullacüchu. Washäcu Jesúsman yupachicupti, Espíritu Santu yanapáman rasul-lanta rimanäpaj. ² Sumaj-sumaj llaquicü. Waran-waran shungüpis nanan. ³ Israel-masicuna Washäcu Jesúsman yupachicunan-raycur, imamanpis čhayäman. Juyu ñawinpa Tayta Diosninchi ricamänan captinsi, mana llaquicümanchu. ⁴ Israel runacunaga Jacobpa willcallan caycanchi. Israel runacunallata Tayta Diosninchi wamrachacuran. Chunyaj pachačhu purishan wicanpis achic-achicyaycar ricaripunyaran. Parlanacun-yaran. Sinaí puntačhu shimintapis musyachiran. Quiquinmi wasinčhu imanuy-imanuy alliman čhurananpäpis, jarananpäpis tantiyachiran. Yawar-masillanpita Washäcu yurinantapis auniran. ⁵ Unay auquillunchicuna caycan Abraham, Isaac, Jacob. Paycunapa willcallanpita Washäcu yurinantapis Tayta Diosninchi camacächiran. Yawar-masillan Jesús caycaptinsi, Israel-masicuna wasguiparan. Washäcijninchi Jesúsmi ichanga cay pachatapis, llapan imacunatapis maquinčhu charan. Payga Tayta Diosninchim. Payllata imapis alliman čhurashun. Chaynuy caycullächun.

⁶⁻⁷ Israel-masicuna Washäcuja wasguipänanpaj, ¿Tayta Diosninchichuraj aunishanta cutiricuran? Mana. Tayta Diosninchi mana Abrahampa, Jacobpa llapan willcancunatachu wamrachacuran. Mana Israel runacunallatachu wamrachacuran. Manchäga shungun munashallanta wamrachacuran. Quiquin Abrahamtapis niran: «Isaacnilayquita wamrachacushaj. Payllapita willcayquicuna miranga.»* ⁸ Tayta Diosninchi mana Abrahampa llapan wamrancunatachu wamrachacuran. Manchäga aunishanjina jucnayllata wamrachacuran. ⁹ Abrahamta aunir, Tayta Diosninchi niran: «Watan caynuy wican cutimupti, majayqui Sara wamrayujna caycanga. Llapanta camacächishaj.»*

¹⁰ Auquillunchi Isaacpapis warmin Rebecačhu ishcay wamran caran. ¹¹⁻¹³ Ichanga wamrancuna mana yuriptillan, allita, mana allita rurananpis mana musyacaptillan, Tayta Diosninchi Rebecata niran: «Jichpa wamrayqui shullcanpa maquinčhu cawanga.» Tayta Diosninchipa shiminčüpis isquirbiraycan:

«Shullca captinsi Jacobta llaquipar, wamrachacushcä.

Esaútam ichanga jichpa captinsi, wasguishcä.»*

* **8:36** Salmo 44.22.

* **9:6-7** Génesis 21.12.

* **9:9** Génesis 18.10, 14.

* **9:11-13** Génesis 25.23; Malaquías 1.2-3.

Tayta Diosninchi shungun munashallanta wamrachacun. Payga allita, mana allita rurashantapis mana ricanchu. Manchäga munashallanta camacächin.

Tayta Diosninchi allillata rurashan

¹⁴ ¿Chaymi: «Tayta Diosninchi llutanta ruraycan» nishuwanchuraj? Mana. ¹⁵ Moiséstapis marca-masinpaj mañacapuptin, quiquin Tayta Diosninchi niran: «Manacaj captinsi munar, pitapis wamrachacushaj. Shungü munashan-cajllata llaquipäshaj.»* ¹⁶ Tayta Diosninchi wamrachacamänanchipaj mana quiquinchichu callpachacunanchi. Manchäga llaquipashpan shungun munaptin, pitapis wamrachacun. ¹⁷ Shiminchüpis Egipto marca mandajta Tayta Diosninchi nin: «Faraón, munayniyuj canayquipaj camacächishcä. Chaymi nishä-nishäta rurachishayqui nuwalla munayniyuj cashäta llapan runa musyananpaj. May-chaychüpis nuwallata manchapacamanga.»* ¹⁸ Tayta Diosninchi munar, pipa shunguntapis chucruyächin ullgujyänanpaj. Llaquipayta munar, pitapis llaquipan.

¹⁹ Sumaj tantiyacushun. «Tayta Diosninchi shungun munashallanta camacächin» nipti waquinniqui llutanta yarpar, niramanquiman: «Juchata aparicuptinchisi, Tayta Diosninchi mana piñapämäshunchu. Paypa shungun munashanta mana tictachishuwanchu» nir. ²⁰ ¿Pitaj canchi Tayta Diosninchita ashipänanchipaj? Mitu manca-yupay caycanchi. Mitu manca quiquin manca-rurajta mana ninmanchu: «¿Imanirtaj cay-nirajta ruramashcanqui?» ²¹ Manca-rurajga yarpashanta mitupita ruran. Chay mitullapita waquin mancata ruran cuyayllapaj; waquinta mana. Chay-jina Tayta Diosninchipis yarpashanta nuwanchiwan ruran.

²²⁻²⁴ Chaymi juchallačhu arujcunata ushyacächinan camacan. Ushyacächimänanchi captinsi, juchanchita jurgapämänananchi captinsi, Tayta Diosninchi llaquipämänananchi camacan. Paypa maquinčhu cawaycanchi. Israel runa captinchisi, jäpa runa captinchisi, unaypita-pacha acracamashcanchi llaquipämashanchita tantiyacunanchipaj. Llapainchita acracamashcanchi imaycamanpis janaj pachačhu cawananchipaj. ²⁵ Chaymi Oseas isquivibishan libruchüpis Tayta Diosninchi nin:

«Jäpa runacunata wajta runa-jina ricaj carsi,
acracushaj wamrachacunäpaj.

Wasguishcunata llaquipar, sumaj llaquipäshaj.*

²⁶ «¿Piraj cacullanquipis?» nishä runacunata wamrachacushaj.»

Jananmanpis nin:

«Jamcunata mana ricsijpishchu.

Mana wamrächu canqui nish captisi,

runacuna jinallančhu auninga:

«Cawaj Tayta Diosninchipa wamrancuna carcaycanqui» nir.»*

²⁷⁻²⁸ Israel runacunapaj Isaías nirán:

«Israel runacuna agu-jina chay-chicajmi.

Chaypis jucha aparicushanpita Tayta Diosninchi llapanta-yupay ushyacächinga.

Mana llaquipar, juclla ushyaypa ushyarachinga.

Auquillunchicunata aunishanta čharcurmi ichanga, waquin-waquillanta jish-pichinga.»*

²⁹ Jananmanpis Isaías nirán:

«Auquillunchicunata waquin-waquillanta Munayniyuj Tayta Diosninchi mana jish-pichiption,

Sodoma marcawan Gomorra marca ushyacashan-jina nuwanchipis pasaypa illarisuhan caran.»*

* **9:15** Éxodo 33.19. * **9:17** Éxodo 9.16. * **9:25** Oseas 2.23. * **9:26** Oseas 1.10. * **9:27-28** Isaías 10.22-23.

* **9:29** Isaías 1.9.

³⁰ Canan sumaj tantiyacushun. Jäpa runacunata mana imatapis ruraycaptin, alli ñawinwan Tayta Diosninchí rican Jesúspa shiminta chasquicushallanpita. ³¹⁻³² Israel runacunatam ichanga Jesúspa shiminta mana chasquicushanpita wasguiparan. Paycuna Tayta Diosninchí alli ricananta munar, Moiséspa shimin nishannuya tucuya ruraran: «Paypa shiminta llapanta charcupti, alli ñawinwan Tayta Diosninchí ricamanga» nir. Chaymi Jesústa tunichicuj rumita-jina ricar, shimintapis mana chasquicuranchu.* ³³ Israel runacuna Washäcuja wasguinanpaj shiminchú Tayta Diosninchí musyachicuran: «Sión marcachú juc runa yuringa pitapis llutäpacachinanpaj. Tunichicuj rumita-jina runacuna ricanga. Achcajmi wasguipanga. Pingaymanpis chayanga Paypa shiminta chasquicurmí ichanga, alli cawayta taringa. Imaypis mana pingayman chayangapächu» nir.*

10

Israel runacuna Moiséspa shiminta charcuya munashan

¹ Irmänucuna, Israel-masicuna Tayta Diosninchipa maquinchú cawananta llapan shungüwan munä. Jishpichinanta munar, waran-waran Tayta Diosninchita mañacapü. ² Israel-masicuna tucuya ruran Tayta Diosninchí alli ricananpaj. Sumaj manchapa-cunpis. Shungun munashanta mana tantiyacurmi ichanga, pantacash purircaycan. ³ Alli ricananpaj Tayta Diosninchí mayna camacächish caycaptinsi, wasguipan. Quiquin yarpashanta rurar, Moiséspa shimillanta charcuya munan. ⁴ Chaypis Tayta Diosninchí juchaynajta alli ñawinpa ricamanchi mana Moiséspa shiminta chercushallanchipitachu; manchäga Washäcuja Jesúspa shiminta chasquicuptinchi. Chaymi Israel-masicuna Moiséspa shiminta charcuya yarpar, pantapacun.

⁵ Unay isquirbisanchú quiquin Moisés niran: «Cawayta munar, Tayta Diosninchipa shimintaraj llap-llapanta chercushuwan.»* Chaura Tayta Diosninchí juchaynajta ricamänanchipaj shiminta wiyar, llapallanta sumaj-sumaj chercunanchi. ⁶ Jesúspa shiminta chasquicucunatam ichanga yupachicushallanchipita juchaynajta Tayta Diosninchí ricamanchi. Chaymi ama nishuwanchu: «Janaj pachapita Washäcuja pushamushun.» Washäcujinchi Jesús mayna yanapaycämanchi. ⁷ Chaynuypis ama nishuwanchu: «Yanapämänanchipaj chacaj pachapita cawarachimushun.» Jishpichimänanchipaj mayna Washäcujinchi Jesús shamusha. Wañushanpitapis mayna cawarimusha. ⁸ Payllaman yupachicuptinchi, jishpichimanchi. Shiminchüpis nin: «Tayta Diosninchipa shimin mayna shunguyquiman chayasha. Shimintapis willapäcuycanqui.»*

Nuwacunapis Washäcuja Jesúzman yupachicunallanchipita willapäcurcaycä. ⁹ Chaymi llapan shunguyquiwan yupachicur: «Washäcuja Jesúsga Taytanchim. Maquinchú purichimanchi. Wañuypitapis Tayta Diosninchí cawarachimusha» nir willapäcuptiqui, jamcunatapis Tayta Diosninchí jishpichishunquipaj. ¹⁰ Tayta Diosninchí alli ricamänanchipaj Washäcuja Jesúzman llapan shungunchiwan yupachicushun. Jishpichimänanchipaj Jesústa taytachacushun. Pi-maytapis willapäshun. Ama upällacushunchu. ¹¹ Isaías isquirbisanchüpis nin: «Yupachicujcunata pingayman Tayta Diosninchí mana churangachu.»* ¹² Israel runa captinchisi, jäpa runa captinchisi, Tayta Diosninchí llaquipämanchi. Payman yupachicuptinchi, llapanchita maquinchú purichimanchi. Jayacuptinchi,

* **9:31-32** Griego rimaychú tunichij rumipita rimar Jesúspita rimaycan. Israelpuna nuwanchi-raycur Jesús wañuyman chayashanta mana auniranchu. Chaymi juchú chapämashanchi-jina yarpayninpis chapash caran. * **9:33** Isaías 28.16. Israel runacunapa jatun marca ishcay jutiyuj caran. Waquin runa nin: «Sión marca» waquinna: «Jerusalén marca.»

* **10:5** Levítico 18.5. * **10:8** Deuteronomio 30.11-14. * **10:11** Isaías 28.16.

sumaj yanapämanchi. ¹³ Shiminchüpis nin: «Jayacujcunata pitapis Tayta Diosninchi jishpichinga.»*

¹⁴ Tayta Diosninchi pü cashantapis mana musyarmi ichanga, ¿imanayparaj runacuna jayacunman? ¿Imanayparaj shiminta wiycunman paypita mana wiycar? ¿Imanayparaj shiminta chasquicunman pipis mana willapaycaptin? ¹⁵ ¿Piraj willapäcunman Tayta Diosninchi mana caéhaptin? Pipis alli willapata chayachimuptin, cusicuyupaj canga. Tayta Diosninchipa shiminpis nin: «Pipis alli willapata chayachimuptin, cusicuyupaj.»*

¹⁶ Ichanga mana llapan runachu shiminta chasquicun. Chaychi unay willacuj Isaíaspis niran: «Tayta, shimiuita willapapti, pipis mana chasquicushachu.»* ¹⁷ Waquin runa wiycuya mana munaptinsi, Jesúspita willapäcurcaycä. Willacushäta chasquicujcuna Washäcu Jesúzman yupachicurcaycan.

¹⁸ Chaynuy caycaptin, ¿Israel-masicuna manachuraj Tayta Diosninchipa shiminta wiyasha? Au. Wiyasham. Shiminchüpis nin:

«Shimin may-chaychüpis willacucashana.

Shiminta llapan marcachüpis wiyashana.»*

¹⁹ Willapäcuptin, ¿willacushan shungunman chayashachuraj? Mana. Wiyarsi, mana chasquicuranchu. Israel runacunata willacujnin Moiséwan Tayta Diosninchi musyachiran:

«Jäpa runacunata: <Paycuna runaichi> niptiquisi, wamrachacushaj.

Wamrachacupti, chiququipaj.

Pampaman churash runacunata alliman churapti, ullgunquipaj» nir.*

²⁰ Isaías libruchüpis Israel runacunata piñapar, Tayta Diosninchi niran:

«Jäpa runacuna pü cashätapis mana tantiyacarsi, chasquicamasha.

Mana tapucuycaptinsi, pü cashätapis musyachicushcä.»*

²¹ Israel runacunapämi ichanga niran:

«Mana wiycamaptinsi,

chucru shungu captinsi,

mana yamacashcächu.

Manchäga maquiíhu cawananta munashcä.»*

11

Israel runacunata Tayta Diosninchi mana wasguishan

¹ Chaura mä, tapushayqui. ¿Acraçuin caycaptinchu, llapan Israel runacunata Tayta Diosninchi wasguipasha? Mana. Mana llapallantachu wasguipasha. Nuwapis Israel runa cä. Abrahampis, willcan Benjamínpis auquillü. ² Unaypita-pacha acracushan Israelcunata Tayta Diosninchi mana wasguiparanchu. Shiminchüpis Elíaspita riman. Paymi juc cuti jagayar, niran: ³ «Taytallau Tayta, acracushayqui runacuna willacuj-masicunata llapanta wañuy cachisha. Jarashunayqui tullpacunatapis llapanta juçhurachisha. Nuwatapis wañuchimänanpaj ashircaycäman. Quiquilläna jamman yupachicuyca.»* ⁴ Tayta Diosninchim ichanga niran: «Mana jamllachu yupachicaycämanqui. Manchäga acracushäcuna janchis waranga (7,000) nuwallaman yupachicaycäman. Paycuna manacaj yaya Baalman mana yupachicunchu. Yaya Baalta mana manchapacunchu.»* ⁵ Canan wicanpis Tayta Diosninchi acracushan Israel runacuna caycanraj. Yupashalla caycaptisi, llaquipämashpan camacächin payllaman yupachicärinäpaj. ⁶ Ichanga mana allita rurashäpitachu wamrachacamasha; manchäga alli shungu cashpan. Llaquipämashanman alli rurashäcuna mana tincunchu.

* **10:13** Joel 2.32. * **10:15** Isaías 52.7. * **10:16** Isaías 53.1. * **10:18** Salmo 19.4. * **10:19** Deuteronomio 32.21. * **10:20** Isaías 65.1. * **10:21** Isaías 65.2. * **11:3** 1 Reyes 19.10, 14. * **11:4** 1 Reyes 19.18.

⁷ Chaymi Israel runacuna Tayta Diosninchawan alli ricanacuya munarsi, mana camäpacushachu. Acracushancunalla Tayta Diosninchiman yupachicun. Waquinta chucru shungu cananpaj camacächisha. ⁸ Shiminchüpis nin:
«Upa cananpaj Tayta Diosninchchi camacächisha.

Ñawiyuj carsi, rinriyuj carsi, canancamanpis Tayta Diosninchipa shungun munashanta mana tantiyacunchu.»*

⁹ Unay mandaj Davidpis chiqui runacuna imaman chayananta munar, Tayta Diosninchita mañacuran:

«Tünancuna ñacayman apachun.

Imamanpis chayachun.

Unyanta cutichir, llapallanta illarachiy.

¹⁰ Nawin ricaycaptinsi, japa-jina cacuchun.

Tantiyayninpis jasacächun.

Sumaj ñacananpaj jucpa maquinman churay» nir.*

Jäpa runacunata Tayta Diosninchchi washashan

¹¹ Chaypis ama nishuwanchu: «Jesústa mana chasquicushanpita Tayta Diosninchchi Israel runacunata pasaypa wasguipasha. Ricaytapis mana munanchu» nir. Manchäga Israel runacunata wasguipashan-janan jäpa runacunatana Tayta Diosninchchi wamrachacusha. Juchantapis mana yarparanganachu. Jäpa runacunata yanapaptinraj, Israel runacunapis juchanpita wanacunga. Tayta Diosninchiman yupachicunga. ¹² Israel runacuna wasguipayninpa jäpa runacunata Tayta Diosninchchi sumaj yanapasha. Allipaj wasguipash caycaptin, llapan Israelecunata maquinman Tayta Diosninchchi shuntangapaj. Chay wichan llapallanchita Tayta Diosninchchi sumaj yanapämäshun.

¹³ Jäpa runacuna, canan jamcunatapis tantiyachishayqui. Washäcu Jesúspita willapänajpaj Tayta Diosninchchi caáchacamasha. Llapan shungüwan willapäcuyçä.

¹⁴ Jamcunata willaparsi, Israel-masicunata mana jungächu. Jamcunata ricacushushpayqui Tayta Diosninchiman yupachicunanta munä. Yupachicuptin, Tayta Diosninchji jishpichinga. ¹⁵ Israel runacuna wasguishanpita jäpa runacunatana Tayta Diosninchchi alli rican. Ima alliraj canman Israelecunapis Washäcu Jesústa chasquicuptin. Chasquicuptin, cawarishta-yupay Tayta Diosninchchi ricanga.

¹⁶ Sumaj tantiyacushun: «Juc tantata jaraptinchi, llapan tantata alli ñawinpa Tayta Diosninchchi rican. Paypa maquinman yürapa sapinta churaptinchi, callapantin yürapis maquinchhu ricacun.» Chaynuypa tantiyanchi llapan Israelecunata Tayta Diosninchchi wamrachacunanta unay auquilluncuna maquinchhu cawashanpita.

¹⁷ Tincuchiypa tantiyacushun. Alli ulibus yüra Israel runacunawan tincun. Jäpa runacunana jačha ulibus yürawan tincun. Alli ulibusta llaumarir, jačha ulibuspa callapanta Tayta Diosninchchi tanachisha. Tanachiptin, alli ulibuspa cullullanchüna jačha ulibuspa callapan chillguin. Alli ulibuspa sapillanwan cawan. ¹⁸ Chaypis jatun-tucur, Israelecunata pampaman ama churashuwanchu. Callapanga sapinta mana cawachinchu. Manchäga sapinmi callapancunata cawachin. Chay-jina jamcunapis Israel runacunapita Tayta Diosninchipa maquinchhu cawarcaycanqui. ¹⁹ Chaymi alli-tucur ama ninquimanchu: «Alli ulibusta llaumarir, chay culluman tanachimasha jačha ulibus-jina caycaptisi.» ²⁰ Rasullanta rimaycanqui. Ichanga sumaj tantiyacuy. Alli ulibusta llaumariycur wicaparij-jina mana yupachicushanpita Israel runacunata Tayta Diosninchchi jargurisha. Cananga jäpa runa captiquisi, Jesúspa shiminta chasquicushayquipita maquinchhu puriycächishunqui. Chaymi ama alli-tucunquichu. Ama witicunquichu. Manchäga Tayta Diosninchita manchapacur cawanquiman. ²¹ Alli ulibuspa callapanta mana cuyapaycarga, jamcunatapis mana cuyapäshunquipächu maquinpita witicuptiqui.

* **11:8** Deuteronomio 29.4; Isaías 29.10.

* **11:10** Salmo 69.22-23.

²² Sumaj tantiyacushun. Tayta Diosninchi waquin runata llaquipan; waquinta mana. Wasguipäcuj Israelmunata mana llaquipashachu. Payman yupachicuptiquim ichanga, llaquipashcashunqui. Mana yupachicuptiquim ichanga, callapata llaumarij-jina wica-parishunquipaj. ²³ Jesúspa shiminta ́chasquicuptin, Israelmunatapis yapay maquinchú Tayta Diosninchi purichinga. Llaumash carsi, quiquinpa callapanta tanachishanjina cutichinga. Tayta Diosninchi munayniuj llaumariycur, cashganman cutichinanpäpis. ²⁴ Pipis jačha ulibuspa callapanta alli ulibus yüraman mana tanachiycaptinsi, Tayta Diosninchi jäpa runacunata wamrachacusha. Pipis alli ulibuspa callapanta juclla tanarächinman. Chay-jina Tayta Diosninchi acracushan Israel runacunata shuntangapaj.

Israel runacunata Tayta Diosninchi washänan

²⁵ Irmänucuna, mana yačhaj-tucunanchipaj Tayta Diosninchi yarpashanta sumaj tantiyacushun. Wamrachacushanta jäpa runa captinsi, llapanta Tayta Diosninchi ricsiraycan. Israelmunam ichanga chucru shungu cashpan wasguipaycangaraj llapan ricsirashan jäpa runacunata maquinman shuntanancaman. ²⁶ Chaypitaraj llapan Israel runacunatapis maquinman Tayta Diosninchi shuntanga. Shiminchüpis nin:

«Washämänanchipaj jucmi Sión marcapita ricarimunga.
Juchačhu cawashanpita Jacobpa willcancunata wanacachinga.»

²⁷ Jananmanpis nin:
«Parlanacushäta ́charcur, jucha aparicushanta mana yarparähänachu.
Llapanta jungaycushaj.»*

²⁸ Chaypis Jesúspa alli willapanta wasguipashanpita Israel runacunata juyu ñawinwan Tayta Diosninchi rican. Jamcunatam ichanga jäpa runa captiquisi, Jesúspa alli willapanta ́chasquicushayquipita alli ñawinwan ricashunqui. Chaypis unay auquilluncunata acracuyninpa Israelmunata llaquipaycanraj. ²⁹ Acracushancunata Tayta Diosninchi mana wasguingapächu. Manchäga aunishanta ́charcurpis, yanapangapaj. ³⁰ Ñaupata jamcuna mana wiyacurayquichu. Chaypis Israelmuna wasguipaptin Tayta Diosninchi llaquipar, jamcunatana maquinchú puriycächishunqui. ³¹ Llaquipäshushayqui-jina Israelmunatapis llaquipanga cananlla mana wiyacuptinsi. ³² Llapanchita llaquipämänanchiraycur Tayta Diosninchi camacächisha upa-tucunanchipaj. Chaymi Israel runacuna captinchisi, jäpa runacuna captinchisi, shiminta mana wiyacuranchichu.

³³ Chaynuy caycaptin, Tayta Diosninchi yarpashanta, ¿piraj tantiyanman? Yarpaysapa cayninman, ¿piraj tincunman? Yarpashanta pipis mana tantiyanmanchu. Yarpaysapa caynintapis mana ricsinmanchu. ³⁴ Shiminchüpis nin:

«Tayta Diosninchi yarpashanta pipis mana tantiyanchu.

Pipis mana willapanmanchu.

³⁵ Pipis mana challishachu:

«Cutichimay» ninanpaj.»*

³⁶ Tayta Diosninchi quiquinmi llap-llapanta camasha. Maquinchú llapantapis purichin. Payllapaj llapanpis caycan. Chaymi payllata llapanchi imay-imaycamanpis alliman ́churashun. Chaynuy caycullächun.

12

Tayta Diosninchipa shungun munashannuy cawananpaj willapashan

¹ Irmänucuna, llaquipämashpanchi tucuy-jinanpa Tayta Diosninchi yanapaycämanchi. Cananga nuwanchipita. Unay auquillunchicuna uywata pishtariycur jarashan Tayta Diosninchipa shungunman tincusha. Chay-jina nuwanchipis quiquinchipa caway-bidanchita jarashuwan shungunman tincunanpaj. Payllata manchapacur,

* ^{11:27} Isaías 59.20-21. * ^{11:35} Isaías 40.13; Job 41.11.

maquillančhu cawashuwan. Wañushanchicaman shungun munashallanta rurashuwan. Chaynuy cawananchi sumaj camacan. ² Chaymi runacuna yarpashannylla ama cawashunchu. Shungun munashantapis ama rurashunchu. Manchäga shungunman tincunanchipaj Tayta Diosninchi shungunchita ticrachinman. Ticrachiptin, shungunman tincushallanta rurashun. Shungun munashannylla cawashun. Allillata rurashun.

³ Tayta Diosninchi llaquipämashpan cačhacamasha llapaniquita piñapänajpaj. Mayganiquipis ama alli-tucunquichu. Manchäga sumaj tantiyacunquiman. Ima-imata ruranayquipäpis Tayta Diosninchi yačhayta camapushushayquiman-tupu imatapis ruranguiman.

⁴ Mä, tantiyacushun. Runapa muguncuna achca caycan. Ichanga juc-niraj-juc-nirajta ruran. ⁵ Nuwanchipis Washäcu Jesúspa maquinčhu cawar juc-niraj-juc-nirajta yačharpis, juc shungulla cawayanchi. Mugucuna yanapänacushan-jina nuwanchipis yanapänacushuwan. ⁶ Shungun munaptin, Tayta Diosninchi yanapaycämanchi ima-imata yačhananchipäpis. Chaymi shiminta willapäcuya yačhar, tantiyachimashanchita llapan shungunchiwan willapäcushuwan. ⁷ Yanapäcuya yačhar, sumaj yanapäcushuwan. Tantiyachicuya yačhar, tantiyachicushuwan. ⁸ Shacyächiya yačhar, irmänunchicunata sha-cyächishuwan. Tarichicuya yačhar, puchuy-puchuy tarichishuwan. Irmänunchicunata ricayta yačhar, llapan shunguchiwan ricashuwan. Pishipacujcunata yanapayta yačhar, cushi-cushilla yanapäshuwan.

Llaquipänacuypita willapashan

⁹ Irmänucuna, ama janan shungulla llaquipänacärishunchu.

Manchäga llapan shunguchiwan llaquipänacur, allillata rurashuwan.

Manacaj rurashanchicuna llapanpis asyächicuypaj.

¹⁰ Llapaninchi wasi-pura-jina alli ricanacärishuwan.

Pampaman ama čhuranacushunchu.

Manchäga alliman čhuranacärishuwan.

¹¹ Tayta Diosninchi munashanta rurananchipaj ama jillanäshunchu.

Manchäga shungun munashallanta llapan shunguchiwan rurashuwan.

¹² Tayta Diosninchiman yupachicushuwan.

Cushi-cushilla cawashuwan.

Ñacayman čhayarsi, ama jagayäshunchu.

Tayta Diosninchita mañacuycar cawashuwan.

¹³ Irmänucuna pishipacuptin, tarichishuwan.

Pachacuya ashiptin, pachächishuwan.

¹⁴ Pipis ashipämaptinchi, chapata ama rurashunchu. Manchäga Tayta Diosninchita mañacapushuwan sumaj yanapänanpaj. ¹⁵ Pipis llaquicur wagaptin, wagäshishuwan. Alliman čayar cushicuptin, cushicäshishuwan. ¹⁶ Jucninch-i-jucninchipis juc shungulla cawashuwan. Ama alli-tucushunchu. Ama yačhaj-tucushunchu. Manchäga llapanwan alli ricanacärishuwan.

¹⁷ Pipis nanächimaptinchi, unyanta ama cutichishunchu. Manchäga llapanpa ricay ñawinčhu allillata rurar cawashuwan. ¹⁸ Llapan runawan allilla cawananchipaj imanuypapis camacächishuwan. ¹⁹ Wawacuna, pipis chiquir imatapis rurashuptiqui, unyanta ama cutichinquichu. Manchäga Tayta Diosninchipa maquinman čhuray. Paywan čhuracächun. Paypa shiminčhu nin:

«Imatapis rurashuptiqui, maquiüman čhuray.

Ama yatapaychu.

Ñacachinä camacan.»

²⁰ Jananmanpis nin:

«Chiquipäshushayqui yargaptin, micuya tarichiy.

Yacunaptin, yacuta macyay.
Chayrämi pingayman ́hayanga.
Pingacurraj, wanacunga.»*

²¹ Pipis imatasí rurashuptiqui, unyanta ama cutichinquichu. Manchäga mana yamacällar alli ñawiquiwan ricaptiqui, juyu cayninpis ushyacanga.

13

Auturdäcunata wiycunanchipaj cashan

¹ Irmänucuna, auturdäcunata wiycushun. Auturdäcuna ́churacänanpaj quiquin Tayta Diosninchi camacächin. Mana camacächiptin, pipis auturdä cayman mana ́chayanmanchu. ² Chaymi auturdäcunata ticrapur, quiquin Tayta Diosninchita ticrapunchi. Ticrapushanchipita ñacayman ́chayashunpaj.

³ Auturdäcunata ama manchacushunchu. Allita ruraptinchi, mana ñacachimäshunchu. Mana wiycujcunatam ichanga ñacayman ́chayachinga. Chaymi mana mancharish juyänanchipaj auturdäcunata manchapacur cawashun. Chayraj alli ricamäshun.

⁴ Paycuna Tayta Diosninchipa maquinčhu caycan alli ricamänanchipaj. Chaypaj car-gunnerman ́chayasha. Paypa maquinčhu cashpanchi mana allita ruraptinchi, llutanta rurashanchiman-tupu ñacachimäshun. Auturdäcunata pucllacuya mana jushunpächu. Paycuna Tayta Diosninchipa shungun munashallanta rurar, llutan rurajcunata ñacayman ́chayachinga. ⁵ Chaymi Tayta Diosninchita manchapacur, auturdäcunatapis wiycushun. Ñacaypita jishpiyllata ama yarpäshunchu.

⁶ Tayta Diosninchi camacächish caycaptin, auturdäcuna mañashan jillarya ́churashun. Paycuna Tayta Diosninchipa mandu-rurajnin. ⁷ Chaymi manchapacur alli ricashun. Imatapis mañaptin, ́churashun. Aruchimaptinchi, arushun.

⁸ Jaga-tucush-imarga, juclla cutichir ushyacächishun. Runa-masinchita llaquipänanchim ichanga ama imaysi ushyacanmanchu. Llaquipashpanchi alli ricarga, Tayta Diosninchipa shimintapis llapantana ́charcushcanchi. ⁹ Paypa shiminta musyanchi. Moiséswan musyachicuran: «Majayquita ama janapachiychu. Ama wañuchicuychu. Ama suwacuychu. Jucpa imancunatapis ama munapaychu» nir. Moisés isquirbischancuna llapan jucnayllaman jucllachacan: «Quiquiqui alli ricacushayqui-jina runa-masiquitapis alli ricanquiman» nishallanman.* ¹⁰ Llaquipäcuja runa-masinta alli rican. Pitapis mana juyu ñawinwanchu rican. Chayraj Tayta Diosninchipa shiminta llapanta ́charcun.

Tayta Diosninchipa shiminta wiycunapaj cashan

¹¹ Irmänucuna, cay pachačhu yupash junajlla cawanchi. Chaymi piñapashajta wiycunquiman. Ama upa-tucunquimanchu. Manchäga Tayta Diosninchipa shimin nishannuyla cawashun. Unaya Jesúspa shiminta ́chasquicur: «Juclla shuntacamäshun» nir mana yarpashcanchichu. Cananmi ichanga jishpichimänanchipaj wallcana pishin.

¹² Chacaj cashantapis, junaj cashantapis musyanchi. Cay pachačhu cawayga chacačhu caway-jina. Runacunapis juchallačhu arun. Tayta Diosninchipi jishpichimänanchi junaj ́chayamuptinmi ichanga, achicyaj junajčhüna cawashunpaj. Chaymi juchata ama aparicushunchu. Manchäga Tayta Diosninchipa shungun munashannuyla cawashuwan. ¹³ Achicyaycaj cawayčhu-jina manchapacur cawashuwan. Upyallačhu, tünallačhu ama purishunchu. Allgu-jina warmin-warmin, runan-runan ama purishunchu. Marca-pingay ama cawashunchu. Ama jayapänacushunchu. Ama chiquinacushunchu. ¹⁴ Shungunchi munashallanta imatapis ama rurashunchu. Manchäga

* ^{12:20} Proverbios 25.21-22. * ^{13:9} Éxodo 20.13-17; Deuteronomio 5.17-21; Levítico 19.18.

Tayta Jesucristupa maquillanchu cawashuwan. Llapan ricay shungun munashallanta rurashuwan.

14

Juc-niraj yarpaj irmänucunata tantiyacunanchipaj

¹ Tayta Diosninchiman yupachicur, sumaj tantiyanacushun. Irmänunchicunapa yarpayninwan yarpayniqui mana tincuptinsi, ama pampaman churanacunquichu. Yarpayniqui-janan ama chiquinacunquichu. Chiquinacur, yatayayman pipis chayan. ² Waquin irmänunchi tarishanta micun. Waquinna Tayta Diosninchchi alli ricananta yarpar, ricsish-ricsishllata micun. ³ Ricsish-ricsishllata micuptiqui Tayta Diosninchchi alli ricashushayquita yarparpis, tarishanta micujcunata pampaman ama churanquichu. Tarishayquita micuptiqui Tayta Diosninchchi alli ricashushayquita yarparpis, ricsish-ricsishllata micujcunata pampaman ama churanquichu. Llapantapis Tayta Diosninchchi wamrachacusha. ⁴ Llapanchi Tayta Diosninchipa maquinchu cawaycanchi. Sumaj tantiyacushun. ¿Juc runapa uywayninta tincupänanchi camacanchuraj? Mana. Quiquin wasiyuj musyan uywaynин alli arushantapis, mana alli arushantapis. Chay-jina Tayta Diosninchipis allita rurananchipaj yanapaycämanchi. Munashanta ruraptinchi, pingayman chayananchitapis mana camacächingachu.

⁵ Waquin irmänunchi ricsish junajllačhu jutucar, Tayta Diosninchita alliman churan. Waquinna waran-waran jutucan alliman churananpaj. Imanuy yarparpis, llapan shungunchiwan Tayta Diosninchita alliman churashun. Quiquinchi-pura ama tincupänacushunchu. ⁶ Waquin irmänunchi ricsish junajta acran Tayta Diosninchita alliman churananpaj. Waquinna tarishan micuya micun. Llapantapis ruran Tayta Diosninchita alliman churashpan: «Ima allish micunäpaj tarichimanqui» nir. Waquinninchchi ricsish micuyllata micurpis, Tayta Diosninchita alliman churashpanchi micunchi: «Ima allish micunäpaj tarichimanqui» nir. Ima-imata micurpis, rurarpis, mana llutantachu ruraycanchi.

⁷ Mayganinchipis mana quiquillanchipächu cawanchi. Mana ushyaräcunallanchipächu wañunchi. ⁸ Cawarpis, wañucurpis, Tayta Jesússta alliman churanchi. Cawarpis, wañucurpis, Washäcuj Jesússpa maquinchu cawaycanchi. ⁹ Nuwanchi-raycur Washäcuj Jesús wañuyman chayasha. Ichanga cawarimusha cawajcunatapis, wañushcunatapis maquinchu charänanpaj.

¹⁰ Chaymi llapanchita maquinchu Tayta Jesús puriycächimaptinchi, ¿imanirtaj irmänucunata waquinta jamurpanqui? ¿Imanirtaj pampaman churanqui? Llapanchita ima-imata rurashanchitapis Tayta Diosninchchi jurgapämäshunpaj. ¹¹ Shiminchüpis isquirbiraycan:

«Cawaycaj Tayta Dios caycä.

Shimi charcucanga.

Munayniuj cashäta tantiyacur llapan runa manchapacamar, ñaupäman jungurpacunga.

Shiminwanpis alliman churamanga» nir.*

¹² Sumaj tantiyacushun. Tayta Diosninchchi alli ñawinwan ricamänanchipäpis, juyu ñawinwan ricamänanchipäpis quiquinchi ima-imatapis rurashanchipita canga. Paymi llapan runata imata rurashantapis jurgapanga.

¹³ Chaymi ama tincupänacushunchu. Tincupänacuptinchi, irmänunchicuna micushanchijanan, upushanchi-janan juchata aparicurunman. Juchata aparicur, Washäcuj Jesússtapis wasguirunman. ¹⁴ Tayta Jesúsman yupachicuptinchi, ima micuypis juchaman mana jančhamanchichu. «Waqin micuycuna mana allichu» nijcuna quiquillanpita

* **14:11** Isaías 45.23.

yarpan. Chaymi: «Mana allichu» niptin, ama micuchishuwanchu. Ama tin-cupäshuwanpishchu. ¹⁵ «Mana allichu» nij irmänucunapa ricay ñawinčhu micur, tincupaj-yupay caycanchi. Mana llaquipäcu-jupay pampaman churaycanchi. Micushanchi-janan pipis Washäcu-j Jesústa ama wasguipanmanchu. Payga llapanchita washämänanchi-raycur wañuyman chayasha. ¹⁶ Chaymi shungunchi munashanta micur, Tayta Dios-ninchita pingayman ama churashunchu. ¹⁷ Paypa maquinčhu cawanchi mana ricsish-ricsishllata micushanchipitachu, mana tarishanchita micushanchipitachu. Manchäga shungunchi shungunman tincunman. Paypa shungun munashanta rurashun. Llapan-wan alli ricanacur, allilla juyashun. Cushishalla cawashun. Llapa npäpis Espíritu Santu yanapaycämanchi. ¹⁸ Washäcu-j Jesústa manchapacur alli cawaptinchi, Tayta Diosninchu sumaj cushicun. Runa-masinchipis alli ricamäshun. ¹⁹ Chaymi irmänunchicunawan imaypis alli ricanacushun. Tayta Diosninchiman sumaj yupachicunanchipaj sha-cyächinacushun.

²⁰ Micuy-janan Tayta Diosninchipa maquinčhu cawajcunata ama mash-tacächishunchu. Ima micuypis allitaga allim. Ichanga micushanchi-janan irmänunchicunata mashtacächir, marca-pingayman chayanchi. ²¹ Chaymi irmänunchi: «Cayga jucha» nir yarpaptin, ricay ñawinčhu ima aychatapis ama micushuwanchu. Binutapis ama upushuwanchu. Achäqui cananpaj imatapis ama rurashuwanchu.

²² «Mana imananchu» nir quiquillayqui yarparanquiman. Tayta Diosninchipa llapanchipa shungunchita musyapämanchi. «Imata micuptinchisi, Tayta Diosninchu mana jyu ñawinwan ricamäshunchu» nir yarpar, shungunchi munashanta micur, upur cawashun. ²³ «¿Allichuraj, manachuraj?» nir micurmi ichanga, juchata aparicunchi. Tayta Diosninchipa shungunman tincushanta mana sumaj musyaycar ruraptinchi, imapis jucha.

15

Washäcu-j Jesúspa llupinpa jatinanchipaj cashan

¹ Llapan shungunchiwan Tayta Diosninchiman yupachicur, wichaypa-uraypa yarpaj irmänunchicunata llaquipäshuwan. Quiquillanchipaj ama yarpäshunchu. ² Tayta Dios-ninchiman sumaj yupachicunapaj irmänunchicunapa ricay ñawinčhu alli purishun. ³ Washäcu-j Jesúspis mana quiquillanpächu yarpasha. Manchäga runacuna ashlliaptinsi, Tayta Diosninchipa shungun munashanta rurasha. Chaypaj Tayta Diosninchipa shiminčhu nin: «Taytallau Tayta, runacuna ashllishuptiquipis, chasquicushcä.»* ⁴ Ima captinpis, paypa shimin tantiyachimanchi shacya-shacyalla cawananchipaj, mana yamacällar sumaj yupachicunanchipaj. Shimin shungunchiman chayaptin, payman sumaj yupachicunchi.

⁵ Llaquipäcu-j Tayta Diosninchu yanapayculläshunqui, ari. Ima captinsi, paymi sha-cyächishunqui Washäcu-j Jesúspa maquinčhu cawar juc shungulla cawanayquipaj. Tayta Diosninchu imaypis mana cačharishunquipächu. ⁶ Chayraj juc shungulla, juc shimilla Tayta Diosninchita alliman churankipaj. Payga Taytanchi Jesucristupa Taytan.

⁷ Chaura Washäcu-j Jesú alli ricamashanchi-jina jucninchu-jucninchipis alli ricanacushun. Chaynuy cawashpanchi Tayta Diosninchitapis alliman churaycanchi. ⁸ Sumaj tantiyacushun. Washäcu-j Jesú yanapäcu-j cananpaj cay pachaman shamuran. Israel-masincunata washänan-raycur Tayta Diosninchu cačhamuran unay Israel auquillunchi-cunata aunishanta charcucächinapaj. ⁹ Jäpa runacunatapis washänan-raycur cačhamuran. Jesú llaquipaptin, jäpa runacunapis Tayta Diosninchita alliman churaycan. Paycunapaj Tayta Diosninchipa shiminpis nin:

«Taytallau Tayta,
jäpa runacunawan juturparpis, alliman churashayqui.

* **15:3** Salmo 69.9.

Cantar allíchu jurgushayqui.»*

¹⁰ Chaynuypis nin:

«Tayta Diosninchi acracushan runacuna cushima, llapan runa may-chaychú juyarpis, cushima.»*

¹¹ Jananmanpis niran:

«Lapan jäpa runa Tayta Diosninchita alliman churayculla, llapan runa manchapacur, allíchu jurgullächun.»*

¹² Willacuj Isaíaspis niran:

«Jesépa willcancunapita juc munayniyuj yuringa. Llapa jäpa runacunata maquinchú purichinga.

Payman jäpa runacunapis yupachicunga.»*

¹³ Irmänucuna, Tayta Diosninchi yanapayculla shunqui payman yupachicunayquipaj, sumaj allilla juyänayquipaj, cushima cawanayquipaj. Payga shiminta charcun. Mana yamacällar yupachicunayquipaj Espíritu Santupis yanapayculla shunqui.

Jesúspita willapäcur Pablo purishan

¹⁴ Irmänucuna, quiquiri-pura alli ricanacushayquita, yarpay-sapa cashayquita, tantiyanacur cawashayquita musyä. ¹⁵ Chaypis shacyäcamur cartacamü mana tantiyahayquicunapita willapärinäpaj. Llaquipämär, Tayta Diosninchi mincacamasha anyapäcur purinäpaj. ¹⁶ Jäpa runacuna-raycur Washäcu Jesúspa alli willapanta willapäcunäpaj cačhacamasha. Paycunapaj cüra-jina mañacapucä. Tayta Diosninchipa shiminta willapäcuyca. Shiminta chasquicuptin, Tayta Diosninchipa shungunwan tincun. Allinnin uywata jarashanta ricashan-jina alli ñawinpa rican. Espíritu Santuwanpis yanapan shungun munashannuy cawanapaj.

¹⁷ Nuwapis Washäcu Jesúspa maquinchú cawar, Tayta Diosninchipa shungun munashanta rurar, cushima camacan. ¹⁸ Washäcu Jesúspita willapäcupti, jäpa runacunapis Tayta Diosninchiman yupachicun. Chaypita cushima. Mana shimilläwanchu willapashcä. ¹⁹ Manchäga Tayta Diosninchipa camacächiyinpa runacunata sumaj yanapashcä. Runa mana imaysi ricashancunata ruranäpaj Espíritu Santu camacächisha. Tayta Diosninchipa munayniyuj cashanta tucuy-jinanpa tantiyahishcä. Jerusalén marcapita Ilírico marca quinrancaman Washäcu Jesúspa alli willapantapis willapäcushcä.

²⁰ Willapäcuj aywar, juc willacushan jananman mana yaycushcächu. Manchäga pipis mana chayashan marcacunallaman yaycushcä. Mä, tantiyacushun. Wasi ruraj runa quiquin pirkashanman tapyan; mana juc pirkashanmanchu. Chay-jina pipis mana willapäcushancunaman Washäcu Jesúspita willapäcushcä. ²¹ Tayta Diosninchipa shiminchüpis nin:

«Paypita unay mana willacucash caycaptinsi, shimin shungunman chayanga. Pi cashantapis mana tantiyahish caycaptinsi, sumaj tantiyacunga.»

Jerusalén marcapitan cuyachicuycunata Pablo apashan

²²⁻²³ Chaymi wacpa-caypa purir unaypita-pacha watucuj shamuya munarpis, mana camäpacushcächu. Cananga cay quinranpa willapäcuya chercushcä. Waquin marcapitan cuyachicuycunata chayanäpis mana cannachu. ²⁴ Watucuya munar España marcapa aywar, yagaramushaj. Ricanacuptinchi, imallawanpis yanapämanqui willapäcuj purinäpaj.

²⁵ Ichanga imallatapis apacurcur, Jerusalén marcaparaj aywarishaj irmänunchicuna chaywan cawanapaj. ²⁶ Acaya quinranchú, Macedonia quinranchú irmänunchicuna shungun shacyaptin, cuyachicuyninta shuntasha Jerusalén marcachu pishipacuj irmänucunata yanapänanpaj. ²⁷ Shungun shacyaptin, shuntar allita rurasha. Jäpa

* **15:9** 2 Samuel 22.50; Salmo 18.49. * **15:10** Deuteronomio 32.43. * **15:11** Salmo 117.1. * **15:12** Isaías 11.10.

irmänunchicuna Israel runacunapita Washäcu Jesústa tarisha. Jaga-tucush-yupay ricacusha. Chaymi Jerusalén marcačhu pishipacuj Israel irmänunchicunata yanapäshun pačhanpäpis, jananpäpis. ²⁸ Jerusalén marcaman cuyachicuynincunata čhayarcachir, España marcapa llucshishaj. Aywar, yaycaramushaj. ²⁹ Čhayamupti, Washäcu Jesúsumaj-sumaj yanapämäshun cushishalla shacyächinacunanchipaj.

³⁰ Irmänucuna, maquinéhu Taytanchi Jesucristu llapanchita charämanchi. Espíritu Santupis llaquipänacunanchipaj yanapaycämanchi. Chaymi ama jungamanquichu. Llapán shunguyquiwan Tayta Diosninchita mañacapamanqui, ari. ³¹ Mañacunqui Judea quinrančhu Jesúspa shiminta wasguipaj Israelcuna mana imatapis ruramänanpaj, cuyachicuycunata apashätapis Jerusalén marcačhu irmänucuna cushi-cushilla čhasquinanpaj. ³² Chaynuypis mañacunqui Tayta Diosninchchi camacächiptin, watucuj čhayamunäpaj. Tin-cushpanchi cushirishämi. ³³ Tayta Diosninchita llapaninchita yanapaycämäshun allilla cawananchipaj. Chaynu caycullächun.

16

Irmänucunata Pablo wamayashan

¹ Cananga cartawan mama Febe čhayamuptin, čhasquinqui, ari. Cencreas marcačhu irmänanchi Febe jutuaj irmänunchicunata rican. ² Payga Tayta Jesúspa maquinéhu cawaycan. Chaymi jamcunapis Tayta Diosninchipa wawan cashpayqui alli ñawiquiwan ricanayqui camacan. Pishipacushantapis tarichinayqui camacan. Mama Febe achcajta yanapasha. Nuwatapis sumaj yanapämasha.

³ Mama Priscilatapis majan Aquilatapis wamayapämay. Paycuna Washäcu Jesúspita willapäcpti, purishimasha. ⁴ Wañuy-caway imapitapis washämasha. Chaymi jäpa runacunapa marcancunačhu jutuaj irmänucunapis sumaj cushicärin. Nuwalläpis sumaj cushicü. ⁵ Mama Priscapa wasinčhu jutuaj irmänunchicunatapis wamayapämay. Yačhänacushä Epénetuta wamayapämay. Paymi Asia quinrančhu Washäcu Jesúspa shiminta puntata čhasquicusha. ⁶ Mama Mariatapis wamayapämay. Payga tucujjinanpa yanapashcashunqui. ⁷ Marca-masi Andrónicutapis, mama Juníastapis wamayapämay. Paycunawan iwal carsilčhu wičgarashcä. Jesúspa cačhan cashanta llapan runa musyan. Paycuna puntata Washäcu Jesúspa shiminta čhasquicush caran; chaypitaraj nuwa. ⁸ Ampliatutapis wamayapämay. Tayta Jesús-janan paywan sumaj yačhänacü. ⁹ Washäcu Jesúspita willacäshimaj Urbanutapis, yačhänacushä Estaquistapis wamayapämay. ¹⁰ Apelestapis wamayapämay. Washäcu Jesúzman yupachicushan-janan sumaj ñacasha. Aristóbulucunatapis wamayapämay. ¹¹ Marca-masi Herodióntapis, Narciso castacunatapis wamayapämay. Paycunapis Tayta Jesúzman yupachicun. ¹² Chay ñaňalla Trifenatapis, Trifosatapis wamayapämay. Paycuna Jesús-raycur sumaj yanapäcuycan. Mama Pérsiditapis wamayapämay. Paypis Tayta Jesú-raycur sumaj yanapaycaran. ¹³ Irmänu Rufutapis wamayapämay. Payga Tayta Jesúspa acracuynin. Mamantapis wamayapämay. Mamanga wamranta-yupay ricamasha. ¹⁴ Asíncritutapis, Flegóntapis, Hermestapis, Patrobastapis, Hermastapis, paycunawan juturaj irmänucunatapis wamayapämay. ¹⁵ Filólogutapis, mama Juliatapis, Nereutapis, Nereupa panintapis, Oimpastapis, paycunawan juturaj irmänucunatapis wamayapämay. ¹⁶ Juturashpayqui jucniqui-jucniquipis llapan shunguyquiwan wamayänacärinqui. Washäcu Jesúzman yupachicushpan jutuaj irmänunchicuna chay-tucuypita wamayäshunqui.

Irmänucunata Pablo piňapashan

¹⁷ Irmänucuna, Jesúspita willapäshushayquita ama jungaychu. Pipis quiquinpa yarpashanman jančhayta munashuptiqui, witichiyya munashuptiqui, ama čhasquipanquichu. Paycuna llutanta willapäcuycan. ¹⁸ Quiquin munashallanta ashircaycan; mana Taytanchi Jesucristu munashantachu. Paycuna pačhallanta ashin.

Alli-tupayllapa, cushichipayllapa lluta runacunata pantachin. ¹⁹ Jamcuna Tayta Diosninchita wiyacuj cashayquitapis, alli rurashayquitapis chay-tucuyčhu musyaptin, jatunpa cushicü. Chaypis Tayta Diosninchita manchapacur cawanquiman. Juchata ama aparicunquimanchu. ²⁰ Tayta Diosninchchi allilla cawaycächimanchi. Supaytapis íchipur, ushyaypa ushyaringa. Pampaman čhuraptin, maquiquičhüna canga.

Taytanchi Jesucristu alli shungu cashpan yanapayculläshunqui, ari.

²¹ Irmänucuna, willacäshimaj Timoteo wamayäshunqui. Marca-masï Luciupis, Jasónpis, Sosípatrupsis wamayäshunqui.

²² Nuwa Tercio, Pablupa isquirbänun caycä. Tayta Jesúsman yupachicur, llapaniquita wamayaj. ²³⁻²⁴ Irmänu Gayupis wamayäshunqui. Paypa wasinčhu pacharpaycä. Wasinčhpis irmänunchicuna jutucan. Erastupis, Cuartupis wamayäshunqui. Irmänu Erastuga cay marcpa jillay charajnin.

Tayta Diosninchita alliman čhurashan

²⁵ Tayta Diosninchita llapallanchi alliman čhurayculläshun. Washäcuj Jesúspita willapaptü, yanapäshunqui alli willapanta sumaj tantiyacunayquipaj. Unaypita-pacha Jesúswan jishpichimänanchipaj shungullančhu yarpararan. ²⁶ Ichanga cananraj willacuycä. Imaycamanpis cawaj Tayta Diosninchchi camacächiptin, unay willacujnincuna jishpichicujpita isquirbirächishančhu musyachicuran. May-chayčhpis llapan runa Washäcuj Jesúsman yupachicunanpaj, payllata wiyacunanpaj Tayta Diosninchchi camacächiran. ²⁷ Washäcuj Jesús yanapaycämaptinchi, imaycamanpis Tayta Diosninchita alliman čhurayculläshun. Payllam Tayta Diosninchchi. Sumaj yarpay-sapa. Chaynuy caycullächun.

Corinto marcačhu irmänučunaman San Pablo cartacushan 1

Tantiyacunanchipaj:

Pablo cay cartata isquirbiran Corinto marcačhu jutucaj irmänučunaman. Corinto jatun marca caran. Chay marcačhu runacuna tucuy-niraj jircacunata manchapacuy-caran. Manchapacur, tucuy-niraj juchata aparicuran. Yačhacash cashpan waquin irmänučunapis juchačhu cawaycaran. Chaypitam Tayta Diosninchipa shungun munashannuy cawanapaj Pablo piñacuran. Corinto marcačhu Pablo willapäcushanpita musyayta munar, liguinqui: Hechos 18.1-18.

Pablo isquirbiran:

Irmänučuna quiquin-pura llaquipänacur cawanapita, Tayta Diosninchipa shungun munashannuy cawanapita: *1 Corintios 1.1-4.21.*

Juchačhu cawaj irmänutu sumaj piñacunapita: *1 Corintios 5.1-13.*

Irmänu-puralla imacunatapis ushyacächinanpita, majanta ashircurraj cacunapita: *1 Corintios 6.1-20.*

Majayujcunata anyapashanpita, majachacarcur mana majachacarcur alli cawanapita: *1 Corintios 7.1-40.*

Jircacunata jarashanpita, mushuj irmänučunata llutäpacachishanpita: *1 Corintios 8.1-13.*

Tantiyachicushanpita, Tayta Diosninchita manchapacur cawashanpita: *1 Corintios 9.1-27.*

Jircacunata manchapacushanpita: *1 Corintios 10.1-33.*

Irmänučuna jutucashančhu warmicuna majanta wiycunapita: *1 Corintios 11.2-16.*

Pascua micuypita: *1 Corintios 11.17-34.*

Espíritu Santu yačhayta camapushanpita: *1 Corintios 12.1-14.40.*

Wañushcunata Tayta Diosninchi cawarachinanpita: *1 Corintios 15.1-58.*

Cuyachicuyninta čhuranapita, irmänučunata wamayashanpita: *1 Corintios 16.1-24.*

Pablo wamayashan

¹⁻² Corinto marcačhu jutucaj irmänučuna, nuwa Pablo, irmänučchi Sósteneswan ish-canii cartacallämü. Tayta Diosninchi acracamar, cačhacamasha Washäcu Jesúspita willapäcunäpaj.

Washäcu Jesúzman yupachicushayquipita Tayta Diosninchi wamrachacushcashunqui. Acracushcashunqui maquinčhu purinayquipaj, shungun munashanta rurar cawanayquipaj.

Irmänučuna may-chayčhu jutucarpis, Jesucristuta jayaranchi. Payga Taytanchim.

³ Tayta Diosninchispis, Tayta Jesucristupis llaquipäshushpayqui sumaj yanapay-cullashunqui. Allilla cawaycachilläshunqui, ari.

Tayta Diosninchita alliman čhurashan

⁴ Jamcunapaj sumaj cushicü. Chaymi mana yamacällar nü: «Taytallau Tayta, ima allish Corinto marca irmänučunata yanapashcanqui. Llaquipashpayqui Washäcu Jesústa cačhamushcanqui.» ⁵⁻⁶ Shiminta tantiyacunayquipaj yanapashcashunqui. Shiminpis shunguyquiman čhayasha. Chaymi manchapacur cawarcaycanqui.

Llaquipäshushayquitapis willapäcurcaycanqui. ⁷ Taytanchi Jesucristu cutimunanta mayaj-mayačlla shuyaptiquipis, Tayta Diosninchi mana cačharishunquipächu. Manchäga imamata yačhayta camapur, yanapaycäshunqui shungun munashannylla cawanayquipaj.

⁸ Shacyächishuptiqui, Taytanchi Jesucristu cutimunan junaj achäqui mana cangachu

pipis ñauquishunayquipaj. ⁹ Tayta Diosninchi aunishanta ćharcucanga. Paymi acracamashcanchi Wawan Jesúspa maquinčhu cawar, juc shungulla cawananchipaj. Washäcuj Jesúsga Taytanchim.

Ticshaparänacushanpita Pablo piñapashan

¹⁰ Irmänucuna, Taytanchi Jesucristupa maquinčhu llapanchi cawanchi. Chaymi juc shungulla cawashun. Apaycahänacur, ama raquicähunchu. Tantiyanacullar cawashun. Juc yarpalla cawashun. ¹¹ Imanuy cawashayquitapis mama Cloipa castancunapita mayashcä. ¹² Apaycahänacurshi, waquinniqui nircaycanqui: «Nuwaga Pablupa maquinčhumi cawä.» Waquinniquinash ninqui: «Apolupa maquinčhu cawä.» Waquinniquipis ninqui: «Kefaspa maquinčhu cawä.» Waquinniquipis ninqui: «Washäcuj Jesúspa maquinčhu cawä.» ¹³ Washäcujninchí Jesús jucnayllam. Paypa maquillančhu cawananchi. Washänajpaj manam nuwatachu rusčhu wañuchimasha. Mana nuwaptachu ushyacushcanqui.

¹⁴ Allipaj mayganiquitapis mana ushyachishcajchu. Irmänunchi Crisputawan Gayul-latam ushyachishcä. ¹⁵ Chaymi pipis mana ninmanchu: «Quiquin Pablo ushyachimasha. Paypa maquinčhu cawä.» ¹⁶ Estefanáspa castancunata ushyachishätapis yarpärishcä. Juccunata ushyachishätam ichanga mana yarpächu.

Tayta Diosninchipa shungun yarpashanta runa tantiyayta mana atipashan

¹⁷ Chaypis Washäcuj Jesús mana cačhamashachu ushyachicunäpaj; manchäga alli willapanta willapäcunäpaj. Mana cačhamashachu alli-tupayllapa rimanäpaj; manchäga washämänanchi-raycur Jesús rusčhu wañushanta willapäcunäpaj.

¹⁸ «Washämänanchipaj Jesús rusčhu wañusha» nir willapaptinchi, mana wiycujcuna pampaman ćhuramanchi: «Upata yarpanqui» nir. Paycuna ñacayman ćhayanga. Washämänanchi-raycur Jesús wañushanta yupachicuptinchim ichanga, alli ñawinpa ricamashpanchi Tayta Diosninchi jishpichimanchi. Munayniuj car, maquinčhu charaycämanchi. ¹⁹ Mana wiycujcunapäga Tayta Diosninchipa shimin nin: «Yačhajcunata upayächishaj. Alli-tupayllapa mana rimangachu.»*

²⁰ Cay pachačhu yačhajcunapis, yačhachicujcunapis, yarpay-sapacunapis mana imatapis yačhanchu. Paycuna Tayta Diosninchipa ricay ñawinčhu upa. ²¹ Quiquillanpita mana pipis Tayta Diosninchawan yačhänacunmanchu. Chaymi jishpichimänanchi-raycur Tayta Diosninchi llapanta camacächisha. «Washämänanchi-raycur Jesús wañuyman ćhayasha» nir willapapti, waquin runa wasguipan: «Upa yarpay» nir. ²² Israel runacuna nin: «Auninäpäga Tayta Diosninchi imatapis camacächinman ricanäpaj.» Griego runacunana nin: «Auninäpäga sumaj-sumajraj imatapis tantiyachimäshuwan.» ²³ Nuwacunam ichanga willapäcü: «Washämänanchi-raycur Washäcuj rusčhu wañusha» nir. Chaymi Israel runacuna ullgüpäman, griego rimaj runacunana asicärin. ²⁴ Tayta Diosninchim ichanga munayniuj cashanta, yarpay-sapa cashanta musyachicur, Washäcuja wañuypita cawarachimusha. Payman yupachicuptinchi, Israel runa caycaptinchisi, Griego runa captinchisi, wamrachacamanchi. ²⁵ Chaymi runacuna: «Tayta Diosninchi pishi-yarpay» niptinsi, pay yarpashanman runacunapa yarpaynin mana tincunchu. «Washäcuj Jesús wañuyman mana ćhayanmanchu caran» niptinsi, Tayta Diosninchi munayniuj cashaman runacunapa munaynin mana tincunchu.

²⁶ Irmänucuna, sumaj tantiyacushun. Waquin runa: «Upa yarpayyuj. Pampa runa. Manacaj runa» nimaptinchisi, Tayta Diosninchi acracamashcanchi. ²⁷ Chaynuypa:

* ^{1:19} Isaías 29.14.

«Upa» nimaptinchisi, Tayta Diosninchi wamrachacamashcanchi yačhaj-tucujcunata pampaman čhurashpan. «Manacaj» nimaptinchisi, Tayta Diosninchi wamrachacamashcanchi munayniyucunata pampaman čhurashpan. ²⁸ Alli-tucujcuna upa cashanchita yarpaptinsi, pampaman čhuramaptinchisi, Tayta Diosninchi wamrachacamashcanchi. Alli-tucujcunatam ichanga pampaman čhurasha. Manacajman čhayachisha runamasincuna alli ricaptinsi. ²⁹ Chaymi quiquillanchipita mayganinchipis Tayta Diosninchipa shungunman mana tincushuwanchu. ³⁰ Chaypis quiquin Tayta Diosninchipa camacächisha Washäcu Jesúspa maquinčhu cawananchipaj. Maquinčhu cawaptinchi, yarpay-sapa cayman Tayta Diosninchipa čhuramashcanchi. Alli ñawinpana ricamanchi. Quiquinmi yanapaycämanchi shungun munashannuy cawananchipaj. Jucha apari-cushanchipitapis jishpichimashcanchi. ³¹ Chaypämi Tayta Diosninchipa shiminčhu nin: «Pipis cushicur, Tayta Diosninchipa llapanta camacächishanpita cushicunman.»*

2

¹ Irmänucuna, Tayta Diosninchipa shungun yarpashanta willapäcur, mana allitupayllapachu willapashcaj. Mana yačhaj-tucushcächu. ² Manchäga Washäcu Jesússlipa willapäcushcaj. Jishpichimänanchi-raycur rusčhu wañuyman čhayashanpita sumaj tantiyachishcaj. ³ Ima rimapacuytapis sumaj mana camäpacushcächu. Jamcunata manchacupti, janäcunapis sicsicyacäcuranraj. ⁴ Rimar, mana yačhaj-tucushcächu. Manchäga Espíritu Santu munayniyuj cashpan willapashäta shunguyquiman čhayachisha. ⁵ Mana runapa shimintachu čhasquicushcanqui. Manchäga Washäcu Jesúzman yupachicunayquipaj Tayta Diosninchipa camacächisha.

Tayta Diosninchipi yarpashanta Espíritu Santu musyachicushan

⁶ Mayur yačhaj irmänucunawan parlar, yačhaj cashäta pashtapacüna. Ichanga mana wañuj runa yarpashallantachu willapäcuycä. Auturdäcuna, yačhajcuna yarpashan jungacajlla. ⁷ Tayta Diosninchipa shungun yarpashanmi ichanga imaypis mana jungacangachu. Jishpichimänanchipäga cay pachata mana camallarmi, mayna yarparan.

⁸ Auturdäcuna yačhaj carpis, mana tantiyacuranchu. Tantiyacur, Munayniyuj Tayta Jesústa mana rusčhu wañuchinmanchu caran. ⁹ Chaychi Tayta Diosninchipa shiminpis nin:

«Manchapacamajcunapäga ñawin mana ricashantasi, rinrin mana wiyashantasi, shungunman mana čhayashantasi llapallantam camacächishcä.»*

¹⁰ Camapämashanchita Espíritu Santuwan Tayta Diosninchipi tantiyachimanchi. Espíritu Santu llap-llapanta musyan. Tayta Diosninchipa shungun yarpashantapis llapanta musyan.

¹¹ Sumaj tantiyacushun. Runacuna jucpa shungun imata yarpashantapis mana musyanchu. Quiquinmi ichanga imata yarpashantapis musyan. Tayta Diosninchipi quiquillan imata yarpashantapis musyan. ¹² Nuwanchi mana quiquillanchipitachu cawanchi. Manchäga Tayta Diosninchiman yupachicuptinchi, shungun yarpashantapis, llaquipämashpanchi tucuy-jinanpa yanapämashanchitapis Espíritu Santuwanmi tantiyachimanchi. Payman mana yupachicujcunam ichanga quiquillanpita imatapis tantiyayta mana atipanchu. ¹³ Nuwacuna Espíritu Santu tantiyachimashallanta willapäcü. Mana shungü yarpashantachu rimä. Chaymi Espíritu Santupa maquinčhu cawaptinchi-raj Tayta Diosninchipa shungun yarpashantapis, imata camapämashanchitapis tantiyacunchi.

¹⁴ Pipis Tayta Diosninchiman mana yupachicur, shungun yarpashantapis mana tantiyanchu. Mana tantiyashpan pampaman čhurar: «Upa yarpay» nin. Shungun yarpashanta Espíritu Santuwanraj Tayta Diosninchipi tantiyachicun. ¹⁵ Chaymi maquinčhu cawajcunalla Tayta Diosninchipa shungun yarpashanta tantiyan. «Upa

* ^{1:31} Jeremías 9.23-24. * ^{2:9} Isaías 64.4.

yarpay» nijcuna imata rimashantapis mana musyanchu. ¹⁶ Tayta Diosninchipa shimpis nin:

«Tayta Diosninchipa shungun yarpashanta, ¿piraj musyanman? ¿Piraj payta tantiyachiman?»*

Nuwanchim ichanga Washäcu Jesúspa shungun yarpashanta musyapanchi Espíritu Santu musyachimaptinchi.

3

Maqui-maquilla Tayta Diosninchipa shungun munashanta rurananchipaj tantiyachicushan

¹⁻⁴ Irmänucuna, apaycaáchäacuyllačhu, chiquinacuyllačhu arushayqui rinrīman čhayamusha. Sumaj mana tantiyacur, shunguyqui yarpashallančhu cawarcaycanqui. Sapu wamra-yupay apaycaáchäacurcaycanqui: «Nuwa Pablupa maquinčhu cawä» nir. Waquinniqui nircaycanqui: «Nuwa Apolupa maquinčhu cawä.» Chaypita alli shimilläpa willapashcraj Washäcu Jesúspita sumaj tantiyacunayquipaj. Sumaj tantiyacushun. Wamra itilla cashancaman lichillata chuchun. Chucru micuya mana micunrächu. Chaymi jamcunatapis pishi wamrata-yupay alli shimilläpa tantiyachishcraj. Chaura, ¿imanirtaj jucta taytachacunqui? ¿Shunguyqui munashallantachu imatapis munarcaycanqui?

⁵ Apolutapis, nuwatapis ama taytachacamanquimanchu. Nuwacunata Tayta Diosninchim mincacamasha Jesúspita willapäcunäpaj. Jucnii-jucnipsis Tayta Diosninchim nimashallanta rurashcä Jesúzman yupachicunayquipaj. ⁶ Mincacamaptin, muruta machij-yupay willapäcur purishcä. Apoluna parguj-yupay llapanta ricar purisha. Tayta Diosninchim ichanga muruta wiñachij-yupay cawachimanchi. ⁷ Chaymi willacujtapis, ricajtapis ama taytachacushuwanchu. Manchäga cawachicuj Tayta Diosninchita taytachacushuwan.

⁸ Mincaycunapis muruj-yupay, parguj-yupay ima-imata rurarsi, jucpa maquinčhu cawan. Tayta Diosninchim ichanga pitapis arushanman-tupu alliman čhuranga.

⁹ Apolupis mincay-masillä. Ishcanii Tayta Diosninchipa maquinčhu cawarcaycä. Jamcunanana Tayta Diosninchim murupacushan-yupay, Tayta Diosninchim tiyanan wasi-yupay carcaycanqui.

¹⁰⁻¹¹ Tayta Diosninchim llaquipämashpan mincacamasha tiyanan wasita jatarachinäpaj. Chaymi simintu rumita jamachij-yupay Washäcu Jesúspita willapäcuya jallarishcä. Jucna wasita pirgaj-yupay Tayta Diosninchipa shiminta sumaj tantiyachicun. Tantiyachicujpis, willacujpis mana shungunchi munashallantachu ruranchi. Manchäga Jesúllaman yupachicushpanchi payllapita tantiyachicunanchi. Payga simintu jallarij rumi-yupaymi.

¹²⁻¹³ Chaymi simintu aywashallanpa wasita jatarachij-yupay Jesúspa llupillanpa pipis aywanman. «Jesúspa llupinpa aywä» nir Tayta Diosninchipa shungun munashannuylla cawar, shiminta tantiyachicärinman. Tantiyachicushanman-tupu llapan ricay Tayta Diosninchim jurgapanga. Wasita nina ushyashan-jina ushyacay junaj imanuy cawashanpis, imata tantiyachicushanpis ricsicanga. Pay munashannuylla cawar tantiyachicushanpis juri-jina, jillay-jina, cuyayllapaj rumi-jina mana ushyacangachu. Janan shungulla cawar tantiyachicushanmi ichanga jiru-jina, shugush-jina, ucscha-jina ushyacanga.

¹⁴ Shungun munashannuylla cawar tantiyachicushan mana ushyacaptin, llapan wiycushanpita Tayta Diosninchim alli cawayta tarichinga. ¹⁵ Ushyacaptinmi ichanga, ushyapacayman čhayachinga. Imatapis mana čhasquingapächu. Imata mana čhasquirsi, Tayta Diosninchipa ñaupanman čhayanga ninapita jishpij-yupay.

* **2:16** Isaías 40.13.

¹⁶ Sumaj tantiyacushun. Tayta Diosninchipa wasin-yupay carcaycanchi. Paypa wawan cashpanchi Espíritu Santuwan maquinčhu purichimanchi. ¹⁷ Chaymi wawancunata pipis llutanta tantiyachiptin, ushyacayman Tayta Diosninchchi chayachinga. Payga wawancunata sumaj rican quiquillanpaj captin. Nuwanchi paypa wawan caycanchi.

¹⁸ Chaymi sumaj tantiyacushun. May-jina yačhaj carpis, ama yačhaj-tucushunchu. Manchäga Tayta Diosninchipa shungun yarpashanta tantiyacushun. Chayraj yarpaysapa cashunpaj. ¹⁹ Shungun yarpashanta mana musyaptin, Tayta Diosninchchi pitapis pampaman čhuran. Chaymi shiminčhüpis nin: «Yačhaj-tucujcunapa upa cayninta quiquin-cunapa shimillanpita Tayta Diosninchchi jurgapan.»* ²⁰ Jananmanpis nin: «Yačhaj-tucujcunapa upa yarpayninta Tayta Diosninchchi musyan.»*

²¹⁻²² Chaymi maygan tantiyachicujtapis ama taytachacunquimanchu. Jamcunarycur Apolutapis, Kefastapis, nuwatapis Tayta Diosninchchi čhuramasha. Canan wicanpis, shamuj watacunapis, cay pachačhu cawaypis, wañupis mana manchachishun-quipächu. Llap-llapanta allipaj maquiquiman čhurasha. ²³ Llapanchi Washäcuj Jesúspa maquinčhu cawarcaycanchi. Washäcuj Jesúsna Tayta Diosninchipa maquinčhu cawaycan.

4

Jesúspa cačhancuna imatapis rurashan

¹ Nuwacuna Washäcuj Jesúspa mincaynillan carcaycä. Chaymi Tayta Diosninchchi unaypita-pacha shungullančhu yarpashancunata willapäcurcaycä. ² Mincaycuna imatapis mana jungallar, mandajnin nishallanta llapanta čharcunan. ³ Chaymi pampaman čhuramänayqui mana camacanchu. Mana runapa shiminwanchu cawä. Allilla juyä. ⁴ Mana imapitapis chapacüchu. Ichanga imanuy cawaptipis, Tayta Diosninchchi ricapaycäman. ⁵ Chaymi Jesús mincacushancunata pampaman ama čhuranquichu. Cutimur, quiquin Tayta Jesúl llapan runata imata rurashantapis jurgapanga. Pacayllapa rurashantapis mayacächinga. Jesúlla llapan runapa shungunta musyapan. Shiminta wiycushanchiman-tupu Tayta Diosninchchi allimanpis, mana allimanpis čhuramäshunpaj.

⁶ Irmänucuna, sumaj tantiyacunayquita munar, piňapäshayqui. Apoluwan ishcani arushäta sumaj ricacunquiman. Tayta Diosninchipa shimenta jungaycur, yarpashayquita ama tantiyachicunquimanchu. Irmänuyquita pampaman ama čhuranquimanchu quiquirqui alli-tucunayqui cashallan. ⁷ Yačhaj-tucushpayqui ama apaycačhäacunquimanchu. Pampaman ama čhuranacunquimanchu. Ima-imäčhu arunanchipäpis Tayta Diosninchchi camacächin. Shungun munashanman-tupu rurananchipäpis quiquin yanapämanchi. Quiquillayqui alličhu llucshiyta ama ashinquichu. Ima-imamanpis Tayta Diosninchchi čhuramanchi.

⁸ Jamcunam ichanga: «Llapanta yačhä» nir yačhachinajta mana munanquinachu. «Tayta Diosninchipa ñawinčhu allina cawä» nir ricamaytapis mana munanquinachu. «Tayta Diosninchchiwan yačhänacü» nir wasguiparcaycämanqui. Ima alliraj canman Tayta Diosninchipa shungunman sumaj tincuptiqui. Chaura shungunchi tincunman. ⁹ Tayta Diosninchipa cačhan caycaptisi, pampaman čhurarcaycämanqui. Asipämär ushyarcaycämanqui. Runacuna wañuchimayta munamaptinpis, washämaya manačhi munanquimanchu. Cay pachačhüpis, janaj pachačhüpis chiquimaj-yupay wasguipämashayquita llapanmi ricaj-ricajlla carcaycan.

¹⁰ Washäcuj Jesúzman yupachicushä-janan pishi-yarpayta-yupay ricarcaycämanqui. Quiquiricunam ichanga yačhaj-tucurcaycanqui. Washäcuj Jesúspita willapäcushä-janan upata-yupay ricarcaycämanqui. Quiquiricunam ichanga sumaj llapanta musyaj-tucurcaycanqui. Alličhu jurgushuptiqui, sumaj cushicärinqui. Nuwacunata ashllir

* **3:19** Job 5.13. * **3:20** Salmo 94.11.

ushyamaptinpis, cusicärinqui. ¹¹ Canancamanpis paáchäpaj mana aypanchu. Janäpäpis pishin. Runacunapis ashllir ushyaman. Wasípis mana canchu. ¹² Imatapis mana tarichimaptiqui, maqui arushallanwan cawä. Runa ashllimaptinsi, Tayta Diosnинchi yanapänanta munar mañacapü. Tumpamaptinsi, mana jagayächu. ¹³ Washäta rimaptinsi, shimita mana jugarichu. Manchäga alli shimilläpa cutichi. Canancamanpis llapan runa asyächicaman. Ricamaytapis mana munanchu.

¹⁴ Irmänucuna, wawäta-jina llaquipar, tucuy-jinanpa tantiyachiyta munaj. Cartacaycämü mana pingayman churanajpächu. ¹⁵ Washäcu Jesúspita tantiyachicujcuna mana pishishunquipächu. Wawanta-yupay ricashujcunatam ichanga mana tarinquipächu. Nuwalla wawäta-yupay alli ricaj. Tayta Diosninchiman yupachicunayquipaj Jesúspa alli willapanta willapashcaj. Willapashäta wiycushayquipita wawäta-yupay ricaj. ¹⁶ Chaymi wamracuna taytanman llucshishan-jina jamcunapis nuwaman llucshinquiman.

¹⁷ Tayta Diosninchipa ricay ñawinchu manchapacur cawanayquita munar, Timoteutapis cačhamushcä. Payga cuyay wamrä-yupaymi. Tayta Jesú munashannuylla cawan. Jutucaj irmänunchicunata may-chaychüpis willapashä-jina Washäcu Jesúspita willapäshunquipaj.

¹⁸ Waquinniqui alläpa yačhaj-tucur chapacunqui: «Pablo manačhi shamungachu» nir. ¹⁹ Chaypis Tayta Diosninchipa camacächiptin, watucushayqui. ¿Mä, yačhaj-tucujcuna shiminman-tupuchush cawarcaycan? ¿Mä, Tayta Diosninchipi yanapaycanchuraj, manachuraj? ²⁰ Tayta Diosninchipa mana shimillanchipitachu alli ricamanchi; manchäga shungunman tincuptinchiraj, munashallanta ruraptinchiraj. ²¹ Irmänucuna, ¿imatataj munaycanqui? Chayamur, ¿alli ñawiwan ricanajtachu, juyu ñawiwan ricanajtachu? Jamcunapita.

5

Marca pingay cacuja jargunanpaj piñapashan

¹ Irmänucuna, jatunpa pingay-tucuyca. Jucniqui märishtayquwan juyar cacushayqui rinriūman chayamusha. Märishtanwan cacuja marca-pingay. Chaytaga Tayta Diosninchita mana manchapacuj runacunasi mana ruranmanchu. ² Chaypis jamcuna mana pingay-tucunquichu. Manchäga: «Mana imananpishchu» nir alli-tucurcaycanquiraj. Märishtanwan cacuj runata juella jargurinquiman. ³ Caručhu caycarpis, yarpashäta willaycaj. Shungüman mana tincuptin: «Jarguy» niycaj. ⁴ Taytanchi Jesú nimashannuylla willapaycapti, parlanacurir chay runata jargurinquiman. Jargunayquipaj munayniyuj Jesú shacyächishunquipaj. ⁵ Märishtanwan cacuja supaya maquinman churaycunquiman. Supay ñacachir ushyaptin, wanacungapishchi. Chayraj Tayta Jesú cutimur, jishpichicunga.

⁶ Alli-tucunayqui mana camacanchu. Musyanchi libadüra juchaman tincushanta. Rimaypis purin: «Chay-chica mačhcata ichiclla libadürash jacachin» nir. ⁷ Chaymi chay märishtanwan cacuja juella jargurinquiman juchan mana aypäshunayquipaj. Tayta Diosninchipa shungun munashannuylla cawanquiman. Pascua fiestačhu libadüraynaj tanta-yupay juchaynaj cawanquiman. Tayta Diosninchipa ricay ñawinchu juchaynajmi carcaycanqui. Pascua fiestačhu cashnita pishtashan-jina Washäcu Jesúspis mayna jishpichimänanchi-raycur wañuyman chayasha. Chaypita juchaynaj carcaycanqui. ⁸ Chaymi Pascua fiestačhu cusicushan-jina: «Tayta Diosninchipi jishpichimashcanchi» nir sumaj cusicärishuwan. Libadürata wicapashanchi-jina jucha aparicuypita witicärishuwan. Tayta Diosninchipa shungun munashannuylla cawashuwan.

⁹ Ñaupata cartacamurä: «Pi-maywanpis cacujcunawan ama chayanacunquichu» nir. ¹⁰ Juchačhu arujcunapita witicuytam ichanga mana camäpacunchichu. Pi-maywanpis

cacujcuna, mallajcuna, suwacuna, jircacunaman manchapacujcuna mana pishinchu. Paycunawan ricanacuya mana munar, cay pachapitarächi witicushuwan. Chaytachu mana yarpashcä. ¹¹ Manchäga ama chayanacunquichu: «Nuwapis Tayta Diosninchiman yupachicü. Irmänu cä» niycar pii-maywanpis cacuptin, mallaj captin, jircacunaman manchapacuptin, ashllicuptin, upyallačhu cawaptin, suwacuptin. «Tayta Diosninchiman yupachicü» niptinsi, chay-nirajcunawan ama micupacunquipishchu. ¹² Irmänu captiquim, jamcunata piñacuj. Mana irmänu captiquiga, mana piñacujmanpishchu. Chaymi juc irmänu juchata aparicuptin, jamcunapis sumaj piñacunquiman. ¹³ Mana yupachicuj runacunata quiquin Tayta Diosninchji juchanta jurgapanga. Märishtanwan cacuj irmänutam ichanga juclla jargurinquiman.*

6

Irmänu-puralla imatapis ushyacächinanpaj willapashan

¹ Canan juctana rimashun. QuiQUIQUI-pura jagayächinacur, ¿imanirtaj jatunman chayachinacunqui? ¿Imanirtaj auturdäcunačhüräj dimandanacunqui? Jutuaj irmänucunapa ricay ñawillančhu ushyacächiniquiman. ² Washäcu Jesú cutimur, nuwanchita čhuramäshun auturdä cananchipaj. Llapan runata maquinchičhu purichishunpaj. Chaynuy caycaptin, ¿imanirtaj ninshi-ninshillata quiQUIQUI-pura mana ushyacächiniquichu? ³ Jesústa mandäshir, anjilcunatapis maquinchičhu purichishunpaj. Chaymi cay pachačhu cawashanchicaman imatapis quiquinchi-puralla ushyacächishuwan. ⁴ Cay pachačhu llapanchi imallapitapis nanächinacunchi. Chaypis ichicllapita marcpa auturdänincunaman ama chayachinacushunchu. Paycuna Tayta Diosninchiman mana yupachicur, shungun yarpashantapis mana musyanchu. Chaymi auturdäcunačhüräj imatapis ushyacächinanchi mana camacanchu. ⁵ Llapantapis piñapaj pingay-tucunayquipaj. Irmänucuna, ¿llapaniqui pishi-yarpayujchu canqui? ¿Mayganiquipis manachu tantiyachinacuya junqui?

⁶ Jamcuna irmänu-purapis jagayächinacuylalačhu arurcaycanqui. Jananmanpis auturdäcunačhüräj dimandanacurcaycanqui. Paycuna Tayta Diosninchitas mana manchapacunchu. ⁷ QuiQUIQUI-pura nanächinacur, pingayllaman čhayashcanqui. Tayta Diosninchipa ricay ñawinčhu alli cawayta munar, ima captinpis ama tics hacäcunquiman. Suwapäshuptiquipis, cačhaporinquiman. ⁸ Chaypis waquinniqui llutanta rurarcaycanqui. Irmänuyquicunapa imantapis suwapaycanqui.

⁹⁻¹⁰ Tayta Diosninchji juchačhu arujcunata ūapanman mana chayachingachu. Chaymi sumaj tantiyacunquiman. Pi-maywanpis cacujcunata, jircacunaman manchapacujcunata, majanta jananpachijcunata, warmi-pura ullgu-pura cacujcunata, mallajcunata, upyallačhu arujcunata, ashllicujcunata, suwacujcunata janaj pachačhu Tayta Diosninchji mana cawachingachu. ¹¹ Waquinniqui chay-niraj juchačhu unay arushcanqui. Ichanga Espíritu Santu shacyächishuptiqui, Taytanchi Jesucristupa shiminta čhasquicushcanqui. Chaymi Tayta Diosninchji llapan juchayquita jungasha. Mana yarparannachu. Shungun munashallančhu cawanayquipaj acracushcashunqui. Alli ñawinwan ricaycäshunqui.

Jucwan-jucwan cacushanpita piñapashan

¹² Waquin irmänucuna nin: «Shungü munashanta ruracüman.» Chaypis mana llapan rurashanchichu Tayta Diosninchipa shungunman tincun. Nuwapis shungü munashanta ruracüman. Ichanga shungü munashallanta ama ruracüman. ¹³ Waquin irmänucuna warminar, runanar, nin: «Micuy pačhallanchiman chayan. Pačhanchipis micuyllata shuyan. Ushyacajlla canchi.» Chaypis Tayta Diosninchji runata mana camashachu warmi-pačha cananpaj, runa-pačha cananpaj. Manchäga

* ^{5:13} Deuteronomio 13.5; 17.7; 21.21.

camacächimashcanchi shungun munashannuylla cawananchipaj. ¹⁴ Tayta Diosninchí munayniyuj cashpan Tayta Jesústa cawarachishan-jína nuwanchitapis cawarachimäshunpaj.

¹⁵ Nuwanchiga Washäcuj Jesúswan chay shungulla cawanchi. Paywan juc shungulla cawaycar, ¿runan-runan puricuj warmiwanpis cacushuwanchuraj juc shungulla cawananchipaj? Chayga mana camacanchu. ¹⁶ Pipis runan-runan puricuj warmiwan cacur, juc shungulla ricacun. Tayta Diosninchipa shiminpis nin: «Ishcan chay shungulla canga.» ¹⁷ Warmiwan runa yatanacur, juc shungulla cawan. Washäcuj Jesúswanmi ichanga juc shungulla cawanchi shiminta échasquicushallanchipita.

¹⁸ Chaymi runan-runan puricuj warmipita witicuy. Waquin jucha runapa shungunman mana chayanchu. Runan-runan puricuj warmita yataparmi ichanga, jucha aparicushan shungunman chayan. ¹⁹ Sumaj tantiyacushun. Runa wasinčhu juyashanjina Tayta Diosninchispis camacächisha Espíritu Santo nuwanchičhu juyänanpaj. Payga maquinčhu purichimanchi. Chaymi quiquinchipitanachu mana cawanchi. ²⁰ Rantishta-yupay Tayta Diosninchí ricamanchi. Maquinčhu purichimänanchipaj Jesús wañuyninparaj rantimashcanchi. Chaymi ima-imatapis rurar, Tayta Diosninchipa shungunman tincushallanta rurashuwan.

7

Majayjcunata willapashan

¹ Jamcuna cartacamashcanqui: «¿Allichuraj pipis mana majachacaptin?» nir. Chaymi cartacamashayquipita willapäshayqui. Pipis mana majachacaptin, alli canman. ² Ichanga pi-maywanpis mana cacunapaj warmi ullgupis majachacanman. ³ Majachacar, warmi ullgupis mishquilla juyanman. Ujllanacunman. Ama jish-pipänacunmanchu. ⁴ Ama mičänacunmanchu. Warmiga runanpa maquinčhu juyan. Runapis warminpa maquinčhu juyan. ⁵ Chaymi majayjcuna ama mičänacunmanchu. Jamaycur Tayta Diosninchita mañacuya munarmi ichanga, majanwan parlanacurir yata juyapärinman. Jinarcur yapay majanwan mishquilla puñunman. Ujllanacunman. Manchäga Supay jucta ricachinga. ⁶ Majanwan yata-yata juyapärinapaj mana Tayta Diosninchipa shiminpitachu rimä, manchäga quiquilläpita. ⁷ Ima alliraj canman llapaniquipis nuwaman llucshiptiqui. Japallä cushish cawanäpaj Tayta Diosninchí yanapäman. Llaquipämashpanchi llapaninchita yanapämanchi imanuypis cawananchipaj.

⁸ Japallacuna, biyüdacuna, nuwa-jina japalla juyäcunman. ⁹ Majanayta mana ičhipurmí ichanga, majachacaptin alli canman. Majachacar, majanaypita mana wañunganachu.

¹⁰ Majayjcunatam ichanga Tayta Jesúspa shiminpita willapäshaj; mana quiquilläpitanachu. Warmiga majanta ama jaguirinmanchu. ¹¹ Warmi ullgupis majanta jaguirir, jucwan ama majachacanmanchu. Majanar jaguirishan majallanwan shuntanacurcur, yapay juyäcunman.

¹² Cananga Tayta Jesúspa shiminčhu mana rimacuptinsi, shungü yarpashanta willapärishayqui. Warmiqui Tayta Jesúzman mana yupachicur jaguiriyta mana munashuptiqui, ama jaguirinquimanchu. ¹³ Chaynuypis runayqui Tayta Jesúzman mana yupachicur jaguiriyta mana munashuptiqui, ama jaguirinquimanchu. ¹⁴ Majayuj captiqui jucniqui Tayta Jesústa mana wiycuptiquisi, ishcaniquita alli ñawinwan ricas-hunqui. Wamrayquicunatapis acracusha. Mana cačharingapächu. Llapanchita Tayta Diosninchí wamrachacamanchi.

¹⁵ Tayta Jesústa wiycushayqui-janan majayqui aywacuya munaptin-imarga, ama mičhanquimanchu. Tayta Jesústa mana wiycur, aywacunan camacan. Tayta Diosninchí allilla cawananchita munan. ¹⁶ Chaypis juclla ama raquicanquichu. Mana raquicar, majayquitapis Tayta Diosninchipa ñaupanmančhi chayachinquipaj.

¹⁷ Tayta Diosninchi runa piwan majachacänanpäis, japallan cacunanpäis camacächin. Chaymi Tayta Diosninchipa shiminta čhasquicur, ama yarpačhacunmanchu: «¿Piwanraj juyäshaj? ¿Mayčüradj juyäshaj? ¿Imawanraj cawashaj?» nir. Cayta maychayčüpis jutucaj irmänucunata willapä.

¹⁸ Jirucush caycar Jesúspa shiminta čhasquicush caycar, ama chäpacunquichu. Jirucüni caycar Jesúspa shiminta čhasquicush carpis, ama jirucunquichu. ¹⁹ Jirucush carsi, jirucüni carsi, Tayta Diosninchipäga mana imananchu. Payga shiminta wiyacunanchita munan.

²⁰ Chaymi Tayta Jesúspa shiminta čhasquicushan junaj cawashannylla pipis cawanman.

²¹ Chaynuypis patrunpa maquinčhu caycar Jesúspa shiminta čhasquicush car, chayllačhu juyanman. Patrun cačharyta munaptinmi ichanga, jina llucshicunman.

²² Patrunpa maquinčhu caycaptiqui Tayta Diosninchi acracushcashuptiquipis, Jesúspa mandunta ruranayquita pipis mana chapäshunquipächu. Patrunniynajta Tayta Diosninchi acracushcashuptiqui, Washäcuj Jesúspa mandunta ruranayqui. ²³ Llapan runapis Tayta Diosninchipa maquinčhu cawan. Jesús wañuyninpa rantishcashunqui. Chaymi runa-masiquita wichaypa-uraypa ama purichinquichu.

²⁴ Irmänucuna, pii captiquipis, imanuy juyaptiquipis, Tayta Diosninchi wamracha-cushcashunqui. Chaymi ricay ñawinčhu alli cawanayquipaj waquin runa wichaypa-uraypa yarpashanta ama ruranquinachu.

Japallacunata willapashan

²⁵ Japallacunata willapänäpaj Tayta Jesús mana rimacush captinsi, quiui yarpashäta tantiyachishayqui. Nuwata llaquipämar, willacujnin canäpaj čhuramasha. Canan nuwanapis yupachicamanquiman. ²⁶⁻²⁷ Nuwapita alli canman japalla-cajcuna mana majachacaptin, majayujcunapis mana raquicaptin. Nacayčhu juyaycanchi. Chaymi japallacunapis, majayujcunapis cacushannylla cacunman. ²⁸ Chaypis maja ashiy mana juchachu. Majayujcunam ichanga ñacay captin, llaquipaypaj cawanga. Mayganiquipis ñacayman čhayanayquita mana munächu.

²⁹ Irmänucuna, yupash watalla juyaj aywanchi. Chaymi majayuj carpis, japalla carpis, ³⁰ wañupacurpis, cushish cawarpis, ima-aycayuj carpis Tayta Diosninchipa shungun munashallanta ruranquiman. ³¹ Alli cawayllata ama ashishunchu. Manchäga cawashanchicaman Tayta Diosninchipa shungun munashallanta rurashun. Cay pacha ushyacangapänam.

³² Nuwallapita warmi ullgupis japalla juyaptin, alli canman. Japalla runa llapan shungunwan imatapis ruran Tayta Diosninchipa ricay ñawinčhu alli llucshinanpaj.

³³ Majayuj runam ichanga sumaj yarpačhacun majanpa ricay ñawinčhu alli llucshinanpaj. Shungunčhu ishcayta yarpan. Tayta Diosninchipa ricay ñawinčüpis, majanpa ricay ñawinčüpis alli llucshiyta munan.

³⁴ Japalla warmipis sumaj yarpačhacun Tayta Diosninchipa ricay ñawinčhu alli llucshinallanpaj, juchaynajlla cawananpaj. Majayuj warmicunam ichanga yarpačhacun wamrancunata ricanallanpaj, runanta alli ricanallanpaj.

³⁵ Llapantapis rimä mana majachacänayquita mičharchu; manchäga Tayta Diosninchipa shungun munashanta rurar alli cawanayquita munar.

³⁶ Chaymi pipis parlay-masinwan ashinacunan junaj čhayamuptin shungun munaptin, ashinman. Maja ashiy mana juchachu. ³⁷ Pipis parlay-masinwan ashinacunan junaj čhayamuptin shungun mana munaptin, ama ashinmanchu. ³⁸ Mana ashirga, allita ruraycan. Ashiptinpis, alli caycan.

³⁹ Warmicuna majan cawashancaman runanpa maquinčhu cawan; runan wañucuptinmi ichanga manana. Yapapacuya munar, yapapacunman Tayta Diosninchipa maquinčhu cawaj runallawan. ⁴⁰ Chaypis nuwapita alli canman mana yapapacuptin. Cushish cawanga. Chayta yarpä Espíritu Santu yarpächimaptin.

8

Jircacunapita rimashan

¹ Irmänucuna, canan jircacunata jarashan micuycunapita rimashun. «Chayta musyarcaycanchi» nir allita rimaycanqui. Chaypis musyaj-tucujcuna alli-tucuyman ćhayan. Llaquipäcujcunam ichanga alli rurayman ćhayan. ² Musyaj-tucujcuna rasunpa imatapis mana musyanchu. ³ Tayta Diosninchim ichanga llaquipäcujcunapa shungunta musyapan.

⁴ Cawaj Tayta Diosninchu jucnaylla. Jircacuna mana cawanchu. ¿Chaura jircacunata manchapacur, jarashan micuycunata micushuwanchuraj? ⁵ Runacuna riman: «Cay pachačüpis, janaj pachačüpis munayniyujcuna achca. Jircacunapis achca» nirshi. ⁶ Nuwanchipämi ichanga Tayta Diosnillanchi rasunpa munayniyuj. Payga Taytanchi. Paypitam cawanchi. Shungun munashannuy cawarcaycanchi. Taytanchi Jesucristu-ima llapanta camasha. Nuwanchitapis camamashcanchi maquinčhu cawananchipaj.

⁷ Tayta Diosninchu jucnaylla cashanta mana llapanchu musyan. Chaymi waquin irmänucuna: «Tayta Diosnillanchiman yupachicü» nir jircacunata jarashancunata micur, shungullančhu yarpan: «Juchata aparicushcä» nir. Paycuna jircacunata manchapacuycanraj. ⁸ Chaypis sumaj tantiyacushun. Tayta Diosninchu mana imatapis micushanchipitachu alli ricamanchi. Micuy mana allimanchu ćhuramanchi. Juchaman-pishchu mana jančhamanchi. ⁹ Ichanga jircaman jarashan micuya ama micunquichu mushuj irmänucunata Tayta Diosninchipa maquinpita mana witicächinayquipaj. ¹⁰ Waquin runa jircacunata jarariycur micuya mallichishushayquita mushuj irmänupa ricay ñawinčhu ama micunquimanchu. Ricashushpayqui jircacunata yapay manchapacunga jarashanta micushpan. ¹¹ Chayta rurar jircacunata manchapacur, Tayta Diosninchipa witicunga. Witicunga chay mushuj irmänucuna-raycur Washäcu Jesú wañush caycaptinpis. ¹² Mushuj irmänucunata llaquicuymen ćhurar, Washäcu Jesústapis llaquicuymen ćhuraycanqui. Juchatapis aparicuycanqui. ¹³ Chaymi micushanchijanan mushuj irmänucuna juchaman aywananpita, jircacunata jarashan micuya ama imaypis micushuwanchu.

9

Manayupay-tucunanpaj piñapashan

¹ Irmänucuna, sumaj tantiyacunquiman. Mana pipis maquichacamanmanchu. Tayta Diosninchu acracamasha cačhan canäpaj. Taytanchi Jesúspis ricaripamasha. Paypa shiminta willapäcptü, čhasquicärishcanqui. ² Waquin runacuna pampaman ćhuramaptinsi, jamcunapaj Tayta Diosninchipa cačhan caycä. Chaymi willapashajta čhasquicur, Taytanchi Jesúspa maquinčhu cawarcaycanqui.

³ Pampaman ćhuramajcunapis sumaj tantiyacunman. ⁴ Nuwacunapis micush-upush purinä camacan. ⁵ Tayta Diosninchiman yupachicuj warmiwan majachacänäpis camacan. «Kefas» nishan Pedrupis, waquin Taytanchi Jesúspa cačhancunapis, paypa wau-guincunapis warmintin purircaycan. ⁶ Ichanga Bernabítawan nuwata micush-upush purinäta mičharcaycämanqui. Nuwacunalla arunäta munarcaycanqui. ⁷ Llapanchi musyanchi murucucunapis micush-upush purishanta, čacra arujpis čacrapa wawanpita cawashanta, uywa michjcunapis uywanpita cawashanta.

⁸ Rimashäga mana runapa yarpayllanchu. Manchäga Moiséspa shiminpita rimä. ⁹ Shiminčhu isquirbiraycan: «Türuta yargaycajta ama aruchiniquichu» nir. Chaynuy niycaptin, ¿türucunallatachuraj Tayta Diosninchu llaquipaycan? ¹⁰ Mana. Nuwacunapaj isquirbichiran. Chay-jina čacra arujcunapis, pallapacujcunapis arushanpita cawan. ¹¹ Nuwacuna murupacuj-yupay Tayta Diosninchipa alli willapanta willapashcaj. Chaymi čacra arujcunata-jina imatapis tarichimänayqui camacan. ¹² Waquin

cačacunata tariycachir, nuwacunatapis tarichimanquiman. Taytayqui-yupaymi caycä. Ichanga canancamanpis ñacayčhu cawarsi, mana imatapis mañacushcajchu. «Pačhan-raycullar Washäcuj Jesúspa alli willapanta willapäcun» nir pipis jamurpämänanpita mana imatasi ashishcächu.

¹³ Tayta Diosninchipa wasinčhu aruj cüracunapis arushanpita cawan. Uywata rupachij cüracunapis Tayta Diosninchita jarashanpita waquinta micun. ¹⁴ Tayta Jesúspis tantiyachicusha: «Alli willapäta willapäcujcuna micush-upush purinan camacan» nir.

¹⁵ Chaypis mana imatapis mañacushcajchu. Cartacamursi, mana imatapis ashüchu. Pačhalläta ashinäpita jina wañucümánpis. Imata nimaptinpis, shimita mana cutircushächu.

¹⁶ Mana alli ricash caytachu ashiyä. Manchäga imanuypapis Jesúspa alli willapanta willapäcüman. Jamacuya munarpis, mana camäpacümanchu. Alli willapanta mana willapäcpti, ñacaymanchi jaycamangapaj. ¹⁷ Chaymi quiquilläpita mana willapäcpti, imata ashinäpis mana camacanchu. Tayta Diosninchchi cačhamaptin, shimita čarcuyçä.

¹⁸ Tayta Jesúspa alli willapanta willapäcushalläwan cushish cawä. Mana imatapis shuyänachu. Chaymi cačhan carsi, imatapis mana mañacüchu.

¹⁹ Runacunapis mana maquichacamanchu. Chaypis Jesúspita willapänä-raycur llapan runapa maquinčhu-yupay cawaycä. Jesúspa shimita čhasquicärinanta munaycä. ²⁰ Chaymi Israel runacunata willapänä-raycur Israel runacuna-jina cawashcä. Paycuna-jina Moiséspa shimentapis čarcushcä. Ichanga mana Moiséspa shimita čarcushanchipitachu Tayta Diosninchchi alli ñawinwan ricamanchi. ²¹ Chaynuypis jäpa runacunata willapänä-raycur, jäpa runacuna-jina cawashcä. Washäcuj Jesúspa shimita čhasquicush carsi, Tayta Diosninchipa shimentapis čarcuyçä. ²² Mushuj irmänucunata willapänä-raycur paycuna-jina cawashcä. Pi-maypis Tayta Diosninchipa shimita llapan shungunwan čhasquicunanta munar, imatapis rurashcä. Llapanwan-yupay paycuna-jina cawashcä. ²³ Nuwata jishpichimänanpäpis Jesúspa alli willapanta pi-maytapis willapashcä. Imatapis llapan shungunwan rurashcä.

Llapan shungunchiwan Tayta Diosninchita manchapacushun

²⁴⁻²⁵ Musyashanchinuypis llallinacujcuna llapan shungunwan llallinacun. Llallinacunapaj waran-waran yačacun shungun mana ushyacänanpaj. Pipis puntata čhayaptin, alli ñawinwan ricar: «Llallishcanqui» nir umanman jačchapita pilltash curünallata jatipan. Ichanga chaquicäcushpan ushyacan. Llallijcuna yačhacushan-jina Tayta Diosninchipa shungun munashannuy cawashun. Chaynuy cawaptinchí, Tayta Diosninchchi alli ricamäshun. Mana ushyacaj cawaytapis tarichimäshun. ²⁶⁻²⁷ Chaymi ushyacajcunata mana yarpächu. Manchäga waran-waran Tayta Diosninchipa shungun munashannuy cawä. Ñacayčhu juyarpis, mana llaquicüchu. Maquinpita mana witicüchu. Witicupti Tayta Diosninchchi mana shuntamaptin, willapäcur purishäpis manacajllapächi canga.

10

¹ Irmänucuna, unay Israel auquillunchicunapa willapanta jungarunquiman. Paycunata Tayta Diosninchchi pucutay rurinčhu purir, washaran. Puca yacu püsupa chimpanmanpis jishpichiran. ² Llapanpis Moiséspa maquinčhu puriran pucutay rurinčhu purishanpita, yacu püsuta chimpachishanpita. ³ Chunyaj pachačhu micuy mana captinpis, Tayta Diosninchchi ricarachishan micuya micuran. ⁴ Yacu mana captinpis, rumipita Tayta Diosninchchi pashtachimushan yacuta upuran. Chay rumi Washäcuj Jesúswan tincun. ⁵ Chaypis auquillunchicuna Tayta Diosninchipa shungun munashannuy mana cawaranchu. Chaymi chunyaj pacha quinrančhu llapan-yupay wañur ushyacaran.

⁶ Llapanpis camacasha ricacunanchipaj. Paycuna jucha aparicuya wañuy-caway munapashan-jina jucha aparicuya ama munapäshunchu. ⁷ Auquillunchicuna manchapacushan-jina jircacunatapis ama taytachacushunchu. Jircacunata

manchapacushampita Tayta Diosninchipa shiminpis nin: «Jamacaycärir, llapan micupacärian. Upyapäcuran. Shungun munashanta rurar, cushish jachwar juyaran.» ⁸ Warmi-pačha cashan-jina ama pí-maywanpis cacushunchu. Warmi-pačha cashanpita juc junaj Tayta Diosninchchi ishcay čunca quimsawan waranga-yupayta (23,000) wañurachiran. ⁹ Auquillunchicuna-jina Tayta Diosninchita maquichacuya ama camashunchu. Maquichacuya camashanpita Tayta Diosninchchi curuwan canichiypa wañurachiran. ¹⁰ Tayta Diosninchitapis ama jamurpäshunchu. Jamurpashanpita waquin auquillunchita Tayta Diosninchchi wañuchicuj anjilninwan wañurachiran.

¹¹ Cananga wallcallana pishin cay pacha ushyacänanpaj. Chaymi auquillunchicuna juchata rurashan-jina juchata ama rurashunchu. Willapancuna Tayta Diosninchipa shiminchüpis isquirbiraycan payllata manchapacunanchipaj. ¹² Chaymi: «Tayta Diosninchipa maquinčhu cawayacá» nir ama witicushuwanchu. Witicur, ushyacayman čayarushuwan. ¹³ Cay pachačhu ñacaypis, jucha aparicuypis mana pishinchu. Maquinčhu cawaptinchim ichanga, Tayta Diosninchchi yanapämanchi. Chaymi juchaman jančhayta munamaptinchisi, washämäshun. Ima ñacayman čhayaptinchisi, yanapämäshun shungun munashannuy cawananchipaj.

¹⁴ Irmänucuna, llapaniquita llaquipaj. Chaymi jircacunata ama taytachacun-quimanchu. Ama manchapacunquimanchu. ¹⁵ Sumaj yarpačhacushun. Willapäcushäta tantiyacunayquipaj yarpayyujmi canqui. ¹⁶ Cüpata upunanchipaj jutucar, cushish časquinchi: «Taytallau Tayta, ima allish washämänanchi-raycur Washäcu Jesú wañuyman čayasha. Yawarnintapis jičhasha» nir upunchi. Tantata paquipanacurpis: «Ima allish washämänanchi-raycur Jesú wañuya tarisha. Caway-bidanta jarasha» nir micunchi. ¹⁷ Chay-chicaj carpis, juc tantallata paquipanacur micunchi. Juc shungulla cawanchi juc tantallata micushpanchi.

¹⁸ Mä, yarpärishun. Israel runacuna jarashan aychata waquinta rupachir jumuyninta Tayta Diosninchita jararan. Waquintana quiquin-purapis mallichinacuran Tayta Diosninchianpis juc shungulla cawananpaj. ¹⁹ Ichanga sumaj tantiyacushun. Jircacuna mana cawanchu. Jarashan aychacunapis cashgan aychalla. ²⁰ Jircacunata jarar, mana Tayta Diosninchitachu jaraycan; manchäga supaycunallata. Supaycunawan juc shungulla cawanayquita mana munächu.

²¹ Chaymi Tayta Jesúswan juc shungulla cawanayquipaj cüpatapis, tantatapis mallichinacur, jircacunata jarashanta ama micunquimanchu. Chaycunata micur, supaycunawan juc shungulla cawanquipaj. ²² Chaymi Tayta Diosninchita ama ullgüchiniquichu. Payga sumaj munayniyuj. Mana ičhipushuwanchu.

Irmänucunata piñapashan

²³ Waquin irmänucuna nin: «Shungü munashanta imatapis ruracüman.» Chaypis irmänunchicunata llutäpacachiptin, rurananchi mana camacanchu. «Imapis quiquípitam» niptinsi, waquin rurashanchicuna irmänunchicunata llutäpacachin. ²⁴ Pipis quiquilpanpaj ama yarpačhacunmanchu. Manchäga waquin irmänunchicunata yarpar, ama llutäpacachishuwanchu. ²⁵ Chaymi llapan casta ranticushan aychata micunquiman. Ama tapupanquichu: «¿Cayga jircacunata jarashanchuraj?» nir. ²⁶ Cay pachata llapantinta Tayta Diosninchchi camasha. Paypita llapan imacunapis caycan.*

²⁷ Juc runa mana irmänu cashpan micuyta mallichishuptiqui, mana tapupällar micunquiman. Ama llutäpacunquichu. ²⁸ «Cay aycha jircacunata jarashämi» nishup-tiquim ichanga, ama časquinquimanchu. Jucha cashanta musyarčhi willaycäshunqui. ²⁹ Quiquiquicuna mana yarpaptiquisi, waquin irmänucuna jucha cashanta yarpanga. Chaymi imatapis ama rurashuwanchu nishanchi-nishanchi irmänunchicunata llutanta yarpächir. ³⁰ Chaymi: «Taytallau Tayta, ima allish tarichillämashcanqui» nir cushish

* **10:26** Salmo 24.1.

micüman. Ichanga llapanta mana micümanchu waquin runa jucha aparicushäta yarpar jamurpämänanpita. ³¹ Manchäga imata rurarpis, imata micurpis, imata upurpis, Tayta Diosninchita allíchu jurgushun. ³² Chaymi llapanpa ricay ñawinčhu alli cawanquiman. Israel runacunapa ricay ñawinčüpis, jäpa runacunapa ricay ñawinčüpis, jutuaj irmänucunapa ricay ñawinčüpis alli cawanquiman. ³³ Quiquilläpita llapan runata llaquipä. Chaymi Tayta Diosninchipa shungun munashanta rurä. Willapashäta wiyacuptin, pitapis Tayta Diosninch washanga.

11

¹ Nuwa Washäcu Jesúspa llupinpa jatishä-jina jamcunapis ricacamanquiman.

Irmänacuna imanuy cawanapäpis willapashan

² Ima allish yarparämanqui. Chaymi llapan willapashajtapis mana junganquichu. Yačhachimashannuyalla llapantapis willapashcaj. ³ Chaypis jucta tantiyachishayqui. Washäcu Jesú Tayta Diosninchipa maquinčhu cawan. Ullgucuna Washäcu Jesúspa maquinčhu cawan. Warmicuna runanpa maquinčhu cawan. ⁴ Chaymi ullgucuna Tayta Diosninchita mañacurpis, shiminta willacurpis, chucunta jurgunman Tayta Jesústa pampaman mana čhurananpaj. ⁵ Warmina majanta pampaman mana čhurananpaj Tayta Diosninchita mañacurpis, shiminta willapäcurpis, shucutacunman. Shucutacuya mana munarmi ichanga, sipra warmi-jina puricunman. ⁶ Chaypis warmipita. Majanpa maquinčhu cawayta mana munar, jina pingaypäpis puricunman. Mama-warmi cayta munarmi ichanga, majanpa maquinčhu cawanman. Umantapis shucutacunman.

⁷ Ullguga ama shucutacunmanchu. Paycuna Tayta Diosninchiman ricchacun. Chaymi Tayta Diosninchita allíchu jurgunman. Warmina runanta allíchu jurgunman. ⁸ Ullguta mana warmipitachu Tayta Diosninchiri ricarachisha; manchäga ullgupita warmita. ⁹ Runatachu mana camasha warmita yanagänanpaj. Manchäga warmita camasha runata yanagänanpaj. ¹⁰ Chaymi warmicuna runanpa maquinčhu cawar, umanta shucutacunman. Runanpa maquinčhu cawaptin, anjilcunapis cushicunga.

¹¹ Tayta Jesúspa shiminta čhasquicush car, warmitapis, ullgutapis pampaman ama čhurashuwanchu. Warmi mana captin, ullgu mana yurinmanchu. Ullgu mana captin, warmipis mana canmanchu. ¹² Warmita ullgupita Tayta Diosninchiri ricarachisha. Ullgupis warmipita yurin. Warmipis, ullgupis, ishcan Tayta Diosninchipita cawan. Paymi llap-llapanta camacächisha.

¹³ Irmänucuna, sumaj yarpačhacuy. Warmicuna shucutacünilla Tayta Diosninchita mañacuptin, ¿allichuraj? ¹⁴ Ullgucuna ajchanta wiñachishan marca-pingay cashanta llapanchi musyanchi. ¹⁵ Warmicunam ichanga ata ajchayujraj sumaj camaran. Ata ajchanga umanta shucutaraj-yupay. ¹⁶ Chaymi pipis tincupämaya munar, sumaj yarpačhacunman. Tayta Diosninchita mañacur warmi shucutacunallanta nuwacunapis, jutuaj irmänunchicunapis musyan.

Purishijnincunawan Pascua micuyta Jesú micushan

¹⁷ Canan nanaj-nanajna piñapäshayqui. Quiquiqui-pura jutucar čchapčhunacuyllačhüshi arurcaycanqui. ¹⁸ Rimaypis puriyan: «Corinto marcačhu jutuaj irmänucuna ja-gayächinacuyllačhüshi juyarcaycan. Manash juc shungullachu cawarcaycan» nir. Wiyashäta riguij-nirämi. ¹⁹ Chayta rurarcaycanqui quiquillayqui allíchu llucshiyta munarčhi, ¿au? Shunguyquitam ichanga Tayta Diosninchimusyapan.

²⁰ Tayta Jesústa yarparäcur jutucash caycar tantata micurpis, bïnuta upurpis ticshaparänacur, ¿allitachuraj rurarcaycanqui? ²¹ Waquinniqui achca-achcata micunqui. Waquinniquina yargaypita wañunqui. Waquinniqui mačhashayquicaman upunqui. ²² Jitacashayquicaman upyayta munar, achca-achcata micuyta munar, wasiquiman aywacärinquisman. Quiquillayquipaj imatapis ashir, waquin irmänucunata pampaman

churarcaycanqui. Pishipacuj irmänucunatapis pingayman churarcaycanqui. Chaynuy cawar: «Tayta Diosninchiman yupachicur jutucashcanchi» niptiquisi, ¿alli ñawïwan ricashayquichuraj? ¿Cushicushächuraj? Mana. Manchäga nanaj-nanaj piñacunajmi camacan.

Pascua miciypita willapashan

San Mateo 26.26-29; San Marcos 14.22.25; San Lucas 22.14-20

²³ Naupata Tayta Jesúspita yačhacushalläta willapashcraj. Tayta Jesús wañuyman ji-tarpunan chacaylla puríshijnincunawan micupäcuran. Tantata aptarcurcur, niran:

²⁴ «Taytallau Tayta, ima allish tarichillämashcanqui.» Tantata paquircur-paquircur, puríshijnincunata aypuran: «Cay tanta quiquími caycä. Jamcuna-raycur wañuyman chayashaj. Chaymi tantata paquipanacur, yarparämanqui» nir. ²⁵ Micuriycur bínuyj cüpata aptacurcur, niran: «Cay bínú yawarními. Yawarníwanraj parlanacushanta juctana Tayta Diosninchí charcucaycächin. Chaymi imaypis cüpapita bínuta upur, yarparämanqui» nir.

²⁶ Canan sumaj tantiyacunquiman. Jutucaycur tantata micurga, bínuta upurga, nuwanchi-raycur Jesús wañuyman chayashanta cutimunancaman musyachicuycanchi.

²⁷ Chaymi ticshaparänacushalla tantata micur, bínuta upur, Jesústa pampaman churarcaycanqui nuwanchi-raycur wañush caycaptinpis, yawarninta jičhash caycaptinpis. Payta wañuchij-yupay juchayuj ricarinqui. ²⁸ Chaymi Jesústa yarparäcur tanta micuya munar, bínuta upuya munar, shungunchitaraj tapushuwan.

²⁹ Mana wanacullar micur, upur, pampaman churanchi irmänunchicunatapis, Jesústapis nuwanchi-raycur wañush caycaptin. Chaynuy cashanchipita ñacayman chayashunpaj. ³⁰ Chaymi waquin irmänucuna jishyayasha. Waquinna wañuya tarisha. ³¹ Shungunchita sumaj tapur wanacushaga Tayta Diosninchipis juchanchita mana jurgapämäshunpächu. ³² Juchanchita jurgapämashpanchim ichanga wanacunanchipaj piñapämämani. Wanacuptinchi, juchačhu arujcunata-jina mana ñacachimäshunpächu.

³³ Irmänucuna, chaymi micupacunayquipaj jutucar, shuyänacärinquiman. ³⁴ Pipis pačhallanta ashir, wasinčhu micucunman. Chaura jutucaycur juc shungulla micupacuptiqui, Tayta Diosninchí alli ñawinwan ricashunquipaj. Manchäga ñacachishunquipaj. Waquin tapucuyniquicunata shamurna, tantiyachishayquipaj.

12

Espíritu Santu ima-imata rurananchipäpis yačhayta camapämashanchi

¹ Irmänucuna, cananga ima-imatapis yačhananchipaj Espíritu Santu yanapämashanchipita tantiyachishayqui. ² Jesúspa shiminta mana chasquicushayqui wíchan jircacunata tucuy-jinanpa jayarashcanqui mana wiyaj captinsi. ³ Cananga sumaj tantiyacunquiman. Espíritu Santuwan Tayta Diosninchí rimachiptin, mana pipis Jesústa pampaman churangachu. Manchäga Espíritu Santu rimachiptin: «Jesúsga Taytanchi» nir jayaranga.

⁴ Espíritu Santuga jcucaylla. Chaypis tucuy-tucuya yačhananchipaj camacächin.

⁵ Irmänunchicunata yanapayta munaptinchi, tucuy-jinanpa yanapänanchipaj caycan. Mayganta rurarpis, Tayta Jesússllata manchapacuycanchi. ⁶ Tucuy-jinanpa yanapaptinchisi, Tayta Diosnillanchi llapanchita yanapaycämanchi. Ima-imata rurananchipäpis quiquin camacächin.

⁷ Espíritu Santu shacyächimanchi jcucinchichi-jucninchisi yanapänacunanchipaj. ⁸ Quiquin Espíritu Santulla waquin irmänunchita yačhayta camapun yačhaj cananpaj, waquintana sumaj tantiyacurir willapäcunapaj. ⁹ Waquintana Espíritu Santu yačhayta camapun Tayta Diosninchiman sumaj yupachicunapaj. Waquintana yanapan jishyačhucunata

allchacächinanpaj. ¹⁰ Waquintana yanapan Tayta Diosninchí camacächishancunata rurananpaj, waquintana Tayta Diosninchipa shiminta willapäcunampaj, waquintana supay maquichacushancunata ricsinampaj, waquintana juc-niraj rimaycunata rimanampaj, waquintana juc-niraj rimaycunata tantiyachicunampaj. ¹¹ Imata rurananchipäpis, musyananchipäpis quiquin Espíritu Santu shungun munashanman-tupu yačhayta camapämanchi.

Juc shungulla cawananchipaj tantiyachicushan

¹² Sumaj tantiyacushun. Runa achca tulluyuj carsi, jucnaylla. Washäcuj Jesúspa maquinčhu cawaj irmänucuna achcaj carsi, juc shungulla cawanchi. ¹³ Espíritu Santu juclachamashcanchi Israel runacunatapis, jäpa runacunatapis, uywaycunatapis, wasiyucunatapis. Ushyacäriptinchi, Espíritu Santu llapanchita yanapämanchi chaychicaj carsi, juc shungulla cawananchipaj. Llapanchitapis maquinčhu purichimanchi.

¹⁴ Runa mana juc tullullapitachu; manchäga achca tulluyujmi. ¹⁵ Runapa janan mana maquillanchu, mana čhaquillanchu. Chaymi čhaquiwan maqui mana apaycačhänaunmanchu. Runaga maquin čhaquinwanraj camaran. ¹⁶ Chaynuypis runapa janan mana ñawillanchu, mana rinrillanchu. Chaymi ñawiwan rinri mana apaycačhänaunmanchu. Runaga ñawiyujraj, rinriyujraj camaran. ¹⁷ Runapa ñawillan captin, ¿imanayparaj wiyanman? Rinrillan captin, ¿imawanraj asyashanta mayaman? ¹⁸ Tullunchicunatapis, imanchicunatapis Tayta Diosninchí munashannuylla camacächisha. ¹⁹ Juc tullullapita car, runapa janan mana camarajchu canman. ²⁰ Sumaj tantiyacushun. Jananchi chay-chica tullupita camacächish caycarsi, jucnaylla. Mana yata-yatachu caycan.

²¹ Chaymi ñawiwan maqui pampaman mana čhuranacunmanchu. Umawan čhaquipis pampaman mana čhuranacunmanchu. ²² Manchäga pishi-yataycunawanraj runapa janan camaran. ²³ Mana ricachicuna jananchitapis alli müdanata ushtucunchi camarajlla ricacänanpaj. Pingaypaj captin, sumaj chapacunchi. ²⁴ Ricacaj jananchitam ichanga mana alläpa chapacunchichu. Chaypis Tayta Diosninchí camasha pishi-yatay-caj jananchitapis, mana ricachicuna jananchitapis, pingaypaj-cajcunatapis runapa janan sumaj camarananpaj. ²⁵ Chaymi mana apaycačhänaullar runapa tulluncuna, mana ricachicuna janancuna nanachinacunman. Quiquin-pura alli ricanacunman. ²⁶ Runapa maquin nanächicuptin, llapan janan nanächicun. Maquin alli ricash captin, llapan janan alli ricash canga.

²⁷⁻²⁸ Nuwanchipis Washäcuj Jesúspa maquinčhu cawaycar, janan-yupay ricacunchi. Llapanchi payman tanaraycanchi. Chaymi Tayta Diosninchí yačhayta camapämashanchiman-tupu imatapis rurashun. Paymi jutucaj irmänucunata waquinta yačhayta camapusha shiminta willacuj cačhananpaj, waquinta shungun yarpashanta musyachicunampaj, shiminta tantiyachicunampaj, waquinta imatapis rurar munayniyuj cashanta musyachicunampaj, waquinta jishyačhucunata allchacächinanpaj, waquinta yanapäcuj cananpaj, waquinta irmänucunata sumaj ricananpaj, waquinta juc-niraj rimaycunata rimanampaj. ²⁹ Ichanga mana llapan irmänucunatachu cačhan cananpaj yačhayta camapusha. Mana llapanchu willapäcullar purin. Mana llapanchu tantiyachicun. Mana llapanchu Tayta Diosninchí camacächiynipa imatapis ruran munayniyuj cashanta musyachicunampaj. ³⁰ Mana llapanchu jishyačhucunata allchacächin. Mana llapanchu juc-niraj rimaycunata riman. Mana llapanchu juc-niraj rimaycunata tantiyachicun. ³¹ Chaypis Espíritu Santuta mañacunquiman mas alli yačhayta camapushunayquipaj. Cananga willapäšhayqui mas alli yačhaypita sumaj llaquipänacärinayquipaj.

13

Llaquipänacuypita tantiyachicushan

¹ Ima alliraj canman anjilcuna rimashanta rimapti, chay-tucuy marcacuna rimashanta rimapti. Llapanta yačharpis runa-masita mana llaquipar, imatapis mana jurgushächu. Rimashallawan ushyaranga. ² Ima alliraj canman llap-llapanta musyapti, Tayta Diosninchipa shiminta sumaj musyachicupti, llapan shungüwan yupachicur puntacunapis wiacamaptin. Chaypis runa-masita mana llaquipar, imatapis mana jurgushächu. ³ Ima alliraj canman llapan pishipacujcunata tarichipti, allíchu llucshinäpaj runa-masita washänä-raycur wañuyman chayapti. Chaypis runa-masita mana llaquipar, imatapis mana jurgushächu.

⁴ Runa-masinchita llaquiyta yačhar, imapitapis tantiyacur upällacunchi. Llaquipayta yačhar, yanapanchi. Mana chiquicunchichu. Mana jatun-tucunchichu. Mana allitucunchichu. ⁵ Mana ashllicunchichu. Quiquillanchipaj imatapis mana ashinchichu. Pitapis mana ashipanchichu. Pitapis mana nanaparanchichu. ⁶ Pitapis mana cu shipanchichu. Manchäga Tayta Diosninchipa shungunman tincuptinchi, cushicunchi. ⁷ Runa-masinchita llaquipayta yačhar ñacachimaptinchisi, chasquicunchi. Ima captinsi, alli ñawinchiwan ricanchi. Llutanta ruraptinsi, wanacunanta shuyaranchi. Ticrapamaptinchisi, mana jaguiricunchichu. ⁸ Rasunpa llaquipayta yačhar, imaycamanpis llaquinchi. Llaquipashanchi mana ushyacanchu. Tayta Diosninchipa shiminta willacuymi ichanga ushyacanga. Juc-niraj rimaycunapis, musyaj caypis ushyacanga. ⁹ Runaga imatapis janan-janallan musyan. Tayta Diosninchipa shiminta willacunapäpis janan-janallan musyan. ¹⁰ Chaymi Tayta Diosninchipi shuntacamänanchi junaj chayamuptin, caycuna ushyacanga. Payga shungun munashanta llap-llapanta camacächin.

¹¹ Wamra cashä-wichan wata-wata rimarä. Shimüman chayashanta rimarä. Pishi-yarpay carä. Runayaptimi ichanga, wamra caynipis ushyacasha. ¹² Chay-jina yarpayninchipi shiptin, cananllaga Tayta Diosninchipi imanuy cashantapis mana tantiyanchirächu. Tincurmi ichanga, sumaj tantiyacushunpaj. Musyapämashanchinuylla nuwanchipis musyapäshun.

¹³ Sumaj tantiyacushun. Cay pachačhu llap-llapanpis ushyacajllam. Chaypis Tayta Diosnillanchiman yupachicushun. Aunishanta charcunapäpis shuyaräshun. Runa-masinchitapis llaquipäshun. Quimsan yarpay alli captinpis, runa-masinchitaraj llaquipäshun.

14

Juc-niraj rimaycunapita tantiyachicushan

¹ Chaymi sumaj llaquipänacärinquiman. Espíritu Santutapis mañacärinquiman tucuy yačhayta camapushunayquipaj. Llapan shunguyquiwan mañacärinqui Tayta Diosninchipa shiminta willapäcunayquipaj. ² Espíritu Santu juc-niraj rimaycunata rimachishuptiqui Tayta Diosninchipi tantiyaptinsi, irmänucuna mana tantiyangachu. Rimashayquita quiquillayqui shungullayquičhu tantiyanqui. Irmänucunam ichanga mana tantiyangachu Tayta Diosninchipa shungun yarpashanta juc-niraj rimayčhu rimaptiqui. ³ Rimashanchinuylla willapäcuptiquim ichanga irmänucuna sumaj tantiyacur, Tayta Diosninchipa shungun munashannuylla cawanga. Anyapaptiqui Tayta Diosninchita wiacamapti, cuyay-munaypaj cawanga. Imaman chayarsi, shungun shacyäcunga. ⁴ Tayta Diosninchipa shiminta willacujcuna jutuaj irmänucunata tantiyachin. Juc-niraj rimaycunata rimajcunam ichanga quiquillanpaj riman. Rimashanta pipis mana tantiyanchu.

⁵ Alli canman llapaniquipis juc-niraj rimaycunata rimaptiqui. Ichanga jatunpa cushicüman llapaniquipis Tayta Diosninchipa shiminta willapäcuptiqui. Pipis juc-niraj

rimayta munaptin, alli canman runa tantiyananpaj ticrachiptiqui. Chayraj jutucay irmänucuna tantiyanga.⁶ Irmänucuna, mä, tantiyacushun. Watucurshi juc-niraj rimaycunačhu yačhachijman. Manash willapajmanchu Tayta Diosninchipa shiminta. Chayta rurapti: «Ima alliraj watucallámanqui» nimanquimanchuraj? Tayta Diosninchipa shiminta mana tantiyachicur, manacajllapächi watucujmanpis.

⁷ Canan tincuchiypa tantiyacushun. Quñapis, arpapis suynashanpa suynacuptin, ¿tunädan llucshingachuraj? ⁸ Murucucunapis curnüta suynashanta mana tantiyar, ¿capitanpa yarpashanta rurangachuraj? ⁹ Jamcunapis juc-niraj rimaycunata rimaptiqui, pipis mana tantiyashunquipächu. Manchäga shiu-shiuyaycaj wayra-jina caycanqui. Chaynuy caycar, ¿imapäraj juc-niraj rimaycunata rimanqui? ¹⁰ Chaypis cay pachačhu runacuna juc-nirajta-juc-nirajta riman. Rimaj-masincunawan llapanmi tantiyanacun. ¹¹ Juc imata rimashantapis mana tantiyar, upa-pura-jina ricacushuwan. ¹² Chaymi Espíritu Santuta ama mañacunquimanchu juc-niraj rimayllata rimachishunayquipaj. Manchäga jutucay irmänunchicunata Tayta Diosninchipa shungun yarpashanta tantiyachicunayquipäpis, shiminta wiyacur cawanayquipäpis mañacunquiman. ¹³ Chaypis juc-niraj rimaycunata rimar, Tayta Diosninchita mañacunquiman rimashayquita ticrachinayquipaj. Chayraj irmänucunapis rimashayquita tantiyacunga.

¹⁴ Juc-niraj rimaycunačhu mañacupti, shungullä cushicun. Yarpaynimi ichanga il-laricäcun. Ima rimashätapis mana tantiyächu. ¹⁵ Chaynuy rurapti, ¿allichuraj caycan? Mana. Manchäga juc-niraj rimaycunačhu Tayta Diosninchita mañacur, alabansacunata cantar, shungüpis cushicunman. Yarpaynëpis tantiyacunman. ¹⁶ Irmänucuna, shunguyqui cushicuptinsi wajta runa juturashayquiman čhayamur, rimashayquitapis, cantashayquitapis mana tantiyangachu. Rinrinwan wiarpis shungunman mana čhayaptin: «Chaynuy caycallächun» ningachuraj? Mana. ¹⁷ Wajta runa mana imatapis jucungachu. Mana imatapis tantiyacungachu rimashayqui, cantashayqui shunguyquita sumaj cushicachiptinsi.

¹⁸ Ima allish Tayta Diosnинchi yanapämasha juc-niraj rimaycunata rimanäpaj.

¹⁹ Ichanga pipis mana tantiyanchu. Chaymi irmänunchicunawan jutucar juc-ishcayllata rimarpis, tantiyashallanta rimäman. Juc-niraj rimaycunata ama rimämanchu.

²⁰ Irmänucuna, wamracuna-jina ama pishi-yarpay canquichu. Paycuna shungun munashallanta ashir, cushish cawan. Jucha aparicuytapis mana yarpanchu. Chaymi jamcunapis sumaj tantiyacurir, imatapis ruranquiman mayur runacuna-jina.

²¹ Tayta Diosninchipa shiminčhu nin:

«Shimüta wiyacunanta munar,

jäpa runacunawan Israel runacunata willacachishaj.

Wajta runacunapa shiminwan willachishaj.

Juc-niraj rimaycunačhu willaycächiptisi, mana wiyacamangachu.»

²² Chaymi juc-niraj rimaycunata rimanchi Tayta Diosninchiman mana yupachicu-jcuna yarpačhacunapaj, mana juturaj irmänucunapächu. Irmänucunata Tayta Diosninchipa shungun yarpashanta willapänanchi; mana yupachicujcunatam ichanga mana.

²³ Mä, yarpačhacushun. Jutucay irmänucunash juc-niraj-juc-niraj rimaycunallačhu rimaycanman. Tayta Diosninchiman mana yupachicuj runa čayar, wajta runa čayar, ¿imaningaraj? «Llapanmi lüçuyasha» ninga. ²⁴ Llapan irmänucuna Tayta Diosninchipa shiminta sumaj willapäcupinti mi ichanga mana yupachicuj runapa shungunmanpis, wajta runapa shungunmanpis čhayanga. Juchayuj cashantapis tantiyacunga.

²⁵ Shungullančhu pacarächishancunata chapacuya mana camäpacur, wanacunga. Jun-gurpacuycur, Tayta Diosninchitapis alliman čhuranga: «Tayta Diosninchipa maquinčhu cawashayquita sumaj tantiyacuycä» nir.

²⁶ Chaura irmänucuna, ¿imatataj rurashun shacyächinacunanchipaj? Jutucar; waquiniqui cantanquiman. Waquinniqui Tayta Diosninchipa shiminta willapäcunquiman. Waquinniquina paypa shungun yarpashanta tantiyachicunquiman. Waquinniquina juc-niraj rimaycunata rimanquiman. Waquinniquina juc-niraj rimaycunata tictachinquiman llapan runa tantiyacunananpaj. Llapanta rurarpis, shacyächinacunquiman Tayta Diosninchipa shungun munashannuylla cawanayquipaj. ²⁷ Juc-niraj rimaycunata rimayta munar, ishcaj-quimsaj-imalla rimanquiman. Ichanga ichic-ichicllata rimanquiman tictachij runa captinraj. ²⁸ Juturaj irmänupa chaupinchu tictachij mana captin, juc-niraj rimaycunata ama rimanquimanchu. Shimiqui amucuya mana camäpacurmi ichanga, quiquillayquipaj rimacunquiman. Tayta Diosninchchi tantiyashunquipaj.

²⁹ Tayta Diosninchipa shiminta willacujcunapis ishcaj-quimsajlla willapäcunquiman. Waquinniqui tapunacunquiman ima-imata rimashantapis Tayta Diosninchipa shimin cashantapis, mana cashantapis musyanayquipaj. ³⁰ Tayta Diosninchchi camacächiptin-imapttinga, rimaycaj upällacunman jucriquina Tayta Diosninchipa shiminta willapäcunayquipaj. ³¹ Llapaniqui tantiyacunayquipaj, shacyäcunayquipaj juc-caman-juc-caman Tayta Diosninchipa shiminta willapäcunquiman. ³² Espíritu Santu rimachishuptiqui, waquin willacujcunapis wiyanacärinquiman. ³³ Tayta Diosninchchi mana munanchu shinri-shinri juturpänanchita. Manchäga allilla cawananchita munan.

Jutucaj irmänucuna may-chaychüpis juturashanchu ³⁴ warmicuna shimin chayashanta ama rimanmanchu. Manchäga Moisés isquirbishanta wiyacur, majanpa maquinchu cawanman. ³⁵ Llapan juturaj irmänucunapa ricay ñawinchu majanta tapuypa-tapunan mana camacanchu. Imatapis tapucuya munar wasinman cutiycur, majanta tapucuman.

³⁶ Irmänucuna, ¿imanirtaj yarpanqui: «Nuwacunallapita Tayta Diosninchipa shimin ricarisha. Nuwacunallata willapämasha» nir? ³⁷ Mayganiquipis: «Tayta Diosninchipa willacujnin caycä. Espíritu Santu shacyächimaptin, llapanta tantiyä» nir cartacamushätapis chasquicunquiman. Tayta Diosninchipa shungun munashallanta cartacamushätapis musyanquiman. ³⁸ Pipis wiyamayta mana munaptin, ama chasquinquimanchu. Chaynuy captin, Tayta Diosninchipis mana ricsij-tucungapächu.

³⁹ Irmänucuna, pipis juc-niraj rimaycunata rimaptin, ama michanquimanchu. Ichanga ima alliraj canman Tayta Diosninchipa shiminta willapäcur cawaptiqui. ⁴⁰ Imatapis rurarr, shinri-shinri ama juturpanquichu. Manchäga sumaj tantiyanacurir, juc shungulla cawanquiman.

15

Washäcu Jesú cawarimushanpita tantiyachicushan

¹ Irmänucuna, Tayta Jesúspa shiminta ama junganquimanchu. Ñaupata Jesúspita willapaptij, chasquicärishcanqui. Maquillanchu cawarcaycanqui. Cananga ama witicunquichu. ² Chayraj Tayta Diosninchipa maquinchu imaycamanpis cawanquipaj. Witicuquim ichanga Jesúspa shiminta chasquicushayquipis yangallapaj canga.

³ Nuwapis alli willapata wiyashätam willapashc妖. Tayta Diosninchipa shimin rimashannuylla juchanchi jungacänanpaj Washäcu Jesú wañuyman chayasha.

⁴ Ayantapis pampaycusha. Wañushanpita quimsa junajta shimin rimashannuylla Tayta Diosninchchi cawarachimusha.

⁵ Cawarircur, Pedrutapis, chunca ishcaywan (12) purishijnincunatapis ricaripusha.

⁶ Chaypita pichga pačhac-ima (500) irmänunchicunata ricaripusha.

Waqin irmänunchicuna cawarcaycanraj. Waquinmi ichanga wañucusha.

⁷ Chaypita Santiaguta ricariparcur, llapan caħancunatana ricaripusha.

⁸ Chaypitarañj ricaripamasha. Chaymi nü: «Jesúspa caúchan carpis, ushyapillanna caycä.» ⁹ Chaymi: «Jesúspa caúchan caycä» niyntapis pingacü. Waquin caúhancunamanpis mana tincüchu. Jananmanpis jutucaj irmänuncunata chiquir jaticaúhashcä. ¹⁰ Chaypis Tayta Diosninchí llaquipämashpan camacächisha shiminta willapäcur purinäpaj. Sumaj yanapämasha. Waquin caúhancuna mana aypämashachu. Ichanga mana quiquilläpitachu rurashcä. Manchäga llaquipämashpan Tayta Diosninchí llapanta camacächisha. ¹¹ Llapaními Tayta Diosninchipa shimillanta willapäcushcä. Chay alli willapata jamcunapis chasquicärishcanqui.

Wañushcunata cawarachimushanpita tantiyachicushan

¹² Nuwacuna willapäcärishcä: «Washäcuñj cawarisha» nir. Chaypis waquinniqui mana auininquichu: «Wañushcuna mana cawaringachu» nir. ¹³ Chaymi tapushayqui: «Wañushcuna mana cawaringachu» niptinchi, ¿Washäcuñj Jesúspis chaura manaéhi cawarishachu? ¹⁴ Washäcuñj Jesúsa mana cawarish caycaptin, manacajllapächi willapäcurpis puriyä. Jamcunapis yangallapächi shimiña chasquicur, Jesúzman yupachicuycanqui.

¹⁵ Washäcuñj Jesúsa rasunpa mana cawarish caycaptin, llullacurchi puriyä. «Washäcuñj Jesústa cawarachimusha» niptisi Tayta Diosninchí wañushcunata mana cawarachiptin, quiquin Tayta Diosninchitaéhi tumpaycä. ¹⁶ «Wañushcunata mana cawarachimungachu» niptinchi, Washäcuñj Jesústapis manaéhi cawarachimushachu. ¹⁷ Washäcuñj Jesústa mana cawarachimush caycaptin, manacajllapächi Tayta Diosninchimanpis yupachicuycanchi. Jucha aruyllachürächi cawaycanchi. ¹⁸ Washäcuñj Jesústa mana cawarachimush caycaptin, wañush irmänunchicunapis ushyacäcushanaéhi. ¹⁹ Nuwanchipis llaquicuypächi cawashunpaj Washäcuñj Jesúsa cay pachallaéhu ushyacash caycaptin.

Washäcuñj Jesúsa ñaupapämashanchi

²⁰ Runacuna tucuya yarpaptinpis, Tayta Diosninchí rasunpa Washäcuñj Jesústa cawarachimusha. Payga llapan wañushcunata ñaupapar, puntata cawarimusha. Cawarachimush carmi, wañushcunata cawarachimunantapis musyachimanchi.

²¹ Adán-janan llapan runapis wañuyman chayan. Cananga Washäcuñj Jesúspita llapan runapis cawaringa. ²² Adánpa llupinpa aywar, llapan runa wañuya tarin. Washäcuñj Jesústa chasquicurmi ichanga, imaycamanpis cawayta tarishunpaj. ²³ Llapanata Tayta Diosninchí camacächisha. Washäcuñj Jesúsa cawariyta ñaupapämashcanchi. Pay cutimuptinraj, shiminta chasquicuycunapis cawarishunpaj. ²⁴ Chaypita cay pacha ushyacanga. Washäcuñj Jesúsa llapan munayniyujcunatapis, mandajcunatapis, auturdäcunatapis illarachinga. Nircur maquinchú llapan purichishancunata Tayta Diosninchipa maquinman churanga. ²⁵ Washäcuñj Jesúsa llapallanta maquinchú purichinga cuncharyuncunata íchiper ushyacächishancaman. ²⁶ Chaypita wañuytapis illarachinga. ²⁷ Chaura shiminchú isquirbiraycächishannuya llap-llapallanta maquinchú purichinanpaj Tayta Diosninchí camacächisha. Quiquin Tayta Diosninchim ichanga Washäcuñj Jesúspis maquinchú mana purinchu. Manchäga Tayta Diosninchipa llapanpis cawan. ²⁸ Chaura maquinman llapanata churashanpita Wawan Jesúspis Tayta Diosninchipa maquinman llapanata churangapaj. Chaypita llap-llapantapis maquillanchüna Tayta Diosninchí purichinga

²⁹ Mä, yapay tapushayqui: «¿Imapäraj wañushcunapa juchan-janan ushyacärinqui?» Wañushcunata cawarachimunan mana caycaptin, yangallapächi ushyacärinquipis.

³⁰ Nuwacunapis wañuy-caway willapäcur, yangallapächi puri. ³¹ Irmänuncuna, achca cuti wañuypita jishpishcä. Ichanga willapäcupi Taytanchi Jesucristupa shiminta chasquicupty, jatunpa cushicü. ³² Willapäcur puripty, Éfeso marcachüpis tucuy-jinanpa wañuchimayta munasha. Micucuj uywacuna-yupay ushyamayta munasha. Wañucur mana cawarinanchi caycaptin, ¿imapäraj willapäcupis? Waquin runacuna-jinaéhi nüman: «Micur, upur puricushun.

Warasi-chicasí ushyacäcushunganaáchi.»*

³³ Irmänucuna, pantachicucunapa shiminta ama chasquipanquimanchu. Rimaypis purin: «Juchaáchu arujcunash juchaman chayachimanchi» nir. ³⁴ Sumaj tantiyacunquiman. Juchata ama aparicunquiman. Waquinniqui Tayta Diosninchipa shungunta mana musyar, yarpashantapis mana musyanquichu. Chaymi wanacunayquita munar, piñapashpä pingaymansí chayachishayqui. Llapaniquita piñapaj pingayman chayaptiqui, wanacunayquita munar.

Wañushcuna cawarimuptin, juc-niraj cashanta tantiyachicushan

³⁵ Sumaj tantiyachiya munaptisi, waquinniqui yarpačacurcaycanqui: «¿Imanayparaj wañushcunata cawarachimunga? Cawarachimush caycaptin, imá-nirajraj janan canga?» nir. ³⁶ Upa canqui-llapa. Llutanta yarparcaycanqui. Murutapis pampachiraj wiñamunapaj. ³⁷ Mana rígupa tulluntachu allpaman jatinchi. Manchága murullanta murunchi. ³⁸ Chaypita murunman-tupu Tayta Diosninchí wiñachimun. Llapán muruta murunman-tupu wiñamunapaj camacächin.

³⁹ Cay pachaáchu juc-niraj-juc-niraj cawanchi. Runawan uywa mana tincunchu. Pichuysacunawan piscädupis mana tincunchu. ⁴⁰ Cay pachaáchu cawaywan janaj pachaáchu cawaypis mana tincunchu. Cay pachaáchüga Tayta Diosninchí camacächishannylla llap-llapan cawan. Janaj pachaáchu cawajcunatapis juc-niraj-juc-nirajta camasha. ⁴¹ Musyanchi intipa, quillapa achicyayninpis juc-niraj-juc-niraj cashanta. Istrillacunapis juc-niraj-juc-niraj achicyämun. ⁴² Chaymi Tayta Diosninchí cawarachiptin, cawarijcunapis juc-niraj-juc-niraj cawarimunga. Cawajcuna imayllapis wañur, pampacunga. Cawarimujcunam ichanga imaycamanpis cawacunga. ⁴³ Cawajcuna wañucur, millanaypaj. Cawarimujcunam ichanga cuyayllapaj. Cawajcuna wañunáchi. Cawarimujcunam ichanga mañaypa-mañaycar cawacunga. ⁴⁴ Wañuptinchi, ayallanchita pampan. Tayta Diosninchí cawarachimaptinchim ichanga, juc-nirajna ricacushunpaj. Chaymi cay pachaáchu cawashanchi-jina janaj pachaáchüpis cawashunpaj.

⁴⁵ Tayta Diosninchipa shiminchú nin: «Cay pachaáchu runa ricarinanpaj Adánta puntata Tayta Diosninchí camaran. Adánmi cawayta chasquisha.»* «Jipa-caj Adán» nishan Jesúsmi ichanga cawachicuj. Paymi wañushcunata cawarachin. ⁴⁶ Chaypis cawari-nanchipaj wañunanchiraj. ⁴⁷ Naupa-caj Adánta allpapita ruraran. Ushyacajlla caran. «Jipa-caj Adán» nishan Jesúsmi ichanga janaj pachapita shamusha. ⁴⁸ Allpapita-cajcuna Adán-jina llapanchi wañuya tarishun. Janaj pachaman shuntacamaptinchí, Jesúsmanna ricchacushunpaj. ⁴⁹ Cananga wañucuj Adánman ricchacunchi. Jesús shuntacamaptinchim ichanga, paymanna ricchacushunpaj.

Wañushcuna cawarachimushan junajpita tantiyachicushan

⁵⁰ Irmänucuna, sumaj tantiyacushun. Jananchiga ushyacajllam. Ayanchipis is-munga. Ushyacaj jananchicunata janaj pachaman Tayta Diosninchí mana shuntangapáchu. Wañucujcunaga imaycamanpis mana cawangapáchu. ⁵¹ Chaymi Tayta Diosninchipa shungun imata yarpashantapis tantiyacushun. Mana llapanchichu wañuya tarishun. Chaypis llapanchita juc ñipchiylláchu Tayta Diosninchí juc-niraj cawayman ticrachimäshunpaj. ⁵² Jesús cutimuptin curnita suynaramuptin, wañushcuna cawari-caracamunga imaypis mana wañunapäna. Cawaycajcunatapis juc-niraj cawaymanna ticrarachimäshunpaj.

⁵³ Ushyacaj cashanchipita mana ushyacajmanna ticrachimäshunpaj. ⁵⁴ Wañucuj cashanchipita mana wañucujman ticrasharaj Tayta Diosninchipa shimin charcucash canga. Paypa shiminchú nin:

«Ima cushicuyraj wañuya íchipushápita.

* **15:32** Isaías 22.13. * **15:45** Génesis 2.7.

Wañuya illarachishcä.

⁵⁵ Cananga pipis mana llaquicunganachu:

«¿Wañuy apacamangachuraj?»

«Ñacachimangachuraj?» nir.»

⁵⁶ Juchata aparicur, wañuya manchacunchi. Wañuyman ćhayananchi cashantapis tantiyanchi Tayta Diosninchipa shiminta mana wiycushanchipita. ⁵⁷ Tayta Diosninchim ichanga Washäcu Jesústa caćhamusha wañupita washämänanchipaj. Jesúsmi nuwanchiraycur wañuyman ćhayar, wañuya ićhipusha. Ima allish Taytanchi Jesucristuwán Tayta Diosninchí llapanta camacächisha.

⁵⁸ Irmänucuna, llapaniquita llaquipaj. Chaymi Tayta Diosninchiman sumaj yupachicushun. Ama llutäpacunquichu: «¿Imamanraj ćhayashaj?» nir. Manchäga Taytanchi Jesúspa maquinčhu cawar, shungun munashanta rurar cawashun. Chaynuy cawaptinchi, imaimata rurashanchitapis Taytanchi Jesús sumaj mirachinga.

16

Irmänucunata wamayar piñapashan

¹ Cananga jucta tantiyachishayqui. Jutucaj irmänucunata yanapänayquipaj Galacia quinrančhu willapashä-jina cuyachicuyniquicunata shuntanquiman.

² Taripacushayquiman-tupu dumingun-dumingun yata ćhuranquiman. Chaynuy rurar ćhayamupti, mana shuntacaćharcaycanquipächu. ³ Chayamur, imallatapis shuntashayquita Jerusalén marcaman apachishun. Mayganiquipis aywaptiqui, cartanpawan apachishayqui. ⁴ «Pablo, jampis aywanquiman» nimaptiqui, aywähishämä.

Chay-tucuypa purinanpaj Pablo yarpashan

⁵ Watucuj shamur, Macedonia marca quinranparaj tumaramushaj. ⁶ Chaypitaj watucushayqui. Tamya wican-ima ćhayamupti, juyapärishunraj. Maypapis aywapti, purinäpaj imallawanpis yanapämämanquiman. ⁷ Ricaycunalläpaj watucuya mana munächu. Tayta Diosninchí camacächiptinmi ichanga, unaylla juyapäriyta munä.

⁸ Chaypis Éfeso marcaćhüräj juyapärishaj Pentecostés fiestata rurashan wicanaman.

⁹ Cay marcaćhu juyu runacuna mana pishiptinsi, willapänäpaj Tayta Diosninchí sumaj yanapaycäman. Jesúspa shiminta willapäcupti, achcaj runa ćhasquicuycan.

¹⁰ Timoteo ćhayamuptin, alli ricanqui, ari. Payga quiqui-yupay Taytanchi Jesúspa shiminta willapäcur puriyan. ¹¹ Pampaman ama ćhuranquichu. Manchäga watucumaj shamunanpaj yanapanquiman. Cayćhu ricaj-ricajlla irmänunchicunawan-ima shuyapaycä.

¹² Irmänunchi Apoluta parlapashcä: «Waqin irmänucunawan-ima Corinto irmänucunata watucamuy» nir. Ichanga manash shamungarächu. Juc junajrächi watucushunquipaj.

¹³ Irmänucuna, Jesús cutimunanta ricaj-ricajlla shuyäshun. Mana yamacällar Tayta Diosninchiman yupachicushun. Ima ñacayman ćhayarpis, ama manchacushunchu. Llapán shungunchiwan Tayta Diosninchipa shungun munashallanta rurar cawashun.

¹⁴ Imaypis sumaj llaquinacärishun. Yanapänacushun.

¹⁵ Acaya marcaćhu irmänu Estefanás wasinpa Tayta Jesúspa shiminta ćhasquicärisha. Paycuna irmänunchicunata sumaj yanapan. ¹⁶ Nuwanchipis chay-niraj mayur irmänucunata wiycushuwan. Llupinpa jatishuwan. Jucninchí-jucninchipis yanapänacushuwan.

¹⁷ Ima allish irmänunchi Estefanás, Fortunato, Acaico watucallämasha. Watucuya mana camäpacuptiquipis, ¹⁸ paycuna watucallämasha. Shacyächishushayqui-jina sumaj shacyächimasha. Chay-niraj irmänucunata alli ñawinchiwan ricashun.

Cartapa ushyanan

¹⁹ Asia quinranchu jutucaj irmänunchicunapis Taytanchi Jesúsman yupachicur, wamayäshunqui. Warmin Priscilawan irmänunchi Aquilapis, wasinchu jutucaj irmänucunapis wamayäshunqui. ²⁰ Llapan irmänucuna wamayäshunqui. Quiquipuicunapis sumaj wamayänacärinqui, ari.

²¹ Irmänucuna, nuwa Pablo cartacallämü. Jamcunata wamayämur, maquïwan isquirbiycämü.

²² Tayta Jesucristuta mana manchapacujcunata Tayta Diosnichi ñacayman chayachichun. Tayta Jesús, cutimuyna, ari.

²³ Llaquipäcuj Tayta Jesús sumaj yanapayculläshunqui, ari. ²⁴ Washäcuj Jesúspa maquinchu cawashpä llapaniquita sumaj llaquipaj. Chayllana.

Corinto marcačhu irmäncunaman San Pablo cartacushan 2

Tantiyacunanchipaj:

Pablo cay cartata isquirbiran Corinto marcačhu jutucaj irmäncunaman. Corinto jatun marca caran. Chay marcaman Pablo juclla cutiyta mana atipaptin, irmäncunata watucunapaj Tituta cačharan. Cutir, Pabluta willaran: «Irmäncuna willapäshayquinulla cawarcaycan. Waquin irmäncunam ichanga pampaman čhuraycäshunqui» nir. Chaymi paycunaman yapay cartacuran.

Chay marcačhu Pablo willapäcushanpita musyayta munar, liguinqui: Hechos 18.1-18; 1 Corintios.

Pablo isquirbiran:

Llaquipashpan juclla mana watucushanpita, wanacush runata alli ñawinwan ricanapita: 2 Corintios 1.1-2.11.

Ñacayman čhayashanpita, shacyäcushanpita, Tayta Diosninchipa shungun munashanuy cawashanpita: 2 Corintios 2.12-6.18.

Ñaupata piñapashanpita, Tito willaptin cushicushanpita: 2 Corintios 7.1-16.

Cuyachicuyninta cushish čhurananpita: 2 Corintios 8.1-9.15.

Shiminta willapäcunanpaj Jesús cačhacushanpita: 2 Corintios 10.1-13.13.

Pablo wamayashan

¹⁻² Corinto marcačhu, Acaya quinrančhu jutucaj irmäncuna, nuwa Pablo, Washäcu Jesúspa cačhan cashpä irmänunchi Timoteuwan ishcani cartacallämü. Tayta Diosninch camacächiyinpa Jesúspa shiminta willapäcur puriyä. Tayta Diosninchipis, Tayta Jesucristupis yanapayculläshunqui. Allilla cawaycachilläshunqui.

Llaquipäcuj Tayta Diosninchita alliman čhurashan

³ Tayta Diosninchita alliman čhurayculläshun. Payga Taytanchi Jesucristupa Taytan. Alli shungu cashpan sumaj llaquipämanchi. Shacyächimanchi. ⁴ Tucuy-jinanpa ñacaptipis, shacyächiman. Shacyächimashan-jina ñacajcunatapis shacyächinä camacan.

⁵ Washäcu Jesús-janan sumaj ñacachimashan-tupu nuwacunata Tayta Diosninch sumaj shacyächiman. ⁶ Shacyaycächimaptin, jamcunata shacyächinajpis camacan. Jamcunarycur ñacayman čhayashcä. Tayta Diosninchim ichanga llaquipämashpan shacyächiman. Canan jamcunatapis llaquipar, shacyächijman Tayta Diosninchiman sumaj yupachicunayquipaj, jishpichishunayquipaj. Chaymi jamcunapis ñacayman čhayar, ama yamacanquichu. ⁷ Washäcu Jesús-janan llapanchi ñacayman čhayashcanchi. Tayta Diosninchim ichanga llaquipämashpanchi shacyächimanchi. Chaymi shacyächishunayquita sumaj musyä.

⁸ Irmäncuna, Asia quinrančhu imanuy-imanuy ñacashätapis willashayqui. Juyupa ñacachimaptin, mana ičhipushcächu. Cawaytapis mana yarpashcächu. ⁹ Wañuy janäčhu caycasha. Chaycuna čhayapamaptin, cawaynipsis, wañuynipsis mana nuwapitachu cashanta tantiyacushcä. Chayraj Tayta Diosninchiman sumaj yupachicuya yačhacushcä. Payga wañushcunatapis cawarachin. ¹⁰ Quiquinmi wañuypitapis washämasha. Washämashannulla imaypis jishpichimanga. Cananga imaman čhayarpis, jishpichimänanta sumaj yupachicü. ¹¹ Washämänanpaj Tayta Diosninchita mañacärinqui, ari. Mañacärishayquita wiyaptin, achcaj runapis Tayta Diosninchita ninga: «Taytallau Tayta, ima allish Pablutawan Timoteuta sumaj yanapashcanqui» nir.

Corinto marcata Pablo watucuyta mana camäpacushan

¹² Irmänucuna, tincupämajcuna imata rimamaptinsi, mana llullacushcächu. Shungüpis musyan. Ricay ñawiquíchüpis alli cawashcä. Tayta Diosninchipa maquinchéhu cawar, mana alli-tucüchu. Mana runacuna ashishantachu willapäcur puriyca. Manchäga llaquipämashanpita Tayta Diosninchipa shiminta willapäcuyca. ¹³ Cartacamurpis, shungü yarpashanta mana pacallar cartacamushcä. Cartacamushäta liguir, sumaj tantiyacärinquiiman. ¹⁴ Waquinniqui mayna shungüta musyapashcanqui. Chaymi Taytanchi Jesús cutimuptin, nuwacunapaj ninquipaj: «Ima allish Jesúspita willapämasha.» Jamcunapäna nishaj: «Ima allish Jesúspa shiminta chasquicusha.»

¹⁵⁻¹⁶ Jamcunata musyapajmi. Chaymi ishcay cutipa watucuya yarparsi Macedonia quinranpa aywar, chayamuya yarpashcä. Cutimurpis, chayamuya munashcä. Chaypititaraj Judea quinranpa cuticüman caran. Cuticupti, jamcunapis yanapämanguiman caran. ¹⁷ Mana chayamuptimi ichanga, ama yarpanquichu: «Chay runa shiminta mana charcunchu» nir. Nuwa mana ishcay-quimsatachu rimä.

¹⁸ Tayta Diosninchshi shiminta charcushan-jina nuwapis shimiña charcü. Aunir, mana jipaman cutircüchu. ¹⁹ Washäcu Jesúspis Tayta Diosninchipa Wawan cashpan shiminta churcuran. Paypita willapäcurcayca Timoteuwan, Silvanuwan quimsanii. ²⁰ Washäcu Jesú Tayta Diosninchshi aunishanta llapallanta charcun. Aunishanta charcushanpita: «Chaynuy caycullächun» nir Tayta Diosninchita alliman churanchi. ²¹ Paymi acraca-mashcanchi Washäcu Jesúspa maquinchéhu cawananchipaj. Shungun munashannuy cawananchipäpis yanapaycämanchi. ²² Canan wawan cashanchi musyacänanpaj Espíritu Santu maquinchéhu puriyca-chimanchi.

²³ Irmänucuna: «Watucushayqui» nirpis llaquicuyman chayanayquita mana munar, Corinto marcaman mana shamushcächu. Jamcunawan alli ricanacuya munashäta Tayta Diosninchipis musyan. ²⁴ Tayta Jesúspa maquinchéhu cawaycaptiqui, maquichacunaj mana camacanchu. Manchäga alli shimilläpa imatapis tantiyachishayqui llapan shunguyquiwan Tayta Diosninchipa maquinchéhu cushishalla cawanayquipaj.

2

¹ Chaymi watucuya munarpis: «Corinto irmänucunata llaquicuyman churaruñman» nir mana shamushcächu. ² Jamcuna sumaj shacyächimashcanqui. Chaymi piñapar llaquicuyman churaptij, ¿piraj shacyächimanga? ³ Jamcuna shacyächimänayqui camacan. Llaquicuyman churamänayquim ichanga mana camacanchu. Chaymi cartallata apachimushcä. Tantiyacuptiqui, shacyächinacur cushishalla cawashunpaj.

⁴ Piñapaya cartacamur, juyupa llaquicur wagashcäraj. Mayganiquitapis llaquicuyman churayta mana munashcächu. Manchäga sumaj llaquipäshajta tantiyacärinayquita munashcä.

⁵ Achcaman chayachiya mana munächu. Chaypis mana upällacümanchu. Tin-cupämaj runa mana quiquillätachu llaquicuyman churamasha. Manchäga jamcunatapis llaquicuyman churashcashunqui. ⁶ Ima captinpis, juyu ñawiquian ama ricaynachu. Mayna piñapashcanqui. ⁷ Wanacush captin, juchanta ama yarparaynachu. Manchäga shacyächinquiman. Mana shacyächiptiqui, pingay-tucushchi ushyacanga. ⁸ Chay runata alli ñawiquipana ricaycäriy. Llaquipaycäriy, ari.

⁹ Chaynuypis shunguyquita musyapayta munar, mayna cartacamushcä: «¿Mä, jucpa shimintachush chasquicunga? ¿Shimillatachush wiycunga?» nir. ¹⁰ Chay runapa juchanta mana yarparaptiqui, nuwapis mana yarparäshänachu. Juchacush captinsi, jamcunarycur juchanta mayna jungaycushcä. Washäcu Jesúspis musyaraycanna. ¹¹ Chaynuy ruraptinchi, Supay mana maquichacamäshunchu. Supayga llapanchita juchaman janchayta munaycamanchi.

Washäcu Jesúspa shiminta cushish chasquicushan

¹² Tróade marcaáhu Washäcuj Jesúspa alli willapanta willapäcuj ́hayapti Tayta Diosninchí camacächiptin, llapan runa cushishalla ́chasquicallämasha. ¹³ Chaypis irmänu Tituwan mana tincur, llutäpacushcä. Chaymi: «Aywacuycäna» nir Tróade marcapita Macedonia quinranpa aywacushcä.

¹⁴ Cananga Tayta Diosninchita alliman ́churayculläshun. Washämänanchi-raycur Washäcuj Jesústa caáchamusha. Payga llapallanta iéhipur, Tayta Diosninchipa maquinchéhu puriycächimanchi. Chaymi Jesúspita willapäcur puripti, may-chaychüpis runacuna wiycaycan. ¹⁵ Tayta Diosninchí camacächiptin, nuwanchi-raycur Jesús wañuyman ́hayasha. Chaymi Washäcuj Jesúspita willapäcur puripti, shiminta ́chasquicucunata jish-pichinga. Mana ́chasquicucunata ichanga ushyacayman ́hayachinga. ¹⁶ Paycunaga Jesúspita shiminta wasguipan. Chaypita wañuymanpis ́hayanga. ́Chasquicucunam ichanga Jesúspita shiminta wiycärin. Chaypita mana ushyacaj cawaymanpis ́hayanga. Chaymi Tayta Diosninchipa shiminta sumaj willapäcuycaptisi, runacuna ́chasquicunapnis, wasguinapnis mana nuwapitachu. Tayta Diosnillanchi musyaraycan. ¹⁷ Waquin runa pačhan-raycullar willapäcur purin. Nuwacunam ichanga llapan shungüwan willapäcuycä. Tayta Diosninchí caáchacamaptin, Washäcuj Jesúspita willapäcur puriycä. Rimashäta quiquin Tayta Diosninchipis musyaraycan.

3

Washäcuj Jesúspa caáchancunapita rimashan

¹ Llapantapis rimä mana jatun-tucushpächu. ́Hayamur, numramintu papilta mana ricachishcajchu: «Cay runa Washäcuj Jesúspa caáchan» nimänayquipaj. Jucläpa aywanäpäpis: «Papilta rurapämäy» nir mana mañacushcajchu. Waquinmi ichanga allitetur, numramintu papilninwanraj purin. ² Nuwacunam ichanga papilwanrächu mana puri. Manchäga jamcuna numramintu papil-yupay carcaycanqui. Washäcuj Jesúspita willapaptij shunguyquiman ́hayaptin, shungun munashannuya cawarcaycanqui. Chaynuy cawashayquita ricar, Washäcuj Jesúspa caáchan cashäta runacuna tantiyacunga. ³ Shungun munashannuy cawanayquipaj quiquin Washäcuj Jesús camacächisha. Nuwacunawan shiminta willacachisha. Shiminta mana papilchüchu, mana läja rumiýchüchu isquirbichisha. Manchäga Espíritu Santuwan cawaj Tayta Diosninchí shunguyquiman ́hayachisha.

⁴ Tayta Diosninchí nuwacunata rasunpa caáchacamasha. Jamcunapis Washäcuj Jesúspa shiminta ́chasquicur, Tayta Diosninchipa shungun munashannuy cawarcaycanqui.

⁵ Chaynuy cawanayquipaj mana quiquilläpitachu willapäcü; manchäga Tayta Diosninchí yanapämäptin. ⁶ Paymi camacächisha alli willapata willapäcunäpaj. Alli willapa mana Moiséspa shiminchu. Moiséspa shiminta mana ́charcucunata wañuchipäcuj. Alli willapata ́chasquicuptinchim ichanga, Espíritu Santu imaycamanpis cawachimanchi.

⁷ Unay Israel runacunawan parlanacuptin, läja rumiáchu Tayta Diosninchipa shimin isquirbiraran. Isquirbisan shiminta Moisés ́hayachiptin, jajllanpis achic-achicyaycaran. Chaymi runacuna cushicuran: «Ima allish Tayta Diosninchawan tincusha. Tincushanpita jajllanpis achic-achicyaycan» nir. Chaypis achicyashan cashgallanman cuticuriran. Chay-jina Moisés ́hayachishan shiminta ́charcuya mana camäpacur, runacunapis alli cawaypita wañuyman ́hayaran. ⁸ Tayta Diosninchí shiminta musyachicur, Moiséspa jajllantapis achic-achicyächiran. Chayta ricar, unay runacuna sumaj cushicuran. Cananga Espíritu Santu paypa shiminta musyaycächimanchi. Chayga sumaj-sumaj cushicuypämi. ⁹ Unayga Tayta Diosninchipa shiminta ́chasquicur, runacuna sumaj cushicuran: «Cananga Tayta Diosninchipa ricay ñawináchu allina cawashunpaj» nir. Chaypis shiminta ́charcuya mana camäpacur, juchaáchu cawashanpita wañuyman ́hayaran. Cananmi ichanga Washäcuj Jesústa ́chasquicuptinchi, juchaynajta

alli ñawinpa Tayta Diosninchi ricamanchi. Chaypita jatunpa cusicunchi. ¹⁰⁻¹¹ Sumaj tantiyacushun. Unay parlanacushan sumaj alli carsi, yupash watacunallapaj caran. Washäcu Jesúspa shiminta échasquicuptinchim ichanga, imaycamanpis maquinchú Tayta Diosninchi cawachimanchi. Chaymi Washäcu Jesúspa shiminman unay parlanacushan mana tincunchu.

¹² Tayta Diosninchipa ñaupanman chayayta yupachicur, imatapis mana manchac-ullarna shiminta willapäcur puriyä. ¹³ Tayta Diosninchawan tincushanpita Moiséspa jajllan achicyacäcuran. Chaymi Israel marca-masincuna mana ricananpaj chapacurcuran. Ichanga yupash junajlla achicyaptin, unay parlanacushanpis yupash watallapaj cashanta tantiyacunchi.

¹⁴⁻¹⁶ Unay Israel runacuna chayta mana tantiyaranchu. Rumi shungu caran. Canancamanpis Tayta Diosninchipa shiminta liguir, mana tantiyanchu. Ñawin chapash-yupay cawan. Washäcu Jesúzman yupachicuptinchim ichanga, Tayta Diosninchi tantiyachimanchi. Shiminpis shungunchiman chayan. ¹⁷ Chaymi: «Tayta Diosninchia tantiyachimanchi» nir Espíritu Santuwan yanapaycämashanchita musyanchi. Paymi jishpichimanchi. Shungun munashannuy cawananchipäpis yanapämanchi. ¹⁸ Chaynuy cawaptinchii, ricamashpanchi runacuna ninga: «Paycuna rasunpa Tayta Diosninchipa maquinchú cawan.» Paypa maquinchú cawar manchapacur, shungunman-tupu cawashunpaj. Chaypämi waran-waran Espíritu Santu yanapaycämanchi.

4

Mitu mancawan tincuchishan

¹ Chaymi Tayta Diosninchipa shiminta willapäcur, mana yamacächu. Llaquipämashpan payga nuwacunata caéhacamasha. ² Pitapis mana chapata rurashcächu: «Pampaman churamasha» nir. Mana cushichipayllapachu willapäcushcä. Manchäga runacunapa ricay ñawinchüpis Tayta Diosninchipa shimmillanta willapäcü. Chayta pii-maypis musyar, nuwacunaman yupachicamanman.

³ Jesúspa alli willapan runata willapaycä. Shungunman mana chayaptinmi ichanga, shiminta mana échasquicushanpita Tayta Diosninchii mana jishpichingachu. ⁴ Paycunata supay maquichacusha rumi shungu cananpaj. Chaypita Washäcu Jesúspa alli willapanata mana tantiyacunchu. Washäcu Jesúz quiuishllan car, Tayta Diosninchipa shunguntapis musyachimanchi. ⁵ Nuwacuna mana jatun-tucurchu willapäcü. Manchäga Taytanchi Jesucristuta alliman churaycä. Paypa maquinchú cawananchi. Jamcunata llaquipaywan willapäcur purircaycä. ⁶ Tayta Diosninchii cay pachata camar achqui mana caycaptinraj, niran: «Achicyächun.» Chay-jina Washäcu Jesúspa shimin shungunchiman chayaptin, shungunchipis achicyacäcun. Quiquin Washäcu Jesúsnam musyachimanchi Tayta Diosninchii sumaj alli cashanta, munayniyuj cashanta, llaquipäcuj cashanta.

⁷ Mitu manca ushyacajlla caycashan-jina nuwanchipis ushyacajlla caycanchi. Chaypis Tayta Diosninchipa shimin shungunchimanraj chayasha. Quiquinmi yanagaycämanchi. Chaymi shiminta willapäcupti, waquin runapa shungunman chayananpaj mana nuwacunachu camacächi. Chaytaga quiquin Tayta Diosninchii camacächin. Paylla munayniyuj. ⁸ Chaymi ima ñacayman runacuna chayachimaptinsi, mana ushyacächimanchu. Tantiyayta mana atiparsi, mana llutäpacüchu. ⁹ Chiquir ushyamaptinsi, imaman jitarpamaptinsi, Tayta Diosninchii mana caécharimanchu. Willapäcunäpäpis tucuypita washäman. ¹⁰⁻¹¹ Maypa puriptipis, Jesúz-janan runacuna ñacaycächiman. Jesústa wañuchishan-jina nuwacunatapis wañuchimayta munan. Jesúsmi ichanga munayniyuj cayninwan washäman. Maquinchú cawachimashanchitapis runacuna tantiyacunga. ¹² Wañuy janächu caycaptinsii, jamcunata Jesúz cawaycächishunqui.

¹³ Salmos libručhu nin: «Tayta Diosninchiman yupachicü. Chaymi mana upällacüchu.» Chay runa yupachicushan-jina nuwacunapis Tayta Diosninchiman yupachicü. Shimintapis willapäcuyca. ¹⁴ Paymi Taytanchi Jesústa cawarachimusha. Chaynuy nuwacunatapis cawarachimanga. Jesúspa ñaupančhu cawananchipaj nuwacunatapis, jamcunatapis shuntamäshunpaj. ¹⁵ Allipämi jamcuna-raycur ñacayman chayashca. Shiminta wiyar, Tayta Diosninchim llaquipäcuj cashanta tantiyacushcanqui. Jamcunapitapis achcay runa tantiyacäringa. Tantiyacur, chay-chicay runa cushicuywan Tayta Diosninchita alliman churanga.

Janaj pacha wasipita tantiyachishan

¹⁶ Chaymi ñacachimaptinsi, mana yamacächu. Janä ushyacaypa aywaptinsi, shungü mañaj-mañajlla caycan Tayta Diosninchiman yupachicunapaj. ¹⁷ Cay pachačhu yupash watalla ñacanchi. Janaj pachačhumi ichanga achic-achicyaycaj pachačhu imaycamanpis cawashunpaj. Cushi-cushilla juyäshunpaj. ¹⁸ Cay pachačhu ñacaycunapis, llapan ricashanchicunapis ushyacajlla; janaj pachačhumi ichanga mana. Chaymi ushyacänäta musyar, janaj pachačhu camapämashanman yarparayca.

5

¹ Cay pachačhu chuclla wasi ushyacaj-jina nuwanchipis ushyacajlla caycanchi. Runa rurashanpis ushyacajlla. Wañur ushyacaptinchipi ichanga, Tayta Diosninchim camacächishan wasíchu cawachimäshunpaj. Janaj pachačhu wasiga mana ushyacajmi. ²⁻³ Cay pachačhu cawar, ñacanchi. Juyupa llaquicunchi: «Maynapis janaj pachaman aywacüman. Wasiynaj mana juyämanchu» nir. ⁴ Cay pachačhu juyar, juyupa llaquicunchi. Sumaj ñacanchi. Chaypis wañuyman chayayta mana munanchichu. Manchäga mana wañujmanna juclla Tayta Diosninchim ticrachimäshun. ⁵ Janaj pachačhu cawananchita mayna shuyaraycanchi. Camacächishanta Espíritu Santuwan Tayta Diosninchim musyachimashcanchi.

⁶ Chaymi ima captinpis, Tayta Diosninchiman sumaj yupachicunchi. Cay pachačhu cawashanchicaman Tayta Jesúswan mana ricanacushunrächu. Yata-yata-yupaymi juyaycanchi. ⁷ Mana ricarsi, llapan shungunchiwan payman yupachicunchi. ⁸ Maynapis wañucushuwan Tayta Jesúswan tincunanchipaj. ⁹ Chaymi cay pachačhu cawarpis, wañuy jananchichu captinpis, Tayta Jesúspa shungun munashallanta rurar cawashun. ¹⁰ Janaj pachačhüga Washäcuj Jesú ima-imatasi sumaj tapumäshunpaj. Llapanchita imatapis rurashanchiman-tupu allimanpis, mana allimanpis chayachimäshunpaj.

Tayta Diosninchowan alli ricanacushanchipita willapashan

¹¹ Chaymi Tayta Jesú tapumänanchita musyaycar, manchapacur cawashuwan. Runamasinchitapis tantiyachishuwan Tayta Jesúspa maquinčhu cawanapaj. Nuwacunapa shungüta Tayta Diosninchim sumaj musyapan. Jamcunapis musyapämankiman. ¹² Waquin runa chayamuptinpis, shunguntaraj musyapanquiman. Paycuna janan shungulla imatapis ruran; nuwacunam ichanga mana. Chaypis mana jatun-tucuycächu. Manchäga Tayta Diosninchipa shungun munashanta rurapti, alli ricamanquiman: «Paycuna rasunpa Tayta Diosninchita manchapacun» nir. ¹³ Waquin runa riman: «Purišijmasincunawan-ima Pablo lüçuyash caycan» nir. Jamcunam ichanga mana lüçuyash caycashäta musyanqui. Jamcuna-raycur maquinčhu Tayta Diosninchim purichiman.

¹⁴⁻¹⁵ Washäcuj Jesúspis llaquipämashpanchi maquinčhu charaycämanchi. Nuwanchiraycur wañuytapis tarisha. Chaymi nuwanchisi wañush-jina juchata ama apari-cushunchu. Jesúsga llapan runata washänan-raycur wañuyman chayasha. Tayta Diosninchim ichanga cawarachimusha. Chaymi shungunchi munashallanta ama

rurashunchu. Manchäga Tayta Jesúsllata wiycushun. Payga llapanchipaj wañuyman chayasha. Paytam Tayta Diosninchu cawarachimusha.

¹⁶ Ñaupata runa-masinchitapis, Jesústapis: «Wañucujlla» nir ricashcanchi. Cananmi ichanga Washäcu Jesúspita mana wañucuj cashanta tantiyacushcanchi. ¹⁷ Cananga Washäcu Jesúspita maquinchu cawar, mana unay cawashanchinuychu cawarcaycanchi. Manchäga Tayta Diosninchipa shungun munashannuylla cawaycanchi. Shungunchipis jucha aparicuya mana munanchu. ¹⁸ Alli shungu cawananchipaj quiquin Tayta Diosninchu camacächisha. Chaymi Washäcu Jesústa caáchamusha. Alli ricanacunanchipaj Jesúspita mana wañuyman chayasha. Llapan runawan alli ricanacuya munar, nuwacunatapis shiminta willapäcu caáchacamasha.

¹⁹ Washäcu Jesúspita llapan runawan Tayta Diosninchu alli ricanacun. Juchata aparicushantapis mana yarparannachu. Chay willapata willapäcunäpaj nuwacunatapis caáchacamasha. ²⁰ Chaymi Washäcu Jesúspita shiminta willapäcuyca. Shiminta willapäcupti, quiquin Tayta Diosninchu willapaycäshunqui. Chaymi Washäcu Jesústa wiycushpayqui wanacur, Tayta Diosninchuwan alli ricanacunquiman. ²¹ Jesúspita ima juchatapis mana aparicuranchu. Chaypis nuwanchi-janan juchayulta-yupay Tayta Diosninchu ricaran. Cananga Jesúspita juchaynajta ricaycämachi.

6

¹ Nuwacuna Tayta Diosninchipa cachan carcayca. Llaquipaycämaptinchi, shiminta wiycushuwan. Camapämashanchita ama jungashuwanchu. ² Shiminchu nin:
 «Jitapashä junajché
 mañacamashayquita wiyashcraj.
 Jishpichinä camacaption,
 chay junaj washashcraj.»

Sumaj tantiyacushun. Cananpis mañacushanchita Tayta Diosninchu wiyaycan. Washämänanchi junajpis chayamushana.

Jesúspita cachan cashpan Pablo ñacashan

³ Irmäncuna, Washäcu Jesúspita willapäcushäjan pipis pampaman ama churamanmanchu. Achäqui mana cananpaj Tayta Diosninchita manchapacur cawarcayca. ⁴ Cachan cashpä llapanpa ricay ñawinchu Tayta Diosninchipa shungun munashallanta rurarcayca. Chaymi ñacayman chayarsi, llaquicuyman chayarsi, tincupacayman chayarsi, mana yamacächu. ⁵ Runacuna wascar ushyamaptinpis, carsilarächimaptinpis, jargur ushyamaptinpis, mana jamaypa arurpis, mana puñuya tarirpis, paçhäpaj mana tarirpis, Tayta Diosninchita mana jungächu. ⁶ Manchäga paypa shungun munashannuylla cawarcayca. Shungun yarpashanta musyapar, pitapis tantiyapä. Llaquipä. Chayta ruranäpaj Espíritu Santu shacyächiman. Chaynuypis llapan shungüwan pitapis llaquí. ⁷ Tayta Diosninchipa shimillanta willapäcü. Munayniyuj cashpan shacyächiman. Llapantapis rurarcayca Tayta Diosninchiman runacuna yupachicunanpaj. Wasguiyta munaptinpis, achäquita mana churapashcächu.

⁸ Waquin runa alli ricamaptinpis, waquinga juyu ñawinpa ricaman. Waquin allichu jurgamaptinpis, waquinga ashllir ushyaman. Tayta Diosninchipa shimillanta willapäcuptipis, waquinga llullata-yupay ricaman. ⁹ Ricsish runa captipis, waquinga jäpa runata-yupay ricaman. Illarachimayta munaptinpis, cawaycäraj. Wascar ushyamarjis, mana wañuchimanrächu. ¹⁰ «Llaquish cawan» nimaptinpis, shungü mana llaquicunchu. «Pishipacuj» nimaptinpis, achcajta yanapashcä. «Jalapačha» nimaptinpis, imapis mana pishimashachu.

¹¹ Corinto marca irmäncuna, imatapis mana pacallar cartacaycämü. Llapan shungüwan willapaycraj. ¹² Jamcunata llapan shungüwan llaquij. Jamcunam ichanga

ricamaytapis mana munanquichu. ¹³ Chaypis wawä-yupay carcaycanqui. Llaquishaj-jina llaquimänayqui camacan. Chaymi llaquipänacur cawashuwan.

Juchata aparicuypita witicunananpaj willapashan

¹⁴ Tayta Diosninchita wiyacur, juchačhu arujcunapa llupinpa ama jatishunchu. Paycunawan shungunchi mana tincunchu. Mä, tapushayqui. ¿Rasun rimajwan llulla rima-jpis tincungachuraj? Mana. ¿Chacajwan achicyajpis tincungachuraj? Mana. ¹⁵ ¿Washäcuj Jesúswan Supaypis tantiyanacungachuraj? Mana. ¿Tayta Diosninchita wiyacujcunawan wasguipajcunapis juc shungulla cawanmanchuraj? Mana. ¹⁶ ¿Juc wasillačhu Tayta Diosninchitapis, jircacunatajis manchapacushuwanchuraj? Mana.

Sumaj tantiyacushun. Wasi wamracuna taytanpa maquinčhu cawan. Chay-jina nuwanchipis Jesúspa shiminta čhasquicuyninchipa Tayta Diosninchipa maquinčhu caway-canchi. Payga cawanmi. Quiquinmi niran:

«Paycunawan juyäshaj.

Waran-warana yanagäshaj.

Tayta Diosnin caycapti, nuwallata manchapacamanga.

Paycunata maquíčhu purichishaj.»*

¹⁷ Jananmanpis niran:

«Juchačhu arujcunapa llupinpa ama jatinquichu.

Paycunawan ama juturanquichu.

Marca-pingay ama cawanquichu.

Chayraj alli ñawipa ricashayqui.*

¹⁸ Warmitapis, ullgutapis llapaniquita wamrachacushayqui.

Jamcunapis Taytachacamanquipaj.

Nuwallam Tayta Diosniqui caycä.

Nuwallam munayniuj caycä.»*

7

¹ Irmäncunallau irmänu, Tayta Diosninchita wamrachacamänanchipaj mayna auni-mashcanchi. Chaymi juchata ama rurashunchu. Shungunchichüpis ima llutancunatasi ama pacarächishunchu. Manchäga Tayta Diosninchita manchapacushun. Shungun munashallanta rurar cawashun.

Corinto irmäncunawan Pablo yačhänaçushan

² Irmäncuna, llaquinacur cawashuwan. Nuwacuna mana mayganiquitapis pam-paman čhurashcajchu. Mana jagayächishcajchu. Mana imayquicunatajis ushyapashcajchu. ³ Llapantapis rimä mana nanapararchu. Jamcunata wañuy-caway llaquishayqui.

⁴ Chaymi jamcunaman sumaj yupachicü. Jamcunapita sumaj cushicü. Jamcunaraycur ñacayman čhayaptipis, llaquicuyman čhayaptipis, shungü ancashyärin. Jatunparaj cushicuri.

⁵ Macedonia marcaman čhayamushäpita-pacha jamayta mana tarishcächu. Manchä tucuy-jinanpa ñacashcä. Runacuna ticrapamashanpita llaquicushcä. Jamcuna-raycur yarpačhacur llutäpacushcä. ⁶ Tayta Diosninchim ichanga llutäpacujcunata shacyächin. Tituwan tincuchimar, nuwatapis shacyächimasha. ⁷ Tito čhayamur, cushicushpan ni-masha: «Corinto marca irmäncuna manchapacur cawarcaycan. Ichanga ñaupata tic-shaparänacushayqupitash jatunpa llaquicun. Cananga jamwan tincuytash munaycan.» Chaynuy willamaptin, jatunpa cushicushcä.

⁸ Ñaupata cartacamushä llaquicuymanshi čhurashcashunqui, ¿au? Quiquüpis llaqui-curishcäraj; cananmi ichanga, mana. ⁹ Manchäga jatunpa cushicü. Pingayman

* **6:16** Levítico 26.12. * **6:17** Isaías 52.11. * **6:18** 2 Samuel 7.14.

Churaypa piñacuptijraj, wanacushcanqui. Cananga llapan shunguyquiwan Tayta Diosninchiman yupachicurcaycanqui. Chaymi cusicunquiman: «Piñacamänanchipaj allipächi Tayta Diosninchichi camacächisha» nir. ¹⁰ Tayta Diosninchichi camacaycachiptin, piñacamashanchicunatapis chasquicushwan. Piñacamashanchicuna alli caycan llaquicuyman chayananchipaj. Llaquicur wanacuptinchi, jishpichimashpanchi Tayta Diosninchichi alli cawayta tarichimanchi. Llaquicur mana wanacuptinchim ichanga, wañuymanship chayashunpaj. ¹¹ Chaymi rasullanta rimashcanqui: «Pingayman Churamänanchipaj allipächi Tayta Diosninchichi camacächisha» nir. Chaynuy captin, allipaj piñacushcaj. Cananga alli ñawiquian ricarcaycämanqui. Ticrapamaj runa pampaman churamaptinsi, sumaj nanachicamashcanqui. «Paycuna chay-niraj» nir rimay puriptinpis, sumaj llaquicushcanqui. Tayta Diosninchita manchapacur, chay runatapis sumaj piñacushcanqui. Cananga paypa shungun munashannuy cawaptiqui, sumaj cusicü. ¹² Cartacamurpis, mana wiyächipashcajchu. Manchäga Tayta Diosninchipa ricay ñawinéhu nuwacunapaj yarpaçacunayquipaj cartacamurä. ¹³ Mana jungamaptiqui, shungüpis jatunpa cushima-cusha.

Titupis cutimur, shacyächillämasha. Ima allish jamcunapis payta shacyächishcanqui. ¹⁴ Allipaj Tituta nirä: «Corinto marcachu irmänunchicunata alli ñawipa ricä.» Quiquinpis allíchu jurgushcashunqui. Jamcunata willapäshaj-jina Titupis chaynuylla willamasha: «Paycuna rasunpa Tayta Diosninchipa shungun munashannulla cawarcaycan» nir. ¹⁵ Jamcunaga Titupa shungunman sumaj tincunqui. Manchapacur chasquicushayquipita, shiminta wiyacushayquipita paypis jatunpa cusicun. ¹⁶ Chaynuy cawashayquipita jamcunaman sumaj yupachicü.

8

Jerusalén marca irmänucunapaj cuyachicuyninta shuntashan

¹ Cananga Macedonia quinranéhu jutucaj irmänucuna imanuy cawashantapis willapärishayqui. Paycuna Tayta Diosninchichi llaquipäcu cashanta tantiyacusha. Chaymi cuyay-munaypaj cawarcaycan. ² Juyupa ñacarpis, pasaypa pishipacurpis, cushima-cushalla cuyachicuynincunata achcanpa Tayta Diosninchipi churasha. ³ Taripacushanmantupu cuyachicuynincunata churashanta quiquipis ricashcämi. Achca-achcatam churasha. Shungun shacyäcupin, nimasha: ⁴ «Cuyachicuynicunata Churanäta ama miähmaychu, ari. Waquin irmänunchicunata yanapänä camacan.»

⁵ «Taripacushayquiman-tupulla churashanta» niycaptisi, achca-achcataraj churasha. Churaycur, nimaran: «Nuwacunapis Tayta Diosninchipa maquinéhu cawarcaycä. Maquinéhu cawar, munashantapis rurashaj. Tayta Jesústa wiyacur, jamcunatapis yanapäshayqui.» ⁶ Chaynuy nimartin, Titutapis caçhamushcä: «Corinto marca irmänucuna churashan cuyachicuynincunata shuntaraycamuy waquinta shuntamushayqui-jina» nir.

⁷ Jamcuna Tayta Diosninchiman sumaj yupachicurcaycanqui. Shimintapis sumaj tantiyacurcaycanqui. Llapan shunguyquiwan chasquicärishcanqui. Chaymi shacyashacyalla runa-masiquicunatapis yanaparcaycanqui. Alli ricashaj-jina nuwacunatapis alli ricarcaycämanqui. Chaymi cuyachicuyniquicunatapis llapan shunguyquiwan churanguiman.

⁸ Ichanga taripacurraj churanguiman. Chaypis waquin irmänunchi imanuy churashantapis ricacunquiman. Alli shunguyquiwan churaptquiraj, llaquipäcu cashayquita llapan musyanga. ⁹ Taytanchi Jesucristupis llaquipämashpanchi allilla cawaycashanéhu nuwanchi-raycur ñacananpaj shamusha. Cananga yanapämaptinchi, alli cawayta tarishcanchi.

¹⁰ Jamcuna janyan watapita llapan shunguyquiwan cuyachicuyniquicunata churashcanqui. Cananga shimita wiyanayqui camacan. ¹¹ Churayta jallarishayquijina taripacushayquiman-tupulla churanquiman. «Alli canman churaptiqui» nipti, llapan shunguyquiwan aunikashayqui-jina cushishalla churanquiman.

¹² Taripacushanchiman-tupu llapan shungunchiwan churaptinchi, cuyachicuyninchita Tayta Diosninchita chasquin. Imanchisi mana caycaptinga: «Churay» mana nimanchichu.

¹³ Ichanga ushyapacayman chayarushuwan jucta-jucta yanapashanchi-janan. Llapanchipis juc shungulla yanapänacushuwan. ¹⁴ Cananga jamcuna puchuy-puchuy cawarcaycanqui. Chaymi yanapänayqui camacan. Wara-warantin pishipacujcuna puchuy-puchuy cawanga. Chaura ushyapacayman chayaptiqui, paycunana yanapäshunayqui camacanga. Chaymi yanapänacur, juc shungulla cawashun. ¹⁵ Tayta Diosninchipa shiminpis nin:

«Achca-achcata shuntarpis, mana puchupacushachu.

Ichicllata shuntarpis, mana pishipacushachu.»*

Irmänu Titupaj mañacapushan

¹⁶ Tito llaquipäshushayquita musyar, cusicunquiman: «Taytallau Tayta, ima allish Pablo llaquipämashan-jina Titupis llaquipämanchi» nir. ¹⁷ Irmänu Tituta: «Corinto marcachu irmänucunata watucurishun» nipti, juclla aunikasha. Alli ricashushpayqui quiquillanpita shaycämun.

¹⁸ Juc irmänuwan-imá Tituta caýchämü. Chay irmänuta Tayta Jesúspa alli willapanta willapäcushanpita may-chaychüpis juturaj irmänunchicuna alli ñawinpa rican.

¹⁹ Chaymi payta acracusha: «Cuyachicuycunata Pablo shuntaptin, ayway. Yanapämuy» nir. Cuyachicuya shuntaycä Tayta Diosninchita alliman churashpä, pishipacujcunata llaquipashpä. ²⁰ Quimsaní shuntapti, runacuna mana jamurpämangachu: «Quiquillanpächi chay-chicata shuntaycan» nir. ²¹ Chayta mana rurämanchu. Manchäga Tayta Diosninchipa ricay ñawinchüpis, runa-masinchipunapa ricay ñawinchüpis alli llucshüman.

²² Paycunawan juc irmänunchitapis caýchämü. Payga shacya-shacyalla imatapis ruran. Jamcunatapis alli ricashunqui. ²³ Tituga yanagämajnimi. Jamcuna-raycur arupti, sumaj yanapäman. Tituwan ishcay yanagämujtapis waquin irmänunchicuna caýchämun. Paycuna Tayta Diosninchipa shungun munashannuylla cawar, Washäcu Jesústa alliman churan. ²⁴ Chaymi cay quinranchu juturaj irmänunchicuna ricacunapaj quimsanta llaquipar, alli ricanquiman. Irmänunchicuna chayraj cusicunga: «Pablo willamashanchinuylla Corinto marcachu irmänucunata rasunpa Tayta Diosninchita manchapacur cawan» nir.

9

Cuyachicuynincunata shuntashanpita yarpächishan

¹ Jerusalén marcachu irmänunchicunapaj cuyachicuyniquita churanayquipaj allápa mana rimacümanchu. Chayta musyanqui. ² Alli shungu cashayquitapis musyä. Chaymi Macedonia quinran irmänucunata jurgapashcä: «Janyan watapita-pacha Acaya quinran Corinto irmänucunata shacya-shacyalla cuyachicuynincunata camaricuycan» nir. Jamcunata jurgapapti, paycunapis yanapamayta munarcaycan. ³ Cananga alli shungu cashayquita ricanapaj quimsaj irmänunchicunata caýchämü. Manchä: «Pablo llullacun» niramanquiman. Chaymi camaricushalla shuyanqui. ⁴ Macedonia quinranpita yanagämajcunawan chayamupti cuyachicuyniquita mana churaptiqui, pingaychu llucshishunpaj. Mana quiquillächu pingaychu llucshishaj. Manchäga quiquipunapis pingay-tucush llucshinquipaj.

* ^{8:15} Éxodo 16.18.

⁵ «Pishipacujcunapaj cuyachicuñicunata ́churashaj» nir aunikaptiqui, yanagämaj irmänucunata cáchaycämü. Imatapis llutäpacuptiqui, paycuna yanapäshunquipaj. Chaymi cuyachicuñiquicunata ́churar, achca-achcata ́churanqui; ama ichic-ichicllataga. Achca-achcata ́churaptiqui: «Alli shungu» nishunquipaj. Ichic-ichicllata ́churaptiquim ichanga: «Mícha» nishunquipaj.

⁶ Mä, sumaj yarpačhacushun.

«Ichicllata murur, ichicllata pallanchi.

Achcata mururmi ichanga, achcata pallanchi.»

⁷ Cuyachicuñinchita ́churayta munar, shungunchi munashannylla ́churashawan. Llaquish caycar, ama ́churashuwanchu. Pipis piñapaya: «Mä, ́churay» nimaptinchi, ama ́churashuwanchu. Tayta Diosninchita shacya-shacyalla ́churajcunallata alli rican.

⁸ Payga tarichicujmi. Sumaj yanapämäshunpaj imanchicunapis mana pishämänanchipaj. Aypäpacushunpaj pitapis tarichinanchipaj.

⁹ Tayta Diosninchipa shiminchú nin:

«Pishipacujcunata puchuy-puchuyta tarichin.

Puchuy-puchuypa tarichishanpita imay-imaypis mana jungangapächu.»*

¹⁰ Tayta Diosninchita llapanchüpis yanapämanchi. Murutapis, micuytapis tarichimanchi. Pishipacujcunata puchuy-puchuyta tarichinanchipäpis sumaj yanapämäshunpaj. ¹¹ Puchuy-puchuyta tarichimaptinchi, puchuy-puchuyta ́churashun. Cuyachicuñiquita ́chayachipti, irmänunchicuna jatunpa cushicunga.

Tayta Diosninchitapis sumaj alliman ́churanga. ¹² Cuyachicuñiquita ́chayachipti, irmänucuna pishipacushanta tarichinquipaj. Chaura cushicushpan llapan shungunwan Tayta Diosninchitapis alliman ́churanga: ¹³ «Ima allish Tayta Diosninchita mana jungamanchichu. Corinto irmänucunapis llapan shungunwan Washäcuj Jesúspa shiminta ́chasquicusha. Chaymi puchuy-puchuytapis apaycächillämun. Waquincunapäpis tariycächin» nir. ¹⁴ Chaymi jamcunapaj llapan shungunwan mañacunga: «Taytallau Tayta, ima allish Acaya quinranchú irmänucunata llaquipar sumaj yanapashcanqui» nir. ¹⁵ Ima allish llaquipäcuj Tayta Diosninchita yanapaycämanchi. Tantiyayta mana atiparsi, sumaj-sumaj cushicunchi.

10

Jesúspa cáchan cashanta Pablo chapacushan

¹⁻² Irmänucuna, sumaj tantiyacunquiman. Washäcuj Jesús llaquipämashanchi-jina nuwapis alli shimilläpa piñacushayqui. Waquin runam ichanga tincupämar nin: «Pablo quiquillanpaj imatapis ashir purin.» Jananmanpis nin: «Ricay ñawinchičhu rimaytapis mana camäpacunchu; carullapita ulguj-tucun.» Nuwaga piwanpis ́churacayta mana ashiycächu. Watucuj shamur, alli shimilläpa piñacushayqui. Tincupämajcunatam ichanga sumaj piñacushaj. ³ Wañucuj runa carsi, Jesússlápita willapäcur puriycä. Runacuna alli-tucur tincupämaptinsi, mana chapacushächu. ⁴ Runacuna shungun munashal-lanta ashir, pitapis ashipan. Nuwam ichanga Tayta Diosninchita tantiyächimashannylla willapäcuycä. Payga munayniyuj cashpan alli-tucujcunata ičhipun. Yarpay-sapa-tucuptinpis, pampaman ́chayachin. ⁵ Alli-tucujcunaga runacuna Tayta Diosninchita wiycunanta mana munanchu. Chaypis shiminta ́chasquicur wiycunanpaj tucuy-jinanpa Washäcuj Jesúspita willapäcushaj. ⁶ Chaymi llapaniqui sumaj wiycärinquiman. ́Chayamur, mana wiycujcunata piñacushaj.

⁷ Mä, tantiyacushun. Pipis: «Llapan shungüwan Washäcuj Jesúzman yupachicü» nir nuwacunatapis alli ñawinwan ricamanman Washäcuj Jesúspa maquinchú cawarcay-capti. ⁸ «Pablo nishan-nishan purichimanchi» niptiquisi, mana pingacüchu. Tayta

* **9:9** Salmo 112.9.

Jesústa wiycunayquipaj maqui^íchu purichij; mana pingayman churanapächu. ⁹ Chaymi cartäta liguir, ama mancharinqui^{ch}u. ¹⁰ Waquinniqui rimarcaycanqui: «Cartallan^{ch}u Pablo sumaj ullguj-tucun. Ricay ñawinchi^{ch}üga wañunächi. Rimaytapis pantapacun.» ¹¹ Chaynuy niptiquisi, sumaj wiyamanquiman. Watucuj shamur, cartä^{ch}u isquir-bimushänuylla sumaj piñapäshaj.

¹² Alli-tucujcuna pampaman churamaptinsi, mana imananchu. Jucta pampaman churar, imata rimashantapis mana musyanchu. Upa cashpan quiquin-pura alli-tucun.

¹³ Nuwacunaga tantiyaycullar, imatapis rimashaj. Tayta Diosninchi camacächisha marcayquimanpis chayamunäpaj. Paymi camacächisha may-chaychüpis willapäcunäpaj.

¹⁴ Musyashayquinuypis ñaupata alli willapata willapäcuj shamushcä. Ichanga mana alli-tucushcächu. Mana willapaptij, Washäcuj Jesúspa shiminta mana wiyanquimanchu caran. ¹⁵ Nuwacuna mana jucpa arushallanwanchu alli-tucü. Manchäga Tayta Diosninchi camacächishannylla shiminta willapaycaj payman sumaj yupachicunayquipaj. Shimin shunguyquiman sumaj chayaptin, aruynipis achcajman chayanman. ¹⁶ Juclä marcacunachüpis Jesúspita willapäcunämi. Juc willacuj aywash captin, ama aywämanchu. Pipis mana jamurpämänanpaj juc willacushanman mana jaticällar purishaj. ¹⁷ Tayta Diosninchipa shiminchüpis nin: «Pipis alli ricash cayta munar, Tayta Diosnillanchita alliman churanman.» ¹⁸ Runata mana alli-tucushanpitachu alli ricanchi. Manchäga quiquin Tayta Diosninchi alli ñawinwan ricaptinraj, nuwanchipis alli ñawinchiwan ricanchi.

11

Pantachicujcunapita Pablo rimashan

¹ Irmänucuna, wichaypa-uraypa rimacuptipis, tantiyaycallämay, ari. ² Runa chayraj ashishan warmita llaquipashan-jina jamcunatapis sumaj llaquipaj. Alli cawanayquita munar, sumaj ricaycaj. Chaymi warmi majanpa maquin^íchu cawashan-jina jamcunapis Tayta Diosninchipa maquin^íchu cawanquiman. Washäcuj Jesúslaman yupachicunquiman. ³ Evata-jina supay maquichacushunayquitam ichanga manchacü. Supay maquichacushuptiqui, Washäcuj Jesúzman llapan shunguyquian mana yupachicunquipächu.

⁴ Jamcunata mayna Jesúspita willapashcaj. Shimintapis chasquicushcanqui. Espíritu Santupis maquin^íchu puriyächishunqui. Chaypis ricashayqui runata wiycaycanqui: «Caymi rasunpa Jesúspita willacuycan» nir. Chay pantachicujcuna purin: «Cay-niraj, wac-niraj ruraptiquiraj, Tayta Diosninchi yanapäshunqui. Ricay ñawin^íchu alli cawanayquipaj caynuy-caynuy ruranquiman» nir. Llutanta yaáchachishuptiquipis, cushishalla chasquicuycanqui.

⁵ Nuwata Tayta Diosninchi caáchacamasha shiminta willapäcunäpaj. Alli-tucuj caáchacunam ichanga: «Tayta Diosninchipa caáhan cä» nirpis llullacur pantachicun.

⁶ Nuwaga rimayta sumaj mana yaácharpis, llapanta tantiyä. Llapan tantiyashäta, alli cawashäta jamcunapis musyanqui.

⁷ Chaymi Jesúspa shiminta willapashcaj Tayta Diosninchi alli ñawinwan ricashunayquipaj. Chaymi arushallawan cawashcä. Mana imatapis mañacushcrajchu. ¿Cananga chayllapitachuraj jamurpaycamanqui? ⁸ Ima allish Jesúspa shiminta willapäcunäpaj juclä marca^{ch}u juturaj irmänunchicuna yanapämasha. ⁹ Marcayqui^{ch}u juyarpis pishipacushcä. Chaypis mana mañacushcrajchu. Macedonia marca irmänunchicuna yanapallämasha pishipacushäcuñata rantinäpaj. Jamcunata imatapis mana mañacushayquipächu. ¹⁰ Imaman chayaptipis, Washäcuj Jesús shungüta musyan. Mana jillay-raycullarchu shiminta willacuyca. Chaymi Acaya quinran^{ch}u pipis shimita mana chapangapächu. ¹¹ Imata rimarpis, llapan shungüwan jamcunata llaquipaj. Tayta Diosninchipis shungüta musyan. ¹² Irmänucuna manchapacärinanta munar, pantachicujcuna achca-achcata mañacun. Chaynuy llallimayta munamaptinsi, mana

jillay-raycullarchu Tayta Diosninchipa shiminta willapäcushaj. Mana yamacällar imaypis willapäcushaj. ¹³ Paycunam ichanga Washäcu Jesúspa caćhan-tucun. Willapäcur pantachicun. Quiquillanpita caćhaman tincuchicun. ¹⁴⁻¹⁵ Supaypis pantachicunapaj: «Achquita apamuj anjil caycä» nir Tayta Diosninchipa caćhan-tucun. Supaypa maquinčhu cawajcunapis alli-tucun. Ichanga juchata aparicushanman-tupu ñacaymanpis ćhayanga.

Washäcu Jesúspita ñacayman Pablo ćhayashan

¹⁶ Sumaj tantiyacärinquiman. Mana shimińan ćhayashantachu rimaycä. Upa-jina rimaptisi, sumaj wiycäramanquiman. Alli ñawiquipa ricamanquiman. ¹⁷ Alli-tucur rimanätačhi ichanga Tayta Jesúspita auningachu. ¹⁸ Waquin runa alli-tucuptin, nuwapis alli-tucunä camacan.

¹⁹ Jamcuna yarpay-sapa canqui, ¿au? Chaypis pantachicucuna shiminman ćhayashanta rimaptin, cushi-cushilla wiyaparanqui. ²⁰ Paycuna maquichacushuptiquisi, jillayniquta jićhushtiquisi, llullapäshuptiquisi, pampaman ćhurashuptiquisi, ashllir ushyashuptiquisi, mana rimacunquichu. ²¹ Nuwacunam ichanga rimarcuyllatapis mana camäpacushcächu chay-niraj canäpaj. Chaymi waquin alli-tucuptin, nuwapis alli-tucüman. ²² Alli-tucujcuna Israel runa cashanman, Moiséspita shimita ćharcushanman, Abrahampa wilcan cashanman yupachicun. Nuwapa papänipis Israel runam. Yaćhachimashanchicunatapis llapanta ćharcü. Abrahampis auquillumi. ²³ Upa-yupay shimita mana jugarimancha. Ichanga: «Washäcu Jesúspita shimita willapäcushcä» niptinsi, nuwarämi chay-tucuychupurir willapäcushcä. Willapäcur purishäpita carsilčhu achca cuti wićgarächimasha. Wascar ushyamasha. Achca cuti wañuchimaytapis munamasha. ²⁴ Israelcuna yawar-masi caycarsi, pichga cutipa quimsa ćhunca isgunwan (39) maqui wascamasha. ²⁵ Quimsa cutipa Roma marcapa murucuncunapis wirumasha. Juc cutičhu chiqui runa sajmamasha. Quimsa cuti bütiwanpis ticrashcä. Ichicllapita yacučhu mana wañushcächu. Llucshiyta mana camäpacur, lamar yacučhu pagas-junaj wampushcä. ²⁶ Chay-tucuypa purishcä. Chimpaycapti, mayupis apamayta munamasha. Asaltanticunapis ichicllapita mana charimashachu. Yawar-masicunapis, jäpa runacunapis sumaj wañuchimayta munasha. Ćhacracunaćhpis, marcacunaćhpis juju runacuna wañuchimayta yarpasha. Lamar yacučhu puriptipis, janäčhu wañuy caycasha. Janan shungulla yupachicuj irmänu-tucujcunapis wañuchimayta munasha. ²⁷ Sumaj arushcäpis. Ñacashcäpis. Puñuytapis mana tarishcächu. Paćhäpaj mana captin, yargaypita, yacunaypita sumaj ñacashcä. Janäpaj mana aypäpacur, jasaypita juyupa ñacashcä.

²⁸ Chay-tucuychupurir jutucaj irmänunchicunapäpis waran-waran yarpaćhacur llaquicü.

²⁹ Jishya charishuptiqui, shungüpís nananraj. Juchaman tunichishuptiqui, ullgü.

³⁰ Chaymi alli-tucur, alli-tucüman wañunächi-jina cashäpita. ³¹ Mana llullacushäta Tayta Diosninchipis musyaycan. Payga Tayta Jesúspita Taytan. Chaymi payllata imaypis alliman ćhurashun. ³² Damasco marcačhu Aretaspä mandajnинши niran: «Pabluta marcapita llucshiycajllata rísu charicurcunqui.» ³³ Chaypis waquin irmänunchicuna marca wajtallanpa jishpichimaran. Canistawan warcuyllapa mandajpa maquinpita jishpichimaran.

12

Tayta Jesúspita ricaripushanpita Pablo willacushan

¹ Alli-tucur, imatapis mana jurgushächu. Chaypis Tayta Jesúspita ricapacachimashanta willacunä camacan. Payga tucuya tantiyachimasha. ² Janaj pachaman apamashan ćhunca ćhuscuwan (14) watana. Ichanga rasunpa aywashätapis, almallä aywashantapis mana musyächu. Tayta Diosnillanchim musyaraycan. ³⁻⁴ Imanuy carpis, rasunpa paypa

ñiaupanman apamasha. Chaychu pipis mana wiyashancunata willamasha. Willacunämi ichanga mana camacanchu.

⁵ Tayta Diosninchiwan tincush carpis, mana alli-tucümanchu. Ima captinpis Tayta Diosninchi yanapämaptillan, cawä; mana quiquilläpitachu. ⁶ Alli-tucur, allita ruräman. Ichanga ama rimacümanchu: «Pablupa shimillan. Shungun yarpashallanta ruran. ⁷ Tayta Diosninchitapis jucchush ricanman» nimänanpita. Alli-tucunäpita ñacay charimänanta Tayta Diosninchi camacächisha. Juyupa ñacachimasha. Cashawan tucsiycämaj-jina shapshicu-masinwan Supay ñacaycächiman. ⁸ Chaymi quimsa cutipa Tayta Jesústa mañacushcä: «Ama ñacachimaychu, ari» nir. ⁹ Paymi ichanga nimasha: «Ñacaptiquisi, llaquipashpä mana jungajchu. Imata mana camäpacuptiquipis, munayniyu cashpä sumaj yanapaycaj.» Chaymi mana alli-tucüchu. Manchäga yanapämänampaj Washäcu Jesúspa maquillančhu cawä. ¹⁰ Washäcu Jesúzman yupachicushä-janan ñacarpis, ashllir ushyamaptinpis, pishipacurpis, jaticačhar ushyamaptinpis, cushish cawaycä. Wañunächi-jina cashäpita llapan runa pampaman čhuramashanman-tupu Tayta Diosninchi yanapaycäman.

¹¹ Irmänucuna, quiquiricuna ashipämashcanqui shimi čhayashanta rimanäpäpis. Jamcuna alličhu jurgamaptquiraj, alli-tucuman. Alli-tucuj cačhacuna nuwata mana imačüpis aypämanchu. ¹² Rasunpa cačhan caycashäta tantiyacunayquipaj quiquin Tayta Diosninchi sumaj yanapämasha. Cačhacamar, yanapämasha ñacaytapis ičhipunäpaj, quiquin camacächiyinpa tucuya ruranäpaj. Pay sumaj munayniyu cashanta ricaycarsi, tantiyayta mana atipashcanquichu. ¹³ May marcačhu purir willapäcunäpäpis yanapallämasha. Jamcunatam ichanga imatapis mana mañacushcrajchu. ¿Mana mañacushalläpitachuraj chiquircaycämanqui? ¿Nuwachuraj juchallicushcä? Rasunpa apari-cush caycapti, juchäta ama yarparanquimanchu.

Corinto irmänucunata Pablo watucuya yarpashan

¹⁴ Cananwan quimsa cutipana watucushayqui. Ichanga mana jillaryiquiraycullarchu shamushaj; manchäga jamcunata llaquipar. Chaymi imatapis mana mañacushayquichu. Sumaj tantiyacushun. Papänin wamrancunata mana mañacunchu. Manchä yanapan. ¹⁵ Chaymi jamcunata willapänä-raycur imätapis ushyashaj. Ushyapacaptisi, mana llaquicüchu. ¿Llapan shungüwan llaquipaycaptijchu, wasguiparcaycämanqui?

¹⁶ Jamcunapa umayquita mana nanächishcächu. Imatapis mana mañacushcächu. Chaypis waquinniqui tumparcaycämanqui: «Pablo ardiyllapa jillaryta mañacusha» nir. ¹⁷ Nuwaga mana pitapis cačhacamushcächu: «Jillaryta apachimuy» nir. ¹⁸ Tituta cačhamurpis, ishcajwan yanagächimushcä. Paycunata cačhacamushcä alli cawashayquita musyananpaj. Ichanga mana mañacushcashunquichu: «Jillaryta jumay» nir. Nuwacunapis imatasi mana mañacushcrajchu. Manchä alli cawashayquita musyanäpaj čhayamushcä.

¹⁹ Nuwacuna mana alli llucshiyta munarchu imatapis rimä. Tayta Diosninchi shungüta musyan. Payman yupachicur, Washäcu Jesúspa maquinčhu cawaycä. Wawallau, llapan shunguyquian Tayta Diosninchiman yupachicunayqui-raycur llapantapis ruraycä. ²⁰ Watucuj shamuya manchacü: «¿Shungü tincungachuraj?» nir. Čhayamur, ¿imanümanraj chiquinacuycajcunata, imatapis munapajcunata, jagayash caycajcunata, warmish ullgush caycajcunata, ticshaparänacuycajcunata, washata rimaycajcunata, tumpacuycajcunata, alli-tucuycajcunata, shungun munashallanta ruraycajcunata tarishpä? Jatunpa llaquicushaj. ²¹ Juchayquita Tayta Diosninchi jurgämaptin, chapanuya mana camäpacushächu. Waquinniqui pingayman čhurarcaycämanqui. Juchapita mana wanacunquichu. Waquinniqui marca-pingayshi cawarcaycanqui. Waquinniquinash allgu-jina jucwan-jucwan cacurcaycanqui. Waquinniquinash shunguyqui

munashallanta rurarcaycanqui. Chaypita sumaj llaquicü. Shungüpis mana shungü-nirajnachu.

13

Irmänucunata yapay piñacushan

¹ Cananwan quimsa cutipana watucushayqui. Pitapis: «Juchayuj» ninanchipaj Tayta Diosninchipa shimintaraj wiyashuwan. Paypa shimin nin: «Juchayuj» ninayquipaj ishcay-quimsa tistiguraj canman. ² Mayna willaparaj. Yapay watucur: «Juchačhu arujcunata piñacushaj» nir. Canan watucur, rasunpa juchačhu arujcunata piñacushaj. Waquin-tapis juchačhu aruptin, piñacushaj. Mana upällacushänachu. ³ Quiquipicunash ashiparcaycämanqui: «Pablo, ¿rasunpachuraj Jesúsca cačhacuynin?» nir. Juchata aparicuptiqui, Washäcu Jesús mana upällacunchu. Ñacachishunayquipäpis munayniyujmi. ⁴ Runacuna rusčhu wañuchiption, Jesús mana rimacushanta musyanchi. Ichanga wañushanpita Tayta Diosninchipi cawarachimusha. Chaymi: «Pablupa shimillan» nimaptiquisi, munayniyuj Tayta Diosninchipa maquinčhu cawaycä. Chaymi jamcunata piñacunajpaj cačhamasha.

⁵ Tayta Diosninchipa shungun munashannylla cawashayquita musyanayquipaj mä, quiquipicunapa shunguyquita tapuy. Washäcu Jesúsca maquinčhu cawashayquitapis, mana cawashayquitapis shunguyqui willashunqui. Mana willashuptiquim ichanga, janan shungullačhi yupachicurcaycanqui. ⁶ Nuwacuna llapan shungüwan Tayta Diosninchiman yupachicushäta llapaniqui musyanquiman. ⁷ Runacuna pampaman čhuramaptinpis, mana imananchu. Manchäga Tayta Diosninchita mañacü manchapacur cawanayquipaj. Alličhu, mana alličhu jurgamaptquipis, mana imananchu. Alli cawashayquita ricarmi ichanga, Tayta Diosninchipa maquinčhu cawashayquita llapan runa musyanga. ⁸ Nuwacuna ima chapatapis mana rurämanchu. Manchäga Tayta Diosninchipa shimillanta wiyacunä. Yanapämäptin, shungun munashallanta rurashaj. ⁹ Chaymi Tayta Diosninchipa maquinčhu cawaptiqui runacuna tumpamaptinpis, mana imasi jucüchu. Manchäga Tayta Diosninchita mañacü: «Corinto runacuna manchapacur cawanapaj yanapaycullay, ari» nir.

¹⁰ Imata rimanätapis musyanayquipaj cartacamuj. Manchapacur cawaptiqui, alläpa mana piñacushayquichu. Piñacurpis, mana pampaman čhurarchu piñacuj. Manchäga Tayta Jesúsca ricay ñawinčhu alli cawanayquipaj munä.

Cartapa ushyanan

¹¹ Irmänucuna, chayllata cartacallämuj. Cananga Tayta Diosninchita manchapacur caway, ari. Juchata ama aparicuychu. Shacyächinacäriy. Juc shungulla allilla caway. Llaquipäcu Tayta Diosninchipi yanapayculläshunqui. Allilla cawaycachilläshunqui. ¹² Quiquipicunapis sumaj wamayänacäriy. ¹³ Cayčhu juturaj irmänucunapis llapanmi wamayämushunqui. ¹⁴ Llaquipäcu Tayta Jesucristupis yanapayculläshunqui. Tayta Diosninchipis llaquipayculläshunqui. Espíritu Santupis juc shungulla maquinčhu puriy-cachilläshunqui. Chayllana.

Galacia marcačhu irmänučunaman San Pablo cartacushan

Tantiyacunanchipaj:

Pablo cay cartata isquirbiran Galacia quinrančhu jutucaj irmänucunaman. Chay quinrančhu marcacunata maquinčhu Roma marcapa mandajnin purichiran. Čhuscu marcajutun caran: Iconio, Listra, Derbe, Antioquía. Chay marcacunačhu Pablo willapäcuptin, achcaj runa Jesúspa shiminta čhasquicuran.

Chay quinranpita Pablo aywacuptin, pantachicuj Israel runacuna yaycapuran. Paycuna willapäcuran: «Alli ñawinwan Tayta Diosninchí ricamänanchipaj Moiséspa shimillanta sumaj čharcunanchi» nir. Chaypis Pablo mayna tantiyachish caran: «Llaquipämashpanchi Tayta Diosninchí Washäcuј Jesústa cačhamuran. Payman yupachicuptinchi, alli ñawinwan Tayta Diosninchí ricamanchi. Imaycamanpis maquinčhu cawachimäshun» nir. Chaymi Galacia quinrančhu irmänucuna mana pantananpita cartacuran.

Pablo isquirbiran:

Pantachicujcunapa shiminta mana čhasquipänanpita: *Gálatas 1.1-10.*

Jesús ricariparcur tantiyachicushanpita: *Gálatas 1.11-2.21.*

Moiséspa shiminpita, Jesúsman yupachicur Tayta Diosninchipa maquinčhu cawananpita: *Gálatas 3.1-4.31.*

Jirucupita, llaquipänacupita: *Gálatas 5.1-6.18.*

Pablo wamayashan

¹⁻² Galacia quinran marcacunačhu jutucaj irmänucuna, nuwa Pablo, Tayta Diosninchipa cačhan cashpä waquin irmänunchicunawan-ima cartacallämü. Nuwata Washäcuј Jesúswan quiquin Tayta Diosninchí čhuramasha shiminta willapäcur purinäpaj. Tayta Diosninchí Jesústa cawarachijmi. Paycuna acracamasha; mana runa-masinchichu. ³ Tayta Diosninchipis, Tayta Jesucristupis llaquipayculläshunqui. Maquinčhu allilla puriycachilläshunqui, ari.

⁴ Cay pachačhu jucha mana pishinchu. Chaypis Tayta Diosninchí camacächiptin, Washäcuј Jesúswa tarisha juchata aparicushanchipita jishpichimänanchipaj.

⁵ Tayta Diosninchí munayniyujmi. Payllata llapan runa imaycamanpis alliman čhuranman. Chaynuy caycullächun.

Jesúspa shiminta ticrapushanpita Pablo llaquicushan

⁶ Irmänucuna, Tayta Diosninchí llaquipämashpanchi maquinčhu cawananchi-raycur Washäcuј Jesústa cačhamusha. Chaymi: «Galacia marca irmänucuna Jesúspa shiminta čhasquicursi, Tayta Diosninchita wasguipaycan» nimaptin, tantiyacuya mana atipächu. ¿Piraj shimiyašhcashunqui jucpa shiminta čhasquicunayquipaj? ⁷ Jesúlla Washäcuј. Juc mana canchu. Chaypis pantachicujcuna llutanta willapashcashunqui Jesústa ticrapunayquipaj, shimintapis wasguinayquipaj. ⁸ Pipis Washäcuј Jesústa pampaman čharur: «Moiséspa shimintaraj čharcushun» nir yačhachicurga, ñacayman čhayachun. Llutanta rimaptin, willacuj-masicunatasi, anjilcunatasi chacaj pachaman Tayta Diosninchí jitarpunga. ⁹ Mayna piñacushcraj. Chaymi sumaj wiyacäriy. Pipis jucpa shiminta willapar Washäcuј Jesúspa shiminta ticrapur, ñacayman čhayangapaj.

¹⁰ Mä, tapushayqui. ¿Piwantaj alli ricanacuya munanqui: Tayta Diosninchiwanchu, runa-masiquiwanchu? Runacuna alli ricamänanta mana ashichu. Manchäga Tayta Diosninchí alli ricamänanta munä. Chaymi maquinčhu cawar, Washäcuј Jesúspa shimintapis wiyacü.

Tayta Diosninchicuñanpita Pablo tantiyachicushan

¹¹ Irmänucuna, mana runa yarpashallantachu willacur puriyä; manchäga Jesúspa alli willapanta. ¹² Mana runachu Washäcuj Jesúspa shiminta willamasha. Manchäga quiquin Jesúswan tincushcä. Ricaripamasha. ¹³ Ñaupata Israel-masicuna cawashan-nuylla cawarä. Jutucaj irmänucunatapis jaticačhar ushyarä. Llapanta illarachiyta munarä. ¹⁴ Israel runacuna yarpashanta wiñay-masicuna janan shungulla čharcuptinsi, llapan shungüwan čharcurä. Auquillúcuna yačhachimashantapis mana juctapis jungarächu. ¹⁵⁻¹⁶ Ima-niraj captisi, llaquipäcu cashpan mana yuriptillä, Tayta Diosninchicuñanpita acracamasha Wawan Jesústa ricsicunäpaj, jäpa runacunatapis willapänäpaj. Jesústa ricsichimaptin, pí runatapis mana ashishcächu Tayta Diosninchipa shiminta tantiyachimänänpaj. ¹⁷ Jerusalén marcačhu punta-caj cačhancuna juturaptinsi, mana tapucuj aywashcächu. Manchäga Arabia quinranman aywashcä. Chaypita Damasco marcaman cuticushcä.

¹⁸ Chaypita quimsa watataraj Jerusalén marcaman Pedruwan tincuj aywashcä. Tincur, ishcay simänalla juyapärirä. ¹⁹ Jerusalén marcačhu mana llapan cačhacunawanchu tincushcä; manchäga Jesúspa wauguin Santiagullawan. ²⁰ Irmänucuna, cartacur rasul-lanta willapaycaj. Tayta Diosninchipis musyan. ²¹ Jerusalén marcapita Siria quinran-manpis, Cilicia quinranmanpis aywashcä. ²² Judea quinrančhu jutucaj irmänucunam ichanga mana ricsimashachu. Paycunawan mana tincushcäpishchu. ²³ Chaypits nuwapaj rimaran: «Unayga chay runa jaticačhar ushyamashcanchi. Cananmi ichanga Jesúspa shiminta willapäcur puriycan» nir. ²⁴ Juyu cashäpita Tayta Diosninchipa alli cayman tictachimaptin, paycuna Tayta Diosninchita sumaj alliman čhurarcaycan.

2

Pabluta cačha-masincuna alli ricashan

¹ Chaypita čhunca čhuscuwan (14) watataraj Jerusalén marcaman Bernabíwan Tituwan cutirä. ² Tayta Diosninchicuñanpita ricaripamar: «Ayway» nimaptin, Jerusalén marcaman aywarä. Israel-masi iirmänucunata willarä: «Jäpa runacunata Jesúspa alli willapanta willapashcä» nir. Mayur irmänucunatapis yata jayaycur, allipaj willacur purishäta willaparä. Čhasquicamänanta munarä. ³ Chay junaj griego runa car jürucüni captinsi, Tituta mana jürucachiranchu. Payga Jerusalén marcaman aywähimaran. ⁴ Waquin runacunam ichanga iirmänu-tucullar pantachicuycaran. Chaymi mayur iirmänucunawan sumaj parlanacurä. Chay pantachicujcuna Washäcuj Jesúspa maquinčhu cawaptinchisi, Moiséspa shimintaraj čharcunanchita munan. ⁵ Ichanga pantachimänanchipita shiminta ama čhasquipäshuwanchu. Manchäga Jesúspa alli willapällanta čhasquicushuwan. ⁶ Parlanacuptipis waquin mayur iirmänucuna sumaj yačharpis, yarpashäpita mana imat-apis rimacushachu. Sumaj tantiyacushuwan. Shungunchipitam Tayta Diosninchicuñanpita willapänänpaj; Pedrutana Israel runacunata willapänänpaj. ⁷ Mayur iirmänucuna quiquinca niran: «Tayta Diosninchicuñanpita Pabluta čhurasha jäpa runacunata Jesúspita willapänänpaj; Pedrutana Israel runacunata willapänänpaj.» ⁸ Chaura Israelcunata willapänänpaj Pedruta cačhacushan-jina nuwatapis Tayta Diosninchicuñanpita willapänänpaj. ⁹ Chaymi Santiagupis, Pedrupis, Juanpis nimaran: «Juc shungulla cawashun. Jamcunapis Tayta Diosninchicuñanpita cačhan carcay-canqui. Bernabíwan ishcaniqui jäpa runacunata willapämunqui, ari; nuwacunana Israel-masinchicunata.» Paycuna quimsanin mayur cačhacuna caran. Maquinčhu jutucaj iirmänucunata purichiran. ¹⁰ Rimayta ushyaycur, nimaran: «Jerusalén marcačhu iirmänunchicuna pishipacuyčhu juyarcaycan. Paycunata ama junganquichu, ari.» Mañacamashanta llapanta cushi-cushilla čharcushcä.

Pedruwan Pablo tincupänacushan

¹¹ Chaypita unayllata Antioquía marcaman Pedro chayamuptin, piñacurä. Mana allitachu ruraycaran. Ishcay căra runa caran. ¹² Ñaupataga jäpa irmänucunawan micupacärij. Santiago caáchamushan Israel irmänunchicuna chayamuptinmi ichanga, ashucuriran. Juturaytapis mana munaranchu. Israel-masincuna jamurpänanta alläpa manchacuran. Chaymi jäpa runacunawan mana juturarannachu. ¹³ Waquin Israel irmänunchicunapis Pedro-jina quiquin-pura alli ricanacuyta munar, jäpa irmänunchicunapita ashucuriran. Bernabípis Pedro rurashanta ricar, llutanta ruraran. ¹⁴ Chaymi Jesúspa alli willapanta mana charcuptin, llapanpa ricay ñawinčhu Pedruta piñacurä: «Israel runa caycar jäpa irmänucunawan alli ricanacur, micur upur juturpashcanqui. Cananmi ichanga jäpa irmänucunapis Israel runacuna-jina cawananta munaycanqui, ¿au? Llutanta ruraycanqui» nir. ¹⁵ Jäpa runacuna Moiséspa shiminta mana ricsir, mana wiycunchu. Nuwanchim ichanga Israel runacuna cashpanchi yurinchipita-pacha wiycushcanchi. ¹⁶ Chaypis mana Moiséspa shiminta charcushanchipitachu alli ñawinpa Tayta Diosninchicamanchi; manchäga Washäcu Jesúspa shiminta chasquicushanchipita. Mana Moiséspa shiminta wiycushanchipitachu alli ñawinpa ricamanchi; manchäga Washäcu Jesúspa shiminta chasquicur maquillančhu cawashanchipita. Moiséspa shiminta charcuya munajcuna Tayta Diosninchipa shungunman mana tincunchu. ¹⁷⁻¹⁸ Washäcu Jesúspa shiminta chasquicushanchipita Tayta Diosninchicamanchi alli ricamaptinchisi, waquin Israel-masinchicuna jamurpämanchi: «Washäcu Jesúspa llupillanpa jatir, juchata aparicuy-canqui» nir. Jamurpämashpanchisi llutanta yarpaycan. Juchaman mana Jesúschu jančhamanchi. Moiséspa shimillanta wiycuya munaptinchim ichanga, jucha-sapa cashanchita llapan musyanga. ¹⁹ Moiséspa shimin allitaga allim. Chaypis charcuya mana camäpacur, Tayta Diosninchipa ricay ñawinčhu jucha-sapa caycä. Chaymi Moiséspa shimillanman mana yupachicüchu. Manchäga Washäcu Jesúspa shimintana wiycuya. Maquinčhu cawar, shungun munashanta rurä. ²⁰ Cananga mana shungü munashantachu ruraycä. Mana quiquilläpitachu cawaycä. Manchäga Washäcu Jesúsman yupachicuptü, cawachiman. Llaquipämashpanchi washämänanchi-raycur Tayta Diosninchipa Wawan wañuytapis tarisha. ²¹ Chaymi Tayta Diosninchipa llaquipämashanta pampaman mana churämanchu. Jamurpämajcuna nin: «Moiséspa shiminta charcuptinchiraj, Tayta Diosninchipa alli ricamanchi.» Chaynuy nir nuwanchi-raycur Washäcu Jesús wañushantapis manacajman churarcaycan.

3

Jesúsman yupachicuptinchi, jishpichimäshun

¹ Galacia irmänucuna, upam canqui. ¿Piraj chapata rurashcashunqui Washäcu Jesússta wasguipänayquipaj? Nuwanchi-raycur Jesússta rusčhu wañuchishanta sumaj willaparaj. ² Canan mä, willamay. ¿Espíritu Santupa maquinčhu cawanayquipaj Moiséspa shimintachuraj charcushcanqui? Mana. Manchäga Jesúspa shiminta chasquicushallayquipita maquinčhu Tayta Diosninchipa cawachishunqui. ³ Upam canqui. Shiminta chasquicushallanchipita Tayta Diosninchipa alli ricaycämaptinchi, Moiséspa shiminman ama yupachicushuwanchu. ⁴ ¿Tayta Diosninchipa yanapaycäshushayquita tantiyaycarchu, jipaman cuticunqui? Chayta ama ruranquimanchu. ⁵ Payga Espíritu Santupa maquinčhu puriyächishunqui. Munayniyuj cashanta musyachicur, tucuyjinanpa yanapaycäshunqui. Mana Moiséspa shiminta wiycushayquipitachu maquinčhu purichishunqui; manchäga Jesúspa shiminta chasquicushayquipita.

⁶ Unaya Tayta Diosninchipa Abrahamta alli ñawinpa ricaran shiminta chasquicushallanpita.* ⁷ Chaymi sumaj tantiyacunquiman. Tayta Diosninchipa shiminta wiycujcunaga Abrahampa willcan-yupaymi. ⁸ Tayta Diosninchipa shiminčhu nin:

* **3:6** Génesis 15.6.

«Jäpa runacunapis shiminta čhasquicunanta musyar, Tayta Diosninchi Abrahamta niran: «Alli willapata willapäshayqui. Jam-raycur pí-maytapis alli ñawíwan ricashaj. Sumaj yanapäshaj.» * 9 Chaymi sumaj tantiyacunquiman. Pipis Jesúspa shiminta čhasquicuptin, Abrahamta alli ricashan-jina Tayta Diosninchi alli rican. Sumaj yanapan.

10 Moiséspa shiminta čharcushallawan alli ricash cayta munajcunam ichanga ñacayman čhayanga. Chapata rurashpan Tayta Diosninchipa shiminéhu nin: «Pipis Moiséspa shiminta sumaj-sumaj mana ēharcuptin, juchata aparicushanpita ñacayman čhayachun.» * 11 Chaymi Moiséspa shiminta čharcuya munashallanpita mana pitapis Tayta Diosninchi alli ricangachu. Shiminéhpis nin: «Shimiña čhasquicucunallata alli ricashaj.» * 12 Moisésmi ichanga niran: «Shimiña wiyyacujcuna llap-llapanta čharcunan. Chayrämi alli ñawinpa ricar, maquinchüpis Tayta Diosninchi cawachinga.» * 13 Washäcuj Jesúsmi ichanga Moiséspa shiminta mana wiyyacuj-jina wañuytapis tarisha. Washämänanchi-raycur juchanchitapis jugaricusha. Tayta Diosninchipa shiminéhu nin: «Ruschu wañujcuna jucha aparicushanta tarin.» * 14 Chaypis Washäcuj Jesúspa shiminta čhasquicuptinchi, Abrahamta alli ricashan-jina nuwanchitapis Tayta Diosninchi alli ricamanchi. Jäpa runa captinchisi, Espíritu Santupa maquinéhu puriycächimanchi.

15 Irmänucuna, tincuchiypa tantiyachishayqui. Juc runa tistamintucur, jipaman mana cutiricunnachu. Tistamintutapis mana rucannachu. 16 Canan Tayta Diosninchipa tantiyacushun. Payga Abrahamtapis, Abrahampa willcantapis alli ricananpaj auniran. Isquirbisanéhu mana achcaj willcanpächu ríman; manchäga jucnayllapaj. Abrahamta: «Willcayqui» nirga, Washäcuj Jesúspami rimaycan. 17 Sumaj tantiyacunquiman. Abrahamwan Tayta Diosninchi parlanacushanta čharcushanam. Abrahamwan aunicushanpita čhuscu pačhac quimsa čunca (430) watataraj Israel-masincunata Tayta Diosninchipa shiminta Moisés willaparan. Chaypis Moiséspa shimin Tayta Diosninchi unay parlanacushanta mana pampaman čhuranmanchu. Aunishanta mana rucanmanchu. 18 Tayta Diosninchi Abrahamta llaquipar, alli ricananpaj auniran. Cananpis aunicushanchita čhasquicunchi quiquinpa shiminta čhasquicur; mana Moiséspa shiminta wiyyacurrächu.

Moiséspa shiminpita tantiyachicushan

19 Chaura, ¿imapätaj Moiséspa shimin alli? Shimin alli caran runacuna jucha apari-cushanta tantiyacunanpaj; ichanga Washäcuj Jesúš čhayamunancamalla. Washäcuja cačhamunanpaj Tayta Diosninchi auniran. Moisésmi ichanga mana Washäcuju caran. Anjilnincunallawan Tayta Diosninchi shiminta willaparan. Jinarcurraj Israel-masincunata Moisés willaparan. Payga parlapäcuja caran. 20 Runacuna imatapis aunicunapaj parlapäcujnintaraj ashin. Tayta Diosninchim ichanga pitapis mana ashinchu. Quiquillan imatapis aunicunapaj.

21 Ima captinpis, Moiséspa shiminta mana pampaman čhurashuwanchu. Chaypis sumaj tantiyacushun. Moiséspa shiminwan Tayta Diosninchipa shimin mana apayačhänacunchu. Chaypis Moiséspa shimin alli cawayman čhayachimänanchi captin, maynačhi Tayta Diosninchi alli ricamäshuwan caran. 22 Ichanga shiminéhu nin: «Lapan runa jucha aparičuyllapaj wañun.» Chaymi Washäcuj Jesúspa shiminta čhasquicurradj, Tayta Diosninchi aunishanta čhasquicushunpaj.

23 Washäcuj Jesúš mana shamushancaman Moiséspa shimillanman yupachicushanchi. Shimintapis čharcunanchi caran. 24 Mandu-rurajta-jina purichimashcanchi Washäcuj Jesúš čhayamunancaman. Tayta Diosninchipa ricay ñawinéhu alli cawayman čhayachimänanchi caran. Moiséspa shiminta čharcuytam ichanga mana camäpacunchichu.

* 3:8 Génesis 12.3. * 3:10 Deuteronomio 27.26. * 3:11 Habacuq 2.4. * 3:12 Levítico 18.5. * 3:13 Deuteronomio 21.23.

²⁵ Chaymi shiminmanpis mana yupachicunchichu. Manchäga Washäcu Jesúspa shimintana čhasquicushcanchi. ²⁶ Payman yupachicushanchipita Tayta Diosninchi wamracha-camashcanchi. ²⁷ Washäcu Jesúspa shiminta čhasquircur, ushyacushanchipita-pacha maquillančhu cawanchi. Pay-jinana cawanchi. ²⁸ Shiminta čhasquicuptinchi, Washäcu Jesúspis čhasquicamanchi: «Wawämi canqui» nir. Čhasquicun Israel runacunatapis, jäpa runacunatapis, warmicunatapis, ullgucunatapis, mandu-rurajcunatapis, quiquinca-nallapita cawajcunatapis, uywaycunatapis juc shungulla cawananchipaj. Llapanchi-tana alli ñawinwan ricaycämancchi. ²⁹ Washäcu Jesúspa maquinčhu cawar, Abrahampa willcan-yupay ricacunchi. Tayta Diosninchi aunishantapis llapanta čhasquicushunpaj.

4

¹ Yapaypis tincuchiypa tantiyacushun. Wamra tacsha cashancaman wasiyujpa wamran cashanpis, uyway wamra cashanpis mana musyacanchu. ² Tacsha cashancaman jucmi imatapis jaran. Jucmi rican, ichanga papänin jitapashan junajcallaman. Chayrämi irinsanta ricachin. ³ Nuwanchicunapis pishi-yarpay cashanchicaman munayniuj jircapa maquinčhu cawashcanchi. ⁴ Yarpashan junaj čhayamuptinmi ichanga, Wawan Jesús yurinanta Tayta Diosninchi camacächiran. Warmipita yuriran. Runa cashpan Moiséspa shiminta wiyacunan caran. ⁵ Nuwanchipis Moiséspa shiminta wiyacunanchi caran. Mana camäpacuptinchim ichanga, jishpichimänanchi-raycur Jesúslla wiyacuran. Camacächiran Tayta Diosninchipa wawan cananchipaj. ⁶ Cananga Tayta Diosninchipa wawanna caycanchi. Maquinčhu purichimänanchipaj Espíritu Santuta caáchamuran. Mañacunanchipäpis Espíritu Santu shacyächimanchi. Chaymi llapan shunguchiwan jayaranchi: «Taytallau Tayta, Papänimi canqui» nir. ⁷ Cananga mana uywaynachu canchi; manchäga quiquin Tayta Diosninchipa wawanna. Wawan car, irinsanchitapis llapanta čhasquishunpaj.

⁸ Unayga Tayta Diosninchi pii cashantapis mana musyar, mana manchapacushcan-quichu. Manchäga munayniynaj caycaptinsi, jircacunapa maquinčhu purishcanqui.

⁹ Cananga: «Tayta Diosninchipa shungunta musyä» nir allita yarpanchi. «Quiquin Tayta Diosninchi shungüta musyapan» nirmi ichanga, allitaraj yarpanchi. Payllata manchapacushun; jircacunata ama. Jircacuna manacajllam. Munayninpis mana canchu. Chaynuy caycaptin, ¿jircapa maquinčhu cawayta munarcaycanquichuraj?

¹⁰ Llutantaraj rurarcaycanqui. «Diyawardačhu fiestata rurashun. Chayrämi alli ñawinwan Tayta Diosninchi ricamäshun» nir diyawardacunata sumaj yarparaycanqui. Ricsish junajtapis, llullu quillatapis, watatapis yarparanqui. Maygantapis mana junganquichu.

¹¹ Chaypitam llaquicü: «¿Tayta Diosninchipa shiminta manacajllapächuraj willapash-caj?» nir.

Irmänucunapaj Pablo llaquicushan

¹²⁻¹³ Irmänucuna, sumaj ricacamanquiman. Israel runa caycar Moiséspa shiminta jungaycur, jamcuna-jina juyashcä. Jesúspa alli willapanta willapashcraj. Jishyar, mana maypapis llucshishcächu. Chaypis alli ñawiquipa ricamashcanqui. ¹⁴ Jishyar llutäpacachiptipis, mana yamacämashcanquichu. Manchäga Tayta Diosninchipa anjilninta-jina, quiquin Washäcu Jesústa-jina alli ricamashcanqui. ¹⁵ Canan, ¿imanirtaj ticshaparaycämancqui? Unayga cushicur, alli ñawiquipa ricamashcanqui. Llapanta tarichimashcanqui. Ñawi chacacäcuptinsi, ñawiquicunatapis jurgaparamanquimanmi caran. ¹⁶ ¿Piñapashalläpitachu ticshaparaycämancqui? Mana tumpaycachu. Manchäga llutancunaman čhayashayquipita musyachishcraj. ¹⁷ «Moiséspa shiminta čharchushun» nijcuna alli ricanayquita munar, cushichipayllapa shimiwashcashunqui. Shungunmi ichanga jucta yarpaycan. Cunčhä jatarinayquita munaycan quiquinca-nallata alli ricanayquipaj. ¹⁸ Piwanpis alli ricanacuya allim. Ichanga ricay ñawilläčhu alli-tucullar

ama ruranquimanchu. Manchäga shunguyquipita llucshinman. ¹⁹ Wawacuna, Tayta Jesústa wasguipaptiqui, jatunpa llaquicü. Shungüpís nananraj: «¿Imayraj llapan shungunwan Galacia runacuna Jesúspa shiminta chasquicunga?» nir. ²⁰ Chaymi jamcunawan tincuya sumaj munä. Ricarrächi tucuy-jinanpa tantiyachijman. Sumaj llaquicuyca. Ichanga ima ruraytapis mana camäpacüchu.

Sarawan Agarpita rimar tincuchishan

²¹ Mä, tapushayqui. ¿Rasunpachuraj Moiséspa shiminta charcuya munanqui? ¿Shiminta tantiyanquichu? ²² ¿Abrahampa willapanta liguishcanquichu? Tayta Diosninchipa shiminchú Abrahampa ishcay wamran cashanta willamanchi. Juc wamrata uywaynin Agarchú tariran; juc-cajtana majan Saračhu. Majan Sara mana pipapis uywayninchu caran. ²³ Uwaynin Agarga runapa callpallanpita wawanta tariran. Chacha Saram ichanga aunishanta Tayta Diosninchí camacächiptin, wawanta tariran. ²⁴⁻²⁵ Cay willapata tincuchiypa tantiyacushun. ¿Mayganpa wamran-yupaytaj caycanqui? Unaya Israel runacunawan parlanacur, Arabia quinran Sinaí puntačhu Tayta Diosninchí willaparan: «Alli ricanajpaj shimiña charcunqui» nir. Chaymi uyway cashpan Arabia marcapita Agarpis, wamrampis jucpa shiminta charcuran. Canan wicanpis Israel runacuna uyway Agar-yupay Moiséspa shimmillanta wiycurcaycan; ²⁶ nuwanchim ichanga manana. Sarata wamranta tarichishan-jina Tayta Diosninchí wamrachacamashcanchi. Saraga wasiyujmi caran. ²⁷ Chaymi Tayta Diosninchipa shiminpis nin:

«Wasiyuj warmi, wawaynaj carsi, cushicunquiman.

Wamrata mana tariptquiräsi, shunguyqui achicyacäcunman.

Uway warmi runawan cacursi,
chay-chica wamrata mana taringapächu.

Jammi ichanga achca wamrata tarinquipaj.»*

²⁸ Irmänucuna, wasiyuj Sarapa wawan Isaacwanmi tincunchi. Payga yuriran aunishanta Tayta Diosninchí camacächiptin. ²⁹ Uway Agarpa wamranga Isaacta chiquir ushyaran. Cananpis maquichacamayta munamashpanchi waquin runa Moiséspa shiminta charcunanchita munaycan. Chiquir ushyamanchi. ³⁰ Chaynuy captinsi, Tayta Diosninchipa shiminchú nin: «Uway warmita wamrantinta jarguy. Wamran ima irinsantapis mana chasquingapächu. Manchäga wasiyuj warmipa wamrallanmi irinsanta chasquinga.» ³¹ Irmänucuna, mana uyway Agarpa wamranwanchu tincunchi; manchäga wasiyuj Sarapa wamranwanmi.

5

¹ Washäcu Jesús jishpichimashcanchi Tayta Diosninchipa shungun munashannuylla cawananchipaj. Chaymi shimmillanta wiycushuwan. Moiséspa shimmillanman ama yupachicushuwannachu. Paypa shimin maquichacush-yupay charämaranchi.

² Sumaj wiycushun. «Jirucunquiman» nishuptiqui aunirga, Washäcu Jesústapis pampaman churarcaycanqui. ³ Mana jirucushallanchipitachu Tayta Diosninchí alli ricamäshun; manchäga Moiséspa shiminta llap-llapanta charcuptinchiraj. Ichanga sumaj charcuya pipis mana camäpacunchu. ⁴ Chaymi charcuya camaj-tucujcuna Washäcu Jesústa pampaman churaycan. Llaquipäcu Tayta Diosninchitapis wasguipaycan.

⁵ Jesúspa shiminta chasquicushanchipitam ichanga Tayta Diosninchí alli ricamanchi. Chasquicunanchipaj quiquin Espíritu Santu yanapämanchi. Canan alli cawayta shuyaraycanchi. ⁶ Washäcu Jesústa wiycuptinchi, jirucush cashanchipis, mana jirucush cashanchipis mana imananchu. «Jesúspa shiminta chasquicushä» nirga, runamasinchitapis alli ricashuwan. ⁷ Chaura Jesúspa maquinchú alli cawaycaptiqui, ¿pitaj llullapashcashunqui ashucunayquipaj? ⁸ Chayta Tayta Diosninchí mana

* ^{4:27} Isaías 54.1.

camacächinmanchu caran. Payga wamrachacamashcanchi. ⁹ Pantachicujcuna allita rimarcushanchitapis llapanta pampaman óhuran. Rimaypis purin: «Libadüra ichiclla arinatapis achcamanshi jacachin» nir. Juc runa juchata aparicuptinpis, achcaj llupinpa aywan. ¹⁰ Jamcunatam ichanga maquinchhu Tayta Diosninchi puriyächishunqui. Chaymi shimiña tantiyacunquiman. Juc shimiyyäshuptiquipis, ama óhasquipanquiman. Pantachicujcunata Tayta Diosninchi sumaj ñacachinga. ¹¹ Irmänucuna, Israel-mäsicuna chiquiman: «Ama jírucuynachu» nir willapäcushäpita. «Allipaj jírucunchi» niptimi ichanga, mana chiquimanmanchu. «Jírucunanchi alli» nirga, nuwanchi-raycur ruschu wañuchish caycaptin, Washäcu Jesústa pampaman óhuranchi. ¹² Chay pantachicujcunam ichanga purircaycan: «Jírucushunraj Tayta Diosninchi alli ricamänanchipaj» nir. Chaymi ní: «Jírucuya munar, quiquinca capacurinmanpis.»

Jishpichish caycanchi Tayta Diosninchipa shungun munashannuy cawananchipaj

¹³ Irmänucuna, mana runapa maquinchünachu puriyacanchi. Chaypis shungunchi munashanta ama rurashunchu. Manchäga jucninchu-jucninchipis llaquinacushun. Yanapänacushun. ¹⁴ Tayta Diosninchipa shimin nin: «Quiquiqui alli ricacushayqui-jina runa-masiquitapis alli ricanquiman.» Llaquinacushpanchi Tayta Diosninchipa shiminta llapanta óharcuycanchi. ¹⁵ Cháphupänacurmi ichanga, ticshaparänacurmi ichanga, mashtacar ushyacanquipaj. Chayman ama óhayanquiman.

¹⁶ Chaymi Espíritu Santupa maquinchhu cawashun. Shunguchi munaptinsi, juchata ama rurashunnachu. ¹⁷ Tayta Diosninchipa shungun munashanwan shungunchi munashan sumaj apaycachänacun. Chaymi shungunchi munashallanta ama rurashunchu. ¹⁸ Espíritu Santupa maquinchüna cawaycanchi. Chaymi ama nishunchu: «Tayta Diosninchipa alli ricamänanchipaj Moiséspa shimintaraj llapanta óharcushun.» ¹⁹ Shungun munashallanta rurajcuna ricsipallam. Paycuna jucwan-jucwan puricun. Warmillata, runallata munapan. Imata rurarpis, mana pingacunchu. ²⁰ Tayta Diosninchita mana manchapacur, jírcacunata manchapacun. Chapata rurar, jírcata jaran. Chiquicun. Cháphupänacun. Yargaj. Imallapitapis alläpa warmin. Alläpa ullgun. Piwanpis ticshaparänacun. ²¹ Imapitapis jagayan. Upyallačhu arun. Pačhallanta ashir purin. Sumaj tantiyacunquiman. Mayna willapashcaj. Chay-niraj runacuna mana Tayta Diosninchipa maquinchüchu cawan. Irinsantapis mana óhasquingapächu. ²² Espíritu Santupa maquinchhu cawarmi ichanga, llaquipänacunchi. Cushi-cushilla purinchi. Jau-calla cawanchi. Tantiyanacunchi. Alli shungu canchi. Manchapacur cawanchi. Rimashanchita óharcunchi. ²³ Cuyapänacunchi. Shiminchita chapacunchi. Chaynuy cawaptinchi, pipis mana imatapis jurgapämäshunchu. ²⁴ Washäcu Jesúspa maquinchhu cawajcuna quiquinpa shungun munashanta mana ruranchu. Jucha aparicuytapis mana yarpanchu.

²⁵ Espíritu Santupa maquinchhu cawar, shacyächimashanchita rurashuwan. ²⁶ Ama allitucushunchu. Ama jagayächinacushunchu. Ama chiquinacushunchu.

6

Irmänucunata Pablo piñapashan

¹ Irmänucuna, pipis juchaman óhayaptin, wanacunapaj yanapanquiman. Espíritu Santupa maquinchhu puriyacar, alli shimillayquipa tantiyachinquiman. Cawaycar, nuwanchipis juchaman óhayarushuwan. ² Washäcu Jesúspa shimita wiyacur, jucniqui-jucniquipis tantiyanacärinquiman. Yanapänacärinquiman. ³ Pipis: «Llap-llapanta óharcü» nirga, quiquillan alli-tucuycan. Llutan yarpaycan. ⁴ Nuwanchim ichanga yarpačhacushun. Imanuy cawashanchitapis quiquinchi musyanchi. Tayta Diosninchipa shimita wiyacur, cushihalla cawashuwan. Pampaman óhuranayqui-cashallan pitapis ama ricapanquichu. ⁵ Quiquinchipita alli cawaytapis, ñacaytapis tarishunpaj.

⁶ Tayta Diosninchipa shiminta willapäcuj runata charashanchiman-tupu imatapis tarichishuwan. Ama mičha cashuwanchu.

⁷ Tayta Diosninchita ama llullapäshuwanchu. Pampaman ama čhurashuwanchu. Payga imatapis rurashanchiman-tupu alli cawaymanpis, ñacaymanpis čhuramäshunpaj. ⁸ Jucha aparicuyllačhu arujcuna juchanpita ñacayta taringa. Espíritu Santupa maquinčhu cawa-jcunam ichanga imaycamanpis alli cawayta taringa. ⁹ Chaymi imaypis Tayta Diosninchita manchapacur cawashun. Mana yamacaptinchi, alli cawayman čhuramäshunpaj. ¹⁰ Chaymi pii-maywanpis yanapänacushun. Irmänunchi captin, sumajraj yanapäshun. Ama jungashunchu.

Washäcuj Jesús-janan Pablo cushicushan

¹¹ Irmänucuna, sumaj ricanayquita munar, jatusaj litrawanraj isquirbiycämü. Jatusaj litracunata quiquí maquiwan isquirbischä. ¹² «Jirucuy» nijcuna llapanwan alli ricanacuya munallar purin. Jananmanpis Washäcuj Jesús rusčhu wañushanta willapäcushanpita jaticačhar ushyananta mana munanchu. ¹³ Jirucurpis, Moiséspa shiminta mana čharcunchu. Alli-tucunallanpämi: «Jirucuy» niycäshunqui. ¹⁴ Nuwam ichanga imapitapis mana alli-tucüchu. Washäcuj Jesús spa maquinčhu cawashpä alli cawä. Paymi Taytanchi. Nuwanchi-raycur rusčhu wañuya tarisha. Nuwa-raycur wañush caycaptin, shungü munashanta mana ruränachu. Manchäga Tayta Diosninchu munashallantana rurä. ¹⁵ Jirucuptinchipis, mana jirucuptinchipis, mana imananchu. Llapan shungunchi-wan jucha aparicuyrita wanacuptinchim ichanga, Tayta Diosninchu allina ricamanchi. ¹⁶ Willapashajta čhasquicushayquipita Israel runacunata-jina Tayta Diosninchu llaquipay-culläshunqui. Allilla cawaycachilläshunqui.

¹⁷ Canan mayganiquipis umäta ama nanächinquimanchu. Rasunpa Jesús spa shiminta willacur puriycä. Chaypita wascatapis čhasquishcä.

¹⁸ Irmänucuna, llapaniquitapis Tayta Jesucristu llaquipayculläshunqui, ari. Chaynuy caycullächun.

Éfeso marcačhu irmäncunaman **San Pablo cartacushan**

Tantiyacunanchipaj:

Pablo cay cartata isquirbiran Éfeso marcačhu jutucaj irmänuncunaman. Éfeso cuyayllapaj jatun marca caran. Jatun cashpan chay-tucupita runacuna rantipacuj, ranticuj aywaran. Irmänuncunapis irmänu-masincunata watucujnuy aywaran. Éfeso marcapita musayta munar, liguinqui: Hechos 18.19-19.41; 20.17-38; Apocalipsis 2.1-7.

Éfeso marcaman ćhayar, quimsa wata Pablo juyaran. Tayta Diosninchipa shimita willapäcuptin, achcaj runa Jesúsman yupachicuran. Aywacurpis, Éfeso marca irmänuncunata mana jungaranchu. Roma marcačhu auturdä wičhgachiptinpis, mana jungaranchu. Manchäga waran-warana paycunata yarparaycaran. Chaymi carsilpita-pacha cartacuran.

Pablo isquirbiran:

Jesucristu Washäcu cashanpita, acracushancunata Tayta Diosninchipa wamrachacushanpita: *Efesios 1.3-3.21.*

Tayta Diosninchipa wawancuna cuyay-munaypaj cawanapita: *Efesios 4.1-6.24.*

Pablo wamayashan

¹ Éfeso marcačhu irmänucuna, nuwa Pablo cartacallämü. Tayta Diosninchipa camacächiptin, Washäcu Jesús cačhacamaptin, shimita willapäcur puriyçä. Jamcuna Tayta Diosninchipa wawan caycanqui. Llapan shunguyquiwan Washäcu Jesúspa shimitapis ćhasquicushcanqui. ² Tayta Diosninchispis, Taytanchi Jesucristupis yanapayculläshunqui allilla cawanayquipaj.

Jishpichicuj cashanpita Tayta Diosninchita alliman ćhurashan

³ Tayta Diosninchita alliman ćhurayculläshun. Payga Taytanchi Jesucristupa Taytan. Paymi Washäcu Jesúsca cačhamusha. Washäcu Jesúsna Tayta Diosninchichi camashanta shungunchichu camacächin. Maquinčhu cawaptinchi, sumaj yanapaycämachi. ⁴ Cay pachata mana camallarsi, Tayta Diosninchichi mayna acracamashcanchi Washäcu Jesúspa maquinčhu cawananchipaj. Acracamashcanchi shungun munashannuylla cawananchipaj, ima juchatapis mana aparicunanchipaj. ⁵ Llaquipämashpanchi unaypita-pacha acracur wamrachacamashcanchi nuwanchi-raycur Washäcu Jesús shamuyninpa. Shungun munashanman llapanpis tincuran. Yarpashannuylla camacaran. ⁶ Tayta Diosninchichi sumaj llaquipämashpanchi Cuyay Wawanta cačhamushanpita alliman ćhurayculläshun.

⁷⁻⁸ Ima alliraj Jesús nuwanchi-raycur wañuyman ćhayasha. Cananga jucha aparicuypita jishpichimashcanchi. Juchanchitapis llapantana jungasha. Mana yarparannachu. Tayta Diosninchichi sumaj-sumaj llaquipämachi. Chaymi llapantapis tantiyachimanchi.

⁹ Quiquin munarmi, shungullančhu yarparashantapis tantiyachimashcanchi. Washäcu Jesús shamuyninpaj Tayta Diosninchichi unaypita-pacha yarpashan camacasha.

¹⁰ Jitashan junaj yarpashanta camacächisha. Tayta Diosninchichi yarparan: «Jesúspa maquinmanmi janaj pachatapis, cay pachatapis ćhurashaj. Llap-llapantam maquinman ćhurashaj» nir.

¹¹ Unaypita-pacha nuwanchitapis acracamashcanchi Washäcu Jesúspa maquinčhu cawananchipaj, irinsanchitapis ćhasquinanchipaj. Yarpashantapis, shungun munashan-tapis quiquin Tayta Diosninchichi camacächin. ¹² Acracamänanchipaj camacaycachiptin, payllata llap-llapanchi alliman ćhurashun. Nuwacunaraq puntata Washäcu Jesúspa shimita ćhasquicunäpaj camacächisha. Unaypita-pacha Israel marca-masinti Washäcuja

shuyashcä. ¹³ Cananga jamcunapis Washäcuj Jesúspa maquinchü cawarcaycanqui. Washämänanchi-raycur wañuyman Jesús chayashanta willapäshuptiqui, llapan shunguyquiwan chasquicushcanqui. Wiyacuptiqui, aunishannuylla Espíritu Santu maquinchü puriycächishunqui. Chaynuypa Tayta Diosninchipa wawan cashayqui musyacan. ¹⁴ Espíritu Santupa maquinchü cawar, Tayta Diosninchipa wawan cashanchita musyanchi. Wawan car alli cawayman churamaptinchi, irinsanchitapis chasquishunpaj. Munayniuj cashanpita llap-llapanchi payllatam alliman churashun.

Irmänucunapaj Pablo mañacushan

¹⁵ Ima allish Tayta Diosninchipa maquinchü cawarcaycanqui. Jesúspa shiminta llapan shunguyquiwan chasquicushayquitapis, irmänu-pura alli ricanacushayquitapis mayashcä. ¹⁶⁻¹⁷ Chaymi nuwapis Tayta Diosninchita mañacur, mayganiquitapis mana jungajchu. Jamcunata ricsishäpita sumaj cushicü. Llapaniquipämi mañacuyçä. Tayta Jesucristuta caçhamuj Tayta Diosninchita mañacuyçä Espíritu Santu alli yarpayta jushunayquipaj, imatapis tantiyachishunayquipaj. Payga Tayta Diosninchipa shungun yarpashanta sumaj tantiyachishunquipaj. ¹⁸ Yarpashan shunguyquiman chayanman. Tayta Diosninchia acracamashcanchi wawan cananchipaj. Wawan car, llapanchi irinsanchitapis chasquicushunpaj. Irinsanchiga sumaj-sumaj allim.

¹⁹ Maquinchü cawashanchipita Tayta Diosninchchi munayniuj cashpan sumaj yanapämanchi. ²⁰ Sumaj munayniuj cashpan Washäcuj Jesústa wañuchish captinpis, cawarachimuran. Jinarcur janaj pachačhu mandäshinanpaj diricha-caj lädunman jamachiran. ²¹ Jesúna llapan auturdäcunatapis, munayniujcunatapis maquinchü purichin. Cay pachačhpis, janaj pachačhpis Jesúzman pipis mana tincunchu. Payga imaypis llap-llapanpita mas munayniuj. ²² Tayta Diosninchchi Jesúspa maquinman llap-llapantapis churasha. Jutuaj irmänucunata ricananpäpis Jesústa churasha. ²³ Cananga warmi runanpa maquinchü cawashan-jina Jesúspa maquinchü cawanchi. Jesús cawachimaptinchiraj, cawanchi.

2

Llaquipämashpanchi wañuypita jishpichimashanchi

¹ Unayga jucha aparicuyačhu arur, wañush-jina Tayta Diosninchipa ricay ñawinchü cawarayqui. ² Juchačhu arujcunapa llupillanpa purishcanqui. Supaypa maquinchü cawashcanqui. Paymi runacunata shacyächin Tayta Diosninchita mana wiycunananpaj. ³ Llapanchipis juchata aparicullar, shungunchi munashanta ashillar cawashcanchi. Chaymi juchačhu arujcunawan iwal Tayta Diosninchchi ñacachimänanchi camacaran. ⁴ Paymi ichanga llaquipäcuj cashpan jishpichimashcanchi. Sumajsumaj llaquipämanchi. Llaquipämashchita Washäcuj Jesúwan musyachimashcanchi. ⁵ Juchačhu cawar wañush-jina cawaycaptinchisi, Washäcuj Jesústa cawarachishanjina cawarachimashcanchi. Nuwanchita shungun llaquipämaptinchi, ima ñacaypitapis Tayta Diosninchchi jishpichimashcanchi. ⁶ Washäcuj Jesústa-jina cawarachimashcanchi. Janaj pachačhu Jesúspa lädunman jamananchipäpis camacächisha paypa maquinchü cawashanchipita. ⁷ Llapantapis Tayta Diosninchchi camacächisha alli shungu cashanta, llaquipäcuj cashanta pi-maypis tantiyacunananpaj. Washäcuj Jesús nuwanchi-raycur wañuyninpa imay-imaypis tantiyachicush canga. ⁸ Payga llaquipämashpanchi jishpichimashcanchi shiminta chasquicushanchipita. Quiquillanchipita jishpiyta mana camäpacushuwanchu. Manchäga shungun munaptin, jishpichimashcanchi. ⁹ Mana imatapis rurashanchipitachu alli ricamanchi; manchäga payman yupachicushallanchipita. Chaymi ama alli-tucushuwanchu. ¹⁰ Nuwanchi Tayta Diosninchipita cawanchi. Washäcuj Jesúspa shiminta chasquicuptinchi, wamrachacamashcanchi imatapis allillata rurananchipaj. Payga unaypita-pacha camacächisha imatapis allillata rurananchipaj.

Juc shungulla cawananchipaj willapashan

¹¹ Israel runacuna ashllir nishurayqui: «Jírucüni jäpa runacuna juchallačhu arun.» Quiquincunam ichanga alli-tucur niran: «Nuwacuna jírucush car, Tayta Diosninchipa maquillančhu cawarcaycä.» Jírucush carpis, jírucüni carpis, runa ricanallanpämi caran. ¹² Unayga Israel runacunapita yata cawashcanqui. Washäcuj pii cashantapis, Israelcunata Tayta Diosninchichi ima-imata aunishantapis mana musyashcanquichu. Paycunata washänantapis mana musyashcanquichu. Jamcunapis Tayta Diosninchiman mana yupachicur, cawashayquiwan cawacushcanqui. ¹³ Cananmi ichanga jäpa runa carsi, mana jäpa runanachu canqui. Nuwanchi-raycur Washäcuj Jesús wañuyninpa Tayta Diosninchipa maquinčhüna cawarcaycanqui. ¹⁴⁻¹⁵ Washäcuj Jesús camacächisha Israel runacunawan jäpa runacuna juc shungulla cawananpaj, mana chiquinacullar cawananpaj. Ishcay casta runa captinsi, ju llachasha. Alli ricanacunanchi-raycur quiquinmi wañuymen chayasha. Moiséspa shimintapis, auquil-lunchi yačhachicushancunatapis jungaycachir, allina ricamanchi. Ishcay casta runatapis juc castallamanna churamashcanchi. ¹⁶ Jesúsga wañuymen chayasha Israelcunawan jäpa runacuna juc shungulla cawananchipaj, Tayta Diosninchichi alli ricamänanchipaj. Chiquinacushanchitapis ushyacächisha. ¹⁷ Jesús cay pachaman shamur, jäpa runacunatapis, Israel runacunatapis willapämashcanchi allilla cawananchipaj. Jäpa runacuna Tayta Diosninchipiita caručhu cawasha. Israel runacunam ichanga Tayta Diosninchipa shiminta sumaj musyan. ¹⁸ Jesús nuwanchi-raycur wañuyninpa Espíritu Santu yanapämaptinchi, llapan mañacushanchitapis Tayta Diosninchichi wi yamanchi Israel runa captinchisi, jäpa runa captinchisi. ¹⁹ Canan mana jäpa runanachu canqui. Mana wajta runachu canqui. Manchäga Tayta Diosninchipa wawanna carcaycanqui. Jesúsga shiminta chasquicujcuna llap-llapanmi Tayta Diosninchipa maquinčhu cawan. ²⁰⁻²¹ Maquinčhu cawananchipäga cačhancunawan, willacujnincunawan yanapämashcanchi. Paycuna Tayta Jesucristupa shiminta tantiyachimashcanchi. Jesúsga wasipa simintuta jallarachij rumi-yupaymi. Quiquin Tayta Diosninchichi churasha. Jesúspita Tayta Diosninchipa shiminta tantiyacushcanchi. Shiminta wi yacur, paypa maquinčhüna cawarcaycanqui. ²² Jamcuna jäpa carsi Jesúsga shiminta chasquicur, Tayta Diosninchipa maquinčhüna cawarcaycanqui. Canan llapanchitana Espíritu Santu ricaycämanchi.

3

Tayta Diosninchichi llapan runata llaquipashan

¹ Nuwata wičgaraycächiman jamcunata Washäcuj Jesúsga shiminta willapashä-janan. ² Chayta mayna musyanqui. Jäpa runa captiquisi jamcunata llaquipar, Tayta Diosninchichi cačhacamasha shiminta willapänajpaj. ³ Quiquin tantiyachimaptin, Tayta Diosninchichi yarpashanta tantiyacushcä. Tantiyachimashanpita mayna cartacamushcraj. ⁴ Cartäta liguir, Washäcuj Jesús yarpashanta sumaj musyashäta tantiyacunquipaj. ⁵ Unayga Tayta Diosninchichi shungun yarpashanta pitapis mana musyachishachu. Cananraj acracushan cačhancunawanpis, willacujnincunawanpis Espíritu Santu Tayta Diosninchipa shungun yarpashanta musyachicusha. ⁶ Sumaj tantiyacushuwan. Washäcuj Jesúsga shiminta chasquicur, jäpa runacunapis Tayta Diosninchipa wawanna caycan. Israel runacunajina Tayta Diosninchichi aunishan irinsatapis chasquinga. Washämänanchi-raycur Jesús wañuymen chayashanpita llap-llapanchi chasquishunpaj.

⁷ Llaquipämär, Tayta Diosninchichi churamasha shiminta willapäcur purinäpaj. Mana quiquipitachu willapäcur puriyca. Manchäga munayniyuj cashpan Tayta Diosninchichi churamasha. ⁸ Washäcuj Jesús sumaj alli. Tucuy-jinanpa yanapämashanchitapis tantiyayta mana atipanchichu. Nuwaga jipataraj paypa shiminta chasquicushcä.

Chaypis llaquipämashpan Tayta Diosninchí ćuramasha jäpa runacunata Jesúspa shiminta willapänäpaj.⁹ unaypita-pacha Tayta Diosninchí yarpashanta tantiyachinäpaj. Paymi llapan ricashanchicunatapis camasha.¹⁰ Cananga jutucaj irmänucunata ricar, anjilcunapis, supaycunapis Tayta Diosninchí sumaj yarpay-sapa cashanta tantiyacunga.¹¹ Jishpichimänanchi-raycur Taytanchi Jesucristu ricarimuptin, unaypita-pacha yarparashantaga Tayta Diosninchí camacächisha.¹² Canan paypa maquinchú cawar, llapan shungunchiwan Tayta Diosninchita imatapis mañacunchi.¹³ Chaymi Jesúspita jamcunata willapaptí ñacachimaptin, ama llaquicunquichu. Manchäga jatunpa cushicärinquiman.

Irmänucunapaj yapay Pablo mañacushan

¹⁴ Llapan runata Tayta Diosninchí llaquipashanta musyar, jungurpacuycur jamcunapaj mañacü.¹⁵ Paypa maquinchú cawan janaj pachačhu cawajcunapis, cay pachačhu cawajcunapis. Llap-llapanta quiquin cawachin.¹⁶ Tayta Diosninchí sumaj munayniyuj. Llaquipäcuj. Chaymi payta mañacü Espíritu Santuwan sha-cyächishunayquipaj. Espíritu Santu Tayta Diosninchipa shiminta shunguyquiman ćhayachin pay munashannuy cawanayquipaj.¹⁷ Chaynuypis mañacü Washäcuj Jesúspa shimin shunguyquiman ćhayaptin, maquinchú cawanayquipaj, quiquipi-pura sumaj llaquipänacärinayquipaj.¹⁸⁻¹⁹ Chayraj Washäcuj Jesús sumaj llaquipäcuj cashanta tantiyacushunpaj. Tayta Diosninchipa wawan captinchi, mayganinchitapis mana jungamanichihu. Llaquipämashanchitapis sumaj tantiyayta mana atipanchichu. Chaypis jamcunapaj mañacü llaquipäcuj-cashan shunguyquiman ćhayananpaj. Mañacü Tayta Diosninchipa maquillanchú cawanayquipaj. Pay alli shungu cashan-jina nuwanchipis alli shungu cashuwan.

²⁰ Canan Tayta Diosninchita alliman ćurashun. Payga sumaj munayniyujmi. Mañacushanchipitapis mas-masraj yanapämanchi.²¹ Washäcuj Jesúspa shiminta ćhasquicur jutucaj irmänucuna llap-llapanchi Tayta Diosninchita alliman ćurashun. Payllam imay-imaypis munayniyuj. Chaynuy caycullächun.

4

Jesústa ricacushpanchi juc shungulla cawashun

¹ Jesúspa shiminta willapäcushápita wičhgaraycächiman. Chaypis Tayta Diosninchipa maquinchú cawar, juc shungulla cawanquiman. Chaynuy cawanayquipaj Tayta Diosninchí acracushcashunqui.² Chaymi ama alli-tucunquimanchu. Manchäga alli shungulla cawapäcunquiman. Pampamanpis ama ćuranacäriniquichu. Llaquipänacushpayqui tantiyanacärinquiman.³ Jucníqui-jucníquipis alli ricanacärinquiman. Espíritu Santupa maquinchú cawar, piwanpis juc yarpaylla cawapäcunquiman.⁴ Jesúspa shiminta ćhasquicushanchipita juc shungullana carcaycanchi. Espíritu Santupis jucnayllam. Llapanchisi Tayta Diosninchí aunishallanman yupachicunchi.⁵ Taytanchi Jesúspis jucnayllam. Paypa shimillanta ćhasquicushcanchi. Llapanchipis juc cutilla ushyacushcanchi.⁶ Tayta Diosninchipis jucnayllam. Paypita llapanchi cawanchi. Llapanchita maquinchú charämanchi. Maquinchú purichimanchi shungun munashanta rurananchipaj. Llapanchi wamran caycanchi.⁷ Yačhaytam ichanga Washäcuj Jesús camapämanchi shungun yarpashanman-tupu ima-imatapis rurananchipaj.⁸ Tayta Diosninchipa shiminchüpis nin:

«Juc runapa maquinpita achcajta jičhusha.

Punta jananman pushasha.

Waquin runacunata imatapis jarasha.

Yačhaytapis camapusha.»

⁹ ¿Imanirtaj: «Punta jananman aywasha» nin? «Punta jananman aywasha» nishanga tincun janaj pachapita chacaj pachaman Jesús yarpamushanwan. ¹⁰ Janaj pachapita yarpamuja janaj pachaman yapay cuticusha llap-llapanta maquinčhu purichinanpaj. ¹¹ Paymi waquinta yačhayta camapusha shiminta willacuj cačhananpaj, waquintana Tayta Diosninchipa shungun yarpashanta willacunanhapaj, waquintana Jesúspa willapäcur purinanpaj, waquintana irmänucunata ricananhapaj, waquintana Tayta Diosninchipa shiminta tantiyachicunanhapaj. ¹² Llapantapis čurasha Washäcuj Jesúspa shiminta sumaj-sumaj tantiyachimänanchipaj. Tantiyachimäshunpaj Jesúspa shungun munashallanta rurar cawananchipaj. Paypa maquillančhu juc shungulla cawananchita sumaj munan. ¹³ «Tayta Diosninchipa Wawan Jesúspa shungun yarpashanta tantiyämi. Shiminta časquicushcämi» nirga, juc shungulla cawayta yačhacushuwan. Washäcuj Jesús Tayta Diosninchipa shungun munashannuy cawashan-jina nuwanchipis paypa shungun munashannuya cawashuwan. ¹⁴ Chaymi sapu wamracunata-jina pipis mana riguichicamäshunpächu. Waquin runa shungun munashallanta yačhaycächin. Tucuy-jinanpa runacunata riguiycächin. Paycuna wayra wacman-cayman imatapis apashan-jina jucta-jucta willapar munashanta llullapämansi. ¹⁵ Nuwanchim ichanga Tayta Diosninchipa shiminta sumaj tantiyacushun. Llaquipänacushun. Maquillančhu cawananchipaj waran-warau Tayta Jesucristu pí cashantapis tantiyacushun. Paypitam cawanchi. ¹⁶ Yata-yata cawaptinchisi, juc-niraj-juc-niraj captinchisi, juc shungulla cawananchipaj camacächin. Yačhayta camapämashanchiman-tupu imatapis rurar, alli ricanacunchi. Llaquipänacunchi. Jesúspa maquinčhu cawar, juc shungullana cawanchi.

Washäcuj Jesúspa shungun munashannuy cawashun

¹⁷ Tayta Jesús nimashannuya willapashajta ama junganquichu. Juchačhu aruj runacuna-jina ama cawanquichu. Paycuna Tayta Diosninchita mana manchapacur, cawashanpa cawacärin. ¹⁸ Jucha aparicuyllata yarpan. Imatapis mana tantiyacunchu. Chucru shungu. Chaymi Tayta Diosninchipa shiminta mana wiycunchu. Maquinčhpis cawayta mana munanchu. ¹⁹ Manchapacuya mana yačhar, mana pingacullar allgu-jina jucwan-jucwan cacun. Jucwan-jucwan mana cacushancaman jamaytapis mana tarinchu. ²⁰ Chay rurashancuna Washäcuj Jesúspa shiminwan mana tincunchu. ²¹ Shiminta wiyahcanquim. Časquicushcanquim. Shungun munashanta rurar cawanayquipaj willapashcashunqui. Willapäshushayqui Jesúspa shiminwan tincun. ²² Willapashcashunqui unay cawashanchi-jina juchata mana aparicunayquipaj. Unay juchallačhu aruptinchi, wañuy jananchičhu caycaran. ²³ Cananmi ichanga willapämashcanchi Tayta Diosninchipa shungun munashallanta shungunchiman čhuracunanchipaj. ²⁴ Chaymi ima juchatapis ama rurashunnachu. Manchäga Tayta Diosninchipa maquillančhu cawashun. Payga camamashcanchi shungun munashallanta rurar cawananchipaj, runa-masinchiwan allillata rurar cawananchipaj.

Imata rurananchipäpis

²⁵ Jesúspa maquinčhu cawaycarga, ama llullapänacushunchu. Manchäga rasuncajllata pí-maywanpis rimashun. ²⁶ Warmirpis ullgurpis, juchata ama aparicunquichu. Warmishalla, ullgushalla ama juyanquichu. Manchäga chay junajlla ushyacächinquiman. ²⁷ Mana ushyacächiptiqui, jucha aparicuyman supay jančhashunquipaj. ²⁸ Suwa carga, ama suwacunquinachu. Manchäga imapis mana pishishunayquipaj sumaj arunquiman. Arucuptiqui, pishipacujcunata tarichinayquipäpis aypanga. ²⁹ Runapa washantapis ama rimanquichu. Manchäga alli shimillayquipa imatapis tantiyachinquiman. Allita rimaptiqui, llaquipäcuj cashayquita tantiyacunga. ³⁰ Runa-masiquita jagayächirmi ichanga, Espíritu Santutapis jagayächinqui. Chayta ama rurashunchu. Tayta Diosninch Espíritu Santuta cačhamusha maquinčhu purichimänanchipaj. Maquinčhu cawaptinchi cay pacha ushyacaptinga, Tayta Diosninch jishpichimäshunpaj. ³¹ Chaymi

ama ticschaparänacunquichu. Ama jagayächinacunquichu. Ama chiquinacunquichu. Ama ashllinacunquichu. Jucpa washashantapis ama rimanquinachu. Ima juchatapis ama ruranquinachu. ³² Manchäga alli ricanacur yanapänacunquiman. Llaquipänacur tantiyanacunquiman. Imasi captinga, juclla ushyacächinquiman. Washäcuj Jesúspa shiminta čhasquicuptinchi, Tayta Diosninchipis llapan juchanchita jungasha. Mana yarparannachu.

5

Jesúspa maquinčhu cawar cuyay-munaypaj cawashun

¹ Nuwanchi Tayta Diosninchipa wawan caycanchi. Chaymi shiminta sumaj wiycushun. Quiquin-jina cawashun. ² Washäcuj Jesús llaquipämashanchi-jina nuwanchipis llaquipänacärishun. Jishpichimänanchi-raycur wañuyman čhayar caway-bidanta jaraptin, Tayta Diosninchipa shungunmanpis sumaj tincuran.

³ Tayta Diosninchipa wawan caycar, ima juchatapis ama ruranquichu. Jucwan-jucwan ama cacunquichu. Pingaypaj imatapis ama ruranquichu. Quiquillayquipaj imatapis ama ashinquichu. ⁴ Ama ashllicunquichu. Upa-tucullar ama imatapis rimanquichu. Pingaypaj juc rimashanta ama cutipanquichu. Manchäga Tayta Diosninchipi imanuy-imanuy yanapäshushayquitapis llapanta willapay. ⁵ Mayna tantiyacushcanqui. Jucwan-jucwan cacujcuna, juchallata aparicujcuna, quiquillanpaj imatapis ashijcuna Washäcuj Jesúspa maquinčüpis, Tayta Diosninchipa maquinčüpis mana cawanchu. Irinsatapis mana čhasquingachu. Quiquillanpaj imatapis ashijcuna Tayta Diosninchita mana manchapacunchu. Manchäga cay pachačhu tarishallanman yupachicun. Chaycunallapäna wañun.

⁶ Pipis pantachishurunquiman: «Tayta Diosninchipa shiminta mana wiycushasi mana imananchu» nir. Shiminta mana wiycujcunata Tayta Diosninchipi sumaj ñacachinga. ⁷ Jamcunatapis ñacachishurunquiman. Chaymi chay-niraj runacunapa llupinpa ama jatinquichu. ⁸ Unay jamcunapis juchata aparicullar cawashcanqui. Cananmi ichanga Jesúspa shiminta čhasquicur, Tayta Diosninchipa wawanna caycanqui. Paypa wawan cashayqui musyacänanpaj juchata ama aparicunquichu. Manchäga Tayta Diosninchipa shungun munashallanta rurar cawanquiman. ⁹ Tayta Diosninchipa wawancuna allillata ruran. Rasullanta riman. Cuyay-munaypaj cawan. ¹⁰ Imatapis sumaj tantiyacunquiman Tayta Diosninchipa shungunman tincushallanta ruranayquipaj. ¹¹ Pipis juchata aparicuptin, ama juchacäshinquichu. Manchäga juchanta jurgapar, piñacunqui. ¹² Paycuna pacayllapa juchata rurashanga marca-pingaymi. ¹³ Juchanta mana pacäshiptinchi, ima rurashallanpis llapanmi musyacanga. Ima juchatapis mana pacajcuna Washäcuj Jesústa wiycun. ¹⁴ Rimay purishannuypis tantiyacunchipaj nin:

«Puñurajcuna, ricchapacuyna.

Wañushcunapa čhaupinpita jataripacuyna.

Washäcujmi cawachishunqui.»

¹⁵ Chaymi imanuy cawashayquitapis sumaj tantiyacunquiman. Upa runa-jina ama purinquichu; manchäga yarpay-sapa runa-jina. ¹⁶ Allillata imaypis ruranquiman. Canan wichan runacuna juyu. ¹⁷ Upa runa-jina ama cawanquichu. Manchäga Tayta Jesúspa shungun yarpashanta sumaj tantiyacunquiman. ¹⁸ Mačhashcuna umanman čhayashanta imatapis riman. Shungun munashanta ruran. Pingaymanpis čayan. Chaymi upyallačhu ama arunquichu. Manchäga Espíritu Santupa maquillanchu cawanquiman. ¹⁹ Tucuy-niraj alabansacunata cantar shacyächinacunquiman. Tayta Diosninchita alliman čhurar llapan shunguyquiwan cantanquiman. ²⁰ Taytanchi Jesucristupa maquinčhu cawar imaman čhayarpis, cushicärinquiman. Tayta Diosninchita imaypis ninquiman: «Taytallau Tayta, ima allish yanapaycämanqui.»

Majayucunata piñapashan

²¹ Washäcu Jesústa manchapacur, jucniqui-jucniquipis wiyanacur cawanquiman.
²² Warmicuna Tayta Jesucristuta wiycushan-jina majanpa shimintapis wiycunman. ²³ Warmiga majanpa maquinchú cawan. Jutuaj irmänucunapis Washäcu Jesúspa maquinchú cawanchi. Paymi imapitapis washämähshun. ²⁴ Jutuaj irmänucuna Washäcu Jesúspa maquinchú cawashan-jina warmicunapis majanpa maquinchú cawanman.

²⁵ Jutuaj irmänucunata Washäcu Jesús llaquishan-jina ullgucunapis majanta sumaj llaquinman. Jesús Čhasquicucunata washänan-raycur wañuytapis tarisha.

²⁶ Maquinman shuntamänanchipaj wañuymanpis čhayasha. Chaynuypis maquinchú cawananchipaj shiminta willapämashcanchi. Yacuwan ushyacuptinchi, juchanchitapis illarachisha. ²⁷ Jutuaj irmänucunatapis maquinchú purichinga. Paycuna cuyamunaypaj cawapácun. Shungun munashallanta rurapácun. Alli ricashna cawapácun. Ima juchačüpis mana cawannachu. Llutantapis mana rurannachu.

²⁸ Jutuaj irmänucunata Jesús llaquishan-jina ullgucunapis warminta llaquinman. Majanta alli ricar, quiquinpis alli ricanun. ²⁹ Pipis quiquinta mana chiquicunchu. Manchäga alli cawayta munar, micun. Imatapis ushtucun. Washäcu Jesúspis jutuaj irmänucunata llaquipar, sumaj rican. ³⁰ Jesústa Čhasquicush carna, paywan juc shungulla cawanchi. ³¹ Tayta Diosninchipa shiminchüpis nin: «Majachacar, maman-taytanpa maquinpita runa witicunga. Majallanwanna juc shungulla cawanga.»* ³² Shiminta liguir, Tayta Diosninchipi yarpashanta achcata yačhacunqui. Canan majachacajwan tincuchishanta sumaj tantiyacushun. Chay-jina jutuaj irmänucuna Washäcu Jesúswan juc shungulla cawashanta tantiyacunchi. ³³ Chaymi runa warminta llaquinman. Warmipis majanta alli ricanman.

6

Wamracunata piñapashan

¹ Wamracuna, Tayta Jesúspa maquinchú cawaycar, mamayqui-taytayquita wiycunquiman. Wiycunayqui camacan. ² Runacuna alli cawananta munar, Tayta Diosninchipi auniran: «Mamayqui-taytayquita alli ricanquiman. ³ Chayrämi chachayashayquicaman cushi-cushilla cawanquipaj» nir.*

Mama-taytacunata piñapashan

⁴ Taytacuna, jamcunapis wamrayquicunata ama jagayächinquimanchu. Manchäga Tayta Diosninchipa shiminta wiycunananpaj alli shimillayquipa piñacunquiman.

Mandu-rurajcunata, patruncunata piñapashan

⁵ Mandu-rurajcuna, jamcunapis llapan shunguyquiwan patrunniquita wiycunquiman. Sumaj manchapacunquiman. Washäcu Jesúspa shiminta rurashayqui-jina patrunniquipa shimintapis ruranquiman. ⁶ Mana ricashuptiquipis, sumaj arunquiman. Washäcu Jesúspa maquinchú cawaycar, patrunniquita sumaj wiycunquiman. Sumaj arurga, patrunniquipa shungunmanpis, Tayta Diosninchipa shungunmanpis tincunqui. ⁷ Patrunniqui mandashuptiqui, wiycunquiman. Cushi-cushilla arunquiman Tayta Diosninchipa ricay ñawinchú alli llucshinayquipaj. Runacunapa ricay ñawillanchú ama aruj-tucunquimanchu. ⁸ Mandu-rurajtapis, mana mandu-rurajtapis alli cawayman Tayta Diosninchipi čhuranga imatapis allita rurashanpita.

⁹ Patruncuna, jamcunapis mandu-rurajniquita alli ricanquiman. Ullgüparcur ullgüparcur ama aruchinquimanchu. Mandu-rurajcunapis, patruncunapis Tayta Diosninchipa maquinchú cawan. Payga llapanchita llaquipämanchi; mana ricsishricsishllatachu.

* **5:31** Génesis 2.24. * **6:3** Éxodo 20.12; Deuteronomio 5.16.

Supaywan ičhipanacushanpita willapashan

¹⁰ Irmänucuna, mä, wihamay. Quiquillayquipita ama alli-tucunquimanchu. Manchäga Tayta Jesúspa maquillančhu cawanquiman. Payga sumaj munayniyuj yanapäshunayquipaj. ¹¹ Tayta Diosninchita sumaj wiycushun. Paymi supaypa maquinpita washämäshun. Tayta Diosninchipa maquinčhu puriptinchi, juchaman mana jančhamäshunchu. ¹² Nuwanchita mana runa-masinchichu chiquimanchi; manchäga quiquin supay. Payga, shapshicu-masincuna-ima, jircacuna-ima munan maquinčhu cawananchita. ¹³ Chaymi Tayta Diosninchipa maquillančhu cawashun. Supay ičhipuya munamaptinchisi, juchaman jančhayta munamaptinchisi, ičhipunanchipaj Tayta Diosninchchi yanapämäshun. Ičhipurpis, Tayta Diosninchipa maquillančhu cawashun. Shungun munashallanta rurashun. ¹⁴ Tayta Diosninchipa maquinčhu cawar, shimintapis llapan shungunchiwan čhasquicushun. Shungun munashallanta rurashun. ¹⁵ Imay-imaypis Jesúspa alli willapanta willapäcur purishun: «Allilla cawachimäshun» nir. ¹⁶ Ima captinpis, llapan shungunchiwan Jesúzman yupachicushun. Chaura supay mana juchaman jančhamäshunchu. ¹⁷ Tayta Jesús washämashanchita ama jungashunchu. Tayta Diosninchipa shimintapis wiycushun. Shiminta wiycuptinchi, supayta ičhipunanchipäpis Espíritu Santu sumaj yanapämäshun.

¹⁸ Imaypis Tayta Diosninchita mañacuycar cawashuwan. Mañacunanchipäga Espíritu Santuwanmi Tayta Diosninchchi yanapämäshun. Llutalla ama cawashunchu. Manchäga irmänunchicunapäpis mañacuycar cawashun. ¹⁹ Nuwapäpis Tayta Diosninchita mañacunqui, ari. Alli willapanta willacupti, yanapämächun. «Washämänanchi-raycur Jesúshamusha» nir shungun yarpashanta musyachicuptipis, yanapämänanpaj mañacunqui. ²⁰ Nuwata jäpa runacunata willapänäpaj Tayta Diosninchchi cačhamasha. Chaypita runacuna wičhgaraycächiman. Chaymi mana manchacullar willapäcunäpaj mañacunqui.

Cartapa ushyanan

²¹ Yačhänacushanchi irmänu Tíquico shamur, imanuy juyashätapis, ima-imata rurashätapis willashunquipaj. Jesúspa shiminta willapäcupti, paymi sumaj yanapämasha. ²² Chaymi shacyächishunayquipaj, imanuy juyashätapis willashunayquipaj cačhacamü.

²³ Tayta Diosninchipis, Tayta Jesucristupis llapaniquita yanapaycullašhunqui, ari. Shiminta čhasquicush caycar, payllaman yupachicunquiman. Irmänu-purasíllaquipänacärinquiman. Allilla cawanquiman. ²⁴ Taytanchi Jesucristuman llapan shunguyquiwan yupachicuptiqui, llaquipäshushpayqui Tayta Diosninchchi sumaj yanapaycullašhunqui. Chayllana.

Filipos marcačhu irmänucunaman San Pablo cartacushan

Tantiyacunanchipaj:

Pablo cay cartata isquirbiran Filipos marcačhu jutucaj irmänucunaman. Filipos marca Macedonia quinrančhu caycaran. Chay marcata Roma runacuna maquinčhu purichiran. Unayllata Pablo chay marcaman aywaran Jesúspa alli willapanta willapäcunananpaj. Filipos marcačhu Pablo willapäcushanpita musyayta munar, liguinqui: Hechos 16.8-40.

Jipataraj carsilčhu wičgaraycaptin, Pabluta yanapänanpaj cuyachicuyninta Filipos irmänucuna apachiran. Llaquipashanta musyar, Pablo cushish cartacuran.

Pablo isquirbiran:

Filipos irmänucunata allichu jurgushanpita: *Filipenses 1.1-11.*

Carsilčhu caycarpis waquin runa Jesúspa alli willapanta willapäcushanpita, Jesús-janan ñacajcunata shacyächishanpita: *Filipenses 1.12-30.*

Jesús alli shungu cashan-jina cawananpita: *Filipenses 2.1-18.*

Timoteuwan Epafradito yanapashanpita: *Filipenses 2.19-30.*

Jesúspa shungunta tantiyacununpita, shiminta wiycununpita, llapan runawan alli ricanacununpita: *Filipenses 3.1-4.9.*

Cuyachicuyninta apachiptin Filipos irmänucunapaj cusicushanpita: *Filipenses 4.10-23.*

Pablo wamayashan

¹ Filipos marca irmänucuna, Jesúspa shiminta čhasquicush car, Tayta Diosnillanchipäna cawarcaycanqui. Nuwa Pablo, Washäcuj Jesúspa mandu-rurajnin cashpä Timoteuwan ishcani cartacallämü. Llapaniquita wamayaj. Mayur irmänucunapis, yanapäcujcunapis, ¿imanuyllataj juyaparcaycanqui? ² Tayta Diosninchipis, Tayta Jesucristupis llapaniquita yanapayculläshunqui. Maquinčhu allilla cawaycachilläshunqui, ari.

Tayta Diosninchita alliman čhurashan

³ Jamcunapaj yarpärir, nü: «Taytallau Tayta, ima allish paycunawan ricsinacachimashcanqui.» ⁴ Jamcunapaj mañacur, cushishalla mañacü. ⁵ Jesúspa alli willapanta willacur puriptü, sumaj shacyächimashcanqui. Unaypita-pacha mana yamacällar, yanapaycämanqui. ⁶ Chayta rurar cawanayquipaj Tayta Diosninch camacächisha. Chaynuypis jishpichishunayqui-raycur Washäcuj Jesús cutimuman junajcaman yanapäshunquipaj. ⁷ Jamcunata llapan shungüwan llaquij. Imaypis yarparaycäshayquim. Llaquipämashpan Tayta Diosninch cačhacamasha. Chaymi Jesúspa alli willapanta willapäcur puriptipis, auturdäcunapa ñaupančhu chapacuptipis, carsilčhu wičgarächimaptipis mana jungamanquichu. Mana cačharimanquichu.

⁸ Llaquishajta Tayta Diosninchipis musyan. Washäcuj Jesús alli ricamashanchi-jina jamcunatapis alli ricaj. ⁹ Chaymi Tayta Diosninchita mañacapü: «Taytallau Tayta, Filipos marca irmänucunata yanapaycullay. Llaquinacuya sumaj yačhacunman. Shimiquita sumaj tantiyacunman. Shunguyqui munashannuy cawanman. ¹⁰ Ima captinsi, imaman čhayaptinsi, manchapacullar cawanman. Maquiquičhu cawar, juchata mana aparicunmanchu. Chaynuy cawar Washäcuj Jesús cutimuptin, pipis mana tumpanganachu: «Filipos irmänucuna jucha-sapa» nir. ¹¹ Washäcuj Jesús yanapaptin, cuyay-munaypaj cawanga. Alli cawaptin, llapan runa alli ñawinpa ricashunquipaj. Alličhu jurgushunquipaj» nir.

Washäcuj Jesús cawachicuj cashan

¹²⁻¹³ Irmänucuna, carsilman chayaptisi, Washäcu Jesúspa alli willapanta willacushäta llapan runa mayasha. Rimay puriptin, mandajta täpaj murucucunapis, llapan pampa runacunapis mayasha. ¹⁴ Carsilarashäta mayar irmänunchicuna llapan-yupay shacyäcur, Tayta Diosninchiman sumaj yupachicun. Mana manchacullarna may-chaychüpis Washäcu Jesúspa shiminta willacurcaycan.

¹⁵ Waquin irmänucuna nuwata apärimar, Washäcu Jesúspa shiminta willacuycan. Waquinmi ichanga alli shungu car willacäshiman. ¹⁶ Alli shungucuna llaquipämashpan willacäshiman: «Jesúspa alli willapanta willacushan-janan wičhgachisha» nir. ¹⁷ Waquinmi ichanga llallipamayta munallar, allíchu llucshiyta munallar, Washäcuja shiminta willacurcaycan. Llaquish wičhgaraycaptisi, jagayächimayta munarcaycan.

¹⁸ Imata ruracuptinsi, mana llaquicüchu. Janan shungulla willacurpis, llapan shungunwan willacurpis, Washäcuja shiminta willacurcaycan. Chaypita shungüpis achicyacäcusha. Sumaj-sumaj cushicü. ¹⁹ Ima allish Tayta Diosninchita mañacapaycämanqui. Espíritu Santu shacyächimaptin carsiléchu caycarsi, allíchu llucshishaj. ²⁰ Pingayman churamänantapis mana camacächingachu. Manchäga imaypis alli ricamashan-jina cawarpis, wañurpis, llapan ricay Washäcu Jesústa allíchu jurgushaj. ²¹ Nuwaga Washäcu Jesúspa maquinchümi cawä. Pay-janan runacuna wañuchimaptin, alli cawayta tarishaj. ²² Cay pachaéhu cawashäcaman may-chaychüpis Tayta Diosninchipa shiminta willacunä. Ichanga ishcayta yarpaycä. ²³ Ishcayta yarpashäpis alli. Wañurga, Washäcu Jesúspa ñaupanman chayashaj. Paywan tincuyta sumaj munä. ²⁴ Jamcuna-raycur cawaptipis, alli canga. ²⁵ Chayta musyar, jamcunawan juturayta munä. Shacyächishayqui Tayta Diosninchiman sumaj yupachicur cushishalla cawanayquipaj. ²⁶ Cutimupti shunguyqui achicyacäcupin, Washäcu Jesústa allíchu jurgunquipaj.

Washäcu Jesúspa shimin nishannuylla cawananchipaj

²⁷ Irmänucuna, carsilpita cačharimaptinpis, mana cačharimaptinpis, Washäcu Jesúspa alli willapanta wiycärinquiman. Juc shungulla cawanquiman. Ima-imata ruranayquipäpis sumajraj parlanacunquiman. Maqui-maquilla Tayta Diosninchipa shiminta sumaj willapäcunquiman. ²⁸ Chiquicujcunata ama manchacunquichu. Mana manchacunayquipaj Tayta Diosninchishi shacyächishuptiqui, ñacayman aywananta tantiyacunga. Jamcunamat ichanga Tayta Diosninchishi washäshunquipaj. ²⁹ Paymi Washäcu Jesúzman yu-pachicunayquipäpis, Jesús-janan ñacanayquipäpis camacächisha. ³⁰ Washäcu Jesúzman yu-pachicuptinchi, runacuna ñacaycächimanchi. Ñaupatapis ñacashäta willarajnam. Cananpis jinalla ñacashäta musyanqui.

2

Washäcu Jesústa ricacushun

¹ Washäcu Jesúsmi ichanga shacyächimanchi. Llaquipämaptinchi, mana manchacunchinachu. Espíritu Santu shacyächimaptinchi, juc shungulla cawaycanchi. Llaquipänacur, alli ñawinchiwan ricanacunchi. ² Chaymi cushish cawanäpaj allíchu jurgamanquiman. Juc shungulla cawanquiman. Sumaj llaquipänacunquiman. Tayta Diosninchita manchapacur cawanquiman. ³ Pampaman churanacullar imatapis ama ruranquichu. Ama apärinacunquichu. Ama alli-tucunquichu. Pitapis ama pampaman churanquichu. Manchäga alli ñawiquiwan ricanacunquiman. ⁴ Quiquillayquipaj imatapis ama ashinquichu. Manchäga llaquinacärir-llaquinacärir cawanquiman.

⁵ Llapanchipis Washäcu Jesúzman yupachicur, llupillanpa aywashun.

⁶ Payga quiquin Tayta Diosninchchi cashpan
mana allíchu llucshiytachu ashiran.

⁷ Manchäga munayniyuj cayninta jaguiycuran mandu-ruraj cananpaj,
pampa runa cayman chayanapaj.

8 Runa cashpan Tayta Diosninchipa shiminta sumaj wiyacuran.

Runacuna pingayman churaptinsi,
ruschu wañuchiptinsi, wiyacuran.

9 Chaypis munayniyuj cayman Tayta Diosninchi churaran.

Payman pipis mana tincunchu.

10 Canan llapan runa Jesústa allíchu jurgunga.

Janaj pachačhu cawajcunapis, cay pachačhu runacunapis,
wañushcunapis allíchu jurgunga.

11 Llapan auninga:

«Tayta Diosninchi alli ricash caycullächun.

Payga Washäcu Jesústa cačhamuran.

Jesúspa maquinčüna cawaycanchi.

Payga Tayta Diosninchim» nir.

12 Wawallau, wiyacujmi canqui. Jishpichish caycäshuptiqui, llapan shunguyquiwan Tayta Diosninchipa shiminta wiyacunquiman. Iwal juyaptinchisi, caručhu captisi, Tayta Diosninchipa shiminta wiyacärinquiman. **13** Shungun munashanta rurananchipaj quiquin Tayta Diosninchi shacyaycächimanchi. Payta manchapacur cawananchipäpis quiquin yanapaycämanchi.

14 Mayganiquipis ama jamurpänacunquichu. Ama jayapänacunquichu. **15** Chaura pipis mana jurgapäshunquichu: «Juchačhu arun» nir. Llapan runa juchata aparicullar cawaptinsi, Tayta Diosninchipa wawan caycar, manchapacur cawashun. Llapan ricacunanpaj alli cawashun. **16** Chayraj waquin runapis Tayta Diosninchiman yupačicunga. Chaymi Tayta Diosninchipa shiminta ama jungashunchu. Washäcu Jesú cutimuptin, cushicushaj: «Allipämi willapashcä» nir. **17-18** Shiminta wiyacuptiqui, shungun munashanta ruraptiqui, Tayta Diosninchipa shungunpis jatunpa cushicunga. Nuwatapis willacushä-janan runa wañuchimaptinsi, ama llaquicunquichu. Manchäga Tayta Diosninchipa shungun munashallanta rurar, llapanchi cushi-cushilla cawashuwan.

Pablo cačhacushancuna

19 Alli cawashayquita musyar, jatunpa cushicushaj. Chaymi imanuy cawashayquita musyayta munar, irmänunchi Timoteuta cačhamushaj; ichanga Tayta Jesú camacächiptinraj. **20** Timoteuwan sumaj yačhänacü. Jamcunatapis mana jungashunquichu. **21** Waquin runam ichanga quiquillan allíchu llucshiyta ashin. Washäcu Jesú yarpashanta mana imasi jucunchu. **22** Timoteo alli shungu cashanta musyanqui. Jesúspa alli willapanta willapäcupü, purishillamasha. Wawä-yupay imačhüpis yanapämasha. **23** Carsilpita llucshinätapis, mana llucshinätapis musyarir, juclla Timoteuta cačhamushaj. **24** Chaypis sumaj Tayta Diosninchiman yupachicü. Carsilpita cačharimaptin, quiquirämi ricashayqui.

25-26 Irmänucuna, ima allish Epafrodituwan imasi pishümajcunata apachillämushcanqui. Payga sumaj yanapämasha. Shungümanpis tincusha. Cananga imanuy cawashantapis musyanayquipaj cačhaycämü. Epafrodituwan imasi llaquipäshunqui. Chaymi: «Jishya charimashanta mayar, Filipos irmänucuna llaquicuycančhi» nir cutimuya munaycan.

27 Rasunpa jishya sumaj charisha. Tayta Diosninchim ichanga llaquipar allchacächisha. Alläpa llaquicunäpita wañunantapis mana camacächishachu. **28** Chaymi jamcunapis Epafrodituta ricar, cushicunayquipaj cačhaycämü. Shunguyqui cushüriptin, nuwapis jatunpa cushicushaj. **29** Chayamuptin, alli ricanqui. Cutimunanpaj Tayta Diosninchim camacächisha. Chaymi paytapis, waquin willacujcunatapis allíchu jurgushuwan.

30 Epafrodituwan imasi jishya chariptinsi, shiminta mana chapacushachu. Jamcuna mana camäpacuptiqui, nuwatapis wañuy-cawaymi ricamasha. Llapantapis rurasha Washäcu Jesúspa shiminta willacurmi.

3

¹ Irmänucuna, llapaniquita llaquij. Ima captinpis, Tayta Diosninchipa maquinchhu cawar, shacya-shacyalla cawanquiman.

Moiséspa shiminta ĉarcuya munajcunata piñapashan

Mayna cartacamush carsi, yarpächipaycäshayqui sumaj tantiyacunayquipaj. ² Pantachicuj Israel runacunapa shiminta ama ĉhasquipanquichu. Paycuna: «Moiséspa shiminta ĉarcushäpitam alli ñawinwan Tayta Diosninchchi ricaman» nir jírucurcaycan. ³ Chaypis alli ñawinwan Tayta Diosninchchi ricamanchi shiminta wiycushallanchipita, Washäcu Jesústa taytachacushallanchipita. Mana jananchita jírucushanchipitachu alli ñawinwan ricamanchi. Manchäga Espíritu Santu shacyächimaptinchi, Washäcu Jesústa allíchu jurgushallanchipita alli ñawinpa ricamanchi. ⁴ Alli cashäta jurgapayta munapti, pipis mana aypämanmanchu. ⁵ Israel casta capti, pusaj junajyuillata jírumaran. Benjamínpa willcanmi caycä. Llapan auquillúcuna Israel runa caran. Moiséspa shiminta ĉarcuya munar, fariseu runacunaman jillicurä. ⁶ Allíchu llucshiyta munar, Jesústa ĉasquicuj irmänucunata jaticačhar ushyarä. Moiséspa shimintapis llap-llapanta ĉharcurä. ⁷ Ñaupata yačhaj cashalläman yupachicurä. Cananmi ichanga Washäcu Jesúzman yupachicü. ⁸ Yačhaj carpis, cushicuya cushicurä. Quiquin Tayta Jesucristuwan yačhänacurmi ichanga, sumaj-sumaj cushicü. Cushicushäga imawanpis mana tincunchu. Unay Tayta Diosninchwan alli ricanacuya munar, Moiséspa shiminta llap-llapanta ĉharcurä. ⁹ Chaypis cananraj rasun-cajta tantiyacushcä. Washäcu Jesúzman yupachicuptiraj, alli ñawinwan Tayta Diosninchchi ricaman; mana Moiséspa shiminta ĉarcushäpitachu. Chaymi Washäcu Jesúspa maquinchüna cawä. ¹⁰⁻¹¹ Runa Washäcu Jesústa ñacachiptinsi, wañuchiptinsi, Tayta Diosninchchi cawarachimusha. Nuwata ñacachimaptinsi, wañuchimaptinsi, Jesús-jina ĉasquicushaj. Wañushcuna cawarimuptin, Tayta Diosninchchi cawarachimänantapis yupachicü. Chaynuupa Washäcu Jesúzman sumaj yačhänacushaj.

¹² Irmänucuna, mana alli-tucuycächu: «Jesúzman tincü. Juchaynajna caycä» nir. Manchäga Washäcu Jesúzman yupachicuycä. Llupinpa puriycä. Cawashannuy cawaycä. Maquinchüna puriycächiman. ¹³ Irmänucuna, quiquilläpita mana Jesúspa llupinpa sumaj-sumaj puriymanchu. Chaymi llapantapis jipaman jaguiycur, ¹⁴ payllamanna yupachicü. Janaj pachamanpis Tayta Diosninchchi ĉayachimäshunpaj. Washäcu Jesúzman yupachicushanchipita alli cawayman ĉuramäshunpaj.

¹⁵ Tayta Diosninchipa maquinchhu cawaycar, shungunchi munashanta ama rurashuwanchu, Manchäga Jesúsmanna yupachicushuwan. Apaycačhänacuptinchisi, llapanta tantiyachimäshunpaj. ¹⁶ Ima captinpis, Tayta Diosninchipa shiminta sumaj wiycushuwan.

¹⁷ Irmänucuna, imanuy cawashätapis sumaj ricacamanquiman. Wiyacuj irmänunchicunatapis ricacunquiman. ¹⁸ Chiqui runacunapita mayna willapashcaj. Paycuna Washäcu Jesústa pampaman ĉuran. Washämänanchi-raycur rusčhu wañuyman ĉayash caycaptinsi, chiquin. Chaymi canan wiguipawanraj yapay yarpärachij. ¹⁹ Paycuna juchata aparicullar cawan. Pačhallanta ashin. Juchata rurarpis, asicačharaj cawan. Mana pingacunchu. Imayllapis juchata aparicushanpita ushyacayman ĉayangapaj. ²⁰ Nuwanchim ichanga Tayta Diosninchipa wawan caycanchi. Janaj pachaman Washäcu Jesúshuntacamänallanchita shuyarpaycanchi. ²¹ Payga wañuj cashanchipita mana imaysi wañunanchipäna camacächinga. Llap-llapantapis ruranga munayniyuj cashpan quiquin-niraj cawananchipaj.

4

¹ Chaymi wawallau, allíchu jurgamashayquipita jatunpa cushicü. Llapaniquta llaquij. Sumajmi watucuya munä. Jamcunapita Tayta Diosninchipis alli ñawinwan

ricaycäman. Wawallau, chaymi shungun munashannuy cawashayqui-jina mana yamacällar Washäcu Jesúspa maquillančhu cawanquiman.

² Washäcu man yupachicushpan mama Evodiapis, mama Síntiquipis ama apayačhänačuchunchu. ³ Paycuna Clemente-ima, waquinirmänunchi-ima sumaj yanapämäran Jesúspa alli willapanta willapäcupü. Chaymi alli ricanacunapaj sumaj yanapanquiman. Paycunata Tayta Diosninchchi ricsiraycan. Maquinčhu imaycamanpis cawan-gapaj. Acta librunkhu jutincunapis isquirbiraycan.

Irmänucuna cushicunan

⁴ Chaymi Tayta Diosninchipa maquinčhu cawaycar, imaypis cushishalla cawanquiman. Ama llaquicunquimanchu. ⁵ Pi-maytapis llaquipanquiman. Washäcu Jesú warasi-chicasi cutimungapäna.

⁶ Ima captinpis, alläpa ama yarpačhacunquichu. Pishipacur-imarga, Tayta Diosninchita mañacunqui. Imallata tarichishuptiquipis, cushishalla čhasquicärinqui.

⁷ Washäcu Jesúspa maquinčhu cawar payllaman yupachicur, Tayta Diosninchchi allilla cawaycächishunquipaj. Shunguyqui jasillaman čhayashantapis tantiyayta mana atipanquipächu.

⁸ Irmänucuna, sumaj yarpačhacushun. Tayta Diosninchipa shungun munashanuya cawashun. Alli shungu cashan-jina cuyay-munapaj cawashun. Shunguman tincushallanta imatapis rurashun. Camacächishannuya purishun. Alli ñawinwan ricamashanchi-jina runa-masinchipapis alli ricashun. Ricay ñawinčhpis manchapacular cawashun. Imaypis runa-masinchipa ricay ñawinčhu allillata rurashun. Chaynu cawaptinchi, runacunapis alliman čhuramäshun.

⁹ Willapashajta, tantiyachishajta ama junganquichu. Ricamashayquita ruraptiqui, willapashajta wiyacuptiqui, llaquipäcu Tayta Diosninchispis mana cačharishunquipächu. Manchäga maquinčhüna allilla cawachishunquipaj.

Pablo cushicushan

¹⁰ Irmänucuna, ima allish yarpäramashcanqui. Tayta Diosninchchi camacächiptin, yanapämashcanqui. Naupata yanapämaya mana camäpacushcanquichu. Cananmi ichanga mana jungamashayquita musyä. ¹¹ Mana pishipacurchu rimaycä. Taripacushalläwan cawayta yačhacashcänam. ¹² Puchuy-puchuyčhu cawaytapis, pishipacuyčhu cawaytapis yačhacashcä. Micuy janančhu cawaytapis, yargayčhu cawaytapis yačhacashcä. ¹³ Washäcu Jesú shacyächimaptin, llapantapis ičhipü. ¹⁴ Chaypis pishipacupti yanapämämar, allita rurashcanqui.

¹⁵ Tayta Diosninchipa shiminta willacur Macedonia quinranpita aywacupti, jamicunalla yanapämashcanqui. Waquin marcačhu jutucaj irmänucunam ichanga mana ricamashachu. Imallawanpis mana yanapämashachu. ¹⁶ Tesalónica marca quinrančhu willacur puripti, pishipacurä. Chaypis mana pipis yanapämashchu. Jamcunam ichanga ishcay-quimsa cuti apachillämushcanqui. ¹⁷ Cananpis mana yapay apachimunayquita monarchu rimaycä; manchäga yanapämashayquipita Tayta Diosninchchi sumaj yanapäshunayquita munar. ¹⁸ Nuwa llapanta sumaj ricaycä. Imapis mana pishiňmanchu. Ima allish Epafradituwan apachillämushcanqui. Cananga imapis mana pishiňmanganachu. Apachimushayquita quiquinta jarashayquita-yupay Tayta Diosninchchi cushishalla čhasquisha. ¹⁹ Washäcu Jesú washämänanchi-raycur jamicunatapis Tayta Diosninchchi sumaj tarichishunquipaj. Payga munayniyuj. Llapanchi maquinčhu cawaycanchi. ²⁰ Chaymi Tayta Diosninchita imaycamanpis alliman čhurayculläshun. Allilla ricayculläshun. Chaynu cayculläshun.

Cartapa ushyanan

21-22 Irmänunchicunata llapantam wamayapämäy, ari. Paycunapis Washäcuj Jesúsman sumaj yupachicun. Purishimaj irmänunchicunapis llapanmi wamayäshunqui. Roma mandajpa wasinčhu aruj irmänunchicunapis wamayäshunqui.

23 Washäcuj Jesús llapaniquita yanapayculläshunqui, ari. Chayllana.

Colosas marcačhu irmäncunaman San Pablo cartacushan

Tantiyacunanchipaj:

Pablo cay cartata isquirbiran Colosas marcačhu jutucaj irmänuncunaman. Colosas marca Asia quinrančhu caycaran. Éfeso marcapita quimsa junajta-imá chaquillapa aywaj. Chay marca jäpa runapa marcan captinsi, Israel runacunapis tiyaycaran. Jesúspa shiminta wiashpan waquin chasquicuran. Epafraspis Jesúspita sumaj tantiyachicuran. Payga jinan runa caran.

Colosas irmänuncuna Jesúzman yupachicushan wican cushish jutucaran. Jipatam ichanga waquin Israel runacunapis, jäpa runacunapis llutanta yačhachiran. Chaymi Pabluta tapucuj Epafras aywaran. Shiminta wiyar, Colosas irmänuncunaman cartacuran.

Pablo isquirbiran:

Colosas irmänuncunata allíchu jurgushanpita: *Colosenses 1.1-8.*

Washäcu Jesús Tayta Diosninchipa Wawan cashanpita, Jesúswan Tayta Diosninch quiquisllan cashanpita, cay pachatapis janaj pachatapis camashanpita, maquinčhu llapan caycashanpita. Chaynuypis Colosas runacunata llaquipashpan Tayta Diosninch wamrachacushanpita, Jesúspa alli willapanta willapäcunapaj Pabluta cačhacushanpita: *Colosenses 1.9-2.5.*

Washäcu Jesúsman yupachicur Tayta Diosninchipa wawan car, shungun munashannuy cawanapita, pantachicujcunata mana wiycunapita: *Colosenses 2.6-23.*

Tayta Diosninchipa wawancuna juchata mana aparicunapita, llaquipänacunapita: *Colosenses 3.1-4.6.*

Wamayashanpita: *Colosenses 4.7-18.*

Pablo wamayashan

¹⁻² Colosas marcačhu jutucaj irmänuncuna, nuwa Pablo, Timoteuwan-imá cartacallämü. Washäcu Jesúsman yupachicuptiqui, llapaniquita wamayämuj. Allilla cawanayquipaj imačüpis quiquin Tayta Diosninch yanapayculläshunqui. Llaquipayculläshunqui. Shungun munaptin, shiminta willacur purinäpaj nuwata cačhacamasha.

Tayta Diosninchita alliman čhurashan

³⁻⁵ Jamcunata mana jungajchu. Chaymi imaypis Taytanchi Jesucristupa Taytanta mañacur, jamcunapäpis mañacuycä: «Taytallau Tayta, Colosas marcačhu irmänuncunata yanapaycullay, ari» nir.

Irmänuncuna, Washäcu Jesúsman yupachicushayquipita, irmänu-masinchicunata alli ñawiquiwan ricashayquipita sumaj cushicü. Chaynuy cawaycanqui janaj pachačhu Tayta Diosninchipa maquinčhu imaycamanpis cawayta yupachicur. Tayta Diosninchipa shiminta wiashayquipita yupachicuycanqui. Paypa shiminga alli willapam. ⁶ Tayta Diosninchipa alli willapanta chay-tucuyčhu willacuptin, runacuna yupachicurcaycan. Paypa shungun munashannuy cawarcaycan. Jamcunapis paypa shiminta wiyar: «Tayta Diosninch rasunpa llaquipämanchi» nir chasquicurayqui. ⁷ Llapantapis yačhänacushanchi irmänu Epafrasmi sumaj tantiyachishurayqui. Payga Washäcu Jesúspa maquinčhu purir, nuwatapis sumaj yanapämasha. ⁸ Espíritu Santu yanapäshuptiqui, llaquinacärishayquitapis willamasha.

⁹ Alli cawashayquita wiyar, mana jamallar Tayta Diosninchita mañacushcä: «Colosas marcačhu irmänuncunata Espíritu Santuwan yanapaycullay yarpashayquita sumaj tantiyacunapaj, shunguyqui munashanta sumaj rurananpaj» nir.

¹⁰ Pay yanapämaptinchiga, shungun munashannuy cawashunpaj. Manchapacur

juyäshunpaj. Shungun yarpashantapis tantiyacushunpaj. ¹¹ Paymi sumaj munayniuj yanapämänanchipaj, shacyächimänanchipaj. Chaymi ñacay chayapamaptinchisi, runa jagayächimaptinchisi, Tayta Diosninchita cushish mañacushuwan. ¹² Payllata alliman churar cawashun. Payga alli ñawinwan ricamashpanchi wamrachacamashcanchi. Janaj pachačhu alli cawaymanpis churamäshunpaj. ¹³ Supaypa maquinpita jishpichimashcanchi. Jinarcur Wawan Jesúspa maquinman churamashcanchi. ¹⁴ Paymi jucha aparicuypita jishpichimashcanchi. Llapan jucha aparicushanchita Tayta Diosninchchi jungananpäis nuwanchi-raycur wañusha.

Washäcuj Jesúzman pipis mana tincushan

¹⁵ Quiquin Tayta Diosninchita mana ricanchichu.

Wawan Jesústa ricarmi ichanga, Tayta Diosninchipa shungun imanuy cashantapis sumaj tantiyacunchi.

Jesúswan Tayta Diosninchchi quiquisllan.

Payman imasi mana tincunchu.

Imatapis mana camallarraj, Tayta Diosninchchi ricsichicusha.

¹⁶ Jesúspa ricay ñawinčhu llap-llapantapis camasha.

Washäcuj Jesú-imá Tayta Diosninchchi cay pachatapis, janaj pachatapis camasha.

Ricashanchitapis, mana ricashanchitapis camasha.

Munayniuj anjilcunatapis camasha.

Llapanta maquinčhu purichinanpaj Washäcuj Jesú-imá camasha.

Chaymi Jesústa llapanchi alliman churashun.

¹⁷ Chaura mana imasi caycaptillan, Jesú cawaycaran.

Paymi Tayta Diosninchchi camashanta llapantapis maquinčhu purichin.

¹⁸ Jutucay irmänucunapis maquinčhu cawanchi.

Tayta Diosninchchi cawarachimushanpita-pacha maquinčhu charämanchi.

Payman mana pipis tincunchu.

¹⁹ Chaymi Tayta Diosninchchi shungun imanuy cashantapis Washäcuj Jesúswan sumaj musyachimanchi.

²⁰ Washäcuj Jesúspita Tayta Diosninchchi llapan camashancunatapis alli ñawinwan rican.

Nuwanchi-raycur rusčhu wañushanpita alli ñawinwan rican janaj pachačhu-cajcunatapis, cay pachačhu-cajcunatapis.

²¹ Unaya Tayta Diosninchita mana wiyacurayquichu. Payta ticrapur, juchata aparicullar cawarayqui. ²² Chaypis Washäcuj Jesú nuwanchi-raycur wañushanpita Tayta Diosninchipa shungunman tincunchi. Llapantapis rurasha ricay ñawinčhu juchaynajta ricamänanchipaj. ²³ Ricay ñawinčhu alli cawananchipaj llapan shungunchiwan Jesúzman yupachicushuwan. Alli willapanta wiyacushuwan. Ama yamacäshunchu. Alli willapanta may-chayčüpis willacurcaycan. Nuwapis willacuyca.

²⁴ Tayta Diosninchipa shiminta jamcunata willapashä-janan ñacachimaptinsi, cushicü: «Washäcuj Jesústa ñacachishan-jina runacuna wičgarächimasha jutucay irmänunchicunata willapashäpita» nir. ²⁵ Jamcunata llaquipar, Tayta Diosninchchi churamasha shiminta willacur purinäpaj. Chaymi llapan irmänunchicunata mayčhu juturaptinpis, Tayta Diosninchipa shiminta sumaj tantiyacunanpaj yanapä. ²⁶ Shungun yarpashanta canancaman Tayta Diosninchchi mana musyachicushachu. Yupachicuptinchim ichanga, musyaycächimanchi. ²⁷ Camacächishanga sumaj-sumaj alli captin, tantiyayta mana atipanchichu. Chaypis llapan runata llaquipar, nuwanchi-raycur wañunananpaj Washäcuj Jesústa cačhamusha. Payga maquinčhu purichimanchi. Tayta Diosninchipa ñaupanmanpis chayachimäshunpaj.

²⁸ Nuwacuna Washäcu Jesúspa shiminta willapäcü. Pí-maytapis piñapä juchata mana aparicullar cawananpaj. Alli shimilläpa yačhachipis Washäcu Jesúspa shungun munashannuy cawananpaj. ²⁹ Chaymi shiminta llapan runa wiyanan-raycur llapan shungüwan willapaycä. Willapänäpaj Washäcu Jesúsumaj shacyächiman.

2

¹ Sumaj llaquishajta jamcuna musyanqui. Mana jungallar jamcunapäpis, Laodicea marcačhu irmänunchicunapäpis, mana ricsimaj irmänunchicunapäpis Tayta Diosninchita mañacapucä. ² Shacyächishunayquita munä. Alli ricanacur juc shungulla cawashpayqui Tayta Diosninchita yarpashanta wiycunayquipäpis, Washäcu Jesúspi cashanta sumaj tantiyacunayquipäpis mañacü. Paytaga Tayta Diosninchita ricsichimashcanchi. ³ Washäcu Jesúsnra Tayta Diosninchipa shungun yarpashanta tantiyachimäshun. ⁴ Chaymi pipis mana pantachishunayquipaj llapantapis willapaycaj. Pantachicucuna cushichipayllapa imatapis riman. ⁵ Caručhu caycarpis, mana ricarpis, llapaniquipaj yarpačhacuycä. Chaymi Tayta Diosninchita manchapacur cawaptiquipis, Washäcu Jesústa wiyacuptiquipis, jatunpa cushicü.

Taytanchi Jesúspa shungunman tincushanta rurashun

⁶ Washäcu Jesústa taytachacushcanchi. Chaymi shungun munashanta rurashun. ⁷ Shiminta wiyashanchi-jina sumaj yupachicushun. Payman tanacushun. Sumaj wiyacushun. Imay-imaypis Tayta Diosnillanchita alliman čhurashun.

⁸ Sumaj wiyacunqui. Pantachicucunapa shiminta ama čhasquipanquichu. Paycuna mana Washäcu Jesúspa shimintachu willacun. Manchäga llutanta riman. Yačhajtucurpis, runa yarpashallanta riman. Jircacunaman yupachicun. ⁹ Nuwanchipämi ichanga Washäcu Jesúsu quiquin Tayta Diosninchita. ¹⁰ Paypa maquinčhu caycan llapan munayniujcunapis. Nuwanchitapis maquinčhu charämanchi. Imaysi mana cačcharimäshunchu.

Ushyachicuypita, cawarimuyypita tantiyachicushan

¹¹ Unayga Israel runacuna Tayta Diosninchipa maquinčhu cawar, jirucuj. Nuwanchim ichanga Washäcu Jesúsmán yupachicushanchipita Tayta Diosninchipa maquinčhu cawanchi. Cananga mana: «Jucha-sapa canqui» nimanchichu. Manchäga Jesú-raycur: «Juchaynaj canqui» nir alli ñawinwan ricamanchi. ¹² Juchanchi-janan Jesúsa waňuyman čhayashantapis, ayanta pampashanta musyanchi. Tayta Diosninchim ichanga cawarachimusha. Chaymi llupinpa aywar juchanchipita wanacur, yacuwan ushyacunchi. Chaura juchaynajta-jina Tayta Diosninchipa ricay ñawinčhu cawashcanchi. Chaymi Tayta Diosninchita mana jirucushta-jina, jäpa runata-jina ricashcashunqui. Cananmi ichanga Washäcu Jesú-raycur Tayta Diosninchita llapanchita allina ricamanchi. Llapan juchanchitapis jungasha. ¹⁴ Unayga Moiséwan Tayta Diosninchita shiminta musyachicuran. Pipis shiminta sumaj-sumaj mana čharcuptin, ñacayman čhayanan caran. Jesúsmi ichanga washämänanchi-raycur rusčhu waňuyman čhayasha. Chaypita juchanchi ushyaraycan. ¹⁵ Unayga jircacuna maquichacamashcanchi. Tayta Diosninchim ichanga quiquinpa maquinčhu purichimänanchipaj llapan jircacunatapis, supaycunatapis ičhipusha. Llapanpa ricay ñawinčhu pingayman čhurasha Jesúwashämaptinchi.

Pampaman mana čhuranacunapaj willapashan

¹⁶ Washash caycaptinchi, pipis mana jitapamäshuwanchu: «Juchata aparicuycanqui» nir imatapis micushanchi-janan, upushanchi-janan, fiestata rurashanchi-janan, diyawardacuna-janan. ¹⁷ Chay rurashanchicuna ushyacajlla. Chaypis Washäcu Jesúcamacächinanta musyaycächiran. Payman yupachicuptinchi, Tayta Diosninchira rasunpa allina ricamanchi. ¹⁸ Waquin runa alli shungu-tucur, anjilcunatapis taytachacun:

«Ricaripamasha» nir. Alli-tucujcunaga umallanpita imatapis jurgun. Paycunata ama manchapacushuwanchu. ¹⁹ Chay-niraj runacuna Washäcu Jesústa mana taytachacunchu. Washäcuja llapan yupachicujcunata yanapan shiminta sumaj tantiyacu-nanchipaj, jucninchu-jucninchipis alli ricanacunanchipaj, Tayta Diosninchipa shungun munashallanta rurananchipaj.

²⁰ Cananga jircacunata ama manchapacushunchu. Mana maquinchüchu cawanchi. Manchäga nuwanchi-raycur wañushanpita-pacha Washäcu Jesúspa maquinchüchu cawanchi. Paypa maquinchüchu cawaycarga, pantachicujcunapa shimintapis ama chasquipäshuwanchu. ²¹ Paycuna Tayta Diosninchu alli ricananta yarpar, ricsish-ricsishllata imatapis charan. Ricsish micuytapis micun. Ricsish imacunallatapis yatan. ²² Runacuna umallanpita jurgushanga watanmaylla jungacäcun. ²³ Runa yarpashanpis allitaga allim. Waquinta allillata ruran. Allíchu llucshiyta munar, ñacayta ashin. Chaypis juchallačhu arun. Quiquincunalla alli-tucun. Mana Tayta Diosninchitachu alliman churan.

3

Washäcu Jesústa ricacushun

¹ Nuwanchitam ichanga Washäcu Jesú alli cawayta tarichimashcanchi. Chaymi Washäcuñinchi Jesú cawashan-jina cawashun. Payta janaj pachaman shuntacur Tayta Diosninchu allíchu jurgusha. Munayniuj cananpaj churasha. ² Nuwanchipis Tayta Diosninchipa shungun munashallanta imatapis rurashawan. Juchatapis ama apari-cushunchu. ³ Shungunchi munashallanta mana ashinchinachu. Manchäga Washäcu Jesúspa maquinchüna Tayta Diosninchu purichimanchi. ⁴ Chaymi Jesú cutimur, llapanpa ricay ñawinchü janaj pachaman pushacamäshunpaj. Chaychu achic-achicyaycar imaycamanpis cawashunpaj.

⁵ Chaura shungunchi munashanta ama rurashunnachu. Majallayquiwan cacun-quiman. Jucwan-jucwan ama cacunquichu. Warmi-pačha, runa-pačha ama can-quichu. Marca-pingay ama cawanquichu. Imatapis ama munapanquichu. Mallaj ama canquichu. Mallajcunaga jillaryman yupachicur, Tayta Diosninchitapis jungay-cun. ⁶ Chay-niraj juchačhu arujcuna-jina ama cawashunchu. Mana wiwaycunata ullgüpar, Tayta Diosninchu ñacachingapaj. ⁷ Unayga Tayta Diosninchita mana wiwaycur, paycunapa llupinpa purishcanqui. ⁸ Tayta Diosninchipa shiminta wiwaycarga, ama jagayächinacunquichu. Ama piñanacunquichu. Ama ticshaparänacunquichu. Ama jayapänacunquichu. Ama ashllinacunquichu. ⁹ Juchačhu cawashayqui-jina ama llullapänacunquichu. ¹⁰ Cananga juchaynajta Tayta Diosninchu ricamanchi. Shungun munashanta rurananchipäpis, shungunman tincunanchipäpis yanapaycämanci. ¹¹ Payga mana ricayninchipitachu alli ricamanchi. Mana imananchu Israel runa captinchisi, jäpa runa captinchisi, chakra runa captinchisi, chunchu captinchisi, puricuj piyun captinchisi, patrun captinchisi. Llapanchita alli ricamanchi Washäcu Jesúspa shiminta chasquicushallanchipita. Paypa maquinchümi llapanchipis cawanchi.

¹² Llaquipämashpanchi Tayta Diosninchu wamrachacamashcanchi. Chaymi llaquipänacushun. Wamayänacushun. Ama alli-tucushunchu. Ama warminquichu. Ama ullgunquichu. Imapitapis upällacushun. ¹³ Irmänunchicunawan tantiyanacushun. Imatapis alli shimillawan ushyacächishun. Juchanchita Tayta Diosninchu mayna jungasha. Chay-jina nuwanchipis irmänunchipa juchanta ama yarparashunchu. ¹⁴ Sumaj llaquinacushun. Llaquinacur, juc shungulla cawashun. ¹⁵ Washäcuja maquinchü chuwaycar, allilla juyäshun. Jaucalla cawananchipämi, juc shungulla cawananchipämi wamrachacamashcanchi. Chaymi imapitapis Tayta Diosninchita alliman churalläshun.

¹⁶ Washäcu Jesúspa shiminta wiwaycunqui, ari. Shunguyquiman chayaptin, Tayta Diosninchipa shiminta tantiyachinacunqui. Anyapänacunqui. Salmucunata cantar,

alabansacunata cantar, Tayta Diosninchita alliman ́churanqui. ¹⁷ Ima allish nuwanchiraycur Washäcuj Jesústa Tayta Diosninchca caćhamusha. Paypa maquinčhu cawar, shungun munashallanta rurashuwan. Payllapita rimashuwan.

Irmänucuna imanuy cawananpäpis tantiyachicushan

¹⁸ Irmänacuna, Tayta Jesúspa maquinčhu cawashayqui-janan majayquipa maquinčhpis cawanquiman.

¹⁹ Irmänucuna, warmiquita llaquinquiman. Nishayqui-nishayqui imatapis ama rrachinquimanchu.

²⁰ Wamracuna, mamayqui-taytayquita wiycunquiman. Wiycuptiqui, Tayta Diosninchipa shungunmanpis tincunqui.

²¹ Mama-taytacuna, wamrayquicunata ama jagayächinquimanchu. Jagayächiptiqui, llaquish cawanga.

²² Piyun arur purijcuna, sumaj wiycunquiman. Washäcuj Jesústa manchapacushayqui-jina patrunniquipa ricay ñawinčhu carpis, jucläčhu carpis, manchapacunquiman. Ricashunallayquipäga ama aruj-tucunquimanchu.

²³ Mandunta rurar, Jesúspa mandunta ruraycaj-jina shacya-shacyalla imatapis ruranquiman. ²⁴ Paypa shiminta wiycunchi. Chaymi shungun munashallannuy cawaptinchi aunishanta ́charcur, Taytanchi Jesucristu alli cawayman ́churamäshunpaj.

²⁵ Juchata aparicullar cawaptinchim ichanga, jucha aparicushanchiman-tupu Tayta Diosninchchi jurgapäshunquipaj. Payga jucha aparicujcunata mana chapangapächu.

4

¹ Piyunta mincacuj irmänucuna, mincayniquicunata alli ricanquiman. Jamcunapis Tayta Diosninchipa maquinčhu cawarcaycanqui. Payga llapanchita ricaycämachi.

Irmänucunata Pablo piñapashan

² Irmänucuna, llutalla ama cawacunquichu. Manchäga Tayta Diosninchita mañacur cawanquiman. Imaman ́chayaptiquisi, cusicärinquiman. ³ Washäcujpa shungun yarpashanta willapäcunäpaj nuwacunapäpis mañacunqui, ari. Jishpichimänanchipaj willacushäpita runacuna wićhgaraycächiman. ⁴ Llapan runata sumaj tantiyachinäpaj mañacunqui, ari.

⁵ Mana yupachicujcunapa ricay ñawinčhpis cuyay-munaypaj cawashun. Jäcurpis, mana jäcurpis, Tayta Diosninchipa shiminta willapäcunqui. ⁶ Pitapis mana nanächipällar willacunqui, ari. Imata tapushuptiquipis, alli shimillayquipa tantiyachinqui, ari.

Cartapa ushyanan

⁷ Imanuy cawashätapis willashunayquipaj yaćhänacushä irmänunchi Tíquicuta caćhayämü. Payga Washäcuj Jesúspa mandunta ruran. Washäcujpa shiminta willacuptipis, willacäshimasha. ⁸ Chaymi imanuy juyarcaycashäta willashunayquipäpis, sumaj shacyächishunayquipäpis caćhayämü. ⁹ Tíquicutawan-ima marca-masiqui Onésimutapis caćhayämü. Paycuna imanuy carcaycashätapis willashunquipaj. Onésimuwan sumaj yaćhänacü. Payga Tayta Diosninchita sumaj wiycun.

¹⁰ Carsilčhu wićhgaraj-masii Aristarcupis wamayäshunqui. Bernabípa yawar-masin Marcospis wamayäshunqui. Marcos imata rurashantapis musyanqui. Chaymi ́chayamuptin, alli ricanqui, ari. ¹¹ «Jesús» jutiyuj Justupis wamayäshunqui. Israel casta irmänunchicuna quimsajlla Tayta Diosninchipa shiminta willacupti, yanapämasha. Sumaj shacyächimasha. ¹² Marca-masiqui Epafraspis sumaj wamayäshunqui. Payga Washäcuj Jesúspa mandunta ruran. Jamcunapäpis Tayta Diosninchita mañacun: «Colosas irmänucunata yanapaycullay, ari. Yarpashayqui shungunman ́chayachun. Munashal-layquita rurachun» nir. ¹³ Epafras llaquishushayquita rinriwan wiyashcä. Laodicea

marcáchu, Hierápolis marcáchu irmänunchicunapis sumaj llaquishunqui. Mana jungashunquichu. ¹⁴ Yačhänacushä jampicuj Lucaspis, Demáspis sumaj wamayäshunqui.

¹⁵ Laodicea marcáchu jutucaj irmänunchicunatapis wamayapämánqui, ari. Irmäna Ninfatapis, wasinéhu jutucaj irmänucunatapis wamayapämánqui. ¹⁶ Cay cartata liguircur, Laodicea marcaman apachinqui jutucaj irmänucuna liguinanpaj. Laodicea marcaman apachishä cartatapis liguiniquiman. ¹⁷ Yupachicuj-masinchi Arquiputa piñapay: «Washäcuj Jesúspa maquinchú cawar, shiminta čharcunanchi» nir. ¹⁸ Quiquïna cay cartapa ushyananta isquirbiycämü. Llapaniquita sumaj wamaya. Carsilarashäta ama junganquichu, ari. Llapaniquitapis Tayta Diosninchi yanapayculläshunqui. Chayllana.

Tesalónica marcačhu irmä nucunaman San Pablo cartacushan 1

Tantiyacunanchipaj:

Pablo cay cartata isquirbiran Tesalónica marcačhu jutuaj irmänucunaman. Tesalónica marca Macedonia quinrančhu jatun marca caran. Chay marcačhu Pablo willapäcuptin, Israel runacunapis, jäpa runacunapis Jesúspa shiminta čhasquicuran. Tesalónica marcačhu Pablo willapäcushanpita musyayta munar, liguinqui: Hechos 17.1-15.

Tesalónica marcačhu Pablo willapäcuptin, waquin Israel-masincuna wañurachiyta munaran. Chaymi juc quillalla willapäcur juyaran. Chaypita juclä marcacunapa willapäcur aywacuran. Chaypis Tesalónica irmänucunata mana jungaranchu. Paycunaga ñacarsi, Jesúzman yupachicurshi cawarcaycaran. Chaynuy cawashanta watucujnuy shamur Timoteo willaran. Chaypitam cushicushpan Tesalónica irmänucunata shacyächinanpaj Pablo cartacuran.

Pablo isquirbiran:

Tesalónica irmänucunata allíchu jurgushanpita, runacuna ñacachiptinsi Jesúzman yupachicushanpita: *1 Tesalonicense 1.1-10.*

Quiquinta ñacachiptinpis, mana yamacällar willapäcushanpita: *1 Tesalonicense 2.1-3.13.*

Washäcuj Jesús cutimunanpita, Tayta Diosninchipa shungun munashannuylla cawananpita: *1 Tesalonicense 4.1-5.28.*

Pablo wamayashan

¹ Tesalónica marcačhu jutuaj irmänucuna, nuwa Pablo, Silvanuwan, Timoteuwanima cartacallämü. Tayta Diosninchipa maquinčhu, Tayta Jesucristupa maquinčhu cawashayquipita llapaniquita wamayämuj. Paycuna llaquipäshushpayqui yanapay-culläshunqui. Allilla cawaycachilläshunqui, ari.

Tayta Diosninchita alliman čhurashan

² Waran-waran Tayta Diosninchita mañacur, jamcunapäpis mañacurcaycä. Cushicur, mana yamacällar nü: ³ «Taytallau Tayta, ima allish Tesalónica irmänucunata yanapay-canqui. Paycuna llapan shungunwan yupachicushunqui. Runa-masintapis llaquipan. Mana yamacällar Taytanchi Jesucristutapis shuyarpaycan.»

⁴ Irmänucuna, Tayta Diosninchchi sumaj llaquipäshunqui. Maquinčhu cawanayquipäpis quiquin acracushcashunqui. ⁵ Jesúspa alli willapanta willapashcajna. Ichanga shimmilläpita shunguyquiman mana čhayashachu. Manchäga munayninwanraj Tayta Diosninchchi tantiyachishcashunqui. Espíritu Santupis shunguyquiman sumaj čhayachisha. Jananmanpis jamcuna-raycur ricay ñawiquíchu alli cawapäcushcä.

⁶ Chaymi Tayta Jesúspa shiminta čhasquicur alli cawashäta ricar, Jesúzmanpis, nuwacunamanpis ricacäramashcanqui. Jesúspa shiminta čhasquicushayquipita runacuna ñacachishuptiquisi, Espíritu Santu shacyächishcashunqui cushishalla cawanayquipaj.

⁷ Chaymi alli cawashayquita llapan irmänucuna musyan. Macedonia quinrančüpis, Acaya quinrančüpis jamcunaman ricacurcaycan. ⁸ Jamcunapita may-chayčüpis Tayta Jesúspa shiminta musyarcaycan. Ichanga mana Macedonia quinrallančüchu, mana Acaya quinrallančüchu, manchäga may-chay-tucuy marcacunačüpis musyarcaycan. Llapan musyan Tayta Diosninchiman yupachicur maquinčhu cawarcaycashayquita. Chaymi nuwacuna willapäcur purinä mana camacannachu. Yangallapačhi willapäshäpis. ⁹ Tayta Diosninchipa shiminta willapashajta llapan musyan. Payta wiယacur, jircacunatapis wasguipashcanqui. Mana manchapacunquinapishchu. Manchäga cawaj Tayta Diosninchimanna yupachicurcaycanqui. Payta manchapacur,

shungun munashannuy cawarcaycanqui. ¹⁰ Cananga Wawan Jesús janaj pachapita cutimunantapis shuyarpaycanqui. Jesústa wañushanpita Tayta Diosninchí cawarachimusha. Chaymi llapan runacunapa juchanta jurgapaptin, Jesús jishpichicamäshun.

2

Tesalónica marcačhu Pablo willacushan

¹ Irmänucuna, allipaj watucuj shamushäta musyanqui. ² Musyashayquinuypis Filipos marcačhu runacuna ashllir ushyamasha. Sumaj ñacachimasha. Ñacachimash captinsi, Tayta Diosninchiman yupachicur shiminta willapänä-raycur jamcunaman čhayamushcä. Marca-masiquicuna chapata ruramaptinsi, paypa alli willapanta willapashcaj.

³ Mana mishquichipallarchu riguichishcaj. Mana pantachicurchu willapashcaj. Yačhachirpis, mana llutantachu yačhachishcaj. ⁴ Shungüta Tayta Diosninchí musyapan. Payga shiminta willapäcunäpaj čhuramasha. Chaymi runacunata mana cushicachi-nalläpächu willapäcuycaj; manchäga Tayta Diosninchipa shungunman tincunanpaj. Payga llapan runapa shungunta musyapan.

⁵ Irmänucuna, mana jatun-tucushäta musyanqui. Mana jillay-raycullarchu willapäcushcä. Chaytaga Tayta Diosninchipis musyan. ⁶ Runacuna manchapacamar: «Taytallau tayta» nimänanta may-chayčhusi mana ashishcächu. ⁷ Washäcuj Jesúspa cačhan caycar, alli-tucuya alli-tucüman caran. Chaypis mana alli-tucushcächu. Manchäga juc mama wamranta alli ricashan-jina jamcunatapis llaquipashcaj. ⁸ Yačhänacushpanchi Jesúspa alli willapanta willapänaj-raycur imamanpis čhayäman caran. Mana willapashalläwanchu ushyaranga. Manchäga wañuytasi jina taríman caran.

⁹ Irmänucuna, nuwacuna sumaj arushätapis, ñacashätapis ama junganquimanchu. Tayta Diosninchipa alli willapanta willapäcushä wíchan sumaj arur, pagas-junajpis jamayta mana tarishcächu. Arushcä mana runapa-cajllaman ricaränäpächu.

¹⁰ Manchapacur cawapäcushäta jamcunapis, Tayta Diosninchipis musyan. Ricay ñawinčhpis, ricay ñawiquičhpis allillata rurar cawapäcushcä. Mana imačhpis juchallicushcächu. ¹¹ Jamcunata wamräta-yupay ricashcaj. ¹² Chaymi shacyächipaycar, willapaycar, anyapaycar, llapaniquwan juyashcä. Tayta Diosninchipa shungun munashannuy cawanayquipaj yaparir-yaparir willapashcaj. Paymi acracamashcanchi maquinčhu imaycamanpis cushishalla cawananchipaj.

¹³ Irmänucuna, Tayta Diosninchipa shiminta willapapti, čhasquicärishcanqui: «Paycuna Tayta Diosninchipa shiminta willapaycämanchi; mana runapa yarpayllanpitachu» nir. Tayta Diosninchipa shimin captin, shunguyquiman čhayasha. Payman yupachicuptiqui, maquinčhuna puriyäčhishunqui shungun munashannuy cawanayquipaj. Chaymi jamcunapita mana yamacällar nü: «Taytallau Tayta, ima allish shimi qui shungunman čhayasha. Chaymi čhasquicärishcashunqui.» ¹⁴ Chaypis Washäcuj Jesúzman yupachicur Tayta Diosninchipa maquinčhu cawashayquipita marca-masiquicuna ñacachishcashunqui. Judea quinrančhu jutucaj irmänucunata Israel marca-masincuna ñacachishan-jina jamcunatapis ñacaycäčhishunqui. ¹⁵ Judea marcacunačhu Tayta Diosninchipa willacujnincunatapis, Tayta Jesústapis wañuchiran. Nuwacunatapis jaticačhämar ushyamasha. Paycuna chiqui runa. Tayta Diosninchita ullgüchin. Runa-masincunapa cunčhan jatarin. ¹⁶ Chiquicuj Israel runacuna chapata ruraman. Juclä marcacunačhu Tayta Diosninchipa shiminta mana ricsijcunata willapänätapis mičhäman. Maquinčhu cawanapaj Tayta Diosninchí jishpichinatapis mana munanchu. Juchačhu arurpis, juchanta miraycächin. Chay-niraj cashanpita Tayta Diosninchipis ullgur ñacayman jaycurij-jaycurijllana caycan.

Yapay watucuyta Pablo yarpashan

¹⁷ Irmänucuna, jamcuna-cajpita aywacur, sumaj llaquicushcä. Jamcunapaj yarparar, llapaniquiwan tincuyta sumaj munashcä. ¹⁸ Nuwacuna watucuj shamuya sumaj munashcä. Quiquipis achca cuti shamuya sumaj munashcä. Chaypis Supay chapata llapanita ruramasha. ¹⁹⁻²⁰ Ichanga Tayta Diosninchiman yupachicushayquipita, maquinchhu cawashayquipita sumaj cushicü. Jesúspa ñaupanchüpis tincushunpaj. Taytanchi Jesús cutimur arushanchipita tapumaptinchi, jamcunapita sumaj cushicur, shungücunapis achicyacäcunga.

3

Pablo llutäpacushan

¹ Irmänucuna, shungü llaquicäcuptin alli carcaycashayquita musyayta munarä. Chaymi Atenas marcapita ² irmänunchi Timoteuta caáchacamushcä. Payga Washäcu Jesúspa alli willapanta willapäcupti, willacäshiman. Ima ñacaychhu caycaptiquisi, Tayta Diosninchipa shiminta tantiyachishunquipaj. Maquillanchhu cawanayquipäpis shacyächishunquipaj. ³ Sumaj shacyäcur ima ñacayman chayarsi, pipis mana witicungachu. Ñacayman chayananchita musyanqui. ⁴ Unayna willaparaj: «Ñacayman chayashunpaj» nir. Cananga nishänuylla änir, ñacarcaycanchi. ⁵ Chaymi jamcunata llaquipar imanuy cawarcaycashayquitapis musyanäpaj Timoteuta caáchacamushcä. Juchacachicuj Supay juchaman janchashunayquita manchacur yarpačhacushcä: «¿Tayta Diosninchipa maquinchüchuraj cawarcaycan? ¿Shimintapis manacajllapächuraj willapäcuphcä?» nir.

⁶ Cananga Timoteo cushish chayamur, nimasha: «Tesalónica marca irmänunchicuna alli carcaycan. Irmänu-masinwanpis llaquipänacur yanapänacurcaycan. Paycunawan tincuyta munashayqui-jina paycunapis sumaj watujyacäshunqui» nir. ⁷ Irmänucuna, Tayta Diosninchiman yupachicur maquinchhu cawashayquita mayar, nuwacuna jatunpa cushicü. Ñacaychhu caycaptisi, llaquicuychhu caycaptisi, jamcuna sumaj shacyächimanqui. ⁸ Tayta Jesúspa maquinpita mana witucushayquita musyar, shungüpis achicyacäcun. ⁹ Chaymi sumaj-sumaj cushicur ni: «Taytallau Tayta, ima allish Tesalónica irmänucuna cushicuyman churamasha. Allipaj yanapashcanqui.» ¹⁰ Yapay tincunanchipäpis waran-warana llapan shungüwan Tayta Diosninchita mañacurcaycä. Tincurga, shacyächishayqui Tayta Diosninchiman sumaj yupachicärinayquipaj, shungun munashannuylla cawapäcunayquipaj.

¹¹ Watucuj shamunäpaj Tayta Diosninchipis, Taytanchi Jesúspis camacaycachichun. ¹² Irmänucunawanpis, runa-masiqicunawanpis mas llaquipänacur cawanayquipaj Tayta Jesú yačhaycäshunqui. Jamcunata alli ricashä-jina llapanwan alli ricanacärinquiman. ¹³ Tayta Jesú yanapayculläshunqui llapan shunguyquiwan Tayta Diosninchiman yupachicunayquipaj, shungun munashannuylla cawanayquipaj. Chaymi Taytanchi Jesú acracushancunawan cutimuptin, juchaynajtana Tayta Diosninchu ricamäshunpaj.

4

Tayta Diosninchipa shungun munashannuy cawananpaj willapashan

¹ Irmänucuna, cananga Tayta Jesú nimashannuylla shacyächishayqui. Shimitä wiyacur, Tayta Diosninchipa shungun munashannuy cawayta yačhacushcanqui. Shungunmanna tincurcaycanqui. Chaypis shungun munashannuylla sumaj-sumaj cawanayquipaj piňapäshayqui.

² Tayta Jesúspa caáchan cashpä yarpashanta mayna willapashcaj. ³ Tayta Diosninchipa shungun munashannuylla cawanquiman. Juchata ama aparicunquimanchu. Warmi ullgupis jucwan-jucwan ama puricunquimanchu. ⁴ Majachacarraj warmi runanta chasquinman. Runapis warmillanta yatanman. Jucpa majanwan ama cacunquimanchu. Manchäga llapanpa ricay ñawinchhu majayquiwan alli cawanquiman.

Tayta Diosninchitapis sumaj manchapacunquiman. ⁵ Tayta Diosninchita mana manchapacuj runacuna-jinaga ama canquichu. Paycuna warmi-pačha. Warmipis runal-lapaj wañun. ⁶ Irmänuyquipa majanman ama yaycapunquichu. Pipis llutanta ru-raptin Tayta Diosninchchi unyanta cutichir, sumaj ñacachinga. Chaytaga mayna willapashcaj. Piñapashcaj. ⁷ Tayta Diosninchchi mana acracamashcanchichu juchallata ru-rar cawananchipaj; manchäga shungun munashannuylla cawananchipaj. ⁸ Chaymi shimita mana wiyyacur, quiquin Tayta Diosninchitapis wasguiycanqui. Paymi shungun munashannuylla cawananchipaj Espíritu Santuta cačhamusha.

⁹ Irmänucuna, quiquipi-pura alli ricanacunayquipaj Tayta Diosninchchi mayna tantiyachishcashunqui. Chaymi nuwa mana rimacümanchu. Mana cartacümanpishchu. ¹⁰ Macedonia quinrančhu llapan irmänucunawanpis alli ricanacuycanqui. Čhaypis pishishushayquipita wallcallata yarparächishayqui. ¹¹ Willapashä-jina cuyay-munaypaj cawanquiman. Jucpa-cajman ama ricaranquimanchu. Manchäga maquiqui arushan-wan cawanquiman. ¹² Chaynuy cawaptiqui, llapan runa alli ricashunquipaj. Pishipacuymanspi mana čhayanquipächu.

Washäcu Jesú cutimunan captin, ama llaquicushunchu

¹³ Irmänucuna, Tayta Diosninchiman mana yupachicucuna wañupacush car, juyupa llaquicun: «Runa-masiwan manaachi tincushänachu» nir. Nuwanchim ichanga Tayta Diosninchiman yupachicunchi. Chaymi juyupa mana llaquicunayquipaj wañushcunapita rasun-cajta tantiyachishayqui. ¹⁴ Musyanchi wañushcunapita Jesústa cawarimushanta. Chaymi pitapis wañush captinsi, Jesústa cawarachishan-jina payman yupachicushan-pita Tayta Diosninchchi cawarachinga. Cawarimujcunata Jesúswan ñaupanman pushacunga.

¹⁵ Cananga cutimunan junajpita quiquin Tayta Jesúspa shimita musyachishayqui. Cawaycajcuna wañushcunata mana ñaupapangachu. Jesú cutimunan junaj cawaycarpis, wañushcunata mana ñaupapäshunchu. ¹⁶ Janaj pachapita Tayta Jesú cutimur, wañushcunata cawarachimunga. Tayta Diosninchipa mayur anjilninwan jayachimunga. Juc anjilpis curnítanta tucamunga. Chay junaj wañushcunata payman yupachicush captin, cawarachimunga. ¹⁷ Jinarcurraj nuwanchi cawaycajcunatapis illajpita apacamäshun paycunawan tincunanchipaj. Pucutay janančhu Tayta Jesúswan tincushunpaj. Tincur, imaycamanpis Tayta Jesúspa ñaupallančhu cawashunpaj. ¹⁸ Chaymi cayta musyashpayqui jucniqui-jucniquipis shacyächinacunquiman.

5

Tayta Diosninchipa shimita wiyyacunanpaj cashan

¹ Irmänucuna, Jesú cutimunanta mayna musyanqui. Imay wíchan cashantapis, imanuy canantapis tantiyashcanqui. ¿Imapánataj willapäshayqui? ² Suwa-jina chacaypa mana yarpashpita Tayta Jesú cutimunanta musyanqui. ³ Cutimunan junaj mana wiyyacujcuna cushish cawarcaycangapaj: «Cananga allilla cawarcaycanchi. Mana imapis canchu» nir. Niycaptillan, mana yarpashpita paycunaman ñacay čhayapunga. Llapanta ushyaringa. Mayganpis mana jishpingachu. Jishyaj warmita mana yarpashpita nanay charishan-jina ñacay čhayapunga.

⁴ Chaymi chacajéchu-jina juchaéhu ama puriychu. Tayta Jesúsuwa-jina mana yarpashpita cutiramunga. ⁵ Llapaniqui achquiéchu-jina puriycanqui Tayta Jesúspa maquinčhu cawashpayqui. Llapa ricay allillata rurar cawarcaycanqui. Mana chacajchünachu llutanta rurar purircaycanqui. ⁶ Chaymi ima juchatapis ama aparicunquimanchu. Juchaéhu arujcuna mana imasi jucullar, puñucash runa-jina juyäcun. Nuwanchim ichanga Jesúswan tincunanchipaj shungun munashannuy cawar shuyaj-shuyajlla caycäshun. ⁷ Jesú cutimunanta mana imasi jucujcuna chacajéchu-jina cawan. Puñucash

runa-jina cawan. Upyallaáhu arun. ⁸ Nuwanchim ichanga achquiúchu-jina cawar, shuyaj-shuyajlla caycar, allillata rurashun. Tayta Diosninchiman sumaj yupachicushun. Llaquipänacur cawashun. Maquillanáhu cawaptinchi, imapitapis jishpichimäshun. ⁹ Nuwanchita acracamashcanchi mana ñacayman ́hayachimänanchipächu; manchäga Washäcu Jesúswan jishpichimänanchipaj. Payga Taytanchi. ¹⁰ Paymi jishpichimänanchiraycur wañuyman ́hayasha. Tayta Diosninchipa maquináhu cawaptinchiga, wañushtapis, cawaycajtapis Jesús apacamäshun iwal cawananchipaj. ¹¹ Chaymi shacyächinacur, cawaycashayqui-jina shacyächinacunqui. Willapäshaj-jina tantiyachinacur cawanqui.

Alli cawananpaj Pablo piñapashan

¹² Irmänucuna, Tayta Diosninchipa shiminta willapäcujcunata alli ñawiquipa ricanquiman. Paycuna sumaj ricashunqui. Tayta Jesúspa maquináhu cawashayquipita piñapäshunquipis. ¹³ Paycunata sumaj llaquipanquiman. Llapan rurashanpita alli ricanquiman. Quiquiqui-purapis alli ricanacunquiman.

¹⁴ Irmänucuna, shimüta sumaj wiycunquiman. Jillacunata piñacunquiman imatapis rurananpaj. Llaquishcunatana shacyächinquiman. Jishyaéchucunatapis yanapanquiman. Tantiyanacur, llapan runawan alli ricanacunquiman. ¹⁵ Pipis llutanta ruraptin, ayninta ama cutichinquimanchu. Manchäga quiquiri-purapis, wajta runacunawanpis alli ricanacur yanapäncunquiman. ¹⁶ Ima captinpis, cushishalla cawanquiman. ¹⁷ Mana yamacällar Tayta Diosninchita mañacunquiman. ¹⁸ Imamanpis ́hayar, ninquiman: «Taytallau Tayta, ima allish Washäcu Jesúspa maquináhu cawanäpaj camacächishcanqui.»

¹⁹ Espíritu Santuta chapata ama ruranquimanchu. ²⁰ Tayta Diosninchipa willacujnincunapa shiminta pampaman ama ́churanquimanchu. ²¹ Ichanga sumajraj mayapanquiman. Llutanta rimaptin, ama ́chasquipanquichu. Allita rimaptinimi ichanga, ́chasquicunquiman. ²² Ima juchapitapis witicunquiman.

²³ Cananga allilla cawachicuj Tayta Diosninchita yanapayculläshunqui shungun munashannylla cawanayquipaj. Taytanchi Jesucristu cutimunancaman maquillanáhu puriyächishunqui ima juchaman mana ́chayanayquipaj.* ²⁴ Paymi acracushcashunqui. Shiminta ́charcur, llapanáhu yanapäshunqui.

Cartapa ushyanan

²⁵ Irmänucuna, nuwacunapäpis Tayta Diosninchita mañacärinqui, ari. ²⁶ Irmänu-purapis llapan shunguyquiwan wamayänacärinqui. ²⁷ Tayta Jesúspa caéchan caycapti, shimüta ama jungaychu. Cartacamushäta llapan irmänunchicunata liguipay.

²⁸ Llaquipäcuj Taytanchi Jesucristu yanapayculläshunqui. Chayllana.

* ^{5:23} Griego rimayáhu runapaj yarpar quimsaman raquin. Chaymi castillánuáhu nin: «espíritu, alma, cuerpo.»

Tosalónica marcačhu irmänucunaman **San Pablo** **cartacushan 2**

Tantiyacunanchipaj:

Pablo cay cartata isquirbiran Tosalónica marcačhu jutuaj irmänucunaman. Ñaupata aywar, Jesúspita sumaj willaparan. Jesúspa shiminta ĉasquicushanpitaraj cartacuran. Chayta musyayta munar, liguinqui: Hechos 17.1-15; 1 Tesalonicenses.

Jipataraj llaquish caycashanta mayar, llutäpacuycashanta mayar, tantiyachinanpaj, shacyächinanpaj cartacuran.

Pablo isquirbiran:

Tosalónica irmänucunata allíchu jurgushanpita, ñacayčhu captin Tayta Diosninchita mañacapushanpita, Jesús cutimunananpita: 2 *Tesalonicenses 1.1-12*.

Jesús mana cutimuptillan pantachicuj runa ricarimunanpita, irmänucuna Jesúsman yupachicular cawananpita: 2 *Tesalonicenses 2.1-12*.

Maquinčhu cawananpaj Tayta Diosninchchi acracushanpita: 2 *Tesalonicenses 2.13-17*.

Irmänucuna mañacapunyanpita: 2 *Tesalonicenses 3.1-5*.

Jilla irmänucunata piñapänanpita: 2 *Tesalonicenses 3.6-15*.

Wamayashanpita: 2 *Tesalonicenses 3.16-18*.

Pablo wamayashan

¹ Tosalónica marcačhu jutuaj irmänucuna, nuwa Pablo, Silvanuwan, Timoteuwan-ima cartacallämü. Ima allish Tayta Diosninchipa maquinčhu, Tayta Jesucristupa maquinčhu cawarcaycanqui. ² Tayta Diosninchipis, Tayta Jesucristupis llaquipäshushpayqui yanapayculläshunqui. Allilla cawaycachilläshunqui, ari.

Tayta Diosninchita alliman čurashan

³ Irmänucuna, jamcunapita cushicunä camacan. Chaymi Tayta Diosninchita imaypis nii: «Taytallau Tayta, ima allish Tosalónica irmänucunata yanapaycanqui. Paycuna sumaj-sumaj yupachicurcaycäshunqui. Quiquin-purapis sumaj llaquipänancurcaycan.»

⁴ Chaymi juclä marcacunačüpis jutuaj irmänunchicunawan tincur, cushish willapä: «Tosalónica irmänucuna Tayta Diosninchipa mana witicunchu runacuna juyupa ñacachiptinsi, chiquiptinsi» nir. ⁵ Llapan ñacaycunata ičhipur, Tayta Diosninchchi mana cačcharishushayquita tantiyacunquipaj. Payga llapan runapa juchanta jurgapanga. Chaymi runa ñacachimaptinchisi, Tayta Diosninchipa shungun munashallanta rurashun.

Taytanchi Jesús cutimunananpita tantiyachicushan

⁶ Tayta Diosninchchi allillata rurar, ñacachishujniquicunata ñacachinga. ⁷⁻⁸ Tayta Jesús ricsichicushan junaj nuwacunata-jina jamcunatapis alli cawayman čurashunquipaj. Janaj pachapita anjilnincunawanpis, warau-warauyaycaj ninawanpis, Jesús achicachicyaycar cutimuptin, llapantapis Tayta Diosninchchi camacächinga. Juchačhu arujcunata unyanta cutichinga. Mana manchapacujcunatapis, Taytanchi Jesúspa shiminta mana ĉasquicujcunatapis ñacayman čhayachinga.

⁹ Mana wiycujcunata ushyaypa illararachinga. Paycuna Tayta Jesúspa ñaupanman imaypis mana čhayangapächu. Achic-achicyaycaj ñaupančüpis mana cawangapächu.

¹⁰ Cutimushan junaj llapan irmänucuna Tayta Jesústa allíchu jurgunga. Shiminta ĉasquicujcuna llapanmi alli ñawinpa ricanga. Jamcunapis shiminta willapapti ĉasquicush caycar, allíchu jurgunquipaj.

¹¹ Chaymi nuwacuna Tayta Diosninchita mañacuycä paypa maquinipa mana witi-cunayquipaj. Payga yanapäshunqui shungun munashannuy cawanayquipaj. Runa-masiquiwan alli ricanacunayquipäpis shacyächishunqui. ¹² Alli cawaptiqui, llapan runa Taytanchi Jesústa alliman churanga. Chaymi Jesúspis jamcunata sumaj alli ricashunqui. Chaynuy cawananchita munan llaquipäcu Tayta Diosninchipis, Tayta Jesucristupis.

2

Jesústa ticrapuj runa ricarimunapita tantiyachicushan

¹ Irmänucuna, cananga Taytanchi Jesucristu cutimur shuntacamänanchipita willapäshayqui. Sumaj tantiyacunquiman. ² Pipis: «Washäcu Jesús shamushana» nishuptiqui, ama chasquipanquichu. «Jesús cutimushanta Espíritu Santu musyachimasha» nishuptiquipis: «Pablo willamasha. Cartacamusha» nishuptiquipis, ama chasquipanquichu.

³ Ima-imata nishuptiquisi, ama chasquipanquichu. Tayta Jesús cutimunanpaj achcaj runaraj Tayta Diosninchita ticrapunga. Apäricuj runapis ricarimunga. Apäricujmi ichanga Tayta Diosninch camacächishannylla ushyacayman chayangapaj. ⁴ Apäricuj runa llapan yaya jircacunapa cunchan jataringa. Wasincunatapis, jarancunatapis jučhurachir ushyaringa. Jerusalén marcachüpis quiquin Tayta Diosninchita ticrapunga. Wasinmanpis yaycapunga: «Cay wasi nuwapa. Nuwallata manchapacäramanquiman. Nuwaga Tayta Diosníqui cä nir.

⁵ Irmänucuna, jamcunawan caycaptillä, llapanta willashcaj. ¿Manachu yarpanqui? ⁶ Cananllaga apäricuj runa manaraj ricarimunanta musyarcaycanquim. Chaparay-canraj. Camacächishan junaj chayamuptinraj, ricarimunga. ⁷ Ichanga mayna runacunata pacayllapa juchacaycächin. Mana chapaptinnam ichanga, llapan ricay ricarimunga. ⁸ Ricarimuptinsi, apäricuj runata Tayta Jesús ushyaringa. Achic-achicyaycaj cutimushan junaj pücarir illararachinga.

⁹ Sumaj tantiyacuy. Apäricuj runa Supaypa munayninwan ricarimunga. Tucuy-jinanpa runacunata riguichinga. Runacuna manchapacur ninga: «Taytallau tayta, runa mana ricashantapis ruranqui. Mana rurashantapis ruranqui. Sumaj munayniuj canqui.» ¹⁰ Apäricuj runaga ushyacayman aywanan cashpan runacunata tucuy-jinanpa juchacachinga. Jesús runacunata llaquipashpan washayta munaycaptinsi, shiminta mana chasquicuranchu. Jishpichinantapis mana auniranchu. ¹¹ Chaymi Tayta Diosninchipis camacächisha apäricuj runa riguichtipin, llullapäcushanta chasquicunapaj. ¹² Paycunapa juchanta Tayta Diosninch jurgapanga Jesúspa shiminta chasquicuya mana munashanpita, juchallačhu cushish cawashanpita.

Irmänucuna wiyacur cawananpaj anyapashan

¹³ Irmänucuna, Tayta Jesús llaquipäshunqui. Chaymi cushicushpä Tayta Diosninchita imaypis ni: «Taytallau Tayta, ima allish Tesalónica marca irmänucunata pirwata-yupay ricashcanqui. Jesúzman yupachicuptin, maquiquichu cawananpaj acracushcanqui. Shunguyqui munashannuy cawananpäpis Espíritu Santuwan yanapaycanqui.» ¹⁴ Chaymi Jesúspa alli willapanta chasquicushallayquipita Tayta Diosninch acracushcashunqui. Taytanchi Jesucristuta alli ricaycar, jamcunatapis alli ñawinwan ricashunquipaj.

¹⁵ Irmänucuna, chaymi Tayta Diosninchipita ama witicunquichu. Alli juyänayquipaj willapashajtapis, cartacamushajtapis ama junganquichu. ¹⁶ Alli cawanayquipämi quiquin Taytanchi Jesucristutapis, Tayta Diosninchitapis mañacuycä. Paycuna sumaj llaquipäshunqui. Llaquipämashpanchi yanapaycämanchi imaycamanpis payman sumaj yupachicunanchipaj. Mana yamacällar yupachicunanchipäpis shacyaycächimanchi. ¹⁷ Shungunchitapis shacyächin maquinichu cawar allillata rurananchipaj, allillata rimanchipaj.

3

Irmänucuna mañacapushan

¹ Irmänucuna, mañacushayqui. Nuwacunapäpis Tayta Diosninchita mañacunqui, ari. May-chaychüpis Tayta Jesúspa shiminta willapäcupü, waquin runacunapis jamcuna-jina cushish chasquicärinman. Tayta Jesústapis alliman churapäcunman. ² Chaynuypis mañacapamanqui juyu runacunapa maquinpita, chiqui runacunapa maquinpita washämänampaj. Paycuna Tayta Jesúsman mana yupachicunchu. ³ Mara yupachicuptinsi, shiminta charcushpan Tayta Jesús imaypis mana cacharishunquipächu. Manchäga payman sumaj yupachicunayquipaj shacyächishunquipaj. Supay imaman chayachishunayquipitapis jishpichishunquipaj. ⁴ Llapanpita willapaptij, tantiyacushcanqui. Ima allish Tayta Jesús shacyächishunqui willapashajnuylla cawanayquipaj. ⁵ Tayta Jesús yanapayculläshunqui, ari. Yanapäshunqui Tayta Diosninchí llaquipäshushayquita sumaj tantiyacunayquipaj. Ima ñacayman chayaptiquisi, yanapäshunqui quiquin-jina cawanayquipaj.

Lapan irmänucuna arunanpaj piñapashan

⁶ Irmänucuna, Tayta Jesucristu nimashanta willapaycaj. Shiminta mana wiycujiirmänucunawan ama talluranquichu. Paycuna jilla runa. Willapashätapis wiycuya mana munanchu. ⁷ Jamcuna imanuy cawashätapis musyanqui. Mana nishä-nishäta rurarchu puriycahashcä. Manchäga sumaj arushcä. Chaymi nuwacunaman ricacamanquiman. ⁸ Arushäwan cawashcä. Cawanäpaj imallatapis mana mañacushcächu. «Jucpa arushanwan cawaycan» nimänanpita pagas-junajpis mana yamacällar sumaj arushcä. ⁹ Mañacunä camacayta camacasha. Chaypis cawashäta ricacamänayquita munar, mana mañacushcajchu. ¹⁰ Llapaniquita rinriquichu-caman willapashcraj: «Mana arurga, ama micunmanchu» nir. ¹¹ Chaypis waquinniqui shunguyqui yarpashallantash rurarcaycanqui. Jillash carcaycanqui. Jucpa-cajllamansi ricaraycanqui. ¹² Chay-nirajcunata Taytanchi Jesucristu nimashannuylla piñacü. Jucpa arushanpita ama cawanmanchu. Imallachéüpis arunman. Quiquinpa-cajwan cawanman.

¹³ Irmänucuna, jamcuna alli rurayta ama yamacanquichu. ¹⁴ Cartacamushäta liguir pipis mana wiycuptin, juchanta jurgapanqui. Paycuna pingacunananpaj ama talluranquichu. ¹⁵ Ichanga ama chiquinquichu. Manchäga yawar-masiquita llaquipäshayqui-jina piñacunquiman.

Cartapa ushyanan

¹⁶ Tayta Jesús allilla cawahimanchi. Imaycamanpis llapan imachéüpis yanapayculläshunqui allilla cawanayquipaj. Llapaniquita maquillanchu puriycahashunqui, ari. ¹⁷ Nuwa Pablo, cay cartata apaycächimü. Llapan cartacunata apachishä-jina ushyananta maquïwan isquirbischä. ¹⁸ Llaquipäcuj Taytanchi Jesucristu llapallayquita yanapayculläshunqui, ari. Chayllana.

Timoteuman San Pablo cartacushan 1

Tantiyacunanchipaj:

Pablo cay cartata isquirbiran yanagajnin Timoteuman. Timoteupa papänin caran jäpa runa. Mamanna caran Israel warmi. Mamanwan awillanga ñaupatana Jesúspa shiminta chasquicäriran. Chaymi Timoteuta wamralla cashanpita-pacha Jesúspa shiminta tantiyachiran. Müsu cashan wican Pablo chay tucuypa willapäcur puriptin, yanagaran. Éfeso marcamanpis ishcanin aywaran. Chay marcačhu Pablo willapäcur, unaylla juyapäriran. Aywacurmi ichanga, Timoteuta jaguiycuran. Müsulla cashpansi payna Tayta Jesúspita tantiyachicuran. Timoteupita musyayta munar, liguinqui: Hechos 17.14-15; 18.5; 19.22; 2 Timoteo 1.5; 3.15; Filipenses 2.19-22; Hebreos 13.23.

Éfeso marcapita aywacurpis, Timoteuta mana jungaranchu. Chaymi shacyächishpan, anyapashpan Pablo cartacuran.

Pablo isquirbiran:

Pantachicujcunapa shiminta Timoteo mana chasquipänanpita: *1 Timoteo 1.1-20.*

Tayta Diosninchita mañacunanpita, manchapacunanpita: *1 Timoteo 2.1-15.*

Mayur irmänucuna cuyay-munaypaj cawananpita: *1 Timoteo 3.1-16.*

Waquin irmänucuna Jesústa wasguinanpita, tantiyachicujcuna cuyay-munaypaj cawananpita: *1 Timoteo 4.1-16.*

Biyüdacunata yanapänanpita, mayur irmänucunata wiycunananpita: *1 Timoteo 5.1-25.*

Tayta Diosninchipa maquinčhu cawar cushishalla cawananpita, Washäcuj Jesúzman yupachicur supaypa maquinčhu mana cawananpita: *1 Timoteo 6.1-12.*

Pablo wamayashan

¹ Timoteo, nuwa Pablo cartacamü. Washäcuj Jesúspa cačhan caycä. Shiminta willapäcur purinäpaj Washäcuj Jesúswan Tayta Diosninchchi cačhacamasha. Paymi jish-pichimanchi. Yupachicuptinchi, alli cawayta Jesús tarichimäshun. ² Timoteo, shimita wiyar Jesústa chasquicushayquipita wamräta-yupay ricaj. Tayta Diosninchipis, Taytanchi Jesucristupis llaquipayculläshunqui. Yanapayculläshunqui. Allilla cawaycachilläshunqui.

Pantachicujcunapita rimashan

³ Timoteo, Éfeso marcapita ama llucshinquichu. Macedonia quinranman manaräsi aywallar, llapanta willapashcaj. Irmänunchicunata ama cačharinquichu. Pipis llutanta tantiyachicuptin, mičhanqui. ⁴ Auquilluyquicuna yarpashan-janan ama tin-cupänacunquichu. Pi-pi auquilluyqui cashantapis ama jurgapänacunquichu. Jurgapänacur, piñanacuylaman pipis chayan. Tayta Diosninchipa shungun yarpashanmanpis mana tincunchu. Llapan shunguchiwan shiminta chasquicurrat, paypa maquinčhu cawanchi.

⁵ Chaymi llapan shunguyquiwan llaquipäcuj canayquita munar, willapaycaj. Llaquipäcuj caycar, llapan shunguyquiwan llaquinacäriya yačhacunquiman. Shunguyquičhu ima juchatapis ama pacarächinquismanchu. Tayta Diosninchiman yupachicur, ama janan shungulla yupachicunquimanpishchu. ⁶ Waquin runa llutanta yarpashpan mana llaquipänacärinchu. Chaymi jurgapänacullar, tincupänacullar cawan. ⁷ «Moiséspa shiminta sumaj tantiyä» nir yačhaj-tucurpis, imata rimashantapis mana tantiyanchu.

⁸ Imapaj rimashantapis sumaj tantiyaptinchiga, Moiséspa shimin alli quiquin Tayta Diosninchipa shimin cashpan. ⁹ Moiséspa shimin mana Tayta Diosninchipa shungun munashannuy cawajcunatachu piñacun; manchäga mana wiycujcunata, juyu runacunata, jucha aparicujcunata, Tayta Diosninchita mana manchapacujcunata, quiquinpa shungun munapashanta ashijcunata, runa-masinta wañuchicujcunata, maman-taytanta

wañuchicujcunata,¹⁰ jucwan-jucwan cacujcunata, warmi-pura, ullgu-pura cacujcunata, runa-masinta suwajcunata, llullacujcunata, tumpacujcunata, Jesúspa shiminta ticrapujcunata. Chay-niraj runacunata Tayta Diosninchí piñacun.¹¹ Shiminta willapäcunäpaj caçhacamaptin, Jesúspa alli willapanta willapäcur puriyä. Munayniyuj Tayta Diosninchita alliman churayculläshun.

Pabluta Tayta Diosninchí llaquipashan

¹² Ima allish Taytanchi Jesucristu shacyächiman shiminta willapäcur purinäpaj. Payga maquinchümi purichiman. Yupachicamar, munashanta ruranäpaj churamasha.

¹³ Unayga: «Allita ruraycä» nir Jesússta ashllir ushyarä. Paypa shiminta chasquicujcunatapis jaticacchar ushyara. Chiqui runa carä. Chaypis payman mana yupachicuñipa, upa cayniwan rurashäpita Jesús llaquipämär, llapan juchäta jungasha.¹⁴ Llaquipämashpan yanapaycäman llapan shungüwan payman yupachicunäpaj, llapan runa-masitapis llaquipar alli ricanäpaj.

¹⁵ Sumaj tantiyacushun. Shungunchimanpis sumaj churacushun. Jucha-sapacunata washänan-raycur Washäcu Jesús cay pachaman shamusha. Llapan runa jucha-sapa caycaptinsi, jucha-sapa cayniiman pipis mana tincuranchu.¹⁶ Jucha-sapa cayniiman pipis mana tincuptin, llaquipämashpan Washäcu Jesúspa maquinchu cawanäpaj Tayta Diosninchí camacächisha. Chaynuypa pipis ricacamar, tantiyacunga: «Jucha-sapa caycaptin-chisi, Tayta Diosninchí llaquipämanchi. Washäcu Jesússta chasquicuptinchi, imaycamanpis maquinchu cawachimäshun» nir.

¹⁷ Tayta Diosnillanchita imay-imaypis alli ricayculläshun.

Alliman churayculläshun.

Mandaj cayninga imaypis mana ushyacajmi.

Imay-imaycamanpis cawacujmi.

Payga mana ricacajmi.

Payllam Tayta Diosninchí.

Chaynuypa caycullächun.

¹⁸⁻¹⁹ Wawallau Timoteo, imaman chayarpis, willapashajta ama junganquichu. Imata ruranayquipäpis Tayta Diosninchí mayna musyachicusha. Chaymi payman llapan shunguyquiwan yupachicunquiman. Shunguyqui shacyächishantapis ruranquiman. Waquin irmänucuna Tayta Diosninchí shungunta musyaycächiptinsi, mana wiyacunchu. Mana imasi jucullar, quiquinpa shungun munashallanta ruracun.²⁰ Mana wiycushanpita Alejandrutapis, Himeneutapis Supaypa maquinman churashcä. Chayrämi Tayta Diosninchita yapay mana apärinanpaj tantiyacunga.

2

Llapan runapaj Tayta Diosninchita mañacapushun

¹ Timoteo, Tayta Diosninchita jayaranquiman. Llapan runacunapaj mañacunquiman. Paycunapaj mañacapunquiman: «Taytallau Tayta, ima allish llapan runata ricaycanqui. Llapanta yanapaycullay, ari» nir.² Jatun auturdäcunapäpis, tacsha auturdäcunapäpis mañacapunquiman. Paycuna alli mandaptin, nuwanchipis jaucalla cawashunpaj. Allilla juyäshunpaj. Tayta Diosninchita manchapacur, shungun munashannuya cawashunpaj.³ Caynuypa mañacapunanchi camacan. Tayta Diosninchipa shungunmanpis tincun. Payga jishpichicujninchí.⁴ Llapan runa maquinchu cawanantapis, shiminta tantiyacunantapis munan.

⁵⁻⁶ Tayta Diosninchí jucnayllam.

Payman chayananchipaj parlapämajninchipis jucnayllam.

Parlapämajninchí Washäcu Jesús.

Payga runa-masinchim.

Washämänanchi-raycur caway-bidantapis Tayta Diosninchita jarasha.
Chayta willapäcunanchipaj shungun munashan wican Tayta Diosninchita llapanta camacächiran.

⁷ Tayta Jesús nuwanchi-raycur caway-bidanta jarashanpita jäpa runacunata willapäcunäpaj Tayta Diosninchita caçhacamasha. Imata nimaptinpis, mana llullacuyucächu. Rasullanta willapäcuyä. Paypa shiminta may-chaychüpis willapäcuyä. Jäpa runacunatana sumaj tantiyayacähi.

⁸ Chaymi may-chaychü jutucarpis, llapan irmänucuna Tayta Diosninchita mañacarinman. Mañacunanchipaj Tayta Diosninchipa shungun munashannylla cawashuwan. Piwanpis ama ticshaparänacushuwanchu. Ama tincupänacushuwanchu.

⁹ Irmänacunapis warmi cayninchu juyanman. Rucapäcuyällar, munapächicuyällar, ama purinmanchu. Juricunallata, achic-achicyaycaj piñicunallata, čhaninyuj müdanacunallata ama ushtucunmanchu. ¹⁰ Manchäga Tayta Diosninchita manchapacuj warmicuna-jina allillata rurar cawanman. Alli rurashanmi warmita camarächin.

¹¹ Willapashantapis sumaj tantiyacunman. Yačhachicujcunata ama ticrapunmanchu. Shimintapis ama jugarinmanchu. ¹² Ullgucunata tantiyachinanpis mana camacanchu. Runantapis ama micuypa micunmanchu. Manchäga upällacunman. Jasilla cacunman.

¹³ Musyashanchinuypis Adánta puntata Tayta Diosninchita camaran; jinarcurrej warmin Evata. ¹⁴ Mana Adántachu supay llullapasha juchaman čhayanapaj; manchäga warmin Evata. Llullapashanta čhasquir, Eva juchata aparicusha. ¹⁵ Chaypis warmicunata Tayta Diosninchita jishpichinga. Paypa maquinchü cawanapaj wamrancunata alli ricanman. Tayta Jesúsman llapan shungunwan yupachicunman. Runa-masinta llaquipanman. Mama-warmicuna-jina Tayta Diosninchipa shungun munashannylla cawanman.

3

Mayur irmänucuna imanuy cawanapäpis tantiyachishan

¹ Allitam rimayä. Pipis mayur irmänu cayta munar, sumaj allita yarpaycan.* ² Mayur irmänu llapan runapa ricay ñawinchü alli ricash runa canman. Juc warmillawan juyanman. Alli shungu canman. Yarpayyuj canman. Imatapis sumaj tantiyacunman. Jurpanta cushishalla pachächinman. Sumaj tantiyachicunman. ³ Upyallačhu, magnacuyllačhu ama arunmanchu. Manchäga llaquipäcunman. Jaucalla cawanman. Jillay-raycullar imatapis ama ruranmanchu. ⁴ Warmintapis, wamrancunatapis sumaj ricanman. Wamrancunata yačhachinman wiyacuj cananpaj, pitapis manchapacunapaj.

⁵ Warminta, wamrancunata ricayta mana yačharga, īmanuparaj jutucaj irmänucunata ricanman? ⁶ Mayur irmänu cananpaj, sumaj-sumajraj Tayta Diosninchiman yupachicunman. Chaymi mushuj irmänuta ama čhuranmanchu mayur irmänu cananpaj. Allitucuptin-ima, supayta ñacachishan-jina Tayta Diosninchita ñacayman jaycuringa. ⁷ Mayur irmänuta llapan runa alli ricanman. Tayta Diosninchiman mana yupachicuj runacunapis alli ricanman. Chaura pipis pampaman mana čhurangachu. Supaypis achäquita mana taringachu maquichacunapaj.

⁸ Yanapäcuj irmänucunapis alli shungu canman.* Shiminta čharcunman. Upyallačhu ama arunmanchu. Jillaylapaj ama wañunmanchu. ⁹ Jesúspita Tayta Diosninchita musyachicushantapis llapan shungunwan čhasquicunman. Shungullančhu jucha aparicuyta ama yarparanmanchu. ¹⁰ Pitapis yanapäcuj irmänu cananpaj čhuranapäga shunguntaraj sumaj musyapanman. Imanuy cawashantapis sumajraj ricanman. Alli cawashanta ricarraj, cargunman čhuranman.

* **3:1** Mayur irmänuta griego rimaychü nin: «epíscopos.» Castillänučhu isquirbin: «obisbo» nir. * **3:8** Yanapäcuj irmänuta griego rimaychü nin: «diakonous.» Castillänučhu isquirbin: «diáconos» nir.

¹¹ Yanapäcuj irmänacunapis alli shungu canman. Pipa washantapis ama rimanmanchu. Manchäga yarpačhacurir-yarpačhacurir imatapis rimanman. Imata aunishantapis čharcunman.

¹² Yanapäcuj irmänucunaga juc warmillawan juyanman. Warmintapis, wamrancunatapis sumaj ricanman. ¹³ Yanapäcuj irmänucuna cargunta sumaj čharcuptin, llapan runa alli ñawinpa ricanga. Washäcuj Jesúsmanpis sumaj yupachicunga.

Washäcuj Jesúspita musyachicushan

¹⁴⁻¹⁵ Timoteo, jamwan sumaj tincuya munaycä. Chaypis juclla mana shamupti cay cartata liguir, jutucaj irmänucuna imanuypa juyänantapis musyanquipaj. Llapanchi cawaj Tayta Diosninchipa wawan caycanchi. Paypa shungun munashannuylla cawaptinchi, Tayta Diosninchipi pü cashantapis runacuna tantiyacunga. Llapanchita čhuramashcanchi pü-maytapis shiminta tantiyachicunanchipaj. ¹⁶ Jesúspita Tayta Diosninchimusyachicushanga tantiyayta mana atipaypaj caycan. Tayta Jesús runa yurisha.

Wawan cashanta Espíritu Santu musyachicuran.

Janaj pachačhu anjilcuna Jesústa ricaran.

Cay pachačhu paypa shiminta may-chayčüpis willapäcuran.

Runacunana shiminta čhasquicuran.

Tayta Diosninchipi ñaupanman shuntacuran.

4

Pantachicujcunapita rimashan

¹ Canan wichancunapaj Espíritu Santu mayna musyachimashcanchi waquin irmänunchicuna Tayta Diosninchipa witicunan cashanta. Witicunga supay yarpashanta pantachicujcuna willapaptin. ² Paycunapa pingacuyninpis ushyacasha. Ishcay căra cashpan llulla runa. ³ Ricsish micuycunallata micunanchita munan. Majachacänanchitapis mičämanchi. Tayta Diosninchim ichanga llapan micuytapis, majachacänanchitapis camacächisha. Chaymi cushicuywan ninchi: «Taytallau Tayta, jamllaman yupachicü. Ima allish micunäpaj camapämashcanqui. Majachacänäpäpis camacächishcanqui. Llapantapis llapan shungüwan čhasquicü.» ⁴ Tayta Diosninchicamashanga llapanpis alli. Chaymi ima micuytapis ama ticrapäshuwanchu. Manchäga cushishalla micucushuwan: «Taytallau Tayta, ima allish micunäpaj tarichillämashcanqui» nir. ⁵ Tayta Diosninchipa shimpita, mañacushanchipita llapan alli cashanta musyanchi.

Timoteuta anyapashan

⁶ Timoteo, cartacamushänuylla irmänunchicunata tantiyachinquiman. Washäcuj Jesúspa alli yanapäcujnin caycar, quiquipis paypa shiminta waran-waran yačhacunquiman. Yačhacushayquinuylla shungun munashannuy cawanquiman.

⁷ Runacuna rimashallanta ama čhasquipanquichu. Paycuna Tayta Diosninchiman mana yupachicushpan umallanpita imatapis jurgun. Ninshi-ninshillata willapäcun. Chaynuy niptinpis, waran-warana yačhacunquiman Tayta Diosninchipa shungun munashannuy cawanayquipaj. ⁸ Tincuchiypa tantiyacushun. Pucllajcuna gänayta munar, sumaj yačhacärin. May-jina yačhacurpis, callpan ushyacajlla. Tayta Diosninchipa shungun munashannuy cawayta yačhacumi ichanga imaypis mana ushyacangachu. Chaynuy cawaptinchi, cay pachačüpis, janaj pachačüpis cawachimäshun.

⁹ Rasullanta willapaycaj. Willapashäta llapan runapis čhasquicunman. Auninman.

¹⁰ Nuwanchiga cawaj Tayta Diosninchiman yupachicunchi. Payman yupachicuptin, pü-maytapis jishpichinga. Chaymi ñacaytapis mana manchacunchinachu. Tucuy-jinanpa paypa shiminta willapäcunchi.

¹¹ Chaymi willapashäta llapanta willapanqui. Tantiyachinqui. ¹² Mayur runa cayman mana chayaptiquiräsi, pampaman pipis ama churashunquimanchu. Manchäga llapan runa ricacunanpaj alli shimillayquipa rimanquiman. Allillata rurar cawanquiman. Irmänucunata llaquipanquiman. Tayta Diosninchiman sumaj yupachicunquiman. Ima juchatapis ama aparicunquimanchu. ¹³ Chayamushäcaman jutucaj irmänucunata Tayta Diosninchipa shiminta liguipaycay. Irmänunchicunata shacyächiy. Sumaj tantiyachiy. ¹⁴ Shiminta willapäcur purinayquipaj Tayta Diosninchipa churashcashunqui. Pay musyacächiptinraj, mayur irmänucuna maquinta umayquiman churaycur Tayta Diosninchita mañacuran. Chaymi carguyquita ama jaguinquichu.

¹⁵ Shimitä llapanta wizacunqui. Chayraj Tayta Diosninchipa ricay ñawinčhu alli cawashayquitapis runacuna musyanga. ¹⁶ Timoteo, imata rurashayquitapis, imata rimashayquitapis sumaj tantiyacunquiman. Llapan shunguyquiwan Tayta Diosninchipa maquinčhu cawanquiman. Shungun munashanta ruraptiqui, Tayta Diosninchita jishpichishunquipaj. Shimiquita chasquicucunatapis jishpichinga.

5

Lapan irmänucunawan alli ricanacunanpaj

¹ Mayur runacunata taytayquita-yupay alli shimillayquipa willapanquiman. Ama ullgüpánquichu. Müsucunatapis wauguiquita-yupay allilla ricanquiman. ² Mayur warmicunatapis mamayquita-yupay alli ricanquiman. Jipashcunatapis paniquita-yupay alli ricanquiman. Ama munapanquimanpishchu.

Biyüdacunata sumaj ricananpaj

³ Waccha biyüda captin, irmänucuna yanapanman. ⁴ Biyüdapa wamrancuna, willancuna captinmi ichanga, paycunaraj yanapanman. Tacsha captin, jishpichishanpita chachancunata ricanan camacan. Tayta Diosninchipa shungunmanpis tincun.

⁵ Waccha biyüdacuna llapan shungunwan Tayta Diosninchiman yupachicun. Payllata jayaran. Pagas-junajpis mañacun. ⁶ Llaparpa janančhu cawayta munaj biyüdacunam ichanga Tayta Diosninchita jungaycun. Chay-niraj biyüdacuna Tayta Diosninchipa ricay ñawinčhu wañush-yupay caycan. ⁷ Chaymi pipis mana jamurpänanpaj irmänucunata piñapanquiman. ⁸ Pipis castancunata, yawar-masincunata mana yanapaptin, Tayta Jesúspa maquinčhu cawashanpis mana musyacanchu. Chay-niraj runaga jäpa wamravyupay caycan. Tayta Diosninchitapis mana manchapacunchu.

⁹ Irmänucuna llapan biyüdata ama shuntanmanchu. Manchäga sujta chunca (60) watayujpita janamanraj shuntanman. Chaypis shuntanman juc majallawan juyash captinraj, ¹⁰ allillata rurash captinraj, wamrancunata alli ricash captinraj, pachächicuj cash captinraj, irmänucunata yanapash captinraj, ñacajcunata yanapash captinraj, Tayta Diosninchita manchapacur cawash captinraj. Chaynuy cawashanpita irmänucuna yanapanan camacan.

¹¹ Jipashllaraj biyüdacunata ama shuntanmanchu. Jipashllaraj cashpan majata munar Washäcu Jesúspa maquinčhu cawaycarpis, witicuringa. ¹² «Mana yapapacushächu» nirpis aunishanta mana charcur, Tayta Diosninchipa ricay ñawinčhu juchata aparicun.

¹³ Waquin jipash biyüdacuna mana imasi ruracuynin captin, jilla cayman chayan. Wasin-wasin puricun. Wishllanta jaticächillar, imamanpis jatican. Washata rimallar purin. Manacajcunallata rimar chay-tucuyman chayachin. ¹⁴ Chaymi jipash biyüdacuna yapay majachacaptin, nuwapita alli canman. Wamrancuna yuriptin, wasi ruraynincuna mana pishingachu. Chaura achäqui mana cangachu pipis jamurpänanpaj. ¹⁵ Waquin jipash biyüdacuna imamanpis runapa-cajllanman jaticar, Supay munashallanta ruracaycan.

¹⁶ Juc irmänapa yawar-masin biyüda captin, wañupacushta yanapanman. Chaura jutucaj irmänucunapa umanta mana nanächinganachu. Juc biyüdapa píninpis mana captinraj, waccha captinraj, irmänucuna shuntanman.

Mayur irmänucunata alli ricananpaj

¹⁷ Irmänucunata alli ricashanpita mayur irmänucunata sumaj manchapacunquiman. Paycuna Tayta Diosninchipa shiminta sumaj willapäshunqui. Sumaj tantiyachishunqui. Chaymi alli ricanayquipis, tarichinayquipis camacan. ¹⁸ Tayta Diosninchipa shiminchüpis nin: «Türuta ama aruchiniquichu shiminta watarcur.» Jananmanpis nin: «Arupacujcuna arushanpita čhasquinman.»

¹⁹ «Mayur irmänush juchata aparicusha» nishuptiqui, ama čhasquipanquichu. Manchäga ishcay-quimsa irmänucuna ricash captinraj, čhasquinquiman. ²⁰ Rasunpa juchanpita mana wanacuptin, llapan irmänupa ricay ñawinčhu piñacunquiman waquincunapis manchapacunanpaj.

²¹ Timoteo, sumaj wiacamay. Irmänucunata llapantapis juc ñawillawan ricanquiman. Shunguyquiman tincuptinsi, mana tincuptinsi, alli ricanquiman. Caycunata willapaycaj Tayta Diosninchipa ricay ñawinčüpis, Washäcu Jesúspa ricay ñawinčüpis, anjilcunapa ricay ñawinčüpis.

²² Maygan irmänutapis cargunman čhurar, maquiquita umanman juclla ama čhuranquimanchu. Manchäga imanuy cawashantapis sumajraj musyapanquiman. Mana musyayniquian juchačhu aruj irmänuta čhuraptiqui, jamtapis jamurpäshunquipaj: «Timoteupis juchacäshiycan» nir. Ima juchamanpis ama jaticaychu. Manchäga Tayta Diosninchipa shungun munashannuya caway.

²³ Jishyačhu runa cashayquita, pačha nanaywan jishyaycashayquita musyashcä. Chaymi yacullata ama upunquichu. Manchäga ichicllatapis bünuta upunquiman.*

²⁴ Waquin irmänucuna unaycaman juchanta pacarächicun. Waquin irmänupa juchanmi ichanga pipis mana jurgapaycaptinsi, juclla musyacan. ²⁵ Chay-jina waquin irmänucuna allillata rurashan musyacan. Waquin irmänucuna alli rurashanta pipis mana ricanchu. Chaypis imay-imayllapis alli rurashancuna llapanmi ricacanga.

6

¹ Irmänucunapis maquinčhu cawashpan patrunninta alli ricanman. Manchäga waquin runa Tayta Diosninchitapis, shiminta tantiyachishätapis pampaman čhuranga.

² Patrunnin irmänu captinpis, alli ricanman. Ama taricunmanchu: «Irmänümi» nir. Manchäga sumaj arüshinman: «Irmänu-masičhümi aruyca. Paywan yačhänacümi» nir.

Jillarylapaj yarpashan

Timoteo, willapashajta llapan irmänuta willapanqui. Imata rurananpäpis sumaj tantiyachinqui. ³ Waquin irmänu: «Taytanchi Jesucristupa shiminta willapäcuyca» nirsi, umanpita jurgurcular imatapis riman. Rimashanga Jesúspa shiminwan mana tincunchu. Tayta Diosninchipa shungun munashannuy cawananchipäpis mana tantiyachimanchichu. ⁴ Paycuna yačhaj-tucullar, shiminman čhayashallanta riman. Upa caynинwan imallatapis tantiyachicun. Tincupänacuylallačhu arur, cushicärin. Chiquinacärin. Nanaparänacärin. Ticshaparänacärin. ⁵ Maganacärin. Llapantapis ruran Tayta Diosninchita mana wiycur. «Tayta Diosninchipa shiminta willacuyca» nir llapanpa janančhu cushish cawayta ashillar purin. ⁶ Tayta Diosninchipa maquinčhu cawar, rasunpa cushish cawanchi. Ichanga tarichimashallanchiwan cushish cawashuwan.

⁷ Llapanchi jinalla yurimushcanchi. Wañucur, imatapis mana apashunchu. ⁸ Chaymi micunanchipaj, jananchipaj caycaptin, cushishalla cawacushuwan. ⁹ Ríçuyayta ashijcunam ichanga, jucha aparicuyman čhayan. Quiquillanpaj imatapis ashir, runa-masinta

* ^{5:23} Waquin Bibliačhu birsiculu 23 witish caycan birsiculu 25 ushyanančhu.

ñiacachin. Chaypitam quiquinpis ñacayman chayanga. Ushyapacanga. ¹⁰ Jillayllata ashijcuna jatun juchaman chayan. Jillayllata ashijcuna achcajnam Tayta Diosninchita mana wiycunchu. Mana wiycushanpita tucuy-jinanpa ñacarcaycan.

Timoteuta piñapashan

¹¹ Timoteo, chay-niraj runacuna-jina ama cawanquimanchu. Manchäga Tayta Diosninchita manchapacuj runa canquiman. Paypa maquinchu cawar, shungun munashallanta rurar cawanquiman. Waran-waran sumaj yupachicuya yačhacunquiman. Runa-masiquitapis llaquipanquiman. Imaman chayarpis, ama yamacanquichu. Llapan runawan tantiyacuj canquiman. ¹² Ima captinpis, llapan shunguyquiwan Jesúzman yupachicunquiman. Paypa maquinchu imaycamanpis alli cawayta tarishana caycar, ama cačharinquimanchu. Tayta Diosninchipa acracushcashunqui alli cawayman churashunayquipaj. Jampis llapanpa ñaupanchu: «Tayta Diosninchipa maquinchu cawashaj» nir Jesústa chasquicushcanqui. ¹³ Cawachicuj Tayta Diosninchipa ricay ñawinčüpis, Washäcuj Jesúspa ricay ñawinčüpis willapaycaj. Mandaj Poncio Pilato tapuptinpis, Jesús mana chapacuranchu. Manchäga rasun-cajllata willaran. ¹⁴ Chaymi, Timoteo, Taytanchi Jesucristu cutimushancaman willapashajta ama junganquimanchu. Llapanta sumaj-sumaj charcunquiman.

¹⁵ Tayta Diosninchichi camacächishan junaj Jesús cutimunga.

Paylla alliman churash canan.

Quiquillan llap-llapanpaj munayniyuj.

Maquinchu llapan mandajcuna cawan.

Auturdäcunatapis maquinchu purichin.

¹⁶ Paylla imay-imaycamanpis cawacuj.

Achic-achicyaycajchu juyan.

Paytaga mana pipis ricashachu.

Ricaytapis mana junchu.

Tayta Diosninchichi alli ricash caycullächun.

Imay-imaycamanpis munayniyuj caycullächun.

Chaynuy caycullächun.

¹⁷ Llapan imacunapis ushyacajlla. Chaymi puchuy-puchuy jananchu cawaj irmänucunata willapanqui mana alli-tucunanpaj, rícu cashanman mana yupachicunapaj. Manchäga Tayta Diosnillanchiman yupachicunman. Payga mana pishičimanchichu. Manchäga cushishalla cawananchipaj yanapämanchi.

¹⁸ Chaymi puchuy-puchuy jananchu cawaj irmänucuna allillata rurar cawanman. Alli rurashanga mana imaypis ushyacaj canman. Alli shungu cashpan pitapis tarichinman. Yanapanman. ¹⁹ Sumaj tantiyacushun. Puchuy-puchuy jananchu cawajcuna alli cawayta munar, allillata imatapis ashin. Alli wasita jatarachinanpäpis simintuta sumaj rurachin. Chay-jina puchuy-puchuy jananchu cawaj irmänucunapis allillata rurar cawanman. Chaynuy cawaptin, Tayta Diosninchispis alli cawayta tarichinga.

Cartapa ushyanan

²⁰ Timoteo, carguyquita charcushayquicaman Tayta Diosninchipa shimillanta willapäcunquiman. Runacuna umallanpita jurgurcur rimashanta ama chasquipanquimanchu. Paycuna yačhaj-tucurpis, manacajllata tantiyachicun. ²¹ Waquin irmänucuna yačhaj-tucujcunapa shiminta wiyar, Tayta Diosninchiman mana yupachicunnachu.

Tayta Diosninchichi llaquipayculläshunqui, ari. Chayllana.

Timoteuman San Pablo cartacushan 2

Tantiyacunanchipaj:

Pablo cay cartata isquirbiran Timoteuman. Timoteupita musyayta munar, 1 Timoteupa jallarinanta liguinqui. Cay cartata Roma carsilpita-pacha Pablo isquirbiran. Wañuchinanta mayar, Timoteo watucunanta munaran. Ichanga mana camäpacuranchu. Chaymi sumaj anyapänanpaj cartacuran.

Pablo isquirbiran:

Mana pingacullar Jesúspa alli willacuyninta willapäcunanpita: *2 Timoteo 1.1-18.*

Alli murucu capitanninpa shiminta wiycushan-jina Jesústa wiycunanpita: *2 Timoteo 2.1-26.*

Jipata achcaj pantachicuj ricarimunanpita, mana uticällar Tayta Diosninchipa shiminta tantiyachicunananpita: *2 Timoteo 3.1-17.*

Wañuy janančhu captinsi mana llaquicushanpita, watucuj aywananta munashanpita, janaj pachačhu Tayta Jesús alli cawayman čuranañpita: *2 Timoteo 4.1-22.*

Pablo wamayashan

¹ Timoteo, nuwa Pablo cartacamü. Washäcuj Jesúspa caćhanmi caycä. Tayta Diosninchichi camacächiptin, shiminta willapäcur puriyä. Washäcuj Jesúspa shiminta časquicuptinchi, alli cawayta tarichimänanchi. ² Timoteo, wamrä-yupaymi canqui. Tayta Diosninchipis, Tayta Jesucristupis yanapayculläshunqui. Llaquipayculläshunqui. Allilla cawaycachilläshunqui.

Tayta Diosninchita alliman čurashan

³ Unay yawar-masicuna llapan shungunwan manchapacushan-jina nuwapis llapan shungüwan Tayta Diosninchita manchapacü. Shungüchu ima juchatapis mana pacarächichu. Timoteo, pagas-junajpis jampaj Tayta Diosninchita mañacuyä. Mana jungajchu. ⁴ Llaquicur wagashayquita yarpar, yapay tincuya sumaj munayä. Tincur, jatunpa cushicushäpaj. ⁵ Awillaryqui Loidapis, mamayqui Eunicipis llapan shungunwan Tayta Diosninchita wiycushanta musyä. Chaymi jampis Tayta Diosninchita llapan shunguyquian wiycushayquita tantiyacushäpaj.

Jesúspa shiminta willacur, ama pingacushuwanchu

⁶ Umayquiman maquita čuraycur mañacupti, Tayta Diosninchichi yaćhayta cama-pushcashunqui. Ama jasacanquimananchu. Manchäga yaćhacushayquiman-tupu imatapis sumaj ruranquiman. ⁷ Tayta Diosninchita Espíritu Santuwan yanapaycämanchi. Chaymi imatapis ama manchacushuwanchu. Imaman čhayaptinchisi, payga shacyächimanchi. Yanapämanchi runa-masinchipatis llaquinanchipaj, imatapis sumaj tantiyacurir rurananchipaj. ⁸ Chaymi Taytanchi Jesúspita willapäcushayqui-janan, carsilman wićhgachimashan-janan pampaman čurashuptiquisi, ama pingacunquichu. Manchäga Tayta Diosninchichi shacyächimashanchiman-tupu shiminta willapäcushun runacuna ñacachimaptinchisi.

⁹ Tayta Diosninchichi jishpichimashcanchi.

Acracamashcanchi maquillančhu cawananchipaj

Mana allita rurashanchipitachu acracamashcanchi.

Manchäga llaquipämashpanchi shungun munaptin acracamashcanchi.

Jishpichimänanchi-raycur Washäcuj Jesústa caćhamusha.

Mana imasi caycaptillan, llapanta camacächisha.

¹⁰ Tayta Diosninchichi llaquipäcuj cashanta tantiyacushcanchina.

Washäcuj Jesús ricarimushana.

Payga Washämajninchí.

Wañuytasi illarachisha.

Alli willapatapis tantiyachimashcanchi.

Shiminta wiyaptinchi, shungunchipis achicyacäcusha.

Mana ushyacaj cawaytapis tarichimanchi.

¹¹ Caycunata willapäcunäpaj Tayta Diosninchí cargüman churamasha. Quiquin acraca-masha caçhan canäpaj, shiminta willapäcunäpaj, shiminta tantiyachicunäpaj. ¹² Cananga Tayta Diosninchipa shiminta willapäcur purishäpita carsilchu ñacaycä. Chaypis mana pingacüchu. Nuwaga Tayta Diosninchiman yupachicü. Paypa maquinchu cawaycä. Cargüta charcushä junajcaman mana caçharimangachu. ¹³ Chaymi Tayta Diosninchipa shungun munashanta ruranayquipaj shimiña wiyacunquiman. Washäcu Jesúzman yupachicur, runa-masiquitapis llaquipanquiman. ¹⁴ Jesúspita willapäcushaga sumaj alli. Chaymi carguyquita charcunayquipaj Espíritu Santu yanapaycäshunqui. Payga maquinchu purichimanchi.

¹⁵ Musyashayquinuypis Asia marcacunachu irmänucuna llapan-yupay jaguirayca-masha. Figeluwan Hermógenespis jaguiraycamasha. ¹⁶ Irmänu Onesíforutam ichanga wasinpa Tayta Jesúsum sumaj yanapaycullächun. Onesíforuga mana yamacällar shacyächimasha. Carsilarächimaptinsi, mana pingacushachu. ¹⁷ Manchäga Roma marcca-caman shamusha. Mana tarimashancaman jamaytapis mana tarishachu. ¹⁸ Éfeso marcaçhu puriptipis, sumaj yanapämasha. Yanapämashanta musyanqui. Chaymi payta llaquipashpan cutimushan junaj Tayta Jesúsum alli cawayman churaycullächun.

2

Jesús-janan ñacar, ama llaquicushuwanchu

¹ Wawallau Timoteo, Washäcu Jesúsga llaquipäcujmi. Payga imaçüpis shacyächishunqui. ² Llapa runapa ricay ñawinchu willapäcushäcunata alli shungu runacunata willapanquiman. Paycunapis Tayta Diosninchipa shiminta tantiyachicunman.

³ Shiminta willapäcushanchipita tincuchiypa tantiyacushun. Alli murucucuna ñacashan-jina nuwanchipis Washäcu Jesú-janan ñacayta chasquicushawan. ⁴ Murucu cashancaman capitannin alli ricananta munar, chacrançüpis manash arunchu.

⁵ Puclajpis gänananpaj siñalashan räya chaupillançhüshi pucllan. ⁶⁻⁷ Chacra runapis murupacushan puguptin, quiquinräshi puntata micun. Tincuchiypa willapashajcunata tantiyacunquiman. Tayta Diosninchipa yanapäshunquipämi sumaj tantiyacunayquipaj.

⁸ Unay mandaj Davidpa willcan Washäcu Jesústa ama junganquichu. Payta wañushanpita Tayta Diosninchí cawarachimusha. Chay alli willapata willapäcur puriyä. ⁹ Jesúspa shiminta willapäcur purishäpita ñacaycächiman. Cadinarcurmí juyu runata-jina carsilaraycächiman. Tayta Diosninchipa shimintam ichanga carsilarächiyta mana camäpacunchu. ¹⁰ Chaymi imaman chayarpis, Tayta Diosninchipa shiminta willacur purinä-cashan mana rimacüchu. Chaynuy rurapti, acracushan runacunatapis Washäcu Jesú jishpichinga. Shiminta chasquicuptin, Tayta Diosninchipa ñaupançhu mana ushyacaj cawayta tarichingapaj.

¹¹ Rasuntachi rimapäcunpis:

«Jesú-janan wañush carga,

Jesúswanmi imaycamanpis cawashunpaj.

¹² Jesú-janan mana yamacällar ñacarpis,

Jesústa mandäshishunpaj.

Wasguiptinchim ichanga,

Jesúspis wasguimäshunpaj.

13 Shiminchita mana ćharcuptinchisi,
Jesús shiminta ćharcun.
Alli shungu cashannuya imay-imaypis cawacun» nir.

Mana tincupänacunapaj willapashan

14 Willapashajta Tayta Diosninchipa ricay ñawinčhu irmänucunata willapanqui. Llapanta yarpächinqui. Quiquin-pura ama tincupänacuchunchu. Tincupänacurga, imatapis mana jurgunchu. Wiyajcunapis Tayta Diosninchiman mananaćhi yupachicunganachu. 15 Chaymi Tayta Diosninchipa shungunman tincunayquipaj alli aruj runa-jina aruyniquito sumaj mirachinqui. Willapäcurpis, Tayta Diosninchipa shimillanta tantiyachinquiman pingayman mana ćhayayanayquipaj. 16 Tayta Diosninchita wasguipajcuna-jina ama rimanquichu. Paycunaga mana musyayninwan shimin atipashallanta riman. Tayta Diosninchitapis mana manchapacunchu. 17 Tincupänacujcunapa yarpashanga jirijina miran. Paycunapa llupinpa jatirmi, Himeneuwan Filetupis 18 llutanta rimar puriy-can. «Wañushcuna mayna cawarimusha» niptin, waquin irmänunchicunapis Jesúzman manaćhi yupachicunganachu.

19 Tayta Diosninchyi yarpashanmi ichanga mana imaypis rucacanchu. Paypa shiminchu nin: «Maquinčhu cawajcunata Tayta Diosninchyi ricsin.»* Chaynuypis nin: «Tayta Diosninchita jayarajcuna jucha aparicuypta ashucunman.»

20 Tincuchiypa tantiyacushun. Puchuy-puchuy janančhu cawaj runapa wasinčhu achcash lätuncuna caycan: waquinga juripitash, waquinnash jillaypita. Waquinshi ichanga jirullapita, mitullapita. Waquintash alli ñawinpa rican, waquintanash mana. Chay-jina runacunapis caycan. 21 Juchanpita wanacuptin, alli ñawinpana Tayta Diosninchyi pitapis ricanga. Paypa shungun munashannuya cawar, shungunmanpis tincunga. Shungun munashallanta rurar, cawanga.

22 Müsucuna shungun munapashallanta ruran. Jammi ichanga Tayta Diosninchipa shungun munashallanta ruranquiman. Payllaman yupachicunquiman. Runamasiquita llaquipanquiman. Llapan irmänucunawan allilla cawanquiman. Paycuna llapan shungunwan jayarar, Tayta Diosninchita manchapacun. 23 Runa tincupänacushanman ama jaticanquichu. Paycuna upa cayninwan, mana musyayninwan chiquinacuyllaman ćhayan. 24 Tayta Diosninchipa maquinčhu cawaj runa runamasinwan ama tincupänacunmanchu. Manchäga llapanwan alli tantiyanacunman. Tantiyayta mana atipaptinsi, alli shimillarpa tantiyachinman. 25 Tincupajcunataga alli shimillarpa piñacunman. Capasćhari Tayta Diosninchyi camacächiptin, wanacunga. Wanacuptinga, shiminpis shungunman ćhayanga. 26 Chayrämi supaypa maquinčhu cawashanpita Tayta Diosninchyi jishpichinga. Supaypis maquinčhu mana purichinganachu.

3

Jipata sasa caway cananpaj willacushan

1 Timoteo, sumaj tantiyacunquiman. Jipataga sasa caway canga. 2 Waquin runacuna runa-masinta mana llaquipar, quiquillanpaj yarpaćhacunga. Jillayllapaj wañunga. Sumaj-tucur alli cashanta musyachicunga. Alli-tucullar puringa. Runa-masinta ashllinga. Maman-taytantapis mana wiyacungachu. Yupay-tucuylalačhu cawanga. Tayta Diosninchita mana manchapacungachu. 3 Jyu cashpan cuyapäcuytapis mana yaćhangachu. Jagayash cashpan piwanpis alli ricanacuyta mana yaćhangachu. Tumpacullar puringa. Shungun munashallanta imatapis ruranga. Pasaypa jyu runa canga. Tayta Diosninchipa shungun munashannuy rurajcunatapis chiquinga. 4 Ishcay căra car, shimintapis mana ćharcungachu. Pishi-yarpayyuj canga. Pingacuyninpis ushyacash

* 2:19 Números 16.5.

canga. Shungun munapashallanta imatapis rurar, Tayta Diosninchipäga mana imasi jucungachu. ⁵ Runa ricanallanpämi payta manchapacuj-tucunga. Shimintam ichanga wiyacuytapis mana munangachu. Chay-niraj runacunapita witicunquiman.

⁶ Waquincunana yačhaj-tucur warmicuna-raycullar juc runacunapa wasinman aywan. Warmicunapis pishi-yarpayuj car, juchacushanpita llaquish car, shungun munapashallanta ashij car, ⁷ runapa shimintapis čhasquicuj-čhasquicujlla shuyaycan. Ichanga chay warmicuna Tayta Jesús pí cashantapis mana imaysi tantiyacungachu. ⁸ Chay yačhaj-tucuj runacunaga Janéswan, Jambréswan tincun. Paycuna Moisésta ticrapuran. Chaynuymi yačhaj-tucujcunapis Tayta Diosninchita ticrapun. Jucha aparicuylaman chutacun. «Tayta Diosninchiman yupachicü» nirpis, shimillan riman. ⁹ Yačhaj-tucurpis, allíchüga mana llucshingachu. Upa cashanga llapan ricay musyacanga. Janéswan Jambrés pingayman chayashan-jina paycunapis pingayman chayanga.

Timoteuta piñapashan

¹⁰ Timoteo, jammi ichanga sumaj puríshimashcanqui. Llapan shunguyquiwan shimita čhasquicushcanqui. Nuwa-jina cawashcanqui. Yarpashätapis tantiyacushcanqui. Yupachicushä-jina Tayta Diosninchiman yupachicuycanqui. Tantiyacushä-jina imapitapis tantiyacunqui. Llaquipäcushä-jina pí-maytapis llaquipanqui. Mana yamacashä-jina imaman chayarpis, ama yamacanquimanchu. ¹¹ Antioquia marcačhu, Iconio marcačhu, Listra marcačhu jaticačhar ushyamashantapis, ñacachimashantapis musyanqui. Tucuyjinanpa ñacachimaptinpis, Tayta Diosninchi jishpichimasha. ¹² Pipis Washäcuj Jesúspa maquinčhu cawar Tayta Diosninchipa shungun munashanta rurarga, chiquir ushyash cawanga. Ñacaymanpis chayanga. ¹³ Yačhaj-tucur juchačhu arujcunapa shungunmi ichanga waran-waran jyu cayman chayanga. Paycunaga yačhaj-tucursi, rimashanta mana musyanchu. Shiminta čhasquicujcunatapis llutanta yačhaycächin.

¹⁴ Timoteo, jammi ichanga sumaj yačhacushcanqui. Shunguyquiman Tayta Diosninchipa shimin chayash caycaption, ama junganquichu. Nuwacuna willapashajta musyanqui. ¹⁵ Wamralla cashayquipita-pacha Tayta Diosninchipa shimita yačhacushcanqui. Shiminta yačhacur, shungun yarpashantapis tantiyacunquipaj. Chaymi Washäcuj Jesúzman yupachicushpanchi jishpichimänanchitapis tantiyacunchi. ¹⁶ Tayta Diosninchi quiquinmi shimita isquirbichisha. Paypa shimin allim. Chaymi shungun yarpashallanta tantiyachicushuwan. Runa llutanta yarpaptinpis, shimin nishannuya tantiyachicushuwan. Llutanta ruraptinpis, piñapäšhuwan. Allilla cawanananpaj anyapäšhuwan. ¹⁷ Maquinčhu cawashpan shimita tantiyacurmi, Tayta Diosninchipa shungun munashallanta rurar cawanga.

4

Washäcuj Jesúspa willapanta imaysi willacunananpaj shacyächishan

¹ Washäcuj Jesú cutimur, llapan runata maquinčhu purichinga. Wañushcunatapis, cawajcunatapis imata rurar cawashanpita tapunga. Chaymi cananga shimita sumaj wiyacunayqui. Tayta Diosninchipa ricay ñawinčüpis, Washäcuj Jesúspa ricay ñawinčüpis willapaycaj. ² Runacuna wiyaptinpis, mana wiyacuptinpis, Tayta Diosninchipa shimita mana yamacällar willapäcunquiman. Llutanta yarpaptin, juchačhu aruptin, piñapanquiman. Chaynuypis alli shimillayquipa shacyächinquiman. Tantiyacurir-tantiyacurir paycunata yačhachinquiman. ³ Jipata runacuna Tayta Diosninchipa shimita wiyayta mana munangachu. Manchäga shungunman tincushallanta rimajcunata ashinga. Paycunaga imatapis mishquichipayllapa yačhachinga. ⁴ Tayta Diosninchipa shimita mana wiyayta munar, upa-tucunga. Chaymi imatapis umanman chayashallanta rimar puricunga. ⁵ Jammi ichanga tantiyacushpayqui

ama llutäpacunquichu. Runacuna ñiacachishuptiquisi, ñasquicunquiman. Mana yamacällar pü-maytapis Jesúspita willapanqui. Carguyquitapis sumaj ñarcunqui.

⁶ Wañuy janächüna caycan. Wañuchimaptin, Tayta Diosninchita jarashan-yupay yawarnipis jičhash canga. ⁷ Murucucuna ñacashan-jina tucuy-jinanpa ñacashcä. Puclajcuna callpan ushyacashancaman puclashan-jina nuwapis llapan shungüwan cargüta ñarcushcä. Tayta Jesúspa shimin nishannylla cawar, willapäcushcä. ⁸ Tayta Diosninchipa shungunman tincushäpita allita ñasquij-ñasquij-jina Tayta Jesús alliman ñuramänanta shuyaraycä. Ichanga mana nuwallatachu alliman ñuramanga. Manchäga allillata rurashpan llapan shungunwan cutimunanta shuyarajcunatapis alliman ñurangana. Cutimushan junaj llapan runapa shungunta musyapar, allimanpis, mana allimanpis ñurangana.

Timoteuta yapay piñapashan

⁹ Timoteo, watucamaj juclla shamunqui, ari. ¹⁰ Irmänu Demás imancunapäpis alläpa yarpačhacur, quiquilläta jaguiraycamar Tesalónica marcaman aywacusha. Crescentina Galacia quinranman aywacusha. Tituna Dalmacia quinranman aywacusha.

¹¹ Lucasllana yanagaycäman. Chaymi Marcoswan ishcaniqui shamunqui. Payga Tayta Diosninchipa shiminta willapäcupti, yanapämanga. ¹² Tíquicuta Éfeso marcaman cačhashcä. ¹³ Shamurga, punchütapis apacamunqui. Tróade marcačhu irmänu Carpupa wasinčhu jaguimushcä. Librucunatapis apacamunqui. Pitush-caj papilcunatapis jungamurunquiman.

¹⁴ Jíru tacaj Alejandrumi ichanga tucuy-jinanpa pampaman ñuramasha. Llutanra rurashanman-tupu Tayta Diosninchu unyanta cutichinga. ¹⁵ Chay runaga imata willapäcushanchitapis pampaman ñuraycan. Chaymi mayaj-mayajlla canayquipaj willapaycaj.

¹⁶ Puntata Roma marcačhu auturdäman ñhayapti, pipis mana nanachicamashachu. Llapanmi jaguiraycamasha. Jaguiramajcunapa unyanta Tayta Diosninchu ama yarparanmanchu. ¹⁷ Japallä caycaptisi, Tayta Jesús mana cačharimashachu. Manchäga waran-warán shacyaycächiman. Chaymi shiminta sumaj willapäcushcä jäpa runacunapis wiyacunanpaj. Maquinčhu purichimar, wañuypitapis jishpichimasha. Micucuj liyupita washämaj-jina wañuypitapis washämasha. ¹⁸ Juchallicucunapa maquinpitapis Tayta Jesús washämanga. Janaj pachaman shuntacamanga. Ñaupallančhu purichimanga. Chaymi paytaga imay-imaypis llapan runa alliman ñuraycullächun. Chaynuy caycullächun.

Cartapa ushyanan

¹⁹ «Pablush wamayaycäshunqui» ninqui mama Priscilata,* runan Aquilata, Onesíforucunata. ²⁰ Irmänu Erastuta Corinto marcačhu jaguiycamushcä. Trófimutapis jishya chariptin, Mileto marcačhu jaguiycamushcä. ²¹ Tamya quilla mana ñhayamushancamalla juclla shamunqui, ari. Irmänunchi Eúbulo, Pudente, Lino, irmäna Claudia, waquin irmänucunapis wamayaycäshunqui. ²² Tayta Jesús llapaniquita yanapayculläshunqui. Tayta Diosninchipis llaquipayculläshunqui. Chayllana.

* ^{4:19} «Priscila» mama Priscapa cuyay cutin caran.

Tituman San Pablo cartacushan

Tantiyacunanchipaj:

Pablo cay cartata isquirbiran irmänu Tituman. Payga Washäcuj Jesúsman sumaj yupachicuran. Timoteo yanagashan-jina Pabluta yanagaran Tayta Diosninchipa shiminta willacäshinanpaj. Creta marcaman aywarpis, ishcanin willapäcuran. Chay marcačhu waquin Creta runacuna Jesúspa shiminta čhasquicäriran. Chaypita juc marcamanna Pablo aywacuran. Aywacur Tituta jaguiycuran irmänucunata tantiyachicunapaj, ricananpaj. Titupita musyayta munar, liguinqui: 2 Corintios 2.13; 7.6–16; 8.6; 8.16–23; 12.18; Gálatas 2.1–3; 2 Timoteo 4.10.

Creta marcapita Pablo aywacur, Tituta mana jungaranchu. Chaymi shacyächiyta, anyapayta munar, cartacuran. Chaynuypis waquin pantachicuj Israel runata upällachinanpaj cartacuran.

Pablo isquirbiran:

Jesúsman yupachicuj mayur irmänucunata cargunman čhurananpita, irmänucunata sumaj ricäshinanpita, irmänucuna pantachicuj Israel runacunapa shiminta mana čhasquipänanpita: *Tito 1.1–16.*

Irmänucunata sumaj tantiyachiptin Tayta Diosninchipa shiminta wiycunapita: *Tito 2.1–3.2.*

Irmänucuna allillata rurar cawanapita: *Tito 3.3–15.*

Pablo wamayashan

¹ Titullau Tito, nuwa Pablo cartacamü. Nuwata Tayta Diosninchichi maquinčhu purichiman. Paymi cačhacamasha Washäcuj Jesúspa shiminta willacur purinäpaj. Chaymi shiminta willapäcuyčä acracushan runacuna payman sumaj yupachicunapaj, shiminta sumaj tantiyacunapaj. Paymi acracamashcanchi shungun munashan-nuy cawananchipaj. ² Wiyacuptinchi, imaycamanpis alli cawayta tarichimäshunpaj. Payga shiminta llapanta čharcun. Chaymi cay pachata mana camallarsi: «Wamracha-cushäcunata shuntamushaj imaycamanpis cawanapaj» nir aunishanta yupachicunchi. ³ Aunishanta canan wican may-chayčüpis willacucänanpaj nuwatapis Tayta Diosninchichi čhuramasha. Payga Washämajninchim. ⁴ Irmänu Tito, Jesúsman yupacushayquipita wawä-yupay caycanqui. Tayta Diosninchipis, Washäcuj Jesúspis llaquipäshushpayqui yanapayculläshunqui. Allilla cawaycachilläshunqui, ari.

Mayur irmänucuna imanuy cawanapäpis tantiyachishan

⁵ Tito, Creta marcačhu jaguishcaj llapan irmänucunata ricanayquipaj. Marcan-marcan mayur irmänucunatapis tantiyachishajnuylla čhuranqui irmänunchicunata ricanapaj.

⁶ Mayur irmänucuna Tayta Diosninchita manchapacur cawanman. Pitapis achäquita ama ashipanmanchu. Warmillanwan alli juyanman. Wamrancunapis Tayta Diosninchita manchapacunman. Pitapis ama jitapanmanchu: «Wamrancuna jilla allgu. Upa rinri» nir. ⁷ Irmänunchicunata ricaj runaga Tayta Diosninchipa maquinčhu cawan. Chaymi llapan runa alli ñawinwan ricanman. Nishan-nishan imatapis ama ruranmanchu. Pitapis ama nanaparanmanchu. Upyallačhu ama arunmanchu. Piwanpis maganacuya ama ashinmanchu. Ama suwacunmanchu. ⁸ Manchäga pii-maytapis pachächinman. Alli runa canman. Imatapis sumaj tantiyacunman. Tayta Diosninchita manchapacunman. Paypa shungun munashallanta ruranman. Imata ruranapäpis sumaj yarpačhacunman. ⁹ Jesúspita nuwacuna yačhachishätapis llapan shungunwan čharcunman. Chayraj irmänunchicunata yačhachinman. Tayta Diosninchita wiycunapaj shacyächinman. Chucru shungucunatapis piňapanman Washäcuj Jesúspa shiminta tantiyacunapaj.

¹⁰ Tito, waquin runacuna Washäcu Jesúspa shiminta mana wiycunchu. Manchäga shimin chayashanta rimar, irmänucunata pantachinan-cashallan puriycan. «Jirucuy» niy-can. ¹¹ Jillayta ashinan-raycullar pantaycächin. Wasin-wasin purir tincupänacaycächin. Chaymi paycunapa shiminta ama chasquipanquichu.

¹² Yačhaj Creta marca runapis niran: «Creta marca runacuna llulla. Juyu. Jilla. Pačhallanpaj cawan.» ¹³ Rasunpa Creta runacuna chay-niraj caycan. Chaymi irmänucuna pantash captin, sumaj piñacunqui Tayta Diosninchita sumaj wiycunapäpis, ¹⁴ «Moiséspa shimintapis, Israel runacuna yarpashantapis charcuy» niycunapa shiminta mana chasquipänanpäpis. Sumaj willapaptiqui, pantachicujcunapa shiminta mana chasquingachu. ¹⁵ Manchapacuptinchi, alli ñawinwan Tayta Diosninchita ricamanchi Moiséspa shiminta mana charcuptinchisi. Wasguipajcunatam ichanga juyu ñawinwan rican. Paycunaga jucha aparicuyllačhu arun. Imatapis mana manchapacunchu. ¹⁶ «Tayta Diosninchita wiycü» nirsi, juyu. Chiqui. Alli cawayta mana camäpacunchu.

2

Imanuy cawananchipäpis tantiyachishan

¹ Tito, jammi ichanga imaypis Tayta Diosninchipa shimillanta willapäcunqui, ari. ² Chacha irmänucuna Tayta Diosninchipa shiminta charcunman. Tantiyacurir-tantiyacurir imatapis rimanman. Runa-masintapis alli ñawinwan ricanman. Imatapis allillata ruranman. Tayta Diosninchimanpis llapan shungunwan yupachicunman. Llaquipäcu canman. Ima ñacaytapis ičhipunman. ³ Chacha irmänacunapis Tayta Diosninchita manchapacunman. Pipa washantapis ama rimanmanchu. Upyallačhu ama arunmanchu. Manchäga juc ricacunapaj Tayta Diosninchita manchapacur cawanman. ⁴ Mushuj majachacash warmicunatapis willapanman majantawan wamrancunata alli ricananpaj, ⁵ sumaj tantiyacurir-tantiyacurir imatapis rurananpaj, mama-warmi cananpaj, yawar-masincunata alli ricananpaj, llaquipäcu cananpaj, majanta wiycunananpaj. Manchapacur cawapterna, mana pipis Tayta Diosninchipa shiminta pampaman churangachu.

⁶ Müsucunapis sumaj tantiyacurir-tantiyacurir imatapis ruranman.* ⁷ Tito, ricacushunayquipaj quiquipis manchapacur cawanquiman. Pitapis willapar, alli shimillayquipa willapanquiman. Tayta Diosninchita manchapacunquiman. ⁸ Paypa shimillanta yačhacuptiqui, mana pipis pampaman churashunquipächu. Shimüta wiycamaptiqui, mana pipis ashllimäshunchu. Imata rimananpäpis achäquita mana taringachu.

⁹ Piyun purij irmänucunatapis willapanqui patrunninta wiycunananpaj, alli ricananpaj. Shimillan atipash ama cachunchu. ¹⁰ Ama suwacuchunchu. Imatapis mana yatapacuptinga, llapan runa tantiyacunga Tayta Diosninchchi Washäcuñinchchi cashanta, shimin alli cashanta.

¹¹ Tayta Diosninchchi llaquipäcu cashpan llapan runata janaj pachaman jishpichinan-raycur Washäcu Jesústa cačhamusha. ¹² Llaquipaycäaptinchi, jucha aparicuypita wana-cushun. Shungunchi munashanta imatapis ama rurashunchu. Manchäga Tayta Diosninchita manchapacur, allillata rurar cawashun. ¹³ Taytanchi Jesucristu warasi-chicasí cutimunga. Paymi Tayta Diosninchchi. Washämajninchchi. Shuntacamänanchita shuyar, manchapacur cawashun. ¹⁴ Washäcu Jesú wañuymapis chayasha nuwanchi-raycur juchapita wanacunanchipaj. Wanacuptinchi, Tayta Diosninchchi llapan juchanchita junganga. Llapantapis rurasha maquinčhu cawananchipäpis, shungun munashallanta rurananchipäpis.

¹⁵ Tito, willapashajta llapanta tantiyachinqui. Shacyächinqui. Sumaj piñapanqui. Pipis pampaman churashunquiman.

* **2:6** Griego rimayčhu müsupita rimar, yarpaycan 20-40 watayuj cashanta.

3

¹ Llapan irmänunchicunata willapanqui mayur runacunatapis, auturdäcunatapis wiyanunapaj. «Arushun» niptin, arunman. ² Pitapis pampaman ama churanmanchu. Ama tincupänacunmanchu. Manchäga llaquipänacuyta, alli ñawinwan ricanacuyta yachanman.

³ Ñaupata Tayta Diosninchita mana wiyacushanchi wíchan upa rinri cashcanchi. Rumi shungu cashcanchi. Jucpa shimillanta wiyacushcanchi. Shungunchi munashallanta rurar, paçhallanchita ashishcanchi. Warmin-warmin purishcanchi. Runa-masinchita juyu ñawinchipa ricashcanchi. Juyu cashcanchi. Chiquinacuyllaçhu arushcanchi.

⁴ Chaypis Tayta Diosninchchi jishpichimajninchchi.

Llaquipämashanchitapis musyachimashcanchi.

Chaynuypis llapan runata llaquipan.

⁵ Mana Moiséspa shiminta charcushanchipitachu llaquipämashcanchi.

Manchäga alli shungu cashpan washämashcanchi.

Ushyacuptinchi, juchanchita mana yarparanchu.

Chayraj yurish-jina caycanchi.

Alli ñawinwan ricaycämanchi.

Shungun munashallanta rurananchipaj Espíritu Santu shacyächimanchi.

⁶ Payta Tayta Diosninchchi caçhamusha Washäcu Jesú camacächiptin.

Payga jishpichimajninchim.

⁷ Llaquipämashpanchi juchaynajta ricamanchi.

Wamran cashpanchi maquinchu imaycamanpis cawananchita shuyarcaycanchi.

⁸ Tito, Tayta Diosninchipa shungun munashallanta willapaycaj. Chaymi manchapacur cawanapaj irmänunchicunata sumaj willapanqui. Paycuna yanapänacunman. ⁹ Ichanga pipis: «Tayta Diosninchchi alli ricamänanchipaj Moiséspa shimintapis charcushuwan. Unay auquillunchi yarpashannylla rurashuwan» nir tincupäshuptiqui, upällachinquiman. Paycuna ima rimashantapis mana musyanchu. Umallanpita imatapis jurgycan.

¹⁰ Paycunata juc-ishcay cutilla piñacunqui. Mana wiyacuptin irmänunchi captinsi, jargurinqui. ¹¹ Tincupänacuyllaçhu arujcuna juchata aparicullar purin. Quiquinpa juchanpita fiacaymanpis chayanga.

Tituta piñapashan

¹² Irmänunchi Artemasta carpis, Tíquicuta carpis, caçhamuya yarpaycä. Mayganpis chayamuptin, Nicópolis marcaman juclla shamunqui tincunanchipaj. Tamya wíchan captin, chay marcaçhu juyapäriya yarpaycä. ¹³ Yaçhaj Zenastapis, Apolutapis yanapanqui, ari. Tayta Diosninchipa shiminta willapäcur puriptin, imasi pishishancunata tarichinqui. ¹⁴ Pitapis tarichinanpaj irmänunchicuna sumaj arunman. Tayta Diosninchipa maquinchu cawar, ama jilla runa cashunchu.

Cartapa ushyanan

¹⁵ Caychu caycaj irmänunchicuna llapanmi wamayäshunqui. Jampis Jesú-janan llaquipämashanchi irmänucunata wamayapämanqui, ari.

Llapallayquita Tayta Diosninchchi yanapayculläshunqui allilla cawanayquipaj. Chayllana.

Filemónman San Pablo cartacushan

Tantiyacunanchipaj:

Pablo cay cartata isquirbiran irmänu Filemónman. Payga Colosas marcačhu ti-yaran. Chay marcačhu Pablo willapäcuptin, Jesúspa shiminta Filemón čhasquicuran. Irmänucunapis paypa wasillančhu jutucaj Tayta Diosninchita alliman čhurananpaj. Pablupis Colosas marcaman aywar, Filemónpa wasinčhu pachacuran. Paywan sumaj yačhänacuran.

Filemónman cartacur, uywaynin Onésimupaj Pablo parlaparan. Onésimuga Filemónpa maquinčhu cawar, čaquinta jurgush caran. Roma marcačhu Pabluwan tincuran. Washäcuj Jesúspita willapaptin, čhasquicuran. Sumaj ricaptinsi, patrunninman cuticu-nanta munaran. Chaymi Onésimupaj parlaparan. Filemóntapis piñaparan Onésimupa juchanta mana yarparänanpaj, mana ūiacachinanpaj. Manchäga alli ūawinwan ricar, irmänu-masinpana čhasquicunanta munaran.

Pablo isquirbiran:

Filemónta wamayashanpita, Washäcuj Jesúzman sumaj yupachicushanpita: *Filemón 1.1-7.*

Onésimupaj parlapushanpita: *Filemón 1.8-22.*

Filemónpaj Tayta Diosninchita mañacapushanpita, waquin irmänucuna wamayashan-pita: *Filemón 1.23-25.*

Pablo wamayashan

¹⁻³ Filemónllau Filemón, nuwa Pablo, irmänunchi Timoteuwan ishcani cartacamü Washäcuj Jesú-janan runacuna wičgaraycächimaptinsi. Tayta Diosninchipa shiminta willapäcur puríshimashayquipita sumaj cusicü. Wasiquičhu llapan juturaj irmänunchicunatapis, mama Apiatapis, yanapäcuj Arquiputapis wamayapämäy, ari. Llapaniquita Washäcujinchi Jesúspis, Tayta Diosninchipis alli ūawinwan ricayculläshunqui. Llaquipäshushpayqui sumaj yanapayculläshunqui.

Tayta Diosninchita alliman čhurashan

⁴ Jamta yarpararmi, sumaj cusicü. Chaymi waran-waran Tayta Diosninchita mañacü: ⁵ «Taytallau Tayta, ima allish Filemón Tayta Jesúzman sumaj yupachicun. Irmänucunatapis alli ūawinwan rican. ⁶ Ichanga: «Yupachicü» nirsi, alli cawananpaj sumajraj tantiyacuchun. Washäcujinchi Jesú-raycur allillata ruraycullächun» nir. ⁷ Irmänunchicunata sumaj llaquipashayquita musyä. Shacyächiptiqui, shungunpis achi-cyacäcusha. Chayta rurar, nuwatapis shacyächimanqui. Shungüpis achicyacäcusha.

Onésimupaj Pablo mañacapushan

⁸ Chaypis Washäcuj Jesúspa maquinčhu cawar, piñacunaj camacan. ⁹ Ichanga llaquipashpä alli shimmilläpa mañacushayqui auquin carpis, Washäcuj Jesú-janan wičgarächimaptinpis. ¹⁰ Uwyayniqui Onésimupaj mañacushayqui, ari. Wičgararpis, Onésimuta wawäta-yupaymi ricä shimipita Jesúzman yupachicuptin.* ¹¹ Ņaupata ricay ūawiquičhu manacaj runash caran. Cananmi ichanga ishcaninchita sumaj yanapaycämanchi. ¹² Shungü llaquiraycaptinsi, maquiquichüna cawananpaj cutiycächimü. ¹³ Jesúspa alli willapanta willapäcushäpita wičgarapti, ricamaj pishiman. Quiquipi yanapämäyta mana camäpacuptiqui, Onésimuta maquičhu charayta yarpashcä. ¹⁴ Ichanga mana aumimashayquicaman charänä mana camacanmanchu. Jamurpämanquimanmi. Alli shimiquipa aumimaptiquiraj, yanapämämanman. ¹⁵ Ņaupata Tayta Diosninchita camacächiptinčhi, Onésimo čaquinta jurgusha. Cananmi ichanga

* **1:10** Rimayninčhu: «Onésimo» ninanga: «Yanapäcuj» ninanmi.

maquiquipita mana imaypis jishpipäshunquipächu. ¹⁶ Ñaupata uywayniqui captin, maquiquiçhu charashcanqui. Jesúsman yupachicuptinmi ichanga, yaçhänacushayqui irmänuta-jina ricanquiman. Llaquipäshä-jina sumaj llaquipanquiman.

¹⁷ Chaymi shungunchi tincuycaptin, nuwata-jina Onésimutapis alli ñawiquiwan ricanquiman. ¹⁸ Imaçħusi llutanta rurash captin, imatapis jaga-tucush captin, willamay. Llapanta jugaricushaj. ¹⁹ Quiquï cartacaycämü: «Llapallanta cutichishayqui» nir. Ichanga Tayta Diosninchipa willacuyninta yaçhachishajpita, jagä-yupay caycanqui. Chaypis mana rimapäshayquinachu. ²⁰ Manchäga irmänu, Tayta Diosninchı-raycur yanapaycallämay, ari. Washäcuj Jesús-raycur shacyaycachillämay, ari. ²¹ Wiyacujmi canqui. Chaymi jucishcayllata cartacamuptisi, llapallantačhi ćharcuj aywanqui.

²² Mañacärishayquita wiyar carsilpita llucshinäpaj Tayta Diosninchı camacächiptin, yapay watucushayqui. Pachächimanqui, ari.

Cartapa ushyanan

²³⁻²⁴ Puríshimaj Marcospis, Aristarcupis, Demáspis, Lucaspis wamayämushunqui. Irmänunchi Epafraspis wamayämushunqui. Paytapis Washäcuj Jesús-janan carsila-raycächin.

²⁵ Chayllata cartacallämü. Taytanchi Jesucristu llaquipäshushpayqui yanapay-culläshunqui, ari. Chaynuy caycullächun.

Hebreoscunaman cartacushan

Tantiyacunanchipaj:

¿Piraj cay cartata isquirbiran? Mana musyanchichu. Waquin yarpan Lucas isquibishanta, Pablo isquibishanta, Apolos isquibishanta, Silas isquibishanta. Waquin yarpan pipis Israel runacunapita juc yačhaj isquibishanta. Pi carpis Israel masincunapaj, hebreo rimayta yačhajcunapaj isquibiran.

Cay cartata isquirbij sumaj llaquish caycaran Israel-masincunapita. Paycuna Jesúsman yupachicushan-janan runacuna ñacachiptin, Moiséspa shimintaraj ĉarcuyta munaran. Chaymi Washäcuj Jesúsllaman yupachicunanta munar, isquirbij runa cay cartata apachiran.

Isquirbij isquirbiran:

Washäcuj Jesúsman anjilcuna mana tincushanpita: *Hebreos 1.1-2.18.*

Washäcuj Jesúsman Moisés mana tincushanpita: *Hebreos 3.1-4.13.*

Washäcuj Jesúsman cüracuna mana tincushanpita: *Hebreos 4.14-7.28.*

Washäcuj Jesúswan juc parlanacuya camacächishanpita: *Hebreos 8.1-10.39.*

Tayta Diosninchipa maquinčhu unay cawaj runacunata ricacunapita: *Hebreos 11.1-40.*

Ñacarpis Washäcuj Jesúsman yupachicur cawanapita: *Hebreos 12.1-29.*

Allillata rurar Tayta Diosninchipa shungun munashannylla cawanapita: *Hebreos 13.1-25.*

Jallarinan

¹ Unay wican Tayta Diosninchshi shungun munashanta sumaj musyachicuran. Unay auquillunchicunata achca cutipa, tucuy-jinanpa willacujnincunawan musyachicuran.

²⁻³ Canan wicanmi ichanga Wawanwan shungun munashanta musyachimashcanchi. Paywanmi Tayta Diosninchillap-llapanta camaran. Llapan camashancunata Wawanpa maquinman ĉurasha. Quiquishllan cashpan Tayta Diosninchipa shungun yarpashantapis musyachimanchi. Payga sumaj munayniyuj. Janaj pachapis, cay pachapis maquinčhu caycan. Paypa shiminta llap-llapan wiyan. Llapan runapa juchanta Tayta Diosninchshi mana imaysi yarparänanpaj nuwanchi-raycur rusčhu wañuran. Jinarcur janaj pachaman cuticur, Tayta Diosninchita mandäshinanpaj diricha-caj lädunman jamacuran.

Jesúsman anjilcuna mana tincushan

⁴⁻⁵ Tayta Diosninchshi Wawanta sumaj alli ñawinpa rican. Wawanman anjilcuna mana tincunchu. Anjilcunata maygantapis mana wamrachacuranchu. Wawanta ricsichicurmi ichanga, Tayta Diosninchshi niran:

«Wawämi canqui.

Nuwapita cawanqui.»

Maygan anjiltapis mana musyachiranchu:

«Taytayqui cashaj. Wawä canqui» nir.*

⁶ Manchäga japallan Wawanta ricsichicur, Tayta Diosninchshi niran:

«Llapan anjilnícuna Wawäta manchapacur alliman ĉuranman.»*

⁷ Anjilcunapaj musyachicur niran:

«Anjilcuna cačhá cashpan wayra-jina shimita purichinga.

Nina-jina shungü munashanta ruranga.»*

⁸ Wawanpämi ichanga niran:

* **1:4-5** Salmo 2.7; 2 Samuel 7.14. * **1:6** Deuteronomio 32.43. * **1:7** Salmo 104.4.

«Taytallau Tayta, munayniyuj cayniquiga mana imaypis ushyacangapächu.
Maquiquíchu cawajcunatapis allilla cawachinqui.

9 Jucha aparicuyta wasguipashcanqui.

Imatapis rurar, Tayta Diosninchipa shungun munashannuylla cawashcanqui.
Chaymi runa-masiquicunapita jamlleta acracushcaj.

Cushi-cushilla cawanayquipaj camacächishcä.

Nuwalla Tayta Diosniqui cä.»*

10 Tayta Diosninchipa shiminčhu juctapis nin:

«Taytallau Tayta, manaraj imapis captillan, cay pachata camarayqui.

Janaj pachatapis maquiquiwan rurarayqui.

11 Llapan camashayquicuna ushyacangapaj.

Quiquiquim ichanga imaysi mana ushyacanquipächu.

Janaj pachawan cay pacha müdana-jina mauokayangapaj.

12 Mauca müdanata-jina lluyllurinqipaj.

Müdanata rucaycaj-jina rucarinquipaj.

Quiquiquim ichanga mana rucacanquipächu.

Imaysi mana ushyacanquipächu.»*

13 Maygan anjiltapis Tayta Diosninchichi mana niranchu:

«Diričha-caj lädüman jamacuy cunčharyuyquicunata pampaman čhurashäcaman.»*

14 Payga anjilcunata cačhacaycämun mandunta rurananpaj, shiminta čhasquicucunata ricananpaj. Čhasquicucunata Tayta Diosninchichi jishpichinga.

2

Tayta Jesústa mana jungananpaj

1 Chaymi Tayta Diosninchipa shiminta sumaj wiycushun. Mana wiycurgua, llutanmanpis čhayarushuwan. **2** Unay wican anjilcuna willapämashanchita čharcunanchi caran. Mana čharcucunata jucha aparicushanman-tupu Tayta Diosninchichi ñacachiran. **3** Chaymi Tayta Jesúspa shiminta mana čhasquicuptinchi, ¿ñacaypita jishpichimäshunchuraj? Tayta Diosninchipa maquinčhu cawananchipaj quiquin Jesúraj shiminta willapämashanchi. Chaypita shiminta wiycunapis sumaj tantiyachimashanchi. **4** Willapämashanchi rasunpa cashanta quiquin Tayta Diosninchispis tantiyachimashanchi. Camacächir, mana imaysi runa rurashancunata Jesúswan, willacujcunawan tucuya rurachiran. Mana imaypis ricashancunata ricar, runacuna manchariran. Tucuy-jinanpa munayniyuj cashanta Tayta Diosninchichi musyachicuran. Chaynuypis acracushan runacunaman Espíritu Santuta cačhamuran juc-niraj-juc-niraj yačhaycunata camapänanpaj.

5 Chaymi Tayta Diosninchipa maquinčhu cawajcunata mana anjilcunapa maquinman čhurashachu; manchäga Jesúspa maquinman. **6** Chaymi shimin nishančhu isquirbiraycan:

«Taytallau Tayta, runacuna ushyacajlla.

Wañucujlla.

¿Imanirraj llaquipanqui?

¿Imanirraj llapantapis tarichinqui?

7 Anjilcunaman tincunapanpís ichiclla pishircusha.

Chaypis alli ricash cananpaj čhurashcanqui.

Allíchu jurgushcanqui.

8 Llapan rurashayquita runapa maquinman čhurashcanqui.»*

Chaymi: «Llapanta runapa maquinman čhurashcanqui» nirga, musyachimanchi llap-llapallanta maquinman čhurashanta. Maquinpita imapis mana jishpingachu. Chaypis

* **1:9** Salmo 45.6-7. * **1:12** Salmo 102.25-27. * **1:13** Salmo 110.1. * **2:8** Salmo 8.4-6.

paypa maquinchú llapan cashanta cananllaraj mana tantiyanchirächu. ⁹ Ichanga Tayta Diosninchí llaquipämashanchita sumaj tantiyacushun. Washämänanchi-raycur Wawan Jesústa wañunanpaj caáchamusha. Yupash watalla anjilcunaman mana tincushantapis camacächisha. Chaypitam ichanga alliman churasha. Nuwanchi-raycur wañushanpita allíchu jurgusha.

¹⁰ Tayta Diosninchipita llapanpis cawan. Llapantapis camasha maquinchú cawanapaj. May-may wawancuna achic-achicyaycaj wasinman chayananta munan. Wawan-cuna ñaupanman chayachinan-raycur quiquin camacächisha Jesús sumaj-sumaj ñacar wañuymanpis chayanapaj. Wawan Jesúsum ñacaptinraj, Tayta Diosninchipaj sumaj alli casha. Chaynuypa llapanchita jishpichimänanchipaj camacächisha. ¹¹ Wiyacuptinchi, llapaninchitana Tayta Diosninchí wawanpa ricamanchi. Wawan Jesúswan juc taytallapita caycanchi. Chaymi mana pingacullar Jesúsum nimanchi: «Chay taytallapita caycanchi.»

¹² Unaypis shiminta musyachicur niran:

«Taytallau Tayta, pí cashayquitapis llapan wawayquita willapäshaj.

May-chaychú jutucaptinpis, cushicuywan alliman churashayqui.»*

¹³ Jananmanpis niran:

«Tayta Diosninchiman yupachicushaj.»

Yapaypis niran:

«Tayta Diosninchí churapamash captin, wawäcunawan-imá caycä.»*

¹⁴ Llapan runa wañujlla. Jesúspis wañucujlla caran. Wañurmi ichanga, wañuchicuj supaytapis i chípusha. ¹⁵ Supay maquichacamaptinchi, wañuya manchacullar cawashcanchi. Jesús wañurmi ichanga, wañuypita washämashcanchi. ¹⁶ Tayta Jesúsum mana anjilcunatachu yanapaj shamusha. Manchäga Abrahampa willcan captinchi, yanapämänanchipaj shamusha. ¹⁷ Nuwanchi-jina runa cayman chayashpan Jesúsum tantiyamanchi. Chaynuypa mayur cüra cayman chayaran. Cüra caynintapis charcuycan. Llaquipämashapanchi mañacapaycämanchi. Jucha aparicushanchita Tayta Diosninchí mana yarparänanpaj quiquinpa bïdanta churasha wañuyman chayanancaman. ¹⁸ Supaypis cay pachačhu Jesústa ñacachiran. Juchacachiytapis munaran. Chaymi ñacachimaptinchisi, juchacachiya munamaptinchisi, Jesúsum washämanchi. Llaquipämashpanchi yanapaycämanchi.

3

Moiséswan Jesústa tincuchishan

¹ Irmänucuna, Tayta Diosninchipa acracuynin caycanchi. Maquinchú puriycächimanchi. Chaymi Jesúsum pí cashantapis sumaj tantiyacushun. Payta Tayta Diosninchí caáchamacusha. Shiminta chasquicuptinchi, mayur cüranchi cashpan mañacapaycämanchi. ² Cüra cayninta charcur, Tayta Diosninchipa shungun munashallanta Jesúsum ruraran. Moiséspis Tayta Diosninchipa shungun munashallanta ruraran. Tayta Diosninchipa wasinta ricaj-jina marca-masincunata maquinchú purichiran. ³ Moisé alli ricash captinsi, Jesúsmán mana tincuranchu. Mä, tantiyacushun. Wasi alli ricash captinsi, wasi rurajta alli rican. ⁴ Llapan wasipis runacuna rurashallan caycan. Chay-jina cay pachatapis, janaj pachatapis Tayta Diosninchí camasha. ⁵ Tayta Diosninchipa wasinchú arur, mincay-yupay paypa shungun munashanta Moisé ruraran. Ima-imata nishantapis marca-masincunata tantiyachiran. ⁶ Washäcu Jesúsmi ichanga mana mincaychu. Manchäga Tayta Diosninchipa Wawan cashpan wasinchú caycan. Nuwanchipis wasi wamrana caycanchi mana yamacällar cushi-cushilla Jesúsmán yupachicushpanchi.

⁷ Chaymi Espíritu Santuta wiyacushun. Payga nin:

* **2:12** Salmo 22.22. * **2:13** Isaías 8.17-18.

«Ima alliraj canman canan junaj Tayta Diosninchipa shiminta wiycäriptiqui.

⁸ Unay auquilluyquicuna chucru shungu cashan-jina ama canquichu.

Ama ticrapäcunquichu.

Chaqui pacha quinranchü purishan wican paycunapa shungunta musyaparä.

Ticrapamar, paycuna maquichacamayta camaran.

⁹ Čhuscu čunca (40) watantin tucuyčhu yanapaycaptisi, munayniuj cashäta ricaycarsi, maquichacamayta camaran.

¹⁰ Chaymi yamacar nirä:

«Cay runacuna shungun munashallanta rurar, juchallačhu cawan.

Shungü yarpashanta mana tantiyacunchu.»

¹¹ Ullgucäcur, nirä: «Aunishä čhacraman imaypis mana yaycunquipächu.

Imaypis jamayta mana tarichishayquipächu.» *

¹² Irmänucuna, sumaj wiycunquiman. Mayganquipis ama upa-tucunquimanchu. Ama chucru shungu canquimanchu. Cawaj Tayta Diosninchipa ama witicunquiman. ¹³ Manchäga waran-waran Tayta Diosninchipa shiminta wiycurcaycar shacyächinacunquiman. Canan junajpis juchata mana aparicunayquipaj, nishayqu-nishayqui imatapis mana ruranayquipaj wiycunquiman. ¹⁴ Washäcuj Jesúspa shiminta aunishpanchi Tayta Diosninchipa maquinčhu cawashunpaj. Ichanga mana yamacällar yupachicunanchi.

¹⁵ Chaymi shiminta ama jungashunchu. Paypa shiminčhu nin:

«Ima alliraj canman canan junaj Tayta Diosninchipa shiminta wiycäriptiqui.

Unay auquilluyquicuna chucru shungu cashan-jina ama canquichu.

Paycuna Tayta Diosninchita ticrapuran.» *

¹⁶ Auquillunchicuna, ¿maygan-maygantaj Tayta Diosninchita ticrapuran shiminta wiyash caycarpis? Ticrapuran Moisés llapan auquillunchicunata Egipto marcapita jurgamushancuna. ¹⁷ Auquillunchicuna, ¿maygan-maygantaj čhuscu čunca watantin (40) Tayta Diosninchita ullguchiran? Llapan jucha aparicuyllačhu aruran.

Chaymi chaqui pacha quinrančhu wañuptin, ayanpis jitarashančhu jitapararan.

¹⁸ Auquillunchicunata, ¿maygan-maygantataj Tayta Diosninchi piñacuran? Llapan auquillunchicunata mana wiycushanpita mayna Tayta Diosninchi piñacuran: «Aunishä čhacraman imaypis mana čhayquipächu. Jamaytasi mana tarinquipächu» nir. ¹⁹ Payga shiminta čharcun. Chaymi mana yupachicushanpita chucru shungucuna jamaytapis mana tariranchu.

4

¹ Tayta Diosninchim ichanga aunishanta jinalla shuyaraycächimanchi: «Alli cawayčhu jamachishayqui» nir. Chaymi llapan shungunchiwan shiminta wiycushun. Manchäga mana čhayashunpächu. ² Unay auquillunchicunapis nuwanchi-jina Tayta Diosninchipa shiminta wiyan. Alli willapa caycaptinsi, mana wiycuranchu. Wiyacujcunawanpis jutucayta mana munaranchu.

³ Nuwanchim ichanga alli cawayčhu jamachimänanchita munar, Tayta Diosninchita wiycunanchi. Payga mayna nisha:

«Ullgucäcur, nirä:

«Aunishä čhacraman imaypis mana yaycungapächu.

Imaypis jamayta mana taringapächu.» *

Jamaypita rimar, Tayta Diosninchi cay pachata camayta ushyarcur jamashanpita rimaycan. ⁴ Jamay junajpita Tayta Diosninchipa shiminpis nin:

«Jančhis-caj junajčhu llapallanta camarcur, Tayta Diosninchi jamaycuran.» *

* ^{3:11} Salmo 95.7-11. * ^{3:15} Salmo 95.7-8. * ^{4:3} Salmo 95.11. * ^{4:4} Génesis 2.2.

⁵ Yapaypis Tayta Diosninchipa shimin nin:
 «Jamanä pachaman mana imaypis chayachishächu.»*

⁶ Jamana pacha caycashanta tantiyashcanchi. Waquin runacuna chayan; waquinmi ichanga mana. Tayta Diosninchipa shiminta wiayacarsi, mana wiayushanpita mana chayaranchu. ⁷ Chaymi jamana pachaman yaycuchinanpaj juc junajpaj Tayta Diosninchji jitaparan. Jitapashan junaj canan wican caycan. Unaya Tayta Diosninchji mandaj Davidwan shiminta musyachicur niran:

«Canan junaj Tayta Diosninchipa shiminta wiayushun.

Shungunchita ama chucruiyächishunchu.

Ama upa-tucushunchu.»*

⁸ Unay auquillunchicunata Canaán marcaman Josué pushaptin, alli cawayta mana tariranchu. Jamaytapis mana tariranchu. Chaymi: «Alli cawaychü jamachishaj» nirga, Tayta Diosninchji mana rimacunmanchu caran. ⁹ Sumaj tantiyacunquiman. Wawancunapaj Tayta Diosninchji alli cawayta shuyaraycächin. Alli cawaychü jamanga. ¹⁰ Chay pachaman chayar, runacuna mana arunganachu. Manchäga alli cawayllačhu jamanga. Tayta Diosninchipis cay pachata, janaj pachata camayta ushyarcur, jamaran.

¹¹ Jamana pachaman chayananchipaj llapan shungunchiwan callpachacushun. Uparinri runacunapa llupinpa ama jatishunchu. Paycuna mana wiayushanpita ñacayman chayaran. ¹² Tayta Diosninchipa shimin munayniyuj. Cawaj. Ishcanläpa afilash cuchillupitasi mas cuchuj. Runapa shunguncaman chayan. Imapis mana chapanmanchu. Runa imata yarpashallantapis, imata munashallantapis taripan. Llapllapanta musyacächin. ¹³ Llapana camashancuna Tayta Diosninchipa ricay ñawinčhu caycan. Llapana pacarashantapis ricaycan. Chaymi ima-imata rurashanchitapis tapumäshunpaj.

Jesús mayur cüra cashan

¹⁴ Jesús janaj pachaman ñaupashana. Payga Tayta Diosninchipa Wawan. Mayur cüranchi cashpan mañacapaycämanchi. Chaymi payllaman llapan shungunchiwan yupauchicushun. Paypita ama ashucushunchu. ¹⁵ Mayur cüra carsi, runa cashanchita tantiyamanchi. Paytapis cay pachačhu purishan wican supay juchacachiyta munaran. Ñacachiran. Paymi ichanga juchata mana aparicuranchu. ¹⁶ Chaymi mayur cüranchi caycaptin, Tayta Diosninchiwan parlayta munar, ama manchacushunchu. Payga llaquipäcuj. Ima ñacaychü caycaptinchisi, alli shungu. Llaquipämashpanchi sumaj yanapämanchi.

5

¹ Mayur cüra cananpaj pitapis marca-masillanpita acran. Cüra cayman churan runa-masincunapaj Tayta Diosninchita mañacapunapaj. Chaymi pipis juchanpita wanacuptin, runa-masinpa cuyachicuyninta, jaracuyninta Tayta Diosninchita jaran. ² Mayur cürapis runa cayninwan pantapacun. Chaymi runacuna mana musyayninwan llutanta ruraptin, pantapacuptin, llaquipan. ³ Tantiyayyuj runa cashpan quiquin jucha aparicushanpita, pampa runacuna juchata aparicushanpita mañacapur, Tayta Diosninchita jaran.

⁴ Chaura quiquillanpita pipis mayur cüra cayman mana chayanmanchu; manchäga Tayta Diosninchji acrarcur alli cayman churaptinraj. Cüracunapa taytan Aarónpis quiquin Tayta Diosninchji acrarcur churaptinraj, mayur cüra cayman chayaran. ⁵ Washäcuj Jesúspis mana quiquinchu ashisha mayur cüra cananpaj. Manchäga Tayta Diosninchji alli ricar, mayur cüra cayman churar, musyachicuran:

«Wawämi canqui.

* ^{4:5} Salmo 95.11. * ^{4:7} Salmo 95.7-8.

Cananpita-pacha nuwapitana cawanqui» nir.*

⁶ Juclächüpis musyachicuran:
«Cüra cayniquipita imaypis mana llucshinquipächu.

Melquisedec-jina cüra canqui» nir.*

⁷ Washäcu Jesús cay pachačhu purir, wiguinpawanraj llapan shungunwan mañacuran: «Taytallau Tayta, wañuypta jishpiycachillämay, ari» nir. Manchapacuj captin, mañacushanta Tayta Diosninchi camacächiran. ⁸ Chaypis Wawan carsi, sumajraj ñacasha wañuyman chayanapaj. Chayraj wiyacuj cayta yačhacusha. ⁹ Wiyacuj cayta yačhacuptinmi ichanga, Tayta Diosninchi cawarcachimuran wiyacujcunata jishpichinanpaj, imaycamanpis maquinčhu cawachinanpaj. ¹⁰ Jananmanpis unay Melquisedecta churashan-jina mayur cüra canapaj churasha.

Irmänucunata piñapashan

¹¹ Sumaj wiyacamay. Achcaraj caycan yačhachinajpaj. Ichanga upa-tucur jil-lanashpayqui tantiyacuya mana atipanquichu. ¹² Juccunata yačhachinayquipaj mayna tantiyacunquiman caran. ¿Imanirtaj imatapis mana tantiyacunquirächu? ¿Tayta Diosninchipa shiminta yaparir-yaparir willapänallajtachu shuyarpaycanqui? ¿Pishi wamra-jina chuchutarächu shuyarpaycanqui? Chucru micuya mana micunquirächu. ¹³ Chuchuj mallwa-jina Tayta Diosninchipa shungun munashanta mana tantiyacunquirächu. Mana yačhacunquirächu. ¹⁴ Sinčhi wamracunam ichanga chucru micucunata micun. Paycuna-jina yarpay-sapacuna allitapis, mana allitapis tantiyacun. Tayta Diosninchipa shungun munashantapis tantiyacun.

6

¹ Chaymi mana tantiyashanchicunata tantiyacushun. Washäcu Jesúspa willapanta ichic-ichicllata yačhacushallanchiwan ama cacushunchu. Unay yačhacushanchinuilla ama cawashunchu. Mayna musyanqui juchačhu cawar wanacuypita, Tayta Diosninchiman yupachicuypita, ² ushyacuypitawan awicuypita,* pipa umanta yataycur mañacuypita, wañushcunata cawarachimunanpita, Tayta Diosninchi llapan runapa juchanta jurgapänanpita. ³ Chaymi Tayta Diosninchi camacächiptin, waran-warana paypita sumaj tantiyacuycäshun.

⁴⁻⁶ Ichanga sumaj tantiyacunquiman. Tayta Diosninchipa ashucush runacuna yipay wanacuya mana camäpacungachu. Chay runapa shungunman Tayta Diosninchipa shimin chayaran. Manchapacur cawaran. Espíritu Santupis yanaparan. Tayta Diosninchipa shiminta wiyacur, cushish juyaran. Paypa maquinčhu juyar, alli cawaytapis tariran. Chaynuy caycaptinsi, chay runacuna Tayta Diosninchipa ashucärisha. Ashucärir, Tayta Diosninchipa Wawan Jesústapis sumaj pampaman churan. Pampaman churaptin, rusman läbaycaj-yupay ricacun. Chaynuy rurariycur, wanacuya mana camäpacungachu.

⁷⁻⁸ Chacrata-yupay Tayta Diosninchi ricamanchi. Payga llapan chacraman tamyachimun. Waquin chakračhu sumaj micuy wayun. Waquin chakračhumi ichanga juyu casha jačhacunalla wiñan. Chakra-yupay waquin runapis Tayta Diosninchipa shiminta wiyacun. Wiyacuptin, sumaj yanapan. Waquin runam ichanga mana wiyacunchu. Paycunata Tayta Diosninchi juyu ñawinpa rican. Ninawan ushyaringa.

Ima captinpis, Tayta Diosninchiman yupachicunananpaj willapashan

* **5:5** Salmo 2.7. * **5:6** Salmo 110.4. * **6:2** Israel runacuna Tayta Diosninchipa ricay ñawinčhu alli cayta munar, juchanpita wanacur waquin yacuman yaycuj, waquinna janallanta awicuj.

⁹ Wawallau wawa, tincuchiypa piñapäshaj manash nanashcashunquichu. Jamcuna Tayta Diosninchita wiyacurcaycanqui. Washäshushpayqui maquinéhu cawarcaycanqui. Chaymi shungun munashanta imatapis rurarcaycanqui. ¹⁰ Shiminta wiyacur quiquipi-pura yanapänacärishayquita Tayta Diosninchchi musyan. Ima-imata rurashayquitapis mana junganchu. Irmänu-pura llaquinacärishayquitapis yarparäcun. Chaynuy cawaptiqui, ¿Tayta Diosninchchi jungaycushunquichuraj? Mana. ¹¹ Chaymi cawashayquicaman irmänu-pura sumaj yanapänacunquiman. Alli cawashayquinylla imay-imaypis juyanquiman. Chaynuy cashayquipita Tayta Diosninchchi shuyarächishushayquita tarichishunquipaj. ¹² Chaymi jillacuna-jina janan shungulla ama canquichu. Manchäga unay auquillunchicuna yupachicushan-jina Tayta Diosninchiman yupachicushun. Paycuna mana ishcay-quimsatachu yarpaj. Manchäga Tayta Diosninchchi aunishantapis mana yamacaypa sumaj yupachicuran. Chayrämi shuyarashantapis chasquiran.

¹³ Pipis Tayta Diosninchiman mana tincunchu. Chaymi auquillunchi Abrahamta aunir, pitapis mana ashiranchu shiminta chercucächinanpaj. Manchäga quiquillan auniran:

¹⁴ «Allipa ricashayqui. Sumaj yanapäshayqui. Wamrayquipis, willcayquicunapis yupaysi mana atipaypaj miranga» nir.* ¹⁵ Chaymi Abraham mana yamacällar shuyaran. Tayta Diosninchchi aunishantapis chasquiran.

¹⁶ Runacunam ichanga imatapis aunir chasquinanpaj juc mayur runataraj shimita chercucächinanpaj ashin. Chayraj jucninpis aunishan chercunanta yupachicun. ¹⁷ Chaynuy caycaptin, imata rurananpäpis auquillunchicunata aunir, Tayta Diosninchchi quiquillan auniran. Chaymi auquillunchicuna yupachicuran: «Quiquin aunishanta Tayta Diosninchchi llapanta chercunga. Aunishantapis mana imaysi cutircungapächu» nir. ¹⁸ Canan sumaj tantiyacushun. Tayta Diosninchchi imata rurananpäpis quiquillan aunin. Pitapis mana ashinchu shiminta chercucächinanpaj. Payga mana llullacunchu. Chaymi jishpichimänanchipaj aunimashanchipis, maquinéhu charämänanchipis jatun cushicuymán churamanchi.

¹⁹⁻²⁰ Chaymi mana yamacällar payman yupachicushun. Unay mayur cüra Tayta Diosninchipa ñaupanman chayashan-jina nuwanchipis chayashunpaj. Unay cüracuna Tayta Diosninchawan tincuj aywar, wasinéhu raquiraycaj bayita wajtancaman yaycuran. Jesúsmi ichanga mayur cüra cayman chayar, Tayta Diosninchipa ñaupanman mayna chayasha nuwanchi-raycur mañacapamänanchipaj. Melquisedec-jina mayur cüra cayninpita mana imaysi llucshingachu.

7

Melquisedecpa cüra cayninwan Washäcuj Jesústa tincuchishan

¹ Melquisedec Salem marcpa mandajnin caran. Cüra cashpan Llapanta Camaj Tayta Diosninchita mañacapurán. Chay wíchan auquillunchi Abraham mandajcunata magar ushyariycur cuticamuran. Cuticamuptin, Melquisedec tariparan. Tincur, Tayta Diosninchita mañacapurán: «Taytallau Tayta, Abrahamta ima-aycachüpis yanapaycullay» nir. ² Chaynuy ruraptin, cuyachicuyninta Abraham raquipurán. Marcacunata maganacuyéhu iéchipurir, imatapis jiéchupacamushanta chuncapita jucta-caman Melquisedecta jararan.

Rimayninéhu: «Melquisedec» ninan: «Tayta Diosninchchi munashallanta ruraj mandaj.» «Salem» ninanna: «Allilla cawachicuj mandaj» ninan. ³ Melquisedecpa manganaytaytan pí cashanpis, auquillun pí cashanpis mana musyacanchu. Imay yurishanpis, imay wañushanpis mana musyacanchu. Payga Tayta Diosninchipa Wawanwan tincun. Chaymi cüra cayninpis mana imaypis ushyacangachu.*

* **6:14** Génesis 22.16-17. * **7:3** Génesis 14.17-20.

⁴ Melquisedec sumaj alli ricash caran. Chaychi unay auquillunchi Abraham cuyachicuyninta chuncapita jucta-caman jararan. ⁵ Jipatapis Levipa yawar-masincuna cüra cayman chayar, Moiséspa shimin mayna camacächish caycaptin, imatapis chuncapita jucta-caman marca-masincunapita mañacuran. Paycuna llapanpis Abrahampa willcan-cuna caran. ⁶⁻⁷ Melquisedecmi ichanga Levipa yawar-masin mana caycarsi, auquil-lunchi Abrahampita chuncapita jucta-caman chasquiran. Jinarcur alli cawayman churar, Tayta Diosninchita mañacapuram: «Taytallau Tayta, sumaj yanapaycullay, ari» nir.

Musyashanchinuypis mayur runa Tayta Diosninchita mañacapun pampa runata sumaj yanapänanpaj. Chaymi Abrahama Tayta Diosninchchi aunish caycaptinsi, Melquisedecman mana tincurchu. Payga Abrahampaj Tayta Diosninchita mañacapuram. ⁸ Levipa yawar-masincuna chuncapita jucta-caman mañacurpis, wañucuj runalla caran. Melquisedecshi ichanga cawaycanraj. Chayta tantiyacunchi Tayta Diosninchipa shiminchu wañucushanpita mana rimacuptin. ⁹⁻¹⁰ Canancamanpis Levipa yawar-masin cüracuna chuncapita jucta-caman mañacurcaycan. Mañacurpis, Melquisedecta quiquinunapis jarash caran. Melquisedecta Abraham jaraptin mana yurillaptin, willcan Levícupis jarash-yupay ricacuran. Chaymi jipataraj yurish carpis, Melquisedecta jarashana caran.

¹¹ Levipa yawar-masincuna cüra cayman chayaran Israel-masincunata Tayta Diosninchawan tincuchir alli ricanacunapaj. Mana camäpacuptinmi ichanga, juc casta cüra ricarimunanpaj alli caran. Ichanga mana Levipa willcancunapitachu, mana Aarónpa yawar-masincunapitachu ricarimusha. Manchäga cüra Melquisedec-jina ricarimunan caran. Ricarimuj cüra sumaj camacächisha Tayta Diosninchawan alli ricanacunanchipaj. ¹² Chaura jucpa yawar-masin cüra cayman chayaptin, Moiséspa shiminpis juc-nirajman tircracäcunan caran. ¹³⁻¹⁴ Ricarimuj cüraga caycan Tayta Jesús. Payga mana Levipa willcanchu; manchäga Judápa willcan. Judápa willcancuna cüra cayman chayananpaj Moisés imaypis mana musyachicuranchu.

¹⁵ Melquisedec-jina juc cüra ricarimuptin, mana sasachu Tayta Diosninchipa shimita tantiyacunanchipaj. ¹⁶ Mushuj cürata mana churashachu Levipa yawar-masin cashanpita; manchäga imaycamanpis cawacuj cashanpita. ¹⁷ Unaypita-pacha Jesúspaj Tayta Diosninchipa shiminchu nin: «Melquisedec-jina cüra cayniquipita imaypis mana llucshinquipächu.» ¹⁸ Chaynuy nir Moiséspa shimin llapanpaj mana aypäpacushanta, chaycamalla cashanta musyachimanchi. Israel-masinchicuna Moiséspa shimita wiyacuya munarsi, mana Tayta Diosninchipa shungun munashannuychu cawaran. ¹⁹ Moiséspa shimin mana sumajchu caran. Mana yarpashannuychu imatapis camacächiran. Chaymi jucpa shimita chasquicunanchi caran Tayta Diosninchipa ricay ñawinchu alli cawananchipaj. Paypa shiminman yupachicunanchi camacan.

²⁰⁻²¹ Cüracunalla cüra cayman churanacuptin, Tayta Diosninchchi mana rimacuranchu. Jesúspami ichanga auniran:

«Cüra cayniquipita mana imaysi llucshinquipächu.»

Nuwa, Tayta Diosniqui, quiquiña shimiwan aunishcaj.

Shimita charcumi» nir.*

²² Chaynupa ñaupa-caj parlanacushanta jipačhu jaguisha. Juc parlanacushanmi ichanga sumaj alli. Aunishanta charcucächinanpäpis quiquin Jesústa churasha.

²³ Unay cüracuna jatinaylla aruran. Juc wañucuptin, jucna yaycuran. ²⁴ Jesúsmi ichanga imaypis mana wañungachu. Cüra cayninpis jucpa maquinman mana chayangachu.

²⁵ Mana ushyacayapa cawar, Tayta Diosninchitapis mañacapaycämanchi. Shimita

* **7:20-21** Salmo 110.4.

chasquicur Tayta Diosninchipa maquinchu cawayta munaptinchi, quiquin imay-imaycamanpis jishpichimanchi. Mana ushyacaypa cawar, nuwanchi-raycur waran-warana Tayta Diosninchita mañacapaycämanchi. Tayta Diosninchipa maquinchu cawayta munar Jesúspa shiminta chasquicuptinchi, quiquin Jesús jishpichimanchi.

²⁶ Chay-niraj mayur cüra pishimaranchi. Jesúsga Tayta Diosninchipa shungunman tincun. Ima juchanpis mana canchu. Imaysi mana juchallicushachu. Juchayuj runacunapa chaupinpita raquir, Tayta Diosninchita janaj pachaman shuntacuran ñaupallanchu cawacunanpaj. ²⁷ Waquin mayur cüracuna quiquinpa juchantawan marca-masincunapa juchanta waran-warana Tayta Diosninchita mañacuran mana imaysi juchancunata yarparänanpaj. Ricay ñawinchu alli cawayta tarinanpäpis uywacunata pishtarcur jararan. Jesúsmi ichanga wañuyman chayar, quiquinpa caway-bidanta Tayta Diosninchita jararan. Juc cutilla jararan imaycamanpis aypäcunanpaj. ²⁸ Unay wican Moiséspa shiminta charcur mayur cüracunata cargunman churaran mañacapamänanchipaj. Chaypis canancaman cargunta sumaj charcuya mana camäpacunchu. Cananmi ichanga Tayta Diosninchita churashan mayur cüra llapanta charcun. Wawan cashpan imaycamanpis Tayta Diosninchipa shungun munashannylla cawan.

8

Washäcuj Jesús juc parlanacuyta llanguichishan

¹ Sumaj tantiyacushun. Mañacapamänanchipaj mayur cüranchi Jesús janaj pachačhu caycan. Munayniuj Tayta Diosninchipa diricha-caj lädunchu jamaraycan. ² Paymi quiquin Tayta Diosninchipa ñaupallanchu, rasunpa-caj purichina jiru chaqui capillačhu mañacapaycämanchi. Chay wasi mana runa jatarachishanchu; manchaga quiquin Tayta Diosninchita jatarachishan.

³ Cay pachačhu mayur cüracuna caycan uywacunata Tayta Diosninchita jarananpaj, cuyachicuytapis churapunapaj. Chaymi Jesúspis Tayta Diosninchita imatapis jaranan camacaran. ⁴ Cay pachačhu cüra cayman Jesús mana yaycunmanchu caran. Cay pachačhu cüracuna mana pishinchu. Achcajraj Moisés yačhachishannylla cuyachicuytunata jararcaycan. ⁵ Cay pachačhu jarashancuna janaj pachačhu jarashallanman tincun. Purichina jiru chaqui capillačhu imatapis rurananpaj yačhachir, Sinaí jircačhu tincun, Tayta Diosninchita Moisésta niran: «Moisés, sumaj wiyacuy. Wasita jatarachir, janaj pachačhu ricachishajtanuylla llapanta tincuchiyllapa ruranqui.»* Chaymi cay pachačhu jarashanpis, rurashanpis janaj pachačhu rurashallanman tincun.

⁶ Mayur cüra Jesúsmi ichanga janaj pachačhüna cüra cayninta sumaj charcuycan. Nuwanchipaj Tayta Diosninchita parlapaycämanchi. Aunishantapis sumaj camacaycächin. Jesús rurashanmanga cay pachačhu cüracuna rurashan mana tincunchu. Unay Israel runacunawan Tayta Diosninchita parlanacur auninacushanmanpis mana tincunchu.

⁷ Israelcunawan unay parlanacushan alli caycaptin, Tayta Diosninchita yapay parlanacun mana camacarannachu. ⁸ Unay parlanacushanta runacuna mana charcuptinmi ichanga, juchanta taripur Tayta Diosninchita niran:

«Tayta Diosniqui caycä.

Imayllapis Israel runacunawan, Judá runacunawan yapay parlanacushaj.*

⁹ Yapay parlanacur, mana unay parlanacushänuychu cangapaj.

Unay Egipto marcapita jishpichicamur, llapan auquilluyquicunawan parlanacurä. Chaypis shimita mana charcuranchu.

Mana wiacamashanpita jaguiycurä.

* **8:5** Éxodo 25:40. * **8:8** Israel runacuna Abrahampita miraran. Ichanga chay castalla caycarsi, ishcay marcaman raquicäcuran. Juc-cajta ricsiran: «Israel marca» nir; juc-cajtana: «Judá marca» nir.

¹⁰ Parlanacunä junaj ćhayamuptinmi ichanga, llapan Israel runacunawan yapay parlancushaj.

Shungü munashanta tantiyacunga.

Shimi shungunman ćhayanga.

Tayta Diosnin capti, nuwallaman yupachicamanga.

Maquićhu cawanga.

¹¹ Llapallanwan alli ricanacushaj.

Pampa runacunawanpis, mayur runacunawanpis alli ricanacushaj.

Chaymi pipis yawar-masinta, marca-masinta mana ningachu: ‹Tayta Diosninchita ricsichishayqui.›

¹² Llaquipashpä llapan juchanta jungashaj.

Juchallicushantapis mana yarparäshänachu.»*

¹³ Tayta Diosninchchi yapay parlanacuypta rimar, unay-caj parlanacushan sumaj mana aypäpacushanta tantiyachimanchi. Unay-caj parlanacushan yarpashannuylla mana aypäpacuptin, jungacaypana aywaycan.

9

Tayta Diosninchipa wasinčhu unay wíchan jarashan

¹ Unay-caj parlanacushančhu Tayta Diosninchchi niran: «Israel runacuna, manchapacamar purichina jiru ćhaqui capillačhu jaramanqui. Chay wasillačhu tincushunpaj.» Chay wasi runa jatarachishallan caran. ² Ishcay cuartuyuj caran. Puncu-caj cuartučhu achqui ratachicunapis, jarashan tantata ćhuraränan mísapis caycaran. Chay cuartullata ricsin: «Lugar santu» nir. ³ Ruri-caj cuartutana ricsin: «Lugar Santísimu» nir. Ishcan cuartuta bayitawan raquiraycächiran. ⁴ Rurićhu caycaran juripita insinsu saumachicuna tacshalla tullpapis, Tayta Diosninchipa babulninpis. Chay babul juriwan chapash caycaran. Babul rurinchüna juri angarawan Tayta Diosninchchi ricarachishan tantapis, Aarónpa chillguij garutinpis, läja rumićhu isquirbiraycashan Tayta Diosninchipa shiminpis ćhuraraycaran. ⁵ Babul janančüna Tayta Diosninchchi caycashanta musyachicushpan cäpan mashtapacush ishcay quirubin ičhiraycaran.* Cäpanwan babulta chaparaycaran. Chayčhu runacunapa juchan aparicushanta Tayta Diosninchchi jungaycuj. Ima captinpis, alläpa ama rimashunnachu.

⁶ Unay cüracuna rurashanta sumaj musyanqui. Waran-waran Tayta Diosninchita jarananpaj purichina jiru ćhaqui capillaman yaycuj; ichanga puncu-caj cuartullaman. ⁷ «Lugar Santísimu» nishan cuartumanmi ichanga watačhu juc cutilla uywapa yawarninta apacurcur, mayur cüra yaycuran. Mana musyayninwan juchallicushantapis yawarta Tayta Diosninchita jararan marca-masincunapa juchantapis, quiquinpa juchantapis jungacächinanpaj.

⁸⁻⁹ Tincuchiypa Espíritu Santo tantiyaycächimanchi. Unay purichina jiru ćhaqui capillačhu: «Lugar Santísimu» nishan ruri-caj cuartuta juc bayita chaparaycaran pipis mana yaycunapaj. Cananpis chaparaycaj-yupay shungunchi caycan. Jarayninchitapis, cuyachicuyninchitapis Tayta Diosninchita jaraycarsi, jucha aparicushanchita mana junganchichu. Shungunchiħüräj pacaraycächinchi. ¹⁰ Jarayninchipis, cuyachicuyninchipis ricsish-ricsishllata jarashanchi-jina ricsish micuylata micurpis, ricsish yacullata upurpis, yačhachimashannuylla awicurcurpis, janan-janallanman ćhayan. Shungunchicaman mana ćhayanchu. Tayta Diosninchipaj pishiranraj. Chaymi paywan alli ricanacunanchipaj juc yarpayta camacächiran.

Caway-bidanta Washäcuj Jesús jarashan

* ^{8:12} Jeremías 31.31-34. * ^{9:5} Quirubincuna caran juripita tacash anjilman ricchacuj. Tayta Diosninchita mana ricar quirubincunata ricar, runacuna tantiyacuran quiquin Tayta Diosninchchi chayčhu caycashanta.

¹¹ Camacächishannylla Washäcu Jesú mayur cüra cayman ́hayasha. Tayta Diosninchí aunishanta tarichimanchi. Tayta Diosninchitapis parlapaycämancchi. Ichanga mana runa rurashan wasíchüchu; manchága janaj pacha achic-achicyaycaj wasíchüna parlapaycämancchi. ¹² Janaj pacháchu mana capshipa yawarnintachu, türitupa yawarnintachu jarasha; manchága quiquinpa yawarninta. Wañuyman ́chayar, quiquinpa caway-bidantaráj Tayta Diosninchita jararan «Lugar Santísimu» nishanman yaycuycur. Yawarninta juc cutilla jaraycur, Tayta Diosninchipa maquinman ́churamashcanchi imaycamanpis cawananchipaj. Juchata rurar wañuyman ́chayananchipita Jesú jishpichimashcanchi. ¹³ Unaya cüracuna capshipa yawarnintapis, manta türitupa yawarnintapis juchayuj runacunaman chajchuran. Tirnira rupachishan učhpatajis machipurán. Chaycuna alli caran runa ricanallanpaj; Tayta Diosninchipámi ichanga pishisharaj. ¹⁴ Juchaynajta ricamänanchipaj Espíritu Santu yanapaptin, Washäcu Jesú quiquinpa caway-bidanta yawarnintinta Tayta Diosninchita jararan. Juchaynaj caycar, caway-bidanta jarasha wañuypta jishpichimänanchipaj. Chayga rasunpa shungunchiman ́hayasha. Ichanga mana ́hayashachu yaparir-yaparir imatapis jarashanchipitachu. Quiquinchi jarashanchi wañuyman ́hayachimänanchi caran. Cananmi ichanga alli ñawinwan Tayta Diosninchí ricamashanchita tantiyacunchi. Cawacuj captin, paypa shungun munashallanta rurar cawashun.

¹⁵ Chaura unay parlanacushanta mana ́charcur, runacuna wañuyman ́hayaran. Chaymi jishpichimänanchi-raycur Washäcu Jesú wañuyman ́hayaynina juc parlanacuya camacächisha. Cananga llapanchita alli ñawinwan Tayta Diosninchí ricaycämancchi. Quiquin acracamashcanchi imaycamanpis maquinchu cawananchipaj.

¹⁶ Cananga tistamintuta rurashanpita tantiyacushun. Tistamintu nishannylla ́charcucänanpaj tistamintucuj wañucunanraj. ¹⁷ Tistamintucuj cawaycaptillan, tistamintu rurashan mana ́charcucanrächu. Tistamintucuj wañucuptinmi ichanga, ́charcucanga. ¹⁸ Chay-jina unay parlanacushan ́charcucänanpaj uywata pishtaj. Chayta ricar, Israel runacuna nirán: «Cananga shiminta ́charcucächinanpaj yawarwan llanguichisha.» ¹⁹ Tayta Diosninchipa shiminta sumaj willapariycur, llapan Israel runatapis yawarwanraj Moisés chajchuran. Puca jiluwán jaćhacunata watarcur, türitucunapa, capshicunapa yawarninta yacuwan tallurcachir, llapan runatapis, Tayta Diosninchí isquirbisan shimintapis chajchuran. ²⁰ Chajchur nirán: «Tayta Diosninchí aunishanta ́charcunapanj cay yawarwan llanguichisha.» ²¹ Yawarwan purichina jiru ́chaqui capillatapis, llapan imancunatapis chajchuran. ²² Tayta Diosninchipa shiminta isquirbir, Moisés nirán: «Tayta Diosninchí alli ricananpaj imatapis yawarwan chajchunan. Yawarwanraj runacuna jucha aparicushantapis Tayta Diosninchí jungaycun.»

²³ Janaj pacháchu-niraj rurash captinsi, purichina jiru ́chaqui capillatapis, llapan imancunatapis uywapa yawarninwan Moisés chajchuran Tayta Diosninchí alli ricananpaj. Chay yawarllawan janaj pacháchu caycaj wasitawan llapan imancunatapis chajchunan mana camacaranchu. Manchága juc alli yawarraj pishiraycaran.

²⁴ Tayta Diosninchipa wasin-niraj captinsi, runa jatarachishan capillaman Washäcu Jesú mana yaycuranchu. Manchága janaj pachaman yaycur, Tayta Diosninchipa ñaupallanchu parlapaycämancchi. ²⁵ Cay pacháchu watan-watan mayur cüra uywacunapa yawarninta apacurcur, purichina jiru ́chaqui capillaman yaycuran. Jesúsmi ichanga quiquinpa caway-bidanta ́churar, juc cutilla yawarninta jararan. Juc cuti jarashallan imaycamanpis aypacun. ²⁶ Quiquinpa caway-bidanta juc cuti jarashan mana aypaptin, cay pachata camashanpita-pacháchi yaparir-yaparir wañunman caran. Tayta Diosninchí camacächishan wíchan ́hayamuptinmi ichanga, quiquinpa caway-bidanta jararan. Nuwanchi-raycur wañuptin, yawarninpa ́chaninwan Tayta Diosninchí: «Juchayquita jun-gashcäna» nir alli ricamanchi.

²⁷ Runapis juc cutilla wañunchi. Chaypitaj jucha aparicushanchipita Tayta Diosninchiji jurgapämäshunpaj. ²⁸ Washäcuj Jesúspis nuwanchi-raycur juc cutilla wañuyman chayasha. Caway-bidanta jarasha llapan runacunapa juchanta Tayta Diosninchiji junganpaj. Cay pachaman yapay cutimur, mana runacunapa juchan-jananchu cutimunga. Manchäga shiminta chasquicujcunata llapanta jishpichingapaj.

10

Unay-caj parlanacuywan jipa-caj parlanacuya tincuchishan

¹ Unayga Tayta Diosninchawan alli ricanacuya munar, runacuna Moiséspa shiminta wiyacunan caran. Shiminta sumaj musyarpis, janan-janallan musyaranchi. Tayta Diosninchiji camacächipämashanchimanmi ichanga mana tincuranchu. Chaymi alli ricanacuya munar watan-watan uywacunata jaraycaptinchi, ¿juchaynajtachuraj Tayta Diosninchiji ricamäshun? ² Moiséspa shiminta wiyacuptin, ¿rasunpachuraj runacunapa juchan illaringa? Rasunpa captin, yaparir-yaparir mana jaranmanchu caran. Shungunpis jucha aparicushanta mana yarparanmanchu caran. ³ Chaymi watan-watan uywata jarashanchi Tayta Diosninchipa ricay ñawinčhu juchayuj caycashanchita musyanchi. ⁴ Türitucunapa yawarninpis, capshicunapa yawarninpis runacunapa juchanta mana illarachinchu.

⁵ Chaymi Washäcuj Jesús cay pachaman shamur, niran:

«Taytallau Tayta,
uywacunata, cuyachicuycunata jarashunayquita mana munashcanquichu.
Manchäga runa yurinäpaj camacächishcanqui.

⁶ Runacuna jucha aparicushanpita cuyachicuyninta jarashuptiquipis,
uywacunata rupachiypa jarashuptiquipis,
shunguyquiman mana tincunchu.

⁷ Chaymi nishcä: «Cayčhu caycällä, Tayta.
Shunguyqui munashanta rurashaj.

Shimiquíchu isquirbirashan-jina llapanta charcushaj.»*

⁸ «Runacuna jucha aparicushanpita cuyachicuyninta jarashuptiquipis, uywacunata rupachiypa jarashuptiquipis, shunguyquiman mana tincunchu» niptinpis, Moiséspa shimin chayta jarananpaj riman. ⁹ «Cayčhu caycällä, Tayta. Shunguyqui munashanta rurashaj» nir juc yarpayta Jesús camacächir, Moiséspa shiminta jipaman churaran. ¹⁰ Cananga nuwanchi-raycur Washäcuj Jesús wañuyman chayashanpita Tayta Diosninchipa shungunman tincunchi. Juc cuti wañushallan aypan imaycamanpis llapan runapa juchanta jungacächinanpaj.

¹¹ Cüracuna waran-warana Tayta Diosninchita jaran. Waran-warana jararpis, runacunapa juchanta mana jungacächiranchu. ¹² Washäcuj Jesúsmi ichanga juchanchijanan juc cutilla quiquinpa caway-bidanta Tayta Diosninchita jararan. Jinarcur Tayta Diosninchipa diricha-caj lädunman jamasha. ¹³ Cananga cuncharyuncunata pampaman churanallanta shuyaraycan. ¹⁴ Tayta Diosninchiji acracushan runacunatam ichanga Tayta Jesús caway-bidanta juc cutilla jarashanpita juchaynaj cayman churaran. ¹⁵ Espíritu Santupis tantiyachimashpanchi nin:

¹⁶ «Tayta Diosninchiji nimanchi:
Parlanacur jitapänacushä junaj chayamuptin, yapay runacunawan parlanacushaj.
Shungü munashanta tantiyacunga.
Shungunman chayaptin, llapanta charcunga.

¹⁷ Llutanta rurashantapis, juchačhu arushantapis mana yarparähänachu.»*

* ^{10:7} Salmo 40.6-8. * ^{10:17} Jeremías 31.33-34.

18 Runapa juchan jungacash captina, pipis Tayta Diosninchita mana jaranman-nachu: «Jucha aparicushápita jaraycaj» nir.

Tayta Jesúspita mana witicunapaj piñapashan

19 Irmänucuna, nuwanchi-raycur Jesús wañuyman óhayashanpita Tayta Diosninchipa ñaupanman óhayayta mana manchacunchinachu. Cananga «Lugar santísimo» nishanman yaycush-yupay Tayta Diosninchawan tincunchi. **20** Caway-bídanta Jesús jarash car, Tayta Diosninchawan tincuchimaranchi. Imapis mana chapämanchinachu. **21** Mañacapamänanchipaj mayur cüra Jesús Tayta Diosninchipa wasinchu caycan. **22** Chaymi Tayta Diosnillanchiman llapan shungunchiwan jillicushun. Payllaman sumaj yupachicushun. Janra jananchita chuya yacuwan armacushanchi-jina shungunchichüpis ima juchatasi ama pacarächishunchu. **23** Tayta Diosninchí aunishanta ócharcun. Chaymi llapan shungunchiwan yupachicushun. Wichaypa-uraypa ama yarpačhacushunchu. **24** Irmänunchicunawanpis shacyächinacushun imatapis allillata rurananchipaj, llaquipänacur cawananchipaj. **25** Waquin irmänucuna irmänunmasincunawan mana jutucanchu. Chaynuy cawananchi mana camacanchu. Manchága imay-imaypis irmänunchicunawan jutucáshuwan. Tayta Jesús cutimunan junaj óhayacämuptin, shacyächinacur cawashuwan.

26 Pipis Jesúspa shiminta sumaj-sumaj musyaycar shuyninpa juchata aparicuptin, jampi mana canchu. Tayta Diosninchita ima-imata jaraptinsi, juchan mana il-laringachu. **27** Manchága Tayta Diosninchí juchanta jurgapánanta musyar, mancharishalla shuyaranga. Chay-niraj ticrapujcunata ratataycaj ninachu Tayta Diosninchí ushyar illarachinga.

28 Moiséspa shiminta pampaman ójurajcunata ishcay-quimsa tistigu captin, mana llaquipällar wañurachij. **29** Chaynuy cash caycaptin, ¿Jesústa ticrapur pampaman ójurajcunata imanuyraj ñacachinga? Jesúsga Tayta Diosninchipa Wawan. Nuwanchi-raycur wañuyman óhayar yawarninta jičhash jipa parlanacushanta ócharcucächir, runacunapa juchantapis jungacächir. Espíritu Santutapis llaquipaycämaptinchi, pampaman ójuraj runacuna ashllir ushyan. **30** Tayta Diosninchipa shiminta musyanchi. Shiminchu nin: «Jucha aparicujcunata juchanman-tupu ñacachishaj. Quiquincunata ticrapushaj.» Jananmanpis nin: «Maquiéchu cawajcunata sumaj ricashaj.»* **31** Tayta Diosninchí cawacuj. Charishuptiqui, manchariypaj canga.

32 Irmänucuna, chaymi sumaj yarpačhacushun. Jesús pí cashantapis tantiyacurir, sumaj yupachicushcanqui. Waquin runa sumaj ñacachishuptiquisi, mana ashucushcanquchu. **33** Llapana ricay ñawinchu magar ushyashcashunqui. Ashllir ushyashcashunqui. Pampaman ójurashcashunqui. Waquinniqui juc irmänucunata magar ushyaptin, jatunpa llaquipashcanqui. **34** Carsilaraptinpis, sumaj llaquipashcanqui. Llapana imayquicunata jičhushuptiquisi: «Janaj pachačhu imapis mana pishimangachu. Tarichimashan imaypis mana ushyacangachu» nir cačhapharishcanqui. **35** Chaymi imaman óhayarsi, Tayta Diosninchiman llapan shunguyquiwan yupachicunquiman. Maquinpitapis ama witicunquichu. Imayllaga alli cawayta tarichimäshunpaj. **36** Mana yamacállar yupachicuptinchi, shungun munashallanta ruraptinchi, llapan aunishanta tarichimäshunpaj. **37** Shiminchüpis nin: «Shamujga manasi aycällatana óhayamunga. Mana juyapacämunganachu.

38 Nuwallaman yupachicamajcuna shungü munashallanta rurar, cawanga.

Nuwapita witicujcunam ichanga shungüman mana tincunchu.»*

39 Waquin runacunata witicushanpita Tayta Diosninchí ushyacayman óhayachinga. Nuwanchim ichanga washämänanchicaman yupachicuyänanchi.

* **10:30** Deuteronomio 32.35-36. * **10:38** Habacuq 2.3-4.

11

Tayta Diosninchipa maquinčhu cawaj runacunata ricacushun

¹ Yupachicurga: «Tayta Diosninchu aunishanta ćharcun» nir llapanta ćhasquicunchi. Aunishanta mana ricaycarsi, camacächinanta llapan shungunchiwan yupachicunchi.

² Unay auquillunchicunatapis sumaj yupachicushanpita Tayta Diosninchu alli ñawinpa ricaran.

³ Nuwanchipis Tayta Diosninchiman yupachicunchi. Unayga mana imasi caranchu. Tayta Diosninchu rimariptinmi ichanga, janaj pachapis, cay pachapis ricacuran. Chaynuypa llapan ricashanchicunata Tayta Diosninchu camashanta tantiyacunchi.

⁴ Abelpis Tayta Diosninchiman yupachicuran. Yupachicushpan allinninta jararan. Wauguin Caínmi ichanga llutallata jararan. Chaymi Abelta Tayta Diosninchu alli ñawinwan ricar, jarashantapis cushish ćhasquiran. Abel wañucushana captinpis, Tayta Diosninchiman yupachicushanta yarparanchi.

⁵ Henocpis Tayta Diosninchiman yupachicuran. Yupachicuycaptin, alli ñawinwan Tayta Diosninchu ricaran. Chaymi: «Tayta Diosninchu shuntacuptin, Henoc illaricusha» niptin, cawaycajllata janaj pachaman apacushanta musyanchi. Tayta Diosninchipa shiminpis nin: «Tayta Diosninchuwan Henoc yachänacuran.» ⁶ Sumaj tantiyacushuwan. Mana yupachicujcuna Tayta Diosninchipa shungunman mana tincunchu. Tayta Diosninchu cawashantapis, shiminta ćharcunatapis yupachicurmi ichanga, shungunman tincunchi. Shimin nishannuya tarichimäshun.

⁷ Noépis Tayta Diosninchiman yupachicuran. Chaymi Tayta Diosninchu imata rurantanapis mana musyaycar, arcata ruraran yawar-masincunatapis jishpichinanpaj. Yupachicur wiyacuptin, alli ñawinwan Tayta Diosninchu ricaran. Waquin runacunatam ichanga mana yupachicushanpita wañuchiran.

⁸ Auquillunchi Abrahampis Tayta Diosninchiman yupachicuran. Chaymi: «Marcayquipita llucshiy. Juc marcačhu ćhacrata jushayqui» nir Tayta Diosninchu auniptin, wiyacuran. Wiyacur, ćhaquin ćhayashanpa aywacuran. ⁹⁻¹⁰ Yupachicuycur aunishan marcaman ćhayar jäpa runacunapa marcan captinsi, juyaran. Jäpa runa car, purichina jiru ćhaqui wasillačhu juyaran. Wamran Isaacpis, willcan Jacobpis auquillun Abrahamjina jäpa runacunapa marcallančhu juyaran ćhacrata junanpaj Tayta Diosninchu auniptin. Abrahamga purichina jiru ćhaqui wasillačhu cawaran Tayta Diosninchipa marcancaman ćhayayta yarpar. Chay marca quiquin Tayta Diosninchipa marcan. Quiquin ruraran imaypis mana ushyacänanpaj.

¹¹ Mama Sarapis Tayta Diosninchiman yupachicuran. Chaymi majan Abrahamwan ishcanin chachayash carsi, wawaynaj warmi carsi, wawata tariran: «Tayta Diosninchu aunishanta ćharcun» nir. ¹² Chaymi Abrahampis wañush-yupay caycashančhu churiyäcuran. Willcancunapis yupaysi mana atipaypaj miraran. Istrilla-jina, agu-jina may-may achcayaran.

¹³ Unay yupachicujcuna jurpay-tucullar cay pachačhu juyaran. Ćhacraynaj-jina puriran. Tayta Diosninchu aunishan ćhacraman mana ćhayaranchu. Chaypis paypa maquinčhu cawayta munar, cushish shuyararan. Sumaj yupachicuran. Ichanga wañucuran.

¹⁴ Chaymi: «Jurpay-tucullar cawä» nirga, yawar-masinpaj marcata ashishanta musyachimanchi. ¹⁵ Ichanga yurishan marcatachu mana ashiran. Yurishan pachallaman yarparar, cuticunman caran. ¹⁶ Mana cuticur, juc marcata ashishanta musyachimanchi. Janaj pachačhu alli marcacaman ćhayayta munashanta musyachimanchi. Sumaj yupachicuptin, shungunman tincuptin, Tayta Diosninchipa musyachicusha: «Paycuna maquičhu cawan. Wasintapis janaj pachačhu camacächishcä» nir.

¹⁷⁻¹⁸ Abraham yupachicushanta musyapayta munar, Tayta Diosninchu nir: «Rupachiypa wamrayqui Isaacta jaramay.» Abraham Tayta Diosninchu aunishanman sumaj yupachicur Isaaclla wamran captinpis, pishtaj aparan. Tayta Diosninchu aunishana

caran: «Abraham, wamrayqui Isaacpa wamrancunapis, willcancunapis yupaysi mana atipaypaj miranga» nir. ¹⁹ Chaymi Abraham yupachicuran: «Munarga, wañushcunatas Tayta Diosninchimana cawarachimunga» nir. Chaynuypa Abraham Isaacninta cutichicuran: «Wamrä cawarimusha» nir.

²⁰ Isaacpis Tayta Diosninchiman yupachicuran. Yupachicushpan wamran Jacobtawan Esaúta alliman churaran: «Taytallau Tayta, imaçhüpis wamräcunata yanapaycullay, ari» nir.

²¹ Jacobpis Tayta Diosninchiman yupachicuran. Chaymi tipicäcuya camarsi Tayta Diosninchita manchapacur, garutinman tuncacushalla Josépa wamrancunata alliman churaran: «Taytallau Tayta, imaçhüpis willcäcunata yanapaycullay, ari» nir.

²² Josépis Tayta Diosninchiman yupachicuran. Chaymi tipicäcuya camaycarsi, Israel marca-masincunata willaran: «Cay Egipto marcapita Tayta Diosninchimana jishpichishunquipaj. Jishpichishuptiqui, tullucunatas apacapamanqui» nir.

²³ Moiséspis maman-taytanpis Tayta Diosninchiman yupachicuran. Chaymi wamran yuriptin: «Cuyayllapaj wamrä» nir quimsa quillacaman pacarächicuran. Egipto marcapa mandajnin: «Lapan Israelcunapa ullgu mallwanta wañurachiy» nir niycaptinsi, mana manchacuranchu.

²⁴ Moiséspis Tayta Diosninchiman yupachicuran. Chaymi sumaj runayar, Egipto marcapa mandajnin wamrachacush caycaptinsi, chincacuran. ²⁵ Yawar-masincunaman witicuran: «Egipto runacuna cushish jucha aparicuyllačhu cawan. Yawar-masicuna ñacayčhu cawaptinsi, paycunawan juyashaj. Paycunataga Tayta Diosninchimana acracusha» nir. ²⁶ Egipto mandajcuna puchuy-puchuy cawaran. Moisésmi ichanga Washäcujninchijina pampaman churanantapis mana pingacuranchu. Tayta Diosninchipa acracuynin carmi, aunishanman sumaj yupachicuran. ²⁷ Tayta Diosninchiman yupachicuycur, Egipto marcapita llucshicuran. Mandaj ullguptinsi, mana manchacuranchu quiquin Tayta Diosninchawan tincush caycar. Chaypis ñawinwan mana ricaranchu. ²⁸ Tayta Diosninchiman yupachicuycur, Israel-masincunata Moisés piñaparan: «Pascua fiestata rurashun. Uywata pishtashun. Yawarninwan wasi puncuyquipa ishcan marcuncunatapis, numralnintapis yawarchäshun. Chayta ricar, wañuchicuj anjilnin jichpa-caj ullguta mana wañuchingachu» nir.

²⁹ Israel runacunapis Tayta Diosninchiman yupachicuran. Chaymi chaqui pachapajina Puca yacu püsuta chimpariran. Jaticačhaj Egipto murucucunam ichanga yacučhu shugupacaypa wañuran. ³⁰ Israel runacuna Tayta Diosninchiman yupachicuycur, Jericó marcatapis ushyaran. Jančhis junaj tumaycaptillan, marca jučhucäcuran. ³¹ Mana wiyacujcunata marcantinta llapallanta Tayta Diosninchimana ushyaran. Runan-runan puricuj Rahabtam ichanga jishpichiran. Payga Tayta Diosninchiman yupachicuran. Yupachicuycur, Jericó marcaman Israel runacuna ricapacuj chayaptin alli ñawinpa ricar, pachächiran.

³² Achcaj runa Tayta Diosninchiman yupachicuran. Ichanga llapanpita willapänajpaj mana jäcünachu. Gedeónpis, Baracpis, Sansónpis, Jeftípis, Davidpis, Samuelpis, unay willacujcunapis Tayta Diosninchiman yupachicuran. ³³ Waquinga yupachicur, jäpa marca runacunata maganacur ičhipuran. Maquinčhu purichijcunata piñaparan Tayta Diosninchipa shungun munashannuy cawanapaj. Tayta Diosninchimana aunishantapis chasquiran. Waquin micucuj liyunpa shiminpitapis jishpiran. ³⁴ Rata Taycaj ninapis mana ruparanchu. Waquintana tucusiytapis mana camäpacuranchu. Waquin jishyachu carpis, allchacäcuran. Maganacuychüpis ičhipuran. Yaycapacuj jäpa murucucunatapis jarguran.

³⁵ Waquin yupachicuj warmicunapis yawar-masin cawarimuptin, cushicuran. Waquin yawar-masincunam ichanga wañuyman chayaran. Paycuna cunčharyuncuna

wañuchiptionsi, Tayta Diosninchita mana wasguiranchu. Manchäga payllaman sumaj yupachicuran: «Imayllapis cawarimur, Tayta Diosninchawan tincushaj» nir. ³⁶ Waquin yupachicucunata ashllir, wirur ushyaran. Waquinta cadinawan mancurnaran. Waquinta carsilchu wičhgarächiran. ³⁷ Waquinta sajmar ushyaran. Waquinta sirüchuwan pullanpa muturiran. Waquinta tucsiy়a wañuchiran. Waquin yupachicucuna pišipacuyman čhayar, jalapačhalla puriran. Uyshapa, capshipa jarachallawan pitucuran. Yargaywan wañuran. Pampaman čhurash caran. Juyupa ñacachish caran. ³⁸ Chaymi čhaquin čhayashanpa aywacärian. Chunyaj pacha quinranpa, chunyaj jirca quinranpa jishpicärian. Wasita mana tarir, učhcucunallačhu, mačhaycunallačhu pachacuran. Juyu runacuna ashllir ushyaran: «Chaycunata ama ricalläshunpishchu» nir. ³⁹ Tayta Diosninchim ichanga yupachicushanpita alli ñawinwan ricaran. Yupachicucuna llapan shungunwan yupachicursi, Tayta Diosninchchi aunishan čharcushanta mayganpis mana ricaranchu. ⁴⁰ Ima captinpis, juc yarpaylla cawaran. Chay yarpashanta Tayta Diosninchchi camacächiran unay yupachicucunapäpis, nuwanchicunapäpis. Chaymi Tayta Diosninchchi aunishanta čharcur, llapaninchita jishpichimäshun shungun munashannuya cawananchipaj.

12

Wawancunata Tayta Diosninchchi piñacushanpita tantiyachishan

¹ Unaypis chay-chicaj mama-warmicuna, mayur runacuna Tayta Diosninchiman yupachicuran. Nuwanchipis paycunata ricacushun. Imamanpis ama jaticäshunchu. Juchatapis ama aparicushunchu. Ima captinsi, mana yamacällar Tayta Diosninchipa shungun munashanta rurar cawashun.

² Yupachicuya sumaj yačhacunanchipaj Jesústapis sumaj ricacushun. Payga Tayta Diosninchiman sumaj yupachicuran. Yupachicunanchipäpis camacächiran. Tayta Diosninchipa ñaupanmanpis čhayachimäshunpaj. Ñacachiptinsi, rusčhu wañuchiptionsi, pingayman čhuraptinsi, cushish čhasquicuran. Alliman čhayananta musyar, mana jishpicuranchu. Chaypita mandäshinanpaj Tayta Diosninchchi diricha-caj lädunman jamachiran. ³ Jesú imanuy-imanuy ñacashantapis ama jungashunchu. Allita ruraptinsi, juchačhu arujuna sumaj chiquiparan. Chay-jina chiquipämptinchipis, ama yamacäshunchu. Jesúspita ama jishpicushunchu.

⁴ Mayganinchitapis juchata ticrapushanchipita mana wañuchimashcanchichu. ⁵ ¿Tayta Diosninchipa shiminta jungaycärishcanquichuraj? Shiminčhu anyapämanchi: «Wawallau wawa, Tayta Diosninchchi tantiyachishuptiqui, ama wasguipanquichu. Piñapäshuptiquipis, ama jagayanquichu.

⁶ Tayta Diosninchchi shungunman tincucunallata piñacun.

Wamrachacushancunallata wascan» nir.*

⁷ Pi runapis wamranta piñacun. Tayta Diosninchipis wamran cashpanchi allipaj piñapämanchi. Chaymi ñacayčhu caycar: «Allipaj Tayta Diosninchchi piñapaycäman» nir čhasquicunchi. ⁸ Tayta Diosninchipis llapan wawanta piñacun. Jucpa churintam ichanga mana rimapanchu.

⁹ Piñapämaptinchi, mamanchi-taytanchipa shimintapis čhasquicuranchi. Chaymi cawachicuj Tayta Diosninchchi piñapämaptinchi, ¿manachu čhasquicushawan? Au, čhasquicunanchi. Paypita cawaycanchi. ¹⁰ Mamanchi-taytanchi quiquinpa yarpashanta rurananchipaj piñacamanchi. Tayta Diosninchim ichanga allipaj piñapämanchi quiquinjina juchaynaj cawananchipaj. ¹¹ Piñapämaptinchi, mana cushicunchichu. Manchäga nanämanchi. Wiyacurmi ichanga, alli cawayta yačhacunchi. Tayta Diosninchipa shungun munashannuypis cawanchi. ¹² Chaymi ama jutucäcunquichu. Manchäga Tayta Diosninchiman yupachicur shungun munashannu cawashun. Maquinchi,

* **12:6** Proverbios 3.11-12.

jungurninchi uticash captinsi, callpachacushun. ¹³ Maypa aywananchipäpis wicsu caminucunata allchashun wijrucuna mana tuninanpaj. Chaymi shungun munashannuy cawaptinchi, Tayta Diosninchipa witiycačhajcunapis mana witicungachu wijru runa tunishan-jina. Juchamanpis mana tuningachu. Manchäga allillana cawanga.

Tayta Diosninchipa shungun munashallanta rurananpaj piñapashan

¹⁴ Llapanwan allilla ricanacunqui. Tayta Diosninchipa shungun munashallanta ruranqui. Manchäga Tayta Diosninchawan pipis mana tincungachu. ¹⁵ Tayta Diosninchipa llapan runata llaquipan. Chaymi llapan runata alli ricanquiman. Pitapis ama jagayächiniquimanchu. Jagayächiptiqui, paypis waquiniquicunata jagayächinga. ¹⁶ Esaúpa llupinpapis ama jatinquichu. Payga warmi-pačha caran. Tayta Diosninchitapis mana manchapacuranchu. Tayta Diosninchichi jichpacunata alli rican. Niycaptinsi, pačhanpaj pishiptin, juc mati micuyllapaj jichpa cayninta Esaú ranticuycuran.* ¹⁷ Jinarcur, jichpa cayninta čhasquinanpaj wiguinpawanraj taytanta mañacuran. Čhasquinanmi ichanga mana camacaranchu.

¹⁸ Unay auquillunchicuna Sinaí puntallačhu Tayta Diosninchawan tincuran. Manchariypaj warauyayapa-warauyar nina ratacurcuran. Juyupa chacacäcuran. Shucucuy wayra ičhicurcuran. ¹⁹⁻²⁰ Curnita tututuylla suynaran. Tayta Diosninchipa shiminpis sumaj wiycaran. Chaura auquillunchicuna niran: «Taytallau Tayta, ama rimamuy-nachu. Shimiquita wiyatya manchacurcaycä.» Tayta Diosninchichi nish caran: «Cay puntaman čhancamuja runatapis, uywatapis sajmayllapa wañuchinqui.»* ²¹ Llapanpis manchariypaj captin, Moiséspis niran: «Manchacü. Janäcunapis jutucäcuycan.»

²² Jamcunam ichanga Sión puntaman, janaj pachačhu Jerusalén marcaman čhayashcanqui. Chay marcaga cawaj Tayta Diosninchipa marcan. Wasinčhu yupaysi mana atipaypaj anjilcuna cushish fiestata rurarcaycan. Tayta Diosninchita alliman čhurarcaycan. ²³ Tayta Diosninchipa jichpa wamran-yupay cushi-cushilla fiestata rurarcaycan. Jutiquicunapis janaj pachačhu apuntaraycan. Tayta Diosninchipa ñaupanman čhayashcanqui. Payga llapan runapa shungunta musyapan. Maquinčhu cawaj runacunapa almanwanpis tincushcanqui. ²⁴ Jesúswanpis tincushcanqui. Juc parlanacuypita parlapaycämachi. Chaypämi nuwanchi-raycur wañuyman čhayasha. Yawarninwan juchanchita illarachisha. Tayta Diosninchichi alli ñawinwan ricamänanchipäpis mañacapuycan. Abel wañushanmi ichanga Caín ñacananta mañacuycan.

²⁵ Chaymi Tayta Diosninchipa shiminta wiyar, ama upa-tucushunchu. Unay auquillunchicuna cay pachačhu Tayta Diosninchipa shiminta wiyan. Mana wiycuptinmi ichanga, unyanta cutichinanpita pipis mana jishpiranchu. Cananga janaj pachapita Tayta Diosninchipa shiminta wiycaycanchi. Paypa shiminta mana wiycur, ¿jish-pishuwanchuraj? ²⁶ Auquillunchicunata Sinaí puntačhu willapaptin, cay pachata tapsichisharaj. Canan wicanpäpis Tayta Diosninchichi nin: «Yapay cay pachata tapsichishaj. Janaj pachatapis tapsichishaj.»*

²⁷ «Yapay tapsichishaj» nirga, llapan camashancunata illarachinanta musyachimanchi. Tayta Diosninchipa wasinmi ichanga mana ushyacangachu. ²⁸ Tayta Diosninchipa maquinčhu cawaycar, nuwanchipis mana ushyacäshunchu. Chaymi Tayta Diosninchita alliman čhurashun. Shungun munashallanta rurashun. Manchapacushun. ²⁹ Manchäga ushyaramäshuwan. Tayta Diosninchiga warau-warauyaycaj nina-yupaymi.

13

Irmäncunata piñapashan

* **12:16** Israel marcačhu jichpa-caj ullgu wamra ishcay janapaypa irinsanta čhasquij. Génesis 25.19-pita 34-caman tantiyachicuycan. * **12:19-20** Éxodo 19.12-13. * **12:26** Ageo 2.6.

¹ Irmänucuna, yawar-masi-pura-jina llaquinacunquiman. ² Pachächinacunquiman. Unaypis pachächicujcuna mana musyayninwan anjilcunata pachächiran. ³ Carsilarajcunatapis quiquipuicuna carsilchu caycaj-yupay ama junganquichu. Ñacajcunatapis quiquipuicunapis ñacaychu caycaj-yupay llaquipanquiman.

⁴ Majayquiwan alli ricanacunqui. Ama jananpachinquichu. Jananpachicujcunata, jucwan-jucwan puricujcunata Tayta Diosninchu juchanta jurgapanga.

⁵ Jillayllapaj ama wañunquichu. Manchäga tarishallayquita aypächicunquiman. Tayta Diosninchipis nin: «Mana imaypis jungashayquichu. Mana imaypis jaguirishayquichu.»

⁶ Chaymi payman yupachicur, shacyächinacushun: «Tayta Diosninchu yanapaycämanchi. Runa-masinchi imatapis mana ruramäshunchu. Chaymi imatapis ama mancha-cushunchu» nir.*

⁷ Ricashujniquicunata sumaj ricacunquiman. Paycuna Tayta Diosninchipa shimita willapäshurayqui. Wañuy jananchu caycarpis, Tayta Diosnillanchiman yupachicuran. Chaymi paycuna-jina cawanquiman. Shimintapis ama junganquimanchu.

⁸ Taytanchi Jesucristu pii cashanpis mana ushyacanchu. Unay wicanpis, canan wicanpis, imaycamanpis cashannylla cawacun. ⁹ Chaymi pantachicujcunapa shimita ama chasquipanquichu. «Tayta Diosninchipa ricay ñawinchu alli juyänayquipaj ricsishllata micuy» nirpis, manacajcunallata yaçhachishunqui. Mana ricsish micuycunallata micuptquirächu, Tayta Diosninchu alli ñawinpa ricashunqui. Manchäga llaquipäcu car, imachüpis yanapäshunqui. ¹⁰ Chaypita unay cüracuna rurashanta mana ruranchinachu. Paycuna Tayta Diosninchipa ricay ñawinchu alli ricash cayta munar, uywacunata rupachiypa jarar, ricsish micuycunallata micuj. Nuwanchi-raycur Jesús caway-bidanta jarashanta yarparmi ichanga, jutucaycur micupacunchi. Chaypita unay yarpashanta rurajcuna mana micüshimanchichu.

¹¹⁻¹² Unay cüracuna Tayta Diosninchu runacunapa juchanta mana yarparänanpaj uywacunata pishtaran. Mayur cüra Tayta Diosninchipa wasin rurin-cajman yaycur uywapa yawarninta jararan. Aychanta wajtaman jurgaycur, ushyajpaj ruparachiran. Maygan cürapis mana malliranchu. Nuwanchipa juchanchita junganapämi ichanga Tayta Jesús caway-bidanta jararan. Marca wajtanchu wañuchish caran. Yawarninwan juchanchita illarachisha Tayta Diosninchawan alli ricanacunanchipaj. ¹³ Chaymi unay auquil-lunchicuna yarpashanta jucläman churashun. Ñacachimänanchi, ashllimänanchi captinsi, Jesúslata ricacushun. ¹⁴ Cay pachachu marcanchi ushyacanga. Shuyaycächimashanchi marcam ichanga mana imaypis ushyacangachu. Chay marcaga janaj pachachu caycan.

¹⁵ Chaymi Jesús allita rurashanpita mana jamallar Tayta Diosninchita alliman churashun. Shiminchiwan alliman churaptinchi, imatapis jarashanchita-yupay chasquin.

¹⁶ Allita rurashanchitapis, runa-masinchiwan yanapänacushanchitapis jarashanchita-yupay chasquin. Chaynu cawashanchi Tayta Diosninchipa shungunman tincun.

¹⁷ Irmänucuna, mayur irmänucunapa shimita chasquicushun. Paycuna ricarcaycämanchi. Alli cawananchita munar, jamaytapis mana tarinchu: «Tayta Diosninchu ricaycämán» nir. Chaymi cushi-cushilla arunanpaj yanapanqui. Chapata ama ruranquichu. Chapata ruraptiqui, willapäshushayquipis yangallapaj canga.

¹⁸ Irmänucuna, nuwacunapäpis Tayta Diosninchita mañacunqui. Shungun munashan-nuy cawayta munä. Shungütapis musyaraycan. ¹⁹ Manasi aycällatana jamcunawan tincuya yarpaycä. Chaymi Tayta Diosninchita sumaj mañacärinqui.

Ushyanan

²⁰⁻²¹ Allilla cawanayquipaj Tayta Diosninchu yanapayculläshunqui.

Paymi wañuypita Taytanchi Jesústa cawarachimusha.

Jesúsga uyshata michij-jina sumaj ricaycämanchi.

* ^{13:6} Salmo 118.6.

Tayta Diosninchi parlanacushan imaycamanpis ñcharcunapäpis nuwanchi-raycur wañuyman ñhayasha.

Cananga Tayta Diosninchipa shungun munashanta rurananchipäpis, shungunman tincushanta rurananchipäpis yanapaycämachi.

Imay-imaypis Washäcu Jesústa alliman ñchurayculläshun.

Chaynuy caycullächun.

²² Irmänucuna, anyapashajta wiycunqui, ari. Cartacur chayllata willapärij.

²³ Irmänunchi Timoteo carsilpita llucshishana. Ñhayamuptin, watucuj shamur, pushamushaj.

²⁴ Tayta Diosninchipa acracushan caycar, llapan ricashujniqui mayur irmänucunata, llapan irmänunchicunata wamayapämanqui. Italia marcachu jutucaj irmänunchicunapis wamayäshunqui. ²⁵ Tayta Diosninchi llaquipäshushpayqui llapallayquita yanapayculläshunqui, ari. Chayllana.

San Santiago cartacushan

Tantiyacunanchipaj:

¿Maygan Santiaguraj cay cartata isquirbiran? Waquin yarpan Jesúspa wauguin Santiago isquirbishanta. Paypa juc-caj jutin caran Jacobo. Payga Pedruwan ishcanin mayur irmänu cashpan Jerusalén marcačhu jutucaj irmänucunata maquinčhu purichiran. Chaymi Jesúsman yupachicuj Israel-masincunata sumaj ricaran. Jesúspita sumaj tantiyachiran. Santiagupita musyayta munar, liguinqui: San Mateo 13.55; San Juan 7.2-5; Hechos 15.13-21; Gálatas 2.9; Colosenses 5.7.

Santiago cay cartata isquirbiran Israel marca-masincunapaj. Paycuna chaytucuy marcacunačhu tiyaycaran. Jesúsman yupachicushanpita auturdäcuna juyupa chiquiparan. Waquinta wañuchiran. Waquinta carsilman wičhgachiran. Chaymi marcanpita jishpicur, juclä marcacunapa aywacáriran. May-chayčhu tiyaptinpis, shačyächinanpaj, sumaj tantiyachinanpaj cartacuran.

Santiago isquirbiran:

Chay-tucuyčhu marca-masincunata wamayashanpita, ñacar Tayta Diosninchí yanapänanpaj mañacushanpita: *Santiago 1.1-18*.

Tayta Diosninchiman janan shungulla yupachicujcunapita, Tayta Diosninchipa shiminta mana wiyacur llullacuycashanpita: *Santiago 1.19-27*.

Llapan runata llaquipänanpita, ñacajcunata yanapänanpita: *Santiago 2.1-26*.

Shiminta chapacunapita: *Santiago 3.1-12*.

Tayta Diosninchita manchapacur cawanapita: *Santiago 3.13-18*.

Quiquillanpaj yarpačhacur imatapis ashijcunapita, runa-masinta mana tincupänanpita: *Santiago 4.1-17*.

Puchuy-puchuy janančhu cawajcunata Tayta Diosninchí ñacachinga pishipacujcunata ñacachishanpita: *Santiago 5.1-6*.

Ñacarpis mana yamacällar Jesús cutimunanta shuyänanpita: *Santiago 5.7-12*.

Mayur irmänucuna jishyačhucunapaj mañacapunanpita, juchačhu cawayta munaj irmänucuna wanacunapaj yanapänanpita: *Santiago 5.13-20*.

Santiago wamayashan

¹ Israel-masicuna, chay-tucuy marcačhu cawaptiquipis, nuwa Santiago cartacallämü.* Munashallanta ruranäpaj maquinčhu Tayta Diosninchipis, Tayta Jesucristupis purichiman. Llapaniqui allilla juyaycärinqui, ari.

Ñacaypita tantiyachishan

² Irmänucuna, ima ñacayman čhayarpis, ama llaquicunquichu. Manchäga sumaj-sumaj cushicunquiman. ³ Ñacashpanchiraj llapan shungunchiwan Tayta Diosninchiman yupachicuya yačhacunchi. ⁴ Mana yamacällar yupachicur, Tayta Diosninchipa shungun munashannuy cawashunpaj. Imatapis mana sasächicushunpächu.

⁵ Mayganiquipis imatapis mana tantiyar, Tayta Diosninchita mañacunquiman. Mana ricapäshunquipächu. Manchäga wiyashunquipaj. Sumaj yanapäshunquipaj shungun munashannuy cawanayquipaj. ⁶⁻⁷ Ichanga llapan shunguyquiwan mañacunqui. Mañacur ama yarpačhacunquichu: «¿Mañacushäta čhasquimangachuraj, manachuraj?» nir. Ishcayta yarpaptiqui, Tayta Diosninchí mana wiyashunquipächu. Chaqui üjata wayra

* ^{1:1} Israel runacunapa unay auquillun Jacobpa čunca ishcaywan (12) ullgu wamrancuna caran. Wamrancunapita yawar-masincuna čunca ishcaywan (12) Israel castan miraran. Chaymi llapanpaj rimar, castillänučhu nin: «doce tribus.»

apacushan-jina ishcayta yarpaj runacunapis wacpa-caypa mashtacäcun. ⁸ Chay-niraj runacuna imata yarparpis, imata munarpis, waran-waran jucta-jucta yarpačhacun.

⁹ Irmänucuna, lluta runa car pishipacuyčhu cawaptiquisi, cusicärinquiman. Tayta Diosninchu alli ñawinwan ricaycäshunqui. ¹⁰ Puchuy-puchuy janančhu cawar pishipacuyman čhayaptiquisi, cusicärinquiman. Tayta Diosninchu alli ñawinwan ricaycäshunqui. Puchuy-puchuy janančhu cawajcuna wayta-jina ushyacajlla. ¹¹ Waytapis shanaywan uyucurin. Camarajlla carpis, chaquicurin. Chay-jina puchuy-puchuy janančhu cawajcunapis rurayninwan tincuypa-tincushančhu ushyapacayman čhayan.

¹² Ñacyman čhayarpis, cusicärinquiman. Tayta Diosninchita mana wasguiptinchi, imaycamanpis ñaupančhu cawachimäshun. Aunimashanchinuylla llapan manchapacujcunata alli cawayta tarichinga.

¹³ Llutan rurayta yarpar, ama ninquichu: «Tayta Diosninchu juchaman jitarpaycäman.» Payga jucha aparicuya mana yarpanchu. Pitapis mana juchata aparicachinchu. ¹⁴ Manchäga quiquin runa jucha rurayta munapan. Imanuypapis aywapan. ¹⁵ Munapashanta rurar, juchallicun. Juchallačhu cawar, mana imaypis Tayta Diosninchipa ñaupančhu cawangachu. Manchäga wañuyllata taringa.

¹⁶ Irmänucunallau irmänu, llutanta ama yarpanquichu. ¹⁷ Tayta Diosninchu alliman čhayachimanchi. Allillata rurananchipäpis yarpächimanchi. Shimintapis čharcun. Mana ishcay-quimsatachu riman. Tayta Diosninchu camashanpita intipis, quillapis caycan. ¹⁸ Shiminta čhasquicuptinchi, quiquin munayničpa wamrachacamashcanchi. Chaymi pirwata-jina allina ricamanchi.

¹⁹ Irmänucunallau irmänu, imatapis wiyanayquipaj rinriquita sumaj quičhanqui. Rimayta munarmi ichanga, shimiquita chapacunqui. Juclla imapitapis ama rimarinquichu. Ama warminquichu. Ama ullgunquichu. ²⁰ Warmijcunapis, ullgujcunapis Tayta Diosninchu munashanta mana ruranchu. ²¹ Chaymi juchata ama aparicunquichu. Manchäga Tayta Diosninchipa shiminta sumaj wiyacunqui. Mana ticrapällar wiyacupiqui, Tayta Diosninchu washäshunqui.

²² Ichanga wiyashallayquiwan ama ushyaräcuchunchu. Manchäga llapanta čharcunayqui. Wiyashallayqui ushyaräcuptin, upa-yupayna caycanqui. ²³ Tayta Diosninchipa shiminta wiyaycar mana čharcucunaga rama-rama ispijučhu runa jajllanta ricacur jungaycushanwan tincun. ²⁴ Jajllan imanuy cashantapis ricacurir, ima-niraj cashantapis mana yarpannachu. ²⁵ Tayta Diosninchipa shiminta sumaj wiyacur allita rurarmi ichanga, alli cawayta taringa. Tayta Diosninchu yanapaptin, imačhüpis alličhu llucshinga.

²⁶ Tayta Diosninchita manchapacur, pipis shiminta chapacunman; manchäga manacajllapämi manchapacushanpis. Shungun munashannuypis mana cawan-nachu. ²⁷ Rasunpa manchapacurga, biyüdacunatapis, wacchacunatapis yanapanman. Juchačhüpis ama cawanmanchu. Chaynuj cawaptinchi, Tayta Diosninchu sumaj cushi-cun.

2

Lapanwan alli ricanacunapaj willapashan

¹ Irmänucuna, munayniyuj Tayta Jesucristupa maquinčhu cawar, llapan runata alli ricanquiman. ²⁻³ Waquinniqui puchuy-puchuy janančhu cawajcunata alli ricanqui. Pishipacuyčhu cawajcunatam ichanga pampaman čhuranqui. Juturashayquiman achic-achicyaycaj müdanash runa čhayamuptin, ninqui: «Tayta, cayllaman shacallämuy. Ñaupañaupallačhu jamashun.» Janra müdanash asyaycar runa čhayamuptinmi ichanga, ninqui: «Jawallačhu jamay. Pachallačhu jamay.»

⁴ Runa-masiquita waquinta alli ricar, waquinta pampaman čhurar, ¿allitachu ruraycanqui? Mana. Manchäga shunguyqui juyu cashanta musyachicuycanqui.

⁵ Irmänucuna, sumaj wiycäriniquiman. Pishipacuyčhu cawajcunatapis Tayta Diosninchí acracusha payman sumaj yupachicunapaj. Manchapacuptin, aunishannuylla maquillančhu cawachinga. ⁶ Jamcunam ichanga pishipacuyčhu cawajcunata pampaman čhuraycanqui. Paycuna shungun munallahanta mana rurachishunquichu. Puchuy-puchuy janančhu cawajcunam ichanga alliman čhuraycaptiquisi, nishan-nishanta rurachishunqui. Auturdäcunawanpis magar ushyachishunqui. ⁷ Taytachacushanchi Jesústapis ashllir ushyan.

⁸ Llapan runata alli ricarmi ichanga, pipis Tayta Diosninchipa shiminta čharcun. Shiminčüpis nin: «QuiQUI alli ricacushayqui-jina runa-masiquitapis alli ricanquiman.»*

⁹ Waquin-waquillanta alli ricarmi ichanga, juchata aparicunqui. Juchata aparicur, quiquipicunalla Moiséspa shimin rimashanman-tupu ñacayta tarinquipaj. ¹⁰ «Tayta Diosninchipa shiminta llapanta čharcü» nirpis waquinta mana čharcurga, llapantana pampaman čhuraycanqui. ¹¹ Mä, tantiyachishayqui. Tayta Diosninchí nin: «Majayquita ama jananpachinquichu.» Chaynuypis nin: «Ama wañuchicunquichu.» Chaymi majayquita mana jananpachirsi runa-masiquita wañuchirga, juchata aparicuycanqui. Tayta Diosninchipa shimintapis pampaman čhuraycanqui.

¹² Chaymi imata rimanayquipäpis, imata ruranayquipäpis sumaj yarpačhacunquiman. Tayta Diosninchí jurgapämänanchi captin, shungun munashannuylla cawashun.

¹³ Runa-masiquita mana llaquipaptiqui, Tayta Diosninchispis mana llaquipäshunquipächu. Runa-masiquita llaquipaptiquim ichanga, llapan runapa juchanta jurgapashan junaj allíchu llucshinquipaj.

Yupachicushanchi imatapis rurashanchipitaraj musyacashan

¹⁴ Irmänucuna: «Tayta Diosninchiman yupachicü» nir shiminta llapanta čharcunquiman. Mana čharcuptiqui, ¿Tayta Diosninchí jishpichishunquichuraj?

¹⁵ Mä, yarpačhacushun. Juc irmänush pačhanta ashir, jananta ashir čhayamunman.

¹⁶ Čhayamuptin, jucniquish imatapis mana tariycachir ninquiman: «Tayta Diosninchí yanapaycallähshunqui. Pačhayquitapis, janayquitapis mana pishichishunquipächu.» Chaynuy shimillayquiwan shacyächipar, ¿allitachuraj ruraycanqui?

¹⁷ «Tayta Diosninchiman yupachicü» nirga, yanapanquiman. Manchäga yupachicushayquipis mana musyacanchu.

¹⁸ Pitapis mana yanaparga, ¿imanayparaj Tayta Diosninchiman yupachicushayquita musyacächinquiman? Nuwam ichanga pitapis yanapar, Tayta Diosninchiman yupachicushäta musyachicü. ¹⁹ «Tayta Diosninchí quiquillan munayniyuj» nir allita yarpaycanqui. Supaycunapis chaynuylla yarpan. Ichanga juyupa mancharir sicsicyan.

²⁰ Upa yarpayta ama yarpanquichu. Tayta Diosninchiman yupachicur, allillata ruranquiman; manchäga yupachicushayquipis manacajllapämi.

²¹ Sumaj tantiyachishayqui. Auquillunchi Abrahamtapis wiycushanpitaraj Tayta Diosninchí alli ricaran. Abrahamga Tayta Diosninchipa shiminta wiycur, wamran Isaacta jararan. ²² Yupachicushan musyacänanpaj Tayta Diosninchipa shiminta wiycuran. Chayrämi Tayta Diosninchipa maquinčhu sumaj tacyacaran. ²³ Tayta Diosninchipa shiminpis musyachimanchi: «Yupachicushallanpita Abrahamta Tayta Diosninchí juchaynajta ricaran» nir. Runacunapis riman: «Tayta Diosninchowan Abraham sumaj yačhänacun» nir.*

²⁴ Sumaj tantiyacunquiman. Tayta Diosninchí alli ricamanchi shiminta wiycur allita rurashanchipita; mana yupachicushallanchipitachu.

* **2:8** Levítico 19.18. * **2:23** Génesis 15.6.

²⁵ ¿«Rahab» nishan warmi imata rurashantapis manachu yarpanqui? Chay warmi runan-runan puricurpis Israel runacuna ricapacuj čhayaptin, Tayta Diosninchita manchapacur pachächiran. Marca-masincuna jaticačhaptin, jucläpa jishpichiran. Allita rurashanpita jucha-sapa captinsi, alli ñawinpa Rahabta Tayta Diosninchí ricaran.

²⁶ Ama junganquichu. Wañush runa imatapis mana rurashan-jina allita mana ruraptinchi, yupachicushanchisi manacajllapaj canga.

3

Shiminchi imatapis rimashan

¹ Irmänucuna, yačhajcunata llap-llapanpitam Tayta Diosninchí tapunga. Chaymi quiquillayquipita yačhaj cayta ama ashinquimanchu.

² Llapanchi imallačhüpis llutanta ruranchi. Shiminta chapacujcunam ichanga juchata mana aparicunchu. Quiquinpa shungun munashanta mana ruranchu. ³ Sumaj yarpačhacushun. Cawallupa shiminta shingawarcur, munashanchipa purichinchi. Maypapis apanchi. ⁴ Jatun-caray bütitapis tacsha timunllawan purichin. Wayra pücaptinsi, munashanpa chaufir purichin.

⁵ Shingawa water-jina, timun-jina shiminchipis imamansi čhayachimanchi. Ichiclla shanshapis ratarir, jircantinta ushyan. ⁶ Shiminchipis shansha-yupay caycan. Juchaman čhayachimänanchipäpis munayniyuj caycan. Chaymi supay llutanta rimachiptin, llapan runa juchata aparicun.

⁷ Runacuna chucaru uywacunatapis, pichuysacunatapis, curucunatapis, yacučhu tiyajcunatapis yačhacächiya yačhan. ⁸ Shiminta chapacuytam ichanga pipis mana camäpacunchu. Runapa shimin wañuymanpis jitarpun. Wañuchicuj. ⁹ Shimillanchiwan Tayta Diosninchitapis alliman čhuranchi. Runa-masinchitapis quiquin-nirajta Tayta Diosninchí camasha caycaptinsi, ashllir ushyanchi. ¹⁰ ¿Juc shimillanchiwanchuraj Tayta Diosninchita alliman čhuraycar, runa-masinchitapis ashllir ushyayäcäshun? Irmänucuna, chay-niraj ama cawashuwanchu.

¹¹ Irmänucuna, imata rurananchipäpis sumaj tantiyacushun. ¿Juc ñawillapita mishquij yacuwan puchguj yacu pashtamunmanchuraj? ¹² Rayanpis jarata mana wayunmanchu, ¿au? Durashnupis rayanta mana wayunmanchu, ¿au? Chaymi juc ñawillapita mishquijwan puchguj yacu mana pashtamunmanchu.

Tayta Diosninchí yačhayta camapämashanchi

¹³ Mayganiquipis yačhaj carga, alli shungu cashayquita musyachicunquiman. Tayta Diosninchipa shungun munashannuy cawaycar, runa-masiquitapis yanapanquiman.

¹⁴ Warmij carmi ichanga, ullguj carmi ichanga, nanaparänacurmi ichanga, juyu carmi ichanga, ama yupachicuychu: «Yačhaj caycä. Tayta Diosninchipa maquinčhu cawaycä» nir. ¹⁵ Manam janaj pacha Tayta Diosninchichu chiquicuya yarpächishunqui. Manchäga payman mana yupachicur shunguyqui munashallanta ashinqui. Supaypa maquinčhu cawanqui. ¹⁶ Chiquinacullar, nanaparänacullar cawar, pipis juc shungulla mana cawanchu. Manchäga juchallačhu arun.

¹⁷ Tayta Diosninchipita yačhaj cayta čhasquicurmí ichanga, paypa shungun munashanuylla pipis cawan. Juchata mana aparicunchu. Pi-maywanpis alli ricanacun. Piwanpis wiyanacun. Tantiyanacun. Llaquipänacun. Yanapänacun. Llapanta alli ñawinwan rican. Alli shungu. ¹⁸ Alli ricajcuna quiquinpis allilla cawanga.

4

Runapa shungun imanuy cashanta tantiyachicushan

¹ Irmänucuna, ¿imapitataj chiquinacunqui? ¿Imanirtaj tincupänacunqui? Shunguyqui yarpashallanta munaparčhi chiquinacuyllačhu aruycanqui. ² Ashishayquita

mana tarir, chiquinacunqui. Maganacunqui. Munapashayquita miéshuptiqui, wañuchinacunqui. Ima-imata munarpis, mana tarinquichu Tayta Diosninchita mana mañacushpayqui. ³ Mañacursi, waquinniqui shunguyqui munashallanta ashinqui. Chaymi Tayta Diosninchipa mana imatapis chasquinquichu. ⁴ Ishcay cära runacuna, shunguyqui munapashallanta ashirmi, Tayta Diosninchipa cunchan jatariycanqui. ¿Manachu musyashcanqui jucha aparicucuna Tayta Diosninchipa cunchan jatarishanta? ⁵ Shiminchú nin: «Tayta Diosninchu runacunata llaquipar, sumaj michin.»

⁶ Tayta Diosninchu jatunpa llaquipämanchi. Chaymi jananmanpis nin: «Alli-tucujcunata Tayta Diosninchu wasguin. Wiyacujcunatam ichanga sumaj llaquipan.»*

⁷ Chaymi supay maquichacuya munashuptiqui, ama chasquipanquichu. Manchäga Tayta Diosninchita wiycunquiman. Wiycuptiqui, supay jishpir aywacunga. ⁸ Tayta Diosninchipa maquillanchu caway. Chaura paypis maquinchu purichishunqui. Juchata aparicush-imarga, wanacunquiman. Janan shungulla yupachicur, llapan shunguyqui-wanna yupachicunquiman.

⁹ Wanacushayqui musyacänanpaj llaquicuy. Atar wagay. Asicačhar ama purichu. Manchäga wiguiquita jičhay. Ama cusicuj-tucunquichu. Manchäga llaquicuy. ¹⁰ Llapan shunguyquiwan Tayta Diosninchita wiycacuy. Chayrämi Tayta Diosninchu allíchu jurgushunquipaj.

¹¹ Irmäncuna, ama jamurpänacunquichu. Jamurpänacur Tayta Diosninchipa shiminta jungaycur, quiquillayquipita yačhaj-tucuycanqui. ¿Tayta Diosninchipa shiminta pampaman churanquimanchuraj? Mana. Manchäga wiycunayqui. Llaquinacunayqui.

¹² Tayta Diosninchu jucnaylla. Ima-imata rurashanchitapis llap-llapanta jurgapämäshunpaj. Payllam munayniyuj jishpichimänanchipäpis, ñacayman jitarpamänanchipäpis. Chaynuy caycaptin, ¿imanirtaj jamurpänacunqui?

Jatun-tucushanpita piñapashan

¹³ Juctana tantiyacushun. Ama jatun-tucunquimanchu: «Waracuna juc marcaman aywashun. Juc wata juymushun. Imatapis rantipacamushun. Chay-chica jillayta rrariycur, cutimushun» nir. ¹⁴ Waracuna imaman chayanayquitapis mana musyanquichu. Runa ushyacajllam. Jučhgutay-jina ricarircur, manasi aycällata illaricäcun. ¹⁵ Chaymi ninquiman: «Tayta Diosninchu cawananchita camacächiptinraj, imatapis rurashun.»

¹⁶ Chaypis waquinniqui alläpa jatun-tucunqui. Jatun-tucur, juchata aparicuycanqui.

¹⁷ Pipis musyaycar allita mana rurar, juchata aparicun.

5

Puchuy-puchuy janančhu cawajcunata piñapashan

¹ Puchuy-puchuy janančhu cawajcuna, sumaj wiycäriy. Tayta Diosninchu ñacachishunayqui junaj janayquičünam. Ñacayman chayanayquita musyaycar, atar cawanquiman. ² Ima-aycayquicunapis ismur ushyacaycan. Achic-achicyaj müdanayquicunatapis puyu ushyaycan. ³ Wañuy janayquičhu caycaptinsi, jutucushayqui juriquipis, jillayniquipis ushyacaycan. Quiquillayquipaj jutucushayqui achäqui canga Tayta Diosninchu ñacayman jitarpushunayquipaj. ⁴ Mincayniquicunatapis llullaparcurnullaparcurna mana pägallar aruchishcanqui. Wiguinpawan mañacushanta Munayniyuj Tayta Diosninchu mayna wiyasha. ⁵ Cay pachačhu shunguyqui munashallanta imatapis rurashcanqui. Llaparpa janančhu cushi-cushilla cawashcanqui. Shunguyqui munashallanta rurar, quiquillayqui camaricushcanqui ñacayman chayanayquipaj.

⁶ Chapacuya mana camäpacuptin, alli runacunatapis ñacachishcanqui. Wañuchishcanqui.

Tayta Jesús cutimunanpita tantiyachishan

* **4:6** Proverbios 3.34.

⁷ Irmänucuna, ñacarsi, mana yamacällar Tayta Jesústa shuyanquiman. Payga cutimungapänam. Čacra runapis murupacuynin sumaj wayunanpaj tamyanantara j shuyan. ⁸ Čacra runa-jina mana yamacällar jamcunapis shuyanquiman. Llapan shunguyquiwan yupachicunquiman. Washäcuj Jesús cutimungana.

⁹ Irmänucuna, quiquipi-pura ama jagayächinacunquichu. Jagayächinacuptiqui, juchata aparicushayquipita Tayta Diosninchicha jurgapäshunquipaj. Payga jurpa puncuman čhayacämuj-yupayna čhayacämum. ¹⁰ Chaymi irmänucuna, ama jagayächinacunquichu. Manchäga unay willacujcuna ñacashanta ricacunquiman. Ñacachiptinsi, shiminta mana amucurcuranchu. Manchäga Tayta Diosninchipa shiminta willapäcuran. ¹¹ Ñacachiptinsi, canancaman shiminta mana amucurcujcunata yarparaycanchi. Alli ñawinwan Tayta Diosninchicha ricashantapis musyanchi. Jobpa unay willapantapis mana junganchichu. Sumaj ñacarsi, Tayta Diosninchipa mana witicuranchu. Chaypitam Tayta Diosninchicha sumaj llaquiparan. Sumaj yanaparan.

¹² Irmänucuna, ima captinpis, rimashayquita quiquillayqui auninqui. Tayta Diosninchipa jutintasi, runa-masiquipa jutintasi ama jugarinquichu. «Au» nirga, ama cutiricunquinachu. «Maná» nirpis, ama auninquinachu. Shimiquita mana čharcuptiqui, Tayta Diosninchicha juchayquita taripushunquipaj.

Jishyačhucunapaj mañacapushan

¹³ Chaymi ñacayman čhayarpis, Tayta Diosninchita mañacunqui. Shacya-shacyalla caycarna, Tayta Diosninchita alliman čhuranqui. ¹⁴ Jishya charishuptiquisi, mayur irmänucunata jayachinqui. Paycuna Tayta Diosninchita mañacuriycur wirawan ja-gushunquipaj. ¹⁵ Yupachicur mañacuptin, Tayta Diosninchicha allchacächishunquim. Juchayquitapis jungar, mana yarparanganachu. ¹⁶ Chaymi juchata aparicush carga, mayganiquipis ama chapacunquichu. Allchacänayquipaj jucniquipaj-jucniquipaj Tayta Diosninchita mañacapunqui. Manchapacuj runacuna mañacushanta Tayta Diosninchicha wiyan. ¹⁷ Unay willacuj Elíaspis runa-masillanchi caran. Llapan shungunwan mañacuptin, quimsa wata pullan Tayta Diosninchicha mana tamyachimuranchu. ¹⁸ Yapay tamyananpaj mañacuptinna, janaj pachapita tamyamuran. Chayraj cay pachačhu miciupis wayuran.

¹⁹ Irmänucuna, pipis juchata aparicuptin, shacyächinqui Tayta Diosninchita wiyacunapaj. ²⁰ Pipis juc irmänuta juchanpita wanacachir, allita ruraycan. Wañuypitapis jishpichinga. Wanacuptin, Tayta Diosninchipa tucuy-niraj juchanta jungaycur mana yarparanganachu. Chayllana.

San Pedro cartacushan 1

Tantiyacunanchipaj:

Pedro cay cartata isquirbiran. Juc-caj jutin caran Simón. Payga Jesúspa puríshijnin caran. Jesúspita willapäcur chay-tucuypa puriran. Willapäcushanpita uray-singaypash ruschu wañuchiran. Chaynuy wañuchinanpaj Roma marcapa mandajnin camacächiran. Pedrupita musyayta munar, liguinqui: San Mateo 14.22–33; San Marcos 8.27–33; 9.2–8; 14.66–72; San Lucas 5.1–11; San Juan 1.40–44; 21.15–19; Hechos 2.1–5.42; 8.14–25; 10.1–48; 11.1–18; 12.1–19; 1 Corintios 9.5; Gálatas 2.6–16.

Pedro Israel irmänucunaman cartacuran. Auturdäcuna ñacachiptin, irmänucuna marcampita aywacäriran. Jurpay-tucullar jäpa runacunapa marcancunačhu tiyarcaycaran. Chaymi paycunata llaquipashpan Pedro cartacur shacyächiran.

Pedro isquirbiran:

Tayta Diosninchi llaquipäcu cashpan alli cawayta tarichinanpita, wañurpis Tayta Diosninchiwan imaycamanpis cawananpita, ñacarpis shacyäcur cushicunanpita: *1 San Pedro 1.1-12.*

Tayta Diosninchipa wawancuna juchata mana aparicunananpita: *1 San Pedro 1.13-2.10.*

Alli rurashanpita runacuna ñacachiptinpis mana yamacänanpita, Washäcuja ricacur cawananpita: *1 San Pedro 2.11-4.19.*

Mayur irmänucuna tantiyachir irmänucunata sumaj ricananpita, müsucuna mayur irmänucunata wiyacunananpita, irmänucuna cuyay-munaypaj cawananpita, supay mana ičhipunanpita: *1 San Pedro 5.1-13.*

Pedro wamayashan

¹ Irmänucuna, nuwa Pedro Washäcuj Jesúspa cačhan car cartacamü. Tayta Diosninchipa acracushan carpis, jurpay-tucullar juyaycanqui Ponto quinrančhu, Galacia quinrančhu, Capadocia quinrančhu, Asia quinrančhu, Bitinia quinrančhu. Llapaniquiman cartacallämü. ² Unaypita-pacha shungun munaptin, Tayta Diosninchi acracushcashunqui. Shungun munashannuy cawanayquipäpis Espíritu Santu yanapaycäshunqui. Chaymi Washäcuj Jesúspa shiminta čhasquicushcanqui. Payga nuwanchiraycur wañuyman čhayasha Tayta Diosninchiwan allina ricanacunanchipäpis, llapan juchanchi jungacänanpäpis. Tayta Diosninchi llaquipayculläshunqui. Allilla cawanayquipaj yanapayculläshunqui.

Tayta Diosninchita alliman čhurashan

³ Tayta Diosninchita alliman čhurayculläshun. Paymi Taytanchi Jesucristupa Taytan. Llaquipämashpanchi Washäcuj Jesústa wañuypita cawarachimusha. Cananga Jesucristupa maquinčhu cawaycanchi. Wañushanpita cawarimuyninpá mushuj cawaytapis tarichimashcanchi. Maquinčhu imaycamanpis cawananchipaj llapan shungunchiwan yupachicuycanchi. ⁴ Mushuj cawayta tarichimashpanchi janaj pachačhu irinsanchitapis jumäshunpaj. Jumänanchi irinsa mana ushyacangachu. Mana janrayangachu. Mana maucayangachu. ⁵ Tayta Diosninchi munayniyuj cashpan shiminta čhasquicushanchipita imapitapis jishpichimanchi. Canan wican ushyacaptin, jishpichimänanchi imanuy cashantapis tantiyachimäshunpaj.

⁶ Maquinman čhayachimänanchi caycaptin, cushi-cushilla cawanchi. Chaypis camacaptin, tucuy-jinanpa ñacapärishun. ⁷ Ichanga ñacaycunata ičhipuptinchiraj, llapan shungunchiwan yupachicushanchi musyacanga. Sumaj tantiyacushun. Juritapis alli

cashanta musyananpaj ninawanraj chulluchin. Juriga ushyacajlla. Nuwanchi yupachicushanchim ichanga juripitapis mas alli. Chaymi llapan shungunchiwan yupachicuptinchi, ñacaytapis íchipuptinchi, Washäcu Jesús cutimur alli ñawinwan ricamäshunpaj. Alliman čhuramäshunpaj. Allíchu jurgamäshunpaj.

⁸⁻⁹ Jesústa mana ricaycarsi, manchapacunchi. Mana ricaycarsi, llapan shungunchiwan yupachicunchi. Tantiyayta mana atiparsi, jatun-jatunpa cushicunchi. Yupachicushanchipita Tayta Diosninchi jishpichimäshun maquinčhu imaycamanpis cawananchipaj.

¹⁰ Tayta Diosninchi jishpichimänanchipaj unay willacujcuna sumaj tapucačharan. Mayacačharan: «¿Pitaraj Tayta Diosninchi cačhamunga?» nir. Jinarcur willacuran: «Sumaj llaquipämashpanchi Tayta Diosninchi juc runata cačhamunga washämänanchipaj» nir. ¹¹ Espíritu Santu rimachiptin, Washäcu ñacanantapis, wañushanpita cawarircamur alli cayman čhayanantapis musyachiran. Chaymi paycunapis Washäcu pī cashantapis, imay čhayamunantapis sumaj tantiyacuya munaran. ¹² Chaypis tantiyacunan mana camacaranchu. Manchäga nuwanchita willapämarchanchi. Tantiyacunanchipaj Tayta Diosninchi camacächisha. Janaj pachapita Espíritu Santuta cačhamusha. Chaymi rimachiptin, waquin willacujcuna Jesúspita willapämashcanchi. Willapämashanchita anjilcunapis tantiyacuya munaran.

Tayta Diosninchipa shungun munashannuy cawananpaj willapashan

¹³ Chaymi sumaj tantiyacurir, imatapis rimashun. Imatapis rurashun. Mana yamacällar Tayta Diosninchiman llapan shungunchiwan yupachicushun. Washäcu Jesús cutimuptin, Tayta Diosninchi llaquipämashpanchi sumaj-sumaj yanapämäshunpaj.

¹⁴ Irmänucuna, llapan shungunchiwan yupachicuycar, wiaycuj wamra-jina cawashun. Unay upa cayninchewan juchata aparicushcanchi. Chay-jina ama cawashunnachu.

¹⁵ Manchäga acracamajninchia Tayta Diosninchi allillata rurashan-jina nuwanchipis shungun munashallanta rurar cawashun. ¹⁶ Shiminčhpis nin: «Juchata mana aparicüchu. Chaynuy jamcunapis juchata ama aparicunquimanchu.»*

¹⁷ Chaymi: «Tayta Diosninchipa maquinčhu cawaycä» nir cay pachačhu jurpaytucullar purirpis, manchapacunquiman. Payga imatapis rurashanman-tupu llapan runapa juchanta jurgapanga. Pipa juchantapis mana chapangachu. ¹⁸ Jamcuna mamayqui-taytayquipita-pacha juchallačhu cawarcaycanqui. Jucha aparicuyllačhu cawaycaptiquisi, Tayta Diosninchi rantiypa-yupay jishpichishcashunqui. Mana juripa čhaninwanchu, jillaypa čhaninwanchu rantishcashunqui; ¹⁹ manchäga nuwanchi-raycur Washäcu Jesús wañuyninpam. Wañuptin, allinnin uyshata jarashan-yupay Tayta Diosninchi čhasquisha. ²⁰ Cay pachata mana camallarraj, nuwanchi-raycur Jesús wañuyman čhayananpaj Tayta Diosninchi camacächiran. Ichanga jipataraj cay pachaman shamusha. ²¹ Wañushanpitapis Tayta Diosninchi cawarachimusha. Alli ricashpan janaj pachaman jamachisha. Chaypita-pacha Tayta Diosninchiman yupachicunanchipaj, aunishanta shuyarananchipaj yanapaycämanchi.

²² Cananga Jesúspa shiminta čhasquicur, juchapita witicushcanqui. Juchapita witicur, llapan irmänuwan alli ricanacuya yačhacushcanqui. Chaymi llapan shunguyquiwan llaquinacäriy; ama janan shungullaga. ²³ Yapay yurish-yupay carcaycanchi, ichanga mana mama-taytapitachu; manchäga Tayta Diosninchipitana. Mama-taytapita yurish car, ushyacajlla canchi. Shiminta čhasquicuptinchim ichanga, Tayta Diosninchi cawachimanchi. Cawachicuj car, shimin mana imaypis jungacangachu.

²⁴ Chaymi nin:

«Runa jiwa-yupay.
Callpayuj cayninpis,

* ^{1:16} Levítico 11.44–45.

camarajlla cayninpis wayta-yupaylla.

Jiwa chaquijlla.

Waytapis ñallpujlla.

²⁵ Taytanchipa shiminmi ichanga imaypis mana jungacangachu.»*
Paypa shimin alli willapa. Jesúspita willapashcashunqui.

2

¹ Chaymi ima juchapitapis wanacushun. Ama llullacushunchu. Ama allitucushunchu. Ama chiquicushunchu. Ama pipa washantapis rimashunchu.

² Manchäga iti lichita chuchushan-jina shunguyquimanpis Tayta Diosninchipa shimin chayanman. Shunguyquiman chayaptin, shungun munashallanta tantiyacunquipaj. Maquillanchüna cawanquipaj.

Jesús cawaj rumi-yupay cashanta tantiyachishan

³ Tayta Diosninchichi llaquipäcu cashanta musyanchina. ⁴ Tincuchiypa tantiyacushun. Tayta Jesús cawaj rumiwan tincun. Payman sumaj jillicushun. Runacuna wasguipaptinsi, alli ñawinpa Tayta Diosninchichi rican. Quiquin acracusha. ⁵ Nuwanchipis cawaj rumi-yupay Tayta Diosninchipa ricay ñawinchu caycanchi. Payga rumita-yupay shuntaycämanchi wasinta jatarachinanpaj. Llapanchita maquinchu purichimäshun. Runa-masinchipaj mañacapunanchipaj cüra caymanpis, shungun munashallanta rurananchipäpis churamashcanchi. Nuwanchi-raycur Washäcu Jesús wañuynipa Tayta Diosninchichi acracamashcanchi ricay ñawinchu alli cawananchipaj. ⁶ Chaymi Jesúspita rimar, Tayta Diosninchipa shiminchu isquirbiraycan:

«Alli rumita Jerusalén marcachu churashaj.

Jallarachij simintu rumita quiqui acracushaj.

Allinninta churashaj.

Pipis chay rumiman yupachicur, allíchu llucshinga.»*

⁷ Chaymi Jesústa chasquicucunata Tayta Diosninchichi allíchu jurgunga. Wasguipajcunam ichanga pingayman chayan. Tayta Diosninchipa shiminchu nin:

«Wasi rurajcuna: «Cay rumi mana allichu» nir wicapashanpis simintuta jallarachinanpaj churasha.»*

⁸ Jananmanpis nin:

«Tunichicuj rumi. Cuçhpächicuj rumi.»*

Chaynuypa shiminta wasguipajcuna ashishanta tariycan.

⁹ Nuwanchitam ichanga Tayta Diosninchichi acracamashcanchi. Maquinchu puriycächimanchi. Cüra cayman churamashcanchi. Acracamashcanchi shungun munashallanta rurananchipaj. Maquillanman shuntacamashcanchi sumaj munayniyuj cashanta runacunata willapäcunanchipaj. Ñaupata juchallachu arur, chacajchu-jina cawashcanchi. Cananmi ichanga shiminta wiyacur, achquiéchu-jina Tayta Diosninchipa maquinchu cawarcaycanchi.

¹⁰ «Ñaupata mana Tayta Diosninchipa maquinchüchu cawashcanqui.

Mana llaquipäshurayquipishchu.

Cananmi ichanga maquinchüna cawaycanqui.

Llaquipaycäshunquina.»*

Cuyay-munapaj cawashun

¹¹ Irmänucunallau irmänu, cay pachachu jurpay-tucullar cawanchi. Chaymi juchata ama aparicushunchu. Juchallachu arur shungunchi munashallanta rurar, Tayta Diosninchipa shungun munashannuy mana cawaycanchichu. ¹² Waquin runacuna Tayta

* ^{1:25} Isaías 40:6-8. * ^{2:6} Isaías 28:16. * ^{2:7} Salmo 118:22. * ^{2:8} Isaías 8:14-15. * ^{2:10} Oseas 2:23.

Diosninchí pí cashantapis mana musyanchu. Paycunawan cawarpis, Tayta Diosninchita sumaj manchapacunquiman. Chaynuy cawaptiqui, imapitapis tumpashuptiquisi, chiquir ushyashuptiquisi, alli cawashayquita ricanga. Chaymi llapan runata allita, mana allita rurashanta tapupashan junaj paycuna Tayta Diosninchita alliman ́churanga: «Manchapacushayqui runa shunguyqui munashannylla allita rurar cawaran» nir.

¹³ Chaymi Tayta Diosninchita allíchu jurgunayquipaj mayur auturdäcunatapis manchapacunquiman. Paycunapa maquinéchu cawanchi. ¹⁴ Tacsha auturdäcunatapis manchapacunquiman. Paycunata Tayta Diosninchí ́churasha llutan ruracujcunata ñacachinanpápis, alli rurajcunata allíchu jurgunanpápis. ¹⁵ Tayta Diosninchí alli cawananchita munan. Alli cawaptinchi, upa runacuna achäquita mana taringachu washanchita rimananpaj.

¹⁶ Cananga imata rurananchipápis quiquinchipitana. Chaypis juchaéhu ama arunquichu. Manchäga Tayta Diosninchipa maquinéchu cawar, shungunman tincushallanta ruranqui. ¹⁷ Llapan runata alli ricanqui. Irmänunchicunatapis llaquinqui. Tayta Diosninchita manchapacunquiman. Mandaj auturdätapis alli ricanqui.

¹⁸ Mandu-rurajcuna, patrunniquita tantiyacuj captinsi, juyu captinsi alli ricanquiman. ¹⁹ Wiyacuycaptiqui, allita ruraycaptiqui ñacachishuptiquipis, Tayta Diosninchí alli ñawinpa ricashunqui. ²⁰ Jucha aparicushayquipita ñacarmi ichanga, juchallayquipita ñacanqui. Alli cawaycaptiqui runacuna ñacachishuptiquipis, Tayta Diosninchí alli ñawinpa ricashunqui.

²¹ Chaypámi acracamashcanchi. Washäcu Jesúspis nuwanchi-raycur ñacasha. Chaymi nuwanchipis llupinpa jatishun.

²² Payga juchata mana aparicushachu.

Pitapis mana llullapashachu.

²³ Runacuna ashlliaptinsi, mana ashlliranchu.

Ñacachiptinsi, mana chiquiparanchu.

Manchäga Tayta Diosninchita mañacuran: «Tayta, jammi llapanta ricanqui» nir.

²⁴ Juchata mana aparicunanchipaj, Tayta Diosninchipa shungun munashannylla cawananchipaj, juchanchita aparicur ruséhu wañuran.

Allchacänanchipaj, alli cawananchipaj nanayta ́chasquicuran.

²⁵ Unayga ujracash uysha-yupay cawaranchi.

Cananmi ichanga ricamajninchiman cuticushcanchi.

Maquinéhüna purichimanchi.

Uysha michij-yupay ricaycämanchi.

3

Majayjcunata piñapashan

¹ Irmänacuna, majayquita wiycunquiman. Wiyacur alli cawaptiqui, majayquipis Jesúspa shiminta tantiyacunga. Shiminta wiyatya mana munarsi alli cawashayquita ricar, pipis mana willapaycaptin ́chasquicunga. ² Alli cawashayquita ricar, Tayta Diosninchita manchapacushayquita ricar, quiquillan tantiyacunga.

³ Alli cayniqui mana jashpachicuyllachu, mana jurita ́churacuyllachu, mana alli müdanata ushtucuyllachu. Janallayquita ama allchacunquimanchu. ⁴ Manchäga alli cayniqui shunguyquipita-pacha llucshimunman. Shunguntiqui alli warmi captiqui, Tayta Diosninchipis alli ñawinpa ricashunqui.

⁵ Chaynuy unay mama-warmicunapis alli shungu cayninta musyachicuran. Paycuna Tayta Diosninchipa maquinéchu cawar, majanpa shimintapis wiycäríj. ⁶ Sarapis shiminta wiycushpan majan Abrahamta taytachacuran. Sara imatapis mana manchacullar alli cawashan-jina jamcunapis alli cawanquiman. Chaura mama Saraman llucshinquipaj.

⁷ Irmänucuna, jamcunapis warmiquita sumaj tantiyanquiman. Alli ricanquiman. Warmicuna pishi-yatay, pishi-rimaparcuy caycan. Chaynuy captinsi, warmi ullguta Tayta Diosninchi wamrachacamashcanchi. Alli cawarga, cushi-cushilla Tayta Diosnin-chitapis mañacushun. Manchäga mana camäpacushunpächu.

Irmänucunata piñapashan

⁸ Llapanchi juc shungulla cawashun. Llaquipänacushun. Chay yawarlla-jina alli ricanacushun. Tantiyanacushun. Pampaman ama churanacushunchu. ⁹ Runa-masinchi chiquimaptinchisi, ama chiquishunchu. Ashllimaptinchisi, ama ashllishunchu. Manchäga llapan runapaj mañacapushun. Tayta Diosninchi yanapämashanchi-jina chiqui runacunatapis yanapäshun. Chaypämi Tayta Diosninchi acracamashcanchi.

¹⁰ Shiminpis nin:

«Alli cawayta munajcuna, cushish cawayta munajcuna,
ama ashllicuchunchu.

Ama llullacuchunchu.

¹¹ Juchata ama aparicuchunchu.

Manchäga allillata rurachun.

Pi-maywanpis mana yamacällar alli ricanacuchun.

¹² Manchapacujcunata Tayta Diosninchi ricaycan.

Mañacushancunatapis wiyaj-wiyajlla caycan.

Juchačhu arujcunatam ichanga ricaytapis mana munallanchu.»*

¹³ Chaymi llapan runapa ricay ñawinčhu alli cawaptiqui, ¿piraj chiquishunquiman?

¹⁴ Tayta Diosninchipa shungun munashallanta rurar cawashayquipita runacuna chiquishuptiquisi, ama llaquicunquichu. Manchäga cushicärinquiman. Tayta Diosninchi shacyächishunqui. Chaymi runa ñacachishuptiqui, ama llaquicunquichu. Ama mancharinquichu. ¹⁵ Manchäga llapan shunguyquian Taytanchi Jesucristuta alliman churanqui. «¿Imanirtaj Washäcu Jesúsman yupachicunqui?» nir pipis tapupäshuptiqui, juclla tantiyachinqui. ¹⁶ Ichanga pampaman mana churallar alli shimillayquipa tantiyachinqui. Washäcu Jesúspa shiminta chasquicur alli cawaptiqui, chiqui runacunapis pingacunga: «Llutanta rimashcä» nir.

Jesús-janan ñacachishan

¹⁷ Tayta Diosninchi camacächiptin alli rurashanchi-janan runa ñacachimaptinchisi, chasquicunanchi. Llutanta rurashanchipita ñacarmi ichanga, pingaypaj ñacanchi.

¹⁸ Juchanchi-janan Washäcu Jesús wañuymán chayaran.

Juchaynaj caycar, jucha-sapa ricacuran Tayta Diosninchipa ñaupanman chayachimänanchipaj.

Runa-masinchi caycar, wañuya tariran.

Tayta Diosninchim ichanga cawarachiran.

¹⁹ Jinarcur unaypita-pacha wičgaraj wañushcunaman aywaran: «Llapanta ičhipushcä» nir.

²⁰ Chay wañushcuna Noépa shiminta mana wiycuranchu. Mana wiycuptin, Noé bütita rurashancaman mana yamacällar Tayta Diosninchi shuyararan. Ushyariptin, pusaj runallata bütiwan yacučhu wampuyllapa jishpichiran.

²¹ Chay-jina Washäcu Jesús cawarimuynipa yacučhu ushyacuptinchi, nuwanchitapis Tayta Diosninchi jishpichimanchi maquinčhu cawananchipaj. Ushyacushanchi mana janallanchitachu pichan. Manchäga llapan shungunchiwan wanacushanchita musyacächin. ²² Washäcu Jesús cawarircamur, janaj pachaman aywacusha. Tayta Diosninchipa diricha-caj lädunčhüna jamaraycan. Chaymi llapan anjilcunapis, munayniujcunapis maquinčhu purin.

* ^{3:12} Salmo 34.12-16.

4

¹ Washäcuj Jesús ñacash caycaptin, ñacayta ama manchacushunchu. Pay-jina ñacar, jucha rurayta mana munapäshunnachu. ² Juchačhu aruj runacuna-jina ama cawashunchu. Manchäga Tayta Diosninchipa shungun munashallanta imaypis rurashun. ³ Unayga jamcunapis juchallačhu arushcanqui. Shunguyqui munashallanta rurashcanqui. Warminar, runanar puricushcanqui. Tünallačhu arushcanqui. Pačhallayquipaj ashishcanqui. Upyallačhu arur, marca-pingay cawashcanqui. Moiséspa shiminčhu mičhaycäshuptiquisi, jircacunata taytachacur manchapacushcanqui. ⁴ Cananga mana tallupaptiqui, tantiyayta mana atipashpan juchačhu aruj-cuna washayquita riman. Ashllir ushyashunqui. ⁵ Chaypis ima-imata rurashan-tapis llapantam Tayta Diosninchchi jurgapangapaj. Mana chapangapächu. Cawajcu-napis, wañushcunapis maquinčhu caycan. ⁶ Chaypämi wañushcunata Jesúspa shiminta willapäcuran. Paycuna cawaycällar, jucha aparicushanpita wañucuran. Chaypis Tayta Diosninchipa ricay ñawinčhu cawarcaycanraj.

Yanapänacuypita tantiyachishan

⁷ Cay pacha ushyacangapaj. Chaymi imatapis sumaj tantiyacuy. Tayta Diosninchita mañacullar caway. ⁸ Jucniqui-jucniquipis llaquinacäriy. Llaquinacur tucuy-jinanpa nanächinacursi, juclla ushyacächinqui. Ama yarparanquinachu. ⁹ Pipis pachacuya ashiptin, mana jamurpällar pachächiy. ¹⁰ Tayta Diosninchchi yačhayta camapushushayquiman-tupu yanapänacunqui. Tucuya yačhananchipaj yarpayta camapämashcanchi. Chaymi llaquipämashanchi-jina sumaj yanapänacunqui. ¹¹ Pipis willapäcur, Tayta Diosninchipa shimillanta willapäcuchun. Pipis yanapäcur, Tayta Diosninchchi tarichishanman-tupulla yanapäcuchun. Imatapis rurar, Tayta Diosninchita alliman čhurashun. Alliman čhurashanchita Washäcuj Jesús camacächin. Chaymi imay-imaypis munayniyuj Tayta Diosninchita alliman čhurayculläshun. Chaynuv caycullächun.

Ñacachishcunata shacyächishan

¹² Irmänucunallau irmänu, ima ñacayman čhayarpis, ama llaquicärinquiichu: «¿Imanirraj ñacaycä?» nir. ¹³ Manchäga Washäcuj Jesús ñacashan-jina ñacar, cushicärinquiiman. Pay munayniyuj cashpan achic-achicyaycaj cutimuptin, jatunpa cushicushunpaj. ¹⁴ Washäcuj Jesústa čhasquicushayquipita pipis ashllishuptiqui, ama llaquicunquiichu. Munayniyuj Espíritu Santu yanapaycämanchi. ¹⁵ Runa-masiquita wañuchishayquipita, suwacushayquipita, juyu cashayquipita, mitichi cashayquipita runacuna ñacachishuptiqui, pingayman čhayanayqui camacan. ¹⁶ Washäcuj Jesústa čhasquicushayquipita ñacachishuptiquim ichanga, ama pingacunquiichu. Manchäga cushicur Tayta Diosninchita ninquiman: «Taytallau Tayta, ima allish Jesúspa maquinčhu cawaycächimanqui» nir.

¹⁷ Cananga Tayta Diosninchipa maquinčhu cawajcunataraj ñacachiyta jallaycusha. Nuwanchipis ñacayman čhayaycaptinchi, ¿Jesúspa shiminta wasguipajcuna imamanraj čhayanga?

¹⁸ «Wiyacujcuna ñacarraj Tayta Diosninchipa maquinman čhayaptin, ¿mana manchapacuj juchačhu aruj runacuna imamanraj čhayanga?»*

¹⁹ Ñacananchipaj Tayta Diosninchchi camacächiptin-ima paypa maquillančhu cawashun. Allillata rurar cawashun. Payga shiminta čharcun. Llapanta Camaj Tayta Diosninchchi mana imaysi cačharimäshunpächu.

5

Irmänucunata piñapashan

* **4:18** Proverbios 11.31.

¹ Mayur irmänucuna, Washäcu Jesú斯 ñacashanta ñawíwanraj ricashcä. Munayniuj cashpan achic-achicyaycaj cutimuptinpis, jatunpa cushicushaj. Chaymi anyapäshayqui.

² Uyshiru uyshanta ricashan-jina irmänunchicunata sumaj ricanquiman. Paycunata Tayta Diosninchi maquiquiman ñurasha mana jillanällar ricanayquipaj. Manchäga cushi-cushilla ricanayquita munaycan. Jillayllata ama ricaranquimanchu. ³ Nishayqu-nishayqui imatapis ama rurachiniquimanchu. Manchäga ricacushunayquipaj Tayta Diosninchita manchapacur cawanquiman. ⁴ Jesú斯 cutimur, mayur irmänucunata ricaj cashpan, alli cawayman ñuramäshunpaj. Alli cawayman ñuramashanchi imaypis mana ushyacangachu.

⁵ Müsucuna, jamcunapis mayur irmänucunata wiycunquiman. Ama alli-tucunquimanchu. Manchäga tantiyanacur imaçüpis yanapänacunquiman. Tayta Diosninchipa shiminpis nin:

«Tayta Diosninchi alli-tucujcunata mana yanapanchu.

Alli shungucunatam ichanga llaquipar yanapan.»

⁶ Llapanchipis mana alli-tucullar Tayta Diosninchipa maquinchu cawashun. Paymi munayniuj. Shungun munaptinraj, alliçhu jurgamäshunpaj. ⁷ Llaquipämanchi. Chaymi imapitapis ama yarpaçhacushunchu. Manchäga paypa maquinchu cawar, llapanta willashun.

⁸ Sumaj tantiyacushuwan. Ricchaycar purishun. Supay chigaypa chiquimanchi. Yargaj liyun-jina purin ricashanta ushyarinanpaj. ⁹ Chaymi sumaj içhipushun. Jesúspa maquinpita ama witicushunchu. Cay pachaçhu mana nuwallanchichu ñacarcaycanchi. Waquin irmänunchicunapis ñacarcaycan. ¹⁰ Chaypis llapanchita llaquipämashpanchi quiquin Tayta Diosninchi Washäcu Jesúspa maquinman ñuramashcanchi imaycamanpis cawananchipaj. Chaymi ñacapäriptinchisi, Tayta Diosninchi jatarachimäshun. Payman sumaj yupachicunanchipaj yanapämäshun. Yanapämaptinchi, maquinpita mana witicushunpächu. Shimintapis mana jungashunpächu. ¹¹ Payga sumaj munayniuj. Payllata imay-imaypis alliman ñurayculläshun. Chaynuy caycullächun.

Cartapa ushyanan

¹² Cay cartata irmänunchi Silvano isquiripämasha. Payga Tayta Diosninchipa ricay ñawinchu alli cawan. Payman sumaj yupachicü. Shacyächinajpj cartacamü. Tayta Diosninchu sumaj llaquipämanchi. Chaymi maquinpita ama witicunquichu.

¹³ Babilonia marcaçhu jutuaj irmänunchicuna wamayäshunqui. Marcosnipis wa-mayäshunqui.* ¹⁴ Quiquiquicunapis llapallayqui wamayänacunqui, ari.

Tayta Jesucristupa maquinchu cawajcuna llapaniqui allilla cawaycullay, ari. Chayllana.

* ^{5:13} «Babilonia marca» nir Roma marcawan tincuycächij.

San Pedro cartacushan 2

Tantiyacunanchipaj:

Pedro cay cartata isquirbiran Israel irmänucunaman. Paycuna juclä marcacunačhu tiyarcaycaran. Chaymi wañuy janančhu captin, irmänucunata shacyächinanpaj yapay cartacuran. Pedrupita musyayta munar, Pedro cartacushan 1 jallarinanta liguinqui.

Wañuy janančhu captin, Pedro yapay cartacuran irmänucuna Tayta Diosninchipa shiminta mana jungananpaj, Tayta Diosninchita wiyacur cawanananpaj, pantachicujcunapa shiminta mana čhasquinanpaj.

Pedro isquirbiran:

Shiminta wiyacunananpaj Tayta Diosninchyi yanapänananpita: *2 San Pedro 1.1-11.*

Wañuy janančhu caycashanpita, Jesúswan tincushanpita, Tayta Diosninchipa shiminta wiyacur cawanananpita: *2 San Pedro 1.12-21.*

Pantachicujcunapa shiminta mana čhasquicunananpita, pantachicujcunata Tayta Diosninchyi ñacachinanpita: *2 San Pedro 2.1-22.*

Pantachicujcuna llullapashanpita, mana yarpashpita Jesús cutimunanpita, Tayta Diosninchipa shiminta mana jungallar cawanananpita: *2 San Pedro 3.1-18.*

Pedro wamayashan

¹ Irmänucuna, nuwa Simón Pedro, Washäcuj Jesúspa mandu-rurajnin cashpä, cačhan cashpä cartacallämü.

Ima allish jamcunapis Jesucristupa shiminta čhasquicushcanqui. Payga Tayta Diosninchyi, Washäcujninchyi. Quiquin camacächisha jamcunatapis, cačha-masintitä Tayta Diosninchyi alli ñawinpa ricamänanchipaj. ² Cananga Tayta Diosninchyi llaquipayculläshunqui. Alli cawayman čhurayculläshunqui. Waran-waran Tayta Diosninchipa maquinčhu cawar, Taytanchi Jesúspa maquinčhu cawar, shungun yarpashantapis sumaj tantiyacushuwan.

Tayta Diosninchipa shungun imanuy cashanta tantiyachicushan

³ Munayniuj cashpan Tayta Diosninchyi yanapaycämanchi shungunta tantiyacunanchipaj, shungun munashannuy cawananchipaj. Munayniuj cashpan, alli shungu cashpan maquinčhu puriycächimanchi. ⁴ Quiquinmi tucuy-jinanpa yanapaycämanchi. Aunishanta čharcur, shungunman tincunanchipaj, jucha aparicuypita witicunanchipaj yanapaycämanchi. ⁵ Chaymi payman sumaj yupachicushuwan. Yupachicurna, cuyay-munaypaj cawashuwan. Cuyay-munaypaj cawarna, Tayta Diosninchyi pii cashantapis sumaj tantiyacushuwan. ⁶ Sumaj tantiyacurna, munashallanchita ama rurashuwanchu. Munashallanchita mana rurarna, mana yamacällar Tayta Diosninchiman yupachicushuwan. Mana yamacällar yupachicurna, Tayta Diosninchipa shungun munashallanta rurashuwan. ⁷ Shungun munashallanta rurarna, irmänunchiwanpis llaquipänacärishuwan. Llaquipänacuycarna, runa-masinchicunatapis llapan shungunchiwan llaquipäshuwan. ⁸ Willapashajcuna shunguyquiman čhayash captin, Taytanchi Jesucristupa shimintapis allipämi čhasquicushcanqui. Chaura allillata rurarna cawanquipaj. Chaymi jumpaj pipis mana ningachu: «Manacajllapaj Jesúspa shiminta čhasquicusha. Shungun munashantapis mana ruranchu.» ⁹ Willapäcushäta mana čharcujcunam ichanga japra runa mana tantiyaj-jina caycan. Jucha aparicushanta Tayta Diosninchyi jungsashantapis mana yarparannachu.

¹⁰ Irmänucuna, Tayta Diosninchyi acracushushayquipis, maquinčhu cawashayquipis musyacänananpaj payta manchapacur cawanquiman. Maquinpita ama witicunquichu. Mana witicur, juchacuymanpis mana čhayanquipächu. ¹¹ Taytanchi Jesucristu Washämajninchyi. Paypa maquinčhu cawanayquipaj mana sasächicunquipächu.

Maquinčhu imay-imaycamanpis cawanayquipaj quiquin Tayta Diosninchí cushish āhayachishunquipaj.

Tayta Diosninchipa shiminta wiycushun

¹² Chaymi: «Llapanta tantiyacushcä» niptiquisi, tantiyacächishayqui Tayta Diosninchipa shiminta sumaj wiycunayquipaj. ¹³ Alli cawanayquipaj cawashäcaman piñacucäshayqui. ¹⁴ Wañuy janäčhüna. Tayta Jesús musyachimasha: «Shuntacunajpaj wallcallana pishin» nir. ¹⁵ Ichanga llapanta tantiyacunayquipaj sumajraj piñapäshayqui. Chayrämi wañucuptipis, shimita yarparanquipaj.

Tayta Diosninchipa maquinčhu cawanapaj willapashan

¹⁶ «Washäcuj Jesús munayniuj. Cutimunga» nir willapäcushäga mana ninshinshillachu. Munayniuj cashanta musyä. Ņawiwanraj achic-achicyaycajman ticracurishanta nuwacuna ricarä. ¹⁷ Tayta Diosninchí alliman āhuraran. Alliħu jurguran. Quiquin munayniuj Tayta Diosninchí nimuran: «Payga cuyay Wawämi. Shungüman tincuptin, acracushcä.» ¹⁸ Rinriwan nuwacuna wiyarä. Jirca puntačhu juturpaycapti, Tayta Diosninchí rimamuran.

¹⁹ Chaymi cananraj unay willacujcuna rimashanman sumaj yupachicunchi. Rimashanga achqui-yupay achicyapaycämachi rimashanta tantiyacunanchipaj. Sumaj wiycunanchi Jesús cutimunan junajcaman. Cutimur, waraj istrilla-yupay cushicachimäshunpaj. Shungunchipis achicyacäcunga. ²⁰ Chaypis sumaj tantiyacunquiman. Unay willacujcuna rimashanta pipis shungun munashannuylla mana tantiyachicunmanchu. ²¹ Willacujcuna mana quiquillanpitachu willapäcuran. Mana umallanpitachu isquirbiran. Manchäga Espíritu Santu rimachiptin, Tayta Diosninchipa shiminta willapäcuran.

2

Pantachicujcunapita rimashan

¹ Sumaj tantiyacushun. Israel marcačüpis: «Tayta Diosninchipa willacujnin cä» nir waquin runacuna quiquin yarpashallanta imatapis yačhachiran. Canan wichanpis waquin irmänunchicuna pantachicur puriyan. Pantachicur, manacajcunallata yačhachishunquipaj. Paycunapis rantish-yupay caycaptinsi, Taytanchi Jesústa wasguipan. Payga washänan-raycur wañuyman āhayasha. Payta wasguirmi ichanga, quiquinpita juclla ushyacayman āhayanga. ² Pantachicujcuna juchata aparicur purishanta achcaj yačhacunga. Chayta ricar, Tayta Diosninchipa wawancunatapis waquin runa pampaman āhuranga. ³ Jillayníquita ushyapäshunayqui-cashallan imatapis willapäshunquipaj. Chay-niraj cashanpita ñiacaypita mana jishpingachu. Chayman āhayananpaj unaypita-pacha Tayta Diosninchí camacächiran.

⁴ Mana wiycuj anjilcunatapis Tayta Diosninchí mana llaquiparanchu. Manchäga chacaj pachaman jaycuriran. Cay pacha ushyacänan junajcaman wičhgaycuran. Chay junajraj juchanta jurgapanga. ⁵ Noé cawashan wichanpis juchačhu arujcunata Tayta Diosninchí mana llaquiparanchu. Ricay ñawinčhu Noélla alli cawaran. Payga marca-masincunata willaparan Tayta Diosninchita manchapacur alli cawanapaj. Marca-masincunam ichanga mana wiycuranchu. Chaymi Tayta Diosninchí Noéllata jančhis castantinta jishpichiran. Juchačhu arujcunatam ichanga yacuwan illarachiran.

⁶ Sodoma marcawan Gomorra marca runacunatapis Tayta Diosninchí ushyayapa ushyaran. Učhpayashancaman rupachiran jipa runacuna ricacunapaj. ⁷ Lottam ichanga Sodoma marcapita jishpichiran. Payga Tayta Diosninchipa shungun munashannuy cawaran. Sodoma runacuna juchata aparicullar cawaptin, marca-pingay cawaptin, Lot sumaj llaquicuran. ⁸ Waran-warán jucha aparicushanta ricar, mayar, shungunpis nanasharaj. ⁹ Sumaj tantiyacushun. Maquinčhu cawajcunata Tayta Diosninchí

ñacaypita jishpichinanta musyanchi. Juchačhu arujcunatam ichanga ñiacaycächin ushy-acay junaj čhayamunancaman. ¹⁰ Sumaj ñacachinga warminar, runanar marca-pingayčhu cawajcunata, shimillan atipashcunata. Chay pantachicujcunapa manchapacuynillan-pis mana canchu. Janaj pachačhu tiyaj anjilcunatapis ashllir ushyan. ¹¹ Anjilcunam ichanga sumaj munayniyu jaycarsi, mana pitapis pampaman čhuranchu. Tayta Diosninchipa ñaupančhu caycar, pantachicujcunata mana rimapanchu.

¹² Chaura uywacuna yarpayniynaj cawashan-jina pantachicujcunapa yarpayn-inpis mana canchu. Paycuna shungun munashallanta imatapis ruran. Allitucursi imata rimashantapis mana tantiyanchu. Uywa-yupay ñacanallanpaj yurisha. Uywata wañuchishan-jina wañuyman čhayanga. ¹³ Runa-masinta ushyapashanpita ñacayta taringa. Waran-warana runapa ricay ñawinčhu juchata aparicullar cushish cawan. Irmänucunawan micupacunayquipaj jutucaptiquipis, paycuna pingappaj jucha rurashancunata rimar asicačhan. ¹⁴ Ricashan warmita munapan. Jucha aparicuya mana yamacanchu. Lluta runacunatapis yačhachin juchata aparicunapaj. Runamasinpa imancunatapis jičhur ushyan. Pasaypa juju runa. ¹⁵ Tayta Diosninchipa shiminta musyaycarsi, mana wiycunchu. Bosorpa wamran Balaam-jina jillay-raycullar llutanta ruran. ¹⁶ Balaam llullacuj aywaycaptin, čhina bürun piñacuran. Upa yarpayninwan aywaycaptin, mičharan.

¹⁷ Pantachicujcuna chaquish pucyu-jina, pacacuj pucutay-jina pantachicun. Yananyaycaj chacajman Tayta Diosninchipi wičhgangapaj. ¹⁸ Alli-tucullar, yačhajtucullar, paycuna imatapis riman. Warmi-pačha runa-pačha canallanpaj pitapis shacyächin: «Tayta Diosninchipi camacächisha» nir. Pipis juchapita chayraj wanacush caycaptinpis, yapay juchaman cutinanpaj shimiyan. ¹⁹ Jananmanpis nin: «Jucha mana maquichacamanachichu.» Chaypis jucha aparicullačhu arun. Juchačhu arujcuna supaypa maquinčhu cawan. ²⁰ Chaymi pipis: «Taytanchi Jesucristupa maquinčhu cawä. Payga Washämajninchipi» nir supaypa maquinpita jishpishana cawan. Juchačhüpis mana arunnachu. Juchaman cutirmi ichanga, juyupana juyuyacäcun. Ñaupapitapis mas juchata aparicun. ²¹ Tayta Diosninchipa shiminta musyaycar pampaman čhuranallanpaj ama čhasquimanchu caran. Tayta Diosninchipa shungun munashanta ama musyanmanchu caran. ²² Jucha rurayman cutijcunapaj rasuntačhari rimaypis purin: «Allgu gumitashanta cutipanshi. Cuchita armachiptinsi, yapayshi mitučhu jučhparin» nir.

3

Washäcuj Jesús cutimunanpita tantiyachishan

¹ Irmänucuna, ishcay cutipana cartacaycämü. Alli cawanayquita munar, ishcan cartačhu willapaycaj. ² Chaymi Tayta Diosninchipa willacujnincunapa shiminta wiycunquiman. Jesúspa cačhancunapa shimintapis ama junganquimanchu. Cačhancunaga Taytanchi Jesúspa shiminta tantiyachishcashunqui: «Taytanchi Jesú Washämajninchipi Maquinčhu purichimanchi» nir.

³ Sumaj wiycärinquiman. Jipata runacuna shungun yarpashallanta rimar, shungun munashallanta rurar puringa. Jesúspa shiminta čhasquicujcunatapis pampaman čhuranga. ⁴ Ashllir ninga: «¿Imanirtaj Jesúsniqui: <Cutimushämi> nirsi, mana cutimunrächu? Unay irmänunchicunapis Jesústa shuyaraycällar wañucusha. Cay pachasi ricarishanpita-pacha cashgallan cacun.»

⁵ Paycuna rimashantapis mana tantiyanchu. Shungun munaptin, cay pachatapis, janaj pachatapis Tayta Diosninchipi camashanta mana tantiyanchu. Pay rimariptin, yacu rurillanpita cay pachapis ricarimuran. Yacuwanraj camaran. ⁶ Chay-jina llap-llapannintinta cay pachata yacullawan ushyaran. ⁷ Canan wicanpis Tayta Diosninchipi rimariptin, cay pachatawan janaj pachata cawaycächin. Ushyacay junaj čhayamuptinmi

ichanga, ninawanna llapanta ushyarachinga. Chay junaj juchanta jurgapar, jucháchu cawajcunata ushyarachinga.

⁸ Irmänucuna, sumaj tantiyacushun. Tayta Diosninchipäga juc junaj waranga (1,000) wata-yupaylla, waranga watapis juc junaj-yupaylla. ⁹ Chaymi ama yarpäshunchu: «¿Imanirtaj Jesús mana cutimunrächu?» nir. Payga llapan runa jucha aparicuypita wanacunantaraj shuyaraycan. Pipis juchallańchu wañunanta mana munanchu.

¹⁰ Chaypis suwa mana yarpashpita yaycapushan-jina Tayta Jesucristupis illajpita cutimunga. Cutimuptin, janaj pacha wararaylla ushyacanga. Intipis, quillapis, istrillacunapis ninawan chulluypa ushyacanga. Cay pachapis llapannintin ushyayapa ushyacanga.

¹¹ Llapanpis ushyacänan caycaptin, ¿imanuytaj cawashuwan? Juchata ama aparicushunchu. Manchäga Tayta Diosninchita manchapacushun. Shungun munashallanta rurashun. ¹² Jesústa shuyarashpanchi: «Juclla cutimuy, Tayta» nir mañacushun. Cutimushan junaj intitapis, quillatapis, istrillacunatapis nina ushyanya. Llapanpis chullucuringa. ¹³ Nuwanchitam ichanga janaj pachatapis cay pachatapis mushujtana Tayta Diosninchí shuyaraycächimanchi. Chaychüga llap-llapan Tayta Diosninchipa shungun munashannuy cawanga. Maysi juyácuylla canga.

¹⁴ Chaymi irmänucunallau irmänu, Tayta Diosninchí camacächinanta shuyaycar, ricay ñawińchu allilla cawashun. Juchata ama aparicushunchu. Llutanta ama rurashunchu.

¹⁵ Cananllaga Taytanchi Jesús mana cutimungarächu. Manchäga llaquipämashpanchi llapaninchita shuyaraycämanchiraj maquinman jishpichimänanchipaj. Irmänunchi Pablupis Tayta Diosninchí tantiyachiptin, cartacamuran. ¹⁶ Tayta Jesús cutimunan junajpita llapan cartancunáchu isquirbiran. Cartancunáchu sasa tantiyaycunapis caycan. Chaymi mana tantiyajcuna, janan shungulla yupachicujcuna Pablupa cartacushanta mana sumaj tantiyar, llutanpa tantiyachicunpis. Tayta Diosninchipa shimintapis llutanpa tantiyachicun. Chay-niraj cashanpita ushyacayman chayangapaj.

Cartapa ushyanan

¹⁷ Irmänucuna, willapashäta musyaycar, pantachicujcunapa shiminta ama chasquipanquichu. Tayta Diosninchipa maquinpita ama witicunquichu. ¹⁸ Manchäga Taytanchi Jesucristupa shiminta sumaj-sumaj tantiyacunquiman. Payga Washäcujninchi. Llaquipämashanchi-jina jamcuna-purasi sumaj-sumaj llaquipänacärinquiman. Taytanchi Jesúllata imay-imaycamanpis allíchu jurgushun. Chaynuy caycullächun.

San Juan cartacushan 1

Tantiyacunanchipaj:

Juan cay cartata isquirbiran. Paypita musyayta munar, San Juan librupa jallarinanta liguinqui. Juan pī-pīman cartacushantapis mana musyanchichu. Waquin yarpan chaytucuy marcacunačhu tiyaj irmänucunaman cartacushanta. Auquin caycar, Juan mayaran irmänucuna jutucashančhu llutanta tantiyachicuj runacuna caycashanta. Chaymi paycunapa shiminta mana čhasquipänanpaj irmänucunaman cartacuran.

Juan isquirbiran:

Tayta Diosninchawan Jesús imaypis cawashanpita, Jesúswan tincushanpita, irmänucuna Jesúsman llapan shungunwan yupachicunananpita: *1 San Juan 1.1-4.*

Irmänucuna cuyay-munaypaj cawananpita, juchanchita Jesús jungananpita, irmänucunata llaquipänanpita, jucha rurayllata mana munapänanpita: *1 San Juan 1.5-2.17.*

LLutanta tantiyachicuj runapa shiminta mana čhasquipänanpita: *1 San Juan 2.18-27.* Jesús cutimunanpita, Tayta Diosninchipa wawancuna allillata rurar cawananpita, llaquipänanpita, Jesúsman yupachicunananpita: *1 San Juan 2.28-3.24.*

Pipis tantiyachicuptin sumaj wiyaparänanpita, Tayta Diosninchipita tantiyachicuy-cashanta musyapänanpita: *1 San Juan 4.1-6.*

Irmänucuna llaquipänananpaj Tayta Diosninchyi yanapashanpita, llaquipäcujcuna Tayta Diosninchipa shungunman tincushanpita, Tayta Diosninchipa Wawan Jesúsman yupachicujcuna paywan imaycamanpis cawananpita: *1 San Juan 4.7-5.12.*

Mañacushanchita Tayta Diosninchyi wiyashanpita, mañacushanchita tarichimänanchipita: *1 San Juan 5.13-20.*

Jircacunaman mana manchapacunananpita: *1 San Juan 5.21.*

Jallarinan

¹ Wawacuna, Jesúspita sumaj tantiyacunayquipaj cartacallämü.

Payga Tayta Diosninchipa shiminta camacächicuj.

Cawachicuj.

Mana imasi captillanraj, cawaycaran.

Nuwacuna shiminta wiyashcä.

Ñawiwan quiquinta ricashcä.

Quiquinwan tincushcä.

² Cawachicuj cashpan quiquin ricsichicusha. Quiquinta ricashcä. Ricashäta willapäcurcaycä: «Imaycamanpis cawachimäshunpaj» nir. Cawachicujga Tayta Diosninchipa ñaupanpita shamusha. Quiquin ricsichicusha. ³ Jesústa ricashäta, wiyashäta willapaycaj juc shungulla cawananchipaj. Juc shungulla cawashuwan Tayta Diosninchawanpis, Wawan Jesucristuwanpis. ⁴ Llapallanchi sumaj cushishalla cawananchipaj cartacaycamü.

Juchapita Tayta Diosninchijishpichimashanchi

⁵ Cananga Jesucristupa shiminta willapäshayqui. Pay nimasha: «Tayta Diosninchijachqui allillata rurashpan. Ima juchanpis mana canchu «chacaj» ninanpaj.» Ni-mashanta llapanta willapaycaj. ⁶ Chaymi: «Tayta Diosninchipa maquinčhu cawä» nirsi juchallachu cawaycar, paypa shungun munashanta mana ruranchichu. Mana rasuntachu rimaycanchi. Manchäga llullacuycanchi. ⁷ Tayta Diosninchijina allillata

rurarmi ichanga, juc shungulla cawanchi. Wawan Jesús nuwanchi-raycur rusché wañuyinipa juchanchitapis mana yarparannachu.

⁸ «Juchata mana aparicushcächu» nir llullacuycanchi. Tayta Diosninchipa shungun yarpashantapis mana tantiyacunchirächu. ⁹ Juchanchita mana pacaptinchim ichanga, Tayta Diosninchita alli shungu cashpan, shiminta ́charcushpan juchanchitapis jungaycun. Juchanchita mana yarparar, alli ñawinpa ricamanchi. ¹⁰ «Juchata mana aparicushcächu» nir Tayta Diosninchitapis llullata-yupay ricaycanchi. Shungunchimanpis shimin mana ́chayanrächu.

2

Llaquipänacunanpaj piñapashan

¹ Wawallau wawa, jamcunaman cartacaycämü juchata mana aparicunayquipaj. Mayganinchipis juchata aparicush-imarga, Jesucristu Tayta Diosninchita parlapämäshun. Payga Tayta Diosninchipa shungun munashallanta ruran. ² Wañuyman ́chayasha mana nuwanchipa juchanchita Tayta Diosninchchi junganallanpächu; manchäga llapan runapa juchanta mana yarparänanpaj.

³ Mä, tantiyacushun. Tayta Diosninchipa shiminta wiyacur, maquinéhu cawashanchitapis musyanchi. ⁴ «Tayta Diosninchipa maquinéhu cawä» nirpis shiminta mana wiyacurmi ichanga, llullacuycanchi. Tayta Diosninchipa shungun munashantapis mana tantiyacunchirächu. ⁵ Shiminta wiyacurmi ichanga, rasunpa Tayta Diosninchita manchapacunchi. Shungun munashallanta rurar cawanchi. Chayraj paypa maquinéhu cawashanchipis musyacan. ⁶ «Tayta Diosninchipa maquinéhu cawä» nirga, Jesucristujina alli cawashuwan.

⁷ Wawacuna, isquirbimushäga mana juc yarpaychu; manchäga Jesúspa shimillan. Shiminta ́chasquicushayquipita-pacha wiyacushcanqui. Unayna rinriquiman ́chayasha.

⁸ Chaypis willapäcushäga juc yarpay. Jesús llaquipäcu cashanta musyarraj, jamcunapis llaquipänacur cawashayquita ricarraj, juc yarpay cashanta tantiyacunchi. Chacajchujina mana cawanquinachu. Manchäga Tayta Diosninchipa shungun munashannuy llaquipänacur, achquiéhu-jina cawarcaycanqui.

⁹ «Achquiéhu cawä» nirpis irmänunchita chiquipar, chacajchujina cawaycanchi. ¹⁰ Irmänunchita llaquiparmi ichanga, achquiéhu-jina cawaycanchi. Imachüpis mana juchallicunchinachu. ¹¹ Irmänunchita chiquiparmi ichanga, chacajchujina cawaycanchi. Chacajchujina cawar, japrä-jina puriyacanchi. Imata rurashanchitapis mana musyanchichu.

¹² Wawacuna, nuwanchi-raycur Jesucristu wañuyinipa Tayta Diosninchchi juchanchita mana yarparashanpita jamcunaman cartacaycämü.

¹³ Mayur runacuna, Tayta Jesucristupa shungunta musyapashayquipita jamcunaman cartacaycämü. Mana imapis captillanraj, pay cawaycaran.

Müsucuna, supayta ičhipushayquipita jamcunaman cartacaycämü.

¹⁴ Wawacuna, Tayta Diosninchipa shungunta musyapashayquipita jamcunaman cartacamushcä.

Mayur runacuna, Tayta Jesucristupa shungunta musyapashayquipita jamcunaman cartacamushcä. Mana imapis captillanraj, pay cawaycaran.

Müsucuna, Tayta Jesucristuman sumaj yupachicushayquipita, Tayta Diosninchipa shiminta ́chasquicushayquipita, supayta ičhipushayquipitapis jamcunaman cartacamushcä.

¹⁵ Wawacuna, juchačhu arujcuna-jina ama cawashuwanchu. Jucha rurashancunatapis ama yačhacushuwanchu. Jucha aparicujcuna Tayta Diosninchita mana manchapacunchu. ¹⁶ Paycuna shungun munashallanta, ñawin ricashallanta, puchuy-puchuy janančhu cawaj-tucuyllata ashin. Chaynuy cawananchita mana Tayta Diosninchichu

camacächin. Manchäga shungun munapashallanta ashir runacunalla camacächin.
¹⁷ Runapa shungun munashan, ñawin ricashan yupash watallapaj caycan. Tayta Diosninchipa shungun munashanta rurarmi ichanga, mana ushyacaypa cawashunpaj.

Washäcujs Jesústa ticrapujpita willapashan

¹⁸ Wawacuna, Washäcujs Jesústa cutimungapäna. Cay pachapis ushyacangapaj. Jesústa ticrapuj runa ricarimunantapis musyanqui. Paycuna mayna ricarimusha. Achcaj purircaycan. Chaymi ushyacay junaj jananchichüna. ¹⁹ Jesústa ticrapujcuna nuwanchiwan iwal puriycashančhu witicurisha. Janan shungulla purišimashcanchi. Rasunpa irmänu caycar, mana witicunmanchu caran. Cananga tantiyacunchi. Waquin runacuna: «Irmänu cä» nirsi, mana Tayta Diosninchipa maquinchüchu cawan.

²⁰ Washäcujs Jesústa camacächiyninpam ichanga Espíritu Santu yanagaycäshunqui. Jesúsga Tayta Diosninchipa acracuynin. Chaymi Espíritu Santu yanapäshuptiqui, shimintapis sumaj tantiyacushcanqui. ²¹ Shiminta tantiyacush captiqui, cartacaycämü. Mana pishiyarpaynachu canqui. Tayta Diosninchipa shungun yarpashanta rasunpa tantiyacur, pipis mana llullacunnachu.

²² Lullacujcuna riguichicur purin: «Jesústa mana Tayta Diosninchichi cačhamushan Washäcujschu» nir. Paycuna Jesústa ticrapunapaj jatarisha. Tayta Diosninchitapis, Wawan Jesústapis mana čhasquicunchu. ²³ Wawan Jesústa wasguipar, Tayta Diosninchitapis wasguipaycan. Nuwanchim ichanga Tayta Diosninchimanpis, Wawan Jesúsmannpis yupachicunchi.

²⁴ Chaymi Jesústa čhasquicushayquipita-pacha wiwashayquita ama junganquichu. Shimin shunguyquiman čhayash caycaptin, Tayta Diosninchipa maquinchüpis, Wawan Jesúspa maquinchüpis imaycamanpis juc shungulla cawanquipaj. ²⁵ Washäcujs Jesústa aunimashcanchi: «Maná ushyacaj cawayta tarichishayqui» nir.

²⁶ Chaymi pipis mana pantachishunayquipaj cartacaycämü. ²⁷ Jesucristu camacächiptin, Espíritu Santu yanagaycäshunqui. Maquinchüpu puriycächishunqui. Mana pipis pantachishunquipänachu. Chaymi juc yačhachishunayquita ama ashinquichu. Manchäga Espíritu Santu yačhachishushayquita wiyclunquiman. Payga mana pantachicunchu. Manchäga Tayta Diosninchipa shiminta yačhachishunqui. Chaymi maquinpitama witicunquichu.

²⁸ Wawacuna, maquillančhu cawar Jesústa cutimuptin, mana manchacushunchu. Ñaupančhüpis mana pingacushunchu.

²⁹ Sumaj tantiyacushun. Jesústa allillata ruran. Chay-jina pipis Tayta Diosninchipa shungun munashannylla cawar allillata ruraptin, wawan cashanta tantiyacunchi.

3

¹ Sumaj tantiyacushun. Tayta Diosninchichi sumaj-sumaj llaquipämanchi. Wamrachacamashcanchi: «Wawämi canqui» nir. Waquin runam ichanga Tayta Diosninchipa maquinchüpu cawayta mana munashpan paypa wawan cashanchitapis mana tantiyanchu.

² Irmäncuna, Tayta Diosninchipa wawan captinchisi, Jesúswan tincunanchi pishimanchiraj. Pay cutimuptinmi ichanga, ñawinchiwanraj ricashunpaj. Quiquinwan tincur, quiquin-niraj ricacushunpaj. ³ Jesúswan tincuya yupachicur, pay cawashan-jina Tayta Diosninchipa shungun munashallanta rurashuwan. Jesúsga Tayta Diosninchipa shungun munashannylla cawan.

⁴ Juchallačhu arujcunam ichanga Tayta Diosninchita tincupan. Paycuna Tayta Diosninchipa shiminta wasguipar juchata aparicun. ⁵ Jesústa juchaynaj car, llapan runapa juchanta aparicunapaj shamusha. ⁶ Chaymi Jesúspa maquinchüpu cawayta, juchacullar mana cawanchinachu. Juchačhu arujcunam ichanga Jesústa pí cashantapis mana tantiyacunchu. Maquinchüpis mana cawanchu.

⁷ Wawacuna, pipis pantachirushunquiman. Tayta Diosninchipa shungun munashan-nuy cawajcuna Jesústa ricacun. Payga allillata ruran. ⁸ Juchata aparicullar cawajcunam ichanga supaypa maquinchhu cawan. Supayga cay pachata camashanpita-pacha juchallačhu arun. Chaymi Tayta Diosninchipa Wawan Jesúshamusha supay camacächishanta illarachinanpaj.

⁹ Tayta Diosninchipa maquinchhu cawajcuna wawan cashpan juchačhu mana cawan-nachu. Manchäga wawan cashpan Tayta Diosninchipa shungun munashallanta rur-rar cawan. ¹⁰ Ricsipalla Tayta Diosninchipa wawancunapis, supaypa wawancu-napis. Supaypa wawancuna mana Tayta Diosninchipa shungun munashantachu ruran. Irmänucunatapis mana llaquipanchu.

Llaquipänacuypita tantiyachishan

¹¹ Unaypita-pacha jucninchu-jucninchipis llaquipänacärinanchipaj Tayta Diosninchu willapämashcanchi. ¹² Caínpa llupinpa ama jatishunchu. Payga supaypa maquinchhu cawar, wauguin Abelta wañuy cachiran. Imapita wañuchishantapis musyanqui, ¿au? Wauguin Abel Tayta Diosninchipa shungun munashanta ruraran. Caínmi ichanga juchallačhu aruran. Chaypita wauguinta chiquir, wañurachisha. ¹³ Irmänucuna, juchačhu aruj runacuna chiquishuptiquisi, ama upatacäcunquichu. ¹⁴ Irmänu-pura llaquipänacushanchi Tayta Diosninchipa maquinchhu cawaycashanchita musyacächin. Irmänuta chiquipajcunam ichanga supaypa maquinchhu cawashanpita wañuyman chayanga. ¹⁵ Chiquicuptinchi, wañuchicuja-jina Tayta Diosninchu ricaycämanchi. Ñaupančhpis mana imaypis cawashunpächu.

¹⁶ Llaquipäcuya yačhacunanchipaj nuwanchi-raycur wañuyman Jesúshayasha. Chaymi nuwanchipis irmänunchicuna-raycur wañuytapis ama manchacushunchu. ¹⁷ Waquin irmänu pishipacuychhu cawaycaptin, micuy janančhu cawaycar mana imatapis tarichir, llaquipäcuya mana yačhanchichu. Tayta Diosninchu llaquipäcuj cashantapis mana tantiyacunchirächu.

¹⁸ Wawacuna, janan shungulla ama llaquipänacärishunchu. Manchäga llapan shunguchiwan llaquipänacur yanapänacushun.

¹⁹ Llaquipänacuptinchiraj, Tayta Diosninchipa wawan cashpanchi shungun munashannuypis cawaycanchi. Chayrämi shungunchipis Tayta Diosninchipa shungunman tincun. ²⁰ Juchallicushanchipita shungunchi llaquish caycaptinsi, alli ñawinwan Tayta Diosninchu ricamanchi. Alli shungu cashpan shungunchitapis musyan. ²¹ Wawacuna, Tayta Diosninchu: «Juchaynaj caycanqui» nimaptinchi, shungunchipis mana nimäshungachu: «Juchačhu aruycanqui» nir. Manchäga: «Tayta Diosninchipa maquinchhu cawä» nir mana manchacullarna payman yupachicunchi. ²² Shiminta wiyacuptinchipis, shungun munashallanta rur-rar cawaptinchipis, llapan mañacushanchita tarichimäshun. ²³ Shiminta čharcunanchipaj Wawan Jesucristupa shimpintaraj čhasquicunanchi. Irmänunchicunawanpis llaquipänacärinanchi. Chayta Tayta Diosninchipa shimin nin. ²⁴ Shiminta wiyacur, Tayta Diosninchipa maquinchhu juc shungulla cawaycanchi. Payga mana imaypis cačharimäshunchu. Maquinchhu cawashanchita tantiyacunanchipäpis Espíritu Santuta cačhamusha yanagämänanchipaj.

4

Pantachicujcunapita rimashan

¹ Wawacuna, runacuna: «Yarpashanta tantiyacunäpaj Espíritu Santuhan Tayta Diosninchu yanapaycäman» nir niptinsi, llapanta ama čhasquicunquichu. Manchäga sumajraj shungunta musyapanquiman. Cay pachačhu achcaj pantachicujcuna riguichicur puriycan: «Tayta Diosninchipa willacujnín cä» nir. ² Tayta Diosninchu cačhamush

captinmi ichanga Espíritu Santu rimachiptin, willacur nin: «Jesús Washäcujninch. Runamasinchi. Cay pachačhu yurisha.» ³ Pantachicujcunam ichanga ninga: «Jesús mana runa-masinchichu.» Chay-niraj runacunata mana Tayta Diosninchichu cačhamusha. Paycuna Washäcuj Jesústa ticrapur supapya maquinčhu cawan. Mayna jatarimusha Jesústa ticrapunanpaj.

⁴ Wawallau, Tayta Diosninch. llap-llapanpaj munayniyuj. Maquinčhu purichishunqui. Chaymi pantachicujcunata supapya maquinčhu puriptinsi, ičipushcanqui. ⁵ Pantachicujcuna supapya maquinčhu cawan. Shimin tincuptin, juchačhu aruj runacunawan sumaj yačhānacun. ⁶ Nuwanchim ichanga Tayta Diosninchipa maquinčhu cawaycanchi. Pipis Tayta Diosninchipa maquinčhu cawar, shiminchita wiycun. Supapya maquinčhu cawajcunam ichanga mana wiycunchu. Chaymi wiycamacashanchiman-tupu pipa maquinčhu cawashantapis musyanchi.

Llaquipänacuypita tantiyachishan

⁷ Wawallau wawa, jucninch-i-jucninchipis llaquipänacärishuwan. Llaquipänacunanchita Tayta Diosninch. yačhachimanchi. Llaquipajcuna Tayta Diosninchipa wawan. Maquinčhu cawan. ⁸ Tayta Diosninch. sumaj llaquipäcuj. Llapan runacunata llaquipan. Chaymi pipis irmänunta mana llaquipar, Tayta Diosninchipa maquinčhüpis mana cawanchu. ⁹ Tayta Diosninch. llaquipäcuj cashanta tantiyacunanchipaj japallan Wawanta cay pachaman cačhamusha. Nuwanchi-raycur shamur, paymi cawachimanchi. ¹⁰ Sumaj tantiyacushun. Tayta Diosninchita manchapacuya mana yačhashcanchichu. Manchäga paymi llaquipämashcanchi. Chaymi Wawan Jesústa cačhamusha nuwanchi-raycur wañuyman čhayananpaj. Jesús quiquinpa caway-bidanta čurasha juchanchita aparicunananpaj. Chaynuupa Tayta Diosninch. juchanchita mana yarparannachu.

¹¹ Wawacuna, Tayta Diosninch. sumaj llaquipaycämaptinchi, nuwanchipis llapan irmänunchicunawan llaquipänacärishuwan. ¹² Tayta Diosninchawan pipis mana tin-cushachu. Llapan irmänunchiwan llaquipänacur cawaptinchim ichanga, Tayta Diosninchipa maquinčhu cawashanchita tantiyacunchi. Paymi shungun munashannuy cawaycächimanchi.

¹³ Sumaj tantiyacunanchipaj Espíritu Santu musyachimanchi. Espíritu Santu yanagämashpanchi Tayta Diosninchipa maquinčhu cawashanchitapis, imaysi mana cačcharimänanchitapis tantiyacunchi. ¹⁴ Wawan Jesústa Tayta Diosninch. cačhamushanta nuwacuna ricashcä. Llapan runapa juchanta aparicunananpaj shamusha. Chaymi washämänanchipaj cačhamushanpita mana manchacullar willapäcuyca. ¹⁵ «Jesús Tayta Diosninchipa Wawan» nir časquicuptin, pitapis Tayta Diosninch. maquinčhu purichin. Mana cačcharinnachu.

¹⁶ Tayta Diosninch. llaquipämashanchita tantiyacushcanchina. Shungunchimanpis čhayashana. Payga llaquipäcuj. Chaymi llaquipaptinchi, maquinčhu cawachimanchi. Mana imaypis cačcharimäshunpächu.

¹⁷ Jesús-jina sumaj-sumaj llaquipar, pay cutimunantapis cushishalla shuyaycanchi. Cutimur, llapan runapa juchanta jurgapanga. Chay junaj shungun munashannuy cawashpanchi mana manchacushunnachu.

¹⁸ Llaquipäcuj runa Tayta Diosninchipa shungun munashanta rurashpan cushishalla cawan. Ñacayman čhayayta mana yarpannachu. Waquin runam ichanga llaquipäcuya mana yačhar mancha-manchalla cawan. Ñacayman čhayanananta yarparäcun.

¹⁹ Tayta Diosninch. llaquipämaptinchi, nuwanchipis payta manchapacunchi. Runa-masinchitapis llaquipanchi. ²⁰ Chaymi: «Tayta Diosninchita manchapacur, maquinčhüna cawä» nir runa-masinchita chiquir, llullacuycanchi. Irmänunchicunata

ricaycar mana llaquiparga, ¿Tayta Diosninchitapis mana ricash caycar, manchapacuy-canchichuraj? Mana. ²¹ Paypa shiminta sumaj wiycushawan. Shiminčhu nin: «Tayta Diosninchita manchapacur, runa-masiquitapis sumaj llaquipanquiman.»

5

Tayta Diosninchiman yupachicur, llaquipänacunchi

¹ Yupachicujcuna Tayta Diosninchipa wawan cashpan maquinchüpis cawan: «Jesús Washäcuj» nir. Tayta Diosninchipa cawaycar, irmänunchicunawampis alli ricanacunchi chay Taytallapita cashpanchi. ² Tayta Diosninchita manchapacur maquinčhu cawar, shiminta wiycur, irmänunchitapis llaquipänanchi chay Taytallapita cashpanchi. ³ Tayta Diosninchita manchapacushanchi musyacänanpaj shiminta wiycunchi. Shiminga mana sasa čarcuychu.

⁴ Tayta Diosninchipa wawancuna maquinčhu cawar, jucha aparicuypita witicärin. Payman yupachicushpanchi supaytapis íchipunchi. ⁵ Ichipunanchipaj Jesústaraj časquicunanchi. Payga Tayta Diosninchipa Wawan.

⁶ Jesucristu cay pachaman shamur, yacučhu ushyacuran. Rusčhu wañur, yawarnintapis jičharan. Ichanga mana yacuwan ushyacushallanchu Tayta Diosninchipa Wawan cashanta musyachimanchi. Manchäga rusčhu wañur yawarninta jičhashanpis musyachimanchi. Espíritu Santupis llapanta musyachimanchi. Payga imatapis rasullanta musyachicun.

⁷ Chaymi quimsa yarpay Jesús shamushanta tantiyachimanchi.* ⁸ Quimsa yarpay juc yarpaylla caycan. Espíritu Santupis, yacučhu ushyacushanpis, wañur yawarninta jičhashanpis, llapan tantiyachimanchi Jesús rasunpa runa cashanta. ⁹ Runa-masinchipa shiminta časquiycar, Tayta Diosninchipa shimintapis časquicushawan. Paypa shimin sumaj Wawan Jesúspita tantiyachimanchi. ¹⁰ Wawan Jesúzman yupachicur, Tayta Diosninchipa shimintapis časquicushcanchina. Wawanpita rimaycaptin shiminta mana časquicurmi ichanga, Tayta Diosninchitapis llullata-yupay ricaycanchi. ¹¹ Wawan Jesúspita rimar, mana ushyacaj cawayta tarichimashanchita musyachimanchi. Chayta tarinchi Wawan Jesúspa maquinčhu cawar. ¹² Tayta Diosninchipa Wawanpa maquinčhu cawar, mana ushyacaj cawayta tarinchi. Wawan Jesúspa maquinčhu mana cawajcunam ichanga mana cawangachu.

Ushyanan

¹³ Irmänucuna, Tayta Diosninchipa Wawan Jesúspa shiminta časquicush caycar, mana ushyacaj cawayta tarinayquitapis musyanquiman. Chaytam cartacaycämü.

¹⁴ Nuwanchi Tayta Diosninchiman yupachicunchi. Mañacushanchi shungunman tincuptin, wiymanchi. ¹⁵ Mañacushanchita wiyaptin, llapan camacächishantapis musyanchi.

¹⁶ Chaura juc irmänu tacsha juchata aparicuptin, Tayta Diosninchita mañacapushun mana wañucunapaj. Tacsha juchaga Tayta Diosninchipa mana raquicächinchu. Chaymi mañacapuptinchi, mana ushyacaj cawayta Tayta Diosninchita tarichingapaj. Jatun juchata aparicujcunapaj mañacapunayquipämi ichanga mana rimacüchu. Jatun juchaga wañuyman runata čhayachin.* ¹⁷ Tayta Diosninchipa shungunman mana tincushancuna llapanpis jucha. Chaypis mana llapan juchachu wañuyman čhayachimanchi.

¹⁸ Tayta Diosninchipa maquinčhu cawajcuna juchačhu mana arunnachu. Tayta Diosninchipa Wawan Jesú washämanchi. Supay mana yatapämancinachu. ¹⁹ Tayta

* ^{5:7} Waquin Bibliačhu nin: «Quimsa yarpayta tantiyachicuj janaj pachačhu caycan: Tayta Diosninchipis, Shiminta Camacächijpis, Espíritu Santupis. Quimsanpis jucnaylla. Cay pachačüpis quimsan tantiyachimanchi: Espíritu Santupis, yacupis, yawarpis. Quimsan juc yarpaylla. * ^{5:16} Waquin runapaj jatun jucha chiquicuy, mana llaquipäcuy. Waquinpäna Tayta Diosninchita mana časquicuy, shiminta mana wiycuy.

Diosninchipa wawan car, maquinchhu cawashanchita musyanchi. Juchaáhu arujcunam ichanga supaypa maquinchüraj puriyan. ²⁰ Tayta Diosninchipa Wawan Jesús cay pachaman shamushanta musyanchi. Paymi Tayta Diosninchchi imanuy cashantapis tantiyachimashcanchi. Paypa maquinchhu cawaycar, Wawan Jesucristupa maquinchüpis cawaycanchi. Payga Tayta Diosninchchi. Imaycamanpis maquinchhu cawachimanchi. ²¹ Wawacuna, jircacunata ama manchapacunquimanchu. Chayllana.

San Juan cartacushan 2

Tantiyacunanchipaj:

Juan cay cartata isquirbiran. Paypita musyayta munar, San Juan librupa jallarinanta liguinqui. Juan pīman cartacushantapis sumaj mana musyanchichu. Waquin yarpan juc mama-warmiman cartacushanta. Waquinna yarpan jutucaj irmänucunaman cartacushanta. Pīman carpis, sumaj willapānanpaj cartacuran.

Juan isquirbiran:

Llaquipashanpita, cusicushanpita, llaquipānacunapita: *2 San Juan 1.1-6.*
Waqin runa llutanta tantiyachicushanpita, pantachicujcunata mana pachächinanpita, imačüpis mana yanapānanpita: *2 San Juan 1.7-11.*
Watucoj aywayta munashanpita: *2 San Juan 1.12-13.*

Juan wamayashan

¹ Mamallau mama, wawantiquiman cartacallämü.* Ima allish Tayta Diosninchi acrakashcushunqui maquinchú cawanayquipaj. Mayur irmänu car, waquin irmänucunawanima cartacamü. Paycunawan llapani Tayta Diosninchipa shiminta čhasquicush caycar, jamcunatapis llapan shungüwan llaquij. ² Tayta Diosninchipa shimin shungunchiman čhayasha. Imaypis mana jungashunnachu. Chaymi llapaniquita llaquij. ³ Tayta Diosninchipis, Wawan Washäcuj Jesúspis yanapayculläshunqui. Llaquipayculläshunqui. Allilla cawaycachilläshunqui. Chaynuy cawachimäshun shiminta wiycunanchipäpis, llaquinacunanchipäpis.

Llaquipānacuypta tantiyachishan

⁴ Waquin juturpashayqui irmänunchicuna tincupti, willamaran: «Irmänunchicuna Tayta Diosninchipa shungun munashannuy llaquipānacurcaycan» nir. Willamaptin, sumaj-sumaj cusicushcä. Chaynuy cawananchipaj Tayta Diosninchipa shiminta musyachicur tantiyachimanchi. ⁵ Mamallau mama, cananga mañacushayqui. Jucninchiji-jucninchipis sumaj llaquipānacärisun. Cartacamushächu mana juc-niraj willapatachu willapaycämuj; manchäga unaypita-pacha Tayta Diosninchipa shiminta wiyashallanchita. ⁶ Llaquipānacujcuna Tayta Diosninchipa shiminta llapanta čharcunman. Llaquipānacur cawananchipaj unaypita-pacha wiyashcanchi.

⁷ Cay pachačhu achcaj runa pantachicur purircaycan: «Jesús mana runachu caran. Mana Washäijninchichu caran» nir. Pantachicujcunawan Jesústa ticrapujcuna chayta riman. ⁸ Pantachishunayquipita maygantapis ama čhasquipanquichu. Manchäga Jesúspa shiminta willapäcushanchisi yangallapaj canga. Čhasquipar-imarga, Tayta Diosninchitarichimänanchi cashantapis mana čhasquishunpächu.

⁹ Pipis Washäcuj Jesúspa shiminta mana wiyacur jucta čhasquipar, mana Tayta Diosninchipa maquinchüchu cawan. Wiyacujcunam ichanga Tayta Diosninchipa maquinchú, Wawan Jesúspa maquinchú cawan.

¹⁰ Pipis juc willapata willapäcuycar čhayapushuptiqui, ama jamachinquichu. Ama: «Wasi caycällan» ninquipishchu. ¹¹ «Wasi caycällan» nir čhasquiparga, juyu rurashancunamanpis jaticaycanqui.

Cartapa ushyanan

¹² Willapānajpaj achcaraj caycan. Ichanga isquirbiyllapa llapanta mana isquirbimümanchu. Manchäga watucuj shamurna, llapanta willapäshayqui. Tincur, cushima juturpäshunpaj. Pishiycashantapis llapanta willapäshayqui.

* ^{1:1} «Mama, wawa» nir juc marcačhu irmänucunapaj tincuchiypa riman. «Mama» nir mayur irmänupaj riman: «wawa» nir irmänucunallapaj.

¹³ Ñañayquipis Tayta Diosninchí acracushpan llapan wawantin wamayäshunqui.* Chayllana.

* **1:13** Unay runacuna marcacunatapis, juturaj irmänucunatapis mama-warmiwan-yupay tincuchij. Canancamanpis waquin ricsin: «Iglesia madre» nir.

San Juan cartacushan 3

Tantiyacunanchipaj:

Juan cay cartata isquirbiran yačhänacushan irmänu Gayuman. Payga Washäcu Jesúzman sumaj yupachicuj. Mayur irmänu cashpan wasinčhu jutucaj irmänucunata sumaj ricaj. Yanapaj. Pachächij. Micuya tarichij. Chaynuy cawashanpita Gayuta allíchu jurguran. Chaymi sumaj shacyächinanpaj, anyapänanpaj cartacuran.

Juan isquirbiran:

Gayuta allíchu jurgushanpita, Tayta Diosninchipa shungun munashannuy cawashanpita, irmänucunata yanapashanpita: *3 San Juan 1.1-8*.

Deótreles jutiyuj runa irmänucunata mana yanapashanpita, Juanpa washanta rimashanpita, Deótreles mana ricacunanpita, Demetrio jutiyuj runa alli shungu cashanpita: *3 San Juan 1.9-12*.

Watucuj aywayta munashanpita: *3 San Juan 1.13-14*.

Juan wamayashan

¹ Tayta Gayo, nuwa mayur irmänu cashpä cartacallämü. Jamta llapan shungüwan llaquij.

² Yačhänacushanchi-janan maquinčhu alli cawashayquipita Tayta Diosninchita mañacapucä ima rurashayquipis alli llucshinanpaj, jishyapis mana charishunayquipaj.

³ Irmänunchicuna watucamar, jampita willamasha: «Tayta Diosninchipa shungun munashanta rurar cawaycan» nir. Chaymi sumaj cusicushcä. ⁴ Irmänucuna wawä-yupay cashpan Tayta Diosninchipa maquillančhu cawaptin, jatunpa cusicü.

⁵ Taytallau Gayo, irmänunchicunata yanapar, allita ruraycanqui. Jucläpita captinsi yanapar, sumaj allita ruraycanqui. ⁶ Paycuna cayman čayamur irmänunchicunawan jutucar, llaquipäcu cashayquita willapasha. Sumajshi yanapashcanqui paycuna purir mana pishipacunanpaj. Chaynuy yanapaycaptiqui, Tayta Diosninchispis sumaj cusicun. ⁷ Chay irmänucuna Washäcu Jesúspa shiminta willapäcur purircaycan. Tayta Diosninchipa shiminta mana čhasquicuj runacunapitam ichanga mana imatapis čhasquiparanchu. ⁸ Chaymi yanapäshawan Jesúspa shiminta chay-tucuyčhu willapäcur purinanpaj. Tarichirga, willapäshiyanchi.

Diotrefeswan Demetriupita rimashan

⁹ Juturaj irmänunchicunaman cartacamurä. Diotrefesmi ichanga nishan-nishanta rurar mana čhasquicamashachu. Manchäga quiquin allíchu llucshiyta munar, pampa-manpis čhuramasha. ¹⁰ Shamur, rurashanman-tupu piñacushaj. Payga nuwacunapa washäta rimallar purin. Irmänunchicuna čhayaptinpis, mana pachächinchu. Pachächiyta munajcunatapis mičhan. Waquin irmänunchita jutucaj irmänunchicunapita jargun.

¹¹ Taytallau Gayo, paypa llupinpa ama jatinquichu. Manchäga allillata ruranqui. Allita rurajcuna Tayta Diosninchipa wawan. Juyucunata rurajmi ichanga Tayta Diosninchipi pü cashantapis mana musyanchu. ¹² Demetriupämi ichanga alli cawashanpita, Tayta Diosninchipa shungun munashannuy cawashanpita llapanpis alli riman. Chaymi nuwacunapis payta alliman jurgü. Pitapis Tayta Diosninchipa shungun munashannuy cawaptin, alliman jurgü.

Cartapa ushyanan

¹³ Willapänajpaj achcaraj caycan. Ichanga isquirbiyllapam llapanta mana isquirbimümanchu. ¹⁴ Manchäga manasi aycällata watucushayquipaj. Tincur, sumaj parlana-cushunpaj.

¹⁵ Allilla juyaycullay, ari. Ricsinacushanchicuna wamayäshunqui. Irmänunchicunatapis ninqui: «Wamayaycäshunquish.» Chayllana.

San Judas cartacushan

Tantiyacunanchipaj:

Judas cay cartata isquirbiran. Payga Jesúspawan Santiagupa shullcanshi caran (San Mateo 13.55). Irmänucunata anyapänanpaj cartacuran.

Judas isquirbiran:

Tayta Diosninchiman yupachicuj runacunaman irquirbishanpita: *San Judas 1.1-2.* Janan shungu irmänucuna llutanta tantiyachicushanpita, Jesús cutimur pantachicu-jcunata ñacachinanpita: *San Judas 1.3-16.*

Tayta Diosninchipa maquinpita mana witicunananpita, Jesúsman yupachicuya yamacajcunata shacyächinanpita: *San Judas 1.17-23.*

Munayniyuj Tayta Diosninchita alliman churananpita: *San Judas 1.24-25.*

Judas wamayashan

¹ Irmänucuna, nuwa Judas cartacallämü. Santiagupa wauguin caycä. Jesucristupa maquinchhu cawar, mandu-rurajnin caycä. Nuwanchita Tayta Diosninchu sumaj llaquipämanchi. Wawan cananchipaj acracamashcanchi. Washäcuj Jesúspis sumaj ricamanchi. ² Llapaniquita llaquipäcuj Tayta Diosninchu yanapayculläshunqui. Allilla cawaycachilläshunqui. Sumaj llaquipayculläshunqui.

Pantachicujcunapita rimashan

³ Wawacuna, unaypita-pacha cartacamuya yarparsi, cananraj camäpacushcä. Washäcuj Jesúspita llapanchi Tayta Diosninchipa maquinchhu cawanchi. Chaypis sumaj tantiyacushun. Tayta Diosninchiga rimashanta charcunmi. Wawan caycar, shimintapis ama jungashunchu. Washäcuj Jesústapis ama cacharishunchu. Payman yupachicushanchi musyacänanpaj llapantapis allillata rurashun. ⁴ Waquin runa irmänu-tucullar, pantachicur puriycan. Paycuna Taytanchi Jesucristutapis pampaman churan. Maquinchhu cawayta mana munar, shimintapis mana wiycunchu. Manchäga marca-pingay cawan. «Juchata aparicullar puriptinchisi, Tayta Diosninchu mana ñacachimäshunpächu. Payga llaquipäcuj» nir quiquinpa shungun munashallanta ruran. Unaypita-pacham ichanga Tayta Diosninchu shiminta musyachicuran: «Pantachicujcuna ñacayman chayanga» nir.

⁵ Unay Israel runacunapa willapanta musyaptiquisi, mä, yarpärishun. Israel runacunata llaquipar, Egipto marcapita Tayta Diosninchu jishpichicamuran. Mana wiycuptinmi ichanga, chaqui pacha quinranchhu ushyaypa ushyaran. ⁶ Mana wiycuj anjilcunatapis chacaj pachaman Tayta Diosninchu wičhgaycuran cay pacha ushyacänan junajcaman. Paycuna quiquinpa cargun captinsi, alliman churash captinsi, Tayta Diosninchita apäriya munaran. Chaypita cadinawan wancuraycur chacaj pachaman wičhgaycuran. Cay pacha ushyacänan junaj ima juchan cashantapis jurgapanga. ⁷ Sodoma marca runacunatapis, Gomorra marca runacunatapis, chay quinran marca runacunatapis Tayta Diosninchu mana upij ninačhu ñacaycächin llapanchi ricacunanchipaj. Paycuna mana wiycur, jucwan-jucwan cacuran. Marca-pingay cawaran.

⁸ Paycuna imaman chayash captinsi, chay pantachicujcunapis: «Tayta Diosninchu ricaripamasha» nir marca-pingay cawarcaycan. Washäcuj Jesústapis pampaman churarcaycan. Tayta Diosninchipa anjilnincunatapis ashllir ushyarcaycan. ⁹ Mayur anjil Miguelmi ichanga Moiséspa ayanta supaywan jičhunacurpis, mana ullgüparanchu. Manchäga niran: «Supay, quiquin Tayta Diosninchu piñacushunqui.» ¹⁰ Pantachicujcunam ichanga imata rimashantapis mana tantiyar, pitapis pampaman churan. Ricaycarsi, uywacuna-jina imatapis mana tantiyanchu. Chaypis tucuyta ruran ushyacayman

chayanallanpaj. ¹¹ Paycuna llaquipaypaj ñacanga. Caínpa llupinpa jatin. Balaampa llupinpa jatir, jillay-raycullar imatapis ruran. Coré-jina Tayta Diosninchita ticrapa-cushanpita wañuytapis taringa.

¹² Alli ricanacur micupacäriptiquipis, pantachicujcuna pingaypaj imatapis manacajcunallata ruran. Manchapacuytapis mana yačhanchu. Shungun yarpashallanta imatapis ashin. Yangalla alli-tucunpis. Pantachicujcuna alli-tucur purishanpita tincuchiypa tantiyacushun. Tamya jallarinan wican pucutayta ricar: «Allipaj tamyamunga» nir cushicunchi. Pucutayta wayra jucläpa apacuptinmi ichanga: «Pucutay yangalla ricarimusha» ninchi. Rüta yüra wayunan wicanpis: «Mishquita micushun» nir cushicunchi. Chaquishta tarirmi ichanga, llaquicunchi: «Chaquish captin, sapirichun» nir.

¹³ Mayu chayar pushgaynin ricarishan-jina pantachicujcunapis manacajcunallata rurar, pingayman chayan. Shicwaj istrilla illaricäcushan-jina pantachicujcunapis chacaj pachaman illarijpaj chayanga.

¹⁴ Pantachicujcuna ñacananta musyachicur, Adánpa willcan Henocpis niran: «May-may anjilnincunawan Tayta Diosninch shaycamunga.

¹⁵ Llapan runapa juchanta jurgapänanpaj shamunga.

Jucha aparicujcunata, pampaman churajcunata, llapantam ñacayman chayachingapaj.

Juchačhu arushanman-tupu, ashllicushanman-tupu ñacachingapaj.»

¹⁶ Pantachicujcuna imallapitapis ullguycan. Imapitapis jagayaycan. Shungun munashallanta ashiyan. Imatapis munarmi ichanga, pitapis alli-tupan. Cushichipan.

Irmänucunata piñapashan

¹⁷ Wawacuna, nuwanchim ichanga Taytanchi Jesucristupa shiminta ama jun-gashunchu. Cačhancunawan shiminta tantiyachimashcanchi. ¹⁸ Paycuna niran: «Jesucristu cutimunanpaj wallcana pishiptin, runacuna mana manchapacunganachu. Manchäga Tayta Diosninchita ashllinga. Shungun munashallanta imatapis ruranga.»

¹⁹ Paycuna chiquinacuyllačhu, irmänucunata raquicächiyllačhu arun. Mana Espíritu Santupa maquinčhu cawar, quiquinpa shungun munashallanta imatapis ruran.

²⁰ Irmänucunallau irmänu, nuwanchim ichanga Tayta Diosninchiman sumaj yupachicushun. Shungun munashallanta rurar, juc shungulla cawashun. Espíritu Santu shacyächimashchiman-tupu Tayta Diosninchita mañacushun. ²¹ Tayta Diosninch llaquiycämaptinchi, maquillančhu cawashun. Taytanchi Jesucristupis llaquipaycämanchi. Cutimur, shuntacamäshunpaj maquinčhu imaycamanpis cawananchipaj. Chaymi mana yamacällar shuyäcushun.

²² Llutäpacujcunata llaquipar, tantiyachicushun Tayta Diosninchiman sumaj yupachicunapaj. ²³ Supaypa maquinčhu purijcunatapis jishpichishun Tayta Diosninchipa maquillančhu cawanapaj. Manchäga ninačhu ñacangapaj. Juchačhu arujcunata llaquiparsi, llupinpa ama jatishunchu. Runapa rurin müdanan janra cashan-jina paycunapa shungunpis janra. Juchallačhu arun. Chaymi llaquipar, juchan mana aypäshunayquipaj Tayta Diosninchita manchapacunquiman.

Cartapa ushyanan

²⁴⁻²⁵ Wawacuna, Tayta Diosnillanchita imay-imaypis alliman churaycalläshun. Payga shungun munashanta imatapis camacächin. Payman pipis mana tincunchu. Payga sumaj munayniyuj. Munayniyuj jucha aparicuypta jishpichimänanchipäpis, juchaynajta ricay ñawinman chayachimänanchipäpis. Quiquinmi Taytanchi Jesucristuta cačhamusha washämänanchipaj. Paypa ñaupanman chayar, jatunpa cushicushunpaj. Chaynuy cay-cullächun.

San Juan ricapacushan

Tantiyacunanchipaj:

Juan cay libruta isquirbiran. Paypita musyayta munar, San Juan librupa jallarinanta liguinqui. Payga isquirbiran Asia quinranchú janchis marcachú jutucaj irmänucunaman. Chay wichan irmänucuna juyupa ñacarcaycaran. Jesúsmán yupachicushanpita Roma marcapa mandajnin jaticačhar ushyaran. Chaymi Jesúsmán yupachicuyta mana munaranchu. Juantapis ñacachishpan lamar chaupin Patmos marcaman jarguran. Chaychú caycar, irmänucunata shacyächinanpaj, Jesúsmán sumaj yupachicunanpaj llapan ricapacushanta isquirbiran.

Juan isquirbiran:

Tayta Diosninchí ricapacachishanpita, quiquin Tayta Jesústa ricashanpita, janchis marcachú irmänucunaman cartacunapita: *Apocalipsis 1.1-20.*

Janchis marcachú jutucaj irmänucunaman cartacur waquinta allíchu jurgushanpita, waquinta piñapashanpita: *Apocalipsis 2.1-3.22.*

Janaj pachačhu Tayta Diosninchita manchapacujcunata ricashanpita: *Apocalipsis 4.1-11.*

Tayta Diosninchipa Uyshan pitush papilta quipsariptin ñacaycuna ricarimunapita: *Apocalipsis 5.1-6.17.*

Washänanpaj wawancunata Tayta Diosninchí chäpachishanpita: *Apocalipsis 7.1-17.*
Janchis curnítata anjilcuna tucamuptin janchis castaraj ñacay ricarimunapita: *Apocalipsis 8.1-11.19.*

Washäcu Jesústa mayur Supay ičhipuya munashanpita: *Apocalipsis 12.1-18.*

Runacunata waräcuy chäpachishanpita: *Apocalipsis 13.1-18.*

Tayta Diosninchí ullgushpan janchis anjilninwan runacunata ñacachinanpita: *Apocalipsis 14.1-16.21.*

Tayta Diosninchí llapan runapa juchanta jurgapänanpita, ñacayman chayachinanpita, Supayta shapshicu-masintinta ñacachinanpita: *Apocalipsis 17.1-20.15.*

Cay pachatapis janaj pachatapis mushujta Tayta Diosninchí camacächishanpita, mushuj pachačhu Tayta Diosninchíwan wawancuna cushish cawanapita, Jesú cutimunapita, wawancuna shiminta wiyacullar cawanapita: *Apocalipsis 21.1-22.21.*

Jallarinan

¹ Tayta Diosninchí Jesucristuta musyachiran: «Ima-imatapis camacächinäta llapan wawäcunata musyachinqui» nir. Jesucristuna anjilninwan mincaynin Juanta musyachiran. ² Juanna llapan shungunwan willapäcusha: «Wiyashäpis, ricashäpis Tayta Diosninchipa shiminmi. Jesucristu llapantapis sumaj tantiyachimasha» nir.

³ Chaymi pipis Jesucristu musyachicushan libruta liguipar, cushicärinman. Liguishanta wiyajcunapis wiyacur, cushicärinman. Paycunata Tayta Diosninchí sumaj yanapan. Camacächinan jananchichüna caycan.

⁴⁻⁵ Irmänucuna, nuwa Juan cartacaycallämü. Asia quinranchú janchis marcachú jutucaj irmänucunata wamayä. Jamcunapaj mañacü:

«Tayta Diosninchí cawajmi.

Imaypis mana ushyacajmi.

Cananga cutimungapaj.

Paypa ñaupanchú Espíritu Santupis, Washäcu Jesúspis llaquipayculläshunqui.*

* **1:4-5** «Espíritu Santo» ninanta griego rimaychú: «janchis espíritu» nin. «Janchis» nir sumaj-sumaj alli cashanta tantiyachicun.

Alli-allilla cawaycachilläshunqui.

Tayta Diosninchı camacächishanta musyar, Jesucristu musyachimanchi.

Paymi puntata cawarisha imaypis mana wañunanpaj.

Llapan runacunata auturdänintinta maquinchı purichin.

Payga llaquipämanchi.

Nuwanchı-raycur ruschı wañur, juchanchicunapitapis jishpichimashcanchi.

⁶ Maquinchüna charämanchi.

Tayta Diosninchıpa mandunta rurar, cüra cayman čhuramashcanchi llapan runapaj mañacapunanchipaj.

Chaymi Jesucristuta imay-imaypis alliman čhurayculläshun.

Munayniyuj cayninga imay-imaypis ama ushyacächunchu.

Chaynuy caycullächun.

⁷ Wiyacäriy. Jesús pucutay jananpa shaycämun.

Llapan runa ricanga.

Tucsiypa wañuchijcunapis ricanga.

Ricar, chay-tucuychı llaquicuywan runacuna waganga.

Chaynuy caycullächun» nir.

⁸ Llapanpaj Munayniyuj Tayta Diosninchı nin: «Imay-imaypis cawajmi cä. Imaypis mana ushyacashächu. Cutiycamüna.* Llap-llapanpaj munayniyuj caycä.»

Tayta Jesús Juanta ricaripushan

⁹ Irmänucuna, nuwa Juanmi caycä. Llapanchi Tayta Diosninchıpa maquinchı cawaycanchi. Jesús-janan ūacaycanchi. Cutimunantapis mana yamacällar shuyarpaycanchi. Nuwata lamar ĉaupin Patmos marcaman jargumaran Tayta Diosninchıpa shiminta willapäcushäpita, Jesús-janan willapäcushäpita.* ¹⁰ Chaychı caycar Jesús cawarishan dumingu junaj Espíritu Santu charicarcamaptin, jipächı rimamuja curnüta suynamuja-niraj wiyarä. ¹¹ Wiyacächiyipa nimaran: «Ricasayquicunata llapanta libruman isquirbinqui. Jinarcur janchis marcačhu jutuaj irmänucunaman apachinqui. Apachinqui Asia quinranchı Éfeso marcaman, Esmirna marcaman, Pérgamo marcaman, Tiatira marcaman, Sardes marcaman, Filadelfia marcaman, Laodicea marcaman.»

¹² Chaura pii rimashantapis ricanäpaj juclla tictirärirä. Ticrar, juripita janchis lamparinta ricarä. ¹³ Lamparincunapa čhaupinchı čhaqui puntancaman yuraj müdanash runaman ricchacuj ičhiraycaran.* Jasgu watun juripita caran. ¹⁴ Ajchan achic-achicyaycaj raju-jina yuraj caran. ūawin nina-jina ratataycaran. ¹⁵ Čhaquincunapis wayllash brunsi-jina achic-achicyaycaran. Rimashanpis čhayash mayu-jinaraj caruman wiyacaran. ¹⁶ Diricha-caj maquinwan janchis istrillacunata charaycaran. Shiminpita ishcanläpa aflash cuchillu llucshiraycaran. Jajllan inti-jina achic-achicyaycaran.

¹⁷ Runaman ricchacujta ricar, wañucäcurä. Ichanga diricha-caj maquinwan yataycamar, nimaran:

«Ama manchacuychu. Cawajmi caycä. Imaypis mana ushyacashächu. ¹⁸ Imay-imaypis cawacü. Wañuymanpis čhayashcä. Cananmi ichanga imay-imaypis cawacushaj. Wañuypis, chacaj pachapis maquičhu caycan. Pitapis cawachimán. ¹⁹ Cartacur, llapan ricashayquita isquirbinqui. Canan wíchan ima cashantapis, shamuj watacuna ima canantapis musyachinqui.

²⁰ «Canan tantiyachishayqui. Maquičhu charashä janchis istrilla janchis täpaj anjilcunawan tincun. Paycuna janchis marcačhu jutuaj irmänucunata täpaycan. Maquičhu charashä janchis juri lamparinna janchis marcačhu jutuaj irmänucunawan tincun.»

* ^{1:8} Griego rimaychı: «Alfa, Omega» nin. Chaynuy nishan imay-imaypis cawashanwan, imaypis mana ushyacashanwan tincun. * ^{1:9} Patmos marca carsil-yupay caran. * ^{1:13} «Runaman ricchacuj» nir Washäcuj Jesúspaj yarpaycaran.

2

Éfeso marcačhu jutucay irmänucunata cartacushan

¹ Éfeso marcačhu jutucay irmänucunata täpaj anjilta cartacur, ninqui:

«Jesúsga jančhis istríllata diričha-caj maquinčhu charaycan. Jančhis juri lamparin čaupinčhu puriycan. Paymi nishunqui: ² ‹Ima-imata rurar cawashayquitapis ricashcä. Nuwa-janan ñacashayquita musyä. Wañuy-caway wiycamashayquitapis musyä. Juchačhu arujcunatapis mana čhasquipashcanquichu. Cačhä-tucujcunata llullacushantapis taripushcanqui. ³ Čhasquicamashayqui-janan ñacachishuptquipis, mana cačcharimashcanquichu. Mana yamacällar shimitapis wiycushcanqui. ⁴ Chaypis llaquicü. Janan shungullana manchapacarcaycämanqui. Quiquiqui-purapis mana llaquipänacärinquinachu. Shimüta čhasquicushayqui wíchan llapan shunguyquiwan manchapacamarayqui. Quiquiqui-purapis sumaj llaquipänacärirayqui. ⁵ Cananga jasacar, carupayllapa ama purinquimanchu. Manchäga wanacärinquiman. Ñaupata llaquipayta yačhashayquinuy cawanquiman. Llapa shunguyquiwan shimita wiycunquiman. Mana wanacuptiqui, lamparinta upirachir illarachishä-jina jamcunatapis illarachishayqui. ⁶ Chaypis Nicolauspa jatirajnincuna ima-imata rurashantapis mana aunipar, allita rurashcanqui. Nicolauscuna imata rurar cawashanga shunguyquimanpis, shungümanpis mana tincunchu.

⁷ «Rinriyuj irmänucuna mayčhu juturarpis, Espíritu Santupa shimita wiycunman. Juchacuya munapächishanta íchipujcunata quiquinpa ñaupanman mana ushyacaj cawayman Tayta Diosninchi čuranga. Cawachicuj yürapa wayuynintapis micuchinga.» »

Esmirna marcačhu jutucay irmänucunata cartacushan

⁸ Esmirna marcačhu jutucay irmänucunata täpaj anjilta cartacur, ninqui:

«Jesúsga cawacujmi. Mana ushyacajmi. Wañuyman čhayasha. Cawarimusha. Paymi nishunqui: ⁹ ‹Ñacashayquitapis, pishipacuyčhu cawashayquitapis ricaycä. Chaypis puchuy-puchuy janančhu cawaj-yupay carcaycanqui. Čhasquicäramashayquipita Tayta Diosninchi tariycächishunqui. Runacuna washayquita rimashanmi ichanga rinrīman čhayamusha. Washa rimaj Israel runacuna yarpan: «Tayta Diosninchipa maquinčhu cawä. Wasinčhu juturä» nir. Chaynuy yarparsi, Supaypa maquinčhu cawarcaycan. ¹⁰ Jamcunam ichanga ñacayta ama manchacärinquichu. Washa rimajcuna supaypa munayninta rurar, waquinniquita carsilman wičhgachishunquipaj shimita wiycushayquita musyapäshunayquipaj. Camacaptin, čunca junajlla ñacachipärishunquipaj. Chaypis wañuy čhayapushuptiquisi Tayta Diosninchita mana wasguipaptiqui, mana ushyacaj cawayta tarichishayqui.*

¹¹ «Rinriyuj irmänucuna mayčhu juturarpis, Espíritu Santupa shimita wiycunman. Juchacuya munapächishanta íchipujcuna wañurpis, cawarimunga. Cawarimur, yapay mana wañunganachu. Manchäga imay-imaypis Tayta Diosninchipa maquil-lančhu cawanga.» »

Pérgamo marcačhu jutucay irmänucunata cartacushan

¹² Pérgamo marcačhu jutucay irmänucunata täpaj anjilta cartacur, ninqui:

«Jesúsga ishcanläpa afilash cuchilluta charaycan. Paymi nishunqui: ¹³ ‹Juyashayqui marcačhu llapan runata Supay maquichacusha. Chaypis jamcuna llapan shunguyquiwan shimita wiycushcanqui. Willacujni Antipasta wañuchiaptinsi, mana

* ^{2:10} Castillänučhu waquin riman: «corona» nir waquinna: «premio» nir. Unay wíchan curünata jačhallapita pilltaj. Jinarcur juc runapa umanman jatipaj: «Llapanta íchipushcanqui. Llapanta llallishcanqui» nir.

wasguimashcanquichu. ¹⁴ Ichanga waquin rurashayquicuna shungüman mana tincunchu. Musyapacuj Balaampa yačhachishanta mana mičhashcanquichu. Balaamga mandaj Balacta shimiyanan: «Israelpunata juchaman jančhay. Uywata pishtar jircacunata jaraycur, mallichinacuchun.* Jucwan-jucwan cacuptinpis, mana imananchu» nir. ¹⁵ Chaynuypis waquinniqui pantachicuj Nicolauspa jatirajnincunapa shiminta časquicärishcanqui. ¹⁶ Cananga wanacäriy-llapa. Manchäga juclla shamur, shimpita llucshij ishcanläpa afilash cuchilluwan mana wanacucunata ñacachishaj.

¹⁷ «*Rinriyuj irmänucuna mayčhu juturarpis, Espíritu Santupa shiminta wiycuman. Juchacuya munapächishanta ičhipujcunata pacaraj manäwan cawachishaj. Yuraj rumitapis jushäpaj. Chayčhu pipis mana ricsishan mushuj juti isquirbiraycan. Chay jutita rumita časquijcunalla ricsingapaj.»*

Tiatira marcačhu jutucaj irmänucunata cartacushan

¹⁸ Tiatira marcačhu jutucaj irmänucunata täpaj anjilta cartacur, ninqui:

«Jesúsga Tayta Diosninchipa Wawanmi. Ñawinpis nina-jina ratataycan. Čaquinpis brunsi-jina achic-achicyaycan. Paymi nishunqui: ¹⁹ Ima-imata rurar cawashayquita ricaycä. Yarparämashayquita, yupachicamashayquita, llaquipänacushayquita, quiquipi-pura yanapänacushayquita musyä. Maquičhu cawar ima ñacayman čhayarsi, mana yamacämanquichu. Manchäga shungü munashanta waran-waran rurarcaycanqui. ²⁰ Chaypis waquin rurashayquicuna shungüman mana tincunchu. ¿Imanirraj juchačhu aruj warmi Jezabelta mana mičhanquichu? Payga wawäcunata pantachir niycan: «Tayta Diosninchipa shiminta willacü. Jucwan-jucwan cacushansi mana imananchu. Jircatapis manchapacushuwan. Uywata pishtar, jircata jarashantapis mallichinacushuwan» nir.* ²¹ Chay warmi wanacunanta munar, mayna willapashcä. Chaypis runacunawan cacur puricuycan. ²² Chaymi juyu jishyaman čhayachishaj. Sumaj ñacachishaj. Runan-runan puricuj warmiwan cacujcunatapis mana wanacushanpita ñacachishaj. ²³ Wañurachinäpaj Jezabelpa llupinpa jatijcunaman jishyata čhayachishaj. Chayraj chay-tucuy marcačhüpis jutucaj irmänucuna llapan runapa shungunta musyapashäta tantiyacunga. Llapaniquita imá-imatapis rurashayquiman-tupu allimanpis, mana allimanpis čhayachishayqui. ²⁴ Waquinniquim ichanga Jezabelpa shiminta mana časquipashcanquichu. «Jezabelshi Supaypa shungun yarpashanta yačhachin» niptinpis, mana časquipashcanquichu. Chaymi piňapänaj mana camacanchu. ²⁵ Ichanga cutimunäcaman shimiña ama junganquichu. ²⁶ Juchacuya munapächishanta ičhipujcunata cutimunäcaman shimiña wiycamaptin, marcacunata mandananpaj čhurashaj. Mandäšhinäpaj Papäni čhuramashan-jina paycunatapis mandaj cayman čhurashaj. ²⁷ Wiyacamajcunapa maquinman čhurapti, jíru garutiwan mana wiycucunata ñacachingapaj. Allpa mancata japllurij-jina ushyarachingapaj. ²⁸ Llapanta ičhipushanpita waraj istrillatapis jushäpaj.

²⁹ «*Rinriyuj irmänucuna mayčhu juturarpis, Espíritu Santupa shiminta wiycuman.»*

3

Sardes marcačhu jutucaj irmänucunaman cartacushan

¹ Sardes marcačhu jutucaj irmänucunata täpaj anjilta cartacur, ninqui:

* **2:14** Griego rimayčhu «ídolo» nir tantiyaj Tayta Diosninchita jungaycur imamanpis yupachicushanta, manchapacushanta. Imamanpis yupachicushanta ricananpaj imaman ricchacucunata ruraj. * **2:20** Tayta Diosninchipa witicur jucman yupachicucunata tincuchij jucwan-jucwan puricucunawan. Chaynuypis ricsij Tayta Diosninchita jananpachiptin.

«Jesúsga maquiníchu Espíritu Santuta purichin. Janchis istríllatapis maquiníchu charaycan.* Paymi nishunqui: «Ima-imata rurar cawashayquita musyä. Runacuna: «Tayta Diosninchipa ricay ñawiníchu alli cawarcaycan» nishuptiquisi, jungsaycaramashcanqui. Wañush-jina carcaycanqui. ² Sumaj yarpaáchacunquiman. Mana wañunayquipaj shimiña wiycunquiman. Janan shungulla wiycuptiqui, Tayta Diosninchipa ricay ñawiníchu mana allitachu ruraycanqui. ³ Ñaupata Tayta Diosninchipa shiminta chasquicárirayqui. Shunguyquicaman chayaran. Cananpis wiycunquiman. Jucha aparicushayquipita wanacunquiman. Manchága suwa-jina mana yarpashpita chayapushayquipaj. ⁴ Waquinniquim ichanga Tayta Diosninchipa shungun munashannuy cawarcaycanqui. Chaymi yuraj müdanash purishimänayqui camacan.* ⁵ Juchacuya munapächishanta íchipujcunata yuraj müdanata ushtupanga. Cawajcunapa jutincuna isquirbirashan acta librüpita mana imaysi illarachishächu. Manchága Papánipa ñaupaníchu, anjilcunapa ñaupaníchu nishaj: «Nuwaman yupachicaman. Maquicchumi cawan.»

⁶ «*Rinriyuj irmänucuna mayíchu juturarpis, Espíritu Santupa shiminta wiycunman.*»

Filadelfia marcaíchu jutucaj irmänucunaman cartacushan

⁷ Filadelfia marcaíchu jutucaj irmänucunata täpaj anjilta cartacur, ninqui:

«Jesúsga Tayta Diosninchipa juchaynaj Wawanmi. Shimin nishanta charcuj. Mandaj Davidpa willcan car, marcantapis maquiníchu purichin. Wasiyuj lläbita charashanjina marcapa lläbinta maquiníchu charaycan. Puncunta quičhaptin, pipis mana wičhganmanchu. Wičhgaptinpis, mana quičhanmanchu. Paymi nishunqui: ⁸ «Ima-imata rurar cawashayquita musyä. Ima allish shimiña wiycushcanqui. Runamasiqui juyu ñawinpa ricashuptiquisi, mana wasguimashcanquichu. Cananga shungü munashanta ruranayquipaj puncuta quičhashä-jina pipis mana chapata rurashunquipänachu. ⁹ Chiquicuj Israelmunatam ichanga ñacachishaj. Paycuna: «Israel runa cashpä Tayta Diosninchipa ricay ñawiníchu alli cawä» nirpis, Supaypa wawan carcaycan. Chaymi paycunata pingayman chayachishaj. Chayraj jamcunata alli ñawipa ricashajta tantiyacur, ñaupayquičhüpis jungurpacuycungapaj. ¹⁰ Tayta Diosninchí runapa shungunta musyapashan wican llapan runa ñacananpaj camacächinga. Ñacay captinsi, mana yamacaypa shimiña wiycamashayquipita washäshayqui. ¹¹ Cutiycamüna. Shimiña wiycuptiqui, mana ushyacaj cawayta tarinquipaj. Ñaupäman chayanayquipaj pipis mana chapashunquipächu.* ¹² Juchacuya munapächishanta íchipujcunata wasiníchu Tayta Diosninchí cawachinga. Chaypita pipis mana cuyuchinganachu. Manchága jananíchu isquirbishaj: «Caycuna Tayta Diosninchipa wawan. Mushuj Jerusalén marcaíchu tiyan. Chay marca Tayta Diosninchipa marcanmi. Janaj pachapita yarpamunga. Quiquipa mushuj jutítapis churapushaj» nir.

¹³ «*Rinriyuj irmänucuna mayíchu juturarpis, Espíritu Santupa shiminta wiycunman.*»

Laodicea marcaíchu jutucaj irmänucunaman cartacushan

¹⁴ Laodicea marcaíchu jutucaj irmänucunata täpaj anjilta cartacur, ninqui:

«Jesúsga ima-imatapis camacächij captin, jutichaparan: «Chaymuy caycullächun» nir. Tayta Diosninchipa shimintapis llap-llapanta willacun. Tayta Diosninchí Jesúswanima llap-llapanta camaran. Jesúsmi nishunqui: ¹⁵ «Ima-imata rurar cawashayquitapis musyä. Jamcuna janan shungulla chasquicáramashcanqui. Wasguimar, juclla wasguiramanquiman. Chasquicamar, llapan shunguyquiwan chasquicamanquiman. ¹⁶ Janan

* ^{3:1} Espíritu Santupita rimar, griego rimayíchu: «Tayta Diosninchipa janchis espíritu» nin. Janchis istrilla rimashanpita Apocalipsis 1.20-ta ricanquiman. * ^{3:4} Yurajpaj rimar, chay wican tantiyaj Tayta Diosninchipa ñaupaníchu cawashanpaj, cushicushanpaj, imatapis íchipushanpaj. * ^{3:11} Apocalipsis 2.10-ta ricanquiman.

shungulla ́chasquicamajcunata ricaytapis mana munallächu. Chaypitam jamcunata millanäcü. ¹⁷ Puchuy-puchuy janančhu cawashallayquiman yupachicunqui. Rasunpa cuyapaypaj carcaycanqui. Waccha canqui. Pishipacuj. Japra. Jalapačha. ¹⁸ Rasunpa puchuy-puchuy janančhu cawayta munar, shimita llapan shunguyquiwan ́chasquicunquiman. Shimiga juriwan tincun. Nuwapita rantishayqui juriga ninačhu chulluchish caycan. Jalapačha puriya mana munarpis, shungü munashannuylla cawanquiman. Shungü munashanta ruraya yuraj müdanawan tincun. Chaymi yuraj müdanash purir, mana pingacullar cawanquipaj. Japra cayta mana munarpis, shungü yarpashanta tantiyacunquiman. Shungü yarpashanga ñawi jampiwan tincun. Ñawiqui jumpish captin, shungü yarpashantapis tantiyacunquipaj. ¹⁹ Shungüman tincujcunatam alli cawananta munar, piñacü. Llaquipashpä willapä. Chaymi llapan shunguyquiwan Tayta Diosninchita wiycäriy. Jucha aparicushayquipita wanacäriy. ²⁰ Sumaj tantiyacunquiman. Puncupita jayacuj-jina jamcunata jayacaj. Jayashäta wiyar ́chasquicamaptiqui, yaycurir yanagäshayqui. Micur upur juyäshun. ²¹ Juchacuya munapächishanta ičhipucunata mandäshimänanpaj lädüman jamachishaj. Nuwatapis shiminta wiyacur juchacuya ičhipushäpita Papäni mandäshinäpaj lädunman jamachimasha.

²² «<Rinriyuj irmänucuna mayčhu juturarpis, Espíritu Santupa shiminta wiyacuman.» »

4

Janaj pachačhu Tayta Diosninchita manchapacushan

¹ Chaypita ricapacuynilläčhu ricäripti, janaj pachačhu puncu quičharaycamuran. Yapay curniňta suynamuj-niraj rimaramujta wiyarä. Nimaran: «Cayman jigamuy. Canan ima-ima canancunatapis ricachishayqui.» ² Niycaptillan, Espíritu Santu aptacarcaramaran. Janaj pachačhüna mayur mandajpa jamananta ricachimaran. Juc jamaraycaran. ³ Jamarajga chillap-chillapyaycaran. Achic-achicyaycaj turmanya tumaparaycaran.* ⁴ Ishcay čunca čhuscuwan (24) jamanacunapis mandajpa jamananta tumaparaycaran. Jamanancunačhu ishcay čunca čhuscuwan (24) mayurcuna yuraj müdanash, juri curünash jamarpaycaran. ⁵ Mayur mandajpa jamananpita illagu achicyaypacchicyämuran. Rimamujcunapis wiycächimuran. Räyupis bunruuypa-bunrurur pash-tamuran. Ņaupančhu jančhis lamparincuna rataycaran. Achquicunaga Espíritu Santuwan tincun.* ⁶ Mandajpa ūaupančhu jatun yacu püsü-niraj caycaran. Ichanga chip-chipyaycaj chuya yacu ricacaran.

Čhuscu cawajcunapis intiřu janančhu ūawiyuj-camalla mandajta tumaparaycaran. ⁷ Cawajcuna juc-niraj-juc-niraj caran. Juc caran liyun-niraj, jucna türu-niraj, jucna runa-niraj, jucna päriycajanca-niraj. ⁸ Čhuscun cawajcuna sujta cäpayuj-caman, ūawincunapis intiřu janančhu caran. Pagas-junajpis mana jamallar Tayta Diosninchita manchapacushpan cantarcaycaran:

«Tayta Diosnillanchi juchaynaj caycan.

Alli cawayninman pipis mana tincunchu.

Paynuya mana canchu, mana canchu, mana canchu.

Paylla llapanpaj munayniyuj.

Imaypis cawacuj.

Mana ushyacaj.

Cutiycämuj.»

* ^{4:3} Waquin runacuna rumi ima-niraj-ima-niraj cashantapis sumaj ricsin. Chaymi rumipa culurninpita jutinta čurapan. * ^{4:5} Apocalipsis 1.4-ta ricanquiman.

⁹ Jamanańchu jamaraycaj mandajta: «Imaypis mana ushyacanquipächu» nir cawa-jcuna cantaycaptin, alliman ́churaptin, cushicuptin, ¹⁰ ishcay ́chunca ́chuscuwan (24) mayurcunapis jungurpaycur alliman ́churarcaycaran. Maquińchu cawashanta musy-achir curünanta pampaman ́churaycur, cantarcaycaran:

¹¹ «Taytallau Tayta,
Llapan runa manchapacuyulläshunqui.
Llapan runa allillaman ́churayculläshunqui.
Munayniuj cashayquipita alli ñawinwan ricayculläshunqui.
Llap-llapanta camashcanqui.
Ima-aycacunapis munaptiquiraj, ricarisha.
Jamllapita imapis cawan» nir.

5

Pitush papilta Washäcuj Jesús quíchashan

¹ Chaypita jamanańchu jamarajpa diricha-caj maquińchu pitush papilta aptaraycajta ricarä. Papiĺchu jananpa rurinpa isquirbiraycaran. Ichanga pipis mana quíchananpaj jańchis pachapa sırawan lagaraycaran. ² Mayur anjiltapis ricarä. Payga wiycächiyipa tapucuran: «¿Cay papilta pačhgananpaj mayganiquitaj munayniuj? ¿Quíchananpaj may-ganiquitaj camacan?» nir. ³ Papilta quíharcur liguinanpämi ichanga janaj pachačüpis, cay pachačüpis, pacha rurinchüpis pipis mana caranchu. ⁴ Papilta quíchananpaj pipis mana captin, juyupa llaquicur wagarä. ⁵ Chaura juc mayur runa nimaran: «Ama wagaynachu. Judápa willcanpita yurij liyun» mandaj Davidpa allicaj willcan llapanta ičhipusha. Paymi munayniuj jańchis sırata quipsarcur papilta quíchananpaj.»

⁶ Ricaycashä́chu manta Uyshata pishtar ushyash caycajta ricarä.* Chaypis mandajpa jamananpa ñaupallańchu, ́chuscu cawajcunapa ́chaupińchu, ishcay ́chunca ́chuscuwan (24) mayurcunapa ́chaupińchu cawaycar ičhiraycaran. Uyshapa wajrancunapis, ñawinpis jańchis caran. Jańchis ñawi Espíritu Santuwan tincun. Tayta Diosninchita Espíritu Santuta cay pachaman cačhamuran llapan runata ricananpaj. ⁷ Uyshana mandajpa jamananman aywarcur, jamaraycajpa maquinpita pitush papilta ́chasquiran. ⁸ Papilta ́chasquircuptin, Uyshapa ñaupanman ́chuscu cawajcunapis, ishcay ́chunca ́chuscuwan mayur-cunapis jungurpacuycuran. Llapanmi arpanwan-caman caran. Juri cüpacunawan insinsutapis aparan. Insinsuga Tayta Diosninchita wiycaucjuna mañacushanwan tincun.

⁹ Pitush papilta ́chasquiptin, mayurcunapis, cawajcunapis Uyshata alliman ́churaycur mushuj alabansata cantaycaran:

«Taytallau Tayta, munayniujmi canqui pitush papilta ́chasquinayquipaj,
sırata quipsarinayquipaj.

Uyshata pishtashan-jina pishtashcashunqui llapan runata rantiypa-yupay jishpichi-nayquipaj.

Tayta Diosninchipa maquińchu cawananpaj yawarniquiwan runacunata jishpichish-canqui.

Paycuna ima casta captinpis, ima rimayta rimaptinpis, may marcapita captinpis, may runa captinpis, llapantam llaquipanqui.

¹⁰ Tayta Diosninchipa mandunta rurananpaj camacächishcanqui.

Llapan runata marcantinta maquińchu purichinanpaj mandaj cayman ́churashcanqui.

Runa-masinta mañacapunanpaj cüra cayman ́churashcanqui.»

¹¹⁻¹² Chaypita ricäripti, may-may anjilcunatapis wiyarä. Yupaysi mana atipaypaj caran. Paycuna intíru janańchu ñawiyuj cawajcunawanpis, ishcay ́chunca ́chuscuwan

* ^{5:6} Apocalipsis librućhu: «Uysha» nir runacuna yarpaj Jesucristupaj. Payga runacunata washänan-raycur wañuyman ́chayasha. Uyshata pishtashan-jina caway-bidanta Tayta Diosninchita jarasha.

mayurcunawanpis, jamanančhu jamaraycaj mandajta tumaparaycasha. Llap-llapanmi juc shimilla mañacurcaycaran. Alliman čhurarcaycaran:

«Uyshata alli ñawinwan llap-llapan ricanman.

Runacunata washänan-raycur pishtaypa wañuyman čhayashanpita alli ñawinwan ricanman.

Paymi munayniuj.

Llapan ima-aycapis maquinčhu caycan.

Yarpayniuj.

Camacächij.

Llapan alli ricanman.

Llapan alliman čhuranman.

Llapan allíchu jurgunman» nir.

¹³ Chaypita juc alabansata wiyarä. Janaj pachačhu cawajcunapis, cay pachačhu cawa-jcunapis, pacha rurinčhu cawajcunapis, yacucunačhu cawajcunapis cantarcaycaran. Llap-llapanmi jamanančhu jamarajtapis, Uyshatapis juc shimilla niycaran:

«Taytallau Tayta, Uyshallau Uysha,

Imay-imaypis allíchu jurgush caycullächun.

Alliman čhuraycullächun.

Alli ricash caycullächun.

Munayniuj caycullächun.»

¹⁴ Chaura: «Chaynuy caycullächun» nir čhuscu cawajcuna auniptin, ishcay čhunca čhuscuwan mayurcunapis manchapacushpan jungurpacaycäriran.

6

Pitush papilpa jarachanta quipsashan

¹ Chaypita ricäripti, Uysha juc sırata quipsariran papilta liguinapaj. Quipsariptin, čhuscu cawajcunapita ráyu pashtamuj-jinaraj jucnillan wiycächiypa jayacuran: «Llucshimunya» nir. ² Chaura juc murucu yuraj cawallun muntash, tucsicunan aptash llucshiramuran. Curünata čhasquicurcur, yapay aywaran llapanta magaj maquinčhu purichinanpaj.

³ Papilpa ishcay-caj lagarashan sırata Uysha quipsariptin, juc cawajna jayacuran: «Llucshimunya» nir. ⁴ Chaura juc murucu yawar-puca cawallun muntash llucshiramuran. Chay murucuta jatun machütinta aptaparcur, cay pachaman cačhamuran: «Runacunata chiquinacachiy. Wañuchinacachiy» nir.

⁵ Papilpa quimsa-caj lagarashan sırata Uysha quipsariptin, juc cawajna jayacuran: «Llucshimunya» nir. Chaura ricäripti, juc murucu yana cawallun muntash, balansan aptash llucshiramuran. ⁶ Čhuscu cawajcunapa čhaupinpita jucna rimaramuran: «Mučhuy cachun. Runa cawananpaj quïlu rígullapaj juc junaj aruchun. Quimsa quïlu sibädallapaj juc jurnal aruchun. Ichanga wiratapis, bïnutapis ama ushyacächichunchu» nir.

⁷ Papilpa čhuscu-caj lagarashan sırata Uysha quipsariptin, juc cawajna jayacuran: «Llucshimunya» nir. ⁸ Chaura ricäripti, ugui cawallu llucshiramuran. Muntarajpa jutin caran: «Wañuy.» Runacunata wañuchir, chacaj pachaman čhayachiran. Muntarajga llucshiran pullanta-yupay runacunata wañuchinanpaj. Marca-pura wañuchinacuywan, mučhuywan, timpurij jishyawan, micucuj uywacunawan wañuchiran.

⁹ Papilpa pichga-caj lagarashan sırata Uysha quipsariptin, Tayta Diosninchipa was-inčhu alli shungu runacunapa almancunata ricarä. Paycunata Tayta Diosninchipa shiminta willapäcushanpitash, wiycushanpitash runacuna wañuchish caran. Almancunaga Tayta Diosninchipa jaracunan tulpa puncunčhu caycaran. ¹⁰ Paycuna wiycächiypa Tayta Diosninchita jayacuran: «Taytallau Tayta, munayniujmi canqui.

Juchaynaj cashpayqui allillata ruranqui. Shimiquita llapanta ćharcunqui. Juchallačhu arujcunata, ¿imayraj juchanta jurgapunquipaj? Wañuchimashanpita, ¿imayraj ñacachinquipaj?» nir. ¹¹ Tayta Diosninchina niran: «Shuyacyuraj. Wañuchishushayquijina waquin irmänucunatapis wañurachinga. Paycunata shungü munashanta ruraptin: «Chaycamalla» nishäcaman wañurachinga.» Chaynuy nir yuraj müdanata ushtuparan: «Ima juchayquipis mana canchu» nir.

¹² Jinalla ricapacuynilläčhu ricapacuycarä. Papilpa sujta-caj lagarashan sîrata Uysha quipsariptinna, pacha juyupa sicsicyacurcuran. Inti yana chicruman, yana jacu-nirajman ticracuriran. Quillapis yawar pucaman ticracuriran. ¹³ Shucucuy wayra rütata shicwachishan-jina istrillacunatapis shucucuy wayra cay pachaman shicwachimuran. ¹⁴ Janaj pachapis lluylluypa-llyullucäcuran. Puntacunapis, yacu ćhaupinčhu islacunapis wacpa-cayman witcuriran. ¹⁵ Chaura maćhaycunamanpis, chaga ćhaquincunamanpis llapan runa pacacuran. Mandajcunapis, auturdäcunapis, capitancunapis, puchuy-puchuy janančhu cawajcunapis, munayniyujcunapis, piyuncunapis, pampa runacunapis llapanmi pacacuran. ¹⁶ Puntacunatawan chagacunata jayacuran: «Pacaycallämäy, ari. Tayta Diosninchitapis, Washäcuj Uyshatapis manchacü. Juyupa ullgucarcärisha. ¹⁷ Ullgucäcushan junaj ćhayamushana. Ñacachimaptinchi, ¿piraj ićhipunga?» nir.

7

Wawancunata Tayta Diosninchichäpacishan

¹⁻² Chaypita ćhuscu anjilta ricarä. Anjilcuna cay pachapa ćhuscun cantunčhu jucaman ićhirpaycaran. Maquinčhu cay pachapis, yacucunapis caycaran. Ñacachinanpäpis munayniyuj caran. Wayratapis chaparaycaran. Chaymi pachatapis, yacucunatapis, yüracunatapis wayra mana pücaranchu. Chaura juc anjilna inti jigamunanpita llucshiramuran. Maquinčhu cawaj Tayta Diosninchipa chäpacunanta aptaraycaran. Ñacachicuj anjilcunatana wiycächiyipa jayacuran: ³ «Shuyacyuraj. Tayta Diosninchipa wawancunataraj urcunčhu-caman chäpashaj. Chaypitaraç cay pachatapis, yacucunatapis, yüracunatapis ñacachinqui.» ⁴ Chaypita wiyarä: «Paćhac ćhuscu ćhunca ćhuscuwan waranga (144,000) Israel runacunallata chäpanqui» nimulta.

⁵ Judá castacuna ćhunca ishcaywan waranga (12,000) chäpacuran.

Rubén castacuna ćhunca ishcaywan waranga (12,000) chäpacuran.

Gad castacuna ćhunca ishcaywan waranga (12,000) chäpacuran.

⁶ Aser castacuna ćhunca ishcaywan waranga (12,000) chäpacuran.

Neftalí castacuna ćhunca ishcaywan waranga (12,000) chäpacuran.

Manasés castacuna ćhunca ishcaywan waranga (12,000) chäpacuran.

⁷ Simeón castacuna ćhunca ishcaywan waranga (12,000) chäpacuran.

Leví castacuna ćhunca ishcaywan waranga (12,000) chäpacuran.

Isacar castacuna ćhunca ishcaywan waranga (12,000) chäpacuran.

⁸ Zabulón castacuna ćhunca ishcaywan waranga (12,000) chäpacuran.

José castacuna ćhunca ishcaywan waranga (12,000) chäpacuran.

Benjamín castacuna ćhunca ishcaywan waranga (12,000) chäpacuran.

⁹ Chaypita yupaysi mana atipaypaj runacunata ricarä. Chay-tucuy marcacunapita, tucuy casta runacuna, tucuy-niraj rimajcuna juturpaycaran. Tayta Diosninchipa ñaupančhu, Uyshapa ñaupančhu yuraj müdanash, palman aptash ićhirpaycaran. ¹⁰ Juc shimilla wiycächiyipa jayacuycaran:

«Tayta Diosninchichäpacishan munayniyuj.

Mandajpa jamanančhu jamaraycan.

Paymi jishpichimajninchichäpacishan.

Uyshapis washämajninchichäpacishan.»

¹¹ Mandaj Tayta Diosninchipa jamananta llapan anjilcunapis, ishcay ćhuncuwan (24) mayur runacunapis, intiru janančhu ñawiyuj ćhuscu cawajcunapis tumaparaycaran. Llapanmi Tayta Diosninchita manchapacur, jungurpacuycur niran:

¹² «Chaynuy caycullächun.

Tayta Diosninchita imay-imaypis llapan manchapacunman.

Llapan alliman ćhuranman.

Payga yarpayniyuj.

Llaquipäcuj cashanpita llapan cushicunman.

Llapan alli ricanman.

Payga munayniyuj.

Camacächij.

Chaynuy caycullächun.»

¹³ Chaypita juc mayur runa tapumaran: «Yuraj müdanashcuna, ¿picunataj? ¿Maypitataj shamusha?» nir.

¹⁴ Tapumaptin, nirä: «Quiiqui musyanqui, tayta.»

Payna nimaran:

«Paycuna juyupa ñacayta ičhipur, ćhayamusha.

Washäcuj Uysha wañuyninpa, yawarninta jarayninpa Tayta Diosninchchi llapan juchan-tapis jungaycusha.

Cananga ima juchanpis mana canchu.

Chaypita yuraj müdananta ushtucusha.

¹⁵ Paycuna Tayta Diosninchipa ñaupančhu juturpaycan.

Pagas-junajpis wasinčhu manchapacurcaycan.

Tayta Diosninchipis ćhaupinčhu juyar, maquillančhu cawachinga.

Imaypis mana cačharingachu.

¹⁶ Paycuna mana imaypis yarganganachu.

Imaypis mana yacunanganachu.

Intipis mana rupanganachu.

Acaypis mana wapunganachu.

¹⁷ Tayta Diosninchipa maquinčhu cawar, mana llaquicunganachu.

Washäcuj Uyshapis Tayta Diosninchipa ñaupallančhu caycar, waran-warana paycunata ricanga.

Uyshiru-jina sumaj ricanga.

Pashtaj yacuman pushanga.

Cawachicuj yacuta upuchinga.

Llaquishpan Tayta Diosninchchi wiguincunatapis pichanga.»

8

¹ Papilpa jančhis-caj lagarashan sırata Uysha quipsariptinna, janaj pachačhu juc ćhajčhanuy imapis mana wagacuranchu. Llap-llapallan upällacäcuran. ² Chaypita Tayta Diosninchipa ñaupančhu jančhis anjil ičhirpaycajta ricarä. Llapan anjil curnütata ćhasquiran. ³ Juc anjilna juripita tacsha mancata apamuran Tayta Diosninchipa ñaupančhu juri tullpačhu insinsuwan saumachinanpaj. Juri mancanman achca insinsuta wiñaran Tayta Diosninchita jarananpäpis, irmänucuna mañacushanta ćhayachinanpäpis. ⁴ Anjil jaraptin, insinsupa jushtayninpis, irmänucuna mañacushanpis Tayta Diosninchiman ćhayaran. ⁵ Chaypita tullpapita tacsha mancaman anjil shanshata wiñaran. Jinarcur pachaman jitarpaycamuran. Mancata shanshantinta cay pachaman jitarpaycamuptin, räyupis bunruruylla pashtamuran. Rimamujcunapis wiycächimuran. Illagupis achicyaypa achicyaran. Pachapis juyupa sicsicyaran.

Anjilcuna curnütata tucamushan

⁶ Jinarcur jančhis anjilcuna camaricuran curnítanta tucamunanpaj. ⁷ Juc anjil curnítata tucaramuptin, yawarwan tallush tamyamuran ninapis, runtu tamyapis. Cay pachačhu yüratapis, jiwatapis jircantinta pullanta-yupay rupariran.

⁸ Juc anjilna curnítata tucaramuptin, jatun-caray puntata ratataycaja jatun lamar yacuman tunirachimuran. Chaymi yacu pullan-yupay yawarman ticraceriran.

⁹ Yacucunačhu tiyajcunapis pullan-yupay wañuran. Büticunapis pullan-yupay ushy-acaran.

¹⁰ Juc anjilna curnítata tucaramuptin, janaj pachapita jatun-caray ratataycaj istrilla shicwamuran pullan-yupay mayucunaman, pullan-yupay yacupa ñawincunaman.

¹¹ Istrillapa jutin caran Asgaj. Chaymi yacu pullan-yupay asgacäcuran. Asgaj yacuta upur, achcaj runa wañuran.

¹² Juc anjilna curnítata tucaramuptin, intitapis, quillatapis, istrillacunatapis jishya chariran. Jishya chariptin, pullan-yupay chacacäcuran. Pagas-junajpis inti, quilla, istrillacuna yangallana achicyaran.

¹³ Jinalla ricapacuyničhu ricapacuycarä. Chaypitaanca päriycaja ricarä. Janajpita japariypa nimuran: «Wawallau wawita. Waquin anjilcunapis curnítata tucaramuptin, runacuna llaquipaypaj ñacanga. Quimsa anjilraj pishiycan curnítata tucaramunanpaj.»

9

¹ Juc anjilna curnítata tucaramuptin, juc istrilla cay pachaman shicwamujta ri-carä. Chay istrilla shapshicucuna wičgarashan chacaj pachapa lläbinta čhasquiran.

² Chaura chacaj pachapa puncunta quičhariptin, jatun jurnupita jushtay llucshimuj-jinaraj yana jushtay ičhicarcamuran. Jushtay ičhicurcuptin, intipis mana achicyaran-nachu. Chacaräcuran. Wayrapis mana wayraranchu. ³ Jushtaypitana chuclus-cuna llucshimuran. Chay-tucuyman shillaran. Alacran canicushan-jina runacunata canicur, juyupa ñacachiran. ⁴ Chaypis chucluscunata Tayta Diosninchi niran: «Wawäcunata ama ñacachinquichu. Paycunapa urcun chäpacush caycan. Jiwacunat-apis, jačhacunatapis, yüracunatapis ama ushyanquichu. ⁵ Mana chäpacush runacunatam ichanga ñacaylla ñacachinqui. Pichga quillantin ñacachir, pitapis ama wañuchinquichu.» Alacran canicushan-jina chucluscuna canicushan juyupa nanaran.

⁶ Chay wíchan juyupa ñacar wañuya ashirsi, runacuna mana wañungachu. Wañucuriyta munarpis, wañuya mana taringachu. ⁷ Cawallu maganacuyman aywaj-niraj chucluscuna caycaran. Umančhu juri curüna-niraj jatiraycaran. Jajllan runapa jajllan-niraj caran. ⁸ Ajchanna warmipa ajchan-niraj caran. Quirunpis liyunpa quirun-niraj caran. ⁹ Intíru jasgunta chaparashan lätalla caran. Päriptin, may-may cawallu pututuylla aywaycaj-jina cäpancuna sir-siryaran.* ¹⁰ Čhupanna alacranpa-jina casha punta caran. Canicur, pichga quillantin runacunata ñacachiran. ¹¹ Chucluscuna chacaj pachačhu mandaj juyu anjilpa maquinčhu puriran. Chacaj pachačhu juyaj mandaj anjilta hebreo rimayčhu: «Abadón» nin. Griego rimayčhüna wañuchicuj captin: «Apolión» nin.

¹² Caycaman punta-caj ñacay čhayamun. Punta-caj ñacay čhawaptinsi, ishcayraj čhayamunga.

¹³ Juc anjilna curnítata tucaramuptin, Tayta Diosninchipa ñaupančhu juri tullpapa čhuscun isquinanpita rimaramuran. Curnítata tucaj anjilta nimuran: ¹⁴ «Jatun mayu Éufrates cantunčhu wataraj čhuscu juyu anjilta pascamuy» nir. ¹⁵ Pascaramuptin, čhuscu juyu anjil llucshimuran murucucunawan pullanta-yupay runacunata wañuchinapaj.

* ^{9:9} Griego rimayčhu: «cäru de guīrapita» ríman. Chay wíchan cawallu ishcay llantayuj cäruta jančhaj. Wañuchinacuyčhu murucucuna cäručhu aywaj.

Unaypita-pacha chay watapaj, chay quillapaj, chay junajpaj, chay ürapaj Tayta Diosnинchi camacächish caran. ¹⁶ Cawallun muntash murucucuna yupaysi mana atipaypaj caran. Chay-chicaj cashanta wiyarä.*

¹⁷ Ricaptü, murucucunapa jasgunta chaparaj läta yawar puca, chacaj asul, asujri-niraj jarwash caran. Cawallupa uman liyunpa uman-niraj caran. Shiminpita llucshimuran jushtay, asujri, nina. ¹⁸ Cawallupa shiminpita llucshimuj jushtaypis, asujripis, ninapis pullanta-yupay runacunata wañurachiran. ¹⁹ Cawalluga shiminwanpis, čhupanwanpis runacunata wañuchiran. Čhupancuna canicuj curu-niraj caran. Canicur, runacunata juyupa ñacachiran. ²⁰ Chaypis wañuypita jishpij runacuna jinallaraj juchata aparicuran. Juchanpita mana wanacuranchu. Supaycunatapis, jircacunatapis taytachacuran. Manchapacunapaj jircaman ricchacujcunata maquinwan rurash caran juripita, jillaypita, brunsipita, rumipita, jirupita. Rurashanga mana ricanpishchu. Mana wiyanpishchu. Mana purinpishchu. ²¹ Chay runacuna jinalla wañuchicuycaran. Runapis, warmipis jucwan-jucwan cacuycaran. Suwacuycaran. Imapitapis mana wanacuranchu.

10

Unay willacujcuna rimashan čharcucashan

¹ Chaypita janaj pachapita munayniyuj anjil pucutay rurinčhu yarpuycämujta ricarä. Umanta turmanya wačhcaraycaran. Jajllan inti-jina achic-achicyaycaran. Čhancan nina-jina warau-warauyaycaran. ² Tacshalla pitush papilta aptaraycaran. Ichanga quičharaycaran. Diricha-caj čhaquin jatun lamar yacuman lluchcaraycaran. Isquirdacaj čhaquinna allpaman lluchcaraycaran. ³ Nircur liyun japarashan-jina jayacuran. Jayacuriptin, janaj pachapita jančhis räyu pashtaramuran.

⁴ Jančhis räyu pashtamushanta apuntanäpaj caycaptü, janaj pachapita wiycächiypa nimuran: «Räyu pashtamushanta pitapis ama willapanquichu. Rimamushantaga ama apuntanquichu.» ⁵⁻⁶ Chaura aunishpan lamar yacuman, allpaman lluchcaraj anjil maquinta janaj pachaman jugarcur niran: «Yarpashancunata Tayta Diosninch camacächinga. Payga imaycamanpis cawacuj. Llap-llapanta camasha. Janaj pachata llapantinta camaran. Cay pachatapis llapantinta camaran. Yacucunatapis llapantinta camaran. Shiminta čharcungana. Juc junajpaj mana jitapunganachu. ⁷ Chaymi juc anjil curnütata tucaramuptin, shungun yarpashan čharcucash canga. Unaypita-pacha shungunčhu pacarächishan yarpashanta willacujnincunawan musyachicuran.»

⁸ Janaj pachapita rimamujga yapay nimaran: «Lamar yacuman, allpaman lluchcaraj anjilman ayway. Aptarashan quičhash papilta mañacamuy.» ⁹ Nimartin, anjilman aywarä: «Tacsha papilta juycallämay, ari» nir. Anjilna nimaran: «Catay. Micuy. Micuptiqui, sumaj mishquinga. Pačhayquitam ichanga juyupa asgächinga.» ¹⁰ Chaura tacshalla papilta čhasquircur, änir micucurcurä. Micuptü, änir sumaj mishquiran. Pačhätam ichanga juyupa asgächiran. ¹¹ Jinarcur nimaran: «Tayta Diosninch camacächiptin, imapis cananta yapay musyachicuy. Runacuna may marcačhu tiyaptinpis, ima casta captinpis, ima rimayta rimaptinpis, jatun mandaj captinpis llapantam musyachinquiman.»

11

Ishcaj willacujcuna

¹ Jinarcur bärata juycamar, Tayta Diosninch nimaran: «Jerusalén marcačhu wasíta tullpantinta tupunqui. Manchapacamajcunatapis yupanqui. ² Sawantam ichanga ama tupunquichu. Sawantaga mana manchapacamaj runacunapa maquinman

* ^{9:16} May-may murucucuna 200,000,000 caran.

Churashcä. Marcä caycaptinsi, paycuna quimsa wata pullan Jerusalén marcata pampa-man churanga. ³ Chay wichan ishcaj willacujnita cačhamushaj quimsa wata pullan shimita willapäcunapaj. Wañupacush-yupay jačhga müdanash puringa.»

⁴ Cay pacha Tayta Diosninchipa maquinčhu caycan. Paypa ñaupallančhu caycar, ishcaj willacujcuna tincun ishcay ulibus yürawan, ishcay lamparinwan. ⁵ Pipis ñacachiyta munaptin, willacujcunapa shiminpitá llucshimuj nina ushyacächinga. Ñacachicujcunata rupaypa illarachingapaj. ⁶ Tayta Diosninchchi camacächiptin, willacujcuna munayniyuj cashpan tamyatapis mana tamyachimungachu. Yacutapis yawarman ticrarachinga. Munar, tucuy-niraj timpurij jishyawan runacunata ñacachinga.

⁷ Tayta Diosninchipa shiminta willapäcuya ushyarcuptinmi ichanga, chacaj pachapita llucshimuj waräcuy maganga. Ičhipunga. Wañurachinga. ⁸ Willacujcunapa ayanpis llapan ricay Jerusalén marca cällíchu jitarranga. Chay marcallačhu Taytanchi Jesústapis rusčhu wañuchiran. Jerusalén runacuna juyu. Sodoma marca runacunawan, Egipto marca runacunawan tincun. ⁹ Quimsa junaj pullannin ayan jitaraycaptin, chay-tucuy marcapita, tucuy casta runacuna, tucuy-niraj rimajcuna ricäcunga. Pampanantapis mičhanga. ¹⁰ Tayta Diosninchipa shiminta willacushpan willacujcuna llapan runata juyupa ñacachish caran. Chaymi wañuchish captin, llapan runa cushicunga. «Ima allish wañuya tarisha» nir, cuyachicuynincunatapis jarancunga.

¹¹ Quimsa junaj pullannintam ichanga Tayta Diosninchchi cawarachimuptin, willacujnincuna jataricurcuran. Chayraj ricäcujcuna juyupa manchariran. ¹² Janaj pachapitana juc jayacamuran: «Shamuy» nir. Jayacamuptin llapan chiqui runacuna ricapaycaptin, ishcaj willacujnincuna pucutay jananpa jigacuran. ¹³ Jigacuptin, cay pacha juyupa sicsicyaran. Jerusalén marcačhu chay-chica wasipis jučhuran.* Runacunapis jančhis waranga (7,000) wañuran. Wañuypita jishpijcunam ichanga juyupa manchariran. Janaj pachaman jayacuran: «Taytallau Tayta, alli ricash caycullay» nir. ¹⁴ Caycaj ñacay čhawarcuptinsi, quimsa-caj čhayamunan pishinraj.

¹⁵ Juc anjilna curnitata tucaramuptin, janaj pachačhu wiycächiypa nimuran: «Cushiculläshun.

Cay pacha Tayta Diosninchipa maquinčhünam.

Cačhamushan Washäcuj Jesúspa maquinčhünam.

Imaycamanpis maquinčhümi Tayta Diosninchchi purichimäshun» nir.

¹⁶ Ishcay čunca čhuscuwan (24) mayurcunapis Tayta Diosninchipa ñaupančhu jamarashanpita sumaj manchapacushpan jungurpacaycäriran. Cushicuywan niran:

¹⁷ «Taytallau Tayta, llapanpaj munayniyujmi canqui.

Imay-imaypis cawajmi canqui.

Imaypis mana ushyacanquichu.

Ima allish llap-llapanta maquiquiman shuntashcanqui.

Sumaj munayniyuj cashpayqui maquiquichünam llapallanta purichinqui.

Chaypitam jatunpa cusicärillä.

¹⁸ May-chayčüpis mana wiycuj runacuna ullgucäcusha.

Cananmi ichanga quiquipi ullgucuyccushcanqui.

Llapan wañushcunatapis juchanta jurgapanquipaj.

Shimiquita willacujcunatam ichanga alli cawayta tarichinquipaj.

Shunguyqui munashanta rurashanpita, shimiquita wiycushanpita manchapacujcunatapis alli cawayta tarichinquipaj.

Paycunata alli ricash captinsi, mana alli ricash captinsi, llapantam alli cawayta tarichinquipaj.

Ñacachicujcunatam ichanga, wañuchicujcunatam ichanga, wañuchir illarachinquipaj.»

* ^{11:13} Griego rimayčhu: «Čhuncapita jucta-caman wasicuna jučhucäcuran» nin.

¹⁹ Chaura janaj pacháchu Tayta Diosninchipa wasi puncun quíchacäcuran. Babulta ricar, runacunawan Tayta Diosninchí parlanacushanta yarparä. Ricaycaptí, illagu achicyaypa-achicyämuran. Rimamujcunapis wiycächimuran. Räyupis bunruruylla pashtamuran. Cay pachapis sicsicyacurcuran. Runtu tamyapis juyupa tamyamuran.

12

Warmipita, pugush curupita rimashan

¹ Chaypita janaj pacháchu juc warmi ricacamuran. Tantiyayta mana atipaypaj caran. Warmita inti tumaparaycaran. Čaquinpis quillaman lluchcaraycaran. Umančhu čunca ishcaywan (12) istríllayuj curünata ushturaycaran. ² Warmi jishyanaycaran. Nanaywan jishyacuya manchacur japaraycaran. ³ Janaj pacháchu jucpis ricacamusha. Jatun-caray pugush puca curu caran. Uman jančhis caran; wajranna čunca. Llapan umančhu-caman curünata ushturaycaran. ⁴ Čupanwan shuntarcur, janaj pachapita pullanta-yupay istríllacunata wicaparamuran. Pugush curu jishyanaycaj warmipa ñaupančhu juturaycaran yuririptillan, wamranta micucircunanpaj. ⁵ Warmina ullguta jishyacuran. Payga llapan marcata maquillančhu purichinanpaj sumaj munayniyu cashpan yuriran. Jiru garutinwan mana wiycucunata ñacachinga. Pugush curupita anjil jishpicirmi ichanga, mallwata apacuran Tayta Diosninchipa ñaupanman payta mandäshinanpaj. ⁶ Mamanpis Tayta Diosninchí camacächishan chunyajman jishpicuran. Chayčhu quimsa wata pullan tarichish caran.

⁷ Chaypita janaj pacháchu maganacuy jallaycuran. Anjil-masincunata shuntacuycur, mandaj anjil Miguel pugush curuta magaran. Pugush curupis shapshicu-masincunawan ičhipuya munaran. ⁸ Chaypis pugush curuga Miguelta mana ičhipuranchu. Chaymi janaj pacháchu mana ricayta munar, ⁹ pugush curuta shapshicu-masintinta jargaramuran. Pugush curu llapan runata juchaman jančhan. Chay curuta Supay captin, ricsin: «Satanás» nir. Pantachicuj Supayta shapshicu-masintinta cay pachaman jargaramuran.

¹⁰ Chaura janaj pachapita wiycächiypa nimuran:

«Cushiculläshun,

Wawancunata Tayta Diosninchí washashana.

Munayniyu cashanta musyachicushana.

Maquinčhüna llap-llapanta charaycan.

Cay pachatapis marcantinta maquinčhu Washäcu Jesús puriycächin.

Irmänunchicunata Supay mana tumpanganachu.

Pagas-junajpis Tayta Diosninchiman mana čhayapunganachu.

Janaj pachapita Supayta jargaramushana.

¹¹ Tayta Diosninchipa wawancuna Supayta ičhipusha.

Wawancuna washänan-raycur Uysha yawarninta jičhar, caway-bidanta Tayta Diosninchita jarayninpa ičhipusha.

Tayta Diosninchipa shiminta wiycushpan willapäcurpis, ičhipusha.

Wawancuna wañuytapis mana manchacuranchu.

Wañuy janančhu caycaptinsi, Tayta Diosninchiman yupachicuran.

¹² Chaymi janaj pachačhüpis llap-lapan cushicärinman.

Llapan anjilcuna jatunpa cushicärinman.

Cay pachačhumi ichanga llap-lapan llaquicärinman.

Yacucunačhu tiyajcunapis juyupa llaquicärinman.

Supay čhayapushcashunqui.

Ullgucurcusha.

Yupash junajlla cačhaylla purinanta musyan.»

¹³ Chaura cay pachaman jargaramuptin, pugush curu ullgu wamrapa mamanta jaticačharan. ¹⁴ Warmitam ichanga Tayta Diosninchi jatun ancapa cäpanta camaripurán chunyaj pachaman jishpicunapaj. Chaychüna warmita quimsa wata pullan sumaj ricaran. Micunanpäpis llapanta camaripurán. Curupitapis washaran. ¹⁵ Pugush curuna chay-chica yacuta mujchipamuran čhayash mayuwan-jina warmita apachinanpaj. ¹⁶ Allpam ichanga warmita cuyapar, pugush curu mujchishan yacuta shugucurcuran. Chaynuypa warmita yacu mana aparanchu. ¹⁷ Pugush curuna chigaypa ullgucurcuran. Warmipa waquin wawancunatana wañuchij aywaran. Warmipa wawancuna Tayta Diosninchipa shiminta wiyacujcunawanpis, Tayta Jesústa čhasquicujcunawanpis tincun. ¹⁸ Pugush curu jatun lamar yacu cantunchüna ičhicuycuran.

13

Waräcuyunapita rimashan

¹ Chaypita jatun lamar yacupita waräcuy llucshiycämujta ricarä. Waräcuy jančhis umayuj, čunca wajrayuj caran. Llapan wajrančhu curünata ushturaycaran. Umancunačhüna Tayta Diosninchita ashllir pampaman čhurar, ima rimaycunapis isquirbiraycaran.

² Waräcuy tigri-niraj caran. Ichanga čhaquincuna ucumäripa-niraj caran; shiminna liyunpa-niraj. Waräcuy imatapis rurananpaj pugush curu quiquin jamashanman jamachiran llapanta mandananpaj, munayniyuj cananpaj. ³ Waräcuypa juc umančhu wañuchicuj jiri caran. Allchacäcuptinmi ichanga, llapan runa manchapacur waräcuya taytachacuran. ⁴ Pugush curutapis, waräcuytapis alliman čhuraran: «Curullau curu, ima allish waräcuya yanapaycanqui. Waräcuyman pipis mana tincunchu. Pipis mana ičhipunmanchu» nir.

⁵ Waräcuy ima-imata rurananpäpis llapanta Tayta Diosninchita camacächiran. Quimsa wata pullan waräcuy ashlliptinsi, apäriptinsi, Tayta Diosninchita mana mičharanchu. Chay junajcuna shungun munashallanta waräcuy imatapis ruraran. ⁶ Tucuy-jinanpa Tayta Diosninchitapis ashlliran. Jutintapis wiyar, ashllir ushyaran. Janaj pacha wasinčhu tiyajcunatapis chiquiran. ⁷ Jesústa čhasquicujcunata wañuchir ushyananpäpis Tayta Diosninchita camacächiran. Chay-tucuyčhu tiyaj runacunatapis maquinman čhuraran may marcapita captinpis, ima casta captinpis, ima rimayta rimaptinpis. ⁸ Washäcuj Uyshapa acta librúnčhu jutin mana isquirbirajcuna waräcuya taytachacur manchapacunga. Paycunapa jutin unay-unaypita-pacha mana isquirbiraranchu.

⁹ Cananga rinriyujcuna sumaj wiyacunman:

¹⁰ «Pipis carsilman čhayanan captin, carsilman aywanga.

Tucsiypa wañunan captin, tucsiypa wañuya taringa.»

Chaymi pipis Tayta Diosninchipa maquinčhu cawar ima ñacayman čhayarsi, mana yamacanmanchu. Manchäga Tayta Diosnillanchiman sumaj yupachicunman.

¹¹ Chaypita juc waräcuy allpapita llucshiycämujta ricarä. Uyshapa-jina ishcay wajran caran. Ichanga pugush curu-jina rimaran. ¹² Waräcuyunaga ishcajmi llapan runacunata maquinčhu purichiran. Allpapita llucshimuj-cajga yacupita llucshimujta yanaparan. Allpapita llucshimuj waräcuya cay pachačhu tiyaj runacunata niran: «Wañuya mana munar, yacupita llucshimuj waräcuya manchapacuy.» Yacupita llucshimuj waräcuypaga uma jirin allchacash caran. ¹³ Allpapita llucshimuj waräcuy sumaj munayniyuj caran. Riguichir, imatapis ruraran. Janaj pachapitapis llapan runa ricay ninata tamyachimuran. ¹⁴ Yacupita llucshimuj waräcuy yanapaptin, tucuy-jinanpa runacunata riguichiran. Yacupita llucshimuj waräcuya machitunwan wañuchish caran. Chaypis cawarimush caran. Chaymi quiquin yacupita llucshimuj waräcuyman ricchacuja rurachiran llapan runa manchapacunapaj. ¹⁵ Waräcuyman ricchacujtaga cawarachiran. Munayniyuj ricacunapäpis, rimananpäpis camacächiran. Pipis mana

manchapacuptin, wañurachiran. ¹⁶ Runacunatapis llapanta chäpacachiran. Waquinta urcunchu, waquintana diricha-caj maquinchu chäpacachiran. Yačhaj runatapis, upa runatapis, puchuy-puchuy jananchu cawaj runatapis, pishipacuj runatapis, uywaycunatapis, patruncunatapis llap-llapanta chäpacachiran. ¹⁷ Chäpacünicuna ranticuytapis, rantipacuytapis mana camäpacuranchu. Chäpaga waräcuya jutinwan tincun. Ichanga nümirullačhu isquirbirasha.

¹⁸ Sumaj tantiyacushuwan. Chäpashan litracuna nümiruman ticran. Nümiruga sujta pačhac sujta čunca sujtawan (666) caycan. Chay nümiru runapa jutin. Maygan runapa jutin cashantapis yačhajcuna tantiyanga.

14

Uyshapita, chay-chicaj runapita rimashan

¹ Ricapacuynilläčhu juctana ricapacurä. Sión puntačhu Uysha ičhiraycajta ricarä. Tayta Diosninchipa jutinwan, Uyshapa jutinwan urcunchu chäpash runacunapis juturpaycaran. Paycuna pačhac čhuscu čunca čhuscuwan waranga (144,000) caran. ² Janaj pachapitana achca arpa chillinyajta-jina, čhayash mayu japarajta-jina, räyu pashtamujta-jina wiyarä. ³ Juturpaycajcuna Tayta Diosninchipa ñaupanchu, ishcay čunca čhuscuwan (24) mayurcunapa ñaupanchu cantarcaycaran. Cantashanga mushuj. Jesúspa shiminta čhasquicush cashpan paycunalla yačhacuran. Čhasquicucunallata cay pachapita jishpichish caran. ⁴⁻⁵ Paycunaga warmin-warmin mana puricuranchu. Warmitapis mana yataparanchu.* Llullacuytapis mana yačharanchu. Ima juchanpis mana caranchu. Manchäga Uyshapa maquillanchu cawaran. Pirwa-yupay, ñupa shuntay-yupay caran. Tayta Diosninchichi shuntasha maquinchu cawananpaj, Uyshapa maquinchu cawananpaj.

⁶ Chaypita janaj pachačhu juc anjil päriycajta ricarä. Jesúspa shiminta pii-maytapis wiycächiypa willaparan: «Shimringa mana imaypis jungacangachu» nir. May marcapita captinpis, ima casta captinpis, juc-niraj rimayta rimaptinpis, willaparan. ⁷ Runacunata wiycächiypa nir: «Tayta Diosninchita manchapacuy. Alliman čhuray. Payga llapan runapa shungunta musyapan. Shiminta wiycucunata janaj pachaman shuntacunga. Mana čhasquicucunata ichanga ñacayman jitarpunga. Tayta Diosninchichi janaj pachatapis, cay pachatapis, yacupa ñawincunatapis camaran. Camacujta manchapacuy.»

⁸ Jipanta shamuj anjilna cushish nir: «Babilonia marca ushyacäcushana. Chay runacuna jatun-tucursi, illaricäcushana. Marca-pingay cawar, Tayta Diosninchita ullgüchiran. Majanta jananpachij-jina chay-tucuyčhu runacunata shacyächiran Tayta Diosninchita apärinanpaj, jucha aparicuyllačhu arur, upyallar cawananpaj.»

⁹ Jipantapis juc anjilna wiycächiypa nir: «Quiquin waräcuytapis, waräcuyman ricchacujtapis manchapacucunata urcumansi, maquinmansi chäpacujcunata ¹⁰ mana cuyapällar Tayta Diosninchichi ullgüpanga.* Pitapis mačharcachir magaj-jina Tayta Diosninchipis ñacachinga. Anjilnincunapa ricay ñawinchu, Uyshapa ricay ñawinchu asujriyuj ninačhu ñacanga. ¹¹ Pagas-junajpis mana ushyacällar rupartin, waran-warau jushtay jataringa. Quiquin waräcuytapis, waräcuyman ricchacujtapis manchapacur chäpacujcuna pagas-junajpis jamaytasi mana taringachu. Ratataycaj ninačhu rupar, mana imaysi ushyacangachu.» ¹² Chaynuy caycaptin, Tayta Diosninchipa wawancuna llapan shungunwan ima ñacaytapis ičhipunman. Tayta Diosninchipa shiminta wiycunman. Jesúspa maquinchu cawanman.

* **14:4-5** Chay wican: «Warmin-warmin puricuj» ninanta Tayta Diosninchipa witicush runacunata ricsij. * **14:10** Griego rimaychu Tayta Diosninchipa ullguyninta juc cüpa bñuwyan tincuchij.

¹³ Chaypita janaj pachapita nimuran: «Wiyashayquita isquirbiy. Cananpita Tayta Jesúspa maquinčhu cawashanpita wañushcuna cushimačinman.» Espíritu Santupis au-nimuran: «Paycuna mana ñacangananachu. Wiyacushpan ima-imata rurar cawashanta Tayta Diosninchipis musyaraycan.»

¹⁴ Ricapacuynillächu jinalla ricapacuycarä. Runaman ricchacujtana ricarä. Yuraj pucutay janančhu juri curünash, afilash üsin aptash jamaraycämuran. ¹⁵ Mayllatana Tayta Diosninchipa wasinpita llucshiramur, juc anjil pucutay janančhu jamaraycajta jayarcur niran: «Rígu pugushana. Llapantana rutuy.» ¹⁶ Niptin, pucutay janančhu jamaraj runaman ricchacujga llapanta rutur, shuntaran.

¹⁷ Jinarcur janaj pachačhu Tayta Diosninchipa wasinpita juc anjilna afilash üsin aptash llucshiramuran. ¹⁸ Llucshimuptin, juc anjilna llucshimuran. Payga insinsuwan saumachinanpaj tullpa ninata waycupacuj anjil caran. Üsiyuj anjiltana jayacuran: «Übas pugushana. Afilash üsiquiwan llapanta pallay» nir. ¹⁹ Chaynuy niptin, anjil llapanta pallaran. Jinarcur japchinanpaj jatun učhcuman wiñarcur, lluchcaran. Tayta Diosninchita ullgüchishanpita lluchcaran. ²⁰ Marca wajtapi lluchcariptin, učhcupita yawar mayu čhayash-jinaraj sujta čunca (60) liwacaman aywaran.* Cawallupa shin-gawatuncamanraj čayaran.

15

Timpurij jishyata tacshimuj jančhis anjilcunapita rimashan

¹ Chaypita janaj pachaman ricar, mancharishcä. Tantiyayta mana atipashcächu. Jančhis anjilta ricarä. Anjilcunapa maquinčhu jančhis casta timpurij jishyacuna caycaran. Jančhis jishya runacunata ñiacachiptinraj, Tayta Diosninchipa ullguynin jasan-gapaj. ² Yacu püsuta-nirajtapis ricarä. Ichanga chip-chipyaycaj chuya yacu-jina ricacuran. Ninawan tallush caycaptin, achic-achicyaycaran. Yacu janančhu waräcuya ičhipujcuna ičhirpaycaran. Paycunaga waräcuytapis, waräcuymán ricchacujtapis mana manchapacuranchu. Waräcuya jutinwanpis mana chäpacuranchu. Chaypita Tayta Diosninchita jucta-caman arpata juran. ³ Paycuna Tayta Diosninchipa mandu-rurajnin Moisés unay cantashantapis, Uysha cantashantapis cantaycaran. Arpata tucapayllapa cantar niycaran:

«Taytallau Tayta, llapanpaj munayniyuj canqui.

Rurashayquiga llapanpis sumaj alli caycan.

Rurashayquita pipis mana ruranmanchu.

Maquiquičhu llapan runata purichinqui.

Pitapis allilla ricanqui.

Pitapis sumaj yanapanqui.

⁴ Tayta, llapan runa alliman čurashunquiman.

Llapan alličhu jurgushunquiman.

Juchaynaj cashpayqui alli cawayniquiman runa mana tincunchu.

Chaymi chay-tucuy marcacunapita sharcamur, manchapacushunquipaj.

Allillata rurar cawashayquita llapan runa ricasha.»

⁵ Jinarcur janaj pachaman ricäripti, Tayta Diosninchipa wasi rurin-caj puncu quičhacäcamuran. Wasiga purichina jiru čaqui wasin caran. ⁶ Ruri-caj cuartupitana jančhis anjilcuna llucshiramuran. Maquinčhu jančhis casta timpurij jishyacuna caycaran. Anjilcunapa müdanan achic-achicyaycaran. Jasgu wačhcunpis juripita caran.

⁷ Intiru janančhu ñawiyuj cawajcunana jančhis anjilcunata jucta-caman juripita tasunta juran. Tasunga Tayta Diosninchipa ullguyninman tincun. Payga imay-imaypis cawan.

⁸ Munayniyuj captin, manchapacuypa captin, wasintapis jushtay niticurcuranraj.

* **14:20** Pichga junaj, sujta junaj čaquillapa puriynuy yawar aywaran.

Chaymi pipis mana yaycuranchu. Jančhis anjilcuna purichishan jančhis timpurij jishya runacunata ñacachiptinraj, yaycuran.

16

¹ Chaypita wiapti, Tayta Diosninchipa wasinpita jančhis anjilcunata wiycächiypa nimuran: «Ayway. Llapanqui runacunata ñacachimuy. Tasunniqicunapita ullguynita runacunaman tacshimuy.»

² Chaymi juc anjil aywar pachaman tasunninta tacshiriptin, waräcuypa jutinwan chäpacush runacunata, waräcuymen ricchacujta manchapacujcunata juyu jiri charicurcuran. Jiriwan runacuna chigaypa ñacaran. Llapan runata ushyaran.

³ Juc anjilna tasunninta lamar yacucunaman tacshiriptin, wañush runapa tintish yawarninman ticraceriran. Yacučhu cawajcunapis llapallan wañuran.

⁴ Juc anjilna tasunninta tacshiran mayucunaman, yacupa ñawincunaman. Chay yacucunapis yawarman ticraceriran. ⁵ Jinarcur llapan yacucunata maquinčhu purichij anjil nimuran:

«Taytallau Tayta,
Cawajmi canqui.

Imaypis mana ushyacajmi canqui.

Juchaynaj cashpayqui alli cawayniquiman runa mana tincunchu.

Llapan runapa shungunta musyapanqui.

Juchata aparicushanpita ñacachir, allita ruranqui.

⁶ Chiqui runacuna wawayquicunatapis, willacujniqicunatapis wañuchisha.

Yawarnintapis mashtasha.

Quiquincunatana yawarta upuchishcanqui.

Aynin cutichinayqui camacasha.»

⁷ Tullpa wajtanpitana wiycächiypa nimuran:

«Taytallau Tayta, allita ruraycanqui.

Llapanpaj munayniuj canqui.

Rurashayquiga llapanpis sumaj alli.

Rurashayquita pipis mana ruranmanchu.

Runacunata juchanman-tupu ñacaycächinqui.»

⁸ Juc anjilna intiman tasunninta tacshiriptin, inti juyupa shanar runacunata ruparan. ⁹ Inti rupaptinsi, runacuna juchanpita mana wanacuranchu. Munayniuj Tayta Diosninchiasi mana manchapacuranchu. Manchäga timpurij jishyata cačhamushanpita ashllir ushyaran.

¹⁰ Juc anjilna waräcuypa marcanman, wasinman tasunninta tacshiriptin, waräcuypa wasinpis, marcanpis chacacäcuran. Runacuna alläpa ñacar, jalluntapis canicurcurushara.

¹¹ Chaypis jucha aparicuya mana cačhariranchu. Mana wanacuranchu. Manchä jiri ushyaptin nanaywan ñacar, Llapanta Camaj Tayta Diosninchita ashllir ushyaran.

¹² Juc anjilna Éufrates jatun mayuman tasunninta tacshiriptin, mayu chaquicäcuran. Chaymi inti llucshimunan marcacunapita murucucunapis mandajnintin čhayapunanpaj chapa mana caranchu. ¹³ Chaypita säpu-niraj quimsa supaycuna pugush curupa shiminpita, waräcuypa shiminpita, pantachicujpa shiminpita llucshiyämuran. ¹⁴ Shapshicucuna munayniuj car, imatapis ruraran runacunata riguichinanpaj. Llapan marcpa mandajnincunata shuntaran llapanpaj Munayniuj Tayta Diosninchawan maganacunanpaj. Llapan runapa juchanta jurgapunan junaj čhayamuptin, Tayta Diosninchita ičhipuya munanga.

¹⁵ Washäcu Jesú nimashanchita jungarunquiman. Pay nirunaj: «Sumaj tantiyacunquiman. Mana yarpashpita cutimushaj. Chaymi cushicärinquiman. Wiyacamajcuna allillata rurar, camaricushalla cawanman. Paycunata alli ñawinpa Tayta Diosninch

ricanga. Mana wiacamajcunatam ichanga pingayman churanga. Paycunata ricaytapis mana munangapishchu.»* ¹⁶ Chaura supaycuna marcapa mandajnincunata shuntaran «Harmaguedón» nishan pachačhu. Hebreo rimayčhu: «Harmaguedón» ninanga: «Meguido puntacuna» ninanmi.

¹⁷ Juc anjilna wayraman tasunninta tacshiriptin, Tayta Diosninchipa wasi rurin-pita, jamarashanpita wiyacächiypa nimuran: «Llapantapis charcushcäna.» ¹⁸ Niptin, räyu bunruruypa-bunrurur pashtamuran. Illagupis achicyaypa achicyaran. Pachapis juyupa sicsicyacurcuran. Cay pacha camashanpita-pacha imaypis mana tapsishan-jina tapsiran. ¹⁹ Babilonia runacuna juchačhu arushanpita Tayta Diosninchı ullgucäcuran. Juyupa ñacachiran. Marcanpis quimsaman račicäcuran. Marcacuna chay-tucuyčhu jučhur ushyacaran. ²⁰ Islacunapis, puntacunapis illaricäcuran. ²¹ Runtu tamyapis juyupa tamyamuran. Runtuga chuscu arüba-yupay lasaran. Runtu tamya runaman shicwamuptin, chigaypa ñacachiptin, runacuna Tayta Diosninchita ashllir ushyaran.

17

Babilonia runacunapa juchanta jurgapashan

¹ Chaypita jucnинна tasun aptaraj anjil ñaupäman sharcamur, nimaran: «Runan-runan puricuj warmita, mayu tincujčhu tiyajtaga, Tayta Diosninchı ñacachinga. Mä, ricäcamushun. ² Chay warmi llapan auturdäcunata chasquiräcusha. Runan-runan cacushan jillaywan auturdäcunata shincachisha. Chay-jina llapan runacunatapis maquichacusha.»

³ Jinalla ricapacuynilläčhu Espíritu Santu ricapacachimaptin, chunyaj pacha quinran-man anjil pushamaran. Chayčhu warmita ricarä. Warmiga jančhis umayuj, chunca wajrayuj puca waräcuya wicheraycaran. Waräcuya janančhu Tayta Diosninchita ashllir pampaman churar, ima rimaycunapis isquirbiraycaran. ⁴ Warmipa müdanan ratariycaj pucawan yawar puca caran. Piñincuna juripita, achic-achicyaycaj ruminapita caran. Juri cüpatapis aptaraycaran. Cüpačhu asyajcunawan runan-runan purishan janracuna wiñaraycaran. ⁵ Urcunčhüna quiquinpa jutin tincuchiyllapa isquirbiraycaran: «Jatun marca Babilonia caycä.

Runan-runan puricujcunapa maman caycä.

Juchallačhu arujcunapa, asyajcunapa maman caycä.

Cay pachačhu pipis mana aypämanchu» nir.

⁶ Ricapaycashäčhu warmi mačhash caycashanta tantiyacurishcä. Jesúspa shiminta wiyacujcunapa yawarninwan mačhash caycaran. Wiyacujcunataga Jesúspa maquil-lančhu cawashanpita wañuchish caran. Chaycunata ricar, juyupa mancharicäcurä.

⁷ Chaura tantiyayta mana atipapti, anjil nimaran: «¿Imanirtaj mancharinqui? Cananga waräcuya wicheraycaj warmi imaman tincushantapis, jančhis umayuj, chunca wajrayuj waräcuy imaman tincushantapis tantiyachishayqui. ⁸ Ricashayqui waräcuy cawaycaran. Ichanga mana cawannachu. Chaypis chacaj pachapita llucshimur, ushyacayman chayangapaj. Ricarimushanta ricar, llapan runa mancharinga; ichanga mana llapanchu. Manchäga unay-unaypita-pacha Tayta Diosninchipa acta librunčhu jutincuna mana apuntaraj runacunalla mancharinga. Waräcuy unayna cawaycarsi, mana cawannachu. Chaypis yapay ricarimungapaj.

⁹ «Mayganiquipis yarpayniyuj car, pipaj rimashätapis tantiyacunquipaj. Waräcuy wicheraycaj warmi juc marcawan tincun. Chay marca jančhis puntayuj car, jančhis umamanpis tincun. Jančhis mandajcunamanpis tincun. ¹⁰ Pichgaj mandajcuna mayna wañucusha. Jucna mandaycanna. Juc-caj mandajmi ichanga cargunman mana

* ^{16:15} Tincuchiypa rimar, griego rimayčhu müdanayyupäpis, jalapačhalla purijpäpis riman.

́chayanrächu. ́Chayarpis, yupash watalla mandangapaj. ¹¹ Puca waräcuya mayna mandaran. Chaypis mandaj-masincuna wañuptin, yapay ricarimunga. Mandaj caymanpis ́chayangapaj. Chaypis ushyaypa illaringapaj.

¹² «́Chunca wajracuna ́chunca mandajcunawan tincun. Paycunam ichanga cargunta mana ́chasquinrächu. Cargunta ́chasquirpis, yupash junajlla waräcuya mandäshingapaj.

¹³ Llapanpis juc yarpaylla waräcuya shungun munashanta ruranga. Llapan shungunwan, llapan callpanwan yanapänacunga. ¹⁴ Mandajcuna waräcuy-ima Uyshata ticrapunga. Uysham ichanga llapanta ičhipunga. Paymi mandajcunapa mandajnin, auturdäcunapa mandajnin. Maquinčhu cawan jatun mandajcunapis, tacsha mandajcunapis. Uysha ičhipuptin, Jesúspa shiminta ́chasquicuj runacunapis allíčhu llucshinga. Paycuna Tayta Diosninchipa shungun munashannylla cawan. Jayachish captin, maquinčhu cawan. Quiquin acracusha.»

¹⁵ Jananmanpis anjil nimaran: «Runan-runan cacuj warmi jamarashančhu tincuj mayucunaga chay-tucuy marcacunawan, achcaj runawan tincun. Chay runacuna chay-tucuy marcacunačhu tiyan. Juc-niraj-juc-niraj rimaycunatapis riman. ¹⁶ Runan-runan cacuj warmita chiquir ́chunca mandajcunapis, waräcuypis ticrapunga. Warmiman tincuj marcata ́chayapur, imancunatapis jičhunga. Jalapačhallata jaguiycunga. Aychantapis waquinta micunga. Waquintana ushyaypa ruparachinga. ¹⁷ Chaynuy cananta Tayta Diosninchipa camacächisha. ́Chunca mandajcuna waräcuya yanapänanpäpis shacyächisha. Tayta Diosninchipa shiminta willapäcushan-jina ́charcuptinraj, llapan shungunwan mandajcuna waräcuya wiyclunga. ¹⁸ Puca waräcuya wicheraycaj warmiga jatun-caray marcawan tincun. May-chayčhu tiyarpis, llapan mandajcuna paypa maquinčhu purin.»

18

Babilonia marca ushyacashan

¹ Ricapacuynilläčhu ricapacuycaptillä, janaj pachapita achic-achicyaycar munayniuj anjil yarpaycämuran. Sumaj achicyaptin, cay pachapis intüri achicyacurcuran. ² Cushicur, japariypa anjil niran:

«Babilonia marca ushyacärunna.

Jatun marca carpis, chunyajna.

Supaycunalla tiyaycan.

Shapshicucunapa mačhayninman ́chayasha.

Janra siucacunapis, tucucunapis chayčhu purin.

Asyaj uywacunapis wasichacusha.

³ Babilonia marcapa mandajnin warmi llapan runata maquinčhu charar, juchallačhu purichiran.

Mačhashta-jina cawahiran.

Majanta jananpachij-jina marcapa mandajnin warmillata mamachacuran.*

Chay-tucuy marca mandajcunapis paywan cacuran.

Marcapa mandajnin puchuy-puchuy janančhu cawaptin, rantipacujcunapis ríçuyaran.»

⁴ Chaypita jucna janaj pachapita wiyclachiypa nimuran:

«Wawacuna, chay marcapita witicäriy.

Juchačhu arujcunawan ama talluranquimanchu.

Timpurij jishya jamcunaman ama ́chayamunmanchu.

⁵ Mana wiyclujcuna juchallan atipay caycan.

Tayta Diosninchipis ricashana.

Chay-chica juchata aparicushanta Tayta Diosninchipa musyaraycan.

* **18:3** Tayta Diosninchipita witicujcunata majanta jananpachicujwan tincuchin.

⁶ Jucha aparicushanman-tupu ñacayman ́hayachun.

Runacunata ñacachishan-jina juyupana ñacachun.

Jucta ñacachishanpita chigaypa ñacachun.

⁷ Alli-tucushanpita chigaypa ñacachun.

Llaparpa janančhu cawashanpita pasaypa ushyapacächun.

Mandaj warmi yarpaj: «Llapan runata maquičhu puriycächi.

Jucpa maquinčhu mana imaypis purishächu.

Biyüda cayman mana imaypis ́hayashächu.

Llaquicuymapis mana ́hayashächu» nir.

⁸ Chay-niraj cashanpita timpurij jishyacuna ́hayapunga.

Illajpita yargaypis, ñacaypis, wañuypis ́hayapunga.

Nina llapanta ushyanga.

Tayta Diosnillanchi munayniyuj. Paymi juchanta jurgapar, ñacachinga.»

⁹ Babilonia marcačhu nina ičhicurcuptinmi ichanga, llapan marcapa mandajnincuna llaquicuywan atar ninga: «¿Piwanraj cacushaj? Silluta manačhi micushänachu.» Paycuna Tayta Diosninchita mana manchapacuranchu. Manchäga shungun munashallanta imatapis ruraran. ¹⁰ Chaura Babilonia marcata ñacachiptin, mancharinga. Carullapita ricar, wiguinpawanraj atanga:

«Babiloniallau Babilonia,

Jatun marca carsi, ushyacayman ́hayashcanqui.

Mana yarpashpita ñacayman ́hayashcanqui» nir.

¹¹ Babilonia marca mana captin, llapan rantipacujcunapis: «¿Piraj rantimäshun?» nir wiguinpawan atangapaj. ¹² Purichishan juricunata, jillacunata, achic-achicyaj rumicunata pipis mana rantinganachu. Chaynuypis bayitacunatapis, müdanacunatapis finu captinsi, achic-achicyaycaptinsi mana rantinganachu. Pirjumi jirucunata, tullupita piñicunata, alli jirucunata, brunsicunata, jirucunata, ¹³ canilacunata, pirjümicunata, bïncunata, wiracunata, ñuchgu mačhcacunata, rïgucunata, uywacunata, uyshacunata, cawallucunata, cărucunata, shutirächishan runacunata pipis mana rantinganachu. Uywata-jina runata mana rantinganachu. ¹⁴ Chaymi marca runacunata rantipacujcuna ninga:

«Cananga silluta mana micunquipänachu.

Shunguyqui munashanta mana tarinquipänachu.

Alli cawayniquipis ushyacashana.

Llapan jillacunata ushyacashana.»

¹⁵ Rantipacujcuna imancunatapis Babilonia marcačhu ranticur, rïcuyaran. Marca ushyapacaptinmi ichanga, mancharinga. Atar, aullar, carullapita jayacunga:

¹⁶ «Babiloniallau Babilonia, jatun marca caran.

Jatun marca carsi, pishipacuymán ́hayasha.

Ñaupata mandaj car, achic-achicyaycaj puca müdanashalla purisha.

Jillay piñicunawan achic-achicyaycaj rumicuna piñishalla cuyayllapaj purisha. ¹⁷ Chaypis mana yarpashpita ushyapacayman ́hayasha.»

Babilonia marca ratariptin, büti mayur purichijcunapis, büti purichijcunapis, bütiwan purijcunapis, rantipacujcunapis carullapita ricapanga. ¹⁸ Jushtay ičhicurcuptin, juyupa mancharinga. Jayacuringa:

«Babilonia marca runacuna puchuy-puchuy janančhu cawasha.

Chay marcaman maygan marcapis mana tincushachu» nir.

¹⁹ Llaquicushpan umancunamanpis učhpata wiñacunga. Atar wagangapaj:

«Marcallau marca, jatun marca caran.

Jatun marca carsi, ushyacayman ́hayasha.

Bütiyucunapis, rantipacujcunapis jillacunata rïcuyasha.

Chaypis mana yarpashpita ushyapacayman ́hayasha.»

²⁰ «Janaj pachachu llapaniqui jatunpa cushima-rinquiiman.

Tayta Diosninchipa wawancunapis, cachancunapis, shiminta willacujcunapis cushima-rinquiiman.

Ñacachishushayquiman-tupu Tayta Diosninchipis ñacachishana» nir.

²¹ Chaura munayniyuj anjil jatun rumita lamar yacuman wicaparamur niran:

«Rumita wicaparishä-jina Babilonia marcata-pis wicaparish cangapaj.

Tayta Diosninchipa wicapaptin, illaringapaj.

Pisi mana imaypis ricangapänachu.

²² Chay marcačhu mana pipis tünapacunganachu.

Arpapis, pincullupis, curnitapis mana suynamunganachu.

Arujcunapis mana canganachu.

Mačhcatapis mana pipis aganganachu.

²³ Achquitasi pipis mana ratachinganachu.

Warmi ashiypis mana canganachu.

Babilonia marca rantipacujcuna sumaj rícu-yaran.

May-chaychüpis chapata rurar, runacunata riguichiran.

²⁴ Babilonia marcačhu Tayta Diosninchipa shiminta willacujcunatapis, wawancunatapis wañuchir, yawarnintapis mashtaran. May-chaychüpis runacunata wañuchiran. Chaynuy cashanpita ushyacayman ́hayangapaj.»

19

Janaj pachačhu cushima-cushan

¹ Chaypita achcajna janaj pachačhu llapan shungunwan cantar, nimuran:

«Cushima-cushan,

Tayta Diosninchita alliman ́churayculla-shun.

Payga washämajninchia.

Paylla munayniyuj.

Chaymi Tayta Diosninchita alliman ́churayculla-shun.

² Payga llapan runapa shungunta musyapan.

Juchaynajcunata washan.

Juchayujcunata ichanga ñacachin.

Runan-runan cacuj warmitapis Babilonia marcantinta ushyasha.

Chay-tucuyčhu runacunata pingacuyninwan juchacachishanpita illarachisha.

Tayta Diosninchipa wawancunata wañuchishanpitapis ñacayman jitapusha.»

³ Yapayna janaj pachapita callpaycur nimuran:

«Cushima-cushan,

Tayta Diosninchita alliman ́churayculla-shun.

Juyu marcata illarachisha.

Rupaptin, mana ́chawaypa jushtaypis ičhiringa.»

⁴ Ishcay ́chunca ́chuscuwan (24) mayur runacunapis, ́chuscu cawajcunapis jungurpacuy-cur, Tayta Diosninchita alliman ́churaran:

«Chaynuy cayculla-chun.

Cushima-cushan,

Tayta Diosninchita alliman ́churayculla-shun» nir.

⁵ Tayta Diosninchipa ñaupanpitana nimuran:

«Shiminta ́chasquicujcuna llap-llapanmi Tayta Diosninchita alliman ́churayculla-chun.

Manchapacujcuna pi carpis, llap-llapanmi alliman ́churayculla-chun.»

⁶ Chaypita räyu-jinaraj, ́chayash mayu-jinaraj, achcaj runa rimashan-jinaraj wiycaran. Wiyapti, nimuran:

«Cushiculläshun.
 Tayta Diosninchita alliman čhurayculläshun.
 Payga llapan runata maquinčhüna purichin.
 Llapapanpaj munayniyuj.

⁷ Llapanchi cusicärishun.
 Llapan shungunchiwan cusicärishun.
 Payta alliman čhurayculläshun.
 Majachacay junaj čhayamushana.
 Uyshaga majachacaj müsuwan tincun.
 Shiminta čhasquicucunana majachacaj jipashwan tincun.
 Paycunaga ricaj-ricajlla shuyarpaycan.
 Parlay-masinta müsu apacushan-jina Uyshapis maquinčhu cawanapaj shuntacunga.

⁸ Shiminta čhasquicucunata yuraj müdanash achic-achicyaycar shuyarānanpaj Tayta Dios-ninchi yanapaycan.
 Manchapacur shungun munashallanta rurashanpita yuraj müdanashta alli ricashan-jina Tayta Diosninchipis alli ñawinpa ricaycan.»

⁹ Chaypita anjil nimaran: «Llapan wiyashayquita apuntay. Maquinčhu cawanapaj Washäcu Uysha shuntaptin, jatunpa runacuna cusicäringa. Parlay-masinta müsu cushima shuntashan-jina wawancunata Uysha shuntanga.»

Jananmanpis anjil nimaran: «Willashajta quiquin Tayta Diosninchi willamasha.»

¹⁰ Nimaptin, jungurpacuycur manchapacurä. Anjilmi ichanga nimaran: «Ama manchapacamaychu. Ama jungurpacuychu. Tayta Diosnillanchita alliman čhurashun. Jesúspa shiminta čhasquicuj-masiquicuna-jina, jam-jina, nuwapis Tayta Diosninchipa maquinčhu cawä. Jesús shacyächiptinraj, willacujcuna shimintapis musyachin. Shiminta čhasquicur, musyachicuycanqui.»

Llapanta ičhipupita rimashan

¹¹ Chaypita janaj pachapa puncun quičharaycamuja ricarä. Yuraj cawallu muntaraj-tapis ricarä. Muntarajpa jutin caran: «Tayta Diosninchipa shiminta willacuj. Llapanta čharcuj.» Payga mandaj carpis, magacuyman aywarpis, allillata ruran. ¹² Paypa ñawin nina-jinaraj ratataypa rataycaran. Umančhu chay-chica curünata ushturaycaran. Jutinpis janančhu isquirbiraycaran. Ichanga isquirbishanta quiquillan pashtachij.

¹³ Müdanan yawarlla shututaycaran. Payta ricsiran: «Tayta Diosninchipa shimin» nir. ¹⁴ Chay-chicaj murucucunapis yuraj cawallunta muntacurcur jatipämuran. Yuraj müdanancunapis achic-achicyaycaran. ¹⁵ Yuraj cawallu muntarajpa shiminpitä ish-canläpa afiflash cuchillu llucshiraycämuran. Llapan marcata ičhipur maquinčhu purichir, jíru garutinwan ñacachinga. Llapapanpaj Munayniyuj Tayta Diosninchita ullgütchishanpita übasta japhishan-jina runacunata ñacachinga. ¹⁶ Racu čhanca müdanan janančhu isquirbiraycaran:

«Mandajcunapa mandajnin caycä.

Auturdäcunapa mandajnin caycä» nir.

¹⁷ Chaypita inti janančhu juc anjil ičhiraycajta ricarä. Paymi aycha micuj cundurcunata, ancacunata, siucacunata jayacuran: «Llapallayqui shacallämuy. Tayta Diosninchipa sumaj camarishan micuyta micunayquipaj jutucäriy. ¹⁸ Tucuy-niraj runapa aychanta micunquipaj. Jatun auturdäcunapa aychanta, capitancunapa aychanta, murucucunapa aychanta, cawallucunapa aychanta, cawallun muntaraj murucucunapa aychanta micunquipaj. Runata uyway captinpis, pugush captinpis, mana alli ricash captinpis, alli ricash captinpis, llapapanpa aychanta micunquipaj» nir.

¹⁹ Chaura ricaycapti, waräcuypis, jatun mandajcunapis murucuncunawan-caman shuntacaran yuraj cawallu muntarajtawan yuraj müdanash murucuncunata maganapaj. ²⁰ Yuraj cawallu muntarajmi ichanga rísu charircur cawaycajta asujriyuj

ninaman waräcuytapis, pantachicuj willacujtapis jitarpuycuran. Pantachicujga imatapis rurar, tucuy-jinanpa runacunata riguichiran. Waräcuya manchapacunantapis, waräcuyman ricchacuja manchapacunantapis munaran. Pipis auniptin, waräcuya jutinwan chäpash caran. ²¹ Chaura yuraj cawallu muntarajga jatun mandajcunatapis murucuntinta wañuchir ushyaran. Shiminpita llucshimuj cuchilluwan cuchuypa ushyaran. Jinarcu llapanpa aychanta aycha micuj cundurcunata, ancacunata, siucacunata jararan. Paycunana sachsashancaman micupäcuran.

20

Waranga watapita rimashan

¹ Chaypita ricäripti, janaj pachapita juc anjil racu cadinan aptash, chacaj pachapa lläbin aptash yarpuycämuran. ² Pugush curuta charircur, cadinawan wataran. Pugush curu «Satanás» nishan Supaymi. Paytaga waranga (1,000) watacaman wataycuran. ³ Pitapis mana pantachinanpaj chacaj pachaman wiçhgaycuran. Puncuta wiçhgarcur, lläbircuran. Waranga wata ñharcuptinraj, ichicllata puripacunapaj caçharinga.

⁴ Mandajcunapa jamanancunatapis ricarä. Jamanancunaman Washäcu Jesústa mandäshijcuna jamacaycäriran. Chaynuypis waquin wañuya taríjcunata ricarä. Paycunapa umanta rugush caran Jesúspa shiminta ñhasquicushanpita, Tayta Diosninchipa shiminta wiycushanpita. Paycunaga waräcuytapis, waräcuyman ricchacujtapis mana manchapacuranchu. Maquinman, urcunman mana chäpacuranchu. Paycunata Tayta Diosninchchi cawarachimuptin, waranga (1,000) wata Washäcu Jesústa mandäshiran. ⁵ Waquin wañushcunam ichanga mana cawarimungachu waranga wata ñharcushancaman. Chaypitaj cawarimunga.

⁶ Puntata cawarijcuna sumaj cushicärinman. Paycunaga Tayta Diosninchipa acracuyninmi. Maquillanchu cawanga. Wañuyman yapay mana cuttinganachu. Manchäga cüra cayman ñhuraptin, Tayta Diosninchipa shungun munashallanta, Washäcu Jesúspa shungun munashallanta ruranga. Cay pachačhu waranga (1,000) wata Jesústa mandäshinga.

⁷ Waranga wata ñharcuptinna, wiçhgaraycächishanpita Supayta caçharinga. ⁸ Supayna chay-tucuypa purir, alli rimaj tumpaylla llapan runacunata pantachinga. «Gog» nishan quinranpitapis, «Magog» nishan quinranpitapis may-may murucucunata shuntanga Tayta Diosninchita magananpaj.* Juyu murucucunata agu-jina chay-chicaj captin, yupaytasi mana atipangachu. ⁹ Murucucunaga chay-tucuypita sharcamur, Tayta Diosninchipa wawancunata, cuyashan marcata yaycapuran. Chaypis janaj pachapita nina tamya tamyamur, juyu murucucunata rupaypa ushyaran. ¹⁰ Chaypita asujriyuj ratataycaj ninaman pantachicuj supayta jitarpuycuran. Chayllačhu waräcuyjis, pantachicuj willacujpis caycaran. Paycuna pagas-junajta ñacanga. Mana imaysi llucshinganachu.

¹¹ Chaypita jatun-caray yuraj jamananchu jamaraycajta ricarä.* Jamaraycajta manchacur, janaj pachapis, cay pachapis jishpicuran. Illaricäcuran. ¹² Jinarcu wañushcunata ricarä. Mayur runa carsi, lluta runa carsi, llap-llapanmi mandajpa jamanan ñaupanchu ičhirpaycaran. Jamanan ñaupanchu acta librucunapis quičharaycaran. Juc acta librupis quičharaycaran. Chay libruchi Tayta Diosninchipa maquinchu cawajcunapa jutincuna isquirbiraran. Waquin librucunačhu wañushcuna allita, mana allita rurar cawashanpis isquirbiraran. Tayta Diosninchina llapan wañushcunata tapuparan ima-imata rurar cawashantapis. ¹³ Yacučhu wañushcunatapis, pamparashcunatapis, chacaj pachapita llucshimujcunatapis Tayta Diosninchchi llap-llapanta tapuparan ima-imata rurar cawashantapis. ¹⁴⁻¹⁵ Wañuytawan chacaj pachatapis Tayta Diosninchipa shiminta mana ñhasquicujnintinta ninaman jaycuriran. Ishcay cutipana wañuyman

* **20:8** Ezequiel 38-39 * **20:11** «Jatun-caray yuraj jamananchu jamaraycaj» ninanta tantiyan quiquin Tayta Diosninchipaj.

Chayaran. Jipataraj wañuyman chayajcunaga ninačhu ushyacaran. Paycunapa jutinta Tayta Diosninchipa acta librunčhu mana tariranchu. Chay actačhu imay-imaycamanpis cawajcunapa jutincunalla isquirbiraycaran.

21

Mushuj cawaypita rimashan

¹ Chaypita cay pachatapis, janaj pachatapis mushujta ricarä. Ricashanchi pachapis, ricashanchi janaj pachapis mayna illaricäcuran. Lamar yacupis mana carannachu.

² Tayta Diosninchipa achic-achicyaycaj marcantana ricarä. Marcanga mushuj Jerusalén marca caran. Janaj pachapita majachacänanpaj rucapäcush jipash-jina yarpuycämuran.

³ Mandajpa jamanan ñaupanpita sumaj wiycächiyipa nimuran:

«Tayta Diosninchipa wasin caychüna canga.

Wawancunawan cawanga.

Maquinčhu paycuna puringa.

Tayta Diosnin cashpan mana cačharingachu.

⁴ Shacyächiptin, wawancuna imaypis mana llaquicunganachu.

Mana wañunganachu.

Mana wañupacunganachu.

Mana waganganachu.

Mana ñacanganachu.

Chaynuy caway ushyacäcushana.»

⁵ Mandajpa jamanančhu jamarajna nimuran: «Llapantapis mushujman ticrachi. Rimashäcuna rasun-caj. Llapanpis charcucanga. Chaymi rimashäcunata isquirbiy.»

⁶ Jinarcur nimaran: «Yarpashäta llapanta charcushcä. Nuwaga imay-imaypis cawaycä. Imaypis mana ushyacashächu. Llap-llapantapis camacächij cä. Chaymi pisi imay-imaycamanpis cawayta munar, nuwaman shamuchun. Cawachicuj yacuta cushishalla tarichishaj. ⁷ Jucha aparicuya ičhipujcunata irinsanta raquipushaj. Paycuna Taytachacamanga. Nuwapis wamrachacushaj maquičhu cawananpaj. ⁸ Jucha aparicuya mana ičhipujcunatam ichanga ratataycaj ninaman jaycurishaj. Llapan shimita mana wiycujcuna, marca-pingay cawajcuna, wañuchicujcuna, pi-maywanpis cacujcuna, musyapacujcuna, jirca jarajcuna, llullacujcuna ninačhu ushyacanga. Chay-nirajcunata asujriyuj ratataycaj ninaman jitarpushaj. Ishcay cutipana wañuyman chayanga.»

Mushuj Jerusalén marcapita rimashan

⁹ Chaypita timpurij jishyawan tasunta charaj jančhis anjilcunapita jucnин nimuran: «Mä, shamuy. Uyshapa shiminta chasquicuj runacunata ricachishayqui. Parlay-masinta müsu llaquipashan-jina Uyshapis shiminta chasquicujcunata llaquipan.» ¹⁰ Espíritu Santupa maquinčhu cashpä ricapacuynilläčhu jatun puntamanna anjil pushamaran.

Tayta Diosninchipa Jerusalén marcanta ricachimaran. Janaj pachapita, Tayta Diosninchipa ñaupanpita yarpuycämuran. ¹¹ Tayta Diosninchipa achic-achicyaycaj, marca chillap-chillapyaycaran. Juri-jina, ispiju-jina achic-achicyaycan. ¹² Marcataga jatun sawan tumaparaycaran. Sawanpa puncuncunapis chunca ishcaywan caran. Juc puncupicaman juc anjil täpaycaran. Puncuncunaga jutiyuj-camalla caran. Israelpa chunca ishcaywan wamrancunapa jutinta aparan. ¹³ Quimsa puncu caran jana-caj lädupa, quimsana ura-caj lädupa, quimsana diricha-caj lädupa, quimsana isquirda-caj lädupa.

¹⁴ Sawantaga chunca ishcaywan rumicuna tuncaraycaran. Rumicunačhu juc-caman Uyshapa chunca ishcaywan cačhancunapa jutin isquirbiraycaran.

¹⁵ Parlapämaj anjilna juri bärawan marcata, sawanta, puncuncunata tupuran.

¹⁶ Tupuptin, marcapa altunpis, anchunpis, largunpis chuscu pačhac chuscu chunca

čhuscuwan (444) lïwa caran.* Juc tupuylla caran. ¹⁷ Sawanpa altunta tupuptin, sujta čunca pichgawan (65) mitru caran. Runa tantiyashan bärawan anjil llapanta tupuran.

¹⁸ Sawanga achicyaj rumiwan pírgash caran. Marcana jurillapita caran. Lüna-jina ricacaptin, llap-llapan ricacaran. ¹⁹ Čunca ishcaywan achic-achicyaj rúmicuna sawanta tuncaraycaran. Juc rumi caran jasaj birdi, jucna asul, jucna báyu, jucna ratariycaj birdi, ²⁰ jucna puca shuyu, jucna yawar puca, jucna jarwash, jucna asul birdi, jucna ratariycaj jarwash, jucna chacaj birdi, jucna murädu, jucna rusilla.* ²¹ Sawanpa puncuncunapis juc achic-achicyaycaj rumipita-camalla caran. Jatun cällipis jurillapita caran. Lüna-jina ricacaptin, llap-llapan ricacaran.

²² Marcata ricapti, Tayta Diosninchipa wasin mana carannachu. Manchäga llapanpaj Munayniuj Tayta Diosninchawan Uysha llapanpa ricay ñawinéhu caycaran. Quiquin-cunawan tincuj pipis aywanga. ²³ Mushuj marca achicyänanpäpis intiwan quilla mana caranchu. Manchäga munayniuj cashpan Tayta Diosninchita achicyan. Uyshapis achicyan. ²⁴ Tayta Diosninchipa marcan achicyashallanwan llapan runacuna cawanga. Llapan marcpa mandajnincunana allinninta apamunga Tayta Diosninchita jaranan-paj. ²⁵ Mana imaypis chacaptin, marcpa puncuncunapis imaysi mana wičhgarangachu. ²⁶ Runacunapis chay-tucuypta llapan ima-aycancunata allinninta Tayta Diosninchipa ñaupanman jutunga. ²⁷ Manacajcunatam ichanga mana yaycuchingachu. Marca-pingay cawajcunawan pantachicujcuna mana yaycungapishchu. Manchäga Uyshapa acta li-brunéhu jutincuna apuntarajcunalla yaycunga. Paycunaga imaycamanpis cawangapaj.

22

¹ Chaypita cawachicuj chuya mayuta anjil ricachimaran. Tayta Diosninchita jama-rashanpita, Uysha jamarashanpita pashtaycämuran. ² Marcpa jatun cälli čhaupinpa aywaycaran. Mayu cantuncunačhu cawachicuj yüracuna ičhirpaycaran. Quillaman-quillaman wayur, watačhu čunca ishcaywan cuti wayuran. Üjancunapis jampi caran llapan runapaj. ³ Mana juju ñawinpanachu wawancunatapis, imacunatapis Tayta Dios-ninchita ricanga. Manchäga Tayta Diosninchispis, Uyshapis jamanallanéhu jamanga. Lla-pan wawancuna manchapacunga. ⁴ Tayta Diosninchipa ñaupanéhu cawar, quiquinwan tincunga. Urcunéhu-caman Tayta Diosninchipa jutinpis chäparanga. ⁵ Pachapis mana chacanganachu. Tayta Diosninchita achicyapaptin, intipis, ima achquipis mana pishin-ganachu. Wawancunana Tayta Diosninchawan, Uyshawan imaycamanpis mandanga.

Washäcuj Jesús cutimunanpita willapashan

⁶ Chaypita anjil nimaran: «Rasullanta willashcaj. Llapanta čharcunga. Shiminta willacu-jcunata shungun yarpashanta Tayta Diosninchchi musyachin. Cananga jamcunata willaj cačhamasha. Llapan camacächishanta čharcungapaj. Mana aycällatana ricashunpaj. ⁷ Jesúsnan nin: «Sumaj wiyacuy. Shaycamüna. Cay libru rimashanta čhasquicucunata Tayta Diosninchchi yanapanga. Chaymi cushicärinquiman.» »

⁸ Nuwa Juan, llapanta wiyashcä. Ricashcä. Llapanta wiyarpis, ricarpis, rica-pacachimaj anjilta manchapacunápaj jungurpacuycurä. ⁹ Anjilna nimaran: «Ama manchapacamaychu. Ama jungurparaychu. Quiquin Tayta Diosninchita mancha-pacuy. Paypa maquinéhu willacuj-masiquicunapis, cay libru rimashanta wiyacujcu-napis, nuwanchipis cawanchi.»

¹⁰ Jananmanpis nimaran: «Willapashajcunata ama pacarächinquichu. Manchäga libru rimashanta llapan runata tantiyachinqui. Llapantipis manasi aycällatana čharcucangapaj.

¹¹ Chaymi juchallačhu aruyta munar, pipis juchallačhu arucuchun. Pingayéhu cawayta munar, pipis pingayllačhu cawacuchun. Tayta Diosninchipa shungun munashanta

* **21:16** 444 lïwa 2,200 kilümitruwan tincun. * **21:20** Griego rimayéhu rumipa culur jutincuna isquirbiraycan.

rurajcunam ichanga allillata ruranman. Tayta Diosninchipa maquinchú cawajcuna sumaj wiyacur cawanman.»

¹² Jesúsnan nin: «Sumaj wiyacuy. Shaycamüna. Llapan runapa shungunta musyapä. Imanuy-imanuy cawashanpita llapanpis čhasquinga. ¹³ Nuwallam imay-imaypis cawacuj cä. Imaypis mana ushyacashächu. Llap-llapantapis camacächij cä. Nuwallapita llapanpis jallarisha. Nuwallapita llapanpis ushyacanga.

¹⁴ «Müdanata tacshaj-yupay runapis juchanpita mayllash captin, Tayta Diosninchí camacächinga mushuj marcaman yaycunanpaj, imaycamanpis cawachicuj yürapa wayuyninta micunananpaj. Chaypitam paycuna cushish cawanga. ¹⁵ Allgu-jina juchačhu aruj runacunatam ichanga marcaman mana yaycuchingachu. Chaynuypis musyapacujcunata, jirca jarajcunata, jucwan-jucwan puricujcunata, wañuchijcunata, jircacunata manchapacujcunata, alli shimillanpa pantachicujcunata mana yaycuchingachu.

¹⁶ «Nuwaga Jesúsmi caycä. Anjilniña cačhamushcä jutuaj irmänucunata shimiña musyachinanpaj. Unay mandaj Davidpa castallanpita yurishcä. Paypa willcan caycä. Waraj istrilla-jina alli willapata apamushcä.»

¹⁷ Espíritu Santupis, llapan irmänucunapis nin: «Tayta Jesús, shamuyna.»

Wiyajcunapis llapaniqui ninquiman: «Shamuyna, Tayta.»

Yacunaywan wañur, Tayta Diosninchita mañacunquiman. Payga cawachicuj yacuta cushishalla tarichishunqui.

¹⁸ Tayta Diosninchí camacächinanta sumaj tantiyacärinquiman. Cay libru rimashanman pipis shungun yarpashanta yapaptin, jančhis casta timpurij jishyawan Tayta Diosninchí ñacachinga. Timpurij jishyapita cay libručhu isquirbiraycan. ¹⁹ Cay libru rimashanpita imatapis pacaptin, ñaupanman pitapis Tayta Diosninchí mana čhayachingachu. Cay libru rimashannylla marcanman mana yaycuchingachu. Cawachicuj yürapa wayuynintapis mana micuchingachu.

²⁰ Caycunata musyachicurna, Jesús nin: «Manasi aycällatana shaycamü.»

Chaura nuwapis nü: «Chaynu caycullächun. Tayta Jesús, shamuyna, ari.»

²¹ Chayllata willapärij. Llaquipäcuj Tayta Jesús llapaniquita yanapayculläshunqui, ari.